

清
實
錄

高宗純皇帝實錄(四)

卷二二二至卷三〇五
乾隆十年至十二年

清實錄

第二冊

中華書局影印

清 實 錄

(第 一 二 冊)

高 宗 實 錄 (四)

•

中 華 書 局 出 版

(北京王府井大街36號)

北京市中國書店發行

中國建築工業出版社印刷廠印刷

•

787 × 1092 毫米 1/16 • 631/8 印張

1985 年 12 月第 1 版 1985 年 12 月北京第 1 次印刷

印數 0,001 — 1,500 冊

統一書號: 11018 • 1355—12 定價: 47.00 元

清實錄第一二冊目錄

高宗純皇帝實錄(四)

卷二二二	乾隆十年正月上	一
卷二二三	乾隆十年正月下	八
卷二二四	乾隆十年二月上	一八
卷二二五	乾隆十年二月下	二六
卷二二六	乾隆十年三月上	三七
卷二二七	乾隆十年三月下	四七
卷二二八	乾隆十年四月上	五八
卷二二九	乾隆十年四月下	六八
卷二四〇	乾隆十年五月上	八九
卷二四一	乾隆十年五月下	一〇一
卷二四二	乾隆十年六月上	一二六
卷二四三	乾隆十年六月下	一三三
卷二四四	乾隆十年七月上	一四八
卷二四五	乾隆十年七月下	一五八
卷二四六	乾隆十年八月上	一七四

卷二四七	乾隆十年八月下	一八四
卷二四八	乾隆十年九月上	一九六
卷二四九	乾隆十年九月下	二〇四
卷二五〇	乾隆十年十月上	二二一
卷二五一	乾隆十年十月下	二三六
卷二五二	乾隆十年十一月上	二五〇
卷二五三	乾隆十年十一月下	二六八
卷二五四	乾隆十年十二月上	二八二
卷二五五	乾隆十年十二月下	二九七
卷二五六	乾隆十一年正月上	三一六
卷二五七	乾隆十一年正月下	三二二
卷二五八	乾隆十一年二月上	三三四
卷二五九	乾隆十一年二月下	三四二
卷二六〇	乾隆十一年三月上	三六三
卷二六一	乾隆十一年三月下	三七五
卷二六二	乾隆十一年閏三月上	三九三
卷二六三	乾隆十一年閏三月下	四〇五
卷二六四	乾隆十一年四月上	四一八
卷二六五	乾隆十一年四月下	四三九

高宗實錄

卷二八四	乾隆十二年二月上	六九九	卷二八五	乾隆十二年二月下	七二一
卷二八三	乾隆十二年正月下	六八七	卷二八六	乾隆十二年三月上	七二五
卷二八二	乾隆十二年正月上	六七八	卷二八七	乾隆十二年三月下	七三九
卷二八一	乾隆十一年十二月下	六六三	卷二八八	乾隆十二年四月上	七五一
卷二八〇	乾隆十一年十二月上	六五〇	卷二八九	乾隆十二年四月下	七六九
卷二七九	乾隆十一年十一月下	六三八	卷二九〇	乾隆十二年五月上	七九二
卷二七八	乾隆十一年十一月上	六二九	卷二九一	乾隆十二年五月下	八〇六
卷二七七	乾隆十一年十月下	六一四	卷二九二	乾隆十二年六月上	八三二
卷二七六	乾隆十一年十月上	六〇三	卷二九三	乾隆十二年六月下	八三五
卷二七五	乾隆十一年九月下	五九〇	卷二九四	乾隆十二年七月上	八四七
卷二七四	乾隆十一年九月上	五七七	卷二九五	乾隆十二年七月下	八六一
卷二七三	乾隆十一年八月下	五五九	卷二九六	乾隆十二年八月上	八七四
卷二七二	乾隆十一年八月上	五四九	卷二九七	乾隆十二年八月下	八八四
卷二七一	乾隆十一年七月下	五二九	卷二九八	乾隆十二年九月上	八九四
卷二七〇	乾隆十一年七月上	五一四	卷二九九	乾隆十二年九月下	九〇六
卷二六九	乾隆十一年六月下	四九〇	卷三〇〇	乾隆十二年十月上	九二〇
卷二六八	乾隆十一年六月上	四七七	卷三〇一	乾隆十二年十月下	九三一
卷二六七	乾隆十一年五月下	四六一	卷三〇二	乾隆十二年十一月上	九四六
卷二六六	乾隆十一年五月上	四四八	卷三〇三	乾隆十二年十一月下	九五九

卷三〇四

乾隆十二年十二月上

九七〇

卷三〇五

乾隆十二年十二月下

九八二

大清高宗法天隆運至誠先覺體元立極敷文奮武孝慈神聖純皇帝實錄卷之二百三十二

監修總裁官總纂官太子太傅文淵閣大學士文淵閣領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履陸

總纂官經筵講官太子太傅文華殿大學士文淵閣領侍衛內大臣稽察欽奉 上諭事件處管理刑部戶部事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞尋奉

敕修

乾隆十年乙丑春正月癸酉朔

上詣

奉先殿行禮○詣

堂子行禮○率王以下文武大臣詣

壽康宮慶賀

皇太后禮成御太和殿受朝作樂宣表如儀○

詣

大高殿

壽皇殿行禮○遣官祭

太廟後殿○甲戌

上詣

皇太后宮問安○乙亥

上奉

皇太后御乾清宮侍宴○諭上年冬月

天降瑞雪南北各省被澤之處甚多麥田普霑

滋潤京師於臘月二十六日六出續紛積地

四五寸許朕感激

天貺益增敬畏之忱今思河間天津等府前歲

荒歉上年晚田幸獲有收閭閻得以安輯而

慶雲鹽山等縣尚有偏災總督高斌已遵旨

料理蠲賑兼施多方補救以蘇窮困但此等

地方於積歉之後小民度日勉強支持茲當

東作方興恐有不能盡力於南畝者朕心軫

念著高斌轉飭有司確加訪察於寒苦之民

再施恩澤以扶持之或有覓食於外鄉者則

當招致回籍酌量資助以復故業無荒田土

再上年浙江嚴衢等處被水頗重朕嚴飭常

安加意撫綏毋得忽視後據常安奏報已經

安置妥協小民不致失所。朕心稍慰。但一年之計在於春。今當耕種之時。著常安督率屬員。確查本地情形。若於上年奏准條款之外。再有應行加恩之處。一面奏聞。一面辦理。該部即遵諭速行。○是日立春。順天府進土牛春山寶座。○丙子。

上詣

皇太后宮問安。○召大學士內廷翰林等茶宴。以重華宮錫宴聯句。○先期派知貢舉辦理

科場示以寬嚴相濟。諭三載賓興。國家舉賢

三

右文之大典。必諸弊悉去。然後可以拔取真才。所謂稂莠不剪。則嘉禾不生。其理顯然。歷來查弊之法。不得不嚴者。此正慎重科名。厚待良士之道。昨歲朕親臨貢院。遍觀堂所。周覽號舍。矮屋風簷。備極辛苦。深可軫念。比賦四詩。令刊堂壁。可以知朕心矣。今歲會試。已展期三月。以待春溫。嗣後即以為例。茲特豫降旨。命禮部侍郎楊錫紱。知貢舉。俾伊得先

期計議。從容料理。楊錫紱可仰體朕心。當嚴則嚴。當寬則寬。於釐剔弊端之中。寓優卹士子之意。二者相成。不相悖也。即如蠟燭一事。因有燭中夾帶之弊。是以改為官給。若向舉子多索價值。則不可。或蠟少而燭質不堅。則更不可。朕姑舉一節。以類其餘。知貢舉者。其善為之。○戊寅。閩浙總督馬爾泰。福建巡撫周學健。奏福興。漳泉。四府糧食。向皆仰給臺郡。所有八社倉穀。採買時。每石定價銀三錢六分。平糶時。四錢。去歲臺郡豐收。自應及時採買。而穀價較前已昂。請將本年應買之穀。准於四府平糶盈餘銀內。照時價加增。總不出八年奏定四錢五分之數。令及早買貯。得旨允行。下部知之。○命翰林院檢討德保。在南書房行走。○是日起。

上以祈穀於

上帝。齋戒三日。○己卯。

世祖章皇帝忌辰。遣官祭。

孝陵○庚辰享

太廟遣誠親王允祕恭代行禮○遣官祭

太歲之神○

上詣

南郊齋宮齋宿○諭據安徽署撫準奏稱上年
徽寧等屬秋被水災急需賑濟其中歙縣休寧
婺源三縣產米素少經臣等奏請於撥協本色
之外將不敷之米照依乾隆七年米貴折賑之
例每石給銀一兩二錢部議未准但查徽屬之

平糶本三三二

歙休婺三縣所需賑糧頗覺浩繁該地山環嶺障
不通舟楫輓運維艱目今豫撥之米已經散給尚
多不敷而災歎之後糧價漸昂仰懇俯照原題每
米一石折銀一兩二錢俾山僻災黎得以隨時買
食等語徽州所屬三縣上年山水暴發淹沒田廬
雖係偏災然猝不及防民困可憫且彼地僻處萬
山之中平日米少價貴非他處可比其散賑不敷
之米著照準奏所請准以一兩二錢給發以示優
恤他處不得援以為例○辛巳祈穀於

上帝

上親詣行禮○詣

皇太后宮問安○命直省籌鼓鑄諭軍機大臣
等近年以來京師錢價增長民用不便朕深
為廛念多方籌畫諭廷臣悉心計議務得善
策以平價值上冬伊等議得數條試行於京
師數月以來錢價漸減似有微效民間稱便
至於外省錢價昂貴比比皆然爾等可將京
師所議各款內摘取數條密寄外省有鼓鑄
地方之督撫令其密為商酌能仿照而行以
便民用否外省與京師情形不同自有難於
一例之處但錢文源源鼓鑄自應日積日多
足敷民用乃價值日漸增長恐私銷或亦不
免夫銷燬制錢之弊最為難查若將零星設
爐之小鋪照京師之例令其歸併派官稽查
以杜燬錢造器之弊事屬易行又如該省既
開鼓鑄其搭放兵餉餘錢並青黃不接之際
平糶官米錢文照京師之例發出官賣以平

市價。此亦似乎可行。總之外省情形。京師不能悉知。該督撫身在地方。自能因時措置。如可仿照而行。即密商辦理。具摺奏聞。若難於籌辦。亦將不能仿照之處。據實陳奏。不必勉強。或致累民。尋江蘇巡撫陳大受奏。京師錢法六條。一。設立鑄銅官局。稽查銷燬。查省城銅鋪。四散開設。必使聚於官局。不特無地可容。兼恐稽查不得其人。反滋擾累。至銷燬之弊。應通飭文武員弁。實力稽察。一。官米局錢文。不必存貯。查歷年平糶錢。俱即發市易銀。現在奉行。毋庸更議。一。歸併錢市經紀。稽查高棧錢價。查兌錢雖有經紀名色。出入悉照時價。不能意為高下。毋庸仿照。一。糶買雜糧。禁止行使錢文。查乾隆六年。業經部議。行令民間。自數兩以上。毋得專用錢文。應再飭地方官。諄切曉諭。一。嚴禁奸民興販。查江蘇錢價。各處相仿。加以運脚。利息甚微。實無興販。惟於出洋船隻。照盤查食米之例。一體嚴查。

實錄卷三三二

七

一。禁止囤積居奇。查各屬富戶。多係存銀。其鋪戶之錢。隨收隨發。亦無囤積之事。并可毋庸查禁。得旨。所見頗是。即京師所辦。現即有杆格難行處也。浙江巡撫常安奏。浙省向無鑄銅大局。賣米官局。亦無錢市經紀。大宗雜糧。似難仿照。京師然銷燬不可不防。則令各州縣。再行設法稽查。興販不可不杜。則令沿海各商。毋得多運出境。囤積不可不禁。則令大小交易。止許兩數用錢。以及平糶錢。限三日發換。貨厚鋪戶零星兌收。庶幾因地制宜。以期有濟。得旨。所奏俱悉。福建巡撫周學健奏。京師錢法六條。不能盡一仿照。自宜推廣變通。一。銅鋪零星貨屋開張。未便移聚一處。但恐爐具現成。暗將制錢私燬。應飭各州縣查明境內銅作坊若干。銅鋪若干。內設爐者若干。開報姓名。取具不敢銷燬。遵依連環甘結。有犯許地鄰保甲首報。仍派典巡千把不時密查。一。平糶時應飭各廠員。將所賣錢五

實錄卷三三二

八

日一報。令該府縣隨時發換。至錢糧自一錢以下。例得折錢。亦令隨收隨發。於旬報摺內。開數備查。再晉江惠安。二縣場內。所收長價。并官商所賣鹽價。除各項公用外。及各縣商人。逐日所賣鹽價。俱交鋪戶兌換。每十日。將換出錢數。附晴雨摺內通報。一。錢市經紀。向未設立。但鋪戶奸良不一。應飭各州縣查明。該處錢莊若干。錢鋪若干。造冊。即令派查銅鋪委員。稽查有無擡價。一。市鎮米麥成石布帛成疋。以上及民間田房交易。客賑收放。典當出入。成兩以上者。概不准用錢。一。閩省環山阻海。挑運維艱。有無興販。應咨管關將軍水師提督。嚴飭員弁。實力稽查。一。囤積錢多。價即踴貴。應照部議。富戶毋得貯至五十串以上。典鋪亦不得過三百串。取具甘結備查。得旨。惟在因時制宜行之而已。法制禁令。豈能盡天下之情哉。湖北巡撫晏斯盛奏京師錢法六條。除歸併經紀。礙難仿設。糶買雜糧。

早經酌奏。興販囤積。再行申禁。均毋庸議外。一。銅鋪四散開設。既未便議移官局。銷燬自所不免。應照京師例。派佐雜武弁。督兵役常川查禁。貢十家互相稽查。並令各鋪將出入數目。逐日登記。按月呈報。一。向來州縣。多將平糶錢。存俟秋成買穀。應令隨收隨發。即於廠旁設局。令商民持銀兌換。得旨。總在汝等妥酌行之。語云。救荒無善政。朕於錢法。亦云如此。湖南巡撫蔣溥奏京師錢法六條。除立市歸併經紀。用銀收買雜糧。均難仿照外。一。銅鋪本微。易於私銷取利。自應派員督查。但鋪面俱在一處。出入有限。不須搬入官房。逐日稽查。一。米廠平糶錢。令三日一次減價收銀。旬終將出入數目冊報。一。客商攜帶盤費。不得過十串以外。水路取船行甘結。陸路取騾馬行甘結備案。一。湖南人民。大抵貯銀。尚恐地方遼濶。未及周知。應通飭各屬。有積錢至百串以上者。易銀存貯。至湖南設爐五座。

每年出錢僅敷放餉。現在創試各處銅礦。俟開採有效。可以添爐三座。將所鑄之錢。作為餘錢。設局官賣。益使泉貨流通。得旨。有治人無治法。即京師現行之法。亦不過補偏救弊。非經久可行之事也。川陝總督慶復奏。陝甘地處西陲。情形與他省更異。京師錢法六條。有可仿照者。一。銅器由外省製就買運。惟小爐銅匠。率皆收買廢銅鎔化。應責成保甲鄰佑。稽查有無銷燬。一。平糴錢。甘省向或貯庫。應與陝省一體隨時發換。一。囤積向干明禁。應令地方官曉諭鄉民。如貯錢至百串以上。一經發覺。按律治罪。有不能仿照者。一。錢鋪皆係小本經營。就地貿易。聲息相通。不能擡價。設立經紀。反開壟斷。一。市集零星糴賣。需錢者多。概令用銀。鄉愚於錢頭銀色。每有未識。買戶轉得欺哄。應從民便。一。陝省現在停鑄錢價日昂。甘省向用舊存制錢。亦在本地流通。並無興販。毋庸議禁。得旨。有治人無治

法。即京城之法。朕亦不謂之十分合宜。仍不過補偏救弊而已。四川巡撫紀山奏錢法首在流通。應令地方官將平糴錢。隨時兌換。覈實造報。以及客商帶錢。不得過三十串以外。鄉民貯錢。不得至一百串以上。均係仿照京師之例。至銅鋪鑄造稀少。且紅銅市價較賤。不須銷燬。錢鋪買賣零星。俱對客成交。市集糴買雜糧。僅升斗使錢。自應悉仍其舊。得旨。所奏俱悉。署廣東巡撫廣州將軍策楞奏粵東行使錢文。向有三項。一。各省所鑄大制錢。名曰青錢。一。從前所鑄康熙小制錢。名曰廣錢。又曰紅錢。一。前代年號古錢。名曰黑錢。近年粵東停鑄。他省運至者少。是以大制錢不可多得。而紅黑二錢充溢市上。質輕價重。一經入爐。得不償失。銷燬之弊。不禁自除。他若民間兌換銀錢。無須另設經紀。商販糴賣糧食。亦無大宗交易。各從其便。惟流通平糴錢。文查禁興販囤積。自宜仿京師例舉行。得旨。

今制錢之所以日貴者以行使之處甚廣也
粵東既有各色錢文行使朕意不若聽從民
便可耳若必定以法令使之盡使制錢反有
扞格難行之處即京師籌畫錢法亦可謂不
遺餘力而總無善策況外省乎○壬午

上詣

大高殿行禮○奉

皇太后居長春仙館○詣

安佑宮行禮○幸圓明園○癸未

上詣長春仙館問

皇太后安○甲申諭哈密公岳素布之父額敏

原係貝子從前岳素布襲封公爵時曾經降

旨日後著有勞績仍封貝子今看岳素布為

人明白謹慎特加恩封為貝子○乙酉

上奉

皇太后幸同樂園侍早晚膳○丙戌

上御西廡大幄次賜外藩宴○丁亥

上詣

安佑宮行禮○奉

皇太后幸同樂園侍早晚膳至乙未皆如之○

御正大光明殿賜朝正外藩及大學士內大

臣等宴召科爾沁親王阿拉布坦羅布藏衮

布貝子品級達爾瑪達都輔國公敏珠爾拉

布坦喀爾喀親王策楞德沁扎布貝子車木

楚克扎布鎮國公根丕勒四子部落郡王阿

拉布坦多爾濟厄魯特貝子三都布青海貝

子丹巴哈密貝子岳素布烏珠穆沁輔國公

德里克旺舒克至御座前賜酒成禮○順天

府行鄉飲酒禮

大清高宗法天隆運至誠先覺體元立極敷文
奮武孝慈神聖純皇帝實錄卷之二百三十二

實錄卷三十三

三十二

大清高宗法天隆運至誠先覺體元立極敷文
奮武孝慈神聖純皇帝實錄卷之二百三十三

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄五次慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德齡經筵講官太子少保工部尚書紀錄六次臣曹振鏞等奉

敕修

乾隆十年乙丑正月戊子命江南督撫輪閱

實錄卷三十三

一

海防諭江南地居腹內無深山窮谷藏奸聚
匪之藪所最宜加意者莫如海防我國家承
平日久海疆寧謐中外習為固然然從來防
患在於未形未雨綢繆古人所云今江省之
上海崇明劉河福山狼山各緊要海口營汛
非不周羅斥堠非不嚴密戰舸非不連檣接
艘然俱付之三五偏裨督率兵卒往來戍守
而已凡形勢之扼塞防守之機宜口岸之平
險何處為瞭望之所何處為守禦之區向例

督撫俱未親至其地考訂而講求焉。夫按圖聚米終不如目擊身親。況士卒何知。大概惡勞好逸。若督撫時一經臨自。必震動恪恭。不致廢弛怠惰。且江南海口數處毗連。附近巡行往返不過匝月。亦不致勞人廢事。該督撫等應仿別省總督巡邊之例。於海口緊要之處。遞年輪流巡視一次。固不必有所紛更。以為建白。亦不可草率一過。視同具文。則防範之事宜。既得深討於平日。備禦之營制。亦得

講究其萬全。更可不時簡閱操演。以整飭戎行。似屬有益。著該督撫等妥商定議具奏。尋議奏海防緊要。分應輪流巡視。擬於本年督臣先往。次年則及撫臣。周而復始。著為令。往巡之時。務將形勢之扼塞。防守之機宜。口岸之平險。及何處為瞭望之所。何處為守禦之區。逐一察看。詳細探討。並順路簡閱沿海營伍。事竣具摺奏聞。得旨。須妥協據實辦理。不可虛應故事也。○辛卯。命直省督撫提鎮嚴

飭屬弁專習騎射。諭營伍以弓馬為主。將備以表率為任。未有將備之弓馬平常。而能訓練兵弁。使之勤加服習。以底於純熟者也。朕聞各省武弁。自副將以下。以及千把總。其弓馬雖不至於十分生疎。然欲求一騎射出色者。竟屬寥寥。揆厥所由。良因該管之大員。甄別屬弁。惟於趨走應對之際。定其賢否。初不於弓馬生熟之間。分其優劣。獨不思武職官員。身列戎行。騎射乃其專責。豈容視為具文。

置之不習。其何以鼓羣弁而勵多士。朕已屢經訓諭。今再頒此旨。著各直省督撫提鎮。嚴飭所屬將備。專心弓馬。務極精良。倘將來或命大臣前往查閱。或引見官弁到京考驗。若騎射仍有生疎者。定於該管之督撫提鎮。是問。該部可即通行傳諭。○四川巡撫紀山奏。叅副都統永寧各款。一借製甲面營運。一捏開報部馬價。一挪移馬價放賬。一私開鋪面販賣。得旨。四川巡撫紀山。特叅永寧狡詐欺

罔圖利營私各款。永寧著解任。回四川候審。其成都副都統員缺著卓鼎調補。將摺內款蹟並案內有名人犯交與卓鼎會同紀山逐一嚴審定擬具奏。○壬辰。諭科場首嚴懷挾而不肖喪廉者流。竟有於衣裘中藏匿文字者。是以有皮衣去面。禮衣去裏之例。朕思春月會試風簷之下。非衣裘不足以禦寒。若將製就皮衣悉令去其褥襲。應試多人既不免改造之費。亦非所以飾觀瞻也。著將皮衣去面之例停止。但於入場之時。悉心察視搜檢。以防弊竇。為士子者更當感朕體恤從寬之意。人人自愛。以從前惡習為深戒。況既登賢書。又非生監可比。豈可為此穿窬之事。喪其已成之功。名既負朕恩。又罹國法。諒不若是之愚也。知貢舉可即通行曉諭之。○又諭上年戶部侍郎李元亮奏請加增捐款一摺。朕降旨交原議之大臣議奏。今思捐例乃一時權宜之舉。去春因直隸少雨歉收。故允廷臣

所請。酌開捐例以備賑恤。幸於五月得雨。禾稼有秋。而各省亦俱豐稔。唯餘直隸興修水利一事。無俟加增捐款也。李元亮所奏不必議覆。○以直隸按察使陶正中為山西布政使。山西布政使嚴瑞龍為直隸按察使。○癸巳。飭直省各督撫提鎮親驗兵丁。充補糧缺。諭國家養育兵丁。將責以披堅執銳。陷陣摧鋒之用。故當召補之始。必擇其身材強壯。技藝可觀者。方准入伍。朕聞外省兵糧缺出。惟馬糧係督撫提鎮親行拔補。至步糧則由營員驗放。因而徇情市惠。往往將猥弱不堪之人混行收錄。虛糜糧餉者有之。又向例兵糧缺出。先儘餘丁頂補。餘丁不足。始募民人充伍。查餘丁一項。原係將營中清出火糧收養兵丁子弟。每名月給糧銀五錢。既可貼補兵丁之不足。且以造就人材。立法本非不善。乃兵丁因餉銀有限。凡子弟之壯大者。多令別業資生。而以幼小羸弱之丁充補。其數徒然

占食半餉。難以造就成材。國家何能收養兵之實用。直省督撫提鎮等。宜思設兵者。經國要畧。簡募者。教練先資。既往者。姑不究。茲後遇有兵糧缺出。無論馬步戰守餘丁。務須親自驗放。不可憚勞。委之營弁。倘一時事冗。不能親閱。亦必令親信大員代看。庶有一兵即得一兵之用。於詰戎之道。方有裨益。其不實力奉行。或經科道查叅。必重處不貸。該部即遵諭通行。○調廣西鎮安協副將劉問政。赴

部引見。○甲午。軍機大臣議覆。甘肅巡撫黃廷桂奏。請修葺通省城堡邊牆一摺。查城垣為地方保障。應如所請。仿照豫省之例。凡工程在一千兩以內者。令各州縣動支額設公費銀。分限五年修竣。在一千兩以外者。無論新坍舊坍。俱確估造冊。取結存案。俟水旱不齊之年。以工代賑。自一萬兩至十萬有餘者。難一時並舉。應酌地形緩急次第興修。至邊牆大堡。亦應一體修葺。但各項工程。必須遣

大員確勘。方可覈計無浮。得旨著派戶部侍郎三和馳驛去。巡撫黃廷桂亦著前赴應行查勘處所等候。會同查勘估計具奏。餘依議。○戶部議覆。浙江巡撫常安奏。浙屬被水。其沙衝石壓之田。請寬糧額三年。竊思免糧以作開墾資本。定限三年。未必即能成熟。應令該督撫查明畝數。題請豁免。仍勸各業戶陸續開墾。按年勘報。依限升科。又稱現經題豁之田。如有新漲漸堅者。先儘原業戶開墾。應

如所請。從之。○川陝總督公慶復奏。哈密留防兵丁。原議兩年一換。往往抵防交代。五月十月方得換回。盛夏人馬乾渴。嚴冬夜無棲止。情殊可憫。請將四月應換之兵。改於三月抵防。九月應換之兵。改於八月抵防。則換回之兵。各早一月起程。既體恤戍卒。亦無誤邊防。得旨著照所請行。○乙未。諭朕奉

皇太后懿旨。貴妃誕生望族。佐治後宮。孝敬性成。溫恭素著。著晉封皇貴妃。以彰淑德。嫺妃。

純妃。愉嬪。

魏貴人奉侍宮闈。慎勤婉順。嫺妃。純妃俱著晉封貴妃。愉嬪著晉封為妃。

魏貴人著晉封為嬪。以昭恩眷。欽此。特行傳諭。該部將應行典禮。察例具奏。○停會試。榜後揀選例。諭為政務在得人。牧民先於擇吏。古者任官必加辨論。所以慎其選也。國家撫育黎元。簡用親民之吏。期於循良。報最教養。兼資銓用。多在科目。而需次年久。每致衰老昏庸。不能勝百

分錄卷三十三

八

一

里之任。其日漸廢弛。貽誤地方。皆人人所共知。共見者。是以上年朕命大學士九卿等定議。於每科會試發榜之後。揀選年力强健。質地明白者。列為一等。以縣令用。若年力精神。堪司教職者。列為二等。以正諭銓選。其應用訓導者。與歲貢分缺。選補至年力衰邁。不堪復就訓導者。以應得之銜休致。如此分別。庶幾人稱其職。於吏治自有裨益。但朕復再三籌度。揀選之法。自不可易。然人材難以豫料。若一經驗看。即為定衡。則入選者

焉保其必稱循良。更恐逾時。或又不堪任用。況才具尚不能一望而知。而心術又豈能外觀即定。所可知者。不過年歲狀貌耳。與其定於數年之前。不若審於選官之日也。今當會試之年。士子雲集京師。初次揀選。人數必多。恐汰除者衆。此等舉子。未免絕其上進之望。志氣隳頽。更非鼓舞人材之意。向來月選之後。原有九卿驗看之例。引見之時。朕又量材改調。或補教職。或令休致。臨時自可區別。毋庸豫為揀擇。著將新定會試榜後揀選之例。停止。嗣後惟令九卿秉公驗看。詳慎去取。勿徇情面。勿事姑容。候朕於引見時。再加酌定。自不使庸材濫司民社。而吏治亦可收得人之效矣。該部即通行曉諭知之。○又諭曰。安寧著回江蘇布政使之任。愛必達著回吏部郎中之任。○大學士鄂爾泰以病勢日劇。疏請解任。調理得旨。卿忠直老成。經綸諳練。簡任機務。兼總中樞。領侍衛內大臣。掌翰林院

事正資倚毗著在任調理不必求請解任該部知道○丙申

上還宮早膳後幸圓明園○諭曰大阿哥生母哲妃著追封皇貴妃所有應行典禮該部察例具奏○建甘肅古浪縣典史衙署從甘肅巡撫黃廷桂請也○丁酉

上奉

皇太后居暢春園○還宮○宗人府疏請此次應封宗室將原任三等奉國將軍

拉善之子書錦阿授為奉恩將軍三等鎮國將軍伊克塔哈之子同麟授為三等奉國將軍三等鎮國將軍嵩阿里之子素勒登額授為三等輔國將軍三等奉國將軍白祥之子廣寬授為奉恩將軍奉恩將軍啟昭之子鵬韜仍授為奉恩將軍從之○戊戌

皇貴妃高氏薨諭曰皇貴妃高氏著加封慧賢皇貴妃○又諭曰皇貴妃富察氏著追封

哲憫皇貴妃○又諭此次春季經筵著停止

己亥諭據湖南巡撫蔣溥奏稱原任鎮守總兵冶大雄被叅一案今已審明並無貪縱情事止於兵丁等犯贓應照失察例開復原職降一級留任現在題覆聽候部議等語冶大雄一案該部照例議覆之後著蔣溥將冶大雄給咨送部帶領引見○準噶爾台吉噶爾丹策零遣使臣哈柳齋表奏曰前奉旨接濟我等前往西藏念經之人牲畜路費念經之時又俯准所請辦理不勝欣喜感激但準噶爾現在新立法性教所有西藏請來好喇嘛大半亡故存者年皆衰邁若由土伯特地方揀選通於經咒者賞發前來立法可期永久為此奏請餘言令使臣口奏附進玉碗木碗各一件貂皮三十張犬馬各二奏入

上命尚書海望傳詢哈柳曰表內令來使口奏何語哈柳奏稱噶爾丹策零令將請發喇嘛事口奏又我等熬茶之人由藏回來頗羅鼐

辦給牲畜路費。不甚妥協。頗羅鼐原係拉藏汗屬下書寫之人。大抵仍念舊讎。所以如此。乞諭頗羅鼐照前例辦理。報聞。○庚子。命尚書海望等傳諭夷使哈柳曰。爾噶爾丹策零本章。朕已觀覽。爾等口奏之言。大臣等亦經奏聞。觀噶爾丹策零所奏。為尊佛法。立法性教。欲請藏內喇嘛。實屬善事。其詞意誠篤。朕甚嘉之。但爾等到藏熬茶。即欲邀請喇嘛。頗羅鼐未曾給發。爾等回後。頗羅鼐奏到。準噶爾來使欲請喇嘛。未奉大皇帝諭旨。未曾給發。伊等回去。或又奏請給發。亦未可定。但從前準噶爾人等。擾亂藏地。拆毀寺廟。有侵害土伯特之讎。俱不願前往。乞大皇帝睿鑒。爾等又稱熬茶之人。頗羅鼐辦給諸物。不甚妥協。想因尚念拉藏汗之讎。是以如此。朕為天下共主。不分內外遠近。一視同仁。因從前爾等有亂藏之事。彼此猜疑。至今未息。衆喇嘛皆佛門弟子。伊等不願前去。朕豈可迫遣。此

事不便降旨。理應停止。○以協辦大學士劉於義暫署直隸總督。○辛丑。

上詣暢春園。問

皇太后安。○幸圓明園。○御山高水長大懽次。賜準噶爾使臣哈柳等宴。○壬寅。

上詣暢春園。問

皇太后安。○還宮。○諭據漕運總督顧琮奏。刑部尚書張照。丁憂回籍。於正月十九日。行至江南徐州地方病故。已差員料理。送

回原籍等語。張照才品優長。兼諳法律。且學問充裕。詞藻清新。二十年來。侍直內廷。勤慎素著。前聞伊父訃音。抱病星馳。朕切諭其以禮節哀。勿致毀瘠。今聞在途溘逝。朕心深為憫悼。著加太子太保吏部尚書。所有應得卹典。該部察例具奏。○是月。署兩江總督尹繼善。議覆巡察江南漕運御史王興。吾條奏水利農田事宜。○上流多開支河。而擇低地蓄池。以灌田畝。應

先修壽州安豐塘。各處倣行。使漫水不至泛濫。查亳秦等州縣。地勢平曠。一遇靈雨。盡成積潦。即使勉強築塘。土鬆易洩。實於救旱無濟。至上游之多開支河。雖為分殺水勢起見。第鳳潁諸郡。受河南全省之水。最大者為淮。匯在洪澤一湖。現經欽差尚書公訥親詳勘。下游通江通海之道。次第估辦。俟大局已定。查看洪湖果能容納。然後委員細看上游歸淮歸湖之道。設有淤淺。另行定議。再壽州安豐塘。因明代開墾圩田。塘身稍小。現存蓄水之處。周一百二十餘里。州境實資利濟。自應及時修治。需工料銀二萬餘兩。擬一半酌動帑項。一半勸輸民力。具疏題請。候部覆遵行。一修治陂塘。宜相度地形。定界立案。遇民食拮据。以工代賑。查陂塘蓄洩。關係農田豐歉。現飭地方官。乘此稔歲。備築不得概俟散賑之年。間有工程較大者。或酌給帑金。或須借口食。分別辦理。一水利既興。應召募善力田

者。教民耘耔。并設官董勸。查教稼勸農。地方官職所當為。近經尚書公訥親條奏。州縣於境內村莊。定限遍行巡視。正可隨時訪察農事。獎勤懲惰。有治田未得法者。令就近之上農教之。毋庸復設專員。一民間計丁分耕田畝。不得遊手耗食。查惰農最宜嚴禁。現已酌立章程。擇力田淳謹者。設為鄉長。專司勸戒。並於州縣巡查到村之日。據實稟陳。年終考核。毋庸計畝分耕。得旨。總在汝督撫實力行之。而實力行之者。蓋少。朕亦無可如爾等何也。○江蘇巡撫陳大受奏。謝上年不能督捕蝗蝻。部議降級。恩寬留任。得旨。覽以後再如此。不實心於平時。而且沽虛譽於事後。朕將不汝寬矣。○漕運總督顧琮奏。漕船除原題大幫飯食銀六兩。小幫四兩。及照依部例造船飯食銀六兩。留為書吏雇覓貼寫飯食等費。其餘年規土宜。一切名色。盡皆革除。并通飭各糧道。一體查禁。得旨。總在汝實心剔弊。

有治人。無治法也。○浙江巡撫常安奏。海寧南門鎮海廟起。迤西至老鹽倉一帶。現有漲沙。嚴飭文武汛守各員。分段保護挑汛。至北岸存水處。自宜遵照原議。各建木石土餞。為攔浪掛沙之計。查秧田廟石塘。正迎大溜。普兒兜石塘。又與老鹽倉迤西柴塘相近。潮汐衝激。均關緊要。各擬添建盤頭一座。其南岸故道。自蜀山迤北。舊有沙淤。以致大溜趨逼北岸。擬就沙嘴開溝引潮。可減南岸之沙。以益北岸。得旨。惟應相其機宜。以盡人事。漲沙不足恃也。○福建巡撫周學健奏。永福縣民余德海等。聚衆燒劫黃姓村莊。現經拏獲。得旨。須嚴處以示警。勿姑息以養奸。○福建學政吳嗣爵奏。謝恩請訓。得旨。汝在湖北。可謂稱職。未可謂盡職。尚應實心勉力。以育才正俗為務可也。○川陝總督公慶復奏。甘省界雜番夷。屯牧城汛。均關要害。臣擬今春赴蘭州。越甘涼。出嘉峪關。一路查閱。弁兵相度形

勢。有應興革諸務。與撫提諸臣。詳籌奏聞。得旨。好。卿自能查閱周詳。調度妥適也。○又奏。逃走喇嘛羅卜藏丹怎等。業於口外拏獲。查西寧距京路近。而該處把總。係川省撥防之員。必欲由川轉解。既涉迂遠。恐致疏失。當飭西寧鎮道。如該把總尚未起身。即由西寧就近起解。如已起身。務飭沿途員弁。加謹防護。得旨。所見是。知道了。○陝西巡撫陳宏謀奏。安民首在察吏。臣自莅江西。及調西安任內。曾將該地方錢糧倉穀。士習民風。山川險要。土田物產之類。通計三十餘條。令州縣將現在情形。與如何辦理之處。逐細登答。一冊再令將境內村莊河道。山嶺道路。繪為一圖。注明道里遠近。四至八到。州縣留心者。固能一見明晰。即平日疏忽者。因此條對繪圖。亦必講求考較。臣擬即以此考察屬員優劣。至部議所開興舉飭禁事件。祇就各省大概而言。其中有此省所有。而彼省所無者。有在部文

條件外者。臣因會商督臣。將陝西應行應禁之事。臚列告示。刊刻分發。並令地方官因公下鄉。即於附近村莊稠密處所。傳集士民。遇有口角。立行剖斷。以及農桑水利。皆可親勘。其無公事應勘之鄉。然後特地前往。立限簡者半年。繁者一年。必須徧閱周知。遇事隨時稟覆。仍令府道覆查彙報。得旨實力妥辦之外。別無可諭也。○甘肅巡撫黃廷桂奏。開採皋蘭鉛礦緣由。得旨。知道了。開礦之事。利害

相半。必為之妥。方受其益也。○又奏。西寧道楊應琚。居官端謹。辦事妥協。首倡社倉。殫力經營。實為通省僅見。得旨。楊應琚原係一能員。若能進於誠而擴充之。正未可量也。○甘肅按察使顧濟美奏。謝恩赴任。得旨。覽。諸凡實心辦理。臬司不比道員。蓋通省之表率。而督撫之亞貳也。必勉盡乃職。毋負任使焉。○四川巡撫紀山奏。瞻對賊番。搶刦徹回兵丁行李。正在嚴緝。該土司不將首犯擒獻。贓物

全交。隨即檄飭諳練夷性弁目人等。前往曉諭。將來示威與否。雖難懸定。而軍糧必須豫為密籌。得旨。是。先事綢繆。甚合機宜。兵貴神速。不可不知。○又奏。據裏塘所屬渣嗎隆黑帳房民報稱。上年十二月間。有夾壩四十餘人。搶去帳房牛隻。又據額哇奔松塘番兵報稱。有夾壩三十餘人。各帶鎗箭。拆毀房舍。搶去文書。查節次所報夾壩人數。多寡不一。是否同夥。係何部落。而失事又在裏塘地方。現

容督提二臣。如即係瞻對賊番。當歸前案嚴緝。得旨。以此觀之。竟有不得不示以兵威者。然須實力為之。莫復如鄭文煥之前轍也。○兩廣總督那蘇圖奏。粵省烏鎗製造演放。皆不得法。因另制新式。令六營各造一百桿。臣仍不時考校。使嫻習純熟。得旨。是。時常留心以期實效可也。○署廣西巡撫託庸奏。粵西城工浩大。請分款開捐。得旨。為修城而開捐。各省將視以為例矣。且最多亦不過四五十

萬四五年間次第興修所費亦不至無措也此奏不准行

大清高宗法天隆運至誠先覺體元立極敷文奮武孝慈神聖純皇帝實錄卷之二百三十三

大清高宗法天隆運至誠先覺體元立極敷文奮武孝慈神聖純皇帝實錄卷之二百三十四

教修

監修總纂官廷議官太子太傅文淵閣大學士文淵閣領閣事領侍衛內大臣稽察欽奉 上諭事件處管理吏部理番院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂總纂官經筵講官太子太傅文華殿大學士文淵閣領閣事稽察欽奉 上諭事件處管理刑部戶部工部事務世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次尋常紀錄十四次臣德瑛經筵講官太子太保工部尚書紀錄六次臣曹振鏞等奉

乾隆十年乙丑二月癸卯朔以散秩大臣恒祿為正紅旗漢軍副都統鑄給河南彰德府糧捕兼管河務通判關防從河南巡撫碩色請也 甲辰遣官祭

先醫之神 乙巳諭軍機大臣據此次夷使哈柳口奏有進藏熬茶之人由藏回巢頗羅鼐辦給牲畜路費不甚妥協大槩是仍念拉藏汗舊讐是以如此等語又噶爾丹策零奏請賢能喇嘛一事朕已降旨西藏之人皆不願去此事頗羅鼐亦曾奏及喇嘛皆不願去

朕難以強派。準噶爾人等與頗羅鼐不睦之處。業已顯露。今雖無事。不可不豫為之備。著傳諭駐藏副都統傳清。令其密飭頗羅鼐。務使留心。有應如何防範豫備之處。詳慎辦理。

○軍機大臣議覆廣州將軍策楞副都統安華奏廣州駐防請照閩省例添設水師營查粵東濱海。首重舟師。現在駐防披甲皆未熟悉洋面情形。並有一經泛海。畏怯不能坐立者。何以責其哨捕。應如所請添設。仍令該將

軍會同該撫將各事宜妥議具題從之。○又議覆四川巡撫紀山奏打箭爐至藍墩一帶塘站令打箭爐同知阜和營遊擊每年春秋二季輪流稽察。查川省文武大員各有職守。未便遠離。自應就近責成該同知遊擊。但定以春秋二季輪流稽察。亦慮曠時廢事。今酌令初次照依所請。嗣後每年秋季輪流稽察一次從之。○吏部議准浙江巡撫兼管鹽政常安疏稱。崇明鹽務從前責成縣丞巡查。今

既設巡鹽大使專缺。應悉歸管理。仍聽地方官統轄從之。○建江西饒州府同知衙署從江西巡撫塞楞額請也。○丙午諭本月十三日朕前往馬蘭峪恭謁

祖陵。所有應行事宜著各衙門先期備辦。○戶部議准奉天將軍達勒當阿奏開採烏蘇里綏芬參山人夫領票出口。於收參時或缺額脫逃無可著追。且距盛京路遠口糧難運。嗣後每票除交官正數外。所有商參六兩以二

兩作辦事官員及設局放卡公用。一兩賞給劄夫保人。餘三兩作開創資本。將動支奉天銀糧資助之例停止從之。○丁未祭

先師孔子。遣誠親王允祕行禮。○軍機大臣議覆雲南總督張允隨奏備邊官兵留徹事宜。一從前夷賊攻逼都竜調赴開化協防之臨元鎮廣羅協官兵六百名。久戍勞費且水土惡毒時生疾病。請於乾隆十年春瘴未興以前全行撤回。其開化沿邊各隘自應酌撥

巡防查開鎮馬白汎原設兵一百五十二名。又三營公撥巡防兵五十名。請於開鎮存城兵內添撥兵九十八名。令開鎮左右兩營遊擊按季輪流防堵。一牛羊汎接連之磨山馬達桂皮樹上下藤橋。猺人寨。在在緊要。又者囊礦廠逼近交趾。此數處烟瘴俱重。請於原設兵一百七十七名外添撥開化存城兵一百五十三名。分佈各處。令中營守備選服習水土者更番巡哨。又天生橋牛羊坪二處邊瘴最重。亦請於原設兵十六名外將開鎮添撥馬白牛羊二汎兵內選服習水土者每處十名。協同更番會哨。仍令開鎮中左二營守備輪替巡防。一壩洒八寨等汎均係沿江烟瘴。惟土著之兵可以耐久。請添募兵五十六名。即於三營兵內遇缺陸續充補。分派前往。一前項添撥兵丁並領兵各員俱自鎮城派往。遠駐瘴地實與出兵無異。請加恩照貼防之例各給鹽菜口糧。一原調協防馬白等處

土練兵三百四十名。請留一百七十名。於新現壩洒大壩等處協同汎兵防守。俟交地寧靜全撤。一都竜廠民漸次復業。請於撤回臨廣官兵之日為始。照舊於馬白口收稅。但貿易人少課難足額。飭令該管同知儘收儘解。至商旅往來責成該同知嚴加盤詰。給牌驗放。以上各條均應如所請從之。○戶部議准湖南巡撫蔣溥疏稱寶慶府屬之筍牙陂頭和尚橋三處皆山僻小徑商賈罕到稅銀四百三十兩零節年多不足額應裁將稅銀歸蓼溪等五處口岸徵收從之。○移江南青浦縣董漕縣丞駐七寶鎮從江蘇巡撫陳大受請也。○戊申祭

大社

大稷遣慎郡王允禧恭代行禮。○諭向來各省鄉試磨勘不過虛應故事。去年朕特派大臣將覆試卷精加磨勘而各省主考學政遂致皆懼參罰此固若輩平日不肯實心玩愒成

習罪有應得。而朕念伊等俱係寒素之員。原藉俸銀養贍。若領俸之日。全行扣除。用度難免拮据。著將罰俸一年者。展限三年扣除。其多寡不齊者。均照此計之。今當春季領俸之時。該部即遵諭行。○奉恩將軍宗室旭昇病休。以其子書伯襲職。○己酉。諭朕此次恭謁祖陵。著莊親王、平郡王、大學士張廷玉、尚書公訥親在京總理。○又諭上年浙江嚴衢所屬地方被水歉收。朕已諭總督馬爾泰巡撫常安等。加意賑卹。務使窮民不至乏食。隨據馬爾泰常安奏稱。已將被災民人一一確查。分別極貧次貧。覈實散給米糧。並加添折賑米價。窮民不致失所。朕心稍慰。但朕聞得淳安建德常山開化四縣。田廬俱被衝淹。非別處被災可比。又紹興府屬之諸暨山陰縣之天樂鄉。及蕭山縣湖南一帶地方。田內現今存水。不能栽種春花。民情仍屬拮据。以上諸處著於三月內。再加賑一月。以接濟之。該部可

即速行文該督撫遵諭辦理。○戶部議覆漕運總督顧琮疏稱。各省截漕。仍徵漕耗。其折徵之年。除山東湖北二省。照舊徵收外。浙江江西河南湖南四省。俱令免徵。而湖南一省養廉等項。在二耗米變價內動支。查漕糧雖經截留。尚有各需款項。自應徵收漕耗。至折徵年分。浙江江西河南漕銀起解。在在需費。若令免徵漕耗。勢必借別項開銷。再湖南二耗米。亦非漕耗銀米可比。未便抵作養廉等項。應令該督因時調劑。妥議具題。從之。○禮部題朝鮮國王李昫遣使表賀。萬壽冬至元旦三大節。及進歲貢方物賞賚筵宴如例。○移直隸蠡縣蓮子口縣丞駐長村。從直隸總督高斌請也。○旌表守正捐軀福建安溪縣民陳左妻吳氏。○庚戌禮部疏請。八旗滿洲蒙古繙譯會試。與文會試合。為一場。除閱卷大臣屆期奏派外。所有受卷收掌彌封謄錄四所官。應照例咨取內閣中

書大理寺太常寺光祿寺國子監各屬官員到部開列具題。至舉子坐號人數衆多。滿洲在東文場。蒙古在西文場。毋庸拘定三人編立一號。謄錄仍於各部院筆帖式內選用。從之。○辛亥。

上幸內右門直廬。視大學士鄂爾泰疾。○兵部議卹蘭陽汎埽土壑陷隨水漂沒之旗牌陳秉義守兵王宣張煥姚成匡自有堡夫劉世肇等六名。照陣亡步兵例。各賞銀五十兩。民夫王乃兒傳志兒二名。照軍功二等傷例。各賞銀二十五兩。仍致祭從之。○都察院左副都御史范璨奏。御史彭肇洙奏請。歲終令戶刑二部。將各省旱澇豐歉。及命盜案件多寡。彙摺入奏。業蒙准行。竊思旱澇豐歉。每年按省分注。固可見民生之休戚。察調劑之當否。至以命盜案件多寡。殿最各省大吏。州縣咸謂案牘紛繁。關係上司政績。勢必草率了事。而黠猾之吏。巧為彌縫。勢必抑勒隱匿。請行

令直省督撫轉飭地方官。平時豫為勸戒。遇事不可寬貸。化暴安良。實有裨益。得旨。所奏亦是。該部知道。○壬子。

上詣

雍和宮行禮。○兵部議覆。署湖廣總督鄂彌達奏。楚省內地副參調補實難其選。請於參將遊擊內。有熟識苗情者。豫行保舉。遇苗疆副將缺出。內地無合例之員。開列請旨揀放。參將候部掣補。查楚省副將七缺。參將三缺。向例定為調補遺缺。仍歸部推。若盡用保舉人員。陞途有礙。應令該督擇係苗疆緊要者。改為二三題缺。以便豫保人員掣補。從之。○癸丑。

孝康章皇后忌辰。遣官祭

孝陵。○大學士等議。覆湖北巡撫晏斯盛奏。稱錢法關係民用。謹就本省情形。酌陳事宜。一。奸民私剪錢邊。案破累累。亟宜及時嚴禁。行使。此外砂板錘扁古錢。及鉛鐵錢。俟相機查

禁一民間質當多係零星不能禁其使錢惟價在三五兩以上者當給本色取贖在二兩以上者亦照本色交還一糴買糧食令漢口等鎮自二三石以上及四川湖南本省大小各船自成石以上用銀交易船過關汛即行嚴查除日用盤費外不准攜帶多錢以上三條均應如所請至稱各當積錢至十串以上者隨令兌給錢鋪誠恐小民待質者多存不敷出尚非盡善之策應令該撫會同湖廣

總督鄂彌達將該省大小當舖按照每日所出錢文多寡遵照京師之例酌定數目妥協辦理得旨奏內事情著鄂彌達晏斯盛妥協實力為之餘依議○軍機大臣會同額駙策凌議覆署定邊副將軍叅贊大臣拉布敦奏稱布爾吉推河在哈瑪爾沙扎海卡座以外其地在阿爾台山梁之外現有額魯特宰桑額勒慎等十餘戶居住布延圖河源四水總會處與得里哀托爾本諾爾三處俱在阿爾

台山梁之內現有烏梁海得木齊扎木禪等十餘戶居住據云游牧處雪大暫時寄居俟春融雪釋即行移去業已密劄兩處坐卡侍衛并鄰近坐卡侍衛嚴行防範等語查額魯特烏梁海等皆準噶爾部人或因避雪來尋水草似無他故但屢向內地卡座近處居住日久未免生事現當夷使在京應面諭以守定界址毋許任意游牧令其回告噶爾丹策零即行撤回再夷使請安進貢非貿易之年

不准帶貨此次哈柳達例攜帶貨物現奉恩旨姑准赴肅貿易亦應俟使臣回巢之日申飭下次不准復帶從之○吏部等部議覆福建學政吳嗣爵奏司鐸職闕訓迪不宜懸缺請於補授具題後即行發憑令該督撫檄催到省考驗赴任其遠省例不由部發憑者亦令依限赴任稽延分別覈叅又教職會試下第限揭曉後五日赴部領照起程仍令該撫將回任日期報部查核均應如所請行各省

一體辦理從之。○兵部疏請補授福建漳州鎮總兵。浙江定海鎮總兵各員缺。得旨福建漳州總兵官員缺。甚屬緊要。著該督於通省總兵內揀選調補。所遺員缺。著王之琳補授。陳鳴夏補授浙江定海鎮總兵官。○以通政使敷文為盛京兵部侍郎。○以宗人府理事官宗室功宜布為正白旗滿洲副都統。○甲寅。

上詣暢春園問

皇太后安。○幸圓明園。○御正大光明殿。賜準噶爾夷使哈柳等食。諭曰。朕明日起程謁陵。俟回鑾。令汝等朝見。恐誤汝等行期。故於今日召見汝等。今天時漸暖。汝等整裝完備。即可起程歸國。不必候朕回鑾也。汝台吉奏請之事。可行則准行。無例不可行者。則不准行。朕惟準情酌理。初無成見。汝等謹記朕諭。旨。歸告噶爾丹策零。在途謹慎行走。隨賜銀兩。緞布有差。○勅諭準噶爾台吉噶爾丹策零。

爾奏稱前往西藏誦經人等。蒙恩賞給牲畜口糧。成全誦經之事。不勝歡欣。並請於土伯特賞給善於經咒喇嘛數人。令經咒之教。可垂久遠。推廣不絕等語。爾尊崇佛道。因立法性教。欲請西藏喇嘛。實一善事。朕觀奏內辭意敬順懇切。甚屬可嘉。但去年爾使臣進藏熬茶。已向郡王頗羅鼐求請喇嘛。彼地喇嘛因念爾等曾在藏內騷擾。不願前往。故頗羅鼐託言無大皇帝旨意。並未發往。亦曾經頗羅鼐具奏。今爾使臣哈柳口奏。頗羅鼐仍念拉藏汗之讐。於爾等進藏熬茶。人牲畜路費。並未支給妥協。由此觀之。爾等兩地相疑。未忘舊事。朕為大君。不分內外。視羣生如一體。撫卹仁愛。即佛道亦以安撫衆生為要。衆喇嘛皆係佛門弟子。伊第既不知情。願朕勒令前往可乎。即使降旨。令發給爾等喇嘛伊等亦未必肯發給。賢能者。此後爾等又不免藉為口實。反生怨望。頗羅鼐係僻處遠地之人。準

噶爾亦係僻處遠地之人爾等彼此互有違言朕豈可偏聽遽罪頗羅鼐乎爾等地方亦有喇嘛豈無一善於經咒者且敬佛廣教只在於心亦不必專憑經咒何必求諸他人此事朕不必降旨今特敕付使臣哈柳齋回爾其善體朕意隨勅賜各色緞十端蟒緞粧緞各八端玻璃磁器各八事○

上還宮○諭嗣後皇貴妃貴妃儀仗內紅緞曲

柄緞著改用金黃色妃嬪儀仗內著添用紅

緞曲柄緞一柄○兵部議覆巡視臺灣給事

中六十七奏更定臺郡營弁事宜一調臺武

職接劄後多有遷延兼遇督提調考等事仍

回內地。在臺不及歲餘兵將尚未熟悉焉能

責其訓練請以到臺日起俸接算一臺兵拔

補陸路外委俟其交代回至內地仍降目兵

亦於體制未協請照水師之例事故缺出就

臺兵拔補期滿缺出與內地外委對調均應

如所請從之○刑部奏熟審人犯輕罪照例

分別減免其斬絞重犯內或有情罪可矜可疑者臣部會同都察院大理寺另行具奏請旨倘內外獄衙門有故意遲延恣行奸弊或人犯妄希巧脫者本犯不准減等官員嚴加治罪從之○補行江西省乾隆七年分軍政年老官一員才力不及官一員分別處分如例○撥湖南城步縣蓮桐欄牛二崗苗民歸江頭巡檢美城崗苗民歸典史管轄從署湖廣總督鄂彌達請也○乙卯

上起鑒謁

東陵○是日駐蹕烟郊○丙辰駐蹕白澗○丁

巳禮部奏乾隆九年順天鄉試經步軍統領順

天府府尹奏請外場巡察御史先期前往貢

院大門外駐宿搜查運送之供給及進院之

夫役與主考同考監試提調副都統內外簾

執事各官之隨從鋪陳等項以杜執事人役

代士子懷挾之弊業蒙准行竊思鄉會試事

同一體且今年會試合八旗滿洲蒙古繙譯

為一場事務較繁。請於巡察外場御史外。添派數員。協同稽察。從之。○是日。駐蹕桃花寺。

實錄卷三三五

去

大清高宗法天隆運至誠先覺體元立極敷文奮武孝慈神聖純皇帝實錄卷之二百三十四

大清高宗法天隆運至誠先覺體元立極敷文奮武孝慈神聖純皇帝實錄卷之二百三十五

駐蹕總管經筵講官太子太傅文淵閣大學士文淵閣閣學領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂

總裁官經筵講官太子太傅文華殿大學士文淵閣閣學稽察欽奉 上諭事件處管理刑部戶部工庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敷修

乾隆十年乙丑二月戊午補行江西省乾隆

實錄卷三三五

一

四年暨乾隆七年分二次大計共卓異官八員不謹官五員罷軟官一員年老官二十二員有疾官五員才力不及官一員浮躁官二員分別陞賞處分如例。○是日駐蹕隆福寺。○已未

上謁

昭西陵

孝陵

孝東陵

景陵俱未至碑亭即降輿慟哭步入

隆恩門詣

寶城前行禮躬奠哀慟王以下文武大臣官員
隨行禮至

壽祺皇貴太妃園寢奠酒○是日駐蹕隆福

寺 庚申春分朝

日於東郊遣寧郡王弘岐行禮○署理定邊
副將軍叅贊大臣拉布敦奏據託爾和烏
蘭坐卡侍衛報稱有準噶爾烏梁海得木
齊烏爾巴齊因今年游牧處雪大寒甚

平定回疆方略卷三十三

二

伊等率領所屬十四家在於黃加書魯克
居住查黃加書魯克地方在阿爾台山梁
以內與內地故卡處相去八十里乃布延
圖與託爾和烏蘭卡倫尋蹤之所當即行
文總管防守烏里雅蘇臺等處之叅贊
大臣烏爾登令其嚴飭坐卡侍衛小心
防範俾流徙之衆得資彈壓不致生事
但亦不可稍涉形迹轉露張皇報聞○
免廣東海陽澄海二縣乾隆九年水災

額賦○是日駐蹕桃花寺○辛酉

上幸盤山駐蹕至癸亥皆如之○壬戌諭教職
為司鐸之官訓課士子長養人材是其專職
乃向來循例銓授未加別擇以致衰老龍鍾
庸劣荒疎之人濫居師儒之席者不可勝數
此中外所共知共見者是以去年朕命廷議
古人原有七十致仕之義現任教職年至七
十以上者令其休致之處曾經通行上年湖
北巡撫晏斯盛以歲貢年已七十應否扣選
一事摺奏請旨時朕復思古來申公伏生老
而傳經人之可用與否未可專以年齒論譬
如年逾七十而強健者亦不可銓選乎未至
七十而病憊龍鍾者亦可姑容乎惟當看其
人之可用與否為去取不當以七十為限總
在督撫學政秉公實心辦理庶有裨益已將
此意明白批諭今伊又復具奏內稱每科鄉
試後既行淘汰至奉文截取之時是否再加
考驗又稱拔貢副榜似應一體考驗等語是

平定回疆方略卷三十三

三

晏斯盛尚未領會朕務在得人之旨。但於細微之處。沾沾奏請。且此旨未曾頒布各省。恐不知者尚多。今應通行宣諭。一體遵奉。查上年有每次鄉試後。令該督撫學政驗看。大加淘汰一條。昨甲子鄉試後。已舉行一次。其實在老邁龍鍾者。業已去其大半。嗣後此例不必每年舉行。候朕因時制宜。酌量降旨。其恩拔歲副。及挨貢應用教職者。驗看之處。仍照舊例行。至該員臨選時。給發文憑到日。仍加

高宗實錄卷三三五

四

考驗。必精力文藝足勝司教之職。方准領憑赴任。庶衰庸者不得濫膺。而學校或可收得人之效。○大學士等議覆貴州總督兼管巡撫張廣泗條奏黔省營伍事宜。一黔省控制夷獯。關隘固在捧鮓。而黃草壩一汛。為滇黔粵三省門戶。兵額均屬不敷。請以安籠鎮標左營原駐捧鮓之遊擊一員。千總一員。外委千總一員。帶原兵五十名。添撥一百九十名。移駐黃草壩。原駐安籠鎮城左營之守備一

高宗實錄卷三三五

五

員。把總一員。外委把總一員。帶原兵一百四十一名。添撥三十九名。移駐捧鮓。把總一員。帶原兵二十名。添撥十名。分防白雲地汛。把總一員。帶原兵四十名。分防法巖千總一員。帶原兵四十八名。添撥十二名。分防歪染汛。內撥兵十名。於巴結壩傍各安一塘。每塘設兵五名。把總一員。帶原兵五名。添撥三十五名。分防革上一塘。外委把總一員。帶兵十名。把守江底一塘。似此抽撥分布。其左營原防塘汛及中右兩營存城兵。未免單弱。應共添兵一百五十名。再貴陽城守營。現存兵七百名。亦屬不敷。應添兵五十名。細查通省。無可分派。請裁貴定縣平伐營都司一員。把總二員。遇缺另補。并裁兵二百四十名。將五十名歸貴陽營分守城汛。一百五十名歸安籠鎮標。但平伐去貴陽甚近。而安籠鎮道路遙遠。自應先儘願還兵丁發往。如不足數。令安籠鎮募補。俟有事故。缺出。陸續扣除。又平伐營

原防龍里汛把總一員兵七十名應改歸定廣協即將所裁平伐營兵內撥四十名並於該協存城兵內撥三十名令外委把總一員帶領防守龍里及安設在城等五塘尚餘平伐營千總一員兵六十名歸入新添營共有千總二員把總二員兵三百六十名應分為左右兩哨令左哨千總一員帶兵八十名分防平伐安設谷紀甘塘擺成臭水苦竹五塘令外委一員帶兵二十名分守平伐原防之谷壤汛並安設發人衝等六塘並令貴陽營委隊目一名帶兵五名分防毛基堡一塘新添營於平伐汛內委隊目一名帶兵五名分防谷衝一塘此外尚有新添營原防新安汛兵應裁五名舊貴定縣汛兵應裁五名尖山汛兵應裁十名栗木汛兵二十名應全裁一威寧鎮僻處西隅所轄苗獠素稱狡悍非重兵不足彈壓而該鎮標僅設左右兩營兼轄畢赤一營聲勢尚單查有大定協副將所管

水城營相距甚近請改歸威寧鎮統轄一黔省各營入冊餘丁多係幼穉遇糧缺斷難挑補徒糜兵餉請悉裁仍令各營按照馬步守原額召募充伍以上各條均應如所請從之

兵部議准杭州將軍薩爾哈岱奏稱駐防杭州各營前鋒請照他省例與領催一體保舉從之○免山東王家崗場竈地乾隆九年旱災額賦十分之一○緩徵江西玉山德興樂平宜黃四縣乾隆九年水災額賦○癸亥諭前因外省兵糧缺出惟馬糧係督撫提鎮親行拔補至步糧則由營員驗放往往徇情市惠濫行收錄虛糜糧餉曾降旨令直省督撫提鎮親自驗放不可憚勞委之營弁今據喀爾吉善奏稱東省各營基布星羅散處十郡距巡撫總兵衙門自一二百里至千里不等若概送提鎮衙門考拔不惟道路跋涉且恐久懸名缺請嗣後臣標所屬二營登州鎮屬濟南城守一營及附近省城之大小營汛

遇有兵丁缺出。臣俱親加考拔。其登克二鎮。臣均照此辦理。至副將乃武職大員。其同城本營。及附近營汛之兵丁。亦即飭令該將慎重選拔。秉公驗補。仍造冊呈報。提鎮於按年巡視各營之時。照冊查對。如有混收糜餉情弊。嚴行叅處等語。此奏亦屬有見。著照所請。行。各省設立營汛。遠近不一。若概送督撫提鎮衙門考試。則相距遼遠之兵丁。往返跋涉。不無苦累。是以從前所降諭旨內。原有督撫一時事冗。不能親閱。准其委令親信大員代看。況委員代看之後。督撫提鎮於巡視之時。原可復加考核。亦不致滋生事端。恐各省督撫提鎮。或有拘泥前旨。不能酌量辦理者。亦未可定。著該部通行傳諭知之。○又諭各省設立駐防其將軍等議給養廉。皆按照地方分別給予。至青州駐防設立以來。將軍等已歷四任。從無以養廉不敷為請者。即欽拜到任。已經數年。亦未以此陳奏。今乃忽欲請照

別省之例。添給養廉。殊屬卑鄙。其本內所稱身抱沉疴。諸疾並作等語。伊既有病。必於公事有誤。乃欲因病請添養廉。尤為無恥。況伊即有拮据之處。亦應具摺密陳。候朕降旨。何得輒用本章。亦屬不合。著飭行。將本發還。○甲子。皇后千秋。令節奉皇太后懿旨。停止行禮筵宴。遣官祭關帝廟。諭直隸河間天津等屬前歲荒歉。朕格外加恩。多方賑卹。曾降諭旨。將被災最重之十六州縣。並故城新城二縣。乾隆九年以前新舊錢糧。俱緩至本年秋收後。令該督看彼地收成。光景奏聞。再行開徵。今思災重各州縣。舊欠錢糧。雖俱停緩。而本年應納錢糧。已屆開徵之期。該處當積歉之後。元氣未復。若照例催輸。民力未免拮据。朕心軫念。著將河間府屬之河間獻縣阜城任邱交河景州吳橋東光天津府屬之青縣靜海滄州南

皮鹽山慶雲深州屬之武強冀州屬之武邑等十六州縣并故城新城二縣所有本年應徵錢糧俱緩至秋收後照例開徵以紓民力。目今東作方興俾得盡力南畝以示朕加惠元元之意該部即遵諭速行。○戶部議准署兩江總督尹繼善疏稱江省上年水災除照例撫卹賑貸外請將丹徒丹陽靖江清河桃源安東銅山海州沐陽徐州十州縣衛錢糧全行蠲免其勘不成災之贛榆泰興二縣暫

請緩徵從之。○漕運總督顧琮奏江省漕船如江淮衛之三六七八等幫興武衛之三四六七八等幫淮安衛之二五等幫廬州衛之二三等幫大河衛之三幫揚州衛之頭幫鎮海泗州衛之前後兩幫水次甚遠最為疲乏又江淮衛之九幫興武衛之頭九兩幫鳳常衛之中幫大河衛之二幫水次不遠而疲刁相埒部推之弁多未諳練請改為繫缺於通漕千總內選補下部議行。○是日駐蹕白澗。

乙丑遣官祭昭忠祠○是日駐蹕盤龍山
丙寅駐蹕三家店○丁卯

上詣

恩佑寺行禮詣暢春園問

皇太后安還圓明園○戊辰

孝昭仁皇后忌辰遣官祭

景陵○諭雍正八年會試曾蒙

皇考特恩派出大臣監看舉子飯食並於常例

外每場賞飯一次及餅餌茶炭之屬今當三

月會試之期天氣正長應照雍正八年例添

賞飯食等物俾舉子充飽從容應試知貢舉

即察例辦理○又諭喀爾喀四部落游牧處

豫備之揚威兵每年令軍營叅贊大臣前往

閱看但念此項兵丁頻年調遣查閱不免勞

苦每年著各該處副將軍就近查閱軍營叅

贊大臣兩年查閱一次○諭軍機大臣曰原

任廣東碭石總兵魏國泰前經慶復以徇私

違例題叅復經那蘇圖奏稱魏國泰於原任

碣石鎮標中營遊擊賴天祥不遵調度廢弛貪劣案內部議以魏國泰到任六日即給莊榮祖委牌照依徇庇例降二級調用等語朕看慶復叅魏國泰則稱違例徇私那蘇圖之奏魏國泰則稱徇庇屬弁慶復那蘇圖二人之言輕重不一究竟實情如何可寄信詢問○御史范廷楷奏甘肅巡撫黃廷桂劾叅慶陽府知府徐天麒情性迂拘不諳律例案件遲錯久留必致闖茸至請內用部屬則云操守廉謹學問淵博人亦端正細繹前後語意自相刺謬請降旨申飭並飭下直省各督撫一切保薦彈劾考語務取質實仍將該員事蹟叙入不得曲示抑揚得旨黃廷桂之奏辭既失檢點范廷楷之劾疏亦屬吹求似此尋章摘句人盡有過者也究於求賢任能有何裨益耶該部知道○已巳

上御勤政殿聽政○以內閣侍讀學士蘊著為通政使右通政鄧時敏為大理寺卿○調原

任松潘鎮總兵邵銓補用內地總兵以四川泰寧協副將宋宗璋為松潘鎮總兵○免山東博興樂安二縣乾隆九年旱災額賦○庚午諭軍機大臣曰延綏總兵官周起鳳摺奏年老不勝邊疆懇求告退爾等可寄信詢問慶復不知周起鳳光景實在如何尚能辦事與否著慶復據實回奏候朕再降諭旨尋奏周起鳳年逾六旬精力未衰尚能辦理營務得旨既如此可留其任卿再時常留心若有衰老之狀即行奏聞可也○戶部議奏臺郡民番錯壤經福建布政使高山會同巡臺給事中六十七徹底清查斷以民地歸民番地歸番各相允服其歷任武職旗員莊產實無侵占投獻致涉爭控者應如所請照舊管業並行令該督撫遵照諭旨轉飭臺郡武員毋得再行開墾置立莊田從之○兵部議覆貝勒允祜奏

陵寢防禦獨無陞途請准其保送副總管現據

盛京將軍咨稱

昭陵曾有此例應如所請嗣後遇有副總管員缺令

陵寢大臣將本處防禦揀選一員送部從之○刑部議覆山西按察使多綸奏軍流妻屬飭差押送長途凌辱殊堪憫惻應如所請除緣坐應流及強竊盜案內免死減等并罪應軍流等僉遣女犯照舊押解外凡情願隨配者聽其親屬伴送不必僉差從之○辛未

上詣

安佑宮行禮○遣官祭賢良祠○壬申

上詣暢春園問

皇太后安○還宮○戶部議准浙江巡撫常安疏稱浙屬因糧請照直省例於文到日為始每犯日給米一升雜費錢五文原放米者將錢添給原放銀者買米散給至玉環廳新設因糧向係動支漁稅今漁稅已豁應於該同知徵收租耗穀價項下支給從之○是月直

隸馬蘭鎮總兵布蘭泰奏

陵寢總管巴圖兼管各處行宮今老病勢難兼顧請代為辦理得旨汝雖係旗下世臣而今職則綠營也內外攸分不宜越俎○署兩江總督尹繼善江南河道總督白鍾山奏修理湖河各工需員甚眾所有河工廳汛及効力人員數既不敷亦難兼顧查從前水利案內効力人員多係辦過下河工程臣等公同揀選取熟悉各段情形者一體酌委仍派實心辦公之員分查得旨是興修大工首應嚴查冒銷之弊朝廷固不惜費亦欲收實效耳○江蘇巡撫陳大受奏鎮江口之搜鹽廳京口關門橋窰灣猪婆灘等處入春潮小不能濟運業飭該管道府縣將應撈應挖之地設法疏通其三汊河淺處加撈二三尺不等現在各幫逐日過進儀徵河口舊設攔潮羅四通濟響水四閘其閘底高者原為蓄水之計

今水勢雖淺。猶可乘潮而進。且進口後。遇淺尚可起剥。非過江船隻可比。亦飭該府縣相機趲辦。得旨。此等事。必應相機速辦。若俟奏聞奉旨後。始上緊辦理。則為時已過矣。○署兩淮鹽政吉慶奏。兩淮引課全額通完。得旨。看汝總有見長之心。較之委靡者固勝。然過猶不及。亦非朕所喜也。○又奏。鹽場大使內。遇有才識平庸。尚無劣蹟之員。如由舉人及各項貢生出身者。考其文理明通。照知縣改教例。准與題請改教。得旨。安得如許。教官缺。且教官即應以庸材為之。而大使反不可以庸材為之。輕重倒置。所見甚鄙。○署安徽巡撫準泰奏。上年監臨。不將料場懷挾之徐斌等。盡法懲治。謝革職。留任恩。得旨。朕所以罪汝者。以汝不應有外吏習氣。所以宥汝者。則以人人盡如此。豈能惟責汝一人。然自今以後。應改之。○閩浙總督馬爾泰。浙江巡撫常安。奏。浙江賑務將竣。甄別各員勤惰。請將實

心辦事者。破格叙賞。得旨。所奏俱悉。州縣於此等事。盡職乃其分內之事。不應叙賞。若是則將來有冒濫假偽者。而百弊叢生矣。如果可嘉。則亦有三年之大計在。○浙江布政使潘思渠奏。浙屬被災。辦理多有未周。迺蒙獎訓。益加悚惶。至撫臣常安。實緣浙省吏猾民刁。一涉張皇。恐致藉災滋事。故外示鎮靜。而內切焦勞。自報災後。督率屬員。查勘賑恤。臣所目覩。用敢直陳。得旨。雖為公論。然又有甫聞災。而常安不肯發銀賑濟。係汝在常安前力爭。且擔承力任。乃發二萬派員查辦者。此論果確乎。○署湖廣總督鄂彌達奏。息訟弭盜之方。首嚴保甲。必先有舉察保甲者。臣擬仿古閭師亭長之制。令各牧令於貢生生監中。擇品行端潔者。聘為鄉正。大邑八人。中邑六人。小邑五人。令其專司舉察保甲。嗣後保長之選。責之鄉正。甲長之選。責之鄉長。仍令州縣將鄉正的名報部。五年勤慎無過。請給

州同縣丞職銜保長有勤慎奉公者。州縣給扁最優者。詳明督撫破格示獎。再有司向以保甲無關考成。奉行不力。應飭各該州縣。每歲躬履城鄉稽察。有能實力遵行業著成效者。該管上司即行推薦。其仍視為具文。或鄉正非其選。或委捕官吏需索。即行題叅道府。一併議處得旨。即照所議行。亦不過有名無實之政耳。汝不云乎。有司尚有奉行不力者。而欲鄉正之奉行獨力乎。○湖南巡撫蔣溥

奏湖南貢院號舍向係南北對向無地可安。爐竈號軍出柵炊爨滋弊。應將兩號併為一號。拆去中間堵壁。改令向南。再於簷下開溝洩水。計工費共一千五百兩。請准支存公銀兩估修得旨。似屬可行。然無庸特降諭旨也。咨部知之。○又奏榔桂二州銅礦出產未能充裕。現於隔遠苗疆內地。委員創採銅錫。得旨。此等事須詳酌妥為之。斷不可圖近利而忘遠憂也。○川陝總督公慶復奏。上下瞻

對番民。慣為夾壩。前因刦奪沿塘徹站官兵行李。勒獻贓賊。抗拒不遵。自宜大加懲創。上下瞻對。在鴉龍江東西夾江而居。各二十餘寨。東有大路二條。西南北共有大路三條。俱屬要隘。界連四瓦述等土司。凡瞻對之出入內地者。俱由四瓦述地界經過。從前曾以萬餘兵攻彼。猶難一時懾服。今若兵力稍弱。不足示威。應選委鎮將各一員。為正副總統。以建昌道為監紀。酌調提標各鄰近鎮協之漢

兵四千名。雜谷瓦寺木坪等之土兵四千名。俱由打箭爐出口。向該土酋等近巢駐劄。并派撥該管之明正土司。及附近之裏塘土司等。於各隘口堵禦。其四瓦述土司。向懼瞻對侵犯。不無暗相結納。實非出於本心。應開導使弗黨惡。則瞻對勢孤。然後指定各夾壩姓名。寨分令該土酋等擒獻。如上瞻對悔悟。即獎令併攻下瞻對。并令雜谷瓦寺等土司奮力前驅。大軍隨後進剿。得旨。看來有不得不

如此之勢。然須詳妥為之。以期一勞永逸。若復如鄭文煥前年之舉。何益之有。此意於李質粹請訓時。亦曾諭及。○署陝西布政使慧中奏錢糧徵解。照數准兌。遇有支放。照封驗看。一切平餘。應請裁革。至陝藩書役。向無工食。隨事需索。陋規並請查明革除。照部科書辦例。量給紙筆飯食。得旨。此等弊。只可去其太甚者。書役之弊。豈能盡革。縱動公項予之。不過多費此一項耳。而彼之需索。仍不能盡除。各省皆然。不獨陝省。此摺交慶復看。令其酌量。○陝西涼州鎮總兵哈尚德奏涼州界錯番夷。一切邊防要務。請賜訓諭。得旨。武臣多有以驕縱得禍者。在汝尤當以此為戒。至訓練兵丁。是汝分內之事。當竭力為之。而又不可欲速也。○四川巡撫紀山奏滇省開鑿川屬羅星渡河道。以濟銅運。得旨。應無分別彼此。助彼為之。○四川布政使李如蘭奏。首領佐雜人員。請與知縣教官一體甄別。得旨。

君子不為已甚者。且州縣尚不能收得人之效。而況佐貳乎。○兩廣總督那蘇圖奏。交夷內訌。彼處米價必昂。恐有內地奸商。越境販鹽。不特私漏米穀。亦恐擾動邊釁。應分飭兩省文武員弁。於緊要汛地。及山林險峻小路。設兵巡防。惟廣西之鎮安一府。向食夷鹽。今既絕其來路。該府每歲需鹽千餘包。將官鹽如數支發。并沿邊各屬。有缺少引鹽。尚須撥補者。陸續辦理。得旨。妥酌為之。

大清高宗法天隆運至誠先覺體元立極敷文奮武孝慈神聖純皇帝實錄卷之二百三十五

大清高宗法天隆運至誠先覺體元立極敷文奮武孝慈神聖純皇帝實錄卷之二百三十六

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲副都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲副都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十年乙丑三月癸酉朔日食○諭八旗

前鋒護軍等三年一次軍政原以該管大臣等不勤操演恐至懈弛所以特派王大臣閱看分別等第以示勸懲自定例以來已閱二次優者獎勵劣者懲戒各知勤勉此次著停止軍政令該管大臣章京等務在平日訓練勿致臨時貌為奮勉並曉諭兵丁等各勤操演馴致精熟至下次軍政派出王大臣閱看時如有生疎不及者朕惟該管大臣章京等是問又諭本月十二日朕御經筵○甲戌

上詣

雍和宮行禮遣官祭

歷代帝王廟○吏部等部議准湖南學政阮學浩條奏學校事宜一教官通曉吏治者少派辦地方事不特廢弛本職兼恐假便私歸請減其差委一苗獠生員歲科試卷一例彌封考校輒居下等未足鼓勵請嗣後於卷面填注苗獠字樣與民籍相較酌量位置一從前苗獠起釁多有劣生在事此輩私通勾結

行蹤詭秘最難查察請嗣後遇生員越境入尚情事除州縣詳報批飭外或學政訪聞教官中詳者亦許委州縣差役關查鄰境一永順所屬四縣在萬山中道路陡險請歲科連考以免跋涉從之○戶部議准河南巡撫碩色疏稱豫省永城等縣應解德州倉米今既改徵黑豆請將原議祥符等州縣協辦漕米統徵本色與黑豆一併起運至解臨清倉米應飭各州縣照例改折每石價銀八錢徵解

從之。○鑄給陝西延安府撫夷理事捕盜同知榆林府撫彝理事糧捕同知關防。從陝西巡撫陳宏謀請也。○乙亥。定殿試日期。諭。向來會試之期在二月。則三月發榜。四月初間殿試。雍正五年。乾隆二年。會試改期三月。則四月發榜。五月初間殿試。朕思五月天氣漸熱。向來改殿試之期者。因三月會試。係偶一舉行之事。今三月會試。已著為定例。則殿試之期。自應酌量變通。著自今科為始。於四月二十六日殿試。五月初一日傳臚。該部即通行曉諭知之。○賑直隸大城。天津。西寧。三縣。乾隆九年。電災飢民。○丙子。清明節。

上詣

壽皇殿行禮。遣官祭

永陵。

福陵。

昭陵。

昭西陵。

孝陵

孝東陵

景陵

泰陵。遣官祭

端慧皇太子園寢。○諭曰。錢斗保醫理平常。在內廷行走。於診脈治病等事。亦無用處。伊亦甚覺疎懶。不稱光祿寺卿職銜。其所加光祿寺卿銜。食正三品俸之處。俱著銷去。仍留太醫院院使行走。効力。○奉天將軍達勒當阿奏。內地撐船人等。於去年五六月間。冒出朝鮮採獵。臣自奉文後。即密飭佐領等。率兵前往搜拏。將草房窩鋪燒燬。查此等人。必係山東沿海偷渡。潛居江汊。恐春夏仍來。舊處隨飭興京。岫巖。鳳凰城。金州。水師各官。加緊巡防。凡登萊進口船隻。取驗船票。遇違例越境人。即拏解盛京刑部。如官兵疎防。分別叅處。下部知之。○賑雲南。白鹽井。乾隆九年。水災。竈戶貧民。○丁丑。

上御太和殿視朝文武陞轉各官謝恩○諭朝班行禮向來不甚整齊今日更覺參差查班御史係何人著查明其都察院堂官亦俱侍立殿廷豈無所見著大學士一併詢問具奏尋奏本日東班查班御史巴什泰常齡海明葛德潤馮元欽錢度西班查班御史三圖伊克善七格丁廷讓歐堪善沈景瀾及左都御史杭奕祿等均請交部議處得旨著交部察議○戶部議准直隸總督高斌疏稱直省廣

昌營都司向支馬糧四分守糧六分今該營兵丁如數補足請照馬步各半例支食從之

○戊寅

上詣

大高殿行禮○幸豐澤園演耕○軍機大臣議覆給事中台柱奏拉林善後事宜一倉糧移糶三姓地方查拉林倉糧今既無須接濟呼蘭應令該將軍副都統查實貯若干應否於青黃不接時運往三姓出糶並酌定數目奏

明辦理一移駐滿洲各戶墾田為業雇工者多自應賞與奴僕但於遣犯內撥給恐不安分之徒錯處滋事應令該將軍等擇其初犯鄉愚尚知畏法者賞給從之○以禮部侍郎楊錫綬為會試知貢舉大學士史貽直吏部左侍郎阿克敦為正考官兵部尚書彭維新刑部左侍郎錢陳羣為副考官○免直隸慶雲鹽山二縣竈地乾隆九年旱災額賦有差○已卯諭軍機大臣據總河白鍾山奏請修芒

稻河東西二閘共估工料銀三萬兩零向來河渠建閘每座不過數千兩今芒稻河閘工雖未知其大小寬狹何如亦何至於三萬兩之多爾等可寄信與白鍾山令其悉心查覈確實數目毋許屬員朦混開估致有浮冒侵蝕之弊著白鍾山具摺回奏尋奏芒稻河東閘有三金門西閘有七金門中間各設大石礮心約寬三丈自雍正十三年移建以來衝刷日久多有塌損非小補可期完固原估工

料銀兩。再四確核。實無浮冒。得旨。外省工程無不浮冒。而河工為尤甚。惟應時常留心查察。至於汝等大員。皆受朕深恩。亦知輕重。豈復有染指於其間。第屬員之欺隱。豈能保其全無。慎之勉之。○戶部議覆四川布政使李如蘭奏豫籌邊地倉儲。查雅州府屬為西藏孔道。現有贍對夷人滋事。應將楚省解貯穀價一萬兩。分發雅安榮經二縣。買補缺額之穀。仍各增買五千石。清溪一縣。溢額無多。亦准買三千石。如價銀不敷。於鹽茶耗羨內墊支。又川西之茂州。川南之會理州。鹽源冕寧二縣。越雋一衛。番苗相率就食。兼開採銅礦。商民需米孔殷。亦應將楚省借撥穀價內。除歸還雅安榮經清溪三縣。所支庫項外。先儘該州縣衛酌量買貯。得旨。依議速行。兵部議覆貴州總督張廣泗奏古州清江等處兵額業於乾隆六年裁減。今又經數載。苗性日馴。且附近各有汛防。毋庸多留糜餉。請再酌

裁古州鎮標中左右三營兵三百名。上江協左右兩營兵一百五十名。朗洞營左右兩軍兵一百名。下江營兵五十名。清江協左右兩軍兵二百名。台拱營左右兩軍兵一百名。丹江營左右兩軍兵六十名。都勻協分防八寨兵四十名。又古州。台拱。八寨。清江。丹江。各同知通判。現存廳標千把一員。兵五十名。亦可裁撤。其分防寨萬汛守備一員。撥回朗洞大營。各兵一時遽撤。營伍未免失業。應俟缺出停募千把留黔補用。均應如所請。從之。○工部議覆川陝總督公慶復等奏稱。陝省估修各屬城垣。在一千兩以內之華陰等十處。工程州縣合力捐修。督撫司道共勦其事。應如所請辦理。至稱咸陽等二十四州縣。俱工在一千兩以上。請將每年存剩公用銀兩儘修外。動用商雜稅銀。查此項城垣。是否均係急工。難以懸揣。現派戶部侍郎三和。馳勘甘肅一帶城堡邊牆。應令就近會同該省督撫。詳

查確勘分別緩急具奏得旨此議覆內慶復等奏稱一千兩以內之工程令州縣合力捐修督撫司道等共勦其事等語部議准行朕思大小各官所領養廉原以資其用度未必有餘可以幫修工作倘名為幫助而實派之百姓其弊更大轉不若名正言順以民力襄事之為公也此議不准行自古有力役之征庶人有赴功之義況城垣為地方保障正所以衛民而使之安堵即如人所居者廬舍耳而必環以牆垣為藩籬之計其事甚明其理易曉且官民原為一體上下所以相維今則漫無聯屬恐日久相忘猝有用民之事必且呼應不靈臣工為此奏者頗多亦不無所見朕再四思維凡有修建重大工程小民力不能辦者國家自不惜帑金為之經理至於些小城工補葺培護使之不至殘缺傾圯則小民農隙之所能為而有司之所當善為董率者也餘依議○庚辰

上幸大學士鄂爾泰第視疾戶部議覆湖南巡撫蔣溥疏稱沅江縣之萬子湖土民情願出貲建壩圍田應如所請令該撫轉飭地方官傳詢有產居民願墾者出貲不願者給價舊有漁課墾戶攤完俟成熟依限升科從之
辛巳

上御乾清門聽政諭昨日會試頭場搜檢各省舉子皆無夾帶惟有浙江溫嵩曾一人搜出細字一張乃係三場策段數條夫定例不許攜帶片紙隻字者蓋恐士子豫帶後場表策埋藏於牆壁間以待臨時之取用也溫嵩曾自應照例治罪但今年眾舉子皆知感朕培養之恩一洗從前醜惡之習其愧恥奮發之意有可嘉焉著將溫嵩曾釋放以示獎勵士眾之奉法并許溫嵩曾仍留舉人准其下科會試倘眾舉子因朕此次寬大之典將來故智復萌則國法具在難以倖免也該管大臣可即通行曉諭應試士子知之○吏部疏

請將不遵定例濫收天文生之欽天監堂司官分別革職降調得旨戴進賢劉松齡係外國人從寬免其處分進愛人本平常今又濫收天文生實屬溺職著照部議革職其滿監正事務著勒爾森兼管漢監正事務著何國宗兼管餘依議○加大學士鄂爾泰太子太傅銜○以兵部尚書彭維新充經筵講官○調甘肅布政使徐杞補用京員以吏部郎中阿思哈為甘肅布政使○是日

皇后詣桑壇位行躬桑禮

妃

嬪二人王貝勒貝子公福晉夫人三人三品以上文武大臣命婦四人以次採桑供蠶事○壬午旌表守正捐軀之山東館陶縣民趙扁頭妻甯氏○癸未諭軍機大臣等山東河南麥秋最為緊要前該撫等奏有缺雨之州縣至今半月未見再奏不知近日曾否得雨光景何如朕心深為廕念若雨澤再愆該撫

應如何籌畫豫為料理可即傳旨詢問令其速行回奏○工部議覆調任山西布政使嚴瑞龍奏晉省文水縣之永樂村石家莊蘇家莊等村汾水處其上游河身高聳易被淹浸且各村地勢平行泥沙易壅應如所請於南岸先築一堰宣洩如果河流暢順再於北岸築堰防漲從之○甲申以補行仲春經筵遣官告祭

奉先殿

傳心殿

上御文華殿講官暨侍班之大學士九卿詹事等行二跪六叩禮分班入殿內序立直講官四人出就講案前行一跪三叩禮復位直講官班第任蘭枝進講論語子路問政子曰先之勞之請益曰無倦講畢

上宣御諭曰昔敬姜之言曰夫民勞則思思則善心生逸則淫淫則忘善忘善則惡心生此正天子勞之之意夫教養二事本是一事既

教之則不能不勞之。無論木鐸之徇庠序黨
遂之設。節其性以六禮。興其德以七教。而彼
蚩蚩之民。方且視以為杆格而難行。即教之
樹藝。課以耕桑。雨淋日炙。中老農執杖而督
其子曰。力為之。其子以為是苦我勞我者有
之矣。而況官乎。此為政者勞民之難也。然而
亦易者。則有先之之誠在。夫老農勞其子。而
其子終不怨者。無他。以為其愛我教我。為我
謀而勞我。而彼亦與我共此勞也。使為政者

以惻怛之心。行忠厚之政。以身先之。則雖勞
其民。而民不以為勞。如子之從父焉。若云以
身勞之。則自有以身先之之事。在此不可以
不辨。講官暨侍班官跪聆畢。興直講官索桂
汪由敦。進講周易修辭立其誠講畢。

上宣御論曰。繫辭曰。君子居其室。出其言善。則
千里之外應之。況其過者乎。居其室。出其言
不善。則千里之外違之。況其過者乎。言行。君
子之所以動天地也。此正可與文言修辭立

誠之意相發明。蓋一言一行。無不以立誠為
要。而非獨指文辭之宜去其偽也。且道之在
天地間。無人而不具。即無人而不可行。顯蒙
庸愚者。不能無言行。即無不可立之誠。若徒
以文辭為事。攻乎此而修治之。去枝葉。絕浮
夸。以為吾將立其誠焉。則此心已非誠矣。所
謂北轅而適越耳。故程子云。修省言辭。便是
要立誠。若只是修飾言辭。為心只是為偽。蓋
深有體驗之學也。講官暨侍班官跪聆畢。大

學士張廷玉等奏曰。

皇上體備內聖外王之學。立心立政。為萬世開
太平。闡明後文先質之模。是訓是行。自九重
敷至教。洵乎宵衣旰食。揭勅幾凝。命之精微。
探本溯原。綜畫卦敘圖之妙蘊矣。臣等恭侍
講筵。親聆
聖訓。不勝欽服。奏畢。諸臣出。就拜位。行二跪六
叩禮。禮成。

上還宮。賜講官及侍班官宴於協和門。○諭二

場以詔誥表判考試應考之舉子所以覘其學問筆力其表題若獨開生面或恐士子不能一時促就則不能完局於衆文人學士顏面有關其詔誥判題亦沿習故套則舉子易於揣摩何由視其夙學甚無取也今科詔誥判題總皆係每科習見者司考諸臣未免草率著傳旨申飭之○兵部侍郎步軍統領舒赫德順天府府尹蔣炳奏京師錢文自各門嚴查後價值漸平而近京州縣錢價頓長總

平糶書三

六

因各省糧艘將次抵通閩廣洋船將次抵津及一切停泊船隻乘時南下奸民囤積販賣之所致請特降諭旨令倉場侍郎嚴飭坐糧廳將回空糧船實力稽查直隸總督嚴飭沿河文武官員將官民船隻悉心查察天津關監督將過關船內嚴搜漕運總督於直隸山東交界之菜園地方嚴飭遊擊與私鹽一體嚴查天津道府將洋船賣貨得錢壓載回空之例停止令其用銀交易並飭沿河地方官

平糶書三

六

申諭各鋪戶無得將大宗錢文售給船戶得旨著照所請行錢文一事有稱廣為開採者有稱嚴禁盜銷者有稱禁用銅器者更有稱多則用銀少則用錢者其論不一即京師現在議定章程稽查辦理亦不過補偏救弊之一端終非正本清源之至計朕思五金皆以利民鼓鑄錢文原以代白金而廣運用即如購買什物器用其價值之多寡原以銀為定准初不在錢價之低昂今不探其本惟以錢為適用其應用銀者皆以錢代而趨利之徒又復巧詐百出使錢價高昂以為得計是輕重倒置不揣其本而惟末是務也不但商民情形如此即官員辦公亦有沿習時弊者如直隸興修水利城工坐糧廳赴東採買布疋所領帑金數萬皆欲易錢運往其他官項大率類此夫所領帑項原係銀兩即報銷亦以銀數數算自應以銀給發何必兌換錢文應用若以領銀之人得受錢文為便不知所發

銀兩即少至分釐亦可按數分子與行使錢文何異況未必至分釐乎向來浙江地方有分釐皆用銀者何嘗見其不便嗣後官發銀兩之處除工部應發錢文者仍用錢文外其他支領銀兩俱即以銀給發不得復易錢文至民間日用亦當以銀為重其如何酌定條款剴切曉諭使商民共知之處著原議之大臣及現在辦理錢法之大臣詳議具奏○兵部議准署湖廣總督鄂彌達疏稱常德水師

平定縣志卷三

七

營戰船業經裁減原設兵一百四十六名無船可配應請裁守備缺將千把兵丁歸常德城守營管轄仍配原船原汛餘兵歸城守陸營銜汛似此裁併常德水師營無庸更隸龍陽至岳州水師營向隸龍陽而大湖阻隔艱於檄調應仍歸岳州城守營管轄從之○乙酉諭盛京兵部侍郎敷文曰盛京乃根本重地向來滿洲風俗淳樸居家崇尚節儉清語及馬步射無不嫻熟從無紛華靡麗之習縱

該處有漸染流俗各部大臣等亦當教導使

之返樸還淳不得互相效尤也爾等皆係董

率之員當各悉心妥辦衙門事務斷不可時

常觀戲宴會況所得無多尤不相宜爾至盛

京見伊等時傳旨曉諭並諭將軍達勒當阿

知之○閩浙總督馬爾泰疏報福清縣海口

牛口二場墾復鹽地一頃九十五畝有奇○

丙戌議政大臣議覆川陝總督公慶復奏三

齊等寨苗民仍請歸籍茂州查三齊等寨本

平定縣志卷三

八

係生苗自前撫臣年羹堯批隸瓦寺土司以

來連年構釁應如所請准歸茂州管轄每年

納糧充賦從之○又議覆鎮守寧古塔將軍

巴靈阿奏請派移駐拉林官員查阿勒楚喀

原有佐領八員防禦二員驍騎校八員筆帖

式二員擬各派一半前往仍酌量將佐領驍

騎校對換移駐並將阿勒楚喀原設協領一

員移駐拉林所估修建廨舍銀兩應照原議

給予從之○工部議准江南河道總督白鍾

山奏由閘稅課每年考覈事宜河臣勢難兼顧請併歸蘇州巡撫管理其銀仍解河工備用從之○丁亥

上耕藉詣

先農壇行禮更服至藉田所

躬耕三推復加一推

御觀耕臺命裕親王廣祿和親王弘晝恒親王

弘旺各五推吏部侍郎歸宣光戶部尚書海

望禮部侍郎勒爾森兵部尚書班第刑部侍

守錄卷三三七

元

郎兆惠工部侍郎索柱左都御史劉統勲通

政使蘊著大理寺少卿盧承綸各九推畢順

天府府尹率農夫終畝賞耆老農夫如例

大清高宗法天隆運至誠先覺體元立極敷文
奮武孝慈神聖純皇帝實錄卷之二百三十六

守錄卷三三七

三

大清高宗法天隆運至誠先覺體元立極敷文奮武孝慈神聖純皇帝實錄卷之二百三十七

監修總纂官總纂官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務黃旗滿洲副都統世襲騎都尉軍功七級隨帶加一級尋常加二級軍功紀錄一次臣履桂

總裁官經筵講官太子太傅文華殿大學士文淵閣領事稽察欽奉 上諭事件處管理刑部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲副都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十年乙丑三月戊子。

平定卷一百一十一

上詣暢春園問

皇太后安。○幸圓明園。○禮部議覆廣東學政

金洪銓疏稱文武生報捐有列欠考項下者

先送學臣補考查欠考諸生必令補考始准

收捐不但阻其急公亦恐吏胥藉端需索所

請似不可行至稱歲考前臨期捐監未頒部

照而倉收已入手者令其免考應如所請從

之○兵部議覆川陝總督公慶復疏稱武職

支食名糧前准部咨令按營制兵額酌為變

通茲查得延綏一鎮向係守備以上馬步各

半千總馬一步四把總馬一步三請照馬步

各半例千總給與馬二步三把總給與馬二

步二河州鎮屬之紅苦二堡把總向食守糧

五分請各加二分再陝甘軍務告竣其營中

公費名糧自宜畫一請照部例每兵百名止

扣二名均應如所請從之○己丑諭曰陳綸

來京陞見自陳年力就衰耳亦重聽恐不勝

昭通重任等語朕看其精神雖尚健旺而重

平定卷一百一十七

聽是實著在京候旨昭通鎮總兵員缺緊要

著楚姚鎮總兵董芳調補楚姚鎮總兵員缺

著臨元鎮總兵紀龍調補臨元鎮總兵員缺

著鄭文煥補授○諭軍機大臣等據張允隨

奏稱昭通鎮總兵陳綸年力就衰耳亦重聽

昭通地廣兵多精神恐難周到等語今陳綸

來京陞見朕看其年力就衰是實已將伊留

京候旨其昭通鎮員缺緊要將董芳調補矣

又張允隨奏摺中稱紀龍亦年老恐不勝臨

元重任。故亦調補楚姚。不知紀龍於楚姚尚
可勝任否。並鄭文煥於臨元要缺。相宜與否。
令其留心試看。數月之後。具摺回奏。○協辦
大學士禮部尚書三泰。以病乞休。得旨。卿才
品優長。簡任秩宗。協贊機務。兼掌太常鴻臚。
宣力年久。正資料理。覽奏以老病乞休。情詞
懇切。著以原官致仕。加太子太保。示朕眷注
舊臣之至意。該部知道。○庚寅。

上詣

實錄卷三三七

三

安佑宮行禮。○工部議准。署湖廣總督鄂彌達
疏稱。鎮筸向無通商水道。請將鎮城溪河一
百二十餘里。開鑿深通。工費在辰關稅項下
動支。從之。○又議准。雲南總督張允隨疏稱。
霑益。南寧。陸涼。三州縣境內。灘河一道。因亮
子口。黑寶灘。至響水壩。二十餘里。率多沙淤。
而巖芳橋一處。石皆坍塌。請動帑開修。從之。
○以吏部尚書公訥親。協辦大學士事務。調
刑部尚書來保。為禮部尚書。以刑部左侍郎

盛安。為刑部尚書。鑲藍旗滿洲副都統雅爾
圖。為刑部左侍郎。○調雲南督標中軍副將
黃士俊。赴部引見。○辛卯。

上詣暢春園。問

皇太后安。○諭。朕今年木蘭行圍。由多倫諾爾。
進張家口回京。程途較遠。與往年不同。所有
此次扈從之侍衛。章京。官員。兵丁。拜唐阿等。
著仍照初次行圍之例。特加恩賞。○又諭。訥
親。協辦大學士事務。不必兼管戶部尚書鑾
儀衛事。其鑾儀衛掌衛事員缺。著哈達哈補
授。○壬辰。諭。六年木蘭行圍。除隨往之拜唐
阿人等外。所有侍衛。章京。官員。兵丁等。曾派
王大臣看射布把。分別等第賞賚。本年木蘭
行圍。所有派出之侍衛。章京。官員。兵丁。仍著
照六年之例。令射布把。定擬等第。奏請賞賚。
所有應派看射布把之王大臣。御前侍衛。著
領侍衛內大臣。查明向例。呈進名單。請旨點
派。○大學士等議。覆詹事李紱奏。八旗丁口。

不得食餉者多。而畿輔五百里內。皆旗人所
得居住。請自巡捕三營。督提二標。天津。宣化。
馬蘭。易州等鎮。所轄馬步兵。遇綠旗缺出。將
附近旗丁頂補。補至十名。設一領催。五十名。
設一驍騎校。三百名。設一防守尉。查駐防與
綠旗營制本屬不同。但旗人所資養贍。惟在
錢糧一項。而綠旗兵額。係漢軍旗分者本少。
自宜酌為變通。除直隸督提各標營。分防散
處。毋庸頂補外。應如所請。嗣後巡捕三營民
人兵丁。每出二缺。令漢軍壯丁。兵丁子弟。另
記檔案。開戶人等。四項間補。此內如係漢軍
所出缺。仍以漢軍壯丁充補。馬蘭。泰寧。二鎮。
令該督提。將附近各標營。按照兵額多寡。酌
量分別若干缺。令二鎮兵丁。遇缺間補。凡調
補及別項缺出。亦照巡捕三營辦理。其應補
兵缺之漢軍壯丁。兵部行文該旗。選年力壯
健。弓馬熟習者。送部。俟該鎮報有十缺。照旗
分派員送往。每名給盤費銀十兩。其無營房

者。每名給價。蓋房二間。均於八旗公產地價
內動支。至此項改補綠旗兵缺。俱有提鎮將
弁管轄。無庸添設領催。驍騎校。防守尉。從之。
○癸巳。增廣西同知通判及州縣各官養廉。
諭廣西地處邊遠。聞各官養廉。有不敷用者。
蓋緣酌議之初。皆就各地方餘潤之多寡。以
定數目。是以參差不等。其不足之員。應思變
通之法。以濟其艱窘。上年朕特降諭旨。令那
蘇圖。託庸。將州縣以及同知通判各官。秉公
確查。何員應增若干。並將何項銀兩。酌撥萬
金。給與。逐一妥議具奏。今據那蘇圖。託庸。奏
稱。臣等率同司道。細覈通省同知通判州縣
等官。除原撥養廉耗羨。已足敷用。或經管鹽
務等項。現有餘潤。並未缺少者。均毋庸增給
外。其餘四十九缺。按其事務之繁簡。地方之
衝僻。擬增養廉四百兩者二缺。增三百兩者
九缺。增二百兩者二十七缺。增一百兩者十
一缺。共需萬金之數。查粵省鹽務項下額徵

西稅銀兩。係屬正項。可以動撥。謹繕清單。進呈等語。著照那蘇圖。託庸所議之數。從本年為始。即行增給。俾各員等用度寬舒。潔已奉公。以副朕體恤臣工之至意。原單並發。該部即遵諭行。○諭軍機大臣等。廣西左江鎮總兵楊剛奏摺。及朕硃批。可俱鈔錄。寄與那蘇圖閱看。其奏請陞見之處。語氣游移。或是惟恐來京陞見耶。其平日辦事如何。俱著那蘇圖據實回奏。○戶部議准。浙江巡撫常安疏稱。浙屬上年被水。請將成災之仁和。錢塘海寧。富陽。餘杭。新城。於潛。昌化。安吉。歸安。烏程。長興。德清。武康。山陰。會稽。蕭山。諸暨。餘姚。上虞。蘭谿。西安。龍游。常山。開化。建德。淳安。遂安。桐廬。分水。三十州縣。應完乾隆九年錢糧。分別蠲免。其勘不成災之金華。湯溪。二縣。及仁和。錢清。曹娥。金山。石堰。五場。湖州。衢州。嚴州。三所。應完地賦場課。統請緩徵。得旨。依議速行。○緩徵廣東茂名。化州。吳川。羅定。四州縣。

乾隆九年蟲災額賦。○甲午。
上詣暢春園。問

皇太后安。○軍機大臣議覆兩廣總督那蘇圖奏稱。交趾莫姓之婿。有岑敬康者。易名莫康武。冒為莫敬光子。潛入交趾境內。煽動夷官。攻奪太平。高原等處。與黎夷日尋干戈。請遴遣大員。召黎維禕。莫康武。至鎮南關宣諭。令其息兵。竊思黎莫構釁。揣其事勢。遣使到彼。未必一呼而至。即令畏威而來。受命而去。夷性狡猾。保無朝盟夕棄。昔漢武時。東粵相攻。使汲黯往視。至吳而還。報曰。粵人相攻。固其俗。不足以辱天子使者。此言甚合治體。所請遣使宣諭。事不可行。應令該督那蘇圖。仍遵前旨。轉飭沿邊文武員弁。各就地方形勢。加意防範。毋令侵擾邊界。報可。○乙未。
上詣暢春園。問

皇太后安。○諭曰。大學士史貽直。陳世倌。協辦大學士事務。吏部尚書劉於義。禮部尚書來

保直隸總督高斌雲南總督張允隨貴州總督張廣泗皆才品優長分猷中外謹慎素著宣力多年史貽直陳世倌來保高斌俱著加太子太保劉於義張允隨張廣泗俱著加太子少保以昭恩眷○兵部議准署兩江總督尹繼善疏稱贛榆縣汎地二十一處沐陽縣汎地一十九處兵俱賃廟居住請每汎各添蓋營房馬兵添建馬棚工料銀在司庫耗羨項內動支從之○丁酉諭曰原任松潘總兵邵銓朕曾降旨令其來京以內地總兵補用今據川陝總督慶復奏稱松潘鎮中營遊擊張允敬揭報邵銓任內營私取利款蹟種種應行質審等語邵銓著解任候審不必來京俟審案清楚之後應否來京著該督請旨○

總理

三陵事務多羅貝勒允祜議覆

孝陵副總管常祿奏請於贊禮郎內每部揀選能辦事者二員題陞主事幫辦本部事務查

贊禮郎額設無多若於該員內揀選能辦事

之人甚屬難得且向無題陞主事例應擇通

曉清漢文字能學辦部務者每部各一員令

其在部學習按俸推陞報聞○吏部議准江

西學政金德瑛奏定例學臣出案發落後將

縣府考卷中解為時稍遲文氣筆跡皆可摹

擬抽換請嗣後於院試招覆日即令提調官

解送與取卷一同磨對從之○工部議准協

辦大學士事務前署直隸總督劉於義疏稱

北運河楊家廳王甫汎張家莊等處隄壩工

程係大溜頂衝甚屬危險請添建草壩幫培

子埝從之○豁直隸蔚縣賈家灣乾隆九年

水衝地賦○戊戌遣官祭黑龍潭

昭靈沛澤龍王之神○諭軍機大臣等朕前

降旨寬免各關米麥稅銀所以紓商力而平

糧價實普惠民生之至意也又恐盈餘減少

戶部稽覈過嚴是以降旨惟令該撫就近查

奏無非欲得其實情耳乃歷年以來朕留心

體察。自降旨免稅以後。所報盈餘。無不短少者。故上年又復降旨。訓諭各督撫等。務期覈實辦理。不得視為具文。近日以來。各省所報米糧過關之數。日見其多。而稅課交官之數。日見其少。即如臨清關。七年免過米麥稅一萬七千二百九十餘兩。八年即免過米麥稅四萬七千三百餘兩。淮安關。七年免過米豆稅十九萬三千四百餘兩。八年即免過米豆稅二十五萬六千八百餘兩。潞野關。乾隆七年。一年免過米豆稅二十一萬二千餘兩。八年分四個月。即免過米豆稅九萬六千九百九十餘兩。再臨清關。六年缺額八千四百餘兩。七年即缺額一萬五千二百六十餘兩。由關。七年缺額一萬一百五十餘兩。其他關口。大率類此。夫年歲即有不齊。而每年過關米糧。其多寡之數。大約不甚懸殊。若果過關米豆。遞年有加。則彼處米豆價。即應大平。何以各督撫所奏糧價摺中。又未有較往年大平之處。

況米豆免稅之條。並非先免何項。續又增免何項。又非於米豆之外。添免別項。稅銀何以逐年遞減如此。其中委曲。實有可疑。該管官員。即無染指。其所委吏胥人等。未必一無透漏。以致米稅雖蠲。米價未減。而商民未受其益。稅課日見有虧。朕特恩蠲免。不惜百萬之多。豈惜此區區盈餘。加之計較。特以惠不及商與民。則政為徒善。且恐漸啟侵隱之端。轉使臣工罹於罪譴。則甚非朕恤商惠民之本意矣。各該督撫等。其善體朕心。毋錯會朕意。務遵前旨。覈實辦理。仍將所以遞年減少之故。明白奏聞。勿事隱飾。○山西巡撫阿里衮議覆。調任山西布政使嚴瑞龍條奏。歸化城命盜案件。如重犯專係蒙古。或蒙民同為兇盜。均罹重辟。俱令同知招解歸綏道。由都統審定。移臬司詳撫具題。其不與民人交涉之案。由同知解道會同都統覆審報部。下部議行。○江西巡撫塞楞額疏報。靖安上高宜春。

分宜萍鄉萬載吉水萬安臨川上饒玉山鉛山建昌大庾袁州等縣衛乾隆八年分開墾地一十三頃三十六畝有奇。○準噶爾部人朋蘇克率屬來降。命賞給安插如例。○己亥。御史李慎修奏。北方民俗。便於用錢。現在廷臣議定條款。未免苛急煩碎。請悉與蠲除。聽民自便。得旨。李慎修此奏。不無所見。著大學士九卿議奏。但摺中所云。諸大臣所議。苛急煩碎等語。甚非立言之體。諸大臣辦理錢法

一事。李慎修容或不知。朕則無不知。且在朝之大臣。與百執事。宜亦無不知者。亦可謂竭智盡慮於其間。若各部大臣。皆似此任事。急公。乃朕所嘉悅。求之而弗可得者也。第大臣所用。不過司員。此中賢否不一。加以市井近利之徒。巧詐百出。以數人之智力。敵千萬人之智力。是以有所不能。而交易之事。原應聽民之便。非可以法禁之繩之者。此朕平心靜氣之論。即令如此辦理。亦朕之失於斟酌。而

已。謂諸大臣奉行不善。朕亦不能為之諱。而李慎修草野新進。直謂之曰。苛急煩碎。試問此數人所辦理。有所入已乎。有為國家錢糧起見之意乎。以此詆毀大臣。甚非靖共爾位之意。李慎修著嚴飭行。○河南巡撫碩色疏報禹州濟源三州縣。乾隆八年分開墾荒地二十七畝有奇。○庚子。

上詣暢春園。問

皇太后安。○選會試落卷錄用教職。并加恩年

老舉人。諭雍正五年。會試榜後。下第舉人。曾

蒙

皇考恩旨。派出大臣檢閱落卷。將其中文理明通者。各省取數十人。再驗看人材年齒。發往以教職補用。朕即位以來。亦曾舉行。今科來京會試舉人。較多於往歲。而且積習一除。士風丕振。是應加恩。以示鼓勵。著於出榜後。將落卷封貯。該部請旨。派出大臣。秉公閱看。選取。發往各省。畀以司鐸之任。俾伊等早膺官

職及時効用。以圖上進。於課士或有裨補。其如何分別選用之處。著交與吏部查辦。至人員多寡之數。亦交與吏部。將從前所發各員。某省已選若干。未選若干。此次應選若干。一併酌議具奏請旨。其有年八十以上者。該部帶領引見。朕將優惠焉。○禮部以會試中額請得旨。這會試。滿洲蒙古取中七名。漢軍取中二名。直隸取中二十五名。奉天取中二名。山東取中十七名。山西取中二十名。河南取中十四名。陝西取中十八名。江南取中三十六名。浙江取中三十二名。江西取中三十一名。湖北取中十四名。湖南取中八名。福建取中十八名。廣東取中二十名。廣西取中八名。四川取中十一名。貴州取中十名。雲南取中十名。南卷五經取中二名。北卷五經取中一名。中卷五經取中一名。○辛丑。戶部議准。湖南巡撫蔣漣疏稱。各省捐監穀額。業經奉旨酌減。請將湖南省各項捐監穀石。悉減一五

收納從之。○壬寅。諭曰。禮部尚書來保。前在刑部尚書任內。有革職留任之案。今已閱三年。著准其開復。○軍機大臣議覆。四川巡撫紀山奏稱。瞻對蠻苗。屢經搶劫不法。自宜大加懲創。而臣所尤慮者。準噶爾所留喇嘛羅卜藏丹怎三人。無故潛逃。正在捲徹官兵之候。保無報信準噶爾。使其乘機窺伺。又熬茶夷使回巢未久。即有西藏所屬之羅藏七立工布朋錯三人。欲逃往青海。其情皆有可疑。請復設自藏至爐臺站官兵。以為思患豫防之計。查臺站官兵一千餘名。不過遞送公文。從前杭奕祿碩色。紀山索拜。先後請徹。俱已准行。但邊防最宜慎重。準噶爾素性嗜利。現在赴藏熬茶。不惜重費。終未給與喇嘛。或萌覬覦西藏之意。亦未可定。所請添設臺站之處。應密交傳清。查看現在安設臺站情形。會商該督撫妥議具奏。從之。○是月。署安徽巡撫準泰奏。安省各屬陸續得雨霑足。惟廬州

府之無為合肥巢縣池州府之銅陵石埭六安州并屬縣霍山鳳陽府之壽宿臨淮定遠靈璧鳳臺等州縣望澤尚殷得旨所奏俱悉其廬池鳳三屬若有受旱情形可悉心妥辦毋致農民失所也。署湖廣總督鄂彌達湖北巡撫晏斯盛奏武昌郡城內貢院後之鳳凰山地處高坡應添設礮位其尤要者武勝門北城角外對紫荊山止隔一濠居民稀少應蓋造官房五間兵房十間添造礮房二間礮門改向山後循城而南為白雲臺應添造礮房一間窩舖三間漢陽門外黃鶴樓礮房應改築高基此外如蕭山礮楚王臺諸要害一切礮位礮房窩舖均有移置添設之處請於奏准修理塘房項內通融湊辦其看守兵丁即於督撫兩標內就近撥防礮位將荊州府舊存大礮二十餘位移用得旨知道了妥協辦理可也。湖北巡撫晏斯盛奏漢口一鎮商賈輳集請令鹽當米木花布藥材六行。

及他省會館各建社倉擇客商之久住而樂善者經理其事得旨若行之善則今之一米商即可為商社矣若行之不善是益一行為六行因積之人米必大貴再與鄂彌達熟籌妥酌奏聞。巡察山東漕運御史沈廷芳奏微山湖之郝山馬令吳家橋各段土隄共二千四百餘丈請一律改建石工得旨若應修者早已修建矣汝不過因巡漕偶一經過必係聽信地方喜事之言不然則是河員欲舉大工以圖利者之論而汝未深悉原委遂欲建此大工亦可謂冒昧之至矣。○川陝總督公慶復陝西巡撫陳宏謀奏常平社倉關係民食自應善為經理今酌定常平之穀存七出三社倉之穀存半出半令州縣封印後按耕種遲早豫立借期務須力田殷實兼有的保方準出借有麥者夏還有穀者秋還倘民間無需多借留倉備貯一遇糧石踴貴即可詳糶以平市價其社正副擇殷實公正者充

當發給印簿。將借戶保人花名登記。官為稽察。如村莊距遠者。聽其分社便民。至積年舊欠。現在陸續歸款。如仍未完。不准再借。得旨。所奏俱悉。有治人無治法。汝等酌妥為之。○川陝總督公慶復奏。瞻對夾壩。出沒不常。業已札知撫提。如應用兵。即妥速辦理。兵有不敷。就近調遣。現在一路塘遞。已撥土兵巡護。事竣後。或仍設臺站。或應作何防範。酌議奏聞。得旨。所奏俱悉。○四川巡撫紀山覆奏川

中法集言三十七

十九

省布政使李如蘭。品行端重。而器量稍隘。按察使倉德。操守清廉。而才具不足。臣與和衷交勗。俱有進境。得旨。所奏俱悉。但一年之久。始奏藩臬兩人。而府道全未奏及。非不留心。則無知人之明也。戒之。○又議奏官莊田地。兵丁任種納租。未免曠弛營務。且所入有限。不能遍濟兵艱。應如重慶鎮臣邱策普所請。照重慶鎮標塘田。悉為變價。與節年動存租銀。一併買貯米石。遇青黃不接時。按名借給。

關餉扣除。得旨。著如所議行。○兩廣總督那蘇圖奏。交夷內訌。自應加意防邊。查粵西太平。南寧鎮安三府。關隘最為綿長。私路皆可透越。實不能一槩堵塞。請擇險要者。設卡二處。勢分犄角。次要者。設卡一處。嚴為鎖鑰。或酌派兵勇。或兼任弁委。密為隄防。再。邊民嗜利。保無攜內地米糧。往易夷鹽。雖設保甲編查。近聞有專委頭目經營者。有遺漏村寨未編者。應申令漢土各官。實力稽察。得旨。所奏

中法集言三十八

二十

俱悉。○又奏夷地驅驢。前接諒山。為通交趾大路。與廣西龍憑營之鎮南大關。及旭轟營之扣山關。由村等處。相距五十里。現有賊匪攻破交地。夷官率兵逃避。惟恐乘機竊發。驚擾居民。查新太協副將張廷柱。現奉調取引見該員熟悉邊地情形。未便驟易生手。請仍令任事。暫緩給咨赴部。得旨。是。知道了。○廣西布政使鄂昌奏。粵西苗蠻情性。大畧與甘肅番猓相似。而刁悍尤甚。撫馭之道。首在察

逐漢奸。不許肆行煽惑。文武員弁。無事不得
濫差兵役。擅入彼境。如應行派巡之事。必須
厚給路費。免其勒取財賄。遇苗蠻干法。盡法
處治。至安夷自相攻殺。現已撥兵守禦沿邊
關隘。壘塞通交私路。併添設子卡分佈。務使
嚴密。得旨所奏俱悉。○雲南總督兼管巡撫
張允隨奏。夷賊攻破交目。復占八寶地方。耕
種。賊氛驟難寧息。且該地去邊界頗遠。壩洒
一汛。煙瘴最盛。難以久駐。已行令開化鎮。安
設土著兵九十名。分守要隘。將餘兵撤回。得
旨所奏俱悉。○又奏。東川府屬。那姑汎荒地
一區。據漢夷人呈請。於披戛河築壩引水。開
鑽山洞。放注可成水田七八千畝。當飭布政
使。借給庫銀一千兩。責成東川府上緊開築。
又府城西門外龍潭。水源甚大。可開渠繞過
東北兩門。引灌川舍瓦泥各寨陸地。其五龍
募魚洞一帶田畝。改用一里河之水。城外滿
壩皆成水田。現飭東川府勸諭農民。及時經

理工費。皆業戶捐輸。奏入。報聞。○又奏。金沙
江下游通川河道。今春水勢稍減。凡最險次
險各灘工。俱可築壩開鑿。得旨。若果如所言。
則成功可望。來往行旅受益。斯朕所愉快者
耳。

大清高宗法天隆運至誠先覺體元立極敷文
奮武孝慈神聖純皇帝實錄卷之二百三十七

大清高宗法天隆運至誠先覺體元立極敷文奮武孝慈神聖純皇帝實錄卷之二百三十八

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次日慶柱

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級日慶柱內大臣戶部尚書鑲藍旗滿洲都統軍功紀錄五次

尋常紀錄十四次日德琿經筵講官太子少保工部尚書紀錄六次日曹振鏞尋奉

敕修

乾隆十年乙丑夏四月癸卯朔享

平定先王二十

太廟遣恒親王弘晳恭代行禮 諭曰黑龍江

副都統瑪熙那著來京候旨所遺員缺著散

秩大臣阿斯海補授墨爾根城副都統員缺

著齊齊哈爾副都統布爾沙調補所遺員缺

著山海關協領遐圖補授遐圖所遺員缺著

準提保補授 戶部議覆直隸總督高斌疏

稱遵化州鮎魚關外瓦罐嶺存剩荒地六頃

七十九畝九分令該關兵就近開墾照旱地

十年起科之例按畝輸糧免其扣抵月米經

臣部覆令照板窄二汎墾種地畝所得籽粒

即抵應支本色米之例茲據該督覆稱鮎魚

關額兵六十七名月給餉銀一兩米三斗折

銀三錢按地分撥每名給地十畝一分零較

板窄二汎兵月支餉銀二兩至四兩不等本

色米一斗之數實屬兵多餉少且瓦罐嶺沙

石難耕收穫無幾懇仍照前奏辦理應如所

請從之 兵部等部議覆直隸總督高斌疏

稱古北口改設提標三營增兵丁軍器子母

礮位新製盔甲鍋帳堆貯營房風火堪虞請

於提標三營守備署旁各建庫房六間在司

庫節年耗羨銀內撥造應如所請從之 工

部等部議覆署理江南總督尹繼善等奏稱

淮揚一帶河道均關河防鹽運

皇上特命尚書公訥親履勘通籌臣等悉心商

酌以期萬全札商意見相合欲治上源應先

治下游欲挑河道當並籌鹽運應將原奏議

挑之高郵官河並蚌蜒梓新車路白塗海溝

興鹽界河東西官河南北串場河范堤添建
閘座金門及閘下歸海引河俱擬急修其運
鹽河通州城河丁堰河至任家港等處俱擬
緩修急修之中如海溝車路等河及閘下歸
海引河乃尾閘宣洩處尤為喫緊限四月內
首先挑竣至串場河亦應急修但正值煎鹽
時應俟冬末春初停煎之候趲挑此下河各
工之次第也上河各工乃湖河遞減宣洩之
處文華寺閘座引河分洩上游餘水歸白馬

湖下注高寶諸湖最為緊要應擬急修餘如
華家灘大新河王家港茅塘港并邵伯通運
引河俱擬緩修此上河各工之次第也各工
內關鹽運者應於鹽庫支銀四十八萬餘兩
令商人分十年還項至關湖河洩水各工估
需銀五十六萬餘兩應將天然南北二壩及
林家西沈家西等工存銀二十二萬餘兩就
近撥用餘三十五萬兩應於上下江藩庫捐
款項下撥用再南關車邏二滾壩減去尺寸

已照原奏趲辦其鹽河通江河港議建閘壩
俟挑鹽河時相度辦理至天然土壩工程甚
堅無庸灰土夯築惟將土壩改與南壩相平
視水勢大小相機妥辦均應如所奏辦理得
旨依議速行欽差協辦大學士吏部尚書
劉於義直隸總督高斌奏查勘各縣河道閘
座工程挑濬修築業經飭屬因地制宜妥為
籌辦至途間得雨雖未霑足而地氣滋潤麥
苗可望有收得旨所奏俱悉至麥苗可望有
收之語竟似過實以目下光景論設十日得
透雨可得八九分若不得雨則低田六七分
高田四五分而已雖較去年固勝而以冬末
春初之雨雪景象觀之豈不虛此

天恩哉此朕之所以跼蹐靡寧耳○山東巡撫
喀爾吉善疏報乾隆八年萊蕪濟寧莒州等
三州縣及榮城縣收併成山衛開墾旱田地
共一十七頃一十九畝有奇○署廣西巡撫
託庸疏報乾隆八年桂林平樂梧州柳州太

平鬱林等府州屬開墾水田地一項一十八畝有奇。甲辰

上御勤政殿聽政。諭嗣後由副都統補授侍郎者或准兼副都統或不准兼副都統之處該部即繕摺請旨。又諭軍機大臣等寧古塔解交樺皮武備院不能盡用與其採解浮多徒勞兵力何若計其足用數目覈減解交可寄知該將軍嗣後照武備院定額每次解交花白樺皮共一萬張。四川道監察御史

張孝捏奏士子出場多將文字謄送先達評閱現奉特旨俟出榜後派大臣另挑落卷畀以司鐸將來所派大臣未必非即從前送閱之人嫌疑不免請令吏部議定各省應取明通數目即咨禮部行知內簾考官於正榜外再取明通為一榜得旨著照所請速行該部知道以太僕寺卿劉綸為大理寺卿以太常寺少卿熊學鵬為右通政使予故刑部尚書張照祭葬如例諡文敏乙巳

上詣暢春園問

皇太后安。諭山東武定府屬地土素稱饑薄兼以連年被災之後元氣未復去秋雖獲有收而冬春雨雪稀少種麥無多今聞甘霖雖沛小民東作方興當此青黃不接之時必無餘力以辦國課朕心廑念著將惠民陽信海豐樂陵濱州商河利津霑化蒲臺青城等十州縣乾隆九年未完錢糧十年應徵新賦概緩至本年秋成後按款徵收俾閭閻得免追呼之擾其乾隆八九兩年出借口糧籽種應於本年夏秋兩熟分別徵完者亦著緩至秋收後開徵以紓民力該部即遵諭行。諭曰廣西柳州府知府譚襄世泗城府知府劉曄潭著調取來京引見柳州府員缺已降旨將成貴補授其所遺泗城一缺著各部於從前由行取補授之郎中員外郎內合例人員揀選保送吏部帶領引見如無此項人員即於應用知府之部員內保送引見。長蘆鹽政

伊拉齊奏海豐樂陵二縣夏麥被旱秋禾歉收額徵民糧奉旨准蠲其場竈地畝夏麥被旱秋禾亦止六分所有額徵竈課請照民糧一體蠲緩得旨下部速議尋議應如所奏辦理從之命禮部侍郎勒爾森兼管鑲紅旗滿洲副都統刑部侍郎雅爾圖仍兼管鑲藍旗滿洲副都統丙午諭前據安徽巡撫準泰題叅宣城縣知縣段雲翮聚衆開堂一案已降旨令該署督嚴審究擬今御史張漢請

特遣公忠大臣采訪審斷朕思督撫大吏身任封疆奉旨承審此案其有無指使情弊自必秉公審擬何必另派大臣前往况部院大臣皆有應辦部務外省此等事件甚多京中大臣亦不勝其差遣且其摺中又稱采訪於官必扶同迎合采訪本縣又恐毀謗曲飾或鄰省道路之間定有公論等語豈本郡本邑之言皆不可信而道路傳聞之語轉可據以定案乎所見殊屬卑鄙錯謬但伊既有此奏

著刑部堂官遴選賢能司官一員前往會同該督審擬具奏○訓正文體諭國家設制科取士首重者在四書文蓋以六經精微盡於四子書設非讀書窮理篤志潛心而欲握管揮毫發先聖之義蘊不大相逕庭耶我

皇考有清真雅正之訓朕題貢院詩曰言孔孟言大是難乃古今之通論非一人之臆說也近今士子以科名難於倖獲或故為艱深語或矜為俳儷詞爭長角勝風簷鎖院中偶有得售彼此仿效為奪幟爭標良技不知文風日下文品日卑有關國家掄才大典非細故也夫古人論文以渾金璞玉不雕不琢為比未有穿鑿支離可以傳世行遠者至於詩賦投藻敷華雖不免組織渲染然亦必有真氣貫乎其中乃為佳作今於四書文採掇詞華以示淹博不啻於孔孟立言本意相去萬里矣先正具在罔識遵從習俗難化職此之故嗣自今其令各省督學諸臣時時訓飭鄉會

考官加意區擇凡有乖於先輩大家理法者擯棄不錄則詭遇之習可息士風還淳朕有厚望焉該部通行曉諭中外知之○丁未戶部議覆福建巡撫周學健疏稱閩省延平汀州二府永春龍巖二州屬沙縣尤溪永安長汀歸化上杭大田漳平等八縣開煽鐵爐年納爐餉請自乾隆八年為始經前撫劉於義題准部覆行令查明有無未便今查並無妨礙田園墳墓所雇人夫俱非外來流民鑄出鐵觔亦止鑄造農具沿海口岸員弁嚴查不致透漏外洋應如所題准其開煽輸課從之又議覆漕運總督顧琮疏稱揚州衛二幫量存船二十四隻應行裁汰應如所請至稱江南之興武衛三七兩幫江淮衛八幫素稱疲敝無丁可僉請將江興二衛貧疲丁船裁減即以揚衛應減之船抵補出運之處有無未便應令該督顧琮會同江督確查妥議具奏到日再議從之 戊申戶部議准長蘆鹽

政伊拉齊疏報乾隆九年分富國場墾竈地一十二畝永阜場墾池地二畝官臺場墾池地三畝固堤場墾池地三十七畝三分分年起科從之○兵部議奏隨營候推千總例於雙月兩委班內銓選因發回原任之年滿千總無班可選奏將第二委班借與發回原任之年滿千總推用用畢仍用隨營候推千總今隨營推用千總人數甚多止以一班銓選未免壅滯請於第二委班下增一班銓補隨營候推千總與各項人員輪班推用俟回原任千總用完仍將第二委班歸還隨營候推千總該員等共有三班銓選得以漸次疏通又查發回各省以守備題補之千總及各項候補守備人員例遇題補缺出與豫保人員輪流間補現在各省候補人員甚眾而豫保千總現任食俸尚無候缺之苦若與積俸年久候補各項人員輪流間補未免過優乾隆九年七月議覆川督以第一缺分用滿員第

二缺掣用豫保千總第三四五缺於候補人員內揀選題補其未分用滿員之提鎮協營以第一缺掣補豫保千總第二三四缺題補候補人員嗣後各省候補守備人員與豫保千總應照川省補用之例方為允協從之
兵部侍郎王承堯以病乞解任得旨王承堯著以原品休致 已酉

上詣暢春園問

皇太后安奉

皇太后御長春仙館 諭朕聞湖廣永州鎮總兵馮廷雄年力已衰辦事寬縱不勝總兵之任著以原品休致永州鎮總兵員缺著將鎮草總兵王廷樞調補鎮草總兵員缺緊要著鄂彌達於所屬總兵內揀選一員調補其所遺員缺著原任昭通鎮總兵陳綸補授陳綸著前往湖廣候缺 諭軍機大臣等前張允隨奏稱昭通鎮總兵陳綸年力就衰耳亦重聽不勝昭通要缺之任昨陳綸來京陛見朕

看其重聽是實精神尚不甚衰或可用於事簡之地是以命往湖廣候缺爾等可寄信與鄂彌達令其留心試看若尚可用即調補一缺如不可用亦據實陳奏 工部等部議覆江蘇巡撫陳大受疏稱江都縣瓜洲城垣因乾隆六年七八月狂風大雨江潮漲漫將護城石岸衝損並致城垣倒卸勘係江防要地亟宜修固估銀九百九十二兩請於匣費項下支給興修應如所請辦理從之 實授宋

厚為貴州按察使 庚戌

上奉

皇太后還暢春園 辛亥

上詣暢春園問

皇太后安

上還宮 幸瀛臺 戶部議覆署安徽巡撫準泰疏稱太常寺少卿今任順天府府尹蔣炳條奏內地州縣請酌裁民壯一案查安省濱臨江淮及洪澤諸湖均關險要且或界連數

省地處衝繁峻嶺崇山易藏奸宄現存民壯自四十名至二十四名不等並非冗役今除要區劇邑無從議減外其餘州縣於原議裁汰三十八名外復酌裁一百八十二名並飭各屬將實存民壯務選壯健不時操練應如所議辦理從之工部等部議覆貴州總督張廣泗疏稱黔省上下兩游新闢新設苗疆之古州清江八寨長寨歸化及逼近新疆之黎平府提臣駐劄之安順府都勻大定平遠獨山黃草壩等處各城垣均關緊要宜急興修請將黔省辦運京鉛水腳節省銀內除動支公費尚有餘銀酌量各該處工程緩急次第興建應如所題從之○壬子諭曰額駙策凌母病加劇著額駙之子蘇布什里前往省視著派御醫邵正文一併馳驛前往診視調治並著賞人參一觔陀羅被一件命翰林院侍讀學士涂逢震編修蔡新在尚書房行走是日起

上以常寧祀

天於

園丘齋戒三日○癸丑欽差左都御史劉統勳奏察看山東通省雨澤情形共一百一十二處除曹縣定陶膠州高密即墨福山文登榮城海陽未經得雨其餘所得分數自一二寸至四五寸不等高下田原半皆佈種民情甚覺安貼得旨覽奏俱悉其得雨四五寸者足資耕種自不必言至一二寸者成何濟哉又麥根生蟲之說以今視之如何得雨後稍回蘇否再此際民情光景若何何不詳悉敷陳耶尋奏東省三四月內雨水情形雖多寡不齊而先後均獲霑溉德州平原禹城齊河歷城五處自三月二十一日得雨後田野已覺滋潤泰安以北僅止敷用迤邐而南如兗沂各屬俱形霑足荷澤鄆城等處亦漸次溥徧惟濟南武定迤北尚未深透至麥根生蟲因春旱所致為地無多得雨後即行消化已無此患

民間景況雖因連歲歉收而已賑又賑不拘
常例現在報災最重之州縣氣象亦覺安恬
不獨無搶奪羨飯削刮樹皮之事即常歲鼠
竊狗偷輩亦覺稀少得旨覽奏稍慰○甲寅
上詣

南郊齋宮齋宿○乙卯常雩祀

天於

園丘

上親詣行禮○臨奠大學士鄂爾泰○幸圓明

園○大學士鄂爾泰遺疏聞諭曰大學士鄂
爾泰公忠體國直諒持躬久任邊疆懋著惠績
簡與機務思日贊襄才裕經綸學有根柢不愧
國家之柱石允為文武之儀型嚮用方殷倚
毗正切去冬忽嬰痰疾朕心廑念選醫調治
存問日頒今春病勢有加朕親往視加銜太
傅冀其漸次獲痊不意竟致不起朕心深為
震悼親臨祭奠特旨輟朝二日披覽遺疏具
見忠君愛國之惻忱尤為追念不置昔我

皇考有配享

太廟之遺詔著該部遵奉舉行並入祀賢良祠
加祭二次其他應得卹典一併察例具奏○
又諭大學士鄂爾泰故著賞銀五千兩辦理
喪事本日著果親王大阿哥三阿哥前往奠
祭各部院大臣八旗都統御前侍衛乾清門
侍衛三旗頭等侍衛以上侍衛班長正黃旗
侍衛等除值班外俱著往弔發引日仍往送
○命兩廣總督那蘇圖來京候旨以廣州將
軍署廣東巡撫策楞為兩廣總督調安徽巡
撫準泰為廣東巡撫以安徽布政使魏定國
為安徽巡撫○丙辰

上詣暢春園問

皇太后安○丁巳諭京師二月間幸得時雨自
三月以來雖間有微雨未能霑足現今麥秋
已屆農家待澤甚殷朕心深為廑念著禮部
照例擇日虔誠祈禱○又諭據山海關副都
統富和奏稱新任監督傅凱到關數日並不

接任來往貨物車輛俱致壅滯等語。傳凱接
受前任監督四達色事件。作難觀望。著來京。
其員缺著兵部郎中阿彌爾圖去。○軍機大
臣等議覆湖北巡撫晏斯盛奏請於漢口地
方令鹽當等商各建義倉積穀以備平糶。查
積穀備糶事屬利民。第恐奉行不善。易起囤
積之弊。轉致米價高昂。如今擇謹厚者司其
出納。亦屬保聚之一法。現奉硃批。令鄂彌達
熟籌妥酌。應俟奏到之日。如屬可行。再行詢
問各省。得旨是。○大學士等議覆四川巡撫
紀山奏稱川省城垣於乾隆三年經調任撫
臣碩色分別緩急工程。估需工料銀一百二
十餘萬。部覆俟有水旱不齊之年。以工代賑。
今查邊城實非可緩。臣於前咨報部急工之
中擇其至緊者雅州府屬之雅安清溪名山
榮經四縣。龍安府屬之平武石泉二縣。寧遠
府屬之冕寧越嶲二縣。衛敘州府屬之屏山
縣。保寧府屬之劍州綿州並所屬之綿竹縣

或逼近番夷。或通省扼要。計十二州縣衛。均
應先修。按報部冊覈算。約費二十餘萬兩。川
省實無可動之項。各州縣亦無額設公費。可
以次第興修。不得不因地制宜。酌開急公之
例。伏查各省捐監俱令於本地交納本色。川
省土著少而流寓多。情形實與各省不同。似
應變通辦理。其流寓商民合無照土方之例。
准其照戶部一百八兩之數。在川報捐。再城
工費重。止許流寓商民捐監。為數無多。恐於
事無濟。可否令各省官民並許在川捐納貢
監。封典職銜。似於銓政無礙。於城工有益。俟
捐有成數。足敷緊工一處之用。即先修一處。
或待將來江省樂善好施。捐數收足時。即移
歸川省收納。則款項更多。工程易集。雖需歲
月。究不似以工代賑之無期等語。查開捐為
一時權宜之計。亦可暫行。但現在江南直隸
例尚未停。未便又開一例。且川省途路遙遠。
即使開例赴捐。必少。恐屬有名無實。應將該

撫紀山所請。照土方例開捐之處。無庸議至城垣修築。原議陸續辦理。川省現有征勦瞻對之事。大工亦難並興。應令紀山於城工緊要中。擇尤急者。動項先行修葺。餘議次第興舉。從之。○吏部等部議覆署理湖廣總督鄂彌達奏稱。湖北容美土司地方。於雍正十三年改土歸流。建置鶴峯一州。長樂一縣。該縣漁洋關。為土漢門戶要隘。陸續招墾。生齒日繁。兼有枕近漁洋之仁和坪。烟戶甚衆。止設

寧遠縣志卷二十八

縣丞微員。不足彈壓。查灣潭地方。為鶴峯長樂之界。向因該州縣兵米需員轉運。遂將宜昌同知駐劄其地。該處地僻事簡。兵米而外。該同知實少承辦之事。請將宜昌府同知移駐漁洋地方。專司民事。查辦墾務。其仁和坪亦令就近管理。原駐漁洋之縣丞。移駐灣潭。代辦兵米。於鶴峯城汛內。撥外委千總一員。兵十五名。合漁洋兵五名。共二十名。駐劄漁洋。以資防範。應如所請。從之。○山西巡撫阿

里袞疏報大同府屬鎮寧所朔平府屬寧朔衛寧武府屬寧武縣乾隆八年分勸墾過額外民屯荒旱地共九頃二十三畝

寧遠縣志卷百三十六

大清高宗法天隆運至誠先覺體元立極敷文奮武孝慈神聖純皇帝實錄卷之二百三十八

大清高宗法天隆運至誠先覺體元立極敷文奮武孝慈神聖純皇帝實錄卷之二百三十九

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次日慶桂

總裁官經筵講官太子太傅文學殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書錄星滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十年乙丑四月戊午諭武員中守備一

平定縣志卷之三

一

官乃將帥之臂指千把之表率非平庸之人所能勝任各省有分發候補守備之年滿千總該督撫自必先儘材技可觀者題請補用而弓馬漢仗不及之員守候日久年力愈衰技勇日退及至得缺之後於營伍操防何能收其實用非振飭戎行之道著各省督撫提臣將現今分發候補守備之年滿千總秉公甄別除年力壯盛才技可觀者仍留候補外其弓馬漢仗平常而年力漸衰者俱准以原

平定縣志卷之三

三

品休致則強銳者既得及時授官而衰庸者亦免於守候矣嗣後三年舉行一次所留候補之員著於支領千總俸銀外另賞給步糧一分以資其食用嗣後保送年滿千總務將人材壯健可以造就及曾實在出過力者舉出寧缺勿濫不得姑息庶不致陞途壅滯亦可收得人之效矣該部即遵諭行○又諭曰正黃旗蒙古輕車都尉塔謹泰因歐打族兄經部訊明革職乃該旗辦理承襲此職時仍引照私罪枷號鞭責之案其子准與開列之例將塔謹泰之子僧保擬正具奏塔謹泰所犯乃干蔑倫常之罪非尋常事案可比或將伊子孫於承襲時擬陪尚可何得遽行擬正該旗都統等所辦殊屬非是著飭行○山東巡撫喀爾吉善奏東省催徵錢糧向用滾單如遇災蠲將分數於單內註明曉諭但發單在開徵之初倘災蠲在半載以後勢難逐戶調查按數分注是以前請另用獨戶清單並

請將未奉災蠲之前已完在官銀兩亦另刊一單註明完數抵作次年正賦今經部覆查議臣查被災有輕重分數有多寡鄉民未能扣算胥吏易於弊混請於獨戶清單內將應蠲之已完銀抵作次年正賦逐戶填明各給一紙其刊刻單費歸於賑恤造冊紙張內報銷下部議尋議應如所奏辦理從之 署四川提督李質粹奏本年正月十七日請訓時仰蒙諭云朕因鄭文煥曾有軍功是以擢用提督今聞伊身有病不能見人且上年辦理郭羅克事不善而番蠻人等見有官兵在彼不過一時畏懼旋仍多事再由藏撤回兵丁又被夾壩搶刦前著傳清往藏更換索拜尚須撥兵護送甚不成體統汝見慶復紀山時可傳旨務須辦理妥協臣至陝西四川節經傳諭及到任後即查訪瞻對果否必須加兵今訪知上中下郭羅克番衆向放夾壩上年懲創後稍為斂跡惟瞻對在打箭爐口外上

瞻對離爐十四站下瞻對離爐十八站四面環山地方險阻雍正六年曾經嘯聚抗官雍正八年用兵征討雖暫懾服而野性未除今又故智復萌肆無忌憚且西藏現駐官兵豈容醜類滋擾實有非用兵不可者誠恐臨時迫促是以已密派官兵整備裝械一俟需用有期庶幾諸事齊備得旨知道了 又奏瞻對賊番滋事示威懲創一切總統官兵雖總兵一員足資料理將來善後事宜必親閱地理情形始有定見請准帶兵前往得旨與督撫商酌而行或汝出口據要害以為接應令總兵前進亦可耳 甘肅巡撫黃廷桂疏報安西衛渠戶乾隆四年分墾成地一十頃有奇 已未

孝端文皇后忌辰遣官祭

昭陵 諭各省土司獲罪減等遷徙內地者本人身故之後有準其家口回籍之例朕思此等土司桀驁性成干犯法紀國家念其冥頑

無知從寬遷徙內地以保全之本身雖故其家口習染舊俗未必能盡革面革心倘回籍之後野性難馴故態復發仍復罹於法網非始終保全之意也嗣後各省遷徙土司身故之後家口應否回籍處著行文原籍督撫酌量夷情奏聞請旨定奪永著為例諭軍機大臣等凡土司獲罪遷徙之後本人身故家口應否回籍著該督撫酌量夷情奏聞請旨朕已頒發上諭其雲南土司安於蕃之家口

高宗實錄卷二二九

五

應仍回江南照舊安插爾等可寄信與張允隨於奉到上諭之後料理發回可也吏部等部議覆湖南巡撫蔣溥奏稱民間失火事所常有小民臨時撲救力苦難齊雍正六年世宗憲皇帝諭令各省多設救火器具十一年議准救火器具入於交代湖南地方草房竹屋起火尤易臣到楚後即嚴飭修整救火器具訓習兵役省城屢次失火未致延燒而常德衡州岳州竟延燒數十間至百餘間不等

緣定例該管地方失火止於罰俸三個月其撲救不力延燒多家並無遞加處分遂至毫無顧忌應請嗣後延燒至二百間以上者罰俸六個月每百間以次遞加至降二級留任而止庶各凜遵等語查定例五城延燒房屋吏目副指揮各以所管地方為該管官自十間以上至三十間該管官罰俸九個月巡城御史罰俸三個月以次遞加至六百間以上者該管官降三級調用御史降一級調用而止請嗣後外省失火如係城內將該管之州縣官照五城失火議處吏目副指揮之例按間數分別議處同城道府照議處御史之例分別查議其城外村莊撲救無及十一間以上至一百間者州縣及駐劄佐雜等官罰俸九個月一百間以上罰俸一年五百間以上降一級調用再查定例內有巡捕營所屬地方失火延燒十一間以上至三十間者千把總守備罰俸九個月叅將遊擊罰俸六個

高宗實錄卷二二九

六

月以次遞加至六百間以上千把總守備降三級調用遊擊降二級調用而止嗣後外省失火如係城內應將武職該管官照巡捕千把總等官兼轄官照叅將等官分別查議至城外村莊其分駐之專兼各官自應照例議處其駐劄城內之專兼官照文職例分別查議從之 戶部議覆甘肅巡撫黃廷桂疏稱乾隆五年平羅縣借給歸併新寶窮民籽種口糧前經臣題請豁免嗣准部覆口糧數目各戶因何多寡互異有無已徵在官捏作民欠等因臣查借過口糧共四千七十四石該縣誤將籽種項下二十石訛入戶口其借給籽種共五千六百九十七石二斗係按所耕田地之多寡酌借該縣又誤遺二十石是以不符原議至前項借給籽種口糧原議三年帶徵因黃河衝決居民半回原籍其無籍可歸者寥寥數戶謀食維艱並無完納請仍照前奏豁免應如所請從之 又議覆福建巡

撫周學健奏古田縣雍正十三年首墾田三頃六十一畝零共徵銀三十兩零應於雍正十三年升科各年應徵銀統於乾隆八年補徵准部覆因何遲至八年方始補徵查欽奉諭旨豁免雍正十三年未完民欠彼時此項田畝尚未入額是以該年未完銀一十兩一錢零並不在已奉豁免案內其元年至七年應完銀兩直至八年補徵請將雍正十三年未完銀一十兩一錢零一體豁免應如所請從之 兩廣總督那蘇圖疏報安南國難番黎文請等七名於乾隆八年駕藤步單桅船一隻往廣義米玳瑁被風飄至崖州望樓港業經支給口糧加意撫恤今發遣回國下部知之 湖北巡撫晏斯盛疏報荊州宜昌二府枝江長陽二縣並荊州左衛乾隆八年分民屯自首開墾田地共一頃四十五畝有奇旌表守正捐軀之江蘇海州民劉國祥妻

董氏 庚申

上詣暢春園問

皇太后安奉

皇太后御長春仙館 吏部帶領三月分月選各官引見得旨今年朕曾降旨將揀選舉人之例停止令九卿於驗看月官時詳加甄別原以州縣為親民之官其初選時必慎加選擇方於地方有益今日引見月官內如周仲鄭鐸康誥謀柴天祿等皆年力衰頹人亦庸

高宗實錄卷之三十九

元

懦糊塗必不能勝司牧之任是以降旨令其改補教職此等人員皆經九卿驗看過者何以未曾舉出夫九卿佐朕辦理庶政用人尤為行政首務若將此等衰懦之人令其赴任視事是姑息者在一人而貽誤者在一邑九卿獨不悉心權衡乎著嚴飭行 戶部議覆甘肅巡撫黃廷桂疏稱寧夏縣屬雍正七年報招墾地千三百畝於十三年徵收奏銷嗣因乾隆三年地震水湧民散歸籍地留積水

數載尚復如故萬難墾種所有應徵額糧七十八石請自乾隆六年起照數豁除應如所請從之 又議覆福建巡撫周學健疏稱臺灣府屬按地徵糧共納稻粟一十六萬七千有零並無額徵銀兩今內地積欠銀兩即分作三年帶徵所有臺屬積欠稻粟自應一例辦理應如所請分年帶徵如有完不及數照錢糧例分別議處從之 刑部等部議准江西按察使翁藻奏稱外省犯罪應徒者亦照軍流之例隆冬盛夏停解等語應如所請犯罪應徒者離原籍一千里以上照軍流之例未經起解者遇冬月概行停止若已至中途初冬十月照常遞解至十一月初一日停解如已將抵原籍本犯情願前進亦照常遞解六月盛夏時亦准停留倘地方官違例發解沿途州縣混行接遞均罰俸六個月從之 工部等部議覆雲南總督張允隨疏稱東川府會澤縣屬木欺古設汛派兵移駐文武員

弁一案經題准建署今查木欺古係新聞夷地孤懸江外並無城郭應於設汛地方添建土堡俾文武弁兵駐劄應如所請從之又議覆前署安徽巡撫準泰疏稱安徽省徽州府郡城歙縣休寧婺源績溪城寧國府郡城南陵涇縣蕪湖城前經題請興修今各屬俱被水災實與以工代賑之例相符請即於司庫修城本款匣費銀內先給八分工料銀及時購料興工統限兩月內辦料徽州府郡城歙縣婺源績溪南陵蕪湖等六處統限四個月完竣休寧限六個月完竣寧國府郡城限八個月完竣涇縣限一年完竣應如所題從之又議覆貴州總督張廣泗疏稱黔省威寧大定等府州縣崇山峻嶺不通舟楫所產銅鉛陸運維艱合之滇省運京銅每年千餘萬勛皆取道於威寧畢節駁馬短少趲運不前查有大定府畢節縣屬之赤水河下接遵義府仁懷縣屬之猿猴地方若將此河開鑿通

舟即可順流直達四川重慶水次委員勘估水程五百餘里計應開修大小六十八灘約需銀四萬七千餘兩此河開通每年可省腳價銀一萬三四千兩以三年餘之節省即可抵補開河工費再黔省食鹽例銷川引若開修赤水河鹽船亦可通行鹽價立見平減大定威寧等處即偶遇豐歉不齊川米可以運濟實為黔省無窮之利應如所奏辦理從之調吏部右侍郎歸宣光為兵部侍郎以湖南巡撫蔣溥為吏部右侍郎禮部右侍郎楊錫紱為湖南巡撫○以漢軍印務叅領范宜謙為正白旗漢軍副都統○辛酉上詣長春仙館問皇太后安奉皇太后還暢春園○戶部議准護理山西巡撫布政使陶正中疏稱解州雍正十二年報墾地一頃八十五畝有奇應於乾隆九年起科茲查內有被水浸坍地一頃十六畝零所有

折色糧銀應請豁免從之○兵部議覆奉天將軍達勒當阿等奏稱

永陵管千丁佐領品級四品官王嘉彥伊祖王有名康熙九年由領催授為

福陵管千丁佐領又佐領品級四品官王希貴伊祖王健吉康熙九年由防禦授為佐領俱經承襲四次雖不便照世襲佐領根源例辦理但自原授之人至今管理九十餘年應照已過五十年看守

陵寢防禦例作為承襲之缺等語應請交與該旗會同辦理世職佐領根源王大臣畫一定議從之工部議覆河南巡撫碩色疏稱陳州府淮寧縣有太皞伏羲氏之陵其殿宇臺閣建立年久不無傾圯遵照乾隆八年六月初二日諭旨飭令地方官於秋成後動司庫地丁銀修葺應如所題從之又議覆河東河道總督完顏偉疏稱河南下南河廳屬祥符汛南岸十三堡臨河掃壩坐當大溜搜刷

屢蟄屢鑲勢甚危險今查得北岸范家灘南坐成兜灣河頭已有吸川之形下至徐家場灘勢灣曲河尾又有建瓴之勢應乘時挑挖引河一道俾河勢順直全黃大溜分洩東趨則南岸十三堡要工得以鞏固估需銀一萬三千七百八十兩零因關係緊要業通融河庫銀兩給發該廳等上緊興挑應如所請從之○廣西憑祥土知州李桂故無子以其弟李樟襲職○雲南雲南縣土主簿張祚宏病休以其子張文裕襲職○壬戌

上御勤政殿聽政○諭曰右衛副都統小格現在患病著派御醫一員前往調治○飭沿海甄練水師諭國家設立營伍修明武備所為折衝禦侮之用必訓練精熟於平日斯可奮勇決勝於臨時是以陸路設營汛沿海設水師皆須勤演習收實效者自去年朕命大臣查閱營伍後陸路該管大員頗有竭力整頓氣象而水師操演則不過將演就陣法塞責

了事其操舟破浪之法官弁兵丁茫然不知
以為此水手之事漫不留意即至舵工水手
其能熟練者亦屬寥寥平日操演之時各船
進退尚且參差往來間斷苟其臨敵何以致
用夫水師以舟為主出沒風濤去來倏忽必
掌舵者能操縱自如而搶風折戣破浪衝波
水手等盡能嫺習即官弁兵丁等亦皆心領
神會不待呼應而自靈然後猝然遇敵駕駛
輕捷一舟之中臂指相使如一人之身則應
變制勝無難向來水師員弁仍以水師用原
欲其熟悉情形收得人之效今則視為故套
該管者不加察微倖者苟延玩是育材之善
政為伊等之捷徑矣著通行申飭沿海將軍
督撫都統提鎮等務遵朕旨實心訓練實心
甄別毋得仍前玩忽虛應故事○又諭朕前
因旗員終養回旗原與漢人回籍不同是以
降旨嗣後終養之員令各該處帶領引見量
與差使此朕體恤旗員之意也但前旨內有

嗣後字樣則該部辦理在奉旨以前者不得
帶領引見一體邀恩著吏部查明奉旨以前
如有終養之員亦著各該處帶領引見工
部議覆江西巡撫塞楞額奏稱豐城一邑為
吉南贛素臨諸江之下游惟恃長隄保障通
計兩岸土石隄共長一百二十里有奇向例
土石兩工俱係民修後乃折徵夫銀貯之於
官聽民領價修理均無水患雍正十二年奏
動鹽規銀五千餘兩官為修築兩隄乾隆二
年又請鹽規銀四千餘兩修築土隄四年又
請動八千餘兩修理石隄並請免徵里夫銀
且議定每年動支鹽規銀一千五百兩為歲
修之費自是以來土隄日見單薄石隄多有
衝坍該縣於每歲外復請動項修葺茲據該
邑紳士里民等請將土隄仍照往例悉聽里
民分段認修所有石隄工大費繁懇請歸官
料理等情應請俯順民情聽民分段認修每
段設立圩長董理水落督夫修理水長督夫

巡防並責令地方官不時稽查無許圩長任意派夫致有滋擾至石隄工程動以千萬計自應歸官承辦查現在坍塌鼓裂各處據估工料銀六十餘兩不必另行動項即於歲修銀內通融辦理今請豫借乾隆丙寅丁卯戊辰歲修銀四千五百兩奏合本年歲修之一千五百兩共銀六千兩購料興工工竣責令承修官保固三年嗣後歲修銀仍照數分撥貯庫遇石隄應行修理詳請動用應如所請從之

癸亥

以山東布政使喬學尹為太僕寺卿

上詣暢春園問

皇太后安 諭京師三月以來雨澤愆期今麥秋已屆未霈甘霖仰望正切朕已降旨虔誠祈禱因思清理刑獄亦祈求雨澤之一端著刑部堂官將徒杖以下等罪查明情罪或應釋放或應減等者即行具奏其尋常案件亦速為完結毋得牽累稽延並行令直隸總督

一體辦理 又諭領侍衛內大臣二缺著來保馬爾泰補授馬爾泰現任總督其缺著佛倫署理 又諭曰正白旗蒙古都統武和圖不能辦理旗務著在散秩大臣上行走所遺員缺著尚書阿爾賽署理 諭曰福建按察使王廷諍現有議處之案著解任其按察使員缺著汀漳道雅爾哈善補授汀漳道員缺著該督撫於所屬道員內揀選一員調補其所遺員缺著將御史丁廷讓補授 協辦大學士公訥親等議覆湖廣總督鄂彌達奏稱別釐里書冊書積弊查糧冊為徵糧實據豈有官冊不詳轉憑私冊之理應拘出里書收貯嚴經與在官之實徵逐一查核冊籍已清之後編列字號置局大堂遇民間上稅令經承照則料算聽百姓取冊核對過割清楚每年開徵時輪點戶長分給滾單令花戶自封投櫃毋許里書胥役包攬以杜挪延之漸應如所奏辦理從之 定邊左副將軍額駙策

凌奏準噶爾宰桑額勒慎來至希巴爾沙海口內求見坐卡侍衛拜都告稱我台吉噶爾丹策零諭云蒙

大皇帝之恩准允求和汝等在額克阿喇勒西喇呼嚕蘇等處游牧居住如遇大國坐卡侍衛和好而行等語我遵台吉之諭到布爾吉推地方聞大國卡座在布延圖哈瑪爾沙扎海等處故我不敢前來今我台吉令我撤回特此告知并以酒醪為獻拜都即諭之云額克阿喇勒西喇呼嚕蘇皆係我卡內之地現今荷蒙

聖主隆恩許爾求和但爾地人等豈可在我卡內地方居住以後宜各守疆界不得妄行額勒慎即移回原地而去奏入報聞戶部等部議覆前任兩廣總督那蘇圖奏定兩廣鹽務章程一積年商欠宜立法查追也兩廣埠商領銷正餘鹽包應完之鹽價羨餘等銀查現在掛欠幾五十萬兩其中有著無著或虛

或實均難懸定應飭令各該州縣傳提本商訊明欠數押取認狀多者分五年帶徵其次三年又其次二年倘商民頂替久已無著或官吏侵漁捏造欠項著落頂替捏造之人及扶同出結之州縣按數完補照例治罪應如所請一催追商欠宜酌定勸懲也兩廣埠商善於逢迎州縣向與交好若不豫定勸懲必致有名無實嗣後帶徵商欠按限全完者題請議叙居限不完及完不足數者照承追虧

空錢糧例叅處應如所請一現在埠商宜秉公甄別也兩廣埠商殷實者少慣與運司聯手以一人而獨霸數埠名曰商棍宜責令道府州縣凡商棍欠帑者悉行革除其埠業抵還欠項不敷者令詳保官商分賠應如所請一收買場鹽宜另撥帑本也粵省帑本約計挪移銀三十萬兩宜核數咨部在餘包商欠內陸續歸款請再撥銀十萬兩作為帑本令開倉時先收價而後賣鹽賣畢即催繳羨銀

均由州縣用聯批掛驗報解並令道府直隸州查如埠商拖欠一併叅處即鹽場大旺亦俟疏請續撥毋許擅挪等語查粵省帑本共三十三萬兩今所稱挪移三十萬兩是否即係帑本再所請另撥十萬兩是否在原帑之外另撥抑或止須十萬將原帑撤回未經聲明不便遽議○新舊鹽包宜均勻配運也粵鹽歲銷約一百二十萬包而未配鹽包較此數尚多若儘配舊鹽則新發帑本不能轉運應新舊各本均勻酌消應如所請一鹽羨名色宜歸併畫一也粵省正鹽外有正額餘鹽額外餘鹽子鹽耗鹽花紅餘鹽等項課餉外又有正場鹽羨餘鹽場羨埠羨額外餘鹽場鹽八折埠羨三封掛一鹽價子鹽京羨花紅額溢羨餘等項名目既多弊混自易應將以上名目一概革除正鹽外悉稱餘鹽課餉外悉稱羨餘先運正鹽再用餘羨每年應銷應交之數令鹽法衙門會同地方分別酌定總

期得數乾隆八年徵收題報之數等語查每年題報之數畧有多寡何以僅照乾隆八年應令該督再行妥議一加增鹽包宜盡行革除也江西龍南等埠及各省正額餘鹽按加二五及加一貼贈統計私贈鹽二萬四千五百包共免餉羨銀一萬一千八百兩既未題明又未報部應盡行革除應如所請一緝捕私鹽宜頒發賞格也粵東三面皆海梟棍出洋沿途搶刦不但阻撓鹽法抑且擾害地方宜在運司庫內撥充公銀二千兩立為賞格另議規條庶文武兵役齊心緝捕應如所請一各省向有鹽規宜責令首報也鹽務陋規取者視同舊例與者亦為常額現在行查各屬其收受鹽規者不過十之二三應懇准各省文武自行首報統俟查報到日確核議奏應如所請一運司分司鹽庫宜徹底清查也運司龐興巧詐婪贓現題叅在案應令接任運司分司及西鹽道將所管庫項無論正雜

錢糧悉行盤核開報以杜侵冒應如所請從之 兵部議覆寧古塔將軍巴靈阿等奏稱查乾隆五年大學士等議准年滿倉官願在本處候缺者咨送引見記名後遇有本旗驍騎校缺出該將軍酌量與記名領催一同題補現在船廠等處年滿倉官記名候缺者已有四名因領催曾經出兵得有功牌倉官並無打仗之事是以每次揀選不得題補請嗣後將年滿倉官自引見記名之日扣於本旗驍騎校出過三缺之後補用一員如當差不勤將記名咨部注銷應如所奏從之 以江蘇按察使李學裕為安徽布政使江南河庫道張師載為江蘇按察使 旌表守正捐軀之山西祁縣民高德山妻孟氏 甲子大學士等議奏據四川巡撫紀山奏稱雍正八年進勦瞻對派漢土兵一萬二千名支給米麪軍需等項為數浩繁今兵數視昔有加糧餉宜多豫備查雅爐二倉現貯米七千六百餘

石附近雅郡各州縣約貯穀尚多應先碾運五千石至爐即酌發軍需銀買補所需炒麪在打箭爐裏巴二塘籌辦又查司庫存貯軍需銀現有一十八萬餘兩又爐雅二庫合計五萬八千餘兩未便全用應請先於司庫封貯備貯二項銀三十九萬三千兩內暫時借動一面題請酌撥鄰省協餉歸項所有軍糧軍需令幹練道員駐爐總理並酌設正協糧務分辦除應支月費口糧騎馱等項照例支給外其將備弁兵借支製備軍裝土兵按名給發安家坐糧及加賞銀兩並漢土各兵之鹽菜口糧茶葉羊折官兵跟役通事譯字斗級倉夫人等應支口糧工食等項雍正八年有例可循者俱遵照辦理其閩外土兵從前止給口糧不支鹽菜但同一効力疆場應請一體支給鹽菜至差委土目番蠻賞需難以豫定應聽總統及總理道員酌辦又稱雅倉現存米應先運赴爐倉嘉眉等府州酌撥米

應水運至雅。從雅赴爐運費除陸運照採買軍需之例支給。其水運因軍糧不容刻緩。所需水脚與平常運送不同。應請照雍正九年報銷之例。其自打箭爐以外。應令明正裏巴二塘土司各派頭目土兵押運。蠻夫烏拉運送各糧務交收。更於臣標派熟練官兵四百名沿途押運。脚價照例支給。運耗照例報銷。其各糧務處催運支放需用兵亦於臣標派百名聽用。所有押運聽差官兵支給各項均請照派撥進勦官兵辦理。押運土目番兵應令總理道員酌賞鼓勵。其軍需銀先運赴爐地交收。轉運各糧務支放均請照例給發運價。至一應糧餉俱須防護。若移營分路進勦糧務處應聽總統酌留官兵護守。並查自打箭爐至藍墩番塘人少不敷。差使應請增漢兵馬匹以速文報。安設隨營軍臺以通信息。造船以便來往建橋以濟行人。雇募水手匠人以備驅策。酌派守護官兵以利禦寇。均應

如所奏斟酌妥辦事竣後將用過錢糧數目造冊報明戶部查核得旨依議速行。乙丑兵部帶領河南巡撫碩色奏請降補河南襄城營都司之河南南陽鎮標中軍遊擊周可昌署理南陽鎮中軍遊擊之襄城都司塔金引見得旨塔金准署南陽鎮標中軍遊擊。周可昌人甚平常著原品休致。先據該撫奏稱周可昌限於才力請降都司經部議以周可昌既係才力不及該撫自應照例題叅乃碩色並未遵例照部議題叅於陛見時又復面請降補都司送部引見殊屬瞻徇著交部察議。丙寅諭近日京師錢價又覺昂貴若五月支領兵餉搭放錢文三成則民間流布之錢較前寬裕於閭閻日用有益著大學士張廷玉協辦大學士訥親戶部尚書海望侍郎傅恒會同即速議奏。禮部帶領會試下第八十以上之舉人董一世等引見得旨董一世張虬陰章著賞給中書職銜張搗謙徐文

靖劉體禮著賞給學正職銜董一世張虬陰章三人各賞緞二疋張撫謙徐文靖劉體禮三人各賞緞一疋工部等部議覆協辦大學士吏部尚書暫署直隸總督劉於義疏稱准督臣高斌移交題稿一件內開查冀州城垣頽缺甚多武強縣係乾隆八年偏災稍重之地元氣未復又前估天津府屬之慶雲縣城因該縣復被偏災現在查賑應列為要工其應需銀兩於山東河南山西等省解到充公耗羨銀內動撥先發十分之六購料興工應如所題從之丁卯

上詣暢春園問

皇太后安軍機大臣等奏軍營隨將軍印務察哈爾兵一百名向例三年期滿經臣等議准改為五年更換一次今春額駙策凌到京臣等向商現今軍營無事所有兵丁有無應行裁減茲據額駙策凌議稱隨印察哈爾兵一百名現於本年七月內期滿應將此項兵

撤回本處不必另派更替其需用隨印兵即於喀爾喀兵內揀選應用似屬可行從之

工部議覆雲南總督張允隨疏稱元江府屬他即地方觀音九道二河係普洱鎮沅威遠等處往來必由之路向來各架木橋一座夏秋雨水泛漲橋被衝倒行人病涉請建石墩木橋二座應如所題從之以大學士陳世倌協辦大學士訥親內閣學士王會汾吏部左侍郎阿克敦兵部尚書彭維新兵部右侍郎開泰刑部尚書汪由敦刑部左侍郎錢陳羣刑部右侍郎彭啟豐工部右侍郎德齡左都御史劉統勳左僉都御史嵇璜大理寺卿劉綸等充殿試讀卷官戊辰策試天下貢士蔣元益等三百十三人於太和殿前制曰國家設科取士每三年而賓興之復明試於廷以覘所志朕既不逮立政無方常思進彼嘉言佐予休治比策試貢士亦既不愧不文爰浴爰度矣乃多士之對揚者華藻是飾骨鯁無聞豈朕

求之不誠歟抑司其事者抑不以進歟不然
豈時無闕政民無隱情耶則多士以起自田
間未諳政務為辭耳夫政事與學問非二途
稽古與通今乃一致爰以多士所素服習敬
業者詢之必有以導朕焉五六七九十一十
三之經其名何昉其分何代其藏何人其出
何地其獻何時傳之者有幾家用以取士者
有幾代得縷晰而歷數歟三選四科五問十
條乃周漢以下取士之別為取為棄為同為
異為得為失可得而詳言歟其銓除也代復
不同魏晉而下率循資格有四科九班之別
五保七流之異其體例亦能條對論列否耶
將欲得賢材舍學校無別途將欲為良臣舍
窮經無他術多士宜有以奮發敷陳啓迪朕
蔽其有深悉時政得失直言極諫者聽 諭
大學士等今日殿試人數眾多天氣炎熱著
工部尚書哈達哈多備茶冰俾士子普沾以
解煩渴並加意照看可即速傳諭知之 已

已戶部議覆甘肅巡撫黃廷桂疏稱寧夏移
建滿城占用民地先經奏明照時給價俾另
行置買其舊城基地並從前撥給滿兵官地
亦奏准交地方官變價今請即將所遺官地
撥給新城所占民地各戶承種新舊滿城相
距不過數里民情俱甚樂從應如所請從之
兵部議覆直隸總督高斌疏稱烟郊白澗
桃花寺隆福寺四處行宮看守外圍兵弁欽
奉諭旨令臣派員看守茲查烟郊行宮應派
外委一員守兵八名請於寶坻營撥守兵五
名王慶坨營撥守兵三名於通協轄屬馬兵
內揀拔外委一員歸三河營管轄白澗行宮
附近村莊應設外委一員守兵八名桃花寺
行宮建處半山應設外委一員兵丁十二名
隆福寺行宮附近
陵寢山叢樹密應設外委一員守兵十六名三
處共守兵三十六名於薊協所屬陸路僻汎
內酌撥外委三員於薊協轄屬馬兵內揀拔

統歸薊州營管轄外委各給土房三間兵丁各給土房二間應如所奏從之 工部議覆協辦大學士吏部尚書暫署直隸總督劉於義等奏稱張家灣東南自木廠至善人橋計長五里餘連年被水河岸衝坍應建護岸排椿板工四百六十丈排水木壩三座並將長店村坍岸加倍寬厚又通州運河逼近城垣應於城北卧虎橋等處建排水壩三座逼溜東行又自小聖廟北石碑起至邵板廠雞心

壩止長三百丈建護岸排椿板工又古北口潮河上岸去年七月水發故道淤平直抵北岸北岸係提標兵房房北為提督衙署現在衝坍北岸寬三十餘丈長八十三丈倒壞營兵自蓋草房八十八間應建荆國石子壩一道長一百九丈衝壞草房應賞給房價建蓋應如所題作速辦理從之 又議覆直隸總督高斌奏稱永定河工上游之桑乾河於乾隆九年春融後委員承修四月工竣後查看

得所開渠身尚高不能進水兼有近山沙河四道六七月間山水驟發挾帶沙泥衝淤渠內俟冬春水落之時驗准情形續加修理至和合堡山口新建石壩穩固上年大汎時壩以上之桑乾河洋河俱較壩下水高二尺是其注下之勢得壩以為截頓已有明驗應於和合堡之下再添建亂石壩一座俾與上壩相距不遠上壩西留水道下壩東留水道以行小水汎至則漫壩而過東西相錯重關疊

鎖以殺水勢並將上壩增高二尺與下壩相稱更為有益至新開渠身四十六里惟渠口寬深未合應再寬五尺鑿深四五尺不等渠底均深四尺渠口外應迎溜開引河一道長一百餘丈引水入渠以暢其勢其沙河歸渠處所大加寬深以防淤墊並令地方每於汎後疏濬應如所奏辦理從之 川陝總督公慶復四川巡撫紀山提督李質粹奏瞻對賊番屢肆搶刦雖經動兵征討而頑心終未盡

革必須增益官兵。懾其心膽。方可一勞永逸。得旨。議政王大臣議奏。尋議覆。據川陝總督公慶復等奏稱。瞻對為通行西藏大道。該土酋恃其險阻。屢為夾壩。擾害地方。並搶刦駐防臺站。撤回兵丁行李銀兩等物。差查賊賊抗不擒獻。頑梗已極。應如該督等所請。以建昌鎮總兵袁士弼為總統。於川省提標各營及雜谷瓦寺各土司內。共派出漢土官兵一萬二千名。遴選幹練之員。帶領進剿。并撥附近瞻對之西寧鎮漢土官兵一千。西藏郡王頗羅鼐所屬江卡番兵德爾格土兵各一千。聯絡聲援。巡邏偵探。從之。庚午。

上詣暢春園問

皇太后安。還宮。○辛未。

上御乾清宮。召讀卷官入。親閱定進呈十卷。甲第。禮部議覆福建巡撫周學健議奏。原任福建學政吳華孫奏請減省延建汀邵福五府修理考棚銀兩一摺。查閩省九府二州自

六年奏准後。每年給修棚銀一千八百兩。乾隆九年。又奏准三年內以二年銀兩勻給各府州。其一年銀兩留為學政衙門書吏鹽菜心紅紙張之用。若如該學政所請。再減八百兩。實不敷用。至該學政任內覈減過各府州考棚銀三百一十七兩零。現在留學政衙門修整科房公廨司庫之用。實屬以公辦公。應如該撫所議辦理。從之。○兵部議覆天津都統富昌等奏稱。乾隆七年。浙閩總督策楞選撥教習十總。曾榮富等四員到津。教演兵丁。屆今三年期滿。請咨浙閩等省。揀選熟水性者四員送部。由部轉發天津。交代教習。應如所請。從之。○戶部議准湖北布政使安圖奏稱。嗣後武職千把等弁。有因貪贓枉法軍務獲罪革職者。除任內有未完降罰案件。追食過俸銀外。如係因公呈誤革職者。無論任內降罰案件多寡。所有食過俸銀一概免追。從之。○是月。江南河道總督白鍾山奏。揚屬下

河一帶興舉大工必須多委人員分段儻挑但工員既多賢愚不等應立定章程嚴行查察庶可杜侵漁草率之弊已於未開工時將修做工程稽查弊竇之法刊發條約令遵照妥辦茲據各工員等呈報海溝車路興鹽界河東西官河以及閘下歸海各引河俱陸續如式挑竣臣由淮揚一帶查勘運河江工即馳往下河按段逐細大勘如有偷減冒混即將承辦工員叅處以期有益無弊得旨須為之以實可也署安徽巡撫準泰奏各屬望雨甚殷會同督臣尹繼善虔禱雨壇復飭屬誠求未蒙感應現在平糶接濟得旨所奏俱悉今雖用汝為廣東巡撫可將一切未雨綢繆之事告之魏定國令其加意料理閩浙總督馬爾泰奏年力就衰難勝封疆重寄請解任回京供職得旨卿尚能宣力封疆不必固辭據鞍矍鑠正汝輩所宜為耳閩浙總督馬爾泰福建巡撫周學健奏革兵楊大勲

私雕鈴記誣令營縣緝拏匪類蕭日光等並捏造偽劄與假票字跡相符監禁後旋畏罪自盡蕭日光等經司道會訊並無散布偽劄之事各營訪察亦無匪夥行蹤地方俱極寧謐是此案楊大勲一人捏造希冀邀功復糧可知得旨此案朕早已知之矣卿等俟明晰案情然後奏聞亦是但此則實係誣罔者可耳若稍有疑竇亦似此辦理則遲矣其屬員推諉及不妥者應查叅閩浙總督馬爾泰浙江提督陳倫炯奏玉環營雖屬海疆究非外洋可比各員弁應照內地一體論俸陞轉停其議叙得旨是知道了浙江定海鎮總兵陳鳴夏奏定海鎮孤懸海表商漁輻輳督察宜周水師責任綦重勉期稱職得旨總兵之任地方營伍民情風俗莫不繫焉必訓兵衛民禁暴安良斯為稱職況水師更易致廢弛宜加意實力為之福州將軍兼管閩海關事新柱奏本年二月江南吳縣商人游仲

謀等在洋遭風飄入琉球國境該國王遣都
通事蔡宏謨等護送入閩足徵恭順所有都
通事及難商附帶貨稅為數無多已飭閩安
鎮口委員一例免徵得旨知道了 山東
巡撫喀爾吉善奏刁民呈稱麥收無望希冀
捏冒緩徵有司市惠沾名曲徇民隱且奏銷
為考成所係借此幸免處分亦事所時有現
在東省糧價不昂民情胥慰而無厭刁民仍
有非災言災妄希恩澤之事國家經費固貴
撙節而人心風俗所係更大查察既真當剴
切檄諭塞其貪心以厚民俗得旨所奏俱悉
若能如此擔當任事實朕所嘉悅若耳目有
不周或出於隱飾諱災之意則好事不如無
諸凡惟有盡心務實斯可耳 又奏准吏部
咨稱本年二月奉旨令各省督撫將節年所
奉教養百姓之事現今如何奉行並行之有
無成效之處悉心條對東省益藏雖未裕而
俗尚儉勤風氣雖未淳而民鮮刁詐惟有飭

屬共矢恪誠交相砥礪得旨所奏俱悉 又
奏東省愚民惑於邪教積習使然雖經拏獲
秦之道朱廷謙等民人稍知儆惕而習俗移
人革心難必嚴飭各屬倘有設立教會惑眾
斂錢者即查拏按律治罪地方官以失察叅
處如僅舉一佛會持誦經咒並無糾眾斂錢
等事地方官善為勸導勿令借端煽惑得旨
是只應如此辦理者 又奏地方偶遇偏災
窮民外出自應收養資送如非因災而出之
民斷不容借名冒濫嗣後每屆夏秋二季收
成候如果境內勘報災傷即將實在情形咨
明鄰省轉行各屬密存查考災民到境詢問
籍貫與咨開地方相符即照例撫卹否則毋
庸留養資送俾卹災經費均歸實用得旨妥
酌為之可也 又議奏東省城垣共一百十
二州縣衛所除現在完固無庸請修外如章
邱等九十一州縣逐一確查應行修理者共
約需工料銀一百數十萬兩惟范縣高密二

處需費在千兩以內餘俱自數千兩至數萬兩并十餘萬兩不等需用浩繁一時難以並舉自應分別緩急如附府巖邑南北通衢濱海要地未便置為緩圖請酌動司庫存公銀按年陸續興修如地非衝要留俟水旱不齊之年以工代賑得旨只可如此從容次第料理也○又奏覆准大學士張廷玉等字寄內稱本年三月二十六日奉旨令各督撫將米稅既蠲米價未平稅課逐年遞減之故明白

奏聞查臨清關徵收稅課雍正六年以前每將臨倉耗銀補苴缺額迨前撫臣岳濬題准米麥雜糧計石徵收始敷正額今米麥等稅蠲免在商只計算實收銀數故缺額在官且乾隆六年稅銀由八月二十二日起至次年七月十五日止計三季零五十四日而奉到蠲免恩旨是在七年五月二十八日是免稅不過四十餘日故缺額僅八千四百餘兩乾隆七年由七月十六日起至次年五月初一日

止計三季零四十六日所過米麥雜糧盡數

寬免故缺額至一萬五千二百餘兩之多此

六七兩年稅課遞減之由也至米稅蠲而糧

價未平蓋因戶口日繁糴糴升斗取給於商

者甚衆商賈計盡錙銖惟知網利如遇平減

若輩即裹足不前矣此過關米糧雖多而米

價之所以未平也得旨所奏俱悉山西巡

撫阿里衮奏報各屬麥苗雨澤情形得旨所

奏俱悉目下頗覺望雨否速奏以慰朕懷尋

奏從前未經報雨之州縣惟渾源應州靈邱

廣靈定襄崞縣永和七處復行查詢尚未覆

到其餘太原等十七州縣并各屬申報得雨

分寸雖入土不等而深透者居多麥苗亦萌

芽吐穗得旨所奏俱悉俟覆到即行奏聞若

有旱形可豫為料理此等事斷不可忽視之

甘肅提督李繩武奏報準噶爾夷使哈柳

赴京沿途照例護送並收受該夷使馬匹皮

張及酬以緞疋等情得旨知道了彼此次

所求之事皆未准行彼復向所伴送人云聖
旨尚許我來一次此旨實未發也又伊所留
之人此次甚不安靜酗酒生事此等處皆不
可不留心○貴州總督張廣泗提督丁士傑
奏本年二月初七日歸化營所屬那魯寨苗
阿陳阿謨等赴場賣花被卡塘苗人阿祥阿
勒阿滕等搶擄貨物並殺傷阿陳燒燬寨苗
房屋隨飭該地方文武選差兵役著落該管
亭目寨頭人等勒令卡塘苗人獻出正兇並
歸還搶去貨物詎意兇苗阿祥等反率本寨
夥黨高踞山巖抗拒及兵役登山擒捕復敢
施放礮石藥弩抵死相持該地逼近粵西將
來苗人等遇事生風所關匪細已分飭各員
弁帶兵協拏陸續擒獲阿祥阿勒阿漂等並
各兇苗妻室子女提解來省重擬得旨此事
辦理妥速甚為可嘉也 貴州古州鎮總兵
崔傑奏報雨水調勻糧價平減並訓練弁兵
技藝情形得旨須實力為之母為虛言古州

尤非他處之比也

大清高宗法天隆運至誠先覺體元立極敷文
奮武孝慈神聖純皇帝實錄卷之二百三十九

大清高宗法天隆運至誠先覺體元立極敷文奮武孝慈神聖純皇帝實錄卷之二百四十

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

較修

乾隆十年乙丑五月壬申朔

實錄卷二百四

上御太和殿傳臚賜一甲錢維城莊存與王際華三人進士及第二甲章愷等九十人進士出身三甲徐窩等二百二十人同進士出身○吏部帶領四月分月選各官引見得旨擬陞浙江金衢嚴道之淑寶現出差黑龍江若俟差滿回京引見未免懸缺太久著將金衢嚴道員缺另行銓選其淑寶俟回京時將擬陞道員之處奏聞請旨○癸酉戶部議覆寧古塔將軍巴靈阿等疏稱拉林阿勒楚喀副

都統衙門公事需用紙張筆墨等項請照伯

都訥副都統衙門公費每年九十兩之例給

予應如所請從之 工部等部議覆直隸總

督高斌疏稱天津靜海滄州鹽山慶雲南皮

等六州縣建造汛撥墩臺營房烟墩等項並

四黨口守備把總鹽山縣之韓村汛南皮汛

各外委把總衙署營房經前督臣孫嘉淦題

部覆准其興建茲查天津等州縣沿海一帶

雨水海潮淋浸難以經久應請在附近村莊

實錄卷二百四

每兵一名建六標草土房一間告示房一間

二馬一棚南皮汛外委把總一員在城守汛

仍請建給衙署鹽山縣之韓村汛外委停建

衙署給土房三間其四黨口守備把總衙署

馬棚營房仍照原題辦理應如所題營房告

示房等准其建造至外委把總向無建造衙

署之例不准建給從之○甲戌

孝誠仁皇后忌辰遣官祭

景陵

上幸圓明園○四川巡撫紀山疏報酉陽州承糧花戶陳治安等七千零九十九戶補首乾隆九年分中下地共五百五十一頃六十一畝○予故大學士伯鄂爾泰祭葬如例諡文端○旌表守正捐軀之貴州普安州民任記珍妻馮氏○乙亥

上詣暢春園問

皇太后安○諭曰原任安徽按察使蘇昌丁憂回旗伊原係給事中今現出有常安保御史

一缺即著蘇昌在御史上行走○又諭據貴

州總督張廣泗奏稱雲南學政翰林院編修張為儀赴任行至貴州省城病故等語雲南路遠學政一缺不可久懸提督雲南學政著沈慰祖去沈慰祖現經差滿著即速赴任不必來京○戶部議覆長蘆鹽政伊拉齊奏稱永利富國永阜王家岡四場並海豐縣竈地乾隆九年二麥被旱勘明成災七八九十分共地一千二百一十一頃有奇共應蠲免銀

五百六十九兩八錢七分零會同撫臣喀爾吉善疏請蠲免嗣接部覆該場縣竈地秋禾有無收成未經聲明不便遽准今查王家岡秋禾被旱業經准免永利場海豐縣秋收六分富國場永阜場秋收八分但場竈濱海地瘠全賴麥收仍請照民糧一例蠲免應如所請從之○刑部議覆監察御史薛澂奏稱流徒人犯到配自應照例安插乃各省無能有司發給地保分派挨戶輪養罪犯公然安坐輪食貧民如款嘉客供其醉飽甚為擾累請勅下督撫流徒人犯老幼廢疾照例撥入養濟院有手藝及年壯有力隨宜安頓勿令失所其分派輪養之處嚴行禁止應如所請從之○旌表守正捐軀之直隸南宮縣民任小二妻宋氏○丙子諭軍機大臣等向來瞻對土番肆行不法擾害地方雍正八年用兵征討祇因辦理未妥草率完結今又故智復萌剽掠無忌不知法紀是以允督撫等奏發兵

征勦乃出於不得已。非朕本意也。夫用兵原非美事。即所費錢糧亦復不少。爾等可密寄信與慶復。紀山李質粹。務期殫心籌畫。調度得宜。以靖邊境。李質粹初到地方。恐諸事尚未熟諳。慶復。紀山當悉心贊助之。倘此番料理不善。或至有損軍威。或仍似雍正八年草率完結。復留後患。朕當於慶復。紀山李質粹是問。○又諭軍機大臣等。朕前降旨。將張師載補授江蘇按察使。今思江臬之任。事務甚繁。張師載誠實有餘。恐才具不足。爾等可寄信詢問尹繼善。若伊難勝此任。則將江西按察使翁藻與之互調。著尹繼善據實回奏。○又諭軍機大臣等。入夏以來。京師雨澤愆期。麥收歉薄。近畿各府雖有得雨之處。然亦未能普遍。聞山東河南兩水調勻。麥秋豐稔。可寄信與喀爾吉善。碩色。乘此收穫之時。酌量於豐收地方。發銀採買麥石若干。存貯該省。以備將來接濟直隸之用。但須善為料理。勿

使本地糧價昂貴。尋喀爾吉善奏覆。東省入夏以來。甘霖疊沛。麥秋尚好。除濟武青三府收成稍歉。餘俱按收穫分數。定糶買之多寡。如果麥少價昂。即將該處情形。據實報明。停買得旨。有旨傳諭高斌處。汝等相商辦理可也。○河南巡撫碩色奏。豫省正二兩月雨澤稀少。至三四月甘霖疊沛。二麥賴以有收。合計各郡縣收成。約有七成。並嚴緝麴販。得旨。合計有七成之收。亦可稍慰矣。至查禁躉麴。乃要務也。須實力行之。○丁丑大學士等議。覆川陝總督公慶復等會奏。打箭爐稽查民人出入一摺。查打箭爐原設三門。東門大卡。係進省通衢。南門公出卡。係赴藏大道。北門雅納溝。係通各處苗蠻小路。因爐城設有茶市。苗蠻匯集貿易。漢民遂亦繁多。向無稽查之例。先經打箭爐監督伊爾哈布奏。爐城三門鎖鑰。應交地方官掌管。撥兵守口盤查。一應內地出口之人。俱令在地方官處起票。守

口人查驗放行。經臣等議以地方官處起票該口驗票放行。有無滋擾勒索弊端。請交川陝督撫妥議具奏在案。今該督等既稱向無稽查之例。原未嚴密。應如該監督所請。將爐城三門鎖鑰。令阜和營都司掌管。南北二門。應各派兵八名稽查。漢民出口者。令其呈請各該地方官印票。自爐置貨出口者。令其呈請爐同知印票。查驗放行。其尋常漢民赴鄉買賣。及苗蠻來爐買茶者。應免請票。以省繁累等語。應如慶復所奏辦理。又稱南北二門口外漢民在彼貿易者。不能即歸。若不稽查。恐不無勾引苗蠻滋事之處。應通行各該汛弁土司土目查明生理年貌籍貫。造冊備案。欲歸者照冊註銷。病故者詳報開除。無力還鄉者酌給路費。亦應照所請辦理。至稱爐地監督今既不與地方事務其關防應改給管理課稅刪去事務二字。應俟照例具題到日該部換給從之。○吏部帶領中式滿洲蒙古

繙譯進士安福等十九員。欽賜進士宗室玉鼎柱一員。引見得旨。安福五訥。員登額。著以六部主事即用。勒爾謹。博文舒寧。安雅爾圖。郎圖。額爾卿。額分派各部院。在額外主事上學習行走。該堂官照例題補。薩哈產。七達色。武極理。四達。玉麟。蘇敏。富躬。格圖。懇。伊蘭。泰佛爾。卿。額俱著歸進士班。照例選用。宗室玉鼎柱亦著照例用。○戊寅。諭曰。李繩武著調補安西提督。永常著調補甘肅提督。永常著來京陛見。其甘肅提督印務著總兵許仕盛暫行署理。其總兵印務著慶復於副將內揀選一員委署。○又諭。朕已降旨將李繩武調補安西。永常調補甘肅。並令永常來京陛見。現今慶復出口巡邊。所有邊境一切事宜。伊三人若可相約會集一處。面同計議辦理。則更為周密。若路程參差。不能面晤。亦不必勉強從事。文移來往亦相同也。○又諭。軍機大臣等。四月以來。直隸各府中。雖有得雨之

處。然亦未能普遍。恐麥收歉薄。將來民間或至乏食。不知高斌曾否將平糶接濟等事。豫先計議否。高斌未曾奏聞。可寄信詢問。此時雖不便聲張。然亦當暗中籌畫。早為留意。著高斌即行具奏。朕又聞山東有蝗蝻萌動之處。該省與直隸接壤。亦著高斌轉飭州縣有司。加意防範。不可疎忽。著速行。○已卯大學士等議覆。四川巡撫紀山征勦瞻對。請加賞土兵一摺。查雍正八年。進勦瞻對。土兵奉

世宗憲皇帝恩旨。加賞。經黃廷桂等議於賞銀三兩外。再加二兩。并每名給牛一。每二十名給羊一。今進勦瞻對。事同一例。應如所奏。以示鼓勵。至賞給牛羊之處。係從前黃廷桂等推廣

恩旨。並非著為成例。應毋庸議。給至土兵賞給安家銀米之處。查雍正八年十月奉

上諭。嗣後土兵之出征者。除恩賞外。其父母妻子。照守兵坐糧之例。每名月給銀九錢。米三

斗。此次出征之川省西寧土兵。自應遵照折銀給發。於奉文之日起。回巢之日止。至添派江卡德爾格土兵二千名。係屬閫外之土兵。就近効力。與閫內土兵。遠涉戎行者不同。其安家銀米。應毋庸議。給得旨。照從前例。賞給諭戶部。向來各省土兵。派撥征勦者。止於起程時。賞銀三兩。並無養贍家口之例。雍正八年進勦瞻對。蒙

皇考恩旨。於常例賞銀三兩之外。加賞銀二兩。並令其家口。照守兵坐糧之例。每月給銀九錢。米三斗。所以示優恤也。此次進勦瞻對。所派土兵。著照雍正八年之例。一體賞給。再從前進勦瞻對。漢土兵丁。有賞給牛羊之處。此次亦著照例。賞給。務令均霑實惠。以副朕鼓勵戎行之意。該部即行文該督撫提鎮等。知之。○吏部議覆甘肅巡撫黃廷桂。學政胡中藻奏。稱歲貢生州同職銜盛元珍。於雍正五年一學。各舉一人之例。保舉。又在口外屯田

効力三載有餘。經前署督臣劉於義奏蒙議敘。復於乾隆二年。委令教習臯蘭書院。已及八載。士子中式數人。著有成效。請將盛元珍送部引見。以示鼓勵等語。應將盛元珍照宗人府教習之例。准其得官。日紀錄二次。從之。

○戶部議覆江西巡撫塞楞額疏稱。調任巡撫陳宏謀條奏廣信府銅塘山弛禁開墾。今查明山內荒地不及三百畝。所生有限。易藏奸匪。請照舊封禁。應如所奏。從之。○又議准

江西巡撫塞楞額疏稱。調任巡撫陳宏謀條奏廣信府之廣平山出產鉛礦。募夫開採。今查該山開挖至八九丈。用工本三千五百餘兩。真苗未得。請停止。從之。○工部議覆江西巡撫塞楞額疏稱。調任巡撫陳宏謀請建羅絲港石壩一道。旋經江漲。汕開土岸十餘丈。經臣奏明。陳宏謀自請賠修。除坍塌處。臣於水退時親詣查勘。著落原修官堵修完固。外查石壩南頭新衝河口十五丈有餘。石壩南

北兩岸勢低土浮。照河工做法。用椿簽葦塘以固其表。加夯礮以實其中。庶保護無虞。因於河口工段。建長十五丈二尺五寸草壩。以塞決口。又於緊連河口之南。隨地勢接築草工一段。長五十一丈五尺。以補老岸之低窪。又於緊連河口之北。依地勢接築草工一段。長二十四丈五尺。以培老岸之單薄。又離石壩三十丈外。有舊存雞背土壩一段。可以挑水。仍照舊加埽加椿修築。自上年七月二十七日。辦料興工。本年二月二十九日告竣。用過工料銀三千一百六十一兩零。應令調任陝撫陳宏謀作速解還歸款。仍令承修之員不時查勘。督率兩圩百姓隨時修補。應如所奏。從之。○庚辰

上詣暢春園問

皇太后安。○諭近據正黃旗蒙古旗分奏請將誤照新滿洲例。辦給併入本旗回子瑚連雅爾等口糧米石之大臣官員。交部察議等語。

瑚連雅爾等俱係從前投順。照例賞給產業。安插已定之人。業經數年。又引新滿洲例。請給口糧。該管官並不詳察。即行支給。甚屬錯誤。著交部察議。至因瑚連雅爾一案。以致併入八旗之厄魯特回子等。羣相效尤。陸續呈請補給八旗內有已經補給。亦有尚未補給者。此皆誤認瑚連雅爾一案。視為定例。遵照而行。非首先錯誤者可比。俱著免其查議。再此項厄魯特回子等。係遠方新來投誠之人。不知定例。冒昧請給。情屬可原。著將伊等治罪。及追賠多領口糧之處。概行寬免。嗣後無庸支給。並將此旨明白曉諭知之。○兵部帶領曾經出兵之年滿千總吳廣等七員引見。得旨。吳廣鄭林鳳。周洪謨。胡繼宗。俱著發回各本省。以守備題補。山西省年滿千總郭旺。著交巡捕營當差。任宗俊。李通。著發回本省。隨營候推。山西係向無題缺之省分。若將伊等發往別省題補。則別省亦有應行題補之

人。如交巡捕營當差。則巡捕營又有應補之員。均屬有礙。似此無題缺省分之年滿千總。應作何酌量補用之處。爾部詳議具奏。尋議覆。凡發回本省以守備題補之年滿千總。有未經題補者。該督撫提出考咨部。歸雙單月分發班內銓選。但雙單月選用守備。共二十二班輪流推用。每年分發班內。不過選用二三員。其有題缺省分如直隸山東廣西俱無庸議。外惟山西河南江西三省向無題缺。若令其盡行咨部。與各省人員挨次推用。則守候仍屬需時。臣等悉心籌畫。請嗣後山西等三省部推守備缺出。以第一二三四缺歸部推選。第五缺行令各該省督撫將發回該省以守備題補之年滿千總。題請補授。如係本省之人。照例將隔府別營之缺題補。若所出之缺與候補之員繁簡不甚相宜。或營制地方應行迴避者。准其將別營之缺調補。此等人員如從前已經送部銓選者。仍准其題補。

其未經題補者亦准其送部銓選如此則無題缺省分每十缺內亦得題補二員而送部者又得輪班銓選兩途並用均可漸次疏通從之○四川下阿壩阿強寨土千戶達各故以其子拆論架襲職○辛巳諭曰三姓副都統青保著來京候旨鄂齊爾所奏事件著交將軍達勒當阿查明議奏青保所遺員缺著頭等侍衛富僧阿補授○諭上司收受屬員餽遺例有嚴禁屢年以來朕又訓飭再三凡屬臣工自應遵守以勵廉隅以端表率聞奉天地方大員每遇生日年節多有收受屬員餽送者始而食物名為土宜實則幣帛之類漸開暮夜之門情好既敦則舉劾不無徇縱實有關於吏治雖自達勒當阿到任後潔已率屬此風稍斂然相沿積習正復不少為此再頒諭旨其已往者從寬不行究詰嗣後務痛改陋習各矢清操以副朕之任使倘有仍蹈前轍者經朕訪聞或被科道糾叅必嚴加

處分○又諭埋骨掩骼亦王政之一端所以推廣仁心不遺枯朽也京師為五方聚處人數繁多之地城外曠野或有遺骸無人收管以致暴露者亦屬可憫著順天府及五城御史等遣人查閱一併歸入義塚掩埋他省如有似此者亦著該地方官查明一體辦理○戶部奏署湖廣總督鄂彌達咨稱宜都縣之橫磧鐵礦雍正十二年因地僻礦稀照舊封禁漢洋鐵礦從前未據開報今復奉文行查該縣親詣二廠查勘均屬腹裏毫無妨礙委非奸商射利營求似應聽民創挖仍照原題二八抽課應如所咨辦理從之○壬午上御勤政殿聽政○大學士等議奏據直隸馬蘭鎮總兵布蘭泰奏稱本標左右兩營兵缺不須漢軍壯丁間補查綠旗兵丁與漢軍有別除食糧當差外原可另謀生計即將漢軍壯丁補用伊等兵缺亦不致資生之策況將該鎮兵調補附近標營所遺之缺仍令該兵

子弟與漢軍間補旗民兩便並無苦累偏枯之虞今該鎮欲將本標兩營額設馬守兵一千一百二十名接輩頂補是該兵子弟即材技平常亦得冒濫殊與慎選兵丁之例有礙嗣後該鎮之附近標營仍令分缺調補其外屬各營所出之缺以一缺補用漢軍一缺調補親標兵丁該兵等既不遠離鄉土而得缺之途較廣從之○戶部等部議覆協辦大學士吏部尚書署直隸總督劉於義疏稱天津縣已故原任浙江處州府同知牛光敏在津捐施育黎堂及附近過往貧民衣糧錢文設立義塚等項共用過銀六千二十一兩零又在靜海縣賑粥用銀三千九百六十兩又伊子候選通判牛兆泰於乾隆八九兩年捐施窮民衣食共銀三千四百四十五兩零請照乾隆八年福建侯官縣貢生何家祖命子舉人何鵬捐修文廟將何家祖加贈之例請將牛光敏加贈

應如所請將已故同知牛光敏准其加贈頂帶二級從之○以內閣學士秦蕙田為禮部右侍郎○予故鑲紅旗滿洲副都統兼二等輕車都尉常永祭葬如例○癸未諭每科學習清書之庶吉士於散館授職後遂不留心清文以致日久荒棄歷來習氣如此昔我皇考曾經訓飭今當散館之期再行申諭所有清書留館各員既用三年之功仍應隨時溫習不使遺忘棄置數年之後朕當考試以分勤惰毋謂朕不戒視成也○又諭從前山東連歲歉收所有借給民間籽種口糧銀穀等項俱應於本年麥秋後催徵還項但朕聞濟南所屬州縣如歷城章邱鄒平齊東濟陽長青齊河臨邑禹城陵縣德州德平原德州衛長山新城等處上秋種麥本屬無多今春得雨稍遲收成不無少歉若將新舊錢糧併令一時完納民力未免艱難著將此十六州縣衛歷年舊欠錢糧以及未完口糧籽種銀

穀概行緩至本年秋收後催徵完項俾民間不致拮据該部即遵諭速行○又諭昨據奉天將軍達勒當阿奏稱寧古塔所屬南海德克登伊等處藏匿偷挖人參之犯甚衆應行派撥官兵前往查拏之處請著該將軍與副都統商酌辦理等語從前雖經將軍鄂彌達奏派官兵查拏此等人犯乃並未實力清除而接任將軍博第巴靈阿等亦不以此為事蓋因與彼處居人有所掣肘故止虛應故事前往一次不過拏獲數犯以圖塞責辦理殊屬草率立法禁止之地容此等匪類潛行聚集不但伊等偷挖人參希圖獲利日久恐於地方別滋事端甚有關係此次辦理務期實心釐剔永靖地方不得仍前徒務虛名苟且從事著曉諭該將軍巴靈阿知之乾清門二等侍衛庫楚曾久於琿春副協領之任深知彼處情形亦曾巡查過彼處地方著庫楚馳驛赴寧古塔交與該將軍巴靈阿有差遣委

用之處將伊試用如行走果好於事有益著奏聞留於彼處遇伊應陞協領缺出即行題補若行走平常無甚用處即行具奏令其回京○戶部等部議覆黑龍江將軍傅森等將禮部會同戶部等部議覆監察御史台桂條奏黑龍江事宜一案分晰定議一稱該御史請將呼蘭官莊糧石歲撥一萬石運至黑龍江存貯經部議該地方積貯是否豐足別城船隻調往是否便利令臣妥議查黑龍江倉內現存米一萬餘石細糧四萬餘石足支二年有餘若撥船運送徒費兵力錢糧再查呼蘭地土肥沃水路與齊齊哈爾黑龍江墨爾根三城相近前任將軍那蘇圖等奏設官莊存貯糧石原備濟三城之不足請嗣後何城備貯缺少即以呼蘭備存糧撥本屬兵備船運送備貯一稱該御史奏生息銀兩出借之後或有死亡事故其應扣利銀著落子弟坐扣無子弟或者落親族或於本佐領內坐扣

並請將現在餘銀代補無著借項。以免拖累。經部議照乾隆七年議定寧古塔船廠息銀之例。出借銀兩。按季本利一並坐扣。退故者。於子孫名下免利扣本。無子孫者。准予豁免。於庫貯賞恤餘剩銀內抵補等語。臣查黑龍江四城利銀無幾。若照船廠之例。必至不能接續。且遇紅白事件。定不敷用。請將出借銀兩。願扣者扣。願償者償。退故者子孫代補。本利俱還。惟無子孫者。始照船廠例辦理。一稱

該御史奏黑龍江倉廩宜建築隄岸。安椿下埽。經部議黑龍江原建木城。年久糟朽。該將軍請另建。並未將江水衝激。應扣椿埽之處。議及。應令據實查明。臣查黑龍江城倉圍牆。俱在高阜。自八丈至二十丈不等。詢之老民。皆言建造之初。原係如此。五十餘年。雖遇大水。並無瀰漫坍塌。若勉強安椿。恐壞生成自然之形。轉至不能經久。以上三條。均應如該將軍等所奏辦理。從之。○以鑲藍旗蒙古都

統西特庫。為廣州將軍。○以鑲紅旗滿洲印務叅領伊倫泰。為寧古塔右翼副都統。○甲申遣官祭

關帝廟。○乙酉。戶部議准江蘇巡撫陳大受疏稱。吳江震澤二縣濱湖。坍漲田蕩。乾隆九年冬。勘共坍沒田蕩八十五頃六十四畝。有奇。新漲田蕩四百三十四頃四十七畝。有奇。其坍沒錢糧。應行蠲免。新漲田地。應行升科。均應如所奏。分別辦理。從之。○丙戌。吏部議

覆安徽巡撫準泰條奏。災邑久任之法。一增定久任之州縣也。查乾隆七年諭旨。州縣題補得人。即令久於其地。係專指兩淮徐鳳潁而言。請將被災之直隸泗州。並所屬盱眙等縣。久任等語。查被災州縣。必須賢員經理。並非鳳潁之外。概不許其久任。應令該撫隨時酌辦。一請暫改部選之中缺也。鳳陽府屬之鳳陽臨淮懷遠定遠四邑。平日之化導既難。災餘之困乏尤甚。請將四缺暫歸外省揀選題補。查

鳳陽等四縣俱係部選中缺並無在外揀選題補之例該撫所請應毋庸議一請久任表率之知府也鳳陽潁州二府現有興修水利

城工必久於其地始能熟悉情形如有堪膺保薦之員請照州縣一例陞銜留任分別年限升用查知府為州縣之表率如果得人即令久於其任亦屬應行之事應令該撫隨時酌辦其所請照州縣一例陞銜留任之處亦毋庸議得旨鳳陽臨淮懷遠定遠著照該撫

軍機處

三

所請行餘依議○刑部等部議覆護理山西巡撫布政使陶正中疏稱大朔理事通判承審察哈爾蒙古人民交涉案件請仍舊例一摺應如所請大朔理事通判承審交涉事件仍由大同朔平二府核轉完結毋庸呈報歸綏道又稱蒙古交涉命案嗣後命該衛所按照旗界帶領件作會同該管理事官相驗承審時仍令原驗之理事官會同該通判審擬又嗣後各旗自行拏獲竊案罪止杖責者令

該通判一面審結一面通詳存案其徒罪以上審得實情先通報再擬結至命盜重案例應監禁者應查明收禁從之

實錄卷二百四

三四

大清高宗法天隆運至誠先覺體元立極敷文奮武孝慈神聖純皇帝實錄卷之二百四十

大清高宗法天隆運至誠先覺體元立極敷文
奮武孝慈神聖純皇帝實錄卷之二百四十一

三、禮部官擬議官太子太傅太僕寺卿太僕寺卿司事總辦內大臣稽察欽奉 上諭事件處管理

吏部理藩院事務正黃旗滿洲都統世宗時都統軍功七級隨帶加一級尋常加二級軍功紀一次臣度桂

總辦官擬議官太子太傅太僕寺卿太僕寺卿司事總辦內大臣稽察欽奉 上諭事件處管理刑部二庫事務

世宗時都統軍功七級隨帶加二級又加二級臣重誥內大臣戶部尚書總辦滿洲都統軍功紀錄奏

尋常紀錄十四次臣總辦擬議官太子少保工部尚書紀錄六次臣曹振鏞等奉

較修

乾隆十年乙丑五月丁亥戶部議覆江蘇巡

平定文三十四

撫陳大受疏稱江蘇等九府州屬濱江坍沒

項下蘆洲田灘課銀四千六百七十六兩五

錢零請自乾隆元年為始概予豁免應如所

請從之○禮部議覆刑部右侍郎彭啟豐奏

稱乾隆五年仰蒙

欽頒太學訓飭士子文昭著聖賢為己之功針

砭俗學浮靡之弊從前止勒石太學各省尚

未頒發請通行天下學宮同

世祖章皇帝卧碑文

聖祖仁皇帝聖諭廣訓

世宗憲皇帝御製朋黨論朔望令教官宣講應

如該侍郎所請從之○戊子諭據御醫邵正

文奏稱額駙策凌之母服藥須用人參著再

賞一觔發往○以協辦大學士吏部尚書訥

親為大學士○己丑

上詣暢春園問

皇太后安○詣

大高殿行禮○還宮○以故雲南鎮南州土州

平定文三十四

同段恒敬弟恒章襲職○予故正白旗

漢軍副都統高大潢祭葬如例○庚寅

內閣翰林院帶領壬戌科散館修撰編

修庶吉士引見得旨清書庶吉士羅暹

春邵齊肅寶光鼎王以昌俱著授為編

修胡澤潢王太岳王世仕俱著授為檢

討漢書修撰金姓編修湯大紳楊述曾

已經授職其庶吉士陳大齡程景伊孫廷

槐朱佩蓮邱柱張泰開曹經姚範劉炳

徐瑋經聞。儲麟趾。陸樹本。杜若拙。戈岱。蔡時田。顧汝修。劉錫齡。俱著授為編修。周孔從。周燾。張日譽。王康佐。周人騏。李金臺。惠士元。陳桂洲。熊為霖。何疇。出科聯。叢中並。覺羅奉寬。俱著授為檢討。凌鎬。朱櫟。閻循琦。王鋌。廖方蓮。熊元龍。盛格。俱以部屬用。○是日起。

上以夏至祭

地於

方澤齋戒三日。○辛卯。諭朕此次巡幸多倫諾

平定集卷三十四

三

爾察哈爾八旗總管及馬廠太僕寺總管等沿途扈從預備差務均自備馬匹器具不無需費著加恩各賞俸半年並著照隨圍官員例豫支秋季俸銀察哈爾副總管等除留該游牧辦事外其隨同總管前來者亦著一體加恩賞給○又諭原任戶部尚書阿爾賽以約束家人賭博奄遭兇逆至於殞命此實主僕間罕有之奇變朕心震怒勅令三法司即時定擬據法司按律將逆奴置之極刑其救

護不力者一人擬斬監候二人充發遠方向來旗人事件類此者例用清字完結是以該部亦用清字照例速正典刑耳此一事在京之黃童白叟無不知之將來傳之外省亦無不共知之其中並無曖昧不可告人之處何必為之隱諱掩飾耶乃御史李慎修特行陳奏以為刑部單用清字完結若惟恐聞之中外者此言甚屬昏憤若單用清字遂可以掩人之耳目則李慎修又何從聞之而為此奏耶尤可異者李慎修以為隱諱之意一萌則俗吏之視災民無所關切從前如雅爾圖之在河南常安之在浙江俱不免以災傷為諱得非逆揣我皇上之不樂聞故隱忍而為此乎朕御極以來旰食宵衣勤求民隱水旱災荒乃民生第一切務朕為未雨綢繆之慮夙夜焦勞無時或釋訓飭督撫大臣至再至三伊等亦知諱災必獲重譴不敢自蹈罪戾若云逆揣朕不樂聞而故為隱忍是必朕實有

平定集卷三十四

四

不樂聞之意。而二人始逆揣耳。朕祇有惟恐不聞災傷之意。並無不樂聞災傷之意。此心可以對

天地神明。即如當日河南被災一事。雅爾圖原曾奏聞。朕恐其中或有隱瞞。特命大臣前往。確實查辦。旋據奏稱雅爾圖報災之處。俱屬相符。並無諱匿。亦已賑濟安插。但辦理畧有未周耳。浙江被水之事。常安亦曾奏聞。但辦理有未善處。朕即降旨嚴行訓飭。並諭該督

實錄卷三十四

五

確查經理之。李慎修獨不知之乎。夫人非聖賢。孰能無過。仲由喜聞過。令名無窮焉。朕日理萬幾。豈能無過。所賴諸臣繩愆糾謬。然喜聞過者。未有不自省也。朕自維過失之處甚多。至災傷一事。實恐聞之不切。救之不力。十年以來。亦既殫心竭力。日夜焦勞。意謂中外臣民。宜無不共知共見者。而李慎修猶為此奏。實令朕寒心。且以知自古為君之難也。聞李慎修舊為雅爾圖屬官。曾以錯誤被雅爾

圖申飭。今日之奏。未必非挾夙怨。然彼欲竊忠直敢言之名。而識見卑庸。兼多私意。自為言官以來。其所條陳。如請停遣官捕蝗一件。夫螟螣蟲賊。秉畀炎火。載在毛詩。漢唐以來。奉行一致。我

皇祖

皇考嚴定捕蝗不力之處。分數十年間。蝗始不為大患。此其彰明較著。確有成效者。又條陳京師錢文一事。而痛貶辦理之大臣。苛急煩

實錄卷三十四

六

碎。夫京師錢價高昂。大臣等籌議。非不盡心。而究無盡善之策。朕已降旨。令酌量變通之道。而李慎修探知。亟為此奏。又復吹毛求疵。將大臣等大加詆毀。以博市井小人之稱贊。所謂欲加之罪。何患無辭。其用心亦詐而巧矣。今以阿爾賽家奴一事。刑部不應用清字完結。而忽牽連及於外省報荒之政。比擬甚為不倫。全不知朕視民如傷之苦衷。而橫加以厭聞災祲之謗議。誠不知其是何肺腑。

也以君上為立名之地不顧理之是非不審事之虛實存心險薄其過不止於狂瞽而已若朕仍復寬容則顛倒妄謬直道全無實有關於人心風俗李慎修著交部嚴加議處其奏摺併發○又諭曰高斌著補授吏部尚書那蘇圖著補授直隸總督高斌俟那蘇圖到任後來京辦事直隸水利河道工程原係劉於義高斌經手著仍舊辦理如有查勘相度之處即從京師前往○戶部尚書海望等議

實錄卷二百一

七

奏據江南河督白鍾山奏稱該省捐例本備地方賑卹之用前因水利各工估需銀三百九十餘萬兩無項可動是以撥用上下兩江捐款接濟若遵照本年十月內停捐則動撥銀無從抵補請再展限二年又據御史葛德潤奏稱捐賑所備莫要於河工今善後事宜果能周詳完密將無需於賑況目前直賑捐款現在雲集人情趨便必樂就直賑而不就江捐應照原議以本年十月停止查捐輸議

敘原屬一時權宜從前總督高斌等以賑務水利需費浩繁奏請開捐則捐款銀兩撥為水利善後事宜之用正與原奏相符且江省水災賑濟各項動撥帑金不下千百餘萬未嘗必以報捐之數抵補況捐例移歸各省收捐本色以備賑糶之用江省現在捐監常平倉穀足以備賑捐例於本年十月已屆限期應如該御史所奏照原議停止其白鍾山請展限之處應毋庸議從之○以戶部左侍郎

實錄卷二百一

八

梁詩正為戶部尚書○壬辰諭大學士等寄信與將軍巴靈阿前令查拏偷挖人參一節因本處人往往有互相蒙混私令潛越索財釋放之習哨探守護巡蹤等應差員弁不實力緝拏惟以一行塞責且有與偷挖之人資借糧食者故若輩始能多聚久藏現在查辦此事務除積習冬令尤當嚴防始有裨益因思侍衛庫楚備悉彼處情弊是以遣往庫楚到時巴靈阿其留意不可令伊掣肘剔除舊

弊務籌其有利於事者行之○內閣奏請大學士公訥親行走班次得旨訥親著在張廷玉之前○癸巳夏至祭

地於

方澤

上親詣行禮○詣暢春園問

皇太后安○幸圓明園○甲午

孝恭仁皇后忌辰遣官祭

景陵○諭曰李慎修顛倒是非變亂黑白背恩

平定縣志

乙

蔑理謗議橫生朕降旨交部嚴加議處但念伊係應補道員之人朕望其有所敷陳裨益政治置之言路而不知其居心險薄偽妄如此今若加以處分是因朕用而使之獲罪也此際有所不忍著將朕旨令其閱看後存貯內閣暫停交部若彼怙惡不悛再有所犯將此一併治罪○大學士訥親奏蒙定行走班次心實未安請列各大學士之末得旨訥親所奏亦是但我朝定制內閣係滿大學士領

班張廷玉早已面奏若以任用之先後為序

則當日鄂爾泰即不應在張廷玉之前矣嗣

後內閣行走列名訥親在前吏部行走列名

張廷玉在前○工部議覆江蘇巡撫陳大受

疏稱寶山縣月浦塘外建築坦水石壩業經

工竣報銷至楊家嘴等處原築坦水部查作

何保護長久查外口臨水處釘椿二路浪激

搜空底土致向外欹應用外椿簽釘根深堅

固原椿內碎石四層現在低陷宜隨時修整

平定縣志

丁

應如所奏從之○乙未諭軍機大臣等貴州

總督張廣泗等奏報黔省匪類謀為不軌一

案供出夥黨甚多四川雲南二省皆有之可

將張廣泗等奏摺節錄寄與張允隨紀山閱

看令其嚴密查拏毋使匪黨漏網亦不可拖

累無辜務飭屬員妥速辦理拏獲何人即時

具奏○戶部議覆陞任署廣東巡撫廣州將

軍策楞疏稱茂名化州吳川羅定等四州縣

被災五七八九十分及水衝河壓不能墾

復田稅共四百九十三頃九十九畝有奇。應徵地丁銀四百二十八兩八錢零。本色米一百三十二石六斗零。閏銀四錢九分零。請一併蠲免。應如所請。從之。○又議覆長蘆鹽政伊拉齊疏稱永利富國永阜王家岡四場並海豐縣二麥被旱。竈地內應徵錢糧業經蒙恩蠲免。所有蠲剩銀六百八十一兩二錢零。請分年帶徵。以紓民力。應如所請。按被災分數照例分年帶徵得旨。依議速行。○署廣西巡撫託庸疏報乾隆九年分桂林柳州思恩三府屬之臨桂來賓象州賓州并鬱林五州縣里民首報墾熟舊荒并未入全書老荒水民田塘共稅二頃六十六畝有奇。又桂林府屬之義寧縣里民首報墾熟荒水屯田稅二十畝有奇。○丙申。

上詣暢春園問

皇太后安。○戶部議覆倉場侍郎覺羅吳拜等疏稱石壩白糧經紀應領排造銀兩較大通

橋雖多一倍有餘。而所排船隻亦較大通橋船料加倍有餘。經部議令開明船長寬厚尺寸開報。查大通橋剝船船底兩幫并鋪面計折見方丈十三丈八尺一寸九分。厚一寸二分。梁頭計折見方丈五丈二尺八寸。厚一寸八分零。排造銀一百三十兩。至白糧經紀剝船船底兩幫並鋪面計折見方丈二十六丈二尺五寸七分。厚一寸五分。梁頭計折見方丈十一丈四尺九寸一分。厚二寸。較大通橋剝船二隻之外。尚多折見方丈十丈有零。實需銀三百餘兩。應如所請辦理。從之。○工部等部議覆陝西巡撫陳宏謀疏稱漢中府并高陵縣大堂等房屋鳳翔縣縣丞衙署均應拆卸大修。府谷縣典史應建給衙署均應如所請。從之。○以翰林院侍讀學士涂逢震為內閣學士兼禮部侍郎。○調正紅旗漢軍都統納穆圖為正白旗蒙古都統。以正紅旗漢軍副都統趙宏恩兼署正紅旗漢軍都統。○

丁酉。

上御勤政殿聽政。○諭軍機大臣等。朕聞河間天津一帶雨水不足。不但二麥歉收。即夏田亦不能補種。人言如此。朕心甚為厯念。不知地方實在情形如何。高斌如何籌畫辦理。可即寄信詢問。令其速行具奏。前據喀爾吉善奏稱。遵旨於山東所屬地方。購買麥石。運至直隸。以備接濟。朕比降旨。令其與高斌相商辦理。但朕近又聞得山東二麥亦有歉收之處。不知直隸必須東省接濟與否。亦著高斌酌量定議。妥辦。尋奏覆。直隸正順廣太趙冀等屬。今年得雨稍早。二麥可望有秋。其餘各屬。大勢歉薄。但正定以北。種麥本稀。終歲之計。全在秋禾。四五月間。雖得雨數次。尚欠霑足。河間天津二府。積歉之餘。尤關緊要。三四五等月。兩郡所屬。均得時雨。晚禾蕎麥。隨時播種。不致荒蕪。現在民情安帖。米價不昂。全無旱象。至東省採買麥石運直。原在豐收之

東昌泰充。沂曹登萊七府。其濟武青三屬。收成稍歉。並未糴買。直省雖不恃此接濟。而近畿之地。先事豫籌。實屬有益。得旨。所奏俱悉。近京一帶。究欠霑足。待澤孔亟。朕復惕勵靡寧矣。○吏部奏請大學士訥親。應兼何殿閣銜。得旨。訥親著為保和殿大學士。兼吏部尚書。○以吏部左侍郎阿克敦。兼管翰林院掌院學士。○以詹事府少詹事沈德潛。為詹事府詹事。兼翰林院侍讀學士。○以鴻臚寺卿梅穀成。為右通政使。○戊戌。諭各直省縣丞。主簿。典史。巡檢等微員。革職解任。或告病身故。實係窮苦。不能回籍者。曾降旨。命該督撫於存公項內。酌量賞給還鄉路費。其教官一項。各直省亦有照微員例賞給者。惟湖廣江西四川雲南廣西等省。從無給過。朕思教職品級。原與縣丞相仿。雖籍隸本省。其中亦有相隔數百里至千里者。路途遙遠。不無乏費之員。嗣後各省教官。有相隔本地五百里以

外實係艱窘者俱著照例賞給以昭畫一○戶部議覆直隸總督高斌疏稱乾隆九年天津北倉截留南漕五十萬石原備荒歉之需今各屬豐收倉廩臨水易致霉變應早為變通請將每歲易州供應

陵糈並滄州駐防天津水師營兵米應需正耗共米七萬五千九百四十四石六斗均在北倉存貯漕米內供支此項漕糧撥完時仍舊照例分項豫請截留南漕支放倘此際各屬或有緩急應接濟之處仍照原議隨時酌量派撥其運至易州等處並請給水運陸運腳價應如所奏通融辦理從之○兵部議覆雲南總督張允隨疏稱滇省副參游都守共計一百一十四缺內由部推者四缺其餘例係揀選題補今准部咨以滇省題缺獨多令區別妥議具題查雲南孤懸天末內則百蠻環處外則三面臨邊形勢險要迥非他省可比必得熟悉諳鍊之員庶收臂指之效其必不

能改為選缺者共計九十六缺至曲尋一鎮乃黔楚通衢楚姚一鎮為迤南九府咽喉景蒙一營界接鎮沅亦屬緊要是以向例題補今查此三鎮營尚稍近內地請將曲尋楚姚兩鎮左右二營游擊四缺及中左右三營守備六缺景蒙營參將一缺守備一缺改為部推等語查雲南向歸部推者惟雲南城守營參將一缺守備一缺大理城守營游擊一缺守備一缺今雖據該督酌改十二缺尚不及十分之二豈無腹內地方可以酌改之處應令該督再行區別具題得旨如該督所請行○工部等部議覆刑部右侍郎彭啟豐條奏浙省事宜一官湖宜實力開濬也查浙江猾吏奸民或占蓄水之湖為田或侵洩水之溝為地水道半為填閉上年浙江布政使潘思渠請禁侵占官湖一摺部議除已經報墾之地其餘蓄水之地畫明界限不許再行開墾今該侍郎以將來之占墾固當嚴禁而現今

之淤淺亦宜修治請令該撫酌議次第開濬應如所請令該撫逐一詳加確勘剷除侵占開濬深寬一徵收漕糧宜畫一也查江南漕米每石收漕費錢五十四文以二十七文給運丁二十七文歸州縣今該侍郎奏浙省州縣藉口向無漕費每石漕米竟有私加五六升至一二升不等蠹役乘機竊取運丁嚇詐勒加官民並累請照江南之例每石收錢二十七文以給州縣殊與該省有漕各屬酌收漕費錢文以及禁止勒索加派之例迥不相符應令該督撫總漕確實嚴查報部到日再議一請定官員往來夫役多寬也該侍郎奏浙省官員往來水路船隻緯夫陸路兜夫扛夫向未定額多者役及千夫少亦不下六七百名實不需此數吏役家人任意多索或折銀入橐稍不遂意即加凌辱且夫役先期晝夜伺候不免飢寒倒斃近來浙省督撫灼知此弊出巡豫為禁約州縣仍不敢不多為豫

備誠如所奏殊屬不合應行浙省督撫查從前何等官員用夫至如此之多州縣因何多行豫備一并指參到日再議嗣後如有多支多應者即行叅處一請禁兵役巡鹽借端擾民也該侍郎奏按行溫台諸郡聞兵丁往往藉端凌虐窮民不曰巡鹽而曰搜鹽挨戶搜查竈前床下稍有食鹽存積多方嚇詐得錢方行釋放苟不遂欲即指為私煎私售拏送甚或一家之鹽無多并數家之鹽扳指獲送請令浙省文武大臣嚴行禁止應如所請轉飭該省文武嚴禁弁役以杜苛索凌虐之弊從之○以鑲白旗滿洲副都統阿蘭泰為鑲藍旗蒙古都統○己亥諭戶部侍郎員缺著工部侍郎呂熾調補仍留直隸學政之任戶部乏人著劉於義兼管尚書事務工部侍郎員缺著范燦補授○準噶爾部人圖魯孟克挈眷來降命賞給安插如例○戶部議准直隸總督高斌奏請十年夏季薊州遵化州豐

潤縣供應

陵工歲需俸餉銀兩。應於九年地丁糧銀內動撥。至應需漕粟米石。請於古北口外八溝等處採買米內運用。得旨著照該督所請行。

庚子諭曰。正黃旗護軍統領奈格。人甚平庸。年亦衰邁。著原品休致。所遺員缺。著慶泰補授。鑲藍旗護軍統領阿爾泰。僅可辦尋常事件。亦不勝護軍統領之任。著解任候旨。所遺員缺。著恒祿補授。○又諭八旗滿洲舊制。以

操演騎射為要。凡兵丁內。優者挑取前鋒護軍。無非欲訓練舊制。不至荒廢。是以步射月校六次。春秋騎射。三年一次軍政。定例遵行。俾兵丁練習精純。惟在該管大臣章京等。實心振飭。數年來。節經降旨訓誡。今見前鋒營兵丁尚可。而大營之該管大臣章京等。平時疎於訓練。故兵丁只求安逸。及屆舉行軍政之期。始紛紛勉學。如此怠忽廢弛。又安望其嫻熟哉。護軍統領等。誠員朕委任之恩矣。嗣後務遵

舊制。親往閱看。以期技藝純熟。倘仍前怠惰。不加勤勉。經朕查出。必將該管大臣章京兵丁等。一併治罪。決不寬貸。將此通諭知之。○又諭曰。劉於義已復用尚書。協辦大學士。伊子劉益。從前恩詔內所得廕生。著給還。○戶部等部議准。陞任湖南巡撫蔣溥。疏稱寶慶府理徭同知。移住長安地方。所有

關帝廟祭祀銀三十五兩七錢零。請照永綏廳之例支給。又該同知設有倉庫監獄。應添設斗級禁卒庫子七名。歲共給銀四十二兩。從之。○又議准山西巡撫阿里衮疏稱。河津縣所屬永安遠停等村。地濱黃河。實在被坍。釀地四十六頃二十六畝零。並無新漲可抵。計無徵糧銀一百七十九兩零。請豁免。從之。○禮部議覆。巡視西城御史舒敏奏。稱阜城門內城隍廟。每年五月初一日起。開廟十日。該住持道官。賃地與人。賣腥羶之物。並有設攤賣唱。鑼鼓喧闐。殊為污褻。嗣後買賣。毋得

逼近殿宇歌唱應行禁止。並行文九門提督及該城巡察從之。○工部議復管理淮安宿遷等關稅務倭赫奏稱該關舊有通船一載之例。如船實能受載百擔而裝貨在七十擔以下者。仍按擔徵收。如滿七十擔者。即照本船受載數目。令輸百擔錢糧。自數百擔以至千餘擔。俱照此例。再查簽量船隻受載之例。凡船頭船梢及平板上跨。俱剔除不入見數之內。即貯貨亦不徵稅。例冊未刊。不知始自何年。乃狡黠船戶。每計貨物已滿七分。即分貯頭梢上跨。以避一載之例。而奸猾吏胥藉此高下其手。嗣後請將散裝貨物。不拘頭梢艙跨。悉行上稅。通船一載之例。禁止。應如所請。按擔徵收。從之。○辛丑。

上詣暢春園。問

皇太后安。○是月。直隸總督高斌奏永定河道員缺緊要。難得勝任之人。英廉曾任江南河工。同知告病回旗。復發直隸。以河工相當之

缺補用。請即以署理得旨。英廉亦係曾經保薦御史之人。未為不可。但命往江南。原以同知用。而彼告病回旗。今驟署道。不可應於河員中節次題補。或令英廉署所出之缺可耳。○又奏。不勝吏部尚書之任。請另簡賢員。並舉禮部尚書來保自代。得旨。卿簡任銓衡。正資料理。不必固辭。該部知道。○兩江總督協理河務尹繼善等奏。下河一帶。地勢低窪。田易漫漶。業經大加挑濬。水勢循軌。但沿河兩岸民田。究宜設立隄防捍衛。除頒發條約外。並委員監視。令濬河人夫。將挑出之土。離河五六丈外堆積。以便築成隄堰。現在如式堆貯。延袤環繞。宛若長隄。倘乘已積之土。排拍堅實。即屬天然隄防。於民田大有裨益。得旨。知道了。○江蘇巡撫陳大受奏。士農工商各有恒業。外此僧道二教。究以頒給度牒者為正。查常州府地方。設立靜堂。羣聚拜佛。其人非僧非道。隨意自立教名。外省郡縣。聲息

相通互稱道友。形涉異端。目下雖無為匪之事。於風俗人心。究有所害。亟宜設法安置。得旨。此等事。若欲為之。則須實力。而不可欲速。不然。則所謂好事不如無也。○江南提督吳進義奏。整飭營伍。必親閱方收實效。地方遼濶難周。似應分年巡察。蘇松水師鎮標四營。駐崇明縣。於巡察蘇松沿海各營時。就便渡海往閱。水陸操演一次。作為一年。狼山鎮駐江北通州。於巡查常鎮沿江各營時。就便查閱狼山鎮標三營。及鎮屬之揚州泰州等營。一次。作為一年。壽春鎮標三營。及鎮屬之六安廬州亳州泗州等營。並非鎮轄之徽寧池蕪廣五營。俱係上江地方。酌量巡查一次。作為一年。三載之間。可以遍閱。於整飭訓練大有裨益。得旨。應如此。整飭營伍。知道了。○安徽巡撫魏定國奏。本年生發蝻孽處所。惟青陽當塗無為和州等處。尚未報到捕淨。其貴池等十數州縣。現在陸續據報撲滅無遺。得

旨。恐尚有未盡之蝻種。宜亟力督捕。此等處慮汝過於柔懦。行小惠而致大害也。慎之。○鳳陽關監督普福奏。鳳陽關稅務船料應照例徵收。其續增之銅觔腳價。並計石之小販。因非船料名目。未便擅徵。呈報戶部在案。旋經議覆。除計石小販應准寬免。其隨船料之銅觔水腳等銀。令照數賠補。合計免過加五銅觔四六腳價等項銀兩。共三十四萬五百八十一兩零。此項實免在商。絲毫未敢染指。今以內務府貧乏徵員。令賠三十餘萬免項。戰慄驚惶。毫無所措。惟有陳情豁免已耳。得旨。汝錯免在前。可也。又復粉飾沽名於後。併欲全免。不可也。此所以應追賠耳。今始知戰慄耶。所奏不准行。○浙江巡撫常安奏。柴塘修築日久。間有朽敗。切諭工員。凡埕陷處。即抽換加鑲。雖從前新漲之沙。已日就堅實。究應多購柴薪。以備不虞。得旨。備柴為要。漲沙竟不足恃。從前亦屢諭之矣。○浙江按察使

萬國宣奏浙省俗尚浮靡。山僻小邑尚知節儉。至浙西之杭嘉湖。浙東之紹興等府。皆競尚奢侈。爭奇鬪勝。屢經宣示禁革。而積重難返。請將應禁條款。刊訂成帙。遍行給散。庶家喻戶曉。陋習可移。得旨。移風易俗。豈易言之。惟應以不息之心。行如傷之政。久道化成可也。○又奏雨水及時。糧價平減。及春花收成分數。得旨。欣慰。覽之。奏報年成。惟應以實。不可徒存慰朕之見。而有所粉飾也。○署湖廣總督鄂彌達等奏楚省長安。綏寧。桂陽。界連黔粵。本年五月內。據長安營遊擊劉策名稟稱。探得廣西馬提寨後石洞。有穿紅袍一人。每夜鼓樂不絕。各寨訪拿甚緊。楚省地靈。汛至粵西。龍勝營約三百餘里。均係苗人錯處。嚴加防範。得旨。覽。汝等亦應留心。恐地方中有似此生事之徒。而汝等不知也。○河南巡撫碩色奏。據廣東巡撫策楞奏。稱別釐常平倉穀出糶。及侵分穀價弊端。應飭該管道府。

親赴所屬徹底盤查。凡遇開糶買補。俱逐一聲明。年分。厥口。以杜存舊糶新。折價交代之弊。查豫省州縣經辦此事。俱將倉穀按存七出三之例核定。先期詳明。俟批准後。依時值減價出糶。循例春月出陳。秋收易新。並無移新作舊之弊。至稱各州縣穀不實貯。惟留價銀貯庫。離任後親屬侵分。竟成虧空。豫省出糶倉糧。俱先將應減價值詳明。五日一次具報。糶價數目。又報所糶總數。及封倉日期。價銀暫存庫內。如買補時價貴。准其暫停。仍將原銀提解府庫。俟價平應買。始行文發各州縣。既不得存留穀價。自無親屬侵分。致成虧空之事。惟倉貯厥口。各州縣雖編列字號。年月細數。向不造報上司。倉儲重務。不厭周詳。應如廣撫所奏。飭各州縣造具厥口清冊。出入逐一註明申報。得旨。不在立法之詳。惟在實力行之。○又奏光州羅山等六州縣蝻子萌動。業經撲滅情形。得旨。知道了。更宜留心。

查察○山西巡撫阿里衮奏太原朔平等府所屬共二十三州縣入夏以來雨澤愆期各處設壇祈禱未蒙感應應循例清理刑獄將情輕罪犯分別減等發落俟甘霖大沛即行停止得旨應如是辦理者知道了○陝西巡撫陳宏謀奏陝省節年委署人員支給養廉有照缺全支者有支一半者又有先支一半而署員復請全給者辦理殊未妥協查原缺委署有現任兼署與試用委署不同現任兼署又有正印與佐貳間曹不同在正印兼署原有本任養廉可資辦理兩任公事半支養廉已足若試用候補人員則全賴署任養廉辦公難以減少佐貳委署正印本任養廉無幾亦賴署任養廉支用今定議試用候補人員並佐貳委署正印者均照署缺全支惟督撫互行兼攝以及司護撫印應止支署任一半餘一半扣留充公兩司道府州縣現任兼署者俱照例止支一半一半充公如佐雜兼署佐雜

及正印兼攝佐雜者俱照缺半支得旨所議妥知道了○又奏推陞刑部郎中員外郎留西安理事同知任之常德在陝年久任事實心可否仍留原任酌量陞用得旨如此則將啟趨避之風矣不准行○雲南總督張允隨奏滇省開濬金沙江通川河道乘春水涸將極險次險各灘分別逐加剷鑿其夾岸峭壁鑿出緯路自乾隆八年十一月興工至十年四月告成現在川省商船赴金沙廠貿易者約三百餘號即雇募此項船隻裝運京銅除經過上游之濫田壩小溜筒及下游之沙河象鼻大漢漕等灘分半盤剝餘皆原載直行毫無阻滯得旨所奏俱悉亦賴卿擔任實心而且條理井然故得成功也覽奏曷勝嘉悅○貴州總督張廣泗等奏黔西州逆犯夏如春黨羽衆多現已獲一百六十四名伊子夏長榮尤為此案首逆經遵義府知府陳玉璧署遵義副將亢宗偉差役入川跣緝於五月

初九日在涪州地方將夏春榮並夥犯童朝網丁玉書拏獲解黔審訊旋又訊出夏如春在川勾結姓名簿一本初藏修文縣磨盤寨吳士仁家轉交貴筑縣丁官寨鄭之鳳家後仍交吳士仁家因委員迅往查追已為吳士龍妻周氏及士仁妻蕭氏燒燬無存隨令夏如春將登記姓名指供據供出夥犯楊玉芝等八十一名先後給送盤纏並未至黔勾結為匪因將開出姓名住址照抄飛咨川省按名緝拏惟是隔省關提人犯衆多難免疎虞倘其中有挾私妄扳者遞解往返尤為無辜拖累應請川省將來拏獲夥犯即解成都交該撫委員嚴審如供情不符咨黔訊取如春父子確供定案倘必須如春父子面審質對應照例移少就多專委員弁多撥兵役押解赴川收審得旨嘉悅之外無可批諭也又批陳玉璽元宗偉入川跣緝句此等急公之員應俟事竣奏聞酌與議敘以示鼓勵又批蕭

氏等燒燬姓名簿句此二婦人不宜輕縱又批既已燒燬亦可使反側子自安又批嚴審夏如春登記姓名句此亦不可少又批其中有挾私妄扳者句所見周到之極正合朕意又批將如春父子押解赴川句此可不必應質審者想亦不過數人仍以解黔為妥○又奏五月十三四等日大雨連綿山水驟發省城地低溪河宣洩不及於十五日黎明水決外城而入衝去北門內外濱河居住兵民六百五十戶淹斃大小男婦一百六十八名當協同司道親往查勘飭屬分別輕重加意賑卹再普安州於四月十四日山溪驟漲北門外淹斃民人十一口所屬亦資孔地方於五月初七日水淹兵民住房一百零六戶人口幸無損傷已飛飭布政司委員齎帑前往照省城所辦分別賑卹得旨所奏俱悉被災處所加意撫卹之黔省尤不比他處也○貴州提督丁士傑奏黔省四鎮總兵官安籠鎮宋

愛居心持正。辦事明敏。營伍事宜。頗稱諳練。古州鎮崔傑。才情雖覺遲鈍。人尚老成。且能留心營伍。威寧鎮曾長治。才具中平。供職小心。遇事黽勉。鎮遠鎮冷文瑞。識量褊淺。務華鮮實。措置多不中肯要。然平日尚能留心整理。故營伍不致廢弛。得旨。所奏俱悉。勗其不及。裁其過當。和衷共濟。以期肅營伍而靖地方。則汝之職也。勉之。

實錄卷二百四十一

三十一

大清高宗法天隆運至誠先覺體元立極敷文奮武孝慈神聖純皇帝實錄卷之二百四十一

大清高宗法天隆運至誠先覺體元立極敷文奮武孝慈神聖純皇帝實錄卷之二百四十二

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總辦官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

實錄卷二百四十二

一

乾隆十年乙丑六月壬寅朔諭朕巡幸木蘭及多倫諾爾於七月二十二日起鑾一切應行豫備事宜著交各該處豫先備辦○戶部議准四川巡撫紀山疏稱煎爛白銅必需紅銅有餘方可點撥建昌紅銅各廠因油米昂貴夫役寥寥迤北礦廠上年四月水淹出銅較減每月所獲尚不足川省鼓鑄之數焉有餘銅點化白銅請將黎溪白銅廠暫行封閉從之○癸卯諭京師自五月中旬得雨以後半月有餘甘澍未能霑渥田禾待澤甚殷著

禮部等衙門擇日虔誠祈禱。○大學士等議奏。據江西撫臣塞楞額奏稱。該省鑄錢所需銅鉛。請行雲貴兩省代籌接濟。但兩省每年辦解京局銅鉛。為數甚多。且本省及四川等處需用。此外有無餘剩。可供別省之處。應令雲貴督臣通盤核算。有餘。即將江西每年額需銅鉛定議賣給。至兩省議定分賣後。價銀如何解還銅鉛如何發運。應令該撫自行咨商辦理得旨。依議。即行。○又議覆。巡察黑龍江戶部郎中福明安條奏內。一稱黑龍江等處兵丁生齒日繁。現在各城壯年閒散計有五千餘名。若不早謀生計。將來必至窮乏。呼蘭有地可耕。請照雍正十三年將奉天開戶旗人移屯呼蘭設立官莊之例。酌借賣米銀兩。令往耕種。分年交米還項等語。查乾隆六年酌派在京旗人移屯奉天等處一案。經大學士查郎阿查勘。除寧古塔所屬拉林。阿勒楚喀等處可種地畝外。黑龍江所屬齊齊哈

實錄卷一百一

二

實錄卷一百一

三

爾之東南六百餘里。呼蘭地方有地徑五百餘里。列為上等。呼蘭之東佛忒喜蘇蘇地方有地徑二百餘里。列為次等。經議政王大臣議以拉林。阿勒楚喀距船廠甚近。請先於此處移駐滿洲一千名屯墾。俟有成效。由近而遠。漸次舉行。今該巡察郎中所請。亦屬代謀生計之意。但閒丁五千餘名。較在京旗人滋生之繁。不啻霄壤。況各處可墾地畝。俟拉林等處由京移駐者。屯種有效。均須次第舉行。自應將呼蘭地方留為在京旗人墾種外。其佛忒喜蘇蘇地方。雖列次等。而距該處旗人尚不甚遠。以之移駐屯墾。亦足資生。應請交該將軍等查酌撥往。并應否仿照官莊之例。借給遷移盤費。詳議具奏。一稱黑龍江屯莊三十。墨爾根屯莊十一。齊齊哈爾屯莊二十。每屯屯丁十名。每名歲交租細糧三十倉石。是三城已有成效。請每年查其所得屯丁人數。漸次酌立官莊。且呼蘭千里膏腴。可以大

興屯田。請以奉天開檔之人。每年酌立屯莊十餘座。將見積貯充盈。不但接濟黑龍江等三城。遠而奉天。近而寧古塔。俱可接濟。即將來京城八旗生齒日繁。拉林移駐充滿之日。并可照例移駐。應如所奏。行令該將軍等。將黑龍江等三城。如何漸次添立官莊。并呼蘭每年酌立之處。詳細確查定議。至稱各城各屯。向乏樹木。應於設立城池屯莊之處栽種。以供薪木梁柱之用。應如所請。令該將軍等一併酌議具奏。一稱黑龍江等處發遣人犯到配三年。安分悔過。及年已七十者。俱奉恩詔查辦。准回旗籍。但從前查辦時。未滿年限。未及年歲。雖經查辦。旋奉部駁者。有之。或本身在配。具呈。或子姪親族在京具呈。屢經部奏。准回旗籍。俱在案。至在京無親族。在配或染病。或戍城。不能具呈者。俱未一體邀恩。情殊可憫。請將原犯情罪。造冊咨部。分別奏聞。等語。查三年悔過人犯。雖有恩旨查辦。但係

一時特恩。並非定例。應以乾隆二年四月十六日奉到在配軍流。亦准查奏之恩詔日期為定。至年已七十。雖情罪較重。亦准奏請回籍之恩詔。事在乾隆二年五月初七日。本犯年歲應以此日為斷。請勅該將軍。將乾隆二年四月十六日以前。在配三年安靜悔過。及乾隆二年五月初七日以前。在配年逾七十各犯。未經查奏。及曾經部駁者。遵照諭旨。除按例發遣。並強竊行兇等重罪。及免死減等實係兇惡棍徒外。餘俱查明情罪。分別應否釋回。咨部請旨。其未滿年限。未及年歲者。概不准入。至欽奉諭旨時。有年逾七十。從前因案情較重。不准回籍。而現今已年逾八十者。與年逾八十以上。除殺人應死。餘皆不論之例。有合。似應矜恤。亦請敕該將軍開明請旨。量與恩施。從之。○禮部議覆盛京工部侍郎留保奏稱。工部五品官六品官司匠。所管千丁上供。

三陵燒造物料生齒日繁。查康熙年間。部議准千丁子弟。照竈戶之例。在奉天八旗漢軍內考試。續經盛京戶部禮部。將所屬莊頭千丁子弟。援例奏令考試。至工部惟四品屬下千丁。准考。五六品官等所屬。事同一例。應請准入於奉天八旗漢軍內。一體考試等語。經臣部以盛京工部五六品等官所屬千丁。從前因何不准考試。咨行該侍郎。今據咨稱。從前五六品等官。所屬無幾。僅能應役。無暇讀書。現在人丁繁盛。實有奮志讀書者。又據奉天將軍咨稱。盛京工部五六品官所屬千丁。俱係陳人五品官所屬內。有三藩人三百八十二名。亦俱係陳人。與考試之例相符。應如該侍郎所請。從之。○授一甲進士第一名錢維城。為翰林院修撰。二名莊存與。三名王際華。為翰林院編修。○調福建汀州鎮總兵黃貴。為漳州鎮總兵。以直隸河屯協副將王之琳。為汀州鎮總兵。○甲辰。禁掛斗送扁之習。諭

親民之官。審理詞訟。秉公剖決。乃職分所當然。在官無可居之功。在民亦不必言感。朕聞外省陋習。有於詞訟審結之後。勝者自以為得計。糾集親左隣里。製斗造扁。懸掛公堂。以為媚悅無識有司。亦恬然受之。不以為怪。此等阿諛獻媚之習。適以啟好訟生事之端。且流為粉飾沽名之弊。澆風斷不可長。嗣後著嚴行禁止。其有仍前掛斗送扁者。各該督撫將縱容徇隱之有司。即行叅處。並將本人一并治罪。該部即遵諭行。○鑲紅旗滿洲三等男舒通阿故。以其子舒敏承襲。○乙巳。兵部奏原任兩廣總督那蘇圖查覆出師義桑口等處。一等軍功。外委虞宏信。准軍功加銜一等。授千總。隨帶紀錄二次。給與功劄。貢生今授州判職銜。岑潔。准軍功加一級。隨帶紀錄二次。監生石爾祿。授為貢生。三等軍功。病故外委傅世佐。予一子監生。從之。○丙午。上詣暢春園。問

皇太后安○兵部議覆著湖廣總督鄂彌達疏稱楚省苗疆副將七缺叅將三缺向係調補經臣奏准部覆令臣擇其最要者酌改二三缺為題缺餘仍照舊調補今查湖北施南協湖南永綏協永順協靖州協四缺湖南宜章臨武桂陽叅將三缺均係苗疆緊要必須豫保熟悉苗疆之員遇缺聽部掣補其沅州協辰州協寶慶協三缺仍照原題於內地副將題補等語查永綏協係新闢地方四面環夷靖州協毗連黔苗又轄新設之長安營桂陽為楚粵門戶民徭雜處此副將二缺叅將一缺似屬緊要至施南永順二協宜章臨武二叅將雖係改土歸流但向化已久與新闢地方不同若俱改為題缺轉於部選人員有礙應令該督仍照舊例於熟悉苗疆之叅將內揀選調補如一時不得其人該督等即行奏請臣部將卓薦一等記名人員開列請旨揀放補用從之○調福建福州城守副將茹銳

臺灣水師副將施必功來京引見○丁未普免天下錢糧諭我朝

列聖相承深仁厚澤無時不加意培養元元以期家給人足百年以來薄海內外物阜民康共享昇平之福朕臨御天下十年於茲撫育蒸黎民依念切躬行儉約薄賦輕徭孜孜於保治之謨不敢稍有暇逸常守節用愛人之訓凡以為民也今寰宇敦寧既鮮糜費之端亦無兵役之耗所有解部錢糧原為八旗官兵及京員俸餉之所需計其所給較之宋時養兵之費猶不及十之一二至於各處工程為利民之舉者亦祇取給於存公銀兩即朕偶有巡幸賞賚所頒亦屬無幾是以左藏尚有餘積數年以來直省偶有水旱朕加恩賑濟多在常格之外如前年江南被水撫綏安插計費帑金千餘萬兩凡此皆因災傷補救而沛恩澤者朕思海宇乂安民氣和樂持盈保泰莫先於足民況天下之財止有此數不

聚於上。即散於下。仰惟我

皇祖在位六十一年。蠲租賜復之詔。史不絕書。又曾特頒

恩旨。將天下錢糧普免一次。我

皇考旰食宵衣。勤求民瘼。無日不下減賦寬徵之令。如甘肅一省。正賦全行豁免者。十有餘年。此中外所共知者。朕以繼志述事之心。際重熙累洽之候。欲使海濱山陬。一民一物。無不均霑大澤。為是特降諭旨。將丙寅年直省應徵錢糧。通行蠲免。其如何辦理之處。著大學士會同該部。即速定擬具奏。○又諭據工部侍郎范璨奏稱。江南下江糧賦。重於他省。向來徵收弊竇甚多。民間每完糧一石。借漕費之名。或以九折收。或以八五折收。甚至以八折收。至雍正七年。蒙

世宗憲皇帝軫念窮黎。

勅令嚴加釐剔。其時尹繼善為江蘇撫。臣悉心籌畫。酌定每石收漕費六分。總令小民平斛。

響。攬額外浮粒不收。地方官奉法緊嚴。彼時

府道常微行密察。諸弊肅清。謳歌載道。乃久而久之。故智復萌。上年下江收漕。賢否不等。聞有初開倉時。印官駐宿倉所。親驗米色。書吏尚無間可乘。迨至漕糧繁兌之時。印官不能處處親驗。吏胥等遂多方刁難。小民不能等候。情願議扣。自九五折至九折不等。大漕既畢。所徵兵行局恤等項米石。竟有扣至八折者。雖得之風聞。然法久弊生。亦不可不再加整頓。況一處如此。他處即相效尤。一省如此。他省亦恐難保。伏懇特頒諭旨。通飭有漕地方官。於開倉之際。刊立木榜。大張曉示。毋許額外需索。令糧道知府等員。不時密訪。如有刁難折扣等弊。即將官吏一並揭參。至於大漕完竣之後。徵收兵行局恤等項。遴委幹員。暗加查察。稍有違犯。亦即稟究。如此則諸弊可以禁止等語。徵收漕糧。弊竇甚多。江蘇之漕。甲於諸省。尤為積弊之藪。朕亦知之。范

琛所奏著發出。令有漕地方大小官員閱看。嚴行釐剔。如有仍蹈故轍者。經朕聞知。或被御史叅劾。必重加處分。至於尹繼善既前在江撫任內。辦理稱善。今節制兩江。仍是職任內。應辨應查之事。何以置若罔聞。一聽有司之變易舊規。奸胥猾吏。得以高下其手也。將此詢問尹繼善。其又何辭。○兵部議奏。和親王弘晝等奉旨查辦八旗世職佐領分例事務。編為成案。請將辦事官員。照纂修八旗則例官員之例。領催披甲。照謄錄之例。給與議敘。查八旗則例館。止有官員議敘。並無領催馬甲議敘之例。謹照兵部則例館議敘之例。再加酌量定議。一兵部則例館。並無議敘一等滿謄錄。今辦理八旗世職佐領定例之領催等。應照兵部則例館二等滿謄錄之例。免其考試。入於本旗議敘班內。四缺後補用一員。一兵部則例館。並無候補繕本筆帖式議敘。今應照八旗志書三等滿謄錄之例。遇缺

先補。一漢謄錄考職州判等。應照八旗則例館之例。歸於雙月陞選。十五缺後。選用一人。一列在二等之領催等。應照兵部則例館三等滿謄錄之例。俟本館一等用完後。再行補用。一列在三等之披甲等。亦應照兵部則例館三等滿謄錄之例。俟本館用完後。再行補用。以上議敘人員。如願改武職。仍准以本旗驍騎校等缺補用。從之。○增建階州州判衙署。從甘肅巡撫黃廷桂請也。○戊申。諭軍機大臣等。聞得辦理萬年吉地工程。一應工作物料錢糧。德爾敏必先辦後發。不獨商人等頗為苦累。即承辦之員。亦每至呼應不靈。夫錢糧固應慎重。而商人等皆係經紀小民。何能墊辦。可寄信德爾敏。嗣後如有應行豫領之項。當即酌量支發。不必過慮。俾商人等不致苦累。則工程庶不致草率。而錢糧亦歸實用矣。若有必需先辦後發之處。著會商爾等辦理。○禮部議覆廣東肇高學政金洪銓疏。

稱

關帝護國庇民神靈赫濯蒙

世宗憲皇帝追封三代公爵。廟祀增輝。竊見公文緊要者。封面概填雙羽飛遞。塘兵或納懷中。或置包裹。輕褻殊甚。可否將雙羽字樣。改為雙翼。應如所請從之。○已酉。諭軍機大臣等。陳子鳳供出年羹堯家人曹德之子曹錦文。隱匿財產一事。上年六月。經刑部奏請將陳子鳳發往江南。交與該督撫會審定擬。距今一載有餘。業已逾限。而尹繼善、陳大受尚未審結。甚屬遲延。此案情節虛實如何。並逾久不結之故。可寄信詢問之。○又諭軍機大臣等。朕前降旨。二氏之教。由來已久。原難盡行沙汰。但遊手之徒。借名出家。耗民財而妨民俗。自不可聽其任意去來。不為清釐。是以諭令該部頒發度牒。以憑查核。乃數年以來。各省所報冊籍。多寡不同。自因本地僧道多寡不同之故。但止有沙汰之數。而未有續收

之數。是有裁而無收也。亦非朕當日辦理此事之意。古聖人之嚴闢異端者。因其有害於政教。今之僧道。不過鄉里無依之貧民。竄入空門。以為餬口計。豈古昔異端之可比。而能為正教之害耶。若果去一僧道。即多一力田之農民。則善政也。但朕復思之。彼游手坐食之人。既為僧道。習於安閒。若迫令改業。受手胼足胝之勞苦。其勢有所不能。不過市井中添無數游惰生事之輩耳。轉不若收之寺觀中。尚有羈縻也。是以朕前原有漸次裁減之旨。不可聽其引而日盛。若緇黃之屬。必應盡汰無遺。則朕從前又何難降旨全行禁革。不事姑容乎。爾等可將朕意寄信與督撫。令其善於體會。轉飭所屬。從寬辦理。若伊等錯會朕意。以為崇高佛老。則又非矣。○內閣翰林院帶領新進士引見。得旨。新科進士。除一甲三名。錢維城、莊存與、王際華。已經授職外。章愷、沈志祖、歐陽正煥、薛芝蔭、蔣元益、史貽謨、徐

開厚張甄陶張若澄徐光文秦鏞李友崇勵
守謙國柱劉元熙毛輝祖顧瀛錢士雲邵齊
烈湯萼聯溫敏楊永謀朱若東黃叔顯孫漢
冀文錦何德新楊維震張馨趙秉忠宋弼許
葵張紹渠謝溶生楊瑋單鐸李英馮秉彝李
因培王協和楊演時蔡淮積善王楷梁濟澤
溫如玉夢麟楊士銘宗室達麟圖范泰恒舒
祿俱著為翰林院庶吉士吳榮段汝舟鄧錫
禮高玉駒閔鶚元莊學和陶思深劉圻姚成
烈江權羅人文楊文振陳慕楷安際虞俞成
楊天恩廖淮孫英李梅曹槐楊文揚杜官德
戴秉瑛喻敬璋關壽齊建中舒敏吳楫劉伯
興趙春福梁景璋張國寧孫曠劉龍光唐文
蔚哈達翰余騰蛟彭禮周才盛張拜賡閔鵠
謝鳳詒趙用熊劉翹羽金澍葉申介王潮俱
著分部學習照例試用狄寬周銘詒孫爾周
周芬佩吳一嵩胡燮臣張萬青任文翌宋煥
魯克寬袁虞禮傳豫趙廷健王訓徐錦汪正

澤侯鈞鄒瀚高登陞趙頤曾光先羅鰲何毅
夫勞宗發高居寧桑淇王善思王銓衡牛宗
文岑天構徐天球徐維綱陸烈葉為舟魯晉
馮渠李際隆李映岱俱著分發各省以知縣
用張夢揚李建中江龍光吳元會孫王綸池
光遠王宇太童元璠何仁陳士師高其度羅
正先孫葵劉震張東賈元鰲陳迴張賓賢張
維燦陳斗歐陽夢旂殷台杰袁芳陳善俱著
以教職即用餘歸原班銓選○兵部議覆直
隸提督保祝奏請將天津正定兩鎮左營游
擊守備宣化鎮中軍游擊守備馬蘭鎮左營
游擊天津城守營都司通州協左右兩營都
司守備并提標所轄之山海關都司唐三營
守備等一十二缺及提標之中營叅將守備
二缺均各改為題補等語查馬蘭鎮左營游
擊係守護
陵寢重地提標中營叅將宣化鎮中營游擊唐
三營游擊均係沿邊緊要應如該提督所請

改為題缺餘應毋庸議從之○四川巡撫紀山奏瞻對頑番不法前委千總向朝選前往曉諭乃下瞻對班滾已發兵二百餘名在西納山下插營阻擋該千總隨令瞻對頭人將公文發去令其回覆而班滾仍復支吾及至上瞻對七林坪土寨照前曉諭又藉稱土司已故家內不知並未放夾壩等語彼此推諉始終不獻贖贖自宜示以兵威師出糧隨現已起運雅郡倉米四千八百八十餘石並接運所需青稞已在爐地購定三千石裏巴二塘共豫購一千五百石其軍需銀亦俱運爐接濟得旨知道了兵貴神速今汝等尚無進師之期而彼已有兵阻擋矣善用兵者如是乎亦諭李質粹知之○又奏本年五月初六日准貴州督臣張廣泗咨稱匪犯夏如春籍隸四川鹽亭在黔造作妖言散給偽劄已於四月初八日拏獲並詢出餘黨汪似海汪錫奇李占春等應查照飭屬逐一嚴拏當即密

諭文武各官遴選幹弁分路嚴緝於五月初九日拏獲李占春俟將夏如春家屬拏解到日一併解黔質究得旨此事須嚴密為之張廣泗於此等事甚留心實得大臣之體恐汝等不及也勉為之○庚戌諭據準奏稱各省蠲免錢糧之例凡遇特恩蠲免者其耗羨仍舊輸納若因水旱蠲免者不得徵收耗羨查安徽所屬鳳潁泗等處從前連值災傷乾隆七年又復被水荷蒙天恩於成災分數例免錢糧外復將蠲餘應行帶徵地漕銀八萬九千二百餘兩地漕米一萬一千八百餘石俱奉特恩寬免此原係因災而加之曠典所有應徵耗羨銀九千一百七十四兩零似應一例免徵但從前未經奏明難以遵辦等語鳳潁泗等處蠲免帶徵地漕銀米一案雖係特恩實因彼地災傷而沛澤於格外者所有應徵耗羨亦著寬免該部即速行文該省督撫遵諭行○戶部議覆前署廣東巡撫策楞

疏稱粵東鼓鑄錢文。部議令將現貯局銅照例配搭鉛錫先行開鑄。其滇省有無餘銅可否通融賣給之處。并令咨商辦理。嗣准雲督張允隨咨覆。節省者囊金釵。二廠銅觔以資粵東鼓鑄。所有粵東開爐鼓鑄青錢所需銅鉛錫應照京局配搭并照雲貴湖廣粵西等省加耗。先設爐六座。每百觔於正耗九觔之外再加補色耗八觔。粵東現貯局銅九萬六千三百九十一觔零。係抽收正課及收買餘銅之項。每百觔作價一十四兩至白鉛黑鉛點錫照部價時價核算。每正耗銅鉛錫共一百九觔。該價銀九兩九錢七分零。除耗不算外。每鑄錢一千需成本銀八錢五分二釐零。照例每錢一十文作銀一兩。除扣還成本尚獲盈餘銀一錢四分七釐零。再所需色耗援照湯丹廠銅之例加給。毋庸作價。查現貯局銅每百觔原給商價銀十兩。今留為鼓鑄。每百觔銀十四兩。是每百觔盈餘銀四兩。所有

色耗八觔。統於此項扣出抵款。於乾隆九年分地丁項內撥鼓鑄工本銀五萬兩。於司庫收貯。其錢局查有裁缺觀風使衙署改為寶廣局。添蓋爐座。所需工料銀統於乾隆九年分田房稅羨內動支。至需用器具什物。先於工本銀內借給工匠製造。於應得工錢內扣還。責成布政使為總理。糧驛道為協理。再委府佐一員為監鑄。雜職一員為巡查。設書辦小書四名。所需薪水工食一切雜用。均於餘息錢內動支。臣部查粵東鼓鑄應給爐匠工料錢。應按該省食物時價支給。未便照別省支銷。餘皆應如前署撫所請從之。○工部議覆署理兩江總督尹繼善疏。稱上江水利急工。前經總辦水利大理寺卿汪隆等奏請修復。部覆准造冊具題查核。今查合肥縣境內原議開復之金斗河及洩水之越河。修建之城東石閘及滁州之孟公石壩。改建閘座。五河縣之蔣家土壩。改建竹簍石壩等工。均無

關於宣洩堵禦實屬虛糜帑項應請停止再
滁州應於東門水關內築土壩高五尺城內
可蓄水以資汲飲更於西門水關外再築一
壩節入城之水水發則攔大溜從城外入護
城河轉入滁河不令全勢穿城以上土壩已
據自行捐築應如所題從之○命戶部侍郎
傅恒在軍機處行走○辛亥

上詣暢春園問

皇太后安○戶部議准四川巡撫紀山疏稱永
寧縣商民白孔昭等請增鹽引六百張共徵
稅銀一百六十三兩四錢四分請自乾隆十
年為始領引配鹽行銷從之○兵部議覆署
湖廣總督鄂彌達等奏稱桂陽州界連東西
兩粵原屬衡州協管轄嗣因該州改為直隸
遂割衡屬之臨武等三縣分屬該州營汛仍
隸衡陽查該州距衡協三百餘里而臨武營
去州不及百里請將桂陽州汛防改歸臨武
營分轄抽撥千總一員帶兵四十名駐防其

原防桂陽州之衡州協千總兵丁抽回應如
所請從之○又議覆四川巡撫紀山疏稱四
省勘界案內議將川省永寧協屬龍場營并
普市官兵移駐赤水及分防古蔺州二處應
建官署營房請動項建造應如所請從之○
壬子大學士等議奏據署湖廣總督鄂彌達
奏籌捐監事例捐穀不如捐銀蓋銀有定數
穀無成價此貴彼賤一百八兩之數勢不能
準照無差倘易捐穀之例捐銀庫貯既充即
偶遇荒歉原可動支購買現在已收之穀留
為平糶之用糶後將銀貯庫毋庸買補復據
廣東道監察御史李清芳疏稱採買之例既
停監穀已通其變若如湖督所奏將監穀捐
銀糶出者不用買補倉廩空虛良規漸廢勢
難舉行惟稱銀有定數穀無成價恐穀價多
於銀數捐者寥寥應令各省督撫按時價斟
酌得中奏准辦理查採買既妨市價而倉儲
不可虛懸是以停戶部捐銀之例令生俊於

本地出餘粟以報捐。庶倉儲漸充。而市價不昂。署湖督陳請更易。殊與停止在部捐銀之原議不符。且一概准收折色。不特倉儲難期足額。一遇歉歲。必致賑糶無資。縱動支庫銀購買。在本地市價既騰。在鄰封亦轉運不易。均於民食有礙。况捐監已收之穀。皆屬額貯之項。若糶後不行買補。倉廩既空。小民何所倚賴。應如該御史李清芳所奏。將署湖督鄂彌達陳請易銀之處。毋庸議。至各省生俊應捐穀數。俱係督撫按各地時價之貴賤。定應捐穀數之多寡。題覆准行。嗣因各省穀價漸昂。復於原捐數內。酌中核議。減一以至減二。較原定穀數已輕。若因報捐人少。遽改。倘將來復有貴賤不齊。勢必又議更張。殊多未便。所有該御史李清芳奏請令督撫斟酌時價得中。奏准辦理之處。亦毋庸議。從之。○戶部議覆四川巡撫紀山疏。稱乾隆五十七兩年。派駐打箭爐口外臺站官兵。借支及馱馬鞍屨。

共銀三千八百一十六兩。內官兵借支行裝銀二千一百三十六兩。可否援照乾隆四年十二月恩旨。准其豁免。應如所請。從之。○命吏部左侍郎翰林院掌院學士阿克敦。充日講起居注官。○癸丑。四川平夷長官司王舉能故。以其子王錫爵承襲。○甲寅。諭軍機大臣等。張廣泗所薦貴州遵義副將周廣清。副將唐開中。朕看二人才具。俱屬中平。非大材料。似只可勝副將之任。縱好亦只可用事簡總兵。或者二人實係卓犖材。引見片時。朕未能詳鑒耳。可寄信詢問張廣泗。亦必有深知處。再此外副將中。實無有優於此二人者耶。令其據實回奏。尋奏覆。黔省副將內。惟二員尚屬稍優。是以並列保薦。此外若銅仁協副將溫朝宰。屢著勞績。亦經附疏薦舉。得旨。就黔論黔。祇此數人。卿亦無可如何。此人才所以難得也。而豫為培植作養。則急應留心者耳。○乙卯。

上詣暢春園問

皇太后安○諭軍機大臣等從前陳宏謀薦王喬林其考語云淡泊自甘意念中常存民物風力素著嚴正內還寓慈祥查王喬林原在江南鎮江府任內以錯擬罪名降級後在西安署知府事又以濫用非刑革職天下焉有存心慈祥之人而錯擬罪名濫用非刑者乎可將此詢問陳宏謀令其回奏尋奏覆王喬林在江南鎮江府任內其錯擬罪名降級之事臣未深知至在西安承審王之博養女被勒身死一案訊係王月正兇因堅不承認加以刑具旋經前撫臣塞楞額審無確據將王月等省釋王喬林附叅議處但此案正兇至今未獲臣細加訪察王月等未必即非正兇王喬林較之濫刑無辜者似屬有間得旨錯薦王喬林不過一時識見未到若因迴護之意而故入人罪則大非矣戒之慎之○調鑲藍旗滿洲副都統納木扎勒為正白旗滿洲

副都統鑲白旗漢軍副都統明安為鑲白旗滿洲副都統以太僕寺卿龔滿岱為鑲白旗漢軍副都統○旌表守正捐軀之湖北襄陽縣民王廷秀妻涂氏○丙辰

上御勤政殿聽政○諭軍機大臣等膽對土番不法擾害地方朕不得已允督撫等所奏發兵征剿以懲兇惡目前所請錢糧已至五十萬之多矣夫用兵貴於神速始克成功乃川督辦理此事甚屬遲緩李質粹等奏稱昨差千總前往曉諭勒獻賊贓彼發兵二百餘名在西納山下插營阻擋是我兵遣發太遲賊人早已聞風豫備所謂兵貴神速者何在看出此情形是伊等辦理游移拘泥業已不合機宜恐將來進剿亦未必悉能盡善永除後患爾等可密寄信傳諭該督撫提臣等務須盡心籌畫犁庭掃穴不至復留餘孽使地方長享安靜之福倘仍如雍正八年之草率完結復為今日之害則慶復紀山李質粹不得辭

其咎也。○又諭軍機大臣等。據四川提督李質粹奏。稱征勦膽對。統領官兵。原派夔州協副將馬良柱。泰寧協副將宋宗璋二員。今宋宗璋雖已陞任總兵。若伊果能熟習邊情。諳練軍務。即多一總兵大員亦可。且伊亦曾經奏請東裝前往。爾等可寄信詢問慶復等。如宋宗璋前往於軍務有益。即著伊一面領兵前去。一面具摺奏聞。○又諭軍機大臣等。碩色自到豫省以來。不過仿照舊規。循分供職。未見整頓一事。向來河南盜賊甚多。頗為民害。即如巨惡姚二鬍子。案內有僧人性魁。乃各盜教師。最為勇悍。碩色到任。已經二年。未聞拏獲懲治。似此敗露之大盜。尚不實力緝拏。則其他廢弛之處。不問可知。可寄信嚴行申飭。令伊將巨盜速行弋獲。不使漏網。並將舊習痛加悛改。○戶部議覆甘肅巡撫黃廷桂疏。請於靈州舊有倉廩九十餘間外。再添建三十六間。查該州於乾隆七年十月以後。

採買糧一萬一千餘石。以每間貯穀五百石計算。只應添建二十餘間。所需工料銀兩。應准於茶筵折銀項下動支。從之。○刑部奏。老幼及折一肢之廢疾。嗣後仍照例收贖外。其贍一目者。不得以廢疾論。有犯軍流徒杖等罪。皆照所犯罪名充配的決。仍請於各例老幼廢疾收贖條內。刪去贍一目三字。再查闕毆律內載。折跌人肢體及贍一目者。小註云。皆成廢疾。杖一百。徒三年等語。蓋以壞人面目。與折人手足。厥罪維均。故皆滿擬城旦。應請仍照律辦理。但小註皆成廢疾四字。應請移於折人肢體一句之下。從之。○署四川提督李質粹奏。膽對頑抗不法。請彰天討。候旨調兵。茂威協副將何啓賢。係曾保總兵。奉旨引見之員。請留川帶兵進勦。得旨。兵貴神速。豈有賊已發兵阻擋。而汝等尚無出師之期之理。若但云候旨而行。則所謂便宜行事者何在。且將在外而受制於朝者。多不成功。朕

不為也。此雖小醜。汝等亦宜存大將風也。勉之。又批。一切機宜。熟籌妥酌。為之。兵者不得已而用之。固不可姑息了事。以貽後患。亦不可玉石俱焚。而無所甄別。至夫殺降冒功。則尤所當戒也。勉之慎之。○又奏。川省五方雜處。奸良莫辨。外來流匪。及本地無業流民。凌虐良善。名曰。咽喉。散處驟難肅清。已嚴飭弁兵上緊查拏。再飭文員一體嚴緝。得旨。所奏俱悉。此等事。汝總宜且置之。盡心料理。瞻對以期速底蕩平可也。○以戶科給事中朱倫瀚為正紅旗漢軍副都統。○予故輔國將軍福爾善祭葬如例。謚溫僖。○直隸總督高斌疏報順天永平保定天津正定宣化等府屬。雍正十二年開墾旱荒成熟地畝。實在升科地九十五頃二十七畝有奇。又天津府屬之天津縣。乾隆九年報墾過水荒地三十五畝。又保定府屬之高陽縣。雍正十三年開墾旱地一頃八十五畝有奇。

大清高宗法天隆運至誠先覺體元立極敷文奮武孝慈神聖純皇帝實錄卷之二百四十二

大清高宗法天隆運至誠先覺體元立極敷文奮武孝慈神聖純皇帝實錄卷之二百四十三

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書領侍衛內大臣都統軍功紀錄五次

尋常紀錄十四次臣嵇璜經筵講官太子少傅工部尚書紀錄六次臣曹振鏞等奉

教修

乾隆十年乙丑六月丁巳諭大學士等今年

字奉天字三

一

外省糧船北上者較往年為多目下直省地方有雨少之處恐將來需用米糧接濟著總督高斌將尾幫漕糧酌留二三十萬石於天津倉存貯備用或於沿河州縣倉廩可以分貯以備撥用亦聽其酌量辦理可即速傳諭高斌等知之○戶部題陞任直隸總督高斌疏稱奉天西路各營盤並錦州等城存貯米豆經盛京戶部侍郎雙喜奏請一并搭運至津轉運京倉接濟查此項粟米彼時原因京

城米貴故於撥運黑豆之便一體運京京城此時似無藉此四千餘石之粟米而河間天津二府屬乾隆八年旱災之後倉儲空虛現奏准赴奉天採買粟米所有前項粟米四千三百三十三石一斗零若與採買之米一并分撥既於倉儲有益又可省運京之費且由海運津為日已久恐沾鹹潤可令州縣乘時借糶易穀貯倉所有黑豆四千餘石仍令運通交納應如所請從之○又議准山東巡撫喀爾吉善疏稱東省雍正十三年勸墾地畝一案查鄒平等州縣衛所勸墾旱地四百九十頃四十六畝有奇內有鹹鹼不毛僅存石骨低窪積水難以播種不能成熟地共八十頃八十畝零請豁免應徵銀從之○禮部等部議覆甘肅巡撫黃廷桂疏稱安西口外原係新設地方未建文廟學校據司詳安西衛冊報建設文廟一所應如所請從之○工部等部議覆

巡視南漕吏科給事中王興吾奏稱漕船過淮入閘或風信不便或水勢湍急必須添緯人夫乘機勒索每名動至一二兩不等雖經前督臣托時奏准每里給銀一釐而人夫多索不休臣兩次巡漕俱極力訪拏枷責並委佐雜彈壓而此風未能盡絕訪查情由蓋以催漕員弁喜作威福每遇灘壩灣曲之處概令多加緯夫稍不遂意即痛責運丁短緯人夫藉此居奇且暗串汛兵分肥請嗣後短緯勒索運丁者令各汛千總查拏凡應添緯地方聽運弁旗丁自行酌雇緯夫居奇即拏解巡漕衙門懲治如汛弁查拏不力捆打旗丁勒令加緯者聽巡漕御史查叅照縱役例議處至漕船入汛無故停泊該汛即將頭舵責處其運丁不遵催趲者該汛會同運弁責處應如所請從之○以宗人府府丞孫嘉淦為都察院左副都御史○調江蘇按察使張師載為江西按察使江西按察使翁藻為江蘇

按察使○三等輔國將軍福爾善故以其子旭英照例降襲三等奉國將軍○戊午諭軍機大臣等京師雨澤未降目下竟有旱象朕心甚為憂惕畿輔之地雖漸次得雨然亦有雨少之處不知近日情形如何若果成災高斌作何籌畫辦理昨降旨存貯漕糧三十萬石於天津倉廩不知此數將來足用與否著高斌悉心計議即速具奏○諭軍機大臣等直隸宣府所屬地方及古北口一帶今年夏月雨水短少收成歉薄恐民間不無乏食之慮且朕出口經過之地亦復需用米糧可寄信與高斌於昨所留天津北倉之漕糧內動撥十數萬石運至密雲宣府古北等處亦是接濟之一策其運至密雲等處尚有河路可通若宣府古北等處如何運往並收貯何倉若或天津所留尚慮不足即於到通未入倉米石內酌撥十數萬石亦可著高斌悉心籌畫即行定議具奏○諭曰陝西巡撫陳宏謀

奏稱按察使赫慶患病懇請解任回京調治等語。赫慶著准其解任調理。其陝西按察使員缺著湖南辰永靖道馬金門補授。○己未諭曰。鑲白旗漢軍副都統鼐滿岱著仍兼太僕寺卿。不必開缺。○旌表守正捐軀之直隸東鹿縣民姚正妻張氏。○庚申。

上詣暢春園問

皇太后安。○戶部議覆山西巡撫阿里衮疏稱綏遠城各通判經徵本色米草折銀。向照內地考成。查口外風勁氣寒。三月冰融。四月播種。霜降甚早。節候與內地迥殊。一歲僅止一種花戶。俱非土著。每歲九月開徵。僅能完半。一屆冬寒。相繼回籍。春融出口。東作尚難支持。何能完官補項。若追呼過迫。必多棄地逃亡。次年四月斷不能與內地一例奏銷。查大同朔平二府現係九月開徵。次年年底造報。所有綏遠城各通判經徵本色米草折銀。請照太朔二府之例。庶完戶得寬裕輸將。而經

徵各員不致枉罹叅罰等語。應如該撫所請。米石於九月開徵。次年歲底奏銷。草折銀自可催納。不便改至年底從之。○辛酉。漕運總督顧琮奏直隸雨水稀少。上廩

宸懷減膳竭誠。

聖顏清減。陳請稍釋以寬。

太后之心。得旨。顧琮此奏朕覽之實深慙愧。水旱之災。

上天之示警。不可諉氣數之適然。但一切補救綢繆。不可不盡人事。以救流離而贖愆過。遑計及帑餉之費乎。朕以德涼不能感召。十年九憂。早去歲。

聖母步禱。朕悚仄靡寧。即今三庚已屆。盈尺未霑。憂出於不知。食忘於已舉。將使朕寬懷以慰。

聖母

聖母之心。即朕之心也。其何以稍慰耶。至云勅下臣工體察政務。朕從來不以災傷之事。委

之臣下讀史至因災詔免三公未嘗不鄙之。昨截漕糶米以次舉行。現今米價如常。即使四府成災賑恤之事亦所易辦。寬刑赦罪適滋莠民玩法之風不可屢行。故因顧琮之奏宣示朕意。或此旨內事體有所未該。許各陳奏。該部知道。○旌表守正被戕之河南商邱縣民周小二妻余氏。○壬戌諭朕以愛養百姓為心。早夜思維。惟期薄海內外家給人足。共享昇平之福。故特頒發諭旨。將天下錢糧通行蠲免。誠以寰宇乂安。國用簡約。朕躬行節儉。糜費又少。左藏所儲可以供數年之經費。是以體古聖人損上益下之訓。特沛恩膏。俾海濱山陬無人不被其澤也。赫泰身為臺諫。乃奏稱國家經費有備無患。今當無事之時不應蠲免一年錢糧。若云恩綸已沛。成命難收。則請將緩徵帶徵之逋賦通行豁免等語。朕之溥施惠澤亦豈全不計及國家之用度。而為是舉。赫泰逞其私智小慧。妄議朝廷。

重大政務勸朕收回成命。不知其出於何心。又稱成命難收。則寧寬緩徵帶徵之項。以塞明詔。是將普遍之恩。賚靳而不施。徒為是煦煦之仁。以示惠養。其多寡廣狹。何啻霄壤。況逋欠錢糧固有一時水旱無力輸將者。亦有刁民抗玩有意拖延者。若一體加恩。則良頑更無區別矣。凡為臣者。苟存利民之心。即所言失當。朕亦必鑒察其隱而優容之。所謂觀過知仁。今朕撫育蒸黎。行慶施惠於常格之外。天下臣民諒皆色喜。而赫泰獨為是屯膏反汗之奏。性與人殊。悖謬已極。不能體朕愛民之心。而反生異議。為國為民者固如是乎。赫泰著交部嚴加議處。尋議照溺職例革職。得旨赫泰著降二級調用。○又諭此次催追鑲黃旗漢軍等拖欠利銀。誠恐不無苦累。特施恩俱從寬免。如恩賞紅白事銀兩有不敷之處。著動廣儲司存貯滋生銀兩應用。此項滋生銀兩特為接濟八旗兵丁紅白事賞賚。

之費。承辦大臣果能辦理妥協。何致拖欠遲誤。如鑲黃鑲藍滿洲旗分同領此銀承辦。俱無拖欠利銀。苦累旗人之患。鑲黃漢軍等數旗不能盡心斟酌。以致拖欠。分應著落賠補。此次朕特施恩豁免。嗣後該旗大臣務宜實心料理。不可仍前草率。希冀朕恩也。○予故原品休致。食半俸。正黃旗滿洲散秩大臣四格祭葬如例。○癸亥。

上詣黑龍潭祭

昭靈沛澤龍王之神。○兵部議准。署兩江總督尹繼善奏稱。武職豫行保題。咨部註冊。遇缺掣補。誠慎重要缺之良法。乃器小易盈之輩。騎射生疎。營伍廢弛。又或豫選之初。年力本強。數年後漸已衰老。請將豫保之員。已滿三年。未得缺者。各督提再行甄別。果堪陞用者。出考咨部。否則咨部注銷。從之。○修直隸南皮縣城垣。從陞任總督高斌請也。○甲子。遣官祭。

火神廟。○諭。從前福建納穀捐監。收受陋規之知府同知州縣各官。經該部議以革職降調者。朕已降旨。從寬留任。分別六年。四年。准其開復。今思通省各官降革留任者。幾及一半。其中不無才守可觀。通達吏治。可以陞補要缺之員。未免限於成例。必俟開復之後。方准題補。倘要地需人。在初任未經試練者。即請陞調。於人地未必相宜。今再加特恩。著將收受陋規案內。降革留任各員。准其照常陞用。所有降革留任罪。帶於新任。限年開復。以示朕鼓舞吏治。振作人材之意。該部即遵諭行。○工部等部議覆。巡察御史和其衷條奏。盛京事宜。一重邊疆以資防範。山海關外。迤東一帶。共設七邊門。邊門外。係各蒙古部落七邊之東南。直接鳳凰城。為六邊。乃奉天寧古塔分界。應加意整飭。令總理大臣輪流查閱。該管官員。更番巡視。又熊岳所屬旅順海口。設水師營官兵。為奉天南面保障。日久廢。

弛並不勤加操練。實力巡哨。軍裝器械半皆朽壞。應行稽查等語。應行令該將軍詳悉定議。題報兵部。一興紡織以濟民用。奉天各處地多宜棉。而布價反倍於內地。旗民不知紡織之利。率皆售於商賈。既不獲種棉之用。而又歲有買布之費。請勸諭多置紡織之具等語。應行該將軍府尹等妥議具奏辦理。從之。

○直隸總督高斌奏請於到通未入倉米內撥發二萬石。運赴密雲古北等處豫備。

聖駕出口需用。從之。○貴州小程番司土官程玉故。以其孫程繩祖襲職。○乙丑諭曰。御史楊朝鼎前奏豫省失盜一事。朕已勅交廷議。今御史范廷楷痛斥楊朝鼎陳奏之非。且云豫省失盜。查乾隆七年共二十四案。八年祇十九案。九年祇五案。較之往年。不為加多。奈何張大其事。議請重典。楊朝鼎即係協理河南道御史。忽然將無作有。騁此刻深之談。其意甚不可解。又云楊朝鼎奏請將盜犯之父

兄伯叔等不同住址者一體治罪。自昔虞廷罰弗及嗣。周室罪人不孥。前史所載。楊朝鼎豈其未知而貿貿若是等語。范廷楷詞氣激切。幾於詈罵。夫御史互相標榜。一唱百和。暗結黨援。固為人心風俗之害。設各執意見。以攻擊相尚。不顧國家政體。若相詈然。此風亦不可長。且楊朝鼎所奏現在交議。大臣等自有持平之論。如果所議准行。范廷楷據伊意見。以為必不可行。再行陳奏未遲。亦未為不可。所謂拾遺補闕。自有其時也。今乃於甫經交議之際。急於參奏。負氣紛爭。為此過甚之語。誠鄒一桂從前所云。不待部覆而撫拾浮囂。撓越瀆陳者。朕早已降旨禁約。范廷楷獨不知之乎。至於請朕撤回原摺。無庸交議。竟以國家政務。弗資六卿。皆伊等御史可以操其行止者。甚屬妄誕。著嚴飭行。原摺并發。○諭本年七月內。朕出口行圍。著履親王。平郡王。大學士。訥親。張廷玉。在京總理諸務。所有

七八兩月文武大選官員。著照乾隆八年之例。文員內之通判州縣等官。武員內之八旗護軍校。驍騎校。及外省送到之補放水手官。驍騎校等官。并年滿千總。俱交王大臣驗看。其中若有年老才庸。不勝煩劇之缺者。酌量調補。隨本奏聞。可即傳諭該部知之。○又諭朕此次行圍。所有外省督撫提鎮等奏摺。著照乾隆八年之例。自起鑒之日為始。凡有外省奏摺。俱齎赴在京總理事務王大臣處。加封交閣。隨本呈送。行在候朕批示。隨本發回。仍於總理處。交付齎摺人祇領。該部即通行傳諭知之。○大學士公訥親等奏。蠲免事宜。臣等謹加酌議。查康熙五十一年。蠲免天下錢糧。將各省分作三年。全免一週。查地丁錢糧額銀共二千八百二十四萬餘兩。請將直隸。奉天。江蘇。西安。甘肅。福建。四川。湖南。雲南。貴州等省銀一千四十二萬九百餘兩。於丙寅年全行蠲免。浙江。安徽。河南。廣東。廣西等

省銀八百六十二萬七千三百餘兩。於丁卯年全行蠲免。山東。湖北。江西。山西等省銀九百一十九萬二千二百餘兩。於戊辰年全行蠲免。其運撥歲需銀兩。統於各該省每年冬撥案內。另行奏聞。至應徵耗羨銀。並非解部之項。應照雍正七年之例。仍舊輸納。留充地方公用。得旨。依議。各省蠲免正賦之年。若有未完之舊欠。按期帶徵。則民間猶不免追呼之擾。著一并停其徵收。展至開徵之年。令其照例輸納。至於有田之家。既邀蠲賦之恩。其承種之佃戶。亦應酌減租糧。使之均沾惠澤。著該督撫轉飭州縣官。善為勸諭。感發其天良。歡欣從事。則朕之恩施。更為周普。一切照雍正十三年十二月諭旨行。又諭朕特降旨。將丙寅年各省錢糧。通行蠲免。以嘉惠元元。經大學士戶部議稱。應照康熙五十一年之例。將各省分為三年。以次豁免。朕已降旨允行。嗣後該省應免之年。或遇水旱等事。若不

格外加恩。則被澤仍有同異。未為普遍。著將特恩應免之數。登記檔冊。於開徵之年。補行豁除。該部即將朕此旨。通行曉諭知之。○戶部議覆。河南巡撫碩色疏。稱原武縣姚五家莊前引河。挖占坍塌地七十七頃九畝零。折實糧地三十八頃五十四畝零。應徵地丁銀一百九十一兩五錢零。漕米一十一石三斗零。該價銀九兩九分零。題請豁免。應如所題從之。○兵部等部議覆。盛京巡察御史和其衷條奏四款。一。從前山海關外。未有驛站。設立小八處官兵。傳遞軍務。此臺馬之名。所由起也。自設站後。遂為沿途防汛之用。將軍具摺奏事。任意騎乘。致馬匹疲瘦。兵丁受累。請勅該將軍據實查明。奏請禁止。一。盛京戶部內倉及各城旗倉。徵收糧料草束。任意秤量。多至加倍收數。已數。勒令折交銀錢。歷任侍郎。或漫無覺察。或通同徇隱。請勅部詳悉定議。量為加增。以為各倉紙張鋪墊之用。數外

多取絲毫。即行治罪。一。盛京內府所屬各莊。每年應交差務錢糧。均係該管驍騎校筆帖式。領催人等。分路催取。伊等不知法紀。任意多收。指名科斂。到處勒令供給。雞豚草料。一空。少不如意。橫加箠楚。即有控告者。佐領不為申理。請勅該將軍嚴加懲治。長遠禁止。一。奉天常平倉。每遇平糶。輒密令地方富商囤戶。一總交銀認買。各處零星設廠。虛應故事。商賈居奇。不惟不能平價。反致時價日昂。請特頒諭旨。嚴行戒飭。以除積習。以上四款。均應如該御史所奏辦理。又稱。從前歷任將軍侍郎府尹。相沿既久。欲察創始之人。則無從究詰。若咎現任之員。恐多拖累。仰祈寬其既往。儆其將來。亦應如所請。從之。○丙寅。

上詣暢春園。問

皇太后安。○諭軍機大臣等。據四川巡撫紀山奏稱。逆匪夏長榮等衆犯。已經拏獲。解往黔省研審。所有搜出書信四封。賬簿一本。一併

咨送黔省查審其書信另錄進呈等語朕看逆夥劉金榜私書內有斯天降之於海立於朝掌於國故油油然與之偕而不自失焉不可以意取且在緩圖等語此數語意甚含蓄似有所指之人可寄信與張廣泗令其將真情審出具摺奏聞勿聽其支吾朦混其他書信中有應行審訊之處亦一併確取口供○刑部等部議覆黑龍江將軍傅森等疏稱本處水師營內發遣當差人犯俱係順治康熙年間發寧古塔等處安插之人後因征俄羅斯作為烏鎗水師二項兵出征凱旋後編為六個佐領令入旗披甲錄用官員惟未入旗分佐領者並無陞路伊等數世與旗人一體當差似應一體錄用且皆係無罪之人原籍並無產業請留本處當差酌量錄用並請將齊齊哈爾黑龍江吉林三處每處添設管轄水手七品官一員協管呼蘭地方運糧水手四十名並無兼管官員請設六品官一員管

轄以上四缺即於水師營人等內揀選等語應如所請水手等准其與旗人一體錄用其添設管轄官員之處毋庸議從之○丁卯調湖廣宜昌鎮總兵蒙應瑞為鎮草鎮總兵以原任雲南昭通鎮總兵陳綸為宜昌鎮總兵○戊辰諭福建汀漳道一缺該督撫奏請揀用人員著將湖南衡永郴道侯嗣達調補福建汀漳道其衡永郴道員缺著李慎修補授李慎修服滿赴部時原掣貴西道缺朕思其年老難於遠任特調江南驛鹽道伊請訓時朕因其向有懇直名或於言官之任相宜是以改用為御史冀其有所敷陳裨益政事乃伊自到任以來其所建白一無可取即如謬指外省督撫匿災不報及謂在京辦理錢務之大臣苛急煩碎是皆不察事之有無虛實與目今之時勢情形但信口譏議以沽直名而已然此失尚屬簧鼓至謂遣官捕蝗大有害於地方應行停止此語尤為悖謬夫捕蝗

之令載在經史詩小雅所云螟螣蟲賊秉畀
炎火者李慎修獨不知之乎姑息於一方而
遺害於萬姓恐古今無此政體也李慎修秉
性乖張識見卑鄙不可居言路但念其操守
尚清故仍用道員以觀其後效○又諭據雲
南總督張允隨奏稱開修羅星渡河道工程
業已告竣銅舟毫無阻碍所有承辦此案之
糧儲道官爾勛魯甸通判金文宗鎮雄叅將
龍有印雲南同知徐柄威信州州判許肇坤

試用州判席椿鎮雄營千總戴君錫把總李
愷皆能實心出力等語官爾勛等在工効力
勤勞可嘉著交部議敘○諭軍機大臣等從
前滇省奏聞濬開金沙上下兩游江工及接
壤川省之羅星渡河道原以接濟民食分運
銅觔今各處工程先後告竣民間米糧自可
流通至於銅觔運費據該督等奏稱金沙江
惟自十一月至三月五箇月之內可以辦運
其羅星渡每年可以分運威寧銅觔一半等

語不知此二處每年可以辦運銅觔若干其
運腳可以較前節省若干并當日開修費用
約計幾年可以抵補爾等可寄信詢問之○
禮部等部議覆奉天府府丞陳治滋奏陳宗
室事宜一肄業生徒宜立法派補一考試之
例宜暫為變通均毋庸議一教習人員宜分
別鼓勵設學以來業經八年所挑各教習人
員除事故解退外餘俱未得考試更換請於
考試時照宗學現行條例分別考成等語盛

京漢教習未邀議敘似應畧為變通請嗣後
教習中如果能成就人才該將軍禮部府尹
出具考語給咨引見欽定再查盛京設立弓
箭教習原因訓練弓馬嗣後應將宗室覺羅
生徒已食歲滿錢糧在學肄業者該將軍年
例出圍時令其前往庶騎射益加嫻習從之
○已巳川陝總督公慶復奏臣等原奏鄰近
瞻對之西寧鎮派撥漢土兵一千名今聞該
土兵率皆怯懦且於路徑亦不深悉未敢因

已奏准。即為遷就。已與西寧鎮臣面商。全用漢兵協應。西寧土兵。概行免調。再瞻對所居碉樓。最為堅固。川陝各營威遠等礮。俱不若滇黔靖逆礮之便利。現已差弁前往借領八位。如果施放合宜。即可照式製造。至各路官兵。約七月內俱可到齊。臣於七月杪亦可赴川。並擬於陝甘二省副叅游守內。酌選曾在川出師。勇敢有為者。隨帶四五員備用。至交臣聞看直隸提臣保祝。密陳征勦瞻對一摺。查郭羅克新經歸化。貪利好勝。咸以有事為榮。今鄰近土兵。俱各派調。而獨遺其類。未免向隅。疑懼臣酌派百名。所以遏其疑貳之心。堅其向化之志。大率所調土兵。以瓦寺雜谷等為多。亦未專藉郭羅克之力取勝。今摺內稱一旦驅之使戰。非但未必即為我用。且恐疑貳終存等語。緣所派數目。并酌派緣由。前摺未經瀆陳。而直隸提臣未悉所以之故。至川省土司。止有瓦寺。並無瓦斯。所稱雜谷瓦

寺。最稱強盛。因去松潘已遠。兼有瓦斯金川等番間隔。其四境俱讎。未敢遠出。邊地以此得戢等語。或亦傳聞之誤。瓦寺雜谷之兵。從前川黔雖得其力。然辦理軍務。寧過於慎重。業札商撫臣確查。俟覆到酌議。會奏得旨。所奏俱悉。○以

昭陵左翼副總管覺羅訥爾布為

昭陵總管。○奉恩將軍諭德故。以其長子明堯

承襲。○庚午

上詣暢春園。問

皇太后安。○吏部奏降調官員。無論優劣。定例俱應出具考語。給咨送部。今各省或註考。或不註考。應再通行各直省。凡知縣以上降調官。悉照定例。分別出具考語。以便查核辦理。從之。○是月。直隸總督高斌奏覆奉到碩色奏摺。令臣會商辦理。查直省夏麥少雨。甫覺歉收。即蒙

皇上先事豫籌。命豫東兩省撫臣。買麥接濟。茲

豫撫碩色酌辦將九年借出豫備之麥十萬餘石徵還備用又擬添撥倉穀合麥共三十萬石接濟直隸現在直省倉儲除足額外尚餘四十萬石麥收雖歉而秋禾已種米價不昂豫省米穀可省運送惟將陽武等縣徵存備用之麥撥十萬石由運河運直已足備糶借之用得旨所奏俱悉京師目下甚覺望雨畿輔光景如何速奏以慰朕懷尋據奏覆直屬永平天津河間順德廣平大名等府及深冀趙遵化州屬得雨俱各霑足惟宣化順天保定府及定易州屬尚未普遍得旨覽此時有成災光景否耶若至成災始為綢繆之計則遲矣○又奏京師至保定一帶不過間段缺雨正定屬缺雨之處稍寬若伏前得雨不至成災得旨昨雖得二寸許雨澤尚欠霑足朕懷不敢稍寬也○兩江總督尹繼善等奏覆京師所議錢法各款外省可否倣照辦理令督撫分別陳奏查江省民間需用銅器甚

少省城內外設爐打造鋪戶大小止三十六家其他州縣更屬寥寥查察銷燬制錢之弊甚易可毋庸歸併銅鋪且本省錢文不多每歲青黃不接時出糶常平倉穀所收錢俱照時價隨發鋪戶易銀貯庫並無聚積一處久貯者亦毋庸議至設立經紀官為稽查江省原無錢行名目亦未設經紀民間稱便前因錢價昂貴令各鋪戶交易五錢以上者用銀其不及者銀錢聽用日逐所收錢文聽錢鋪易去兌換不許濫掛錢幌久經通飭遵行又糧店收買雜糧禁止使錢查省會糧食行鋪收買雜糧向係用銀取其赴他處置貨輕便外邑亦然第恐鄉愚不識銀色或竟用錢亦所不免業經飭屬出示嚴禁又嚴禁與販囤積江省地居腹內洋船不通且東西南路均隔山往來係用竹輿手車搬運不易各處價值低昂所差無幾扣算運費並無厚利商民斷不肯為此無益之舉雖本境鋪戶貿易多

用錢文。然朝入暮出。勢難囤積。均可毋庸查禁。惟是燬錢之弊。難保必無。應責成文武員弁。督率兵役。協同保甲。留心查察。有私燬者。按律治罪。且現奉部議。禁止興販囤積。及雜糧等店。多用錢文。加以本省源源鼓鑄。錢價可望平減。民用亦便。得旨。此事固宜詳察妥辦。然遲至今始行覆奏。可見汝有怠心矣。慎之。○江南河道總督白鍾山奏。柳株為河工要料。必須豫籌種植。現在黃河兩岸。丈出侵隱官地一千五百三十四頃零。各營汛兵每年有應栽額。柳力難兼顧。應俟農功畢後。遴委効力幹員。會同文武汛官。於丈出官地內。募夫栽植。所需工價。公項內酌量節省發辦。不必請動錢糧。得旨。所奏俱悉。但論裕料可耳。必以節省為見。亦屬過中。○又奏黃運湖河水勢長發。及各處工程修護平穩情形。得旨。覽奏欣慰。朕懷秋汛踵至。更宜加之意也。○署湖廣總督鄂彌達等奏。據漢川潛江天

門監利沔陽五州縣報稱。漢水驟長。各隄垸均有衝潰。田禾間亦被淹。枝江當陽水勢較大。被災畧重。當飭水利道員。星往查勘。將被水居民。分別賑卹。並飭修理城垸。隄穩固得旨。所奏俱悉。雖屬偏災。彼受災之民。則已拮据矣。惟應加意撫卹可耳。○又奏覆廣東撫臣策楞奏。辦常平倉穀一摺。令直省督撫查奏。除南省辦理情形。業經撫臣蔣溥會奏外。楚北枕山傍水倉貯所在。瀕臨江岸者。潮濕易侵。僻處山坳者。霉變堪虞。若使舍舊糶新。折耗益多。該州縣豈肯自為貽累。勢不能移新作舊。至倉穀交代之例。舊官夏秋離任。新穀尚未登場。將價銀交新任買補。若舊官冬間離任。仍令舊官採買。如有虧缺。該管道府分賠。亦難容隱。虛捏。惟倉貯廩口。雖編列字號數目彙報。而買貯年分。實未開載。應如策楞所奏。造具清冊。註明年分。通報得旨。知道了。妥辦。則仍在汝等不時稽察也。○河南

巡撫碩色奏鄧州新野秋禾間有淹損於借給籽種補種外復按戶口大小酌借倉穀接濟得旨是被災處所加意撫綏之○河東河道總督完顏偉奏豫東二省黃河水勢伏汛以來時長時消各汛土埽工程俱修築堅實惟武陟汛壩工商邱五堡隄工耿家寨埽工胡家屯隄工近因河勢坐灣頂衝著溜業經相度情形修防平穩秋汛在即督率文武員弁先事豫籌以期有備無患得旨所奏俱悉

今年秋汛恐有過大處宜加意防之○山西巡撫阿里衮奏二麥秋禾并各屬得雨情形內稱陽曲祁縣應州大同陽高繁峙崞縣七處從前缺雨於五六月俱得雨二三寸不等均已霑足得旨二三寸雨澤焉得謂之霑足此見不可存於胸中又稱太原汾州朔平等屬得雨尚未深透現在分飭祈禱如有被旱情形即豫為籌畫得旨是應早為妥協辦理以免臨時周章○甘肅巡撫黃廷桂奏鞏昌

府屬岷州之林家族於四月二十三日山水陡發衝壞民房三間淹斃小孩一口隴西寧遠西寧等縣俱於五月十七日被雹傷禾秦州之豐盛川等處亦於是日被水被雹現在飭屬確勘分數酌借銀兩令買籽翻耕並查明被災戶口動支倉糧接濟應徵錢糧暫行停緩得旨所奏被災州縣加意撫綏之○又秦寧夏府屬惠農一渠上引黃流下通六墩昌潤二渠昌潤渠下梢即係埂外間田原隸寶豐縣屬因河決縣廢而地亦荒除安插民人墾熟旱地二十三萬五千三百餘畝外尚有未墾荒土二十七萬畝欲使地無憂旱必須接引惠農渠水下注方為有益當即委員分工辦理上下修濬俾渠水流通到梢處處均敷引灌廢地得此水源招墾更易豐收可望得旨所奏若能詳酌妥辦則有益之嘉舉也○四川巡撫紀山奏瞻對頑番不法派撥漢土官兵分路進剿現在賊番聞風畏懼

悔罪投誠乘此剋期前進計日可奏膚功得
旨彼如果誠心悔罪投命自不可逞我兵勢
玉石俱焚但不可聽其延挨反墮彼計應為
一勞永逸之謀耳可告之督提等○又奏上
中郭羅克地方有尚堪開墾地土約計可播
籽種二百零五石畜牧亦易孳生現在窮番
共三百二十一戶各行作保請借牛本籽種
通計需銀二千九百四十九兩零即於鹽茶
耗羨內動給辦理報聞○又奏拏獲逆犯夏
如春餘黨人數既多人心易惑現因緝拏逆
犯家屬居民驚惶已有挈家逃竄之事亟宜
剴切曉諭以安其心得旨甚是此辦理之所
以難也惟張廣泗解此故黔中屢獲此等逆
犯而亦無愚民驚惶之事今川省甫緝數犯
即有此事則辦理不善未曾先事綢繆之失
在汝語云經一事長一智此後勉之諸凡留
心○兩廣總督策楞奏粵東山多田少產米
不敷民食現在查勘高雷廉一帶閒曠之地

約八萬餘畝皆可墾種詳議勸墾規條以垂
久遠得旨好知道了○又奏粵海關地方寫
遠口岸繁多差派稽稅之人弊端百出請於
補放監督時在現任將軍副都統內特命一
員協同辦理得旨已命準泰兼理若另派一
人恐其掣肘至用旗員之處於彼去時即有
旨令其與汝商辦矣○又奏承審廣西布政
使唐綏祖一案原參各款係那用公項及收
受屬員餽送等情但唐綏祖因公那用公項
雖係詳明辦理究未報部固有應得之罪而
撫臣託庸之原參立意措詞未免涉於刻覈
至續參贓款屬員首稟者居多而原首之梧
州府戴肇名所供亦與原首不盡相符俟提
齊人証訊取確供後再行具題得旨是朕早
即疑唐綏祖未必至此蓋彼乃一伶俐人豈
有不知利害者但託庸向日於彼並無交涉
何至有過於苛求之事此又朕所不解者據
實奏來又批此奏嘉悅之外無可批諭秉公

辦理可也。尋據奏覆，參革廣西藩司唐綏祖與撫臣託庸有無夙嫌，留心體察，殊不可得。嗣有西省武弁赴東考驗，詢悉唐綏祖素有擔當，僚屬多怨而忌之。上年託庸赴任，值唐綏祖在京陛見，即有乘間媒孽其短，以錢糧聳人聽聞者。託庸初任封疆，意在整頓吏治，且見那動款項為錢糧所關，是以不及細查。從前奏明之案，遽為題參。後知原參各款大半因公，又改歸督臣承審，疑而增懼，未免有

平錄卷之四十二

三十一

意搜求，以實原參。適有降調梧州府知府戴肇名，原任泗城府知府劉暉澤，從而迎合，傳會為之出首，並查出參革賓州知州阮維璋、河池州知州朱紅，侵欺得贓各款，一併續參。現在併案審理。外省習氣，督撫到任，每亟圖參劾一二屬員，以博整頓之名。審後半屬子虛，始知被人愚弄。託庸辦理此事，未免涉於習俗之見。臣細覈供情，或事屬有因而已，甚其說或並無其事，而實出挾嫌。俟覈實各供

時將所首與所供不符之員，另疏題參並案嚴審。唐綏祖果有應得之罪，必不敢絲毫徇隱而挾嫌誣揭之。贓私亦不敢為之附會。惟有祇遵前諭，秉公辦理得旨。皆公論知道了。

大清高宗法天隆運至誠先覺體元立極敷文奮武孝慈神聖純皇帝實錄卷之二百四十三

大清高宗法天隆運至誠先覺體元立極敷文奮武孝慈神聖純皇帝實錄卷之二百四十四

監修總裁官總纂官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶隆

總裁官經筵講官太子太傅文華殿大學士文淵閣領事稽察欽奉 上諭事件處管理刑部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄四次臣陸錕經筵講官太子少保工部尚書紀錄六次臣曹振鏞等奉

敕修

乾隆十年乙丑秋七月辛未朔享

實錄卷二百四十四

太廟遣恒親王弘晔恭代行禮。○諭曰。阿克敦所辦事件繁多。其協辦步軍統領衙門刑名事務。著雅爾圖管理。○又諭甘肅寧夏寧朔平羅三縣於乾隆三年地震之後。借給牛價銀兩以資耕種。分作四年帶徵。又經展限。其力能完納者。已如數還項。尚有未完萬餘。皆係無力貧民。若與本年額賦及帶徵之項一併輸納。未免拮据。著該部查明。加恩豁免。以紓民力。該部即遵諭行。○吏部議准。前署廣

實錄卷二百四十四

東巡撫策楞疏稱。廣州府為邊海要地。各屬捕務向係佛山同知及廣糧通判兼轄。今府屬香山縣之前山寨添駐海防同知。所有香山順德東莞番禺等四縣均屬相連。其捕務應改歸海防同知就近管理。至南海增城龍門從化花縣等五縣捕務。歸佛山同知兼轄。新安新會新寧三水清遠等五縣捕務。歸廣糧通判兼轄。凡盜案疎防及提比經捕。俱照各管地方查叅辦理。從之。○又議准四川巡撫紀山奏稱。寧遠府屬冕寧縣縣丞一員。分駐瓦尾距縣城甚近。一切民猥事件。俱赴縣控訴。並無縣丞辦理之事。查冕寧縣離縣一百七十里路當孔道。漢番雜居。請將冕寧縣原駐瓦尾縣丞改駐冕寧山。遇命盜案件。即令驗勘。至冕寧山舊設遊擊一員。今已裁汰。其衙署即作縣丞衙署。從之。○壬申上御勤政殿聽政。諭軍機大臣等。朕聞浙江嘉善縣地方。汎兵查獲一匪類船隻。拐有幼

女同行口稱係伊親戚該縣知縣公出經典史盤詰此幼女乃係江南松江府婁縣拐帶前來手足俱用藥損壞兩目不能遠視該犯曾經煮食幼童四人乃幼女所親見船內盤出人首許多聞其術有師傅授已行二十餘年其船從寧波等處而來此犯審出之後隨經嘉善百姓登時擊斃等語此等異常兇惡之犯自應窮究根底查拏黨羽按律治罪明正典刑以快人心以申國法豈一死足以蔽其辜今聽百姓登時擊斃草率完結安知衆百姓之中不有匪賊夥黨在內欲其速死以滅口耶可寄信詢問常安此事辦理未安務將根底窮究夥黨查出永除將來之患不得聽有司之希圖省事苟且結案也著常安具摺回奏○以翰林院侍讀學士陳邦彥充日講起居注官○癸酉諭軍機大臣等直隸地方今年雨澤不勻有得雨霑足之州縣亦有未能霑足之州縣今八月開徵之期將屆可

寄信與高斌令其悉心體察或有雨少歉收應行緩徵者一一確查分別奏聞候朕降旨若將來有成災應行蠲免之處亦陸續奏聞請旨尋奏直屬文安等一百一十二州縣衛廳夏麥被旱被雹情形前經奏報在案至各處秋禾除順天府之東西南三路同知並永平保定二府及遵易定三州所屬各州縣俱經得雨透足可望有秋毋庸置議外其宛平大興昌平通州景州故城阜城交河吳橋東光寧津慶雲鹽山滄州南皮藁城樂城晉州贊皇靈壽元氏邢臺沙河南和廣宗鉅鹿唐山內邱任縣平鄉永年成安邯鄲肥鄉曲周廣平雞澤威縣清和磁州開州元城大名魏縣南樂清豐東明長垣宣化延慶保安懷安西寧蔚州蔚縣赤城龍門懷來棗強衡水南宮新河武邑趙州併所屬之柏鄉隆平高邑臨城寧晉武強等七十州縣延慶衛熱河喀喇河屯八溝四旗張家口等五廳有六月內

未經得雨者。亦有得雨未能透足者。雖經補種晚禾。恐收成不無歉薄。內除景州故城阜城交河。吳橋東光慶雲鹽山滄州南皮武邑武強等十二州縣俱係乾隆八年被災最重之區。所有本年應徵錢糧。業於上年奉旨緩徵外。其餘六十四州縣衛廳當八月開徵之期。亦應暫行緩徵。俟秋後勘明是否成災。將應行蠲免之處。陸續奏聞。分別辦理。惟慶雲縣早象已成。急宜豫為安頓。現飭該管道府。

軍機處

五

親赴查勘。撥運漕米。以備賑借之用。得旨。所奏俱悉。如所議行。又批。畢竟將來恐如慶雲成災光景者。有幾州縣耶。詳查速奏。以慰朕懷。戶部議覆漕運總督顧琮奏稱幫船重運赴北沿途起剥過淺費用繁多丁力竭廢每將回空食米全起過壩及催趲回空食米必缺雖有應領餘米並扣存回空之銀仍不敷用查向例糧船回過東省時准帶梨棗六十石以資航水之用邇年首進回空較從前

軍機處

下

甚早。行抵東省。尚無梨棗市賣。丁舵人等徒有准帶之名。而無霑恩之實。請嗣後准帶核挑瓜子柿餅芝麻等物六十石。應如所請。令回空各幫通融酌買。俾歸次有資。從之。○以廣西右江道周人驥為湖南按察使。○甲戌。刑部議覆浙江按察使萬國宣奏稱命案擬抵人犯。向有孤丁留養之例。然多於成招後供稱孤丁。不無捏報漏網。請嗣後於相驗時。即令該犯報明是否孤身。祖父母父母若干年歲。有無篤疾。敘入初報文內。有應侍情節者。附疏聲請等語。查例載留養一條。原屬法外施仁。若因此舞弊却罪。殊非防奸之道。應如所請。但到案之初。或該犯原有兄弟子姪。成招時已經死亡。又或祖父母父母於初報時尚未七十。亦無疾病。成招時已成老疾。亦不得拘泥初供。不為援例留養。應行令直省一體遵行。從之。○乙亥。

上詣暢春園問

皇太后安。戶部議覆署兩淮鹽政吉慶奏稱鹽引疏銷，必須豫籌接濟。現在辦運之乙丑綱鹽，江西湖廣口岸銷售疏暢，恐將來民食不敷，請豫提丁卯引目備用等語。查乾隆八九年癸亥甲子二綱，因額引不敷，豫提已已戊辰綱引運銷。今乙丑綱既稱行銷暢旺，自應照例豫提引目帶運。但原定額引自庚申綱起至已已綱止，分作十年帶銷。目下已帶完九綱，止存丙寅一綱。將來帶完之後，更無帶運引目。應令該署鹽政將如何酌增新引之處，先期覈議具題從之。○又議准閩浙總督馬爾泰疏稱，閩省各州縣原派養廉，多不敷用。前經督臣那蘇圖奏請酌給鹽規銀，辦公查鹽規一項，計銀一萬零八十四兩。原議各州縣酌留之數，自四十八兩起至二百兩止，共計五千七百四十四兩。今量行覈減，止給四千九百六十四兩。至西河浦下二處委員，仍照原定二百兩撥補。餘銀解貯道庫歸

公從之。兵部尚書班第等奏，各處駐防官兵原為防衛地方而設。至山海關、熱河、古北口、張家口、天津、小八城等處，又因沿邊關隘重地，是以添駐滿兵。該管各員自應加意整飭。今一年之內，各處報逃之案，竟有二百五十餘起之多。查定例，旗兵潛逃，一年自首者免罪。各該駐防處於該犯銷逃之後，因披甲已經補人，又為咨報該旗，循例留京，以致不肖之徒竟藉潛逃為留京之計。請飭各省駐防將軍、都統、副都統及城守尉、防守尉、總管、副總管等，嚴加約束。如有逃犯，雖准自首免罪，仍即發回原處當差，不准留京。再各處逃兵該管官無失察處分，未足示儆。請嗣後失察逃兵之佐領、防禦、驍騎校等，照綠旗營兵私逃專管官失察之例，罰俸一年。其協領、叅領、城守尉、防守尉、總管、副總管等，照兼轄官失察之例，罰俸六個月。得旨：所奏是。依議。○太僕寺卿喬學尹以老疾乞休，得旨：喬學尹

年齒雖老尚可勝京員之任。今以衰病具摺求退。何不奏請於藩司任內。而陳乞於補授京職之時。殊屬不合。不准辭。著飭行。○以吏部侍郎宗室德沛。刑部尚書汪由敦。教習庶吉士。○丙子。諭軍機大臣等。據新柱奏稱。筆帖式奇寵額。伊輪二員。委管稅務。辦理妥協。今伊二人筆帖式之任將滿。俱應循例回京。惟是稅務殷繁。接辦之人。仰懇將該二員暫留筆帖式之任。管理稅務等語。朕已降旨允行。但掣得外省筆帖式之員。向俱畏難不願前往。今因經理稅務。而使之久於其任。則不可。此二員暫准辦理二三年。照例更換。令其來京。爾等可寄信與新柱知之。○兵部議准。署湖廣總督鄂彌達奏稱。楚北荆門一營。汎地遼濶。前因新隄地屬荒野。移撥該營守備。帶兵分防其荆門營務。僅責成千總微弁。每多貽誤。查新隄近日民戶殷繁。原設駐劄之通判兼轄把總一員。兵六十名。今再撥千總

一員。帶兵四十名。儘足防守。請將守備撤回荆門。并餘兵六十八名帶回。從之。○工部議准河東河道總督完顏偉等議。覆前任山東布政使包括條奏。東省挑河泉夫。酌減工食。就近改募一摺。查山東有泉十七州縣。向設泉夫七百八十四名。春夏秋三季。在本境疏泉栽柳。冬月調赴濟寧。協挑運河。裹糧遠役。既屬艱難。而又素非習諳挑河之人。倩代賠累勢所不免。請將距河寫遠之泰安。平陰。萊蕪。肥城。新泰。寧陽。泗水。曲阜。鄒縣。滋陽。蒙陰等十一縣。協挑泉夫五百七十四名。改令近河各州縣代為募雇。其泉夫每名額支工食銀十兩。每年扣減六兩。彙解河庫。轉發沿河州縣。就近代募。餘銀四兩。照舊支給泉夫止令。專司本地疏泉栽柳。免其挑河。至近河之滕縣。嶧縣。魚臺。濟寧。汶上。東平。等六州縣。泉夫二百十名。仍令協挑。無庸扣銀。另募從之。旌表守正捐軀之貴州普安州民任記珍。

妻馮氏。丁丑諭會典開載。康熙年間。選拔庶常。後有選派講讀。修撰。編檢數員。為小教習之例。教習漢庶吉士詩文四六。今科庶吉士著掌院張廷玉。阿克敦教習。庶吉士之大臣德沛。汪由敦。於現任講讀。修撰。編檢內。選派數員。為小教習。諭軍機大臣等。前高斌遵旨議稱。於到通未入倉之米糧內。撥二萬石。運往密雲古北口二處存貯。以為備用。蓋因彼時雨澤未降。恐田禾歉收。豫為此接濟之策。今聞伊欲於十日內辦完。車戶殊費周章等語。況雨澤普降。秋成可望。不知密雲古北等處。尚須豫備否。或可不運。或仍應運送。或道路泥濘。可以從容運往。即寄信與高斌。令其酌量地方情形。具奏辦理。尋奏密雲古北二處。原議撥貯通米二萬石。以備接濟。今酌量辦理。止運一萬石。即存貯密雲。不必運往古北。並令從容撥運。不必加緊催趕。得旨。如所請行。○戊寅總理

三陵事務多羅貝勒允祜奏。臣奉命管理陵寢事務。召見時。諭令敬謹安靜。不可妄生事端。臣受任以來。一切典禮事件。惟與同事之公大臣及各官員商酌辦理。乃公祿慶信用長祿。因臣前有叅奏長祿之事。遂生猜忌。後見臣委任鶴山。又屢言此人甚不可用。每遇鶴山承辦事件。有意苛求。似此意見參差於公事。恐多貽誤。請解臣總理之任。並特派大臣將臣所辦事務逐一查明。如有不合之處。即交部嚴加議處。得旨。據此。已忘朕之諭旨矣。有何重權。汝等如此相爭。殊為可笑。○己卯

上詣暢春園。問皇太后安。○幸瀛臺豐澤園。○還宮。○庚辰孝懿仁皇后忌辰。遣官祭景陵。○

上詣雍和宮行禮。○幸圓明園。○諭曰。馬蘭鎮總兵

布蘭泰患病著派太醫一員前往診視○戶部議准長蘆鹽政伊拉齊會同陞任直隸總督高斌覆奏長蘆所屬灤州遷安樂亭豐潤寧河等五州縣引地自設立老少牌鹽奸徒收買發販以致私鹽充斥官引壅滯難銷若照閩省之例折給老少錢文停其自行負責則影射囤積之弊既除而貧民計日得錢可資度日又無負販往來之苦實屬均有裨益至各州縣現存老少若干名務須查驗確實每名日給大錢二十四文令商人按月照數捐交嗣後如有新補貧難老少一例折給其滄州鹽山等州縣有應照此辦理者並令查明具題從之○又議准四川巡撫紀山會同川陝總督公慶復疏稱開採銅礦事宜一樂山縣屬之老洞溝宜賓縣屬之梅子凹出產銅礦均應開採請各委佐雜幹員管理厥務其一切發價運銅等事即交各縣就近經管一報採各商土著流寓不一應令地方官查驗

殷實良商取結保送所有抽收課耗銅餉照建昌廠之例辦理一礦廠夫匠衆多應設頭目分隸更擇幹練者一二人為商總稽查私銅漏稅諸弊一廠員公廨請於鹽羨銀內動支修建至月費向分三等議給今銅礦新開上中下一時難定請暫照中廠之例酌給月費銀二十兩一廠商奸良不一爐竈私賣弊所不免應令廠官責成巡役稽查從之辛巳稽查右翼宗學右通政熊學鵬奏右翼宗學共設滿漢教習九人凡在館學生滿漢文藝之優劣教習人員訓課行走之勤惰皆應不時考核今稽查右翼宗學係臣與光祿寺卿沈起元二人俱係漢官於繙譯素未通曉請再派滿洲文臣一員公同稽查得旨著派開泰壬午諭軍機大臣等朕聞山東德州以南有數州縣缺雨喀爾吉善未曾奏聞不知近日得雨否若尚未得雨喀爾吉善作何籌畫辦理可寄信詢問令其即速具奏○戶

部議覆山東巡漕御史沈廷芳條奏漕務四款一除僉丁包運之弊一定衛缺銓選之法一押運領運員弁鑄給關防一停運隨幫千總支給廩工以上各款或係現行事例或與定例不合未便更張應毋庸議得旨依議巡漕御史沈廷芳條奏漕務四款俱經部駁從前巡漕御史回京之時往往將不能行事件勉強條奏幾款以圖塞責如果係應行之事自應盡心竭力辦理何得於回京時以章奏為虛文而不思實效沈廷芳著飭行兵部題閩粵南澳鎮總兵官何勉以老病乞休得旨何勉老成歷練効力有年屢經請休著解任調理俟病痊之日來京請旨所遺南澳鎮總兵員缺著陳林每調補該部知道刑部尚書盛安奏湖廣民人熊宗正毆死無服族祖熊建侯一案現在按律擬絞尚未具題乃御史萬年茂會核時以年未及歲之犯向例於按律擬抵外題請免死收贖今熊宗正年

僅十五未經一體聲敘請勅交廷議查十歲以下殺人者例應擬罪請旨十歲以上者向無此例謹將從前辦理同異緣由並此次不行援案題請之處逐一聲明具奏得旨刑部專司刑名其辦理各案前後互異之處必有緣由萬年茂既未深知又未向該部詳查但據已見即行陳奏未免急遽此案現交九卿議覆著將盛安所奏一併交九卿妥議具奏尋奏查雍正十年丁乞三仔毆死丁狗仔一案因丁乞三仔年僅十四先被丁狗仔欺凌起釁又係拾擲土塊誤傷是以得從末減今熊宗正毆死熊建侯起釁既由於該犯且又執持兇器雖年齒尚幼而情罪較重未便從寬請嗣後十五歲以下殺人之犯令該督撫查明實與丁乞三仔情罪相等者援照聲請聽候上裁從之江蘇巡撫陳大受疏報靖江縣乾隆九年新漲折實平田十二頃九十七畝有奇又新坍折實平田三頃五十四畝

有奇。分別升蠲額賦有差。○署廣西巡撫託庸疏報臨桂義寧來賓象州賓州并鬱林等六州縣首報乾隆九年墾熟民屯水田二頃八十六畝有奇。○以大學士公訥親兵部右侍郎開泰充經筵講官。○癸未。

上詣暢春園問

皇太后安。○戶部議准署廣西巡撫託庸疏稱粵西各處銅廠因官買餘銅過多商人未能獲利以致開採寥寥鼓鑄不敷請將各廠所出銅止以三分抽課餘銅七分聽商自賣俾得踴躍開採課銅亦可充裕從之。○補行引見考選御史之吏部員外郎王顯緒等二員得旨王顯緒喬履信俱著記名入於從前記名人員內以御史用。○甲申。

上御勤政殿聽政。○諭從前石林口衝決用過修築工料銀二十三萬九千一百餘兩部議著落該管河員照數賠補原以該處舊有土壩致被衝決應照疎防之例賠修第聞石林

土壩係乾隆五年間河臣率民修築之工並未動用錢糧與永定官隄疎防衝決者有間且七年黃水異漲亦非尋常可比動項既多該管各員勢必艱於賠償著格外加恩免其追賠嗣後凡有隄防處所務須先事綢繆毋得再臨前轍若稍有疎虞決不寬貸該部即遵諭行。○又諭向例滿洲郎中京察一等者吏部奏請考試於引見時記名以道府用如不敷選用再令各部保送考試其從前引見未經記名人員不在保送之例嗣後亦著一體考試帶領引見吏部將該員前次未經記名之處於引見摺內聲明。○以通政司右通政梅穀成為宗人府府丞。○乙酉中元節遣官祭

永陵

福陵

昭陵

昭西陵

孝陵

孝東陵

景陵

泰陵○遣官祭

端慧皇太子園寢○

上詣

安佑宮行禮○諭曰吏部尚書高斌於河工事務素所熟練今雖內用仍在直隸地方著兼管直隸河道總督印務如有應行查勘相度之處即從京師前往○戶部議准奉恩輔國

公兼護軍統領恒魯等奏稱隨圍借俸請照兼管職任一併支給得旨恒魯功宜布著照部議借給即民公以下世職官員亦應照伊等現兼職任借與俸祿該部嗣後照此辦理○又議覆署廣西巡撫託庸奏稱粵西乾隆七八兩年因收成歉薄撥運湖南漕米四萬石分給桂平梧州柳慶等府州縣平糶今已陸續易買穀石交還請仍留貯各屬於每年青黃不接時出借兵民除歉歲照例

免息外其年歲在八分以上者每石止收息穀八升並將此項價銀解貯司庫以備地方公用等語查粵西地處邊徼戶鮮蓋藏若將漕米易穀之項留備糶濟垂之久遠有裨民食應如所請其糶賣息穀銀亦准入於存公項下備用至出借倉穀向例每石收息一斗未便從減應一例辦理從之○以廣東澄海協副將陳謝勇為福建金門鎮總兵

大清高宗法天隆運至誠先覺體元立極敷文奮武孝慈神聖純皇帝實錄卷之二百四十四

大清高宗法天隆運至誠先覺體元立極敷文奮武孝慈神聖純皇帝實錄卷之二百四十五

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務立黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂

經裁官經筵講官太子太傅文華殿大學士文淵閣領閣事稽察欽奉 上諭事件處管理刑部尚書三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十年乙丑七月丙戌諭朕向來巡幸所

實錄卷二四五

過地方曾派員嚴查隨從官兵人等不許蹂躪農田滋擾百姓此次啟行之時正值秋成在望禾稼尚未登場誠恐約束不嚴以致踐踏禾黍有妨農務著都統阿蘭太護軍統領法諸那管理多派官兵沿途察看嚴加鈐轄其隨從官員兵丁亦令將家人跟役自行管束如有不遵禁令傷及田禾者即行查叅并行令該督提等遴委委員弁一體稽查毋得玩忽戶部議准陞任直隸總督高斌疏稱直

屬文安河間獻縣阜城肅寧交河吳橋東光滄州慶雲靜海鹽山青縣西寧赤城宛平大興霸州保定大城涿州房山良鄉固安永清香河密雲通州三河武清寶坻薊州寧河灤州盧龍遷安撫寧臨榆清苑滿城安肅定興新城唐縣博野慶都容城完縣蠡縣雄縣祁州束鹿安州高陽新安任邱寧津故城天津南皮正定獲鹿元氏藁城樂城無極贊皇平鄉廣宗鉅鹿唐山內邱任縣磁州邯鄲成安曲周廣平威縣清河東明延慶宣化萬全龍門懷來冀州併所屬之新河武邑衡水趙州併所屬之栢鄉隆平臨城寧晉高邑深州併所屬之武強饒陽安平定州併所屬之曲陽深澤易州併所屬之涑水廣昌遵化州併所屬之豐潤玉田又延慶衛熱河喀喇河屯等一百一十二州縣衛廳因春夏雨澤愆期二麥被旱歉收兼有被雹傷損者俱經酌借籽種口糧並令及時佈種秋禾其應否加賑蠲

免俟秋獲時勘明分數辦理得旨依議速行
丁亥

上詣暢春園問

皇太后安諭時屆新秋正當禾稼登場之際誠恐各省雨暘不齊收穫不一或有至於成災者其經理之處不容刻緩若該省督撫有請免請賑本章應照例辦理者朕巡幸口外降旨未免稍遲著留京總理事務之王大學士等四人照前年之例一面將副本交部查辦一面奏聞部議之後亦即一面行文該省一面奏聞如此則事得速辦不致或有稽延又諭今年直隸地方雨澤不勻朕心深為軫念降旨令高斌確查籌畫具奏據高斌奏稱宛平等六十四州縣衛廳於六月內有未經得雨者有得雨未能透足者當八月開徵之期所有應徵新舊錢糧應遵旨暫緩徵收將來是否成災尚難豫計俟秋收後酌看收成情形再行奏聞分別辦理至慶雲一縣目

下旱象已成現委道府親赴查勘撥領漕米以為賑借之用等語慶雲一縣既已成災著加意撫綏毋致失所其餘州縣俱著緩徵又思此等州縣將來收成如何目下雖難豫定著那蘇圖悉心體察若有成災之處可豫為籌算速行辦理毋得稍有稽遲其上年奉旨緩徵之景州等十二州縣亦一體查辦大學士等議覆給事中衛廷璞御史孫灝奏稱直省丙寅年地丁錢糧現經奉旨蠲免請令有產之家酌減佃租並勸諭節儉各等語查恩免之年令業戶減租惠佃是在督撫大吏董率有司多方開導俾田主知公溥之義佃戶無頑抗之風以周惠愷而息爭端若必限定讓租分數繩以官法其勢徒滋紛擾所奏應毋庸議至積年民欠遇蠲租之歲既予停徵小民至愚幸有贏餘不知撙節及來歲新舊兼徵未免仍屬拮据應如所請飭令地方官訓民節儉俾將來開徵之日得以急公完

納從之。吏部議覆欽天監會同管理國子監算學太僕寺少卿成德等議奏。漢算學生由舉人出身者。期滿以天文生補用。與生童充補者無別。請即以博士陞補。其算學期滿之助教。教習遇有五官正。靈臺郎。挈壺正。博士等缺出。請與欽天監應陞人員。相間補用。先用助教。教習一次。後用應陞人員一次。再欽天監額設三科。術業不同。所有算學館議叙候補俸缺之天文生。請各按伊等素習之業。補用本科之缺。均應如所請。至所稱滿洲蒙古漢軍。漢人天文生。中式舉人者。照筆帖式中式舉人之例。在任候陞。遇應用班次。歸本班選用。又蒙古算學生。既補滿洲天文生。而滿洲天文生應陞。有博士六缺。挈壺正二缺。主簿一缺。靈臺郎三缺。五官正二缺。蒙古則止有五官正二缺。其蒙古天文生與滿洲天文生如何陞用之處。並請酌議等語。查天文生向例止以本監之缺陞用。自不便如筆

帖式。通陞部院等衙門之缺。惟中式舉人者有應選知縣之班。不得以其在天文生任內。即行扣選。嗣後滿洲蒙古。照例考試。漢軍漢人。照例揀選。遇應選知縣之年。歸班選用。至蒙古五官正員缺。定例由理藩院等衙門出身者。以理藩院應陞之缺陞用。由吏部等衙門出身者。以六部應陞之缺陞用。今蒙古算學生陞至五官正。如論俸應陞之時。不論六部理藩院。准一體陞用。從之。浙江巡撫常安奏。浙西嘉湖二府。向有一種奸匪。迷拐幼孩。肆行殘害。慘毒難言。今據嘉善縣知縣陳以剛詳稱。挈獲拐犯富大。陳大二名。訊認實情。不諱。又究出各處餘黨多人。比時看審人民。同聲指詈。並將富大。立刻毆斃等語。臣當經飛檄各路。密挈務獲。至富大既經拘執。自應聽候審擬。正法。何以該邑民人。遽行毆斃。現在飭查。有無別情。另行辦理。得旨。是。此必有其黨羽。恐露踪跡。所為耳。且該縣亦屬無

能矣。應查叅。又批。此案應徹底詳查。不可使一人漏網。仍將作何辦理處。具摺奏聞。戊子諭目下伏汛已過。秋汛尚在長發之時。所有修防搶護事宜。督河諸臣。自必相機料理。其中或有具疏應交部議者。著留京總理事務之王大學士等。一面交部查辦。一面奏聞。部議後。亦一面行文該省。一面奏聞。庶不稽遲時日。又諭。聞齊齊哈爾地方。雨澤缺少。近日曾否得雨。如有被旱田畝。作何籌辦。所有彼處倉糧。及呼蘭穀石。可否足敷賑給。或運何處米穀接濟之處。著將軍傅森詳悉酌議具奏。緩徵安徽壽州。宿州。鳳陽。臨淮。懷遠。虹縣。靈璧。鳳臺。阜陽。潁上。泗州。五河等十二州縣。鳳陽。鳳中。宿州等三衛。水災。鳳臺。潁上。蒙城等三縣。電災。額賦賑貸飢民。以饗藍旗蒙古副都統莫爾渾為歸化城右翼副都統。旌表守正被戕之四川灌縣民曹金榮女曹氏。○已丑禮部議准。四川學政蔣

蔚疏稱。酉陽一州僻處川東。生童向赴重慶府考棚應試。往返二千餘里。路險難行。孤寒盤費維艱。請照夔州寧遠二府之例。歲科連考。從之。庚寅諭。各省捐收監穀。原欲廣為儲積。以濟民生。使倉儲日漸充裕。且出有餘。以備不足。亦不似一時採買。致有穀貴之患。乃州縣或恐折耗賠墊。或恐有干例議。往往視為畏途。每遇投捐之人。故為刁難恐嚇。是以生俊畏葸不前。又復多布浮議。以搖惑上司之聽聞。地方大吏。不思善於督率。轉為其所愚。即如湖廣總督鄂彌達。奏請監穀收銀。并稱州縣畏懼徵爛。難望其實力奉行。是明知州縣有留難之弊。不行查禁。而為之遷就。其說楚省為產米之鄉。尚且如此。又何怪他省之有名無實也。夫捐穀乃利民之善舉。但非州縣之所樂從。即欲顧惜賠累。亦當設法籌辦。使不致於徵變。豈可聽其騰口阻格。而明露姑息之意。著各該督撫。實心整理。嚴行申

飭務將從前積習滌除。使生俊樂從倉庾充實。庶於民生實有裨益。該部即通行各督撫知之。○又諭朕聞福建浦城關稅從前題定額徵銀二千七百餘兩。後於乾隆三年更定稅則。委員監收一年。以為定額。缺少銀五百四兩零。嗣後連年短徵。蓋因該關夫腳難於雇覓。以致商貨稀少。經徵各員無力墊補。遂成懸欠。著將此項稅銀五百四兩零加恩豁免。令其儘收儘解。其乾隆三年以後節年缺額銀兩一併加恩免其賠解。該部即遵諭行。○諭軍機大臣等。委送戰船到津之叅將向來俱照豫行保舉例註冊陞用。今福建督標水師營叅將劉使送船到津。該部帶領引見。朕看其人平常未必能勝副將之任。爾等可寄信與馬爾泰。令其將該員平日居官如何之處據實奏聞。尋奏劉使於水師船務雖素稱熟練。然年力衰邁。恐不能勝副將之任。得旨如此。則不可以副將題補。若彼俸次應陞

亦宜聲明摺奏。○又諭前據張廣泗奏稱。奸民夏長榮謀為不法一案。其微露逆蹟之時。有黔省兵丁王燕陸士湛探知信息。乃更改名姓。詭為投順。騙得偽劄。稟明該管千總。拏獲王燕等。此事可嘉。著寄信與張廣泗。應加提拔獎賞。以示鼓勵。○又諭前有湖北麻城縣民人雷响來在刑部出首李開花夥黨。聚集四川。謀為不法一案。刑部已密行川省。確查虛實。辦理。爾等可密寄信與慶復。紀山。令其悉心根究。固不可株連無辜。亦不可聽地方官希圖省事。有意寢息。致留後患。○辛卯。戶部議准盛京戶部侍郎雙喜奏稱。盛京內倉每年額徵地米不敷支放。查遼陽開原廣寧三城地米徵額甚多。除支給俸米等項外。餘米聽各城酌量存糶。原非額貯之款。請將三城地畝就近各移三萬晌。赴內倉交納地米二千三百餘石備用。從之。○又議准御史范廷楷奏稱。直省各屬地丁錢糧。向例遇蠲

免之年仍收耗銀以資辦公。但經徵之員因耗銀非正項可比任意多收。查舊例徵收正項錢糧聽民自封投櫃兼委佐貳教官等監收監拆該管上司仍不時稽察。今徵收耗銀亦應照例辦理從之。又議准山東巡撫喀爾吉善疏稱濟寧膠州寧海平度鄒縣汶上單縣武城曹縣鄆城諸城掖縣濰縣高密即墨蓬萊黃縣福山棲霞招遠萊陽文登等二十二州縣臨清衛前因倉儲充裕未經議請捐收監穀近年陸續借糶額貯不敷請酌定額捐穀十二萬石令各處生俊即在本籍投捐其應捐銀穀數目悉照東省減二收捐及本折兼收之例辦理至曲阜等處原經議有捐額停止未行請仍同濟寧等處一例收捐從之。又議准署河東鹽政衆神保覆奏山西陝西河南三省行銷河東引鹽山西陝西兩處秤斗兼用河南止用勛秤向係地方官與商民按照秤斗銀錢酌量售銷並未議定

價報部相沿行之甚便即可久遠遵守毋庸另議貴賤兩價以滋紛擾至靈寶縣鹽價商人現請量減銷賣亦應著為定例並請減每年公費雜項銀六百八十餘兩以補商利從之。禮部議准福建巡撫周學健疏稱閩省正音書院原為教習閩人通曉官音而設但閩省士民甚多一館之內止可容十餘人正音固難遍及況教習多年鄉音仍舊徒為虛糜帑項請裁四門正音書院責令州縣教職實力勸導俾通曉官音從之。兵部等部議覆湖北巡撫晏斯盛奏稱各處在配軍流人犯向交地保收管該犯與牌甲錯處每至誘惑善良且挾制地保苛求無狀請嗣後各省收到軍犯除老病廢疾仍歸原配各州縣收入養濟院外其餘即於通省府廳州縣佐雜各衙門勻派當差日給口糧應如所請至所稱軍犯止照省分充配不必限定州縣免致多寡參差查充軍例有五等道里遠近不一

若第照省分遣發恐起趨避之漸請照軍犯應遣府分轉行該處督撫於該府所屬州縣覈明里數勻撥充役從之○刑部議覆江蘇巡撫陳大受奏稱民人錢永興毆死胞兄錢永生應擬斬決但錢永興家無次丁援例請留承祀等語查錢永興雖因被兄趕毆情急格擋然逞兇肆毆多傷殞命非邂逅失手者可比與奏請承祀之例不符應毋庸議又御史孫灝等議錢永興毆兄致死實由伊兄起釁與尋常承祀者有間情尚可原且子嗣既無族人俱絕應援例准其承祀得旨九卿議奏近來御史等於公事往往以兩議相尚此風不可長孫灝等著飭行○以廣東高廉道黃岳牧為貴州按察使○壬辰

上自圓明園奉

皇太后啟鑒幸多倫諾爾○詣

皇太后行宮問安 諭乾隆八年朕恭謁

祖陵經過之州縣蠲免錢糧十分之三今年直

隸地方間有雨澤未能霑足之處前已降旨緩徵此次出口行圍所有經過地方不令絲毫擾累但安營除道未免有資民力朕心軫念著將近京一帶及宣府等處車駕經由之州縣本年應徵額賦蠲免十分之四其如何分晰辦理之處著總督那蘇圖速行酌量籌辦並將朕諭宣諭官民等知之尋奏直屬宛平大興昌平順義懷柔密雲熱河喀喇河屯四旗多倫諾爾獨石張家等口萬全宣化保安懷來延慶州延慶衛等州縣衛廳俱係行圍經過地方查各處安營除道均屬闔境輪撥其額徵銀兩米豆草束榛栗等項亦應闔邑攤免十分之四並照例將入官旗地餘絕地畝租銀同額賦一體蠲免得旨所奏俱悉是日駐蹕南石槽 癸巳

上詣

皇太后行宮問安 是日駐蹕密雲縣○甲午

上詣

皇太后行宮問安。諭朕降旨通免天下錢糧。可否將耗羨一併豁免之處。著大學士張廷玉。訥親。密議具奏。是日駐蹕要亭。乙未。上詣。

皇太后行宮問安。諭前歲朕臨幸奉天。目覩收成豐稔。米價平減。而直隸適當需米之際。是以降旨該督令其前往販運。原以一年為限。後限期將屆。又准臣工條奏。展限一年。目下直隸慶雲等州縣收成歉薄。雨澤尚有未能需足之處。若果海禁稍弛。商販流通。米糧充裕於民食。自有裨益。著將奉天海禁再展限一年。該部即遵諭行。又諭口外二溝地方現存米一萬餘石。今年熱河一帶缺雨。恐米價一時昂貴。著保祝率同恒文等將二溝存貯米石內酌撥數千石。即速運赴熱河。交地方官酌看情形。以備平糶之需。使米價不致高昂。即於隨從人等亦屬有益。該部即遵諭速行。諭軍機大臣等從前供應。

陵糈原係山東河南二省分年輪辦。後緣八溝等處米糧充裕。其運送。

陵寢較為便捷。因准臣工條奏。將口外購買之米運抵薊糧。而豫東二省應辦之糧運送通倉備用。朕此次出口。見古北口外一帶雨澤未能需足。收成不無歉薄。聞八溝尚屬有秋。朕意將來收成之後。酌量採買米石就近運赴口外一帶缺雨之處。以備借糶賑卹之用。其應運薊糧仍按舊例辦理。可寄信大學士張廷玉。訥親。會同總督那蘇圖。定議奏聞。如那蘇圖已經赴任。即令大學士等寄信前去。令其即速籌辦。又諭畿輔未得透雨之州縣。將來如果成災。應如何接濟之處。前已傳諭高斌令其會同在京總理事務王。大學士。與那蘇圖。豫行定議。今朕出口。路經密雲。古北一帶。殊覺天時亢旱。恐致成災。其接濟之方。亟應籌畫。可即寄信大學士張廷玉。訥親。會同二王及尚書高斌。總督那蘇圖。速行妥。

議將運至密雲古北口糧石。即行酌量情形。或借或賑。或平糶。一面辦理。一面奏聞。如此時那蘇圖已經赴任。即行寄信會商務俾近邊貧民不致失所。宣府一帶亦應籌及。又諭給事中圖爾泰等摺奏趙羅氏及趙昇爭產一案。請交與刑部查審等語。朕思此等細事。原係該巡城給事中自應辦理之事。何必另交刑部查審。況摺內所指副都統鄂齊爾之處。尚非重大事情。其虛實亦在未定。伊又不在京中。審訊殊屬未便。可寄信大學士張廷玉。訥親。令該給事中就近傳喚各犯審明。據理完結。原摺併發。○是日駐蹕兩間房。○丙申。

上詣

皇太后行宮問安。

上行圍。○諭軍機大臣等。本月二十六日。朕至常山峪行宮駐蹕。未刻得有雨澤。可寄信詢問王。大學士等。是日京師曾否得雨。亦著隨

本奏聞。○又諭王。大學士等會議摺內。應行辦理者。即便辦理。不必奏聞。如有必須奏聞之處。著隨本奏聞。不必專發。天氣炎熱。驛站馬匹。恐致傷損。○總理事務王大臣等議奏。查直屬缺雨之州縣。是否成災。八月初間。始可定局。臣等豫為籌辦。其早象已成者。自不可泥秋災不出九月之例。辦理稽遲。應即令地方官悉心查勘。除收成約有五分者。應請緩徵。並於開春借給口糧接濟。其不及五分。雖得雨亦難挽救者。即行查明戶口。造冊請賑。至貧民現在乏食者。并不得泥急賑之期。即為酌給米石。再一州縣內。祇有數村被旱。其成災重者。應一體急賑加賑。災輕之處。即無庸急賑。仍查明分數口數。按月給賑。至慶雲縣。已經成災。除急賑一月外。再照成災分數。按月加賑。並從寬給與口數。所有需用米穀。如本處倉貯不敷。其距北倉路近。水運可通者。即動撥存貯。或漕米不便遠撥。於附近

州縣酌撥應用。得旨朕未經過之處如所議。至口北一帶。昨見甚屬亢旱。想已成災。故有旨諭王大臣等將運密雲之米。今已無需應用。宜於口內外或借或賑。酌量妥辦。可查照前旨速辦。又議奏京倉現存黑豆除應給各處駝馬牛鹿需用外。止餘三萬餘石。目今直屬雖節次得雨。而豆田恐有歉收。自應豫籌。但遠赴豫東二省及奉天等處採買。未免煩費。查宣化府屬現存屯豆十一二萬石。若運至京師。以資動撥。平糶較為便易。得旨依議。既有餘豆。可於宣府兼宣順適中之地。豫行平糶數千石。則迴鑾時衆不苦芻秣之需矣。亦行令那蘇圖妥辦。又議奏自京至馬蘭峪經過地方。現奉諭旨。令臣等查明道旁地畝數目。并業主姓名。分晰造報。遇有恩蠲錢糧。易於辦理。臣等公同酌議。請將馬蘭峪經由道路丈量脩築。為常年清蹕之地。如有丈用民間地畝。照例給價。並將兩旁種植柳

株以表觀瞻。至熱河一帶御道。其兩旁地畝。向因該處民人有墊道安營等事。屢蒙恩卹。亦應令督臣那蘇圖約畧將二三里內地畝勘明造冊。以便臨時查辦。得旨依議。又批此一路向有種柳。今存少半。應令那蘇圖酌辦。戶部議准。盛京戶部侍郎雙喜奏稱。奉天所屬各城雜稅。向係銀錢兼收。每年徵解錢積貯庫內。日久未能流通。查黑龍江支放兵餉。向有兼用錢之例。請將各城所收稅錢。照例搭放兵餉。餘剩仍貯庫。以備次年之用。從之。戶部等衙門議准。吏部郎中金洪銓奏稱。黜奢崇儉。風俗攸關。各處地方官及仕宦之家。宜遵照欽定禮書。首先節儉。以為齊民表率。其地方隨時奉到上諭。應於每月朔望宣講。

聖諭廣訓之後。一體講解。俾愚民共知感化。至孝子節婦有貧苦不能自存者。請於存公項下按月酌給口糧。以資養贍。再四民之蠹。莫

如閒民並令地方官留心查訪。凡係閒民集處之地嚴行懲治從之。免湖北荊門州乾隆七年水衝沙壓田地額徵銀三百一十九兩有奇併乾隆八九年未完銀兩悉行豁免。以太僕寺卿龔滿岱為太常寺卿。是日駐蹕常山峪。丁酉。

上詣

皇太后行宮問安。是日駐蹕喀喇河屯。戊戌。

上詣

皇太后行宮問安。

上行圍諭此次隨圍官兵應於波羅河屯撥給官馬即命哈達哈親往放給務須妥協辦理。是日駐蹕避暑山莊至壬寅皆如之。已亥諭軍機大臣等宣化一帶未得透雨朕心軫念前已降旨令王大學士等寄信與那蘇圖豫為籌畫不知近日得雨與否可寄信詢問令其將目下情形及如何辦理之處即

速具摺奏聞。是月陞任直隸總督兼理河道高斌奏永定河伏汛已過工程平穩得旨伏汛甚小恐秋汛過大宜加意防之。署兩江總督協辦河務尹繼善奏上江之宿州壽州鳳陽臨淮懷遠虹縣靈璧鳳臺潁上阜陽泗州五河及鳳陽鳳中宿州三衛下江之安東桃源清河阜寧沛縣銅山蕭縣睢寧邳州宿遷海州贛榆沭陽及大河衛本年四月間雨多水長麥田被淹業經借給籽種口糧在案嗣因五月底至六月中旬雨水連綿復有續報被水者現飭各州縣查明被災輕重之處先賑卹一月得旨是據準奏情形相同應加意撫卹。又奏上下江地方自六月望後至七月初間大雨時行有從前被淹涸出之地補種秋禾復被水淹者有前未被水而今秋禾淹損者查上江之宿州靈璧虹縣鳳陽懷遠泗州下江邳州睢寧海州沭陽贛榆等處被災最重其餘州縣大勢較輕現將乏

食貧民。先行撫卹。俟勘明成災分數。酌定賑濟月分。另題辦理。得旨。覽奏俱悉。被災之處。加意撫卹。毋致小民失所也。○江蘇巡撫陳大受奏。江省蠲免錢糧。酌議事宜三款。一。江省地丁漕項。向未分別徵收。今地丁全數蠲免。而漕項仍應完納。恐吏胥朦混浮收。應飭各州縣清查定額。分晰應免應完之數。曉諭糧戶。一地丁耗羨。向隨正項輸納。今正項已蠲。而耗羨照舊徵收。雖屬零星小數。其火工票錢。反致多用。請令花戶於完納漕項時。帶完耗羨。即附填串票。不必另給。亦不得耗外加耗。一。吳中佃戶抗租。久成錮習。況業戶現邀恩免。頑佃尤得藉詞賴租。今酌議業戶收租。照蠲免之銀。酌減分數。如業戶邀免一兩者。應免佃戶五錢。得旨。所議尚屬留心。行之。則仍在人耳。○又奏。江蘇漕額繁多。徵限緊迫。吏胥因緣為奸。雖逐年清釐。然亦止能懲創於耳目所及。而積弊尚未盡除。臣嚴行整

飭。不敢稍有懈弛。得旨。惟當實心時刻查察耳。弊豈能盡除哉。○江南河道總督白鍾山奏。黃河南岸陳家浦隄工。切近海濱。七月間水勢驟漲。外灘全行塌去。雖竭力搶護。而潮溜湍急。異常。以致隄身坐墊。得旨。此奏殊不明悉。百姓曾否被災。何無一言。○又奏。葦蕩左右兩營新設弁兵。未建衙署。營房。兵丁零星散處。備弁亦各賃住。毫無聯屬。請建守備千把總衙署。及兵丁營房。得旨。如所請行。○江蘇布政使安寧奏。江省各府州屬收捐監穀。有贏縮不齊之處。自應派勻撥運。請先就一府一州之中。將溢額穀石。撥補缺額之處。俟派撥齊全。再就近撥補別府州缺額之處。其水腳即動項支給。得旨。好。交督撫酌量行之。○安徽巡撫魏定國奏。上江所屬鳳。潁。廬。六。泗。滁。等府州。盜劫時聞。查節年未獲盜案甚多。請嚴定功過。酌立賞格。令鳳。廬。道為總緝。並選幹練州縣數員為分緝。多募慣能獲

盜捕役徧行訪拏。州縣官除拏獲本境盜犯。毋庸記功外。有拏獲鄰境盜首一名者。記大功一次。從盜記功一次。積匪搶奪等賊犯。兩名記功一次。捕役分別賞銀。玩縱即將州縣題叅。捕役懲治。至安慶沿江一帶。現飭弁兵等實力巡查。如有應緝盜犯。亦照鳳潁等處之例辦理。得旨。應嚴懲盜風。以靖地方。但觀汝所辦。尚屬過於賞而薄於罰。且緝盜是其本責。今賞重而罰輕。則將來反致不賞則不緝盜矣。此不通方之政也。戒之。○閩浙總督馬爾泰奏。浙省提標兵丁夥謀盜劫。業經訪拏究辦。並札知提臣陳倫炯。將該管將弁查明揭叅。得旨。此事應從嚴辦理。以警其餘。○浙江巡撫常安奏。臣本年六月。巡查杭嘉海洋一路。至黃道關乍浦口等處。見斥堠碁布。戰艦排連。及配兵出哨。聯絡聲援。法極周密。臣猶慮日久懈弛。復飭文武員弁實力防範。得旨。實之一字。須時時體驗行之。餘無可諭。

汝也。福建巡撫周學健奏。閩屬福州興化泉州福寧等府。自六月後。雨澤缺少。現已委員前往各處察勘。斷不敢稍存粉飾。亦不敢不盡心籌辦。得旨。覽奏俱悉。常存此心。朕復何慮。水旱亦所時有。惟在盡人力以補救耳。勉為之。○又奏福州等府屬旱象已成。臣與督臣馬爾泰。竭誠祈禱。於七月二十六日。大沛甘霖。晚禾可以補種。得旨。覽奏。曷勝欣慰。此皆汝等督撫和衷遇災能虔誠修省。故有此轉歉之報。甚愜朕意也。○又奏閩省額徵地丁銀。每年拖欠甚多。非盡由民戶頑抗所致。現行令未完各縣。徹底清查。分別有無役蝕。抑實在民欠。設法催徵。剔除錮弊。得旨。此事固應實力為之者。但不宜於旱災之時。徐料理。何愁不辦耶。○又奏督臣馬爾泰。因年齒就衰。忽患中風之症。幸尚能受補。醫治半月。稍覺痊可。得旨。欣悅。覽之。若漸可痊愈。則並非中風。若果係中風。正難望其痊愈耳。

目下光景何如可據實奏聞。河南巡撫碩色奏豫省自乾隆四年至六七兩年連被水旱貧民乏食竊劫時聞近因歲獲有秋兼之嚴行保甲盜案漸少今御史楊朝鼎因河南積年盜案甚多請將夥盜不分首從概行正法是盜案已減於前而立法反欲加重似未平允得旨楊朝鼎所奏未必即可行而汝為此言得毋有諱盜之意耶戒之。又奏謝降調留任恩得旨汝總以小心無過倖免耳然封疆大臣之責不止此也以後若不奮勉擴充恐終不免矣。山東巡撫喀爾吉善奏東省陵縣平原德州惠民陽信海豐樂陵蒲臺利津濱州霑化冠縣臨清邱縣館陶恩縣夏津武城十八州縣及德州衛雨澤愆期收成難望豐稔如有應行籌畫之處即酌量辦理得旨昨已有旨問汝矣倘此數州縣被災不可因其偏災而忽視之加意撫綏可也。又奏濟寧一帶運河因雨大水漲隄埝多被衝

漫現飭河員分頭防護並查勘災民量加撫卹得旨知道了被災處所速行加意撫卹不可玩視也。山西巡撫阿里衮奏晉屬大同陽高天鎮馬邑忻州定襄等六州縣夏麥被旱傷損現酌借貧民籽種口糧並行緩徵得旨所奏俱悉其缺雨之處秋禾情形如何若有旱形可速為料理即具奏以聞。川陝總督公慶復遵旨覆奏臣前派泰寧協副將宋宗璋統領松潘一路官兵進勦瞻對嗣因宋宗璋陞任松潘總兵改委威茂協副將何啟賢但查瞻對本係宋宗璋舊轄地方情形熟悉且以本鎮大員統領所屬之兵更為妥協現在四川提臣李質粹議往打箭爐口外東俄洛地方駐劄接應宋宗璋領兵前進正可就近調度再陝甘一帶邊疆要地臣於巡邊之際已飭文武諸臣加意防範瞻對與西寧所屬接壤現已撥兵堵截其打箭爐附近之巴塘裡塘亦移咨雲貴督臣防禦得旨所奏

俱悉。此事宜妥協周詳料理。毋少致疎忽也。
○又奏。下瞻對班。聞兵進勦。現稱出結効。
順。恐係秋禾將熟。希圖延緩收穫。亦未可定。
又上瞻對頭目。騷達邦等情願獻出三寨。効
力引路。並攻下瞻對。亦不可遽信。容臣到川
時確查虛實。與撫提諸臣密商辦理。得旨覽。
須慎重為之。不可墮其術中。○又奏。陝省今
夏豌豆歉收。查省城八旗九營兵馬。每歲額
支豌豆四萬四千三百四十餘石。俱於近省
之咸寧長安等州縣屯更戶下徵運。今收豆
既少。輸納維艱。請緩七徵三。以紓民力。其兵
馬料豆。支放不敷者。請將道倉備貯軍需之
豆。並咸寧長安二縣存貯之豆。暫為撥供。次
年徵收還款。再查潼關縣節年支剩之豆。存
積日久。亦可撥運支放。俟來年徵還時。一併
存貯道倉。統作豫備之豆。向後偶有歉收。即
就近借支。不必另撥。得旨。如所請行。○甘肅
巡撫黃廷桂奏。甘省階州固原鎮番肅州靈

臺山丹碾伯中衛河州秦州清水等州縣被
雹被水。夏禾損傷。現在委員確勘。酌借籽種
口糧。暫行停徵。其淹斃人口。照例賑卹。地畝
坍壓者。查明題豁。得旨。所奏俱悉。其成災之
處。加意撫卹。毋致失所。斯慰朕志矣。○又奏。
州縣為親民之官。一切應行應禁事件。前經
分列條款。飭屬奉行。隨時申報。有無成效。並
責成該管道府州親赴查勘。但甘省地方遼
濶。若道府州按季出巡。未免常年在。請令
於秋成後。按年輪派。巡閱一次。詳報督撫。年
終覈實彙奏。得旨。知道了。惟在實力奉行。若
視為虛文。巡查亦何益之有。○又奏。向例陞
調各缺。應擇並無停陞降職者。方准題補。往
往不得合例之員。請嗣後甘省邊要題缺。容
於現在停降各員內揀選具題。仍於本內叙
明停降各案。其部臣議覆。亦將該員不合例
之處。聲明於前。而以應否陞調。兩請於後。聽
候裁定。得旨。此與汝等摺奏何異耶。仍舊貫

可也。廣東提督林君陞疏報粵東各屬早稻收成分數及秋後雨澤霑足情形。得旨所奏俱悉。奏報雨水年歲切不可存粉飾之意。慎之。廣西左江鎮總兵官楊剛奏官兵技藝全在操練。現派千把目兵充當教習。日在公所訓練。臣復親加試看。其訓練已熟者。派往塘汛防守。又每月十日。委員前往考驗一次。得旨。此皆下乘。若論為將之道。一切用不著。擴充識見為要。○貴州總督兼管巡撫事

實錄卷一百五

三十一

張廣泗奏前經奉旨鈔寄京師所議錢法六條。令臣等酌量可以仿行之處。密商辦理。查黔省情形與京師不同。臣悉心妥議。除並無打造銅鋪官米局。嚴錢市經紀。雜糧客店及富戶囤積等弊。均無憑仿照外。惟黔地界連川楚粵西。商賈絡繹。而各處錢價俱昂。恐客商因此販錢射利。以致本處錢價增長。應照京師嚴禁興販錢文之例。飭令關隘稅口。查有載錢出境者。照例治罪。又大學士等議嗣

後官員辦公支領帑項銀。即以銀給發。不得復易錢文。至民間日用除零星買賣。許用錢文外。餘俱用銀交易。臣亦接到部咨。轉令地方官遵照施行。得旨。此事奏覆殊覺遲緩。至於辦理。惟在因時制宜。○又奏貴州按察使員缺。現係署兵備道孫紹武暫行署理。但臬司為刑名總匯。員缺未便久懸。請速揀賢員補授。得旨。已用黃岳牧矣。其為人謹飭。亦能辦事。但苗疆恐未歷練。卿其作成之。

實錄卷一百五

三十二

大清高宗法天隆運至誠先覺體元立極敷文奮武孝慈神聖純皇帝實錄卷之二百四十五

大清高宗法天隆運至誠先覺體元立極敷文奮武孝慈神聖純皇帝實錄卷之二百四十六

是年巡幸盛京時宮太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務盛京鎮萬州都統世襲騎都尉軍功加七級隨帶加一級奉常加二級軍功紀錄一次臣慶桂

世襲騎都尉軍功加九級隨帶加二級又加二級臣富綱內大臣戶部尚書理藩院滿洲都統軍功紀錄五次

世襲騎都尉軍功加九級隨帶加二級又加二級臣富綱內大臣戶部尚書理藩院滿洲都統軍功紀錄五次

世襲騎都尉軍功加九級隨帶加二級又加二級臣富綱內大臣戶部尚書理藩院滿洲都統軍功紀錄五次

教修

乾隆十年乙丑八月庚子朔

上詣

皇太后行宮問安 總理事務王大臣等奏前

月二十六日京師甘霖達旦現當田禾秀實

之時得此透雨秋禾既可堅實晚田亦大有

裨益得旨覽奏曷勝欣慰此間亦得四五寸

許雨澤皆云於晚田甚屬有益看此光景仰

賴

天恩雖歉不致盡無收耳且夜雨朝晴殊無跋

涉之苦上下和樂今已至熱河王大臣等其

共茲喜也亦令在京各王大臣等知之○大

學士張廷玉訥親覆奏密雲古北一帶旱象

已成現奉諭旨令臣等會同二王及尚書高

斌總督那蘇圖將運往密雲古北糧石酌量

借糶賑卹今那蘇圖已經赴任臣等即行寄

信會商得旨覽此事汝等議定可交保祝就

近督率辦理今因熱河米價較前年尚平而

較去年則昂故即降旨令其率同地方官出

粟平糶矣 戶部議准奉天府府尹霍備疏

稱義州每年徵收糧額二萬八千餘石前請

建倉二十間止貯米一萬二千石餘仍租賃

民房零星堆貯請添蓋倉廩四十間從之○

又議覆貴州總督兼管巡撫事張廣泗奏黔

省安籠等鎮協營分防各汛酌議分貯米石

一摺查黔省各屬倉廩向設府廳州縣城內

各處營汛離城一百里至二三百餘里不等

需用米撥運維艱應如所請將捧鮮黃草壩

菩薩塘瓦渣河龍場以個定南歸集牙舟柳

霽宗地赤水河王母列當王寨三洞等十六
汛添蓋倉廩分貯米七千七百五十石至滾
縱九門定旦白索雞擺尾嗅腦番招排養梁
上等九汛俱係新開苗疆距各廳駐劄處稍
遠亦應酌撥分貯但原議五千七百石為數
過多今量行核減止分貯米三千四百石動
支平糶銀兩在於各汛就近撥買從之工
部議准陞任直隸總督高斌奏稱直省淀泊
河灘各地畝或因水道遷徙或係隄岸空餘

半屬腴田可以耕種現在逐一查勘分別等
次酌定租銀給附近貧民認種每戶自十畝
至三十畝計口受田毋許逾限每年所收租
銀解貯道庫為河工歲修之用如遇水大被
淹止免應徵租銀不得請賑或值地方大勢
災歉仍照例一體辦理倘有逃絕之戶招人
另佃禁私行典賣從之○辛丑賜扈從王公
大臣等食○壬寅總理行營事務王大臣等
議奏由青海前來之王公等請於波羅河屯

駐蹕時設宴賜食即賞幣物銀兩其隨從之
侍衛官員跟役人等亦分別賞緞布再蒙古
王公扎薩克等請安後即回游牧者並賜宴
遣歸如前願隨圍奉旨允行者俟至多倫諾
爾再賞奏入報聞 癸卯

上自避暑山莊奉

皇太后啟鑒 詣

皇太后行宮問安 戶部等部議准甘肅巡撫

黃廷桂疏稱安西衛學新設教授請鑄給印

信並照赤金靖逆柳溝等廳衛各員邊俸陞

轉之例五年俸滿即以應陞之缺陞用從之

兵部議覆漕運總督顧琮奏稱向例漕船

過淮逾限者將運弁等議以責革然未經題

准部覆不便即時發落仍令戴罪督押及准

到部議而該弁旋以抵通完糧題請開復以

致視為具文不行實力催趲請將違限議處

之員雖完糧不准開復令其督押下運如再

違限即於過淮時發落扣運等語查議處定

例無扣運完結之條。未便更改。但運弁違限。必當嚴懲。嗣後令該督於過淮時。查明違限日期。即行照例發落。似亦速漕之一法。從之。
○緩徵淮安。茆瀆臨洪。興莊等三場。本年水災。新舊鹽課。兼賑飢民。其災輕之板浦。徐瀆。中正等三場。未完。乾隆八年分。借給麥價銀。併行緩徵。
○停徵湖北。漢川。孝感。黃梅。潛江。沔陽。天門。荊門。當陽。雲夢。江陵。監利。枝江。宜都等十三州縣。沔陽。荊州。荊左。荊右。四衛。本年水災。光化。穀城。二縣。電災。額賦。賑貸飢民。是日駐蹕中關。○甲辰。

上詣

皇太后行宮問安。○諭江蘇各屬。向有學租一項。以供給發廩生。並賑卹貧生之用。此固國家體恤士子之恩也。但聞向來學臣賑貧。每於各處考試事竣。始據各學冊報給發。其中弊端種種。不一而足。朕思與其散賑於考試將竣之日。何如散給於士子雲集之時。則耳

目衆多。貧者不致遺漏。而不貧者亦難以冒支。嗣後著各該學政。轉飭各學教官。確查極貧次貧。造具花名細冊。於按臨之日投遞。該學臣覈實。即於三日內逐名面賑。則貧生均霑實惠。該教官等。如有濫開混報等弊。亦易查出。叅處。○署兩江總督。協辦河務尹繼善。以七月二十二日。

聖駕起鑾。巡幸多倫諾爾。具摺請安。得旨。覽。朕奉

皇太后出口行圍。一路清吉。今至波羅河屯。見衆蒙古傾心向化。識

祖德之無邊。卜皇圖之有永。卿其共茲喜也。○

是日駐蹕波羅河屯。○乙巳。諭冒籍頂名。例有嚴禁。況歲科考試。為士子進身之始。尤宜加意清釐。以肅學政。今據崔紀奏稱。江蘇地方童生應試。率皆彼此通融互考。甚且有一人冒考數處。或多做重卷數名。以為院試時售賣之地者。通省皆然。而松江府為尤甚等

語此種弊端所關士習非淺。朕思各府州縣皆有烟戶冊籍。按籍而稽。難以蒙混。誠於州縣考試之時。童生報名。查對烟戶無訛。方許廩保填結。府考縣考。俱令原保廩生識認。則冒籍頂名之弊可除。於士習不無裨益。著該督撫轉飭所屬實力奉行。不得視為故事。該學政亦不時稽查。如有仍蹈前轍者。查明按例究治。該部即遵諭行。○諭軍機大臣等。朕聞山東武城縣今年春夏亢旱。七月內雖經得雨。將來秋成未免歉薄。農人望歲情迫。再滕縣地方。夏間雨水過多。近日泗水漲發。而該縣被災尤甚。前據巡撫喀爾吉善將濟寧發水緣由奏明。而被災各州縣未經詳悉奏報。可寄信詢問。令其將該處情形並現在如何辦理之處。即速據實奏聞。尋奏武城縣夏間雨澤缺少。續經節次得雨。雖收成不能豐稔。然亦在六分以上。民情甚屬安帖。至滕縣境內之坤三。坤四。離二十二等堡。前因雨大

水漲。旋即消退。但水勢經過之處。豆禾不無損傷。臣現已委員查勘酌量撫卹。民人並無失所得旨。覽奏稍慰朕懷。其督率有司妥協辦理。○總理事務王大臣等議奏。密雲古北一帶應行借糶賑卹事宜。前奉諭旨令臣等咨商督臣那蘇圖公同酌議。復諭議定後。即交保祝就近辦理。今那蘇圖與臣等會同定議。如果密雲古北二處秋收歉薄。自應籌辦賑卹。現在旱象已成。請將該處運到漕糧一萬五千餘石。先行平糶。俾米價不至加增。其口外四旗通判所屬及喀喇河屯等處常平倉貯并內務府倉糧。共有一萬二千餘石。亦應酌撥平糶。如貧民無力糶買者。量行酌給。於明歲麥熟後收補還倉。兵丁無力者一體借支。於月餉內扣還。其應作何借糶之處。即交提臣保祝相度辦理。至宣化府屬各州縣現存倉糧二十萬餘石。亦令照例速辦。又臣等會商八溝等處秋成有望。若於收穫後前

往該處採買。就近接濟熱河一帶。實屬有益。亦應令保祝委弁協辦。至薊遵豐等處。

陵糈。從前議令每年酌量口外情形。就近採買。原屬相機辦理。今口外既經缺雨。恐致歉收。應遵旨仍按舊例。將豫東二省糧石。運往供應。得旨依議。宣化一帶。著開泰前往董率妥辦。○署湖廣總督鄂彌達奏。楚北開爐鼓鑄。先經採辦滇銅三十一萬八千五百五十餘觔。嗣因銅色低潮。奏請截留京銅十萬觔。與

滇銅搭配鼓鑄。俟范毓麟所辦洋銅到楚。再行調劑辦理。現今截留之銅。配鑄已完。而洋銅尚未運到。萬難停爐以待。查原辦滇銅。除陸續配鑄外。尚存十二萬四千二百二十餘觔。請以滇銅六二紅銅三八配用。即動項酌買紅銅。解局供鑄。得旨該部知道。○是日駐蹕張三營。○丙午。總督倉場戶部侍郎覺羅吳拜等奏。糧艘回空。接領新運。最關緊要。查江南興武。江淮二衛幫船。運丁向稱貧乏。本

年領運北上。沿途起剥添緯。費用殊多。現在無力回南者。共船二百六十二隻。請每船借支通庫輕齎銀十六兩。以濟回空之資。在於各丁應領起運錢糧內。分年扣還。得旨著照所請。行該部知道。○是日駐蹕十八里台。○丁未。

上行圍於永安莽喀。祭。

先師孔子。遣履親王允禔行禮。○戶部議覆盛京佐領管理中江稅務監督恩特奏。中江稅務向未設立衙署。監督併書役人等俱係賃房居住。其解送錢糧等費。稅員自行經理。辦公每至拮据。請照領給盤費之例。於火耗銀內動支等語。查中江稅差。原派盛京部員就近徵收。並未設經費銀兩。續因揀派京員前往。道里遙遠。始行議給盤費。今該監督以各項經費繁多。請照例支用火耗銀兩。自應酌量給與。以資辦公。從之。○兵部議准山西巡撫阿里衮疏。稱山右成晉。鳴謙仁義蒙城。

侯馬泓芝。褫亭星輶南關權店太安芹泉栢井甘桃等十四驛馬匹原係驛丞管理續經改歸州縣各屬政務殷繁有顧此失彼之慮請照舊仍歸驛丞經管再大同朔平寧武保德各塘站馬匹由霍州等處撥協者均係該處遣人赴塘餵養每苦鞭長莫及請將此項撥協馬改歸管塘州縣及驛丞就近總管其額支工料銀原管各州縣在省北者豫季移交在省南者解交冀寧道轉發從之○兵部等部議覆貴州總督兼管巡撫事張廣泗疏稱古州清江台拱八寨丹江都江松桃等各鎮協營俱係苗疆新設應建造塘房以資捍禦等語查古州等處塘汛應建塘房共計一百七十一塘准照數修建從之○撫卹江蘇邳州睢寧海州沐陽贛榆等五州縣大河衛本年水災飢民緩徵新舊額賦其災輕之阜寧銅山沛縣蕭縣宿遷清河安東桃源等八縣一例緩徵併借給籽種口糧○停徵山西

大同陽高天鎮馬邑忻州定襄等六州縣本年旱災額賦兼貸飢民是日駐蹕海拉蘇台○戊申

太宗文皇帝忌辰遣官祭

昭陵

上詣

皇太后行幄問安○行圍於畢雅喀拉○諭軍機大臣等前據陳大受奏常州府地方多有設立靜堂非僧非道聚眾拜佛男女混雜其傳教名目種種不同江寧松江鎮江太倉等屬亦皆有之隨經密飭訪查已查出五六十處現在分別辦理一摺朕批諭去後迄今數月未見覆奏朕思此等瑩瑩孤獨併聚一堂以謀衣食雖蹟涉不經或亦出於萬不得已且由來已久並無滋事之處一旦絕其相生相養之路情亦堪憫不知陳大受現在如何辦理可寄信詢問令其據實奏聞尋奏常州等處靜堂各教目下雖無為匪之事但查其

人並非盡係覺獨。有夫婦子女親族。有房可住。有田可耕。而設堂立教。招聚至二三十人。多係年力精壯。事既不經。情頗涉異。臣現在酌量安頓。如一堂之內。房間尚少。而居者係一家親屬。仍令執業居住。耕田自給。若房間多而聚處人衆。即改為普濟堂。其人仍許在內居住。田地亦仍為己業。惟令將佛像移奉寺菴。不得再行聚衆禮拜。或原係舊日僧菴。即招曾給度牒之僧看守。並密諭各屬。從容辦理。不可急遽滋事。亦無致一人失所。得旨。覽止。可如此而已。○又奏。浙省拏獲拐盜多人。訊出夥黨。有居江省青浦等縣者。因飭各屬嚴行查緝。現據吳江縣查獲馬天生一船。即提解蘇州。嚴加究訊。惟是百姓聞有拏獲拐犯聚觀之人。輒起公忿。立行毆斃。轉致無從根究夥黨。臣又密諭各屬。慎密妥辦。得旨。馬知非。即其夥黨所為。以滅其跡耶。不可墮其計中。且地方官何為者。致令官犯被人毆

斃乎。又批。此事足見汝等向不留心所致。若於辦理之際。復行怠忽從事。則失愈大矣。○是日駐蹕呼魯蘇台。○己酉。上行圍於威遜格爾。賜蒙古王。台吉等宴。○諭軍機大臣等。前曾降旨。將密雲古北。熱河一帶糧石。酌量情形。或賑或平糶。交與提督保祝。就近督率辦理。今已連次得有透雨。未知該處情形如何。是否成災。前次運往密雲米一萬五千石。果否足敷賑糶之用。抑或尚需八溝米石接濟。再密雲米石動用之後。今年尚能買補還項與否。保祝現在如何辦理。可寄信詢問。令其詳悉奏聞。尋奏。密雲古北運到通米一萬五千石。現分三處平糶。兼以連日得雨。晚禾可望薄收。糧價有減無增。其熱河一帶及中關波羅河屯平糶事宜。恒文業經辦理。該處糧價亦稍減。現據四旗熱河兩廳請照市價平減即止之議。停止。查中關波羅河屯二處。登場不遠。自可無煩再糶。惟

熱河及喀喇河屯等處災象已成其平糶是否可停現照會熱河道查明酌辦再密雲古北平糶米約算可至西成如有不敷古北現有倉穀四千石密雲有倉穀八千餘石可備賑糶無需八溝接濟若密雲倉穀動用之後仍應於鄰近有收地方補買還倉其通倉運到之米原係南漕所有平糶價銀似應解歸藩庫無庸採買得旨與督臣酌議行○兵部侍郎開泰奏宣化一帶借糶事宜命臣前往辦理臣惟有董率地方各員悉心妥辦俾災民均霑實惠得旨知道了查災一事固不可冒濫以啟愚民僥倖之念而此次所以遣汝者則因鑒輿必經之路或有荒涼氣象汝應外不露此意而內則亟為調停且不可即言查賑但云奉旨遣來查道或云平糶可耳再者回鑒之時若有愚民希恩告賑此則大不可行之事汝應密為留心凡此所諭汝俟那蘇圖到時告彼知之一切汝二人同辦是

日駐蹕準烏拉岱翌日如之○庚戌
太祖高皇帝忌辰遣官祭

福陵○

上行圍於溫都里華○戶部議覆盛京禮部侍郎納爾泰奏稱奉屬補放倉官之筆帖式請照原品食俸一摺查向例筆帖式揀派倉差即支食倉官俸及期滿回任則又降食筆帖式原俸體制未協嗣後應照京中補放倉監督之例仍按該員品級食俸其寧古塔黑龍江等處倉官亦應畫一辦理從之○兵部等部議准奉天將軍達勒黨阿等議奏匪類偷挖人參潛藏禁地自應設法緝拏請將寧古塔三姓渾春等處水陸隘口添設卡座分派官兵嚴拏私濟米糧之人其南海雅蘭西楞等處即令欽派二等侍衛庫楚作為首領選員帶兵於每年七月在吉林地方及三姓所屬德克登伊烏蘇里等處分路前往嚴緝官兵即留彼處過冬燬踐伊等窩鋪地畝查拏

接濟米石。務使匪類盡絕。至南海雅蘭西楞等處。霜早雪大。官兵騎往之馬。於霜雪未降前趕回。俟次年派往。過冬官兵帶往。此次前往官兵等并賞一季俸餉。從之。工部議准。欽差戶部侍郎三和等奏稱。甘省各處邊牆城堡。坍塌損所在多有。第城垣為兵民倚賴。較邊牆尤關緊要。應先修葺。查甘州。狄道。河州。平涼。固原。古浪等府州縣。或控制邊口。或路當孔道。請修建城垣。至肅州鎮屬金塔一協。設在邊外。其城垣改建之處。俟督臣查明辦理。從之。以三等侍衛富德為鑲藍旗蒙古副都統。辛亥。

上行圍於額爾袞郭。賜蒙古王額駙台吉等宴。遣官祭。

關帝廟。諭曰。江蘇巡撫陳大受奏請於九月內赴京。朕見將巡撫印務交與總督尹繼善署理一摺。朕已批允。今據尹繼善奏稱。九月間正當出巡之際。難以兼顧等語。其江

蘇巡撫印務著布政使安寧暫行護理。尹繼善巡查事竣。仍著署理巡撫印務。○是日駐蹕都木達烏拉。岱翌日如之。○壬子。

萬壽節遣官祭

太廟後殿○遣官祭

福陵

昭陵

昭西陵

孝陵

孝東陵

景陵

泰陵○遣官祭

顯佑宮

東嶽廟

城隍廟

上詣

皇太后行幄行禮。○御行幄。扈從王公大臣官員及蒙古王公台吉等行慶賀禮。賜扈從

王公大臣蒙古王公台吉等宴○癸丑

上詣

皇太后行幄問安○工部議准欽差戶部侍郎
三和陝西巡撫陳宏謀等奏稱陝省各屬城
垣親往逐一查勘如榆林府谷神木定邊四
縣城工坍損尤甚第逼近邊疆頗關緊要即
應動項修築鄜州亦係咽喉要地該城東北
二面為洛水衝刷請添建石隄即於隄上築
城安塞縣城外山水陡逼亦應築隄保護並
另開引河以順水勢其餘各處緩工陸續興
修從之○免江蘇沛縣昭陽湖水沈田地額徵
銀三千二百六十八兩有奇糧一千四百五
十五石有奇○是日

上行圍於布爾噶蘇台駐蹕○甲寅

上詣

皇太后行幄問安○行圍於巴彥溝○諭曰周
學健奏積貯一摺朕已批交王大學士會同
該部速議具奏矣著將原摺并奏片一併抄

錄寄與大學士張廷玉○訥親令其仿照從前
降旨辦理各省水旱之例一面辦理一面奏
聞 又諭閩浙總督馬爾泰現在患病著派
御醫孫之煥馳驛前往診視 是日駐蹕巴
彥溝翌日如之

實錄卷一百四十六

二十

大清高宗法天隆運至誠先覺體元立極敷文
奮武孝慈神聖純皇帝實錄卷之二百四十六

大清高宗法天隆運至誠先覺體元立極敷文奮武孝慈神聖純皇帝實錄卷之二百四十七

監修總裁官理藩院太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次是桂

紹毅會經議官太子太傅大學士文淵閣領事稽察欽奉 上諭事件處管理刑部戶部三庫事務

世宗憲皇帝軍功加十九級隨帶加二級又加二級臣等謹將內大臣戶部尚書鍾寶璣滿洲都統軍功紀錄五次

平定紀錄十四次臣等謹將議官太子少保工部尚書紀錄六次臣等謹將平奉

啟修

乾隆十年乙丑八月乙卯

上行圍於烏里雅蘇台○賜王大臣蒙古王額

駙台吉等宴○丙辰

上詣

皇太后行幄問安○行圍於畢圖舍哩○兵部

侍郎開泰奏宣化府屬被災各州縣現在督

臣委員確勘陸續散賑但該處向例相沿既

行散賑則平糶稍緩查宣屬山僻且被災較

重若拘泥緩糶之說恐米價漸增臣酌令地

方官查明曾開糶之處如米價猶昂不必速

議停止其未開糶者即量行出糶以平市價得旨所奏俱悉○是日駐蹕依遜薩爾巴里丁巳

上詣

皇太后行幄問安○遣官祭昭忠祠○是日

上行圍於阿濟格鳩和羅駐蹕○戊午祭

大社

大稷遣履親王允禔恭代行禮○

上行圍於僧機圖大學士等遵旨議奏直省

蠲免錢糧現奉諭旨令臣等將耗羨可否一

併豁免之處酌議辦理查正項錢糧已分三

年蠲免若將耗羨一例豁免則養廉充公等

項無可支用雖有節年存剩盈餘各間款可

撥而此外不敷之數尚多應將耗羨仍微得

旨是知道了○是日駐蹕博勒齊爾○己未

上詣

皇太后行幄問安○行圍於永安湃○是日駐

蹕齊爾博庫口庚申順天府府尹蔣炳奏

順天府屬各州縣被旱歉收。現今糧價雖屬平減。民間雜糧亦宜撙節。查燒鍋一項。最為耗費。例應嚴行查禁。現飭各屬實力奉行。得旨。是知道了。○是日

上行圍於英圖和洛駐蹕。○辛酉。

上詣

皇太后行幄問安。○諭此次奏請隨圍之熱河

官員兵丁等。並未支給路費。著賞佐領福當

阿大緞一疋。其餘官員各賞官緞一疋。兵丁

等各賞銀三兩。俟抵庫爾奇地方。將熱河

隨來之官員兵丁等。俱著副都統瑪爾拜帶

回。○是日

上行圍於薩達克圖口。駐蹕。翌日如之。○壬

戌。

世宗憲皇帝忌辰。遣官祭

泰陵。○戶部議准。閩浙總督馬爾泰疏稱。江南

吳縣商民游仲謀等八十二人。因在中洋遭

風。飄至琉球國地方。彼處官員多方援救。安

頓養贍。復遣通事蔡宏謨等護送來閩。足徵

遠藩愛戴之忱。現在員役人等除照例安插

廩給外。並請酌賞緞紗布疋。其解送船隻亦

為驗勘修葺從之。○賑貸湖北宜城長樂二

縣。並荊州右衛本年續被水災飢民。○以翰

林院侍讀學士赫瞻為太僕寺卿。以鑲白旗

護軍叅領鄂鼐為

景陵總管。○癸亥。

上詣

皇太后行幄問安。○賜哈瑪爾上行走之公琳

沁達爾漢侍衛塔布囊及官員兵丁等銀幣

有差。○諭軍機大臣等。朕聞江南徐州一帶

被水歉收。現在貧民多有行至河南之商邱

虞城山東之曹單等縣地方謀食者。從前尹

繼善奏下江之淮徐海所屬各州縣低窪地

土被淹。現今確查撫恤等語。經朕批諭被災

之處。加意撫恤。毋致小民失所。今該處乏食

貧民。流移四出。尹繼善身任地方。何未據實

奏聞可寄信詢問令其將該處實在情形及如何辦理安輯之處即速具奏尋奏徐州一帶自七月望後續因豫東等省上游水發黃河驟漲以致銅山蕭縣碭山等縣同時被淹臣即飛飭府縣將被水貧民先行撫恤安頓但地方猝遭水災民居衝塌遂有行至附近之商邱虞城曹單等縣謀食者現聞本地加意撫綏陸續回里其有未回者並咨豫東三省送令回籍一體入賑再上下江被水各屬輕重不等臣與兩撫臣悉心籌辦先將被災較重之處賑一月口糧再酌定加賑月分多寡衝塌房屋照例給銀修葺目下正當種麥之期其涸出地畝並借給籽種得旨果如此實力辦理可以稍救災黎矣是日

上行圍於池老圖博勒齊爾駐蹕 甲子

上詣

皇太后行轅問安 總督倉場戶部侍郎覺羅吳拜奏今年北河水小橫淺頗多自榆林莊

至蔡村一帶河道因北風正作河水日消各幫回空船隻行走甚艱若不竭力疏濬恐誤新漕兌限現飭沿河汛弁多雇人夫將橫淺處所作速挑挖務令幫船及早出關奏入報聞是日

上行圍於庫爾奇呼駐蹕 乙丑

上詣

皇太后行轅問安 遣官祭賢良祠 是日駐蹕尚岡河 丙寅諭曰三旗牧廠盈餘牛十九隻羊七千二百七十八隻商都達卜遜諾爾牧廠盈餘馬三百四十一匹著賞給隨圍之王公大臣官員兵丁太監併蒙古王額駙台吉及察哈爾官員兵丁等其如何賞給之處交總理行營事務王大臣酌量辦理戶部議准貴州總督兼管巡撫事張廣泗疏稱黔省每年辦運京局及川黔兩省鉛觔為數甚多各處鉛廠開採日久出鉛不敷查大定府屬之保木底產有鉛礦現已試採請照

蓮花廠之例。每鉛百觔。抽課二十觔。即令水城通判總理廠務。設押運人役。照例支給養廉工食。至收買餘鉛。向例每百觔給價一兩三錢。竈民工本尚虧。請酌增一錢。從之。○浙江巡撫常安疏報。臨安歸安慈谿定海西安等縣。乾隆九年。懇熟田地。山蕩一百三十頃三十六畝有奇。○補行議敘出征西藏鎮海堡兩處軍功之鑲藍旗蒙古佐領巴圖孟可。授雲騎尉如例。○賑貸甘肅安定會寧靖遠等三縣。本年旱災。飢民。○賑廣東電白吳川二縣。本年旱災。海豐縣蟲災。及南澳廳所轄隆深二澳風災。飢民。○是日駐蹕多倫諾爾。至戊辰。皆如之。○丁卯秋分夕。

月於西郊。遣理郡王弘暘。恭代行禮。○上詣

皇太后行幄問安。○賜王大臣蒙古王額駙台吉等食。○諭。向來蠲免錢糧之例。止係地丁。而糧草不在其內。朕前降旨。將乾隆丙寅年

直省應徵錢糧。通行蠲免。惟是甘省地處邊隅。所徵地丁少而糧草多。其臨邊各屬。丙寅年應徵番糧一萬二千六百餘石。草五百餘束。著格外加恩。一體蠲免。再河東河西額徵屯糧草束。亦著蠲免三分之一。該督撫善為辦理。俾民番均霑實惠。該部即遵諭行。○又諭。朕自起鑒以來。護軍統領管轄各處。未能整肅。一切差事。甚屬懈怠。護軍統領有約束守衛之責。公恒祿並不以管轄為事。理應即予議處。第念尚係初任。著加恩寬免。嗣後若仍不改悔。朕決不姑貸。色楞人本平庸。不勝護軍統領之任。著調補鑲黃旗蒙古副都統。所遺鑲紅旗護軍統領員缺。著塔爾瑪善補授。○又諭。此次察哈爾八旗。在圍執事之官員兵丁等。應如何賞賚之處。著交總理行營事務王大臣等議奏。尋奏。自張家口至庫爾奇呼等處。蒙古臺站。雖調用張家口獨石口二處驛馬。而察哈爾鑲黃旗亦派有

官員兵丁等看守馬匹傳遞文報請賞官員等彭級各一疋兵丁等毛青布各二疋從之
又諭朕至宣化將閱鎮標官兵著公哈達哈尚書班第先期前往豫備辦理○以廣東廣州將軍標中軍副將袁政為廣東左翼總兵官 戊辰遣官祭黑龍潭
昭靈沛澤龍王之神○已已

上詣

皇太后行幄問安 是日駐蹕古爾班庫德爾

是月直隸總督那蘇圖奏直屬被旱各州縣業經節次得雨者秋禾可望有收惟宣化萬全龍門懷來西寧懷安延慶保安等八州縣及延慶衛已成偏災現飭該管道府查辦賑恤得旨所奏俱悉宣化一帶朕令開泰前往平糶卿應辦事件俟有頭緒亦可前往就近查辦更妥 又奏直隸被旱成災各屬除宣化等八州縣延慶衛外又有慶雲贊皇威縣故城臨城高邑等六縣臣現將賑借事宜

豫為籌酌擬於本月二十日前赴張家口接駕沿途查勘情形並與開泰面商賑恤諸務得旨所奏俱悉開泰奏摺中曾批諭查辦之法卿其詢彼一同妥辦○又奏本年被災各屬除宣化等十四州縣及延慶衛外其昌平密雲三河獻縣鹽山滄州鉅鹿蔚州蔚縣赤城亦續報有成災村莊一切賑恤糶借及蠲緩各事宜俱遵照原議分別輕重辦理得旨所奏俱悉○直隸提督保祝奏密雲古北一帶平糶事宜命臣督率料理臣於張三營叩送鑾輿後趕緊回署沿途察看近日情形自七月後兩次得雨晚禾秋成可望兼之平糶糧價漸減得旨看此情形自熱河至張三營現有平糶小民得以接濟而隨行衆人亦可免昂價食米之患且兩次得雨晚田可望薄收是無可辦之事矣朕所慮者兩間房至要亭一帶經過時見晚田將萎恐得雨亦無及似應即為平糶以安民心汝應即回古北口

查辦為妥。此處之事。交恒文可也。○又奏臣遵旨即回古北酌辦平糶。查自密雲以至古北相隔百里。應分三處出糶。今設密雲一處。再於要亭相去八里之石匣城設立一處。古北城設立一處。至兩間房去古北甚近。且民戶亦屬無多。即令赴古北糶買。其無力貧民不能糶買者。地方官業已請賑。不須借給。得旨所奏俱悉。○又奏臣前因熱河停止平糶。隨照會熱河道富勒赫確查是否可停。今據覆稱該處停糶後米價未增。且秋成不遠。無須再糶。至密雲古北一帶。將來新穀登場。糧價日減。其平糶亦可停止。得旨所奏俱悉。朕至宣化將閱鎮標武備。汝等其豫為料理。○署兩江總督協辦河務尹繼善奏黃河南岸陳家浦隄工。因秋汎漫溢。坐墊隄身。淹損民居。兵舍糧田。灘地蘆蕩鹽場。約數十處。現已查明賑恤。仍俟水退後。助給蓋屋銀兩。再上江之鳳。潁。泗。下江之淮。徐。海。夏秋兩被水災。

均經先後具奏。旋於七月半後。黃水盛長。下江之山陽。清河。安東。桃源。海州。沐陽。銅山。蕭縣。碭山。沛縣。邳州。宿遷。睢寧等州縣沿河低窪地畝。續被水淹。其上江鳳。潁等屬。亦因七月內淮河泛漲。前經被災之鳳陽。懷遠。鳳臺。虹縣。宿州。靈璧。臨淮。阜陽。潁上。泗州等州縣。秋田又被淹浸。更有前未被災之合肥。亳州。霍邱。太和。廣德。建平。滁州。全椒。和州。含山等處。亦被災輕重不等。臣與兩撫臣委員確勘。分別賑撫。得旨所奏俱悉。一切賑恤之務。應竭力綢繆。督率屬員。加意妥協為之。○又奏海洋內島嶼甚多。巡哨必須周密。查下江之蘇。松。均係邊海要區。而崇明尤為全省門戶。自崇明出高廖二嘴。即為外洋。大羊山屹峙於中。其北則小羊山。為江浙兩省分轄之處。每年派撥弁兵。坐駕戰船。春秋兩次出巡。立法已備。然出口之高廖二嘴。名曰匯頭。距崇明三百餘里。暗伏水中。極稱危險。兼之風信。

不常將弁畏難規避未免停泊日多請嗣後出哨船隻如遇有異常颶逆自不得不守口停泊倘風信本順而將弁任意偷安巡查不力者即行嚴叅再小羊山地方江浙兩省商船漁船盡泊於此在山巖之下搭蓋蘆蓬其中奸良莫辨而巡洋烏船因船大身重不能收泊巖內惟寄碇半洋遙望而返稽查究未親切應另設小哨船二隻挑選弁兵前往小羊山駐泊常川在彼彈壓商漁等船遇搶奪情事嚴拏解究探知某山某巖有奸匪形迹即密報巡哨將備協力搜擒俟秋底滿哨漁船進口官兵一併撤回得旨立法固屬周密行之則仍須實力耳○江蘇巡撫陳大受奏下江淮徐海三屬因六七月間雨大水漲各州縣秋禾被淹現在撫恤貧民酌借籽種并設法宣洩以便佈種二麥其有夏災地畝復被秋災者除夏災已經撫恤外今再撫恤一月得旨此事早應奏聞何遲至今日耶一切

料理須加意為之務期妥協無虞汝方可起身來京陛見至今年被災光景較之七年究竟如何速奏以慰朕懷○又奏江蘇各屬倉貯原額多不敷數雖現在淮到部咨停止採買但本年夏秋二季被災各州縣賑貸平糶動用米穀甚多若再停買補倉儲更多缺額請仍將存貯平糶價銀陸續酌買得旨是應因時辦理者○漕運總督顧琮奏阜寧縣陳家浦漫工處所臣前往查勘地在雲梯關迤下五十餘里黃河尾閘逼近海口而陳家浦以下十餘里向無隄工多係蘆葦蕩地每黃河漲發任其散溢至老灘高阜之處不能漫越仍復入河歸海本年黃水過大以致漫隄過水約有百十餘丈之多若仍在此處堵閉是與水爭地費多益少臣與河臣白鍾山相度情形應於上首遠築遙隄直接老灘高處以束水勢力半功倍現在口門已經掛淤俟水落後河臣即行妥辦具奏得旨汝可謂勤

勞王事者矣。所奏俱悉。江南河道總督白鍾山奏今歲淮安各屬被水成災。業經督撫二臣查明賑恤。至陳家浦乃係阜邑近海之一隅。蕩地荒僻。居民亦屬有限。臣前於隄工坐墊時。即將被水人戶安頓撫恤得旨。淮揚經七年異漲之後。朕意數年之內。可保無虞。乃今年又復遭此。則下河之工。汝與尹繼善所辦者何事。觀汝二人。惟以取和為務。且有諱飾甚。非朕倚任之意也。此諭。亦令尹繼善知之。安徽巡撫魏定國奏。安省鳳。潁。泗。等屬及鳳宿等衛。從前被水麥田。秋禾續報被淹。臣照例查明賑恤。其廣。滁。和。等州屬間有淹漫之處。一體查辦。再被水各州縣。應徵新舊錢糧。分別停緩。並設法疏消積水。俟應種麥時。酌給籽種得旨。是。諸凡妥協撫恤。恐汝查察不能周到。須實力勉為之。○浙江巡撫常安奏。前因拏獲拐犯富大等。訊出同夥各犯姓名。臣即飭屬查拏。旋據嘉善烏程。海

寧。桐鄉。秀水。等縣先後報獲富子文。毛可奇等男婦數十餘人。并詳加研訊。除富大先經毆斃。富子文。毛可奇續報病故外。餘犯按律究治。臣不敢草率完結。亦不敢稍有瞻徇得旨。雖云未草率。然使重犯未正典刑。而先斃者三人。可云不疏忽乎。戒之。又批。仍宜速行結案。重處以快人心。○閩浙總督馬爾泰再以老病不勝封疆。奏請解任回京。得旨。覽奏。頓增懸念。今已差良醫赴閩診視矣。卿其善為調攝。尚期速痊。以慰朕懷。毋以解任為請也。○又奏。臣疾現在就痊。正需調攝。而總督事務殷繁。未能久任。請准臣來京就職得旨。覽奏欣慰之至。前奏即未准行。況今已痊可。豈有來京之理。○福建巡撫周學健奏。閩省福州。興化。泉州。福寧。延平。建寧等府。先經被旱各州縣。有七月內得雨露透者。晚田可望有收。惟霞浦。福鼎。福安。寧德。浦城。松溪等六縣。受旱較久。八月初雖經得雨。將來收

成未定。如在五分以下。即酌量分別蠲賑。至近省閩縣。侯官。長樂。福清。羅源等縣境內。間有被旱數村。與霞浦等縣相似者。應一體辦理。再漳浦縣及澎湖地方。報有被水成災之處。亦委員查勘賑恤。得旨。似此轉歉為豐。皆汝等誠心勤民所致。覽奏曷勝欣慰。其被偏災者。亦應留心撫恤之。○巡視臺灣給事中六十七等奏。臺屬秋成豐稔。米價平減。現在閩省內地。夏秋缺雨。民間恐致乏食。請飭臺郡各屬。乘時採買穀石。以備倉貯。有應運內地者。即陸續撥運。但海道艱險。非熟知風信之人。未敢輕蹈。而近年議海運者。每慮臺灣米穀。有偷漏他處之弊。不知米船在臺出口。及至廈門收口。俱係官為稽查。實無偷漏之患。得旨。所奏俱悉。又批。不知慣作弊者。皆熟知風信之人也。此處尚宜酌量。○署湖廣總督鄂彌達議覆。漢口鎮為九省通衢。商賈雲集。皆賴四川。湖南。及本省產米州縣運販資

食。及江浙商販之需。實為米糧會集之區。今撫臣晏斯盛請設市鎮社倉。查係商當等六行情願捐貯。俾得隨時減糶。以濟商民。即長遠舉行。亦無奸商囤積。致有米貴病民之處。得旨。果屬可行。汝等妥協為之可也。○又奏。湖廣幅員遼濶。而南省苗疆一帶情形。尤須親身按閱。擬於九月間前往巡視。得旨。知道了。不可虛按故事。須一切加意為之。○新授湖廣鎮筸鎮總兵官蒙應瑞謝恩。得旨。鎮筸乃苗疆要鎮。汝其實心實力。整飭營伍。和輯兵民。以綏靖地方。勉之莫忽。○山東巡撫喀爾吉善奏。臣前因滕縣知縣王爾鑑捕盜有功。奏請陞署同知知州。今王爾鑑以侵課敗露。請將臣交部治罪。得旨。知人其難。豈特汝哉。但不欺斯可耳。何罪之有。○又奏。各省額貯倉穀。現經奉到部咨。停其買補。但查東省倉貯。本不敷額。幸今歲大勢豐收。似宜相時採辦。請將濟兗東武青登萊七府屬缺額較

多之州縣動項酌買以足原額其泰沂曹缺額無多即令停買得旨所奏俱悉山西巡撫阿里衮奏晉屬曲沃翼城猗氏萬泉虞鄉解州安邑夏縣絳州聞喜垣曲絳縣等十二州縣被水成災現將乏食貧民先賑一月口糧其房屋衝塌人口淹斃者並酌給修葺殮埋銀兩得旨覽所奏賑恤之數尚覺過少不無失所之慮耶仍應加意辦理又奏晉省太原一鎮統轄十協營分布太原平陽汾州

澤州潞安蒲州等六府遼沁解絳吉陽平定等七州地方遼濶營汛星散其將弁兵丁軍容器械恐不能一律整飭臣擬親往各處巡查即據實奏聞分別勸懲得旨是當行者尚須為之以實○川陝總督公慶復奏臣於八月行至川省與撫提諸臣籌辦瞻對軍務查上下瞻對其始雖同縱屬為盜但上瞻對應襲肯朱年未及歲聞兵進勦親自繳印投誠並泣訴伊叔四朗謀奪土職願為官兵引路

進攻即其屬下不為實心出力應止誅其屬下之頑梗者而肯朱可從寬宥至下瞻對班滾與上瞻對賊首四朗勾通交接不獻賊賊情罪較重然果親出投誠亦可暫緩其死先令獻出各案賊賊有應正法者即在軍前正法再令繳出各寨軍器然後酌議安置倘敢抗違如故盡行勦滅得旨所奏俱悉獻賊彼蓋不難設詭指數人以為首犯即使在軍前正法將來徹兵之後保其不再生事耶朕以

為即使彼誠心悔過縱赦其死宜趁此兵力遷之他處使土地不為伊有方為永逸之計卿等以為何如○又奏臣前月自陝赴川行至寶雞大雨竟夜渭河漲溢淹損秋田臣恐附近各州縣窪地被滂當即委員分路查勘旋據臨河之扶風岐山郿縣武功長武興平富平盤屋三原渭南長安并甘省之隴西永昌碾伯漳縣寧遠禮縣山丹伏羌等州縣陸續詳報被水情形俱經札致陝甘撫臣等酌

辦賑恤事宜。至臣入川。察看風土。實為樂郊。但五方雜處。奸宄所在多有。臣飭地方官嚴密查拏。得旨。所奏俱悉。卿乃一路福星。其所設施。自必井井有條也。○陝西巡撫陳宏謀奏。陝省渭南。麟遊。郃陽。延長。延川。宜川。甘泉。中部。洛川。宜君等十縣。秋禾被雹損傷。現飭先行借給口糧。成災者另為辦理。但被雹尚屬一隅。通縣田禾暢茂。得旨。欣慰覽之。又批。慶復摺奏。扶風等州縣有被水者。何未奏耶。

○甘肅巡撫黃廷桂奏。肅州鎮標各營餉銀。向例按季赴蘭州關領。往返四千餘里。耗費甚多。請照安西之例。併作兩季兼支。但豫領之項。未便并給兵丁。致滋濫用。請就近貯肅州道庫。屆期散給。得旨。可行者。知道了。○署四川提督李質粹奏。臣於七月初八日。自川省起程。進勦瞻對。二十六日。行抵東俄洛地方。總統建昌鎮總兵索士弼及各路漢土官兵。亦先後齊集。隨議分作三路前進。南路由

裏塘。以抵邊多等處。係夔州協副將馬良桂統領。北路由甘孜。以抵阿斯等處。係松潘鎮總兵宋宗瑋統領。中路由沙普隆。以抵日裏等處。係總統建昌鎮總兵索士弼統領。臣駐劄東俄洛。在裏塘沙普隆兩路適中之地。離甘孜亦不甚遠。均可調度策應。得旨。瞻對若鉅而走險。捨準噶爾無可投。此處宜加意防之。并告之慶復。紀山及李繩武等。○兩廣總督策楞奏。粵東廣惠潮肇高等府及羅定一州例有渡船稅銀。前任督臣那蘇圖奏請豁免。經部議駁。今御史趙肇洙復請查照原奏。免徵奉旨。令臣議奏。臣查各屬濱河地方。義渡官渡。原無索錢之事。而前項稅銀。乃出於銀貨往來之大河船。蓋緣此等船隻充當之時。例取身家殷實甘結。凡各鎮小本鋪家。用銀置貨。類皆託其代買。孤身客販。無力雇船者。亦附搭行走。伊等停泊開越之處。皆有一定馬頭。官為稽查。以免船戶偷竊之慮。故按

戶給帖令輸稅銀若一經議革恐船隻散漫無稽沿途偷竊疎虞轉非行旅之便請仍照戶部原議遵行得旨著照所議行該部知道○又奏西省各邊綿亘千有餘里其間汎地左江鎮統轄居多該鎮總兵楊剛辦事雖為明白然每思立功塞外恐致妄生邊釁似應量為調用再簡老成持重之員鎮守其地得旨所奏是彼亦奏請陛見來京待朕酌量○新授廣州將軍錫特庫具摺謝恩得旨覽一

切效法策楞為之○貴州總督兼管巡撫事張廣泗奏逆匪夏如春供出在川夥犯八十餘名據川省咨稱先後緝獲多人然互相狡賴多不承認臣查事關逆案固不可拖累無辜亦未便任其漏網應將該犯等移解來黔以憑質審得旨所見甚是亦應速結以快人心而靖惡習○貴州威寧鎮總兵曾長治奏威寧州地方自夏徂秋雨澤霑足年穀可望豐收民情亦甚安貼得旨覽奏欣慰太平之

時莫懈武備尤汝等所宜留心也

大清高宗法天隆運至誠先覺體元立極數丈奮武孝慈神聖純皇帝實錄卷之二百四十七

大清高宗法天隆運至誠先覺體元立極敷文奮武孝慈神聖純皇帝實錄卷之二百四十八

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部以稽察院事務正黃旗滿洲都統兼管騎都尉軍功加七級隨帶加一級尋常加二級軍功紀錄一次臣履桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部主事事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十年乙丑九月庚午朔

實錄卷二百四十八

上詣

皇太后行幄問安。○總理事務王大臣等奏。前月二十七日。京師得雨霑透。晚田可望有收。秋麥亦乘時插種。現在米豆價值漸次平減。得旨。欣悅覽之。朕恭奉

皇太后已至多倫諾爾。仰蒙

上天慈祐。一路清吉平安。夜雨朝晴。諸凡妥適。

覽衆蒙古之奔走輸誠。知我

列祖之貽謀孔厚。今已迴鑾。於二十四日至圓

明園。宣化府屬雖被旱。朕命那蘇圖等加意撫恤。古所云遊豫休助者。雖不敢當。然比之晏處深宮。祇令有司料理者。所益諒不淺也。其令在京王大臣等知之。○軍機大臣等議奏。準噶爾投誠之厄魯特回子等。安插各處。賞置產等項銀。又作為額外護軍披甲。支給錢糧。原因伊等邊遠來投。加恩格外。伊等身故後。所出額外護軍等缺。若再挑取伊等子孫頂補。未免過優。查安插各處之厄魯特回子等。俱係歸入旗分佐領之人。嗣後除照例賞置產銀外。如本身已故。出有額外護軍等缺。即照理藩院所辦。選伊子息內。漢仗可觀。堪供差遣者。該管大臣酌挑本旗佐領下額缺。不准挑補額外護軍披甲。即有子息幼小。不能料理產業者。未長成以前。該管大臣派人照管。令足資養贍。再此後投誠之人。奉旨賞給額外護軍披甲者。錢糧減半支給。仍令該管大臣。不時稽查。毋致妄費。從之。兵部

侍郎辦理步軍統領事務舒赫德奏。江西會試武舉賴湘。偶因拾得物件。被捕盜兵指為偷竊。拏獲送官。隨有會試舉子多人。毆縛兵丁。將賴湘立行解脫。查賴湘事果被誣。自應靜聽審斷。乃此輩肆橫無忌。殊干法紀。若不究辦。倡首之人。何以示儆。但考試為期甚邇。逐加究訊。恐輾轉牽引。一時不能清結。於武闈大典有礙。臣暫將賴湘釋放。密訪首犯。俟闈務竣後究治。得旨。辦理殊失寬縱。即未得首犯。其賴湘豈可省釋。著將伊革去武舉。遞解還鄉。○準噶爾部人烏巴什率屬九人來降。命賞給安插如例。○是日

上行圍於額爾托昂色欽。駐蹕。○辛未。兵部侍郎開泰奏。宣屬萬全等縣復有續被霜雹之處。現經督臣那蘇圖。委員查勘。分別辦理。再萬全。宣化。懷來。延慶。四州縣皆係迴鑾時經過地方。恐米穀草豆。隨營買者既多。或致市價過昂。臣與督臣酌量情形。豫為妥辦。得旨。

覽。○是日

上行圍於多倫鄂博圖。駐蹕。○壬申。

上詣

皇太后行幄問安。○諭從前

聖祖巡幸。路經昌平。曾遣官致祭明陵。此次進口。路過昌平。應如何遣官致祭之處。著該部查例具奏。尋議遣大臣各一人。前往明代十二陵致祭。○又諭。據尹繼善奏。黃河南岸阜寧縣陳家浦隄工。因七月內水勢陡長。大溜

直射隄根。坐墊二十餘丈。漫淹官莊民地。廟灣。場竈。所有被災兵民。竈丁。現在撫恤。又銅山。蕭縣等處沿河窪地。均有被水之處。再上江之鳳。潁。等屬亦因雨水稍多。淮河泛漲。宿州。鳳陽。等州縣。秋田被淹。輕重不等。其乏食貧民。先行撫恤一月。俟勘明成災分數。分別辦理等語。上下兩江被災各屬。乏食貧民。深可廛念。該督撫其善體朕心。加意撫恤。以拯災黎。務俾安輯。此時正當開徵之期。著即將

被災各州縣。所有應徵各項錢糧。暫緩徵輸。俟查明按例辦理。淮徐經七年被災之後。雖極力賑恤。恐元氣未復。一應賑卹諸務。著該督撫即速確查。隨地隨時。善為辦理。無致一夫失所。轉瞬寒冬。窮民內有室宇坍塌。無所棲止者。尤堪軫恤。官給蓋屋銀兩。未免不敷。該督撫督率屬員。加意妥協料理。務令各有寧居。以副朕深求民瘼之意。朕思上江之鳳。潁。泗。下江之淮。徐。海。各屬。瀕臨河湖。屢遭水

高宗實錄卷二四八

五

患。自乾隆七年異漲之後。朕特遣大臣會同督河諸臣。通盤籌畫。不惜帑金。次第修舉。為奠安民生之計。意謂數年之內。可保無虞。乃尹繼善等。並未有所設施。致令今歲復遭水患。甚非倚任之意。若此番辦理災賑事宜。更不悉心妥協。則咎有攸歸矣。該部即遵諭飭行。又諭。據巡撫喀爾吉善奏。濟寧魚臺。滕縣。嶧縣。郯城。臨清。衛海豐。七州縣。衛偶被偏災。現在查明賑卹。所需賑糧。如倉貯不敷。就

近撥濟。再有不足。銀穀兼賑。每穀一石。照例折銀五錢等語。朕思被災之地。穀價必昂。災民所領折價。恐或不敷買食。著於舊例每石五錢之外。再增一錢折給。俾得從容購買。以示朕加惠災黎之意。該部即遵諭速行。○是日

上行圍於古哲諾爾。駐蹕。○癸酉。

上詣

皇太后行幄問安。○大學士等議覆雲南總督

高宗實錄卷二四八

六

張允隨奏稱。滇屬猛緬休致土司奉廷徵與承襲之次子奉欽詔等在伊所管境內。肆意苛虐。又勾通緬莽。潛蓄異圖。現據猛緬五十村寨土民波巖遮耐等呈請改土歸流。似應俯順民情。改設流官等語。查土司奉廷徵父子虐民藐法。自不可仍令保有土宇。但荒遠苗民性情難馴。恐改流之後。或有管轄不便之處。勢必又議更張。轉非慎重邊防之意。應令該督就彼地情形。悉心體訪。查明該土司

族內有無為衆信服之人。可以承襲土官。抑或必應改設。始足撫輯遠民。務須逐一酌量具奏。俟到日再行定議。從之。○戶部議准浙江巡撫常安疏。稱海寧縣許村場。分給民三。竈七。新漲地畝。於乾隆六年。被潮衝決。租銀無可著追。請自乾隆六年為始。俱予豁免。從之。○浙江巡撫常安疏。報鎮海。象山。太平。樂清。青田。松陽。定海。平陽。麗水。常山。西客等十一縣。乾隆九年。墾復額內荒缺民竈屯田地。山。蕩。一百五十九頃三十六畝有奇。招回人丁二百七十八口。○是日

上行圍於塔奔陀羅海。駐蹕。○甲戌。

上駐蹕烏蘭諾爾。○乙亥。

上詣

皇太后行幄問安。○諭軍機大臣等。據內務府奏。被災官莊坐落地方。永清。新城。固安。霸州。涿水。易州。青縣。交河。東安。武清。天津。定興。懷柔。宛平。大興。等州縣。俱有被旱被雹之處。以

上各州縣。從前那蘇圖。兩次奏報被災摺內。未經奏及。或係地方官尚未詳報。或係另有籌辦之處。抑或出於莊頭等之捏報乎。可寄信詢問。向來內務府派員查勘。祇屬具文。朕思查辦災荒。全在地方有司。其莊頭等所報實與不實。該州縣官果能確查與否。著那蘇圖。留心稽察。據實奏聞。尋奏。直隸官莊地畝。皆與民地毗連。如果官莊被災。例應報明地方官。確查分數詳報。由臣衙門移咨戶部。轉

咨內務府。委員會同地方官查辦。倘官莊所報不實。地方官必不敢為轉詳。今內務府奏報各州縣官莊被災被雹之處。內除東安。懷柔。二縣。未經報早外。其永清等十三州縣。夏麥被旱歉收。經前督臣題報在案。又永清。天津。二縣。七月內有被雹村莊。亦據布政使詳明酌借籽種在案。至各處秋禾。並未被旱。是以臣兩次報災摺內。亦未奏及官莊所報。想係二麥而非秋禾。但東安。懷柔。本年麥收約

計六七分不等。並無民地官莊題報旱災之案。查官莊既由地方官勘報。自應詳加查核。不可稍有草率。臣嗣後益當留心稽察。以杜捏飾。得旨。此事內務府尚未派員往察。卿可於內務府司員察辦時。令有司體察有無情弊。據實奏聞可也。○又諭此次入哨。自圍場至張家口。安設臺站。俱用獨石口。張家口。兩處驛站官員所管馬匹。伊等俱各早為豫備。馳遞本報無誤。辦理甚屬妥協。所有管理獨石口驛站郎中阿拉卜坦。張家口驛站員外郎長興。俱著以應陞之缺記名。○又諭此次隨圍兵丁一千八百名。內有常隨排行之兵丁三百名。每人賞銀四兩。其餘兵丁一千五百名。及墨爾根上行走兵丁七十二名。每人賞銀三兩。常在卡守護兵丁一千一百十五名。每人賞銀四兩。至在哈瑪爾行走之策凌達什及達什琳沁等三十二人。俱賞官緞一匹。○戶部議准。貴州總督兼管巡撫事張廣

泗疏稱。黔省丹江所屬濟川地方。出產鉛礦。可以開採。請照例二八抽課。變價解部。至掛丁等處。僻處苗地。雜徑甚多。請添設巡役稽查。其人役工食等項。照例支給。從之。○兵部等部議准。鑲白旗漢軍都統永興奏稱。八旗另戶丁壯。該管各官及領催族長等。必須嚴加約束。近查各旗。因瘋疫閉汙。走失迷蹤者。一年之內。多至一百四五十人。緝獲者甚少。請嗣後八旗因病逃失之人。如一年內不能拏獲者。將該管都統。副都統。叅佐領。驍騎校。及領催族長等。照外省駐防逃人之例。分別處分。或實係逃走。捏稱患病逃失者。將該管各官。照新定督捕例議處。至逃失人等。所過地方。及存留處所。一經拏獲。並將各處失察之員議處。再八旗服役家丁。或拐帶財物潛逃。亦請通行順天府。五城。及各處地方官。加意查緝。從之。○又議覆。雲南曲尋鎮總兵田玉奏稱。向例各鎮協營逃兵。逾限不獲者。議

處該管員弁。立法至為嚴密。但員弁規避處分。每將逃兵捏作玩法革伍。久假辭退等項名色。具報開糧。遂不復行緝拏。以致狡卒效尤。動輒逃走。請嗣後寬免處分。勒限嚴緝等語。查兵丁私逃。該管員弁若無處分。必不實力緝獲。且定例亦不便遽更。惟逃兵詭報開糧之處。恐不特雲南一省為然。舊例未經議及。請通行各省督撫。提鎮查明此等情弊。即將該員弁照沉匿不報例議處。從之。○賑貸

河南永城鹿邑夏邑商邱柘城等五縣水災

飢民。○是日

上行圍於扎瑪克圖。駐蹕。○丙子。

上詣

皇太后行幄問安。○是日

上行圍於陀爾呼。駐蹕。○丁丑。

上詣

皇太后行幄問安。○戶部等部議覆。川陝總督公慶復奏稱。哈密管糧文員。舊例兩年更換。

不特交盤折耗殊多。而辦理屯田。屢易生手。難收就熟駕輕之效。請嗣後五年一次更換。應如所請。至該處管糧文員。前因清理軍需。餘糧甚多。兼以駐劄防兵。收放兵糧。事務殷繁。是以議派二員經管。今貯糧較少。防兵撤回。應令該督將管糧文員內。可否減派一員之處。酌量議題。從之。○刑部議准。禮部侍郎秦蕙田奏稱。民志之定。在於上下有辨。近日奸民慢抗官長。有因地方偏災。發賑稍遲。即搶奪村市。喧鬧公堂者。有因審斷詞訟。偶涉偏徇。即糾眾罷市。甚至凌辱長官者。而無識之州縣。恐地方滋事。曲意優容。又或頑佃抗租。欺慢田主。有司聽其刁脫。其士民涉訟事件。或不明究是非。故直鄉民而不直紳士。若此之類。皆足以長刁風。雖舊例載有明文。而窮鄉僻壤。或未共知。請勅令直省督撫。嚴飭所屬。遇此等情事。毋稍寬縱。並摘錄緊要條例刊諭。從之。○免浙江海寧縣被朝銜卅錢

江地畝無徵額賦。○旌表守正捐軀之山東定陶縣民李來妻范氏。○是日駐蹕濟甯噶朗圖他拉。翌日亦如之。○戊寅。

上詣

皇太后行幄問安。○賜蒙古諸王食。○諭軍機

大臣等。朕聞張家口以內一帶地方。草束短少。其價昂貴。此次迴鑾經過。隨從人衆。價必倍昂。可寄信那蘇圖。令其速委幹員。於草束豐裕之所。籌酌運往。俾官兵人等。易於購買。

平定縣志

一

再柴薪亦所必需。凡駐蹕之處。並著多為運貯。以備買用。○又諭曰。旺扎勒之母溘逝。寄諭大學士訥親。派在京散秩大臣一員。侍衛十員。備帶茶酒。前往奠祭。並賞給旺扎勒銀五百兩。令其料理伊母喪事。○刑部議覆。太常寺少卿鄒一桂奏稱。監獄重犯。雖防範不可不嚴。然律載獄具全圖。自有定式。近因日久弊生。禁卒人等。創立非刑。凡遇囚徒。無分多寡。概令排卧一頭於籐籬中。橫穿長木鎖。

逼兩頭。壓住手足。獄囚緣此斃命者不少。甚非欽恤之意。請飭直省督撫。嚴行查禁。如有仍用穿木束囚。並各項非法者。即照例治罪。從之。○己卯。

上駐蹕哈木呼諾爾。○庚辰。

上詣

皇太后行幄問安。○諭安徽省鳳。潁。泗。等屬乾

平定縣志

一

隆六七兩年。被災農民。借給籽種口糧。朕曾降旨。分年緩徵。今雖屆催納之期。第念該處當積歉之餘。今歲夏秋。又復被水。若令按期輸納。小民未免拮据。著將鳳。潁。泗。所屬六七兩年。分民借未完米麥銀兩。緩至丙寅。戊辰兩年。麥後分完。俾民力得以紓徐。輸將不致竭蹶。以示朕軫恤閭閻之意。該部即遵諭速行。○諭軍機大臣等。朕覽此次稽察月摺。吏部戶部。各未完事件甚多。何以完結如此之速。戶二部。未完事件甚多。何以完結如此之速。可寄信大學士張廷玉。訥親。令其將上次月

摺。逐一查對。並將如何完結之處。具摺奏聞。

○戶部議准。直隸總督那蘇圖奏稱。直屬被旱之七十六州。縣衛廳現據各屬分別詳報。內惟故城。慶雲。贊皇。臨城。高邑。威縣。宣化。延慶。保安。懷安。西寧。萬全。龍門。懷來。等十四州縣。及延慶衛。災象已成。臣酌辦賑卹事宜。請將被災戶口。先行急賑一月。再查極次貧民。分別加賑。即動支各處倉糧。及派撥領運米石。如有不敷。再在隣近州縣撥給。至宣化府屬倉貯不足濟用。其加賑請兼用銀穀米。並令各屬酌借貧民麥種工本。以資播種。有應蠲應緩錢糧。勘明分數題請。其被災旗戶。令地方官會同旗莊官查勘。一例賑濟。再續報被雹。被水。被霜。各州縣。已經成災者。均照例查辦。得旨。依議速行。○正黃旗漢軍副都統趙國政。乞休。允之。○旌表守正捐軀之河南封邱縣民王三盧妻翟氏。○是日駐蹕十八里台。○辛巳。

上駐蹕隨賚廟。○壬午。

上詣

皇太后行幄問安。○賜張家口副將以下各官及兵丁等銀幣有差。○戶部議准。貴州總督兼管巡撫事張廣泗疏稱。湖南。郴。桂。二廠每年所出鉛。除該省鼓鑄外。尚餘商鉛。請照湖南布政使長柱原議。自乾隆十年為始。每年在。郴。桂。二廠收買白鉛十萬觔。黑鉛二十萬觔。運京。其黔省上下兩運。每次減辦白鉛五萬觔。黑鉛十萬觔。俾威寧一路。既得從容辦理。而餘出馱腳。亦可雇給滇省運銅。從之。○免陝西。長安。咸寧等縣乾隆五七年。被水衝決民屯地畝。額徵銀一千一百一十兩有奇。糧一千一百十九石有奇。○命兵部侍郎歸宣光。知武舉。內閣學士涂逢震為武會試正考官。詹事府詹事沈德潛為副考官。○是日駐蹕轄堡。○癸未。

上詣

皇太后行幄問安。○是日駐蹕宣化府。翌日亦如之。○甲申。

上閱宣化鎮兵。賜總兵以下各官兵等銀幣有

差。○賜隨從王公大臣食。○遣官祭

歷代帝王廟。○遣官祭

都城隍之神。

實錄卷二百四十八

六

大清高宗法天隆運至誠先覺體元立極敷文奮武孝慈神聖純皇帝實錄卷之二百四十八

大清高宗法天隆運至誠先覺體元立極敷文奮武孝慈神聖純皇帝實錄卷之二百四十九

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲部總管翼領都尉軍功加七級隨帶加一級尋常加二級軍功紀錄一次臣慶桂

總管官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書總管翼領滿洲部總管功紀錄五次

尋常紀錄十四次臣陸煥經筵講官太子少保工部尚書紀錄六次臣曹振鏞等奉

敕修

乾隆十年乙丑九月乙酉諭前因畿輔地方

實錄卷二百四十九

一

多缺雨之處恐黑豆收成歉薄不敷京師餽養馬駝之用曾降旨令在京總理王大臣等豫為籌畫河南山東素稱產豆之鄉或可就近撥濟續據覆奏無庸豫東撥運宣化存貯豆石儘敷接濟等語今宣化一帶已經被災此項豆石應留該處備用况京師得雨之後現在豆價未為昂貴將來如有需用之處另行酌撥不必動用此項 又諭今年宣化府所屬夏秋缺雨其成災州縣已據總督邵蘇

圖題明賑濟四個月。至明年二月停止。今朕回鑾經過。見該處被災頗重。邊地多寒。計來歲麥秋。尚在五六月內。恐停賑之後。小民未免乏食。其如何加賑之處。著該督留心豫為籌畫。臨時酌量情形。奏明辦理。○諭軍機大臣等。七月內。王大臣等議撥宣化豆石一事。朕已允行。今該處現經成災。且地方官亦以辦運為難。後思此處現被災。而反運豆於他處。亦非民情之願。故降旨不必動用此項。但

不知目下京師豆價如何。若價值尚平。無庸另為籌畫。如豆價昂貴。必須接濟。應如何令山東。河南撥運之處。王大臣等一面辦理。一面奏聞。○戶部議准。安徽巡撫魏定國疏稱。上江宿州鳳陽臨淮懷遠虹縣靈璧鳳臺蒙城等八州縣。鳳陽宿州二衛。本年夏麥被災。蠲賑事宜。業經分別辦理。現續被水災。請照例恤賑。有應蠲緩者。同前次彙題。其夏間借過籽種口糧。俟下年麥熟後。免息徵收。不成

災之處。亦酌借倉貯。以資接濟。得旨。依議速行。○又議准山西巡撫阿里衮議覆前任河東鹽政吉慶條奏。晉省丁銀。分別攤徵減徵。一招查各屬丁糧。分辦貧民偏累尚多。請將太原徐溝清源襄陵洪洞趙城汾西浮山岳陽靈石汾陽孝義臨晉萬泉左雲平陸聞喜鄉寧等十八縣丁銀。全數攤入地糧。交城曲沃翼城長治長子屯留襄垣潞城黎城壺關平順廣靈大同樂平夏縣等十五縣丁銀。一

半攤入地糧。寧鄉繁峙二縣。照下則徵收。餘銀攤入地糧。吉州無業窮丁。攤入地糧。其渾源和順二州縣。攤入地畝三分之一。河曲縣攤入地畝十分之一。至陽曲太原榆次祁縣徐溝清源文水大同等八州縣。屯丁徭銀。亦全數攤入屯地。此外各州縣。照舊分辦。俟明年編審之期。清查增減壯丁。秉公編徵。從之。○停徵山西曲沃翼城猗氏萬泉虞鄉解州安邑夏縣絳州聞喜垣曲絳縣等十二州縣。

本年水災額賦賑恤飢民。○命察哈爾正藍旗總管明德回京。以鑲黃旗護軍叅領雙柱為察哈爾正藍旗總管。起原任副都統清保為鑲黃旗護軍叅領。○旌表守正捐軀之河南鄧州民劉登妻賈氏。○是日駐蹕下花園。○丙戌諭軍機大臣等。上江之鳳。潁。泗。等屬下江之淮。揚。徐。海。等屬數年以來。屢被水災。乾隆七年古溝石林決口。曾命高斌前往查勘辦理。上年命大學士訥親前往查勘營伍。亦經順便查看河道。俱曾會同尹繼善。白鍾山等將應行修濬各工程。詳酌辦理。不知今年被水之處。係伊等曾查勘之處乎。或雖經查勘。尚未修理工段者乎。抑或雖經修理。仍復受患。未受實效乎。抑或從前查勘各工程。與現今衝決漫溢之處。其地不同。其水亦支分派別乎。其現在興舉各工。將來果否有益。抑仍不免將來之衝溢乎。可寄信詢問。並將今秋尹繼善。白鍾山。顧琮等奏報淮揚被水。

及陳家浦決口各摺。令二人詳閱酌議。與準泰條陳之摺。一併議奏。尋奏。臣等細閱尹繼善等奏摺。內稱阜寧縣陳家浦隄工。七月間黃河驟漲。隄身坐墊。查該處地近海濱。隄外半屬葦蕩荒地。近因河流刷去外灘。直逼隄根。致被衝陷。前據河臣奏稱口門現已掛淤。俟水落後。即相機圈隄。以束水勢。第陳家浦乃數百年黃淮入海之路。今雖衝決。自應仍照舊口堵築合龍。不失老隄故迹。方為鞏固。應令河臣等加謹辦理。至徐州以上之黃河。南北兩岸。北岸蘇家山一帶。向無隄工。遇盛漲聽其漫灘宣洩。本年水勢過大。是以多被淹浸。其南岸毛城鋪一帶。據稱因洪溝河民堰坍缺。以致沿河被淹。查洪溝河上承毛城鋪減下之水。下達淮河入洪澤。從前議築議疏俱以下游規制未定。未經辦理。現在臣等議覆。準泰請開濉河一摺。交督河二臣妥辦。將來下游疏暢。洪溝等處隄堰。亦可補築。其

餘淮徐海各屬地方逼近湖河隄堰林立一有宣洩易受水患乾隆八年臣高斌於善後案內議將各屬河溝修濬原以疏通積潦今因東省蒙沂諸山連次發水猝被衝淹仍宣洩不及所致應令河臣等將舊有河溝再行挑浚其上江之鳳潁泗諸屬據奏七月內因淮河泛漲豫省之水建瓴而下秋未被淹查該處淮澮交流專藉洪澤湖為尾閘乾隆九年臣訥親議將天然壩及南關車邏等壩酌量減放并將高郵之官河通泰之鹽河興鹽之串場等河廣為挑挖務使洪河減下之水不致阻隔亦為上游諸州縣頻年積潦之故現今工程尚未全舉應令河臣等依照題定工段作速償辦以上各府州縣被水地方有臣等曾經查勘者亦有未及偏閱者至一切工程有彼時相度毋庸議建者亦有曾經議建尚未興工者並有業已修建仍復受患與受患而非修建之地者總之河湖交會之區

流猛汎急即有工程亦難使一勞永逸全不受患惟在司河者度其被患之由豫籌弭患之策遇有險要臨時再行相機補救請將臣等酌議應行修築各事宜交與總督尹繼善總河白鍾山酌量情形辦理得旨依議速行又議奏廣東巡撫準泰請開濰河一摺查濰河二股俱發源河南一自永城一自夏邑至濰溪口會毛城舖減下之水由苻離集灰谷堆入五湖再由小河口下達安河滙歸洪澤湖紆迴數百餘里經江南蕭宿靈虹等州縣即古所謂浪蕩渠也濰溪口以上本係清流自會毛城舖將溝等河減下之黃水濁沙停蓄每易淤墊臣高斌曾於總河任內將五湖上下之燕子口謝家溝等處俱行挑浚乾隆七年又經大學士陳世倌等奏將宿靈虹等處通濰溝渠疏濬以消積潦九年臣訥親至毛城舖勘視洪溝將溝等河與督河二臣商及迤下一帶河道原議俟洪湖下游規制一

定次第挑濬。并擬於兩旁增築子埝。以防漲溢。今巡撫準泰。因在途次目擊情形。奏請急為開濬。應如所奏。濰河經由之處。凡河身淤淺窄狹者。令該督等。委員勘估。速挑。其應作何分員管轄。及每年歲修之處。俱交與尹繼善。會同白鍾山。詳酌妥議。得旨。依議。速行。○是日

上行圍於沙城。駐蹕。○丁亥。

上詣

皇太后行幄問安。○停徵山東濟寧。滕縣。嶧縣。魚臺。郯城。等五州縣。及臨清衛水災。海豐縣旱災。額賦賑貸飢民。○是日駐蹕懷來縣。○戊子。

上詣

皇太后行幄問安。○諭自十八里台站。留令在後行走之官兵等。不必隨赴湯泉。著統領大臣。就近帶領進京。○是日駐蹕岔道。○己丑。

上詣

皇太后行幄問安。○閩浙總督馬爾泰奏。閩省內地九府二州屬。丙寅年額徵錢糧。現經全數蠲免。惟臺屬一廳四縣地畝。向係編徵粟穀。每年徵穀一十六萬九千五百餘石。撥支內地。及臺澎兵糧之需。與通省地畝糧銀。同係正供。請一體蠲免。以惠海外民番。其各處額支兵糧。雖有臺郡節年積存穀。可敷動撥。但海外重地。貯備尤宜充裕。未便全數撥供。請將內地應支戍臺班兵春米。督標提標金門。廈門。閩安等各營兵米。在各營就近府廳州縣。新捐監穀內碾支。其臺澎二處兵糧。即動支臺郡積存穀。得旨。有旨諭部。餘依議。○諭閩省丙寅年地丁錢糧。已全行蠲免。惟是臺灣府屬一廳四縣地畝額糧。向不編徵銀兩。歷係徵收粟穀。今內地各郡既通行蠲免。而臺屬地畝。因其編徵本色。不得一體邀免。非朕普徧加恩之意。著將臺灣府屬一廳四縣丙寅年額徵供粟一十六萬餘石。全數蠲

免該部即遵諭行。是日駐蹕薛山。庚寅上詣

皇太后行宮問安。吏部議准巡視臺灣給事中六十七等奏稱各省州縣地方新例令該管道府按李巡查臺郡遠隔重洋計地二千里一應錢糧倉庫刑名事件俱歸道府管理若令按李出巡以二千里之廣非月餘不能徧及必致曠廢公事請仍照舊例一年內臣等與道府各巡一次其直省道府有似此不能按李巡查者該督撫據實直陳酌議從之。戶部議准河南巡撫碩色疏稱鞏縣雍正十二年報墾荒地內有二頃十一畝勘係宋陵四旁餘地。郊縣雍正八年報墾旱地內有三頃六十五畝勘係宋臣蘇軾蘇轍護墳餘地不便仍行耕種其原報升科銀米併請豁免陵旁墳旁餘地庶資遮護從之。兵部以武會試中額請得旨這考試漢軍取中六名直隸取中十三名陝西取中十四名山

西取中十五名河南取中六名四川取中四名江南取中三名浙江取中六名山東取中三名湖南取中二名湖北取中二名福建取中七名廣東取中七名廣西取中三名雲南取中三名貴州取中二名江西武舉有毆差之事今科著停其取中餘依議。是日駐蹕溫泉至壬辰皆如之。辛卯戶部議覆江蘇巡撫陳大受疏稱清河桃源安東邳州睢寧海州沐陽贛榆等八州縣及大河衛夏災田畝秋禾續被水淹現將極貧之民加意撫恤其夏災應蠲錢糧統歸秋災案內辦理等語查各屬夏災分數未便歸併秋災應令該撫先行勘明夏災田畝分晰報部其應蠲錢糧再於秋災案內一併聲明具題得旨依議速行。壬辰

上詣

皇太后行宮問安。諭據熊學鵬摺內所奏九卿秋審山東河南二省強姦傷人四案情同

罪異之處。觀之其言似屬近理。但所稱盛宰汪由敦堅執不聽等語。盛宰汪由敦職司法紀。其堅執不聽。亦必另有情節。著交大學士將秋審冊內此四條詳加覈對。並傳盛宰汪由敦詢問明白具奏。至伊所奏請勅下九卿將本年秋審凡屬姦情案內。皆量其情節輕重。一律再加確覈等語。不知秋審為民命攸關。朕所慎重。臨時自必與大學士該部商確再三。然後勾決。且此際辦理將已告竣。設如彼言必致過時。所見殊屬迂謬。著飭行。○總理事務王大臣等議奏。京師豆價目下增減不一。細察情形。緣各鄉收穫未盡上市。即豫東三省商販亦未到京。是以豆價增減難定。臣等通盤籌酌。雖宣化屯豆奉旨停運。而京倉存貯黑豆二十三萬六千餘石。除各處支給外。尚餘三萬六千餘石。即市價高昂。尚足資平糶。毋庸另為籌撥。得旨。寄信碩色。○又諭朕覽王大學士等奏。現在京倉存貯黑豆。

除將來各處供支外。僅餘三萬餘石。似覺未為充裕。京師需用黑豆之處甚多。恐豆價一時增長。所存三萬餘石。不足以平市價。今歲東省間有歉收之處。毋庸撥濟。至河南通省收成。頗稱豐稔。可傳旨大學士張廷玉。訥親寄信碩色。酌量該處情形。如合計運價。每石在一兩以內。酌撥三四萬石。或五萬石。運貯京倉。以備平糶之用。令其一面辦理。一面奏聞。若統算豆價運費。為數過多。難以平糶。亦著據實具奏。○以一等男李思忠曾孫李周德。照例降襲三等男爵。○癸巳。

上迴鑾奉

皇太后居暢春園。

上幸圓明園。○甲午。實授鄂彌達為湖廣總督。

德敏為荊州將軍。○乙未。

上詣暢春園問

皇太后安。○詣

大高殿行禮。○還宮。○諭據寧古塔將軍巴凌阿

奏稱南海之雅蘭西楞德克登伊烏蘇里等處現議派遣官兵查拏匪一事因由部覆奏咨到較遲本年不及辦理俟明年四月再令起程前往等語朕已交部覈議但思此事原因前任將軍及巴凌阿等俱未實心辦理是以特降諭旨交伊等詳悉籌畫巴凌阿自應遵奉朕旨一面議奏一面即行辦理乃耽延稽遲以致違逾時日而轉藉口因候部咨遲誤又及一年殊屬非是著嚴行申飭○大學士公訥親奏寧古塔將軍巴凌阿奏稱副都統烏察喇年已六十八歲人本昏庸辦事未能明晰近更精力衰邁或令原品休致或調別任請旨遵行得旨吉林副都統烏察喇著來京陛見其員缺著嵩阿禮調補○賑兩淮泰州屬廟灣場水災竈戶緩徵鹽課○丙申。

孝慈高皇后忌辰遣官祭

福陵○兩廣總督策楞疏報廣惠潮肇高廉瓊

嘉八府州屬首墾田地一百三十一頃○免廣西鬱林州雍正十三年報墾不熟旱地額賦○是日起

上以孟冬享

太廟齋戒三日○丁酉諭本日御史李清芳奏稱今年秋審情實人犯較多於前或經上年緩決今復改入情實者或經二次三次四次緩決亦有改為情實者又有本應立決之犯勅令九卿議覆改為緩決今亦改為情實者此等案件皆有可生之路今改為情實乃至三十餘案恐非仰體好生之德等語李清芳所見甚屬迂謬蓋獲罪之犯法司定擬有應立決者有應監候者其監候囚犯秋審時九卿定擬有入於情實者有仍為監候者有入於可矜者此皆酌其情罪輕重以分等差至於律應立決之犯法司初次題奏時朕令九卿定議經九卿議改監候而朕俞允者乃察其情事與極惡之犯微有不同不忍即正典

刑暫緩須臾耳。非謂其罪確非情實。而可以徐徐寬宥之也。今李清芳之意。以為既經奉旨改為監候。則不應入於情實之內。糊塗已極。設如其說。將何以整倫常而弼風教乎。至於緩決衆犯。歷來頗有改擬情實者。正以明其罪之難逭。雖一時暫緩。終不免於情實。使小民知所畏懼。不敢輕蹈法網。若謂一經緩決。即係應生之人。不應復入情實。竟是永免其死矣。尚安得謂之緩乎。法律不且虛設耶。蓋緩決者。一時之恩。情實者不易之法。若其罪本應情實。祇因上年緩決。而遂屈法以用恩。則縱暴養奸。無所底止矣。夫制刑非古聖人所得已。苟求其生而不得。即聖人亦無如之何。故易於中孚。則曰。議獄緩死。於旅。則曰。明慎用刑。而不留獄。言當緩者緩。不當緩者不留也。朕每年敬慎秋典。各省案件雖多。必詳覽再四。務求其一線可原。期有合於古人服念旬時之意。所頒諭旨。明且悉矣。此意願

與諸臣共之。乃今歲秋審。外廷不無浮議。朕深知之。蓋盛安意在執法。凡有關於倫常者。必不容宥。而孫嘉淦又欲博寬大之名。一味姑容。遂至議論繁多。各持一見。彼蔑倫傷教者。固法所當誅。然亦當念克頑之民。何以至此。此皆平時教化之未洽。以致民俗之澆漓。我君臣方當自愧。豈待此時秋曹諸臣誅一二人。遂謂可以轉移惡俗。盡明刑弼教之職乎。若再一味姑容。則克頑漏網。愈以長惡。何以慰死者之心。而垂將來之戒。若云多寬一人。即可以造福。此尤婦人女子之見也。大約九卿秋審。其於彼此之間。亦無私心。但各泥意見。即不免流於一偏。不知用法貴乎平允。若先存意見。則爭執以求勝。詞愈堅而情愈遠。情愈遠而理愈失。求其平允。豈可得乎。書曰。惟齊非齊。有倫有要。求其平允也。朕心惟一虛公。毫無成見。今年秋審兩議各案。朕從九卿議者三。從孫嘉淦議者一。亦皆據理裁

斷期協於中。若謂朕之從九卿者多。而從孫嘉淦者少。意在於嚴。則又大誤矣。爰因李清芳陳奏。明頒訓諭。令九卿及內外臣工。共知之。李清芳摺並發。○諭軍機大臣等。前降旨。蠲免各直省地丁錢糧。經戶部議將各省酌留分貯銀兩。以及雜項平餘等銀。造冊詳報。以備酌抵歲需。朕思各省存餘銀兩。款項不一。雖經造報。而報部之後。該處動用。部內無由得知。并有未經報部者。可寄信與各省督撫。令其將歷年凡有存餘銀兩。詳悉查明。并將可否動用酌撥之處。分別具摺奏聞。毋得稍有遺漏。此因普施大恩。不得不從權辦理。並非為裕帑起見。著各督撫善體朕意。速為料理。○又諭大學士訥親。尚書高斌。會議河工二摺。已交總督尹繼善。總河白鍾山。會同辦理。可寄信與尹繼善。令其即起身前赴各該處。會同白鍾山。察勘情形。詳酌辦理。其各被水地方。有現在應行賑恤者。亦著尹繼善

留心查察。務期籌畫妥協。毋致災民失所。吏部議覆兩廣總督策楞疏稱。署瓊州府知府于需。試用一年期滿。題請實授等語。查于需係由知州陞署知府。試用未滿三年。與實授之例不符。應毋庸議。得旨。各省要缺。有一時不得合例之人。該督撫題請越銜補授。及陞署者。雖與定例未符。尚因地方緊要。或一時不得合例之人起見。至署理之人。辦理事務。與現任無異。自應照例俟年限滿日。題請實授。今瓊州府之于需。試用年限未滿。該督遽請實授。係有心博屬員之感激。以致違例辦理。近來似此者頗多。策楞著飭行。嗣後有似此者。即著該部隨本一併察議。具奏。○戊戌。

孝敬憲皇后忌辰。遣官祭泰陵。○賜宣化府城鎮朔樓御書扁曰神京屏翰。昌平州西門城樓御書扁曰重巖環拱。○戶部議准署廣西巡撫

託庸疏稱。桂平二府屬額徵米。除撥支本處駐防兵糧。及各州縣祀典。役倉等項米外。存剩之米。請自丙寅年為始。折色解司。以供太思。二府及鬱林州等處兵糧之用。尚有不敷。在潯州府所屬額徵本色米內折解湊支。從之。○實授尹繼善為兩江總督。慧中為陝西布政使。安圖為湖北布政使。陳惠榮為貴州布政使。王芥園為山東按察使。張坦熊為雲南按察使。○以吳士英為湖北襄陽鎮總兵官。○是月。刑部侍郎錢陳羣奏。明愍帝在位十七年。未營陵寢。歿後就葬妃園。我世祖章皇帝憫其荒涼庠隘。勅令修葺。並勒豐碑。越今八十餘年。傾圯特甚。臣昨奉差告祭。見其饗殿配屋。瓦毀垣頽。請令督臣轉飭有司。重加修葺。得旨。著照所請行。該部知道。○直隸總督那蘇圖奏。熱河一帶歉收。而八溝糧價平減。應遵旨勅項採買。運送熱河。查該處駐防兵米。歲需二萬四十石。除莊頭等額

交米外。尚不敷米七千五百石。應赴八溝照數採辦。此外又有豫備兵米二萬四千石。亦請乘時酌買。交貯熱河喀喇河屯。化育溝三處官倉。以供來年借糴之需。奏入。報聞。○直隸正定鎮總兵范毓綺奏。臣家居山右。今聖駕巡幸五臺。臣姪清沆備進羊千隻。馬十匹。以供賞賚之需。交臣代奏乞收。得旨。用不完之物。即隨營衆人。亦已徧賞矣。此奏進不受。○署兩江總督協辦河務尹繼善等議奏。安省各屬城垣。應修葺者。計三十九座。臣等酌情形之緩急。估銀數之多寡。挨次興工。先儘地當衝途。沿江沿河者修理。次及可緩工程。估計少者先修。多者後修。修竣。仍責成該管府州每年親加履勘。並飭各州縣實力保護。得旨。知道了。修理之法。照議。查察則仍汝等專責。不可謂一奏了事也。○江蘇巡撫陳大受奏。本年淮徐海各屬被災。需用賑項甚多。查安東銅山。沛縣。海州。沐陽。贛榆等州縣倉

貯向未足額。恐不敷用。現於揚州屬並隣近州縣倉糧內酌撥穀十萬石。運貯各屬。約計可敷賑糶。至所需折色銀兩。於司庫撥往淮安府銀二萬兩。徐州府五萬兩。海州三萬兩。分貯備用。得旨。所奏俱悉。所撥之項。不尚少乎。恐不敷兼賑之用。宜留心調處。無使災民失所也。江南河道總督白鍾山奏。銅沛廳屬之冰電山。對岸舊有沙灘。逼溜南趨。以致冰電山大隄外。河崖坍塌日甚。本年秋汛漲發。逼近隄根。甚為險要。臣現飭道廳等多募人夫。籌辦幫隄下埽各工。查該處近因汎水漫灘。刷有河漕。然外唇有灘阻碍。不能掣溜刷淤。而新淤嫩灘之上。人夫又不能站立。挑挖甚難。忽於八月二十日。西北風大作。溜隨風湧。掣進新刷河漕。外唇嫩灘全塌。兩崖塌寬一百五六十丈。黃河大溜直走新河。冰電山大隄之外。急溜頓消。一切工程俱可停止。不惟節省帑項甚多。而冰電山一帶險工化

平集卷二十四

三

為平穩。得旨。以手加額。欣慰覽之。此皆河神默佑。汝應虔誠致祭。以申報謝之忱。○又奏。本年黃運江湖伏秋二汛連次盛漲。各處工程險要。臣四路奔馳。竭力搶救。各工幸得保護穩固。其陳家浦漫工處所。現已掛淤獻灘。臣督率人夫。圍隄堵築。上緊贖辦。得旨。覽奏稍慰。又批。汝之勞苦。朕已知之。但恐未能提綱挈領耳。○又奏。豐碭廳屬之石林壩工。自乾隆七年堵築完固。雖今歲疊經異漲。而該工甚為平穩。惟查石林迤上之雙廟地方。毗連石林。近因河溜直射。崖岸坍塌。於石林壩工有碍。請在雙廟加築外越隄一道。直接石林壩工。并相機下埽建壩。挑溜開行。奏入。報聞。○又奏。今歲汎水盛漲。迥異常年。而各處工程搶護鑲修。幸賴辦料齊全。得以應用無誤。茲當新料登場之時。應豫為添辦。臣與淮揚淮徐兩河道悉心商酌。按各廳工程之險易。用料之多寡。乘時購運貯工。以備次年之

平集卷二十四

三

用。得旨。所奏俱悉。昔禹之治水。未聞備料建隄也。然古今時勢不同。只得行其下策耳。此而不勉。責有攸歸矣。○蘇州布政使安寧奏。淮。徐。海。被災各州縣。酌定賑恤事宜。除各屬先行撫恤一月外。請將被災最重之阜寧。清河。桃源。安東。銅山。邳州。睢寧。海州。極貧給賑四月。次貧三月。次重之山陽。鹽城。宿遷。蕭縣。沐陽。贛榆。極貧給賑三月。次貧兩月。稍輕之碭山。沛縣。極貧給賑兩月。次貧一月。其漂陽。江浦。無庸撫恤。止將極貧給賑兩月。次貧一月。地漕錢糧。分別蠲緩。此外尚有漂水。高淳。豐縣。寶應。被水村莊。雖勘不成災。亦分別借給緩徵。得旨。雖經定有章程。仍應留心查察屬員。令其妥辦。○江西巡撫塞楞額奏。江省常平倉穀。定額一百六十萬六千石。從前缺額甚多。臣陸續買補勸捐。止少七萬三十餘石。雖現在遵照部文。停止採買。而本年秋收豐稔。捐輸本色者諒不乏人。約計歲內即可

彌補足額。得旨。穀少之數。亦不為多。應趁豐收買足也。速為之。○浙江巡撫常安奏。浙屬定海。象山。太平。黃巖。四縣沿海地畝。間被潮漫。江山。嵊縣。二縣高阜之處。亦多缺雨。雖勘報歉收分數。未至成災。例不蠲賑。然民食或未免拮据。請酌借籽種。並緩徵錢糧。得旨。如所請行。○閩浙總督馬爾泰遵旨議覆福建布政使高山奏。稱臺屬義民張毓良等七百九十餘名。請照例查明考驗。分發標營。酌量錄用。其年力就衰。情愿歸田者。給地自行耕種等語。查雍正十年。逆匪吳福生案內。倡首之義民侯心富等三百七十餘名。已經議敘給劄。至續請之義民張毓良等。若一概給劄。准敘。既無差等。恐滋冒濫。伊等同一隨征立功。未可概行棄置。應令地方官將立功冊報之義民等。查明確數。即會同營員。驗送考察。一等考拔外委把總。次等分發內地各標營食糧効力。另候考拔至臺郡現在地畝。非係

有主餘埔。即屬熟番未墾。未便奪歸義民。致滋事端。得旨。如所議行。○又奏。閩省華林寺。設立普濟育嬰兩堂。一切口糧衣布費用。每年實需銀三千二百餘兩。內有原撥鹽務雜羨銀一千二百餘兩。前經奏報歸公。不便再支。所有田租生息存公等項銀。止一千八百餘兩。不敷應用。請自乾隆十年為始。每年在於鹽道庫內餘剩充公一項。撥給銀一千二百兩。得旨。如所請行。○又奏。澎湖一協。為臺厦扼要衝途。向設戰艦三十六隻。以供巡哨護送之用。現在被風擊壞二十四隻。應動項補造。該協目下乏船配駕。臣一面辦理。一面具奏。得旨。所奏俱悉。應上緊辦理者。○福建巡撫周學健奏。閩省七月得雨後。接續沾溉。所有從前被旱較甚之各縣。晚稻收成。雖不免減損。尚不至成災。得旨。所奏俱悉。又批。雖不成災。然明歲青黃不接之時。不可不預為加之意也。○湖北巡撫晏斯盛奏。市鄉竊匪。

積久漸為盜根。查律載行竊二次者。罪止杖刺。多不知戒。請於杖刺外。令帶枷懸鈴充警。三年無犯。釋除鈴枷。仍照常點卯。再三年無過。即開除卯冊。賞給資本營生。再犯照律分別絞流。至市村攫白之徒。又為竊賊之漸。而閭閻一種霸占地方。亦與攫竊相為表裏。應一併造冊立案。交巡典鄉耆保正約束稽查。如有違犯。即照本罪加倍處治。得旨。有治人。無治法。汝且試行看。○又奏。楚省收穫。惟恃早中二稻。早稻通省八分以上。中稻八九分以上。晚稻稍薄。得旨。覽奏不無少歉情形。乎。米糧價值若何。併奏以聞。○河南巡撫碩色奏。豫省向稱盜藪。頗為民害。臣到任後。查拏各案盜賊甚多。惟巨盜性魁尚未緝獲。因飭各屬挑選幹捕。分路偵訪。現經拏獲究治。得旨。汝在豫省所辦事件。此為第一可嘉。既經弋獲。慎毋令其免脫。仍應嚴訊。速行定案正法。其獲彼員役。宜加鼓勵。○河南河北鎮總

兵官丁山奏。臣屬九營。分防懷慶。開封。彰德。衛輝。河南。汝州。陝州。等處。合計秋收豐稔。民情亦甚寧貼。得旨。覽奏俱悉。河北營伍近改觀否。○山東巡撫喀爾吉善奏。登州府屬蓬萊縣。報有松榆楊柳等木料。漂流入境。臣聞高麗國地方。陡發大水。彼處艾江河檔口木料。衝決四散。因飭該縣撈獲收管。並咨會奉天將軍。府尹。查明果係高麗漂流木料。即咨明內部。行文該國差員赴領。以示柔遠之意。得旨。知體。○川陝總督公慶復奏。上瞻對應襲肯朱於官兵甫出口時。親赴建昌鎮總兵袁士弼營投誠。其所屬頭目騷達邦等亦各帶土兵。獻寨効用。經該鎮察無虛偽。當即收撫。并約北路官兵。攻勦四朗。其辦理甚為妥協。至四朗。本係上瞻對賊首。即親出投順。亦無可寬。從前提臣并總統等原議。先攻四朗。然後會合官兵。直搗下瞻對。今松潘鎮總兵宋宗璋因四朗母兄赴營投首。即為撫賞。令

伊親出。欲圖草率完結。與提臣等原議辦理互異。有誤機宜。但既經招撫。止仍將四朗收管。俟下瞻對平復後。再行嚴審定罪。其宋宗璋即令隨同中南兩路官兵。并攻下瞻對。如再不遵調度。即行揭叅。得旨。所見甚是。此乃伊等向日習慣了事之智也。但既有此芥蒂。恐諸將不合。非用兵之道。宜亟留心。○又奏。下瞻對賊番。因官兵進勦。於江東設卡隘數處。最關緊要者。係加社了卡。欲過江攻寨。必先克取此卡。隨經建昌鎮總兵袁士弼分遣中路官兵進攻。大敗賊番。得加社了卡大小三處。撥漢土官兵一百餘名防守。仍乘勝力攻。逼賊番碉樓之木魯工地方。復得正卡一處。并木魯工左右卡二處。夔州協副將馬良柱統領南路官兵。由直達地方。進攻蠻寨三處。前抵擦馬所。復連破蠻寨十五處。其各寨賊番。逃竄山箐。派兵追捕。燬賊寨九處。又分兵前攻熱泥。燬賊寨二十三處。現擬往攻擦

牙所。數日內兩路官兵連獲要卡六處。共破五十餘寨。總兵袁士弼副將馬良桂督率將弁兵丁等。俱能奮勇出力。得旨。覽奏曷勝欣慰。但始之非難。終之惟難。行間奮勇諸將士。已可嘉矣。至於經理其後。成一勞永逸之謀。斯卿等之責也。勉之。特勝輕敵。兵家所忌。亦令行間將士知之。○又奏。中路官兵在木魯工之右面溝內。攻擊賊巢。燬碉樓五座。又探知泥咱卡隆半坡箐林之中。有賊番二百餘人。奔上山梁。進兵攻捕。賊番退避碉樓。我兵三面夾攻。賊番逃入箐林。復燬碉五座。又分遣官兵。由右山梁搜捕。進攻茹色。甲納溪。兩處賊巢。而下瞻對班滾。竟敢領兵迎敵。官兵奮力夾攻。賊衆散逃深箐。現在相機進剿。其南路官兵。前往擦牙所。相度險隘。分兵進攻賊番中。左右三寨。燬右寨八處。左寨十三處。至松潘鎮總兵宋宗璋統領北路官兵。已至阿賽地方。在下瞻對交界處所。現在作何進

攻。尚未報到。得旨。覽奏欣慰。但焚殺者多。陣斬者少。尚未可謂全勝也。○又奏。陝屬寶雞等十二縣。被水情形。前經奏報在案。續據咸寧。咸陽。臨潼。鳳翔。華州。華陰。朝邑。七州縣。亦報有被淹村莊。俱經委員確勘。內惟興平。長安。寶雞。扶風。郿縣。武功。等六縣。被災較重。分別極次貧民賑恤。鳳翔。咸寧。臨潼。三縣。被災田地無多。止照例請豁錢糧。其餘各州縣。勘不成災。無庸給賑。得旨。所奏俱悉。仍應督率屬員。使無濫無遺可耳。○陝西巡撫陳宏謀奏。臣接到四川巡撫紀山密札。內稱成都奸民混貼偽示。詞語狂悖。並開有河南。江南。江西。貴州。山東。山西。陝西。四川。等省影黨姓名。寄臣查照察訪。臣思此等偽示。不過奸徒隨意捏造。煽惑里民。並非各省實有此等公此等事也。若將偽示姓名。轉諭各屬查緝。是因一荒誕無稽之帖。而各省互相傳播。以假作真。展轉煽惑。臣止將偽示與司道閱看。令其

留心訪察。未便轉諭各屬。以滋紛擾。至於稽查匪類。禁止邪教。地方官原應時刻留意。又不待有訛言偽示。方行查禁也。得旨。所見是。應實力行之。但此等事。地方官不視以為無足重輕。以致滋蔓。則張大其事。反益紛擾。故辦理得中為甚難也。勉為之。○署陝西布政使慧中奏。各關抽稅。俱有部頒則例。以昭信守。獨陝屬大慶關一處。向照日收成例抽稅。與部頒則例。互有參差。吏胥易為朦混。嗣後請照部頒則例。畫一徵收。並勒石關前。不許額外加增。得旨。告撫臣。聽其議行。○兩廣總督策楞奏。粵東各屬倉糧。所有存貯糶價。現在准到部文。停止採買。惟是瓊州一屬。遠隔重洋。所產米糧。不敷民食。且自開常平事例以來。並有全未收捐之處。又潮州南澳一鎮。四面環海。而常平開捐。從前亦未議及。若將兩處應買穀一例議停。恐緩急無以接濟。請仍行購補足額。得旨。此事又經人條奏矣。若

缺穀多而價又平。則仍宜補額。不必拘於部議也。○又奏廣東按察使張嗣昌。因病解任。臣暫委廣東糧驛道副使朱閑聖。署理臬篆。該員操守端廉。辦事靜細。如蒙調取赴京引見。准予補授。似可勝任。得旨。若調來引見。是按察使缺。又易一人矣。今有岳濬。服滿應補。已有旨諭部。將伊補授。俟彼到任後。再令朱閑聖來京引見。朕觀其人。若可以備後用。未遲也。○雲南總督兼管巡撫事張允隨奏。四川瞻對頑番。現經發兵攻勦。臣因滇省維西所屬之奔子欄。阿墩子等汛。與川省之巴塘。裏塘接壤。裏塘之外。即係瞻對地方。恐賊番急而奔竄。臣飭沿邊汛弁。董率目兵。土弁頭人等。加謹巡防。得旨。是知道了。○貴州提督丁士傑奏。黔地苗獮雜處。臣抵任二載。體訪苗疆情形。自乾隆元年。削平叛逆之後。各處設屯安堡。分營制汛。防範周密。苗民無不帖服。安化正宜加意綏戢。力為拊循。臣惟與督

臣張廣泗。協恭共濟。約束兵役。毋許滋擾。苗寨並嚴查漢奸。必使根株淨盡。得旨。貴州現有張廣泗。可減朕南顧之憂。汝但能與之和衷辦理。聽其指示。而助其不逮。則苗疆益當綏靖矣。○貴州古州鎮總兵崔傑奏。臣屬各協營地方。秋禾大勢豐收。至古州城垣。文員現已督工修築。臣嚴飭將弁等留心巡查彈壓。得旨。所奏俱悉。古州尤不比他處。更宜加慎也。

實錄卷二百九

高

大清高宗法天隆運至誠先覺體元立極敷文奮武孝慈神聖純皇帝實錄卷之二百四十九

大清高宗法天隆運至誠先覺體元立極敷文奮武孝慈神聖純皇帝實錄卷之二百五十

世宗憲皇帝純皇帝太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部院院事除舊滿洲都統世襲騎都尉軍功七級隨帶加一級尋常加二級軍功紀錄一次臣履歷

認職官經廷議官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德興經廷議官太子少保工部尚書紀錄六次臣曹振鏞等奉

數修

乾隆十年乙丑冬十月己亥朔享

實錄卷二百五

一

太廟

上親詣行禮○遣官祭

永陵

福陵

昭陵

昭西陵

孝陵

孝東陵

景陵

泰陵○遣官祭

端慧皇太子園寢○頒乾隆十一年時憲書

○順天府行鄉飲酒禮

御製補笙詩六篇命工歌之詩曰我逝南陵言陟

其岵昔我行役瞻望有父欲養無由風木何補

我逝南陵言陟其岵今我行役瞻望有母母也

倚閭歸則寧止南陵有筍擇實勺之孱孱孩提

孰與咻之慎爾溫清潔爾旨肴今爾不養日月

其恤南陵三章有白者華不污纖塵咨爾士兮宜修

實錄卷二百五十一

二

其身不修其身乃貽羞于二人有白者華婉茲

靜好咨爾女兮宜修婦道不修婦道乃貽羞于

二老白華匪玉涅而不緇白華匪蘭芬乃勝之

我擷白華載咏載思白華匪玉質玉之令白華

匪蘭臭蘭之淨我擷白華載思載咏白華四章瞻彼

阪田厥黍始華胼足胼手嗟嗟我農夫瞻彼阪

田黍華以秀胼手胼足惟勤斯殖茂華有不秀

矣秀有不實矣其雨其雨矣杲杲日出矣怒予愁

之恤矣華黍三章王庚便便東西朔南六符調變八風

節宣王庚容容朔南西東惟敬與勤百王道

同王庚廓廓東南朔先憂而憂後樂而樂

王庚恢恢南朔東西皇極孰建惟德之依典

四章澗松童童蛙黾隣兮邱草萋萋蕩青雲兮

凡百君子慎乃託身兮澗松童童澗則卑兮

邱草萋萋邱則崎兮凡百君子審乃所依兮

有崇者邱物無不遂有卓者道愚無不智資

生育德永植母替崇邱三章在上曰天在下曰地

君君臣臣父父子子在下曰地在上曰天父

實錄卷二百五十二

三

父子子君君臣臣由其儀矣物則熙矣儀其

由矣物則休矣由儀四章○諭川省民番雜處賦

糧不一有徵收米豆雜糧者有認納貝母青

裸折徵米石者其各聽營土司又有番民認

納夷賦銀兩及按例完納本折貢馬等項俱

與應徵地丁無異朕思該省丙寅年地丁錢

糧業已全數蠲免而各民番土司所輸因非

條糧不能普霑惠澤著加恩將丙寅年分寧

遠敘州二府所屬州縣衛所建昌鎮標各營

應徵米豆龍安府茂州松潘鎮營所屬番寨折徵米石雷波黃螂苗民認納本色雜糧建昌鎮標會川會鹽南坪打箭爐各廳營新撫各土司番民認納夷賦銀兩各土司完納本折貢馬等項一例蠲免以示朕優恤邊方之意該部即遵諭行○命廣西左江鎮總兵楊剛來京陛見○庚子諭軍機大臣等有人奏稱本年黃河水勢伏秋二汛異常盛漲較上年長至二尺有餘徐郡沿河一帶工程竭力

清實錄卷二百五

四

搶護幸保無虞而南岸一帶無隄之處多皆泛溢淹浸至阜寧縣陳家浦地方因隄內多係蘆蕩竈地歷來未曾下埽聞於前歲即已溜逼隄根河員僅於老隄內築越隄一道以資保護上年汎水長發老隄又已坍塌止存越隄外餘地十餘丈本年六月間雖於上游築挑水埽壩一道而老隄未經修築至七月上游埽壩衝去大溜直射越隄河臣臨工始趕集人夫料物晝夜儼築幫戩然已水深溜

急椿埽不能到底以致七月間河溜下注海潮上湧漫決二十餘丈黃河直由射陽湖雙洋子八灘三路歸海迨至八月連日大雨東北風作潮汐倒灌不能下洩入海漲漫橫溢淹浸甚廣陳家浦潰決之口門竟至二百餘丈惟望秋汎將過水勢漸退庶可及時堵塞再聞陳家浦未決之前工員四次稟請河臣發帑河臣只給銀數百兩以致緩不濟急蓋河臣係河員出身工程熟諳一切弊竇皆所深悉綜覈太甚事務不肯擔承於錢糧上尤覺過緊工員含怨俱有幸災樂禍之意等語此朕得之訪聞者其言實中白鍾山之病夫錢糧固宜節省但河工關係重大與別項工程不同現在南河需費多金即刻意節省亦屬有限若衝決一口不但小民流離可憫而賑濟之費用帑不貲較之先事豫防臨時搶護其所費孰多孰少耶白鍾山祇知慎重錢糧而不能權其事之輕重朕所不取至於河

員雖例用家道殷實之人。然孰是挾貨投効者。若過於綜覈。恐皆觀望退縮。不能與上官一心於事。無益。將此並諭白鍾山知之。○又諭各省辦理賑務情形。百出其侵漁扣剋等弊。在所不免。所以自古有救荒無善策之語。但其滋弊之處。若督撫精明查察。有司實力奉行。切切以釐剔為念。不使諸弊叢生。則胥吏少一分之侵剋。百姓即多受一分之惠澤矣。即如今年宣化一帶。被旱成災。經朕車駕臨幸。特遣大臣前往料理。自覺弊竇稍清。至各省地方遼濶。水旱時有。安能悉遣大臣前往。該督撫身任封疆。賑恤之處。諒亦不能徧歷。無遺。其有被災較重者。間一親至其境。董率稽查。弊端自然減少。閭閻得霑實惠。較之飭屬辦理。自更有益。著該部傳諭各該督撫。嗣後如有災重地方。該督撫可以親往者。即行親往查察。以恤災黎。此朕勤求民瘼本意也。楊開鼎陳奏賑務積弊摺並發。○御史范

宏賓奏本年九月戶部貴州司檔房焚燬值宿司員漫不經心。請嚴加察議。至起火緣由。安知非書吏巧詐營私。故將冊籍堆積之所。暗藏火種。焚燬滅跡。應將該司書吏確究重懲。如係有心。即治以故燒公廨之罪。得旨。如所請行。○辛丑。

上御乾清門聽政。○諭雍正十一年瓜州安插回民開墾地畝募雇渠夫借給牛價口糧例應分年交納。因邊民寒苦。尚有未經還項銀一千二百餘兩。歷年已久。貧民應當體卹。著照安西等處屯戶未完牛價口糧之例。開恩豁免。可即傳諭該督撫遵行。○兵部議准兩廣總督策楞奏稱碣石鎮總兵劉大勲患病請解任調理。得旨。劉大勲著照該督所請。准其解任就近調理。俟病痊之日。送部引見。該部知道。○工部等部議准陝西巡撫陳宏謀疏稱。同官縣陳爐鎮等處煤井兼產磺渣。除煤井仍聽民自行開採外。其磺渣令經紀自

出工本煎熬。各營並各州縣行戶。有需用硫磺處。稟明官司。給與印照。售買。經紀所領司帖。依酒行例。每年輸稅銀一兩。私售者。照例治罪。地方官分別叅處。從之。○禮部右侍郎秦蕙田。奏請給假省親。得旨。准給假。不必開缺。○以正黃旗護軍統領法珠。納為鑲藍旗蒙古副都統。○貴州總督兼管巡撫事張廣泗。疏報乾隆九年分。南龍。平越。都勻。鎮遠。思南。石阡。思州。大定。遵義。定番。開州。永寧。普安。黃平。正安。貴定。龍里。安平。安南。甕安。湄潭。荔波。施秉。清溪。畢節。桐梓。仁懷。等府州縣。陸續報墾水旱田地。共二千八百三畝。有奇。○壬寅。諭軍機大臣等。那蘇圖奏八溝建倉一案。云待部覆。及朕問戶部。何以遲延。據戶部查奏云。於上年十二月。行查直隸。本年八月。始據總督那蘇圖咨覆。今復飭查緣由。迄今尚未具題。則是此案係由該省辦理具題遲延。何得以俟部覆為詞。可寄信令其知之。○又

諭現在修理九門石路街道溝渠。所有各城甕圈廟內。有應行修補者。著一併修理。其與廟無涉。不應存留房屋。著交伊等查拆辦理。○又諭曰。廣州將軍錫特庫。副都統馬瑞圖。安華。各繕摺具奏。請安著寄諭。伊等嗣後將軍副都統等。具奏請安。著同繕一摺。副都統等如有自行具奏事件。再另繕摺具奏。○兵部議准。閩浙總督馬爾泰等。疏稱。閩省撫標弁兵。原係陸汛。現在分防之羅星壁頭等塘。汛均屬水汛。且與督標駐劄相近。請將撫標之羅星壁頭。中洲江邊。林埔。姑庵。哨門。礮臺。各塘汛弁兵。改歸督標水師營。照原派弁兵數目。分撥巡防。其督標水師營。原防之埔頭。古岐。魁岐。磕坑。肚頭。君竹。等六塘兵丁。改歸撫標。於魁岐汛。撥弁一員。帶兵十名。居中彈壓。餘照原防兵數。派撥從之。○工部等部議准。江西巡撫塞楞額。奏請修理上年蛟水衝壞之大庾縣老新兩城。護脚塚口等項。從之。

○左都御史杭奕祿以老病乞休得旨卿才品優長簡任風紀正資料理著照舊供職不必以老病求罷該部知道○兵部右侍郎開泰奏八旗拴養馬匹近聞交馬領馬時有用銀賄囑等弊請通飭嚴禁違者與受一併治罪得旨這所奏是○直隸總督那蘇圖奏直屬被旱之宛平等州縣衛廳內除宛平大興通州寧津晉州靈壽樂城邢臺沙河南和任縣永年肥鄉曲周成安邯鄲廣平雞澤磁州開州元城大名魏縣南樂清豐東明長垣棗強南宮衡水新河趙州隆平寧晉並八溝四旗等三十六州縣廳秋收六分至九分不等新舊錢糧均應開徵其節年被災之景州故城阜城交河吳橋東光慶雲鹽山滄州南皮武邑武強等十二州縣額徵錢糧統歸八九兩年被災緩徵案內分別辦理本年被災較重之宣化懷來保安延慶懷安西寧赤城龍門蔚州蔚縣萬全並延慶衛等十二州縣衛

新舊錢糧概行停緩村莊被災復大勢歉收之昌平鉅鹿威縣臨城高邑密雲等六州縣暨闔境被災歉收之熱河喀喇河屯張家口三廳所屬地方新舊錢糧亦均請停緩成災自數村至數十村不等之贊皇藁城元氏廣宗平鄉唐山內邱清河柏鄉三河等十州縣被災村莊新舊錢糧分別停緩不被災村莊仍照例開徵得旨那蘇圖所奏直隸被災各州縣衛廳應將新舊錢糧緩徵者俱著照所請行至贊皇等十州縣被災村莊亦准停緩其不被災村莊例應開徵朕思彼地既有歉收之處其隣近村莊諒亦難免拮据著加恩將不被災村莊應徵舊糧亦著緩徵以紓民力○命吏部尚書高斌察看直隸水利○以鑲黃旗漢軍叅領方天相為正紅旗漢軍副都統兵部帶領保舉總兵之湖南副將徐啟新等引見得旨徐啟新看來漢仗尚好辦事未必去得著回原任該提督

王無黨。尙舉三人亦屬過多。著飭行。○癸卯。上御太和殿視朝。文武陞轉各官謝恩。請暢春園問。

皇太后安。○幸圓明園。○諭今年上江之鳳潁泗。下江之淮徐海等屬。秋被水災。朕心軫念。切諭該督撫。董率有司。加意撫卹。蠲賑兼施。毋使窮民失所。現在該督撫遵旨悉心辦理。陸續具奏。但恐該省所貯米糧。未必充餘。明春青黃不接之時。尚須官米平糶。此時應豫為籌畫。況今年南漕輸京者甚多。著將明年上江漕糧。截留五萬石。下江漕糧。截留十萬石。以備將來賑糶之用。該部即行文該督撫遵諭行。○甲辰。戶部議覆陞任湖南巡撫蔣溥疏。稱江西運補湖南漕米十萬石。內除撥運廣西四萬石。餘六萬石。上年題明。令江西委員分運貼近水次之岳州等府縣交卸。平糶易銀。解交倉穀。不敷之安化等府廳縣衛。於秋成時。各照一米二穀。買穀十二萬石。分

貯現在時價不一。通計短銀萬餘。請將各屬尚存價銀者。秋成後。照時價儘銀買貯。不敷原派穀數。於監穀內捐足。其已墊買之臨湘沅江慈利安鄉永綏等縣廳。先將江楚等員賠補少糶米價。動支撥補。不敷酌動公項。找給查江西運楚米六萬石。原係題明照一米二穀。令各屬易穀分貯。何致缺銀萬計。遽請儘銀買貯。復將不敷穀數。於監穀捐足。并動公項找給。已買之縣廳。應令該撫楊錫紱仍遵原題。將江西運楚米六萬石。內除漂沒斛少米九百九十二石。實收米五萬九千八石。糶出價銀。通融撥給各屬。照一米二穀。易穀十一萬八千十六石。如價果不敷。准按應追各員少糶價銀數目。借支公項八百七十八兩有奇。發各屬湊買。俟少糶價銀追完歸款。至漂沒斛少之米。應易穀一千九百八十四石。原無糶價可動。應於監穀捐足。從之。○禮部議准。山西巡撫阿里衮疏。請將捐軀殉國

之明寧武總兵官諡忠武周遇吉并妻劉氏編入祀典其同時盡節之遊擊崔雲王前士呂品貴王尚慎張大選高日光及生員楊鼎勲楊鼎樞幕友廩生賈三光等九人一體從祀額設祭祀銀十兩即於寧武縣民公建祠內春秋致祭其銀於該縣地丁銀內編支從之○雲南總督兼管巡撫事張允隨疏報新平寧州文山會澤麗江景東等府州縣乾隆九年開墾成熟田共十一頃六十九畝有奇○蠲緩渾津黑河莊頭旱災租米有差○乙巳

上御洞明堂勾到雲南貴州四川情實罪犯停決雲南斬犯二人貴州斬犯三人絞犯三人四川斬犯二人絞犯二人餘七十一人予勾○諭向來冬至既屆一應秋決人犯例不行刑若遠省地方有奉到文書在冬至以後者則留至次年冬至前正法後因此等人犯盡屬凶惡罪無可緩若遲至一年之久未免別

生事端仍於奉到部文時處決但思應決諸犯既無可緩適值冬至亦須稍遲嗣後如有過期接到部文者著於冬至七日以後照例處決該部行文各督撫知之○又諭朕覽山西情實人犯冊內因賭博釀成人命之案甚多皆因疎縱賭具賭博所致該地方官豈有無處分之理著刑部查奏○又諭曰原任副都統瑪熙那圖納博吉著兵部遇便帶領引見○吏部議准河南巡撫碩色疏稱改設之

祥符永城鹿邑夏邑淮寧等五縣縣丞員缺俱屬緊要應定為要缺於通省佐雜內揀選調用祥符永城鹿邑夏邑均定為管糧水利縣丞淮寧定為水利糧鹽縣丞所需衙署確估於本年耗羨銀內支建夏邑縣丞移駐該縣會亭地方餘俱駐劄縣城從之○丙午

上詣暢春園問

皇太后安○諭軍機大臣等朕覽各省秋審招冊見山西省內因賭博致死人命者甚多此

皆平時地方官不嚴禁賭博之故若果查拏甚嚴必不至於如此可寄信與阿里衮令其督率州縣官嚴行查禁毋蹈前轍○又諭八旗拴養官馬甚關緊要昨放給隨從人員官馬俱有折給銀兩之弊此皆由平日並未用心餵養而該旗監放馬匹大員亦未能立時查出所致嗣後著交八旗都統等不時嚴察再遇朕各處巡幸放給官馬時將八旗都統副都統銜名著當月旗彙總具奏候朕閱看每旗各派大臣一員監放○戶部議准四川巡撫紀山疏報安縣德昌所應開除田地共一頃二十五畝有奇樂至邛州大邑青神縣江雷波等州縣衛首墾田地共十一頃五十畝有奇所有額賦照例分別增除從之○

丁未

上御洞明堂勾到廣東廣西情實罪犯停決廣東斬犯二人絞犯二人廣西斬犯三人餘六十二人予勾○吏部議准甘肅巡撫黃廷桂

等疏稱裁汰之甘山道地方事務既歸肅州道管轄應請添鑄整飭甘肅等處字樣關防從之○戊申大學士等議奏各省捐監收納本色行之既久半屬有名無實應請停止仍歸部收捐折色得旨依議朕從前本欲將各項捐納盡行停止後經廷議請酌留捐監一條以為士子進身之階尚屬可行是以允其所請嗣因倉儲為民食攸關復諭令本省收捐本色以備糴賑之用今鄂彌達等又請捐收折色經該部將捐監之例分別議覆蓋因各省生監以捐穀為難觀望不前者多於積貯之數無甚裨補究非便民之策不得不因地變通但朕意究以積貯為要圖各省收捐本色之例亦不必停其有願在部捐折色者亦聽如是則既無州縣胥吏之滋弊亦不阻士子上進之階矣至直隸捐款原係一時權宜之計上年因河間天津等處旱象已成一切賑濟諸事需費浩繁兼之興修水利工程

亦須濟用。乃准廷臣之議。照好善樂施之例。暫開捐款。以濟經費之不足。今該處賑務。俱已完竣。水利。工程。辦理。亦有頭緒。所有捐款。自應停止。或外省尚有赴京投捐者。遽令中止。恐有未便。其如何定限停止之處。著大學士會同該部定議具奏。○戶部等部遵旨。會議湖廣總督鄂彌達等奏。湖南城步。綏寧新闢苗疆。設立長安營。續辦善後各事宜。一長安營歲需兵米。初議令靖州。并所屬之會同。通道二縣。領銀買運臨口。交理徭州判分運長安大營。交收散給。今查老寨汛塘去長安城。往返百二十餘里。領米維艱。臨口至長安大營九十里。自臨口抵老寨汛塘亦九十里。遠近相當。運費無增。請將老寨汛塘并兵歲需月米。即令靖州理徭州判按數分運該汛。建倉貯放。其臨口抵老寨運道。如流溪至木脚小路。暨地窰木關口栗樹坳涼水井三十六峯平溪等處。均請開修。一靖州州判歲支

養廉銀二百兩。現當承辦軍糧。事冗費繁。請增給銀一百兩。看倉押運。添設民壯四名。每名歲給工食銀六兩。修理器械銀一兩。盤量兵米添設斗級一名。每年給工食銀六兩。一移駐雙江巡檢。原設阜隸二名。弓兵十名。不敷差緝。請添弓兵四名。民壯八名。一苗徭俗悍。宜令漸知禮義。請於城綏九崗并青坡司徭寨等處。各設義學。延文行兼優生員教讀。廩餼照永綏例。歲給銀十六兩。館舍將各寨絕產房屋撥給。一文武官弁兵役。巡查新疆借宿苗房。恐滋擾累。絕產房屋。除撥義學館舍外。尚有空存。將枕近路旁者。酌改公所。餘房估計變價充公。均應如所奏辦理。其請增靖州州判養廉之處。應無庸議。雙江巡檢衙門添設弓兵民壯共十二名。為數過多。未免糜冗。應令酌減從之。○以故四川中渣壩土百戶淹中之子勞丁拉哩土百戶多結朋錯之子曲仲扎什襲職。貴州楊義長官司金玉

故子幼以其弟金坪代理土務○加賑河南商邱鹿邑夏邑永城柘城等五縣本年水災飢民○已酉

上御洞明堂勾到奉天福建陝西情實罪犯停決奉天斬犯一人絞犯二人福建斬犯三人絞犯四人陝西斬犯二人絞犯二人餘七十人予勾○諭淮揚之串場等河於今年冬底築壩挑濬鹽舟不能行走其丙寅新綱引鹽應豫先趕運四十萬引以資分發接濟第各商既有額辦之引又有趕運之鹽一時完課未免竭蹶著加恩將豫運新鹽其請單呈綱兩次應納錢糧俱緩至加餉時一併完納再該商等豫運鹽餉堆積垣所不無滷耗著照乾隆二年之例凡本年十二月三十日以前到所新鹽每引加耗二十觔俾商力得以紓徐該部即行文該鹽政知之○又諭朕覽御史馮元欽所奏甚屬純繆國家經理庶政事貴持平廷臣集議自宜一秉公心各屏偏

私然亦無取於一倡百和諾諾唯唯故即偶有參差適成公正至於刑名案件法司會擬更宜再三詳慎公同參覈以求情理之當或所見不同正不妨彼此商確歸於平允間有立意各殊兩議具奏者朕則擇其善者而從之若有負氣相爭立言失體者朕必加以申飭乃馮元欽奏稱部臣剖白之言近於詆訶尚憶張照為尚書時於議稿中偶有一二逞其筆鋒迅利失當過中之語朕曾訓誡之近則無是也至稱各持是非竟成水火分門別戶儼然敵讎不可不防其弊等語在馮元欽之意以為防微杜漸而不知伊正蹈分門別戶之見故不覺輕出其口將來若有黨同伐異之事即自此語開之也馮元欽著嚴飭行朕以廣開言路為心故寬待言官以收進言之益而伊等遂恃朕之不加譴責漸無忌憚試問近日臺諫諸臣誠心獻替有裨於政治者幾人哉朕留心察其隱微處心積慮總不

出名利二途。即偶有建白者。亦並非為國為民。思盡言官之職。不過博取虛譽。冀朕之賞識。加以陞遷。外用多得養廉耳。即如謝濟世當日於

皇考時竊慙直之名。及復為御史。則以養母為辭。懇請外用。甫到道員之任。即請加增養廉。操守耿介者。固如是乎。吳煒為御史時。曾以河務叅劾高斌。及朕用伊為口北道。伊畏首畏尾之意。甚覺卑鄙。朕諭之曰。高斌斷不存此意見。若存此意見。亦不成其為高斌矣。汝若因此與高斌抵牾。則過又在汝矣。莫謂高斌不能執法也。及朕今年巡幸宣化。召伊進見。因諭之曰。汝在任能受此荒涼否。謂其南人或不習於邊地也。伊乃奏稱。臣每年有養廉二千兩。甚覺豐足矣。是其志量。乃不過沾沾於利祿耳。則跡其向之敢言。果出何心耶。李慎修自負鯁直。不知者亦以是稱之。有人言其色厲而內荏。其鯁直乃致飾於外。以為

欺世盜名計耳。非真鯁直也。朕初不深信。及用為御史。其所陳奏。皆膠執不通之說。無一可見之施行。且有荒悖過甚者。朕降旨訓飭。宥其狂瞽。仍用為外道。以觀其後效。伊請訓之時。頓改為委靡巽順。以保全此監司之職。不復作謹直之象。設其鯁直性成。如古人之願留臺中。以盡言職可也。是其志亦祇在溫飽。朕始信人言之不謬耳。昔司馬光論臺諫之官。其汲汲於名者。則深戒之。是沽名且大不可況。惟利是圖乎。彼三人者。頗負一時之名。而在儔人中。伊亦岸然自異。乃志趣卑陋。若此。全不知聖人謀道不謀食之訓。何況其下焉者乎。爰因馮元欽之奏。頒發此旨。俾言路諸臣。各加警惕。痛洗從前陋習。以副朕期望之意。馮元欽摺並發。○諭軍機大臣等。有人奏稱。近日民驕之處。有二。一在工程。一在賑濟。赴工者領帑到手。私自潛逃。望賑者。一有不得開堂鬧市。此等之事。多由地方官辦

理未善。即如工程一事。有種無賴之徒。平時串通胥吏。遇有興修。謀為包攬。又或蠹役自領帑金。捏名包作。地方官利其省便。遂不加深求。一經發帑。轉手花銷。迨動工之時。拮据莫措。遂不得不為逃避之計。亦或有不肖工員。雖零星雇募。按名發銀。而土方則以廣為狹。挑挖則以深為淺。論價則是。計工則非。及民力不支。大工弗集。則曲飾其說。以為民驕之故。又如散賑一事。被災之始。或大吏踏勘。冀邀聲譽。每至以必不可得之數。虛為慰藉。愚民無知。信為實然。迨地方按例查辦。絕不如前。而開闢之端起。又或被災已重。待哺甚急。有司不能即時申報。以致民情惶怖。而開闢之端亦起。又或有司防範未周。徒役刁難。民鮮實獲。吏多中飽。及至倉猝。不能鎮撫。則亦曲飾其說。以為民驕之故等語。現在各省民情安貼。稍加恩惠。俱知感戴。細察情形。此時尚無驕縱氣象。間有一二開闢之處。或係

地方官辦理未善。以致釀成事端。如奏內所稱諸弊種種。亦未可定各督撫等身任封疆。有教養斯民之責。平日自當留心化導。遇有工賑等事。更須訓飭屬員。妥協料理。務使諸弊悉除。民情帖服。方不負朕愛養黎元之意。今既有人陳奏及此。爾等可寄信與各督撫。令其知之。○工部等部議准。湖北巡撫晏斯盛疏稱武昌省城坍塌。上年曾題估修。嗣因積雨。坍塌更多。請於原估外。續加確估興修。從之。○內閣學士兼禮部侍郎福十寶。以老病乞休。得旨。福十寶著以原品休致。該部知道。○庚戌

上詣暢春園問

皇太后安。○詣

安佑宮行禮。○諭今年直隸宣化所屬等處。被旱歉收。朕諭該督多方籌畫。加意撫綏。目今賑務已有頭緒。諒貧民不致失所。但恐宣化附近州縣。所貯米穀。未必處處充裕。可以派

撥濟用。來歲青黃不接之時。或致米糧不敷。此時應當計及。著將通倉米撥五萬石。聽該督那蘇圖酌量分派於缺米州縣存貯。以為備用。該部即遵諭行。○吏部右侍郎蔣溥奏。湖南舵桿洲工程。前經會勘。將歲修無益之處奏明。近奉旨詢問。復將不必修理情形面奏。但已成之功。不可任其頽廢。應令該督撫飭岳州府同知。留心保護。並查防湖濱不肖之徒。偷竊物料。得旨。著照所請行。該部知道。

○辛亥。

上御洞明堂。勾到江西浙江湖廣情實罪犯。停決江西斬犯三人。絞犯一人。浙江斬犯二人。絞犯五人。湖廣斬犯五人。絞犯二人。餘八十五人予勾。○諭通政司事務簡少。官員過多。可酌量裁減一二員。尋議漢右通政二缺。請裁汰一缺。從之。○戶部議准。湖廣總督鄂彌達等疏稱。乾隆八年。增賞湖南長安營兵眷米。係武岡綏寧二州縣分領辦碾。武岡交城

步縣轉運。綏寧徑運長安。武岡州城至城步縣城一百二十里。道途平坦。每夫負米五斗。城步縣城至扶城二十里。山路次難。每夫負米四斗。扶城由老寨抵長安一百里。與綏寧徑運長安一百三十里。均屬山路最難。每夫負米三斗。其城步縣接運米石。除截留散給老寨。餘應運大營者。請一併存留老寨。建倉貯放。運夫腳價。原題照軍需例。六十里為一站。每站一夫。給工銀六分。回費銀三分。食米

一升。按時價折給。歲運眷米。視辦理軍需有間。請自本年秋季始。每站一夫。給工銀五分五釐。回費銀二分五釐。食米一升。折給銀一分。從之。○工部等部議准。湖廣總督鄂彌達等疏稱。芷江縣因建衙署教場。演武廳等項。價買民田八畝。有奇。額賦應予開除。從之。○旌表守正捐軀之直隸長垣縣民張能妻蘇氏。○壬子。

上御洞明堂。勾到江蘇安徽情實罪犯。停決江

蘇斬犯五人。絞犯二人。安徽斬犯一人。絞犯五人。餘六十九人。予勾。○工部議准江蘇巡撫陳大受疏稱。寶山縣屬之月浦塘。顧隆浜。地方險要。向無坦坡之處。本年夏間。俱被風浪衝卸。請增築石壩坦坡。從之。○癸丑。

上詣

安佑宮行禮。○戶部議准江西巡撫塞楞額疏稱。上年玉山縣夏禾被旱。田勘共九十六頃有奇。成災七八分不等。且係山鄉砂土。得雨

平定天言云

三八

後雖補種雜糧。收成歉薄。所有應蠲糧銀。請即照秋災蠲免。得旨。依議速行。○兵部議覆青州將軍伯欽拜奏稱。山海關等處逃兵。該專管兼轄之員。部定罰俸例。應請酌量變通。查山海關熱河古北口張家口天津小八城等處。俱係沿邊關隘。上年以來。逃兵過多。是以議令嗣後逃兵自首者。免罪。發回原處當差。失察之佐領防禦驍騎校照綠旗營兵私逃例。罰俸一年。兼轄之協領叅領城守尉防

守尉總管副總管等罰俸六個月。本年七月內奉旨允行。今該將軍以滿洲官員。惟倚俸資生。與綠旗官員。俸外尚有薪蔬等項者不同。請一年內。兵丁逃至五名。將專管之佐領防禦驍騎校罰俸六個月。至十名兼轄之協領。罰俸六個月。至二十名將軍副都統。罰俸三個月。未免過寬。請嗣後逃兵自首者。銷逃免罪。仍發原處當差。該管各官。均免查議。逃至三名者。失察之佐領防禦驍騎校。罰俸一年。至五名協領叅領。罰俸六個月。至十名將軍副都統。罰俸三個月。城守尉總管防守尉等。照協領例處分。並令各省駐防兵丁。均如此例辦理從之。

實錄卷二百年

三九

大清高宗法天隆運至誠先覺體元立極敷文
奮武孝慈神聖純皇帝實錄卷之二百五十

實錄卷二百五十

三

大清高宗法天隆運至誠先覺體元立極敷文
奮武孝慈神聖純皇帝實錄卷之二百五十一

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十年乙丑十月甲寅以鎮國將軍富爾

松阿為鑲黃旗滿洲副都統○乙卯

上奉

皇太后還宮○詣

大高殿

壽皇殿行禮○詣

皇太后宮問安○戶部議准甘肅巡撫黃廷桂

奏稱徽縣大門江洛等鎮額徵屯糧一千九

百二十六石有奇每年搭支文縣營兵糧一

百二十餘石餘於大門鎮建倉收貯嗣因嚴

座不敷屯。民情願賃房。官收民守。乾隆六年。以文營兵關領不便。部准免其在徽搭支本色。屯糧益增。現屆徵期。無房可賃。若令赴城交納。盤費數倍額輸。請照秦安縣屯糧折徵例。每石改徵銀六錢五分。從之。○禮部議准四川學政蔣蔚奏稱。龍安。寧遠。雅州等府。及茂州所屬各縣。地鄰番夷。恐不肖生員。藉稱遊學。潛入苗疆生釁。請嗣後邊庠文武生員。遊學內地者。呈明本學教官。牒行州縣。取具地鄰甘結。詳准遵行。仍令州縣註冊。歸日銷案。違者詳究。已結報而教官不牒州縣。州縣不轉詳學政者。將該州縣教官。分別叅處從之。○雲南總督兼管巡撫事張允隨奏。秦普洱鎮總兵崔善元。誤保逆犯刁正彥子刁愠。刁先在該鎮標充伍食糧。及至脫逃。復不加緊緝獲。請革職留普。勒限緝拏。得旨著照所請行。該部知道。尋諭崔善元著革職。仍留原任。勒限三年緝拏。若能拏獲。准其開復。如逾

限不獲。兵部奏聞。請旨。○丙辰。

上詣

皇太后宮問安。○諭軍機大臣等。今年陳家浦隄工衝決。經大學士訥親。尚書高斌議令。仍照舊口堵築。正隄必不可棄。必使合龍。方為鞏固。朕已降旨。交與該總河等辦理。前據白鍾山奏稱。過水之後。旋即獻灘。現在督率人夫。圍隄堵築等語。朕問高斌。高斌以據奏圍隄堵築。觀其情形。則所築即係正隄。白鍾山所辦是。今覽白鍾山奏內。又稱向裏圍築。月隄一道。將漫水之處。全行包攝等語。前奏係圍隄堵築。今又奏稱圍築月隄。不知伊係因築正隄。再將月隄圍築。以為施工之地耶。抑或止築月隄。竟舍正隄不築。前後奏語。不甚明晰。爾等可寄信與白鍾山。令其詳確奏聞。并令繪圖粘簽呈覽。尋奏陳家浦隄工。前後衝刷二百餘丈。該處逼近大溜。勢甚湍急。且海潮上湧。難以施工。因相度情形。於西首舊

隄向裏接築起直至東首舊隄止所築即係正隄並未另築月隄謹將奏語不明處繪圖粘簽呈覽再該工雖經堵築堅實但河勢坐灣恐水長時仍行汕刷請加築重隄一道得旨所稱重隄可暫緩俟朕詳酌之○戶部議准長蘆鹽政伊拉齊疏報慶雲鹽山滄州海豐等四州縣嚴鎮海豐二場各竈地並海豐場劉家莊等村淨竈地秋禾被旱除將被災貧竈與民一體撫卹淨竈戶口令場員安頓得所外仍飭確勘成災頃畝分數分別蠲緩得旨依議速行總理青海夷務副都統莽古賚奏乾隆丙寅年川陝甘三省蠲免錢糧所有西寧屬之玉樹等族並暫隸西藏管轄納克書番衆應徵馬貢銀兩可否一體蠲免得旨著一體蠲免該部知道○又奏西寧番族內百長請照佐雜例賞戴金頂得旨著照所請行該部知道調四川龍安府知府李炎來京引見丁巳諭曰殷扎納著解護軍

統領之任俟有蒙古副都統缺出具奏補授哈岱著以都統銜辦理正白旗護軍統領事務正紅旗蒙古都統員缺著提督保祝補授古北口提督員缺著熱河副都統瑪爾拜補授瑪爾拜員缺著索拜調補○戶部議准福建巡撫周學健疏稱南澳鎮標左營月需兵米前因該同知倉貯屢穀不敷借碾議歸詔安縣動碾倉穀以為兵糧派收臺粟歸補嗣南澳廳倉撥貯詔安縣監穀五千石該廳新舊貯穀已敷借碾且自臺運澳較運詔路直費省請嗣後月需兵米飭令臺粟竟運澳倉臺運稍遲即借該廳倉儲俟運到歸還從之○戊午上御乾清門聽政○諭軍機大臣等上年部覆史積琦條奏摺內經朕降旨令各省督撫將奉到教養事宜有無成效悉心條對今閱一載有餘而兩江閩浙川陝兩廣各總督福建甘肅四川廣東廣西各巡撫俱未覆到可寄

信令伊等作速覆奏。○軍機大臣等議覆川陝總督公慶復奏稱四川囑子多係福建廣東湖廣陝西等省流棍入川前經奏明將著名渠魁盡法處治外來者遞回原籍本省奸民責鄉保管束並咨鄰省凡赴川之人本省給照無照阻回後仍有捏造姓名指稱依傍兩月之內來川者多至三千餘名請嗣後搬眷入川之人由川省查覆實有親屬產業方許本地給照應如所請令於本地呈明地方官移咨川省查明給照到日繳銷川省各官亦不得借端將實有親屬產業之人不行查覆從之。○戶部議准雲南總督兼管巡撫事張允隨疏請動撥司庫地丁銀一萬九千二百二十三兩並道庫收存米折銀七千八百八十兩有奇飭員分領往黔蜀地方買米一萬四百二十八石以足昭通大關魯甸永善疊東川營所屬木欺古汎等兵米三年額數米價運腳有節省一併買米交倉不敷找

給從之。○禮部尚書任蘭枝以老病乞休得旨卿才品優長簡任秩宗正資料理覽奏以衰病求罷情詞懇切著以原品休致該部知道。○工部議准湖南巡撫楊錫紱奏稱長沙府屬之湘陰益陽二縣水利隄工向因長沙未設巡道歸岳常澧道管理今湖南添設驛鹽道分巡長沙寶慶二府所有該二縣水利隄工應就近改歸長寶道管理從之。○以左春坊左諭德興泰少詹事雷鉉充日講起居注官。○旌表守正被戕之河南寧陵縣民品三妻尚氏。○己未準噶爾部人策零及德卜珠爾率屬來降命賞給安插如例。○豁免甘肅寧夏寧朔平羅并已裁之新渠寶豐等五縣乾隆三年地震前民欠籽種糧共一萬一千九百三十石有奇平羅新渠寶豐三縣未完牛種蓋房銀八萬六千一百九十九兩有奇。○庚申。

上詣

皇太后宮問安。○御紫光閣閱中式武舉騎射。
○大學士等議覆御史楊開鼎奏稱直隸捐款現在奉旨令大學士等酌定期限停止原所以慎重名器。但貢生與監生同為士子上進之階。非捐納職銜可比。且捐貢例無銓選不礙正途。應請酌留。至封典孝治攸關。凡身霑一命之榮。皆思顯揚其祖父。况所給祇屬空銜。與實授官職有間。亦請酌留。應如所請。令戶部入於捐監案内一體辦理。從之。○戶部等部議覆河南巡撫碩色奏被水各屬一切賑卹事宜。一。加賑穀石。宜通融撥濟。應如所請。永城鹿邑不敷賑穀。准於鄰近虞城睢州等處撥濟。來年麥熟買補。一。加賑口糧。宜銀穀兼賑。應如所請。除倉儲有餘之商邱柘城。仍給本色外。永城鹿邑夏邑銀穀兼賑。穀一石折給銀六錢。一。加賑口糧。宜陸續支放。應如所請。按月散給。仍於來春青黃不接時。借糶接濟。一。被災地方。宜以工代賑。應如所

請。鹿邑柘城永城商邱坍塌城垣。動項興修。夏邑積水未涸。城垣暫停興修。得旨。依議速行。○辛酉。

上御紫光閣閱中式武舉技勇。○戶部議覆湖廣總督鄂彌達疏稱湖南靖州會同通道等三州縣歲辦長安營兵米。請照買補平糶倉穀定價。以一米二穀折給。陸運夫價。按站給銀。查歲辦長安兵米。靖州每石給銀一兩二錢。會同通道每石給銀一兩。從前未折銀兩。原有定價。况各省兵米折價。向無照買補平糶價值之例。應將該督所請。無庸議。惟陸運夫價。山路險峻。應如所請。以六十里為一站。每夫負米四斗。每站給銀九分。從之。○又議覆湖南巡撫楊錫紱奏稱。辦運銅鉛木植物料。撥運米石採辦碾運兵糧。平糶買補各項價腳。及賑濟銀米等款。均請照各省工程例。定限報銷。應如所請。動項無多者。辦竣日限兩月造冊詳報。上司亦限兩月核轉題咨。動

項繁多者。均各限三月。其採買難易之處。即於請動銀款案內聲明。州縣離省遠近不一。准扣除程限。有行查隔省及交代等事故。該督查明。分別題咨展限。報銷時將起限滿限聲明。至工程報銷。雖向有定限。亦應於題咨內聲明。從之。○壬戌。

上詣

皇太后宮問安。○御紫光閣覆試中式武舉騎射。○戶部議准漕運總督顧琮疏稱。臨清河

南後等幫。起運八年分漕糧。截留天津等處所有已支行月盤耗等項銀。應按程扣追。請照山東之例。分三年扣還。從之。○兵部議准湖廣總督鄂彌達疏稱。楚省苗疆。副叅十缺。向來均係調補。調補後再遇缺出。內地人員恐難其選。因於本年六月。題請揀選保題應陞人員掣補。嗣准部覆。永綏靖州。副將。桂陽叅將。缺俱緊要。施南。永順。二協。宜章。臨武。叅將。二缺。視永綏等缺有間。議令

酌改查副叅各缺。沅州。辰州。寶慶。三協。前已題明。列為苗疆次要缺。永綏。靖州。桂陽。三缺。俱苗疆緊要。嗣後缺出。請先儘內地合例之員。揀選調補。內地乏人。題明。由部將豫保人員掣補。施南。永順。宜章。臨武。四缺。改土歸流多年。應與沅州。辰州。寶慶。三缺。並列為苗疆次要缺。缺出。於內地揀選調補。乏人。題明。由部將卓薦一等記名人員。請旨揀補。從之。○癸亥。

上御太和殿傳臚。賜中式武舉一甲董孟。李經世。胡經綸。三人。武進士及第。二甲蔡永福等九人。武進士出身。三甲錢國佐等七十三人。同武進士出身。○諭軍機大臣等。編修莊存與。進呈講章內。有播種秋麥一條。著抄錄寄與直隸總督。那蘇圖閱看。令其善為勸諭百姓。廣行播植。然亦只可聽民之便。不可勉強滋擾。○又諭。今歲江南淮。徐。海。三屬被災。朕心軫念。多方撫卹。除動支該處常平倉儲外。

又將江以南州縣倉儲協撥十萬石湊用。又特旨將下江漕米截留十萬石於本省以備將來糶賑之需。今思被災之海州等七州縣漕米除按分蠲免及蠲剩之米緩至明冬帶徵外。其各州縣熟田應行徵解之米約計五六萬石。明春青黃不接之時與其再議協撥。徒滋搬運之煩。不如將此漕米截留本處以資接濟。其各州縣正額漕糧之外尚有帶徵節年緩漕一項應徵搭運者約計二萬餘石。彼地既已被災民間未免拮据亦著緩至明冬帶辦以紓民力。又徐州八屬止豐縣勘不成災但闔屬悉係災地禾穀搬運必多所有應徵漕贈米四千餘石及帶徵之米一千八百餘石亦著畫一辦理該部即遵諭行。○甲子。

上御懋勤殿勾到山東山西情實罪犯停決山東斬犯五人絞犯十二人山西斬犯三人絞犯五人餘八十三人予勾。○準噶爾部人博

爾第等來降命賞給安插如例。○戶部議覆江蘇巡撫陳大受疏稱江浦溧陽山陽阜寧清河桃源安東鹽城銅山沛縣蕭縣碭山邳州宿遷睢寧海州沭陽贛榆并淮安大河徐州二十一州縣衛被水軍民請計災輕重分別賑卹其貧生亦一體辦理。衝坍房屋瓦房每間給銀七錢五分草房四錢五分令其修葺貧民流離者招回資送撫綏不願回籍及疾病不能回籍者照例留養至海州沭陽贛榆邳州睢寧阜寧銅山被災較重應將漕糧漕項按分蠲免蠲剩銀米及其餘各縣衛漕項並未完舊欠錢糧均請緩至丁卯年同地丁一體徵輸漕糧緩至明冬帶辦查江浦等州縣衛被災該撫未將被災田地勘明分數遽請賑卹應令勘明具題到日再議其衝坍房屋暨貧生流民均照例辦理至漕糧漕項並未完舊欠可否蠲緩請旨遵行得旨依議江浦等二十一州縣衛本年漕糧漕項等項

銀米並舊欠錢糧俱著照該撫所請速行○
又議准兩廣總督策楞疏稱龍川海陽饒平
揭陽嘉應等五州縣荒山可種樹木請令無
業貧民各就山場遠近承墾每人以一頃為
率照斤鹵下則例十年後升科准為世業又
東莞香山新會南海增城三水番禺新安新
寧清遠龍川澄海饒平陽江封川高要德慶
東安茂名石城電白吳川海康遂溪徐聞瓊
山澄邁儋州樂會陵水萬州文昌等三十二
州縣額征漁課共銀五千八百九十八兩有
奇或按埠勻攤或按船攤徵難免豪強勒抽
請自丙寅年始照歸善海豐陸豐潮陽惠來
等五州縣例將額徵銀數按漁船大中二號
勻派給與司照如數交納小船免徵從之○
乙丑

上御懋勤殿勾到直隸情實罪犯停決斬犯二
人絞犯十四人餘七十九人予勾○諭每年
冬月差往山東巡漕御史兼有稽查挑漕河

道之責著都察院即照例請旨嗣後俱於十
月內奏請派往○賑湖南湘陰龍陽沅江等
縣旱災飢民并停徵本年錢糧○丙寅

上詣

皇太后宮問安○諭曰盛京工部侍郎留保奏
稱母年七十有五現今患病懇請來京侍養
等語留保著補授內閣學士兼禮部侍郎其
盛京工部侍郎員缺著蘊著補授○又諭據
兩廣總督策楞奏按察使張嗣昌現在患病
著解任調理其員缺著岳濬補授○兵部議
覆鑲黃旗察哈爾總管那蘭泰奏佐領伍
什布分食屬下錢糧查雍正六年鑲黃旗佐
領雙柱分食屬下錢糧經該旗叅奏停其分
食康熙五十一年鑲黃旗台吉楚魯木分食
屬下錢糧經該旗查奏准其分食舊案既屬
兩歧多寡又不畫一請勅下八旗王大臣將
察哈爾佐領台吉等坐扣屬下錢糧或應援
雙柱或應援楚魯木之處妥議請旨至佐領

伍什布分食屬下錢糧。查自伊祖音濟那原編佐領時。即已分食。應免查議。但近年多扣。至九十及一百餘兩不等。雖稱屬下願幫。究屬多扣。應將伍什布罰俸九月。從之。○調駐防廣東正黃旗協領王文敏來京引見。○賑貸湖北漢川。孝感。黃梅。潛江。沔陽。天門。荊門。當陽。雲夢。江陵。監利。枝江。宜都。宜城。長樂。光化。穀城。均州。鄖縣。荊州。荊左。荊右。等州縣衛水災軍民。并分別停徵本年錢糧。○豁除湖北當陽。荊左。二縣衛水衝難墾民屯田地。共十三頃七十三畝有奇。○旌表守正被戕之河南扶溝縣民扈繼東妻陳氏。○丁卯。

上詣

奉先殿。

壽皇殿行禮。○是月。熱河總管七十奏。遵旨查看喀喇河屯西邊攬水舊隄。水衝一段。應先修補。至隄旁添設堆撥。細詢本處舊人。據稱康熙四十八年。雍正十一年。水大。曾衝二次。

水勢稍長之年。未經衝動。應俟明夏。看水勢大小。酌請添修。得旨是。又批。如此。則可以不添此工矣。○直隸總督那蘇圖奏。宣化府城西門外連南北兩角。飛沙積與城齊。應急刨去。刨平後。於舊沙堆邊。挑壕一道。外築長隄。密種箕柳。沙可刷落。不至復堆城下。且宣化現在被災。來春動工。於窮民有益。得旨著照所請行。各屬城垣。尚恐有似此者。徐徐留心辦理可也。○兩江總督尹繼善奏。陳家浦水漫隄工。先經河督白鍾山。督率堵築。復於本月初三日。自江寧親赴該工。協力催儻。漫口業已合龍。並相度地勢。令於來春興工。圍築重隄一道。保障隄身。嗣由阜寧安東一路。督查賑務。回至清江浦。復遵旨會同白鍾山。渡黃詳勘下江被水各州縣。得旨。總河雖係白鍾山。但彼一謹慎而不識大體之人。只可司錢糧出入耳。如陳家浦一事。若早發數千金之帑。以堵築於未然。亦未必致遭衝決。百姓

受災。且反費數十萬帑之賑恤也。故河工一事。一以委卿。不可推諉。白鍾山。朕亦知卿不推諉於彼。但不為之隱飾。斯可矣。○又奏報。上江之鳳。潁。泗。下江之淮。徐海各屬被災情形。並詳慎辦理賑撫一切事宜。得旨。覽奏。俱悉。救荒無善政。極力料理。尚恐不逮。若空言而無補。返之天良。能自安乎。○江南河道總督白鍾山奏報。陳家浦隄工堵竣。並以衰病乞罷。另賞旗差。得旨。不必辭退。益當勉力向前可耳。○安徽巡撫魏定國奏。據戶部咨開。平糶米穀。買補未足者。現捐監已歸各省收捐本色。採買自可停止。其存貯糶價。應造報酌籌辦理。查安徽原題請捐米數。並賑缺。續請捐補米數。共應捐米六十二萬九千餘石。開捐一載。通屬共止報捐穀十二萬石有奇。折米六萬餘石。且本年鳳。潁。泗等屬州縣被水。今冬來春。尚須賑糶。幸本年豐稔處多。請將平糶價銀。仍留安省。乘時買補。得旨。是自

應如是辦理者。○又奏報。安徽九月以後得雨。並陳明賑貸被災州縣貧民情形。得旨。必實力妥協料理。方足以慰朕懷也。○江西巡撫塞楞額奏。撫鎮兩標兵丁。有室家者甚少。緣江西舊習。營兵缺出。由現兵引進餘丁挑補。所謂餘丁。並非兵丁子弟。不過稍得引進之費。將市井無室家游手人引入。非慎重營伍之道。曾密諭南昌。新建二縣。舉送情願入伍之土著武童。現據舉送挑補。併通知鎮標亦覓土著。陸續拔補。得旨。所見甚可嘉。妥為之。○閩浙總督馬爾泰等奏。稱福建布政使高山。因臺灣番性難馴。奏請照川。廣。苗疆土司例。於熟番土目中。擇立土司。給與職銜頂帶。使分管社番。統轄生番。經部議令查明。應設幾員。給與何項頂帶。定議具題。查臺灣南北二路。雖均名土番。而熟番與生番。良頑迥別。且熟番雖每社有通事土目。一社各為一類。土目人等。即由番眾推擇充革。非川廣土

司。世有威信者比。若生番殘殺性成。更難令盡聽熟番指揮。至稱酌定時日。令民番貿易一節。生番從無與民番交易之事。若誘之使出。恐更生事端。請各仍舊章。惟嚴防內地民番。無越生番地界生釁。並於秋深時。堵禦隘口。勿使生番逸出肆害。所有設立土司。並令民番貿易之處。無庸議。得旨是。著照卿等所議行。○福建巡撫周學健奏報。拏獲積拐孩童之陳朝器等。並飭按察司。督察地方文武。速追夥黨。盡數擒拏。得旨是。應如此從嚴辦理。以安閭閻者也。○又奏報。晚禾收成。分數惟霞浦福鼎惠安三縣。收成稍歉。得旨覽奏。俱悉。其收成歉薄處。須加意妥籌接濟之策。可也。○湖廣總督鄂彌達奏謝天恩。並稱從此竭力殫心。省愆補過。以期無負破格委任殊恩。得旨覽。一切勉力為之。滿招損。謙受益。不可不慎也。○又奏報。湖北糧價。並司道賢否。得旨覽。司道賢否。摺留中。其知府同知亦

應奏其賢否。且汝到任已逾年。而始奏此數人。況又不過平平看語。誰則不能。此非察吏安民之意也。戒之。其陳仁。鹿邁祖。不致誤事否。○湖北巡撫晏斯盛奏。請動支司庫存荆關減半餘平銀。開修東湖歸州長陽巴東四州縣入川陸路。並稱宜昌府以下。三峽水路內有十二碛。為緯道所必經。險窄傾卸。上年修過三碛。本年八月。修過五碛。餘未修四碛。請歸併修理入川陸路項下。續修完竣。得旨。此處向未修理。姑仍其舊。且明年免各省正供。所用錢糧正多。理應節省。此項俟有偏災。以工代賑。尚可為耳。○山東巡撫喀爾吉善奏報。安頓江南因災流至東省貧民。願回籍就賑者。資送回籍。願留養者。照例留養。得旨。知道了。○川陝總督公慶復等覆奏。川屬積貯倉糧。每年青黃不接時。均各出陳借糶。秋成如數還倉。從無移新作舊。留銀貯庫之事。且地氣潮濕。夏秋各州縣必需移倉換貯。

盤量透風。若照廣東按定廩口。注明採買年分。於各屬自行晒晾盤量。均有窒礙。請仍如川省成規辦理。得旨。所奏俱悉。○又奏據西安布政使慧中呈開。藩司衙門。各房吏書人等。歲需飯食。及庫丁口食。並各項冊籍紙張。約共需銀五千九百二十四兩有奇。為數未免過多。查甘省藩司衙門。吏書每歲口食等項。約共銀三千九百餘兩。陝省自應照此酌定。除原有銀二千五十五兩零外。將現在議減之稅冊。當帖等項銀六百兩。仍照前數存留。又庫房書吏。應得各屬批解錢糧銀共一千三百餘兩。亦應留充公用。統計每歲共銀三千九百五十五兩有奇。按各房繁簡派給。其餘陋規。一概裁革。至庫官原定油紅等項銀一百二十兩。向於庫書陋規項下分給。殊非體制。請亦照甘省例。於公費內支給。得旨。著照所議行。○又會同巡撫紀山奏報。進剿上下瞻對。中北南三路官兵連捷情形。內稱

實錄卷一百一十一

三十一

北路官兵。攻破喇嘛甲爾溫布所據靈達卡隘。餘賊逃入林箐。復會同西寧官兵。攻木魯大山。奪佔山梁。攻破賊卡碉樓。殲賊甚衆。中路官兵。攻破底朱戰碉二座。殲賊十餘名。餘賊潛逃入箐。攻若色寨。殲賊十餘名。復攻底朱。殲賊數十名。其東面山梁賊番。亦經打死數十名。並燒燬碉樓二十一座。又攻楚壩哇寨。傷賊五名。餘賊逃遁。南路官兵。攻擦牙所。先克二十一寨。今復攻燬四十六寨。殲賊無數。間有逃入山林者。餘寨設法攻打。並咨催各路官兵。速為進攻。俱於中路會合。攻殄班滾巢穴。得旨。欣慰覽之。○甘肅布政使阿思哈奏報。各屬收成分數。並陳明被災之靖遠安定。會寧。隴西。華亭。秦州。伏羌。靜寧。秦安。莊浪。金縣。皋蘭。涇州。平涼。西寧。碾伯。寧朔。肅州。等州縣。分別賑貸。蠲緩情形。得旨。撫卹災黎。地方第一要務。不可忽視也。慎之勉之。○又奏請將安西口外。招墾沙州地方戶民。舊借

實錄卷一百一十一

三十一

未完皮衣銀六千六百餘兩。降旨豁免。得旨。為惠甚小。何必特頒諭旨。且汝甫為布政。不可存此市恩之心也。○兩廣總督策楞奏。原任肇高學政金洪銓。奏粵東通省荒地。宜招徠勸墾。查廣南韶肇連羅六府州。已無不耕之土。惠潮嘉三屬。微有官荒。業已具題請墾。瓊州雖有荒地山場。錯雜黎歧境內。議墾恐滋紛擾。惟高雷廉三屬。委員查出荒地共七萬五千七百餘畝。應亟籌墾。聞仍俟細核肥瘠。勸墾試種有驗。再分別等則。題報升科。得旨。是。應如是辦理者。○廣州將軍錫特庫奏。報粵東秋旱得雨情形。並八旗標兵。因颶風急雨。坍塌房垣。動支旗營生息餘剩銀。酌借修葺。分十二月扣還。得旨。知道了。年歲奏報。不可稍涉粉飾也。○署廣西巡撫託庸覆奏。本年二月。奉准抄示京城現行錢法。命斟酌可否遵行。謹就粵西情形條議。一打銅鋪戶。搬入官房鎔造。查粵西民情樸實。鮮用銅器。

實錄卷二百五十一

三十四

且現開採銅礦。鋪戶有銅可買。無藉銷燬制錢鑄造。一官局賣米錢文。不必存貯局內。查粵西並未設有官局。即偶需平糶。亦銀錢兼收。收錢即隨時易銀存貯。秋收買穀還倉。並無將錢存貯之處。一錢市經紀。宜歸併一處。官為稽查。粵西並無錢市。亦未設有經紀。不過鹽米雜貨各店。兼換錢文。若設經紀於民。轉多不便。一客糧店收買雜糧。禁止使錢。粵西鋪戶收買。俱係用銀。鄉民肩挑來城者。賣錢有限。無庸查禁。一錢文宜嚴禁出境。粵西陸聯滇黔。水通湖南廣東。滇省產銅。鼓鑄甲於天下。黔省毗連滇省。湖廣亦開鑄多年。自足民用。往來粵西者。除帶盤費錢。照京師例禁止。惟廣東需錢甚廣。現始開鑄。民用未敷。勢難概禁。請酌定赴廣客船。大船許帶錢二十串。中船十五串。小船八串。俟該省開鑄。足敷民用。一體禁止。一囤積錢文。宜加嚴禁。粵西貧民居多。即殷實之家。亦惟將所收米穀

實錄卷二百五十一

三十五

等物。易錢資用。因積之弊。惟鋪戶不免。應照京城例。曉諭鋪戶。無許因積至百串以上。違者照違制例治罪。錢入官。得旨。此事不應如此遲延辦理。可行不可行。直陳何妨。觀望何為耶。戒之戒之。○廣西右江總兵畢映泰。交匪莫康武等。本年六月。復占奪保樂夷州。現在三崗北幹地方聚集。距邊隘約七八日程。已於接壤保樂之歸順州。小鎮安。二汛。酌量險要。多設卡座。將該處及臣標貼防官兵。分撥巡查。並時差員弁稽察。不令匪徒乘間出入內地。透漏米糧。得旨。覽奏俱悉。謹守邊防。毋致滋事可也。

實錄卷二百五十一

二十六

大清高宗法天隆運至誠先覺體元立極敷文奮武孝慈神聖純皇帝實錄卷之二百五十一

實錄卷二百五十一

二十七

大清高宗法天隆運至誠先覺體元立極敷文奮武孝慈神聖純皇帝實錄卷之二百五十二

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶豐

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級入加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十年乙丑十一月戊辰朔諭軍機大臣

等從前阿炳安辦理寧夏城工一案恣意扣減侵蝕經督撫等先後查出賊私五六萬兩現在著落追賠今又據巡撫黃廷桂奏稱該員當日剋減土方磚灰等項銀一萬三千餘兩又舊基土牛並未遵估創運冒銷銀一萬二千餘兩以及經修之城牆倉廩均有閃裂損壞應令勒限重修等語阿炳安當寧夏被震之後乘此災傷肆其侵噬貪狡百出情殊可惡可寄信西安將軍博第巡撫陳宏謀委

員將伊家產嚴查不得稍容隱匿以備將來賠修公項之用○兵部侍郎班第奏八旗所拴馬匹兼管都統等平時不行嚴察多致疲瘦甚且交馬時有以銀代之弊請嗣後除八旗各佐領所拴駝一隻仍令佐領等拴養外其各佐領馬二十六匹令佐領各拴一匹餘令各佐領下之驍騎校護軍校前鋒護軍等拴養並照米廠例於八旗都統副都統內每旗欽派一員專管如有多拴馬匹或私指佐領下人名拴養該管都統即行叅處知情不叅或不知被人叅奏將該都統一併議處從之○給事中增壽保奏盛京大政殿四圍向蓋綠瓦現值修理宮殿請盡換黃瓦其綠瓦移於王等坐落之大亭換蓋又盛京大小官員行禮向未分別次序請照太和殿於大政殿前設立品級山其大清門前兩傍下馬牌以內自後牆至前牆添設鹿角不准騎坐車馬行走報聞○又奏盛京戶部侍郎雙喜年

老昏憤。辦事錯誤。瞻徇。請革職。令其回京。報聞。○已已。禮部先期疏請。

皇太后聖壽節。應行慶賀禮。得旨。是。照例行禮。奉

皇太后懿旨。今年停止筵宴。○大學士等會議。協辦大學士劉於義等奏。直隸水利章程。一。各州縣新工。宜令官入交代。民均力役。應如所請。令直隸總河。總督。將各屬河道隄岸等工。畫明界址。分派印汛。各官管理。并令各村莊。設立渠長。遇汛過。及冰融水涸時。督率居民。自行疏濬修補。水衝木朽坍塌。准勘明估報。動項修理。一。唐河兩岸。宜設涵洞。應如所請。於唐完滿三縣境內。每五里。設涵洞一座。一。新建河閘。宜移駐汛員。應如所請。束鹿縣管河主簿。移駐唐縣。專司廣利首閘。並境內河道。寧晉縣百尺巡檢。移駐滿城縣之方順橋。管理方順橋一帶村莊。並滿城縣境內河道橋閘涵洞等項。定為兼河之缺。缺出。於河

員內揀署。清苑安州新安三州縣新工。仍歸原管之河員管理。新城縣河道。將定興縣縣丞。改駐新城管理。一。閘座宜設立額夫。應如所請。廣利通會金線小聖廟下閘。東安屯善馬廟寨頭廟等八閘。每閘設閘夫八名。每名歲給工食銀六兩。同口村段村新閘等三閘。責令坐落村莊之練地。及所設渠長管理。一。保定新河。宜專定管轄之河廳。應如所請。將保定府鹽捕通判。改為水利通判。管唐縣完縣滿城清苑安州五屬河道。凡河閘一切事宜。並汛員考成。均由該員核轉。並換給保定府水利鹽捕通判關防。一。新設堡船。宜分隸東西兩淀。應如所請。將新添堡船二百隻。祇夫六百名。各分半。撥津軍河捕二廳管轄。並增設千總二員。分隸該二廳。駐劄東西兩淀。管理船夫。一。子牙隄河。宜分隸廳汛。並添設管堡河兵。應如所請。自莊兒頭至當城歸子牙廳管轄。自當城至西沽紅橋。歸津軍

廳管轄。其二廳原隸之堡船祿夫。每廳各分立上下二汛。撥派員弁駐劄。修濬防護。並於隄岸添建堡房二十座。每座設河兵二名。於南運河河兵內抽撥一。各河隄岸宜廣籌裁柳。應如所請。民地相連之隄岸。地方官勸令各按地界種植。州縣佐雜及河工効力人員。願捐種者。成活後驗明。照河工栽柳例。分別議敘。從之。○戶部議准。署廣西巡撫託庸疏稱。恭城縣屬之猪頭嶺鉛礦。經商試採。煉砂

出鉛。鉛內分出銀及蜜陀僧。請准開採。即照該縣大有朋山例。鉛及蜜陀僧。每百觔抽正課二十觔。撒散三觔。銀一兩抽正課一錢五分。撒散三分。從之。○河南巡撫碩色覆奏。採運黑豆情形。豫屬祥符中牟陽武封邱汲縣新鄉輝縣獲嘉原武等九縣。豆價既平。兼近水次。合計買運價費。到京在一兩以內。現分派各該縣。令共買豆四萬石。但辦齊時正值河凍難運。查本年豫省漕糧項下。有黑豆九

萬九千三百餘石。來春抵通。足資動撥。此項採買豆石。統限十一月內採辦。運赴水次收貯。來歲春融。委員押運。令於三月抵通。兌交倉場侍郎代收轉運。得旨。著照所請行。該部知道。○河南按察使王丕烈。以母憂解任。以戶科給事中王興吾為河南按察使。○調河南糧驛道胡紹芬廣東糧驛道朱閑聖。湖南鹽驛道鍾昭來京引見。○旌表守正被戕之河南商邱縣民周二小妻余氏。○庚午。

上詰

皇太后宮問安。○賑貸直隸香河三河昌平密雲延慶衛新安容城易州吳橋交河景州獻縣故城天津慶雲靜海鹽山滄州正定元氏藁城無極贊皇鉅鹿廣宗內邱唐山平鄉柏鄉高邑臨城威縣清河宣化萬全懷安西寧蔚州蔚縣延慶州赤城龍門懷來保安熱河張家口獨石口喀喇河屯等四十八州縣衛廳旱災軍民。○賑貸陝西興平長安寶雞扶

風。鄆縣武功等六縣水災貧民。並緩徵本年錢糧。及新舊借欠常社倉糧。其未成災之三原渭南。盤屋富平。岐山。長武。華州。華陰。朝邑。咸陽等十州縣酌借口糧。一併緩徵。○辛未。諭朕即位以來。屢念八旗兵丁生計。增添錢糧。賞借庫銀。酌給官地官房。復屢加恩賚。曲為籌辦。而伊等生計。仍未能寬裕。實因生齒日繁。一時難以比戶充贍。朕當緩為籌畫。至於各旗都統等。雖已賞給坐糧養廉。而生計

亦未寬裕。應如何按照伊等職任繁簡。分別增給養廉。動用何項錢糧。又辦事章京內。有未經給與坐糧養廉者。應如何加恩給與得項之處。著軍機處詳悉議奏。尋奏領侍衛內大臣。每年各賞給銀九百兩。滿洲都統。各七。百兩。蒙古漢軍都統。前鋒統領。護軍統領。各六百兩。滿洲副都統。步軍統領。各五百兩。蒙古漢軍副都統。內大臣。散秩大臣。鑾儀使。上駟院武備院卿。步軍翼尉。各四百兩。歲共需

銀六萬三千九百兩。至辦事章京內。惟印務章京。未有養廉。請照副叅領之例給與。歲共需銀二萬二千五百兩。通計大臣官員。需銀八萬六千四百兩。除領侍衛內大臣等。原有養廉外。餘不敷銀四萬六千四百兩。每年由戶部領取大臣等定為二季。於三月支給十分之四。十月支給十分之六。在軍營之大臣。各按原職支給。賞給副都統銜之在軍營者。照蒙古漢軍副都統例支給。叅領等員。年終

支給。其領侍衛內大臣處生息銀兩。向交廣儲司。今歲不敷養廉銀。請暫於廣儲司滋生銀內領用。得旨。依議。其不敷賞之銀。著於戶部銀庫飯銀內動用。○又諭八旗兵丁。習學馬步射。甚為要務。向來考驗護軍前鋒等演射。均量加勸懲。優者格外獎賞。其驍騎營兵丁。向不入考。今將八旗滿洲蒙古漢軍及上三旗包衣之護軍校。驍騎校。親軍。前鋒護軍。領催。馬甲。拜唐阿等。特派王大臣。會同該管

大臣等。考射布把。中三枝以上者。分別記名。即中未合式。而弓力強。漢仗好者。亦著記名。若老病不能射箭。而當差年久。曾經効力行間。及平日尚能步射。行走較好。此次未得入考者。准各該管大臣等。列名具奏。候朕閱看。酌量施恩。俾兵丁等咸知鼓勵。優者倍加奮勉。即平等者。亦可望其勉力習學。進於優等。所派王大臣等。著即行考驗。編列等第。各將所記名數。交軍機處彙總具奏。○又諭兵丁等射布把。鑲黃旗著派莊親王。奇通阿。滿福。海格。正黃旗著派和親王。佛倫。趙宏恩。功宜。布。正白旗著派平郡王。來保。李元亮。卓巴。正紅旗著派怡親王。哈達哈。塞貝。舒凌阿。鑲白旗著派慎郡王。班第。哈岱。恒祿。鑲紅旗著派履親王。勝安阿。岱。明安。正藍旗著派淳郡王。海蘭。阿蘭泰。雅爾圖。鑲藍旗著派貝勒弘明。阿克敦。永興。勒爾森。上三旗包衣著派裕親王。伊勒慎。塔勒瑪善。呼畢圖。○戶部議准署

兩淮鹽政吉慶疏報。板浦。莞瀆。徐瀆。中正。臨洪。興莊。等六場。秋復被水。內不產鹽之莞瀆。場。夏災已恤。尚可緩至加賑。半耕半曬之臨洪。興莊。二場。耕種寬戶。亦毋庸先賑。其業鹽寬戶。與專事曬鹽之板浦。徐瀆。中正。三場。情俱拮据。請無論極次貧。先行撫恤一月。其各場新舊折價錢糧。並未完乾隆八年夏災。借給麥價。一併緩徵。得旨。依議速行。○又議准。山東巡撫喀爾吉善等疏稱。滕縣。嶧縣。魚臺。濟寧。郯城。臨清。海豐。等七州縣。衛水災。業經勘明分數。分別極次貧。題請照例加賑。惟本處倉糧不敷。若拘泥乾隆八年。部頒銀穀兼賑。毋庸撥運鄰邑穀石之例。恐銀多穀少。買食維艱。請仍於鄰近倉穀。或買貯麥內。撥運接濟。得旨。依議速行。○旌表守正捐軀之直隸威縣民張崇本妻楊氏。○壬申。上御乾清門聽政。○諭曰。王安國。服制將滿。著補授禮部尚書。俟服闋之日。赴部辦事。○旌

表守正被戕之四川梁山縣民曾三賢妻賴氏○癸酉諭軍機大臣等朕聞京師豆價日昂皆因趕運宣化米石雇車甚多車戶畏避不前商販希少所致昨詢吳拜等據稱該督運限一萬餘石已經運送足資目前接濟其餘米石原備來歲青黃不接之用可以陸續運往朕已令吳拜等自下暫且緩運可寄信那蘇圖令其酌量該處情形分別指示地方官陸續辦運庶宣屬米石不致有誤平糶而派雇官車之累亦可免除○又諭朕聞今歲浙江收成豐稔米糧價值與當年甚賤之時相等乘此有秋正可及時買備倉穀從前部議將採買之處暫停今復酌議採買可寄信與常安令其轉飭各屬即時採買以裕倉儲再該省米價果如朕所聞與當年賤時相等其收成實在幾分亦著據實奏聞○戶部議覆兩江總督尹繼善疏稱近年場竈產鹽頗旺請將淮北加帶餘鹽引二萬七十道作為

定額自甲子綱始彙入奏報其帶乙引內加帶餘鹽引二千七道俟帶行乙卯引目運竣即行停給應如所請惟停給帶乙引內加帶餘鹽恐誤民食未便遽議停給從之○工部議准浙江巡撫常安疏稱海寧縣觀音堂老鹽倉二汎柴塘上年秋雨連綿塘身間段衝陷請分別修理從之○以刑部左侍郎錢陳羣兼禮部侍郎事務○甲戌

上詣

皇太后宮問安○遣官祭

先醫之神○諭軍機大臣等江南海州沭陽一帶頻年被災水患迭見今年仍復被淹朕詢問巡撫陳大受據陳大受奏稱海州之水下苦於鹽河之南北橫截使六塘南北潮河之水不得東流上苦於沭河之水盡由沭陽海州入海宣洩不及以致為災欲治海州之水下當去鹽河橫截之積弊令地方官視水大小一面及時開壩一面報明鹽院又令民

各處俱依高處修築圩圍。廣留水道。則海州之南。可以無災。上則當分洩沐河之源。令於大山頭北四里溝八里湖地方。正馬陵山腰斷處。開一河。引入贛榆之大興鎮河。又於下流。各引一河。南入新河頭。北入圍子河。則上流既減。下流自無四潰之虞。再贛榆之三公河。舊為洩水之道。前因堵塞。苟一挑濬。積潦可消等語。陳大受所奏如此。爾等可寄信與尹繼善。白鍾山。令其委員查勘。悉心籌畫。其應作何開通疏濬之處。妥酌辦理具摺奏聞。務使水患悉除。民不罹災。以副朕病瘼民瘼之意。○九卿議覆。江蘇巡撫陳大受奏。請將毆死胞兄。應擬斬決之錢永興。援例留祀。經部以肆毆多傷。非邂逅失手議駁。而御史孫灝等。又以讐由兄起。且家無次丁。議請准其承祀。奉旨著九卿議奏。查弟殺胞兄。大傷倫紀。且逞兇疊毆。法尤難貸。錢永興應照刑部等原議擬斬立決。該撫所請。暨御史孫灝等

所議承祀之處。無庸議。得旨。錢永興著即處斬。餘依議。○加賑兩淮廟灣場水災貧竈。並蠲緩本年壓徵。及上年折價錢糧。○緩徵湖南桃源。武陵等縣旱災本年錢糧。○乙亥。上御懋勤殿。勾到朝審情實罪犯。停決斬犯十人。絞犯三人。餘二十三人予勾。○諭軍機大臣等。奉天將軍達勒當阿。所奏莽牛哨等處。請派官兵巡察一節。據部奏請。俟咨問朝鮮國。再行定議等語。從前以此事訊及朝鮮。因伊等不願。是以停止。今縱復行咨問。彼一小國。思利其屬下。勢必仍以不便奏請。此事果於該國地方有礙。自當停止。以示寬洪。倘與伊境內地方。本不相涉。僅止巡查邊境。以期地方清肅。該將軍即應隨時察辦。何必咨問為也。是以將部議駁正施行。朕意巡察乃地方官分內之事。况自有舊典。惟能盡力以事為事。則善矣。何必增設哨汛。爾等將此情節。寄諭達勒當阿知之。○又諭。九卿所議錢永

興致死胞兄一案。大學士陳世倌奏稱。錢永興。十世單傳。兄弟二人。一死一抵。宗祀斷絕。情殊可憫。應否改為應斬監候等語。朕思從前所辦弟毆胞兄致死之案。許其存留承祀。原屬法外之仁。但必其情罪甚輕。實無干犯抵格情形。而邂逅致死者。方許酌量擬議。請旨。則罪當而恩不濫施。若但因家無次丁。不論罪案之重輕。槩准承祀。則將來獨子有犯。皆不得治罪。借如獨子不孝父母。致毆其父母。父母親告。亦得謂延其宗祀。而竟置之不問乎。蓋承祀之條。所以重絕人之嗣。而此等兇惡之徒。弗念天顯。於情理萬無可恕。國家寬大之恩。本不為若輩而設。即令殄絕宗祀。亦彼自絕於天。而非國法之絕之也。况伊古以來。史冊所載。聖賢卿相。無後者不一而足。海內良善之人。亦不能使之人人有後。而獨於罹扞重辟之輩。轉輾委曲。廢國家一定之法律。為之請命。獨何心哉。即以彼一家而言。

其兄之無罪而死者。既無後矣。厥弟逞兇。應死。反必為之立後。於情亦殊為不平。如錢永興。十世單傳。至伊始有兄弟兩人。實亦形影相弔。苟稍有天良。念先世嗣續之重。不特弟不可干犯其兄。兄亦當友愛其弟。今使錢永興所犯。即屬毆死乃弟。亦不可不繩之以法。而况毆兄致死。尚何一綫之可原哉。若謂活一二兇惡之命。即為陰德。此所見與婦人女子何異。就使果有陰德。而戴德者。不過一二兇惡應死之犯。將來愚不肖相率效尤。身陷大戮。皆斯言實階之厲。流禍之與種德。果孰輕而孰重耶。朕於刑名重案。慎之又慎。必求其生而不得。方置之典刑。而於情罪重大者。不敢違道以干譽。至於倫常所在。關係天理民彝。飭紀明刑。豈可任情姑息。總之因物付物。不設一毫成心。未嘗有意從寬。亦未嘗有意從嚴。欽哉。惟恤所望諸臣。共襄明允之治。嘗聞臯陶曰。殺之三。堯曰。宥之三。臯陶不專。

指刑官。凡議獄者。皆有臬陶之責。若下有宥之三之臬陶。則為君者亦不得不為殺之三之帝堯矣。此案已照九卿所議完結。因大學士陳世倌之奏。宣諭此旨。使中外司刑者共知之。○又諭。今年上下兩江有被災之州縣。朕心甚為軫念。屢頒諭旨。令該督撫加意賑恤。無使乏食。其室廬坍塌無所棲止者。官給蓋房銀兩。未免不敷。亦令加意料理。頃尹繼善奏稱。舊例官給修房之費。上江瓦房每間四錢。草房三錢。次貧者各減一錢。下江瓦房每間七錢五分。草房四錢五分等語。朕思時屆三冬。小民被水之後。不復寧居。寒苦可憫。著於瓦房草房定例之外。每間加增銀二錢。俾窮民力量有餘。及時繕完屋宇。以昭朕格外加恩之意。民竈亦一例加增。該部即遵諭行。○又諭。朕聞呂熾在直隸學政之任。所用夫馬。多於往時之學臣。有應發價者。俱不發價。以致每州縣賠墊銀四五十兩之多。且餽

送食物等件。亦多收受。朕得之傳聞者如此。可密寄信那蘇圖。令其確查據實具奏。尋奏直隸學政按試諸郡。所有夫馬車輛。向係沿途州縣雇備接替。應給價者。該學政自行發價。亦有不發者。學政呂熾往來需用大車。自十餘輛至二十輛不等。俱先行發價。經各州縣繳還。未曾復給。其車數與往時相仿。惟州縣各賠墊銀二三十兩不等。至考時日用食物。向即各州縣勻攤供應。並不發價。呂熾照舊而行。計每日費銀十餘兩。又今秋考竣發案後。有正定。順德等屬新生。公製扁對。懸掛察院。並送盃緞靴帽等禮儀。亦曾收受。至在任聲名。俱稱闕防嚴密。取士公平。得旨。以後仍應不時留心查訪。若有甚不妥處。即行奏聞。○駐藏副都統傳清奏。遵旨飭令郡王頗羅鼐。於今年卡隘處。派素所深信之人。遠出偵察。準噶爾蹤跡。十月初三日。據頗羅鼐呈稱。本年三月二十日。派深信之薩嘉達克齊。

博爾博等三十名。探望準噶爾做善事回巢蹤跡。據伊等回告。越過阿哈雅克卡座。到噶斯路上。探得準噶爾人等回巢。路上人畜多有死傷。情形甚屬艱窘。又據頗羅鼐呈稱。拉達克汗策卜登。那木扎爾等寄信內稱。從前葉爾羌人等。每年到我所屬地方貿易。自準噶爾熬茶以來。一年有餘。不見有人來此貿易。因遣二人前往薩納珠口探信。據伊等回告。探得準噶爾部內。墨得格齊巴圖魯宰桑等。出痘死者十三人。其屬下出痘死者甚衆。噶爾丹策零畏懼。向從前奪取哈薩克游牧之北地方藏避。又準噶爾所屬吉爾吉爾頭目二人不和。內頭目甘班圖伯克。殺死一頭目。并據其地。修造薩瓦爾格里雅城。截奪往來買賣人等。後噶爾丹策零避痘回巢。派兵三千名。進征吉爾吉爾。薩瓦爾格里雅城。將吉爾吉爾之甘班圖伯克殺死。屬下人等。俱帶至厄魯特地方居住。又噶爾丹策零遣宰

桑數人。向查汗薩瓦爾部落講和。其現在信用之大宰桑二名。一係巴圖爾之子拉沁。一係策零敦多卜之子扎克巴。又有阿木賓禪汗。強暴有力。占據四處部落。所屬有阿卜都爾噶里木部落。中途又有博洛爾汗部落。博洛爾汗部落內無汗。係哈屯楚哈爾辦事。噶爾丹策零在阿卜都爾噶里木看視行兵之路。遣回子巴克達呼雅遜都喇呼沙。巴勒賓等四十人前往。彼處人猜疑。殺死三十三人。惟七人遁歸。噶爾丹策零愈怒。派厄魯特兵二萬四千。哈薩克兵四千。吉爾吉爾兵二千。令伊族台吉策卜登圖拉爾。滿積圖拉爾。袞都爾圖拉爾。於今年正月內起程前往。但聞阿卜都爾噶里木汗。力量充足。兵丁強健。勝負未知如何。報聞。○戶部議覆。福州將軍新柱奏稱。福州駐防官員。遇有喪事。請照在京旗員例。借四個月錢糧。查各省駐防。均無借支俸銀之事。所請應無庸議。得旨。看來在京

八旗官員。遇有喪事。准借四個月俸銀料理。甚屬有益。福州駐防官員。著照將軍新柱所請。准其借給。其坐扣之處。亦照京師一體辦理。至各省駐防官員。亦照此施行。若藩庫相隔遙遠。或將該處存貯別項銀兩。或將錢糧衙門存貯銀兩。即行動撥借給。餘依議。○調綏遠城副都統舒明。為右衛副都統。正藍旗蒙古副都統布延圖。為綏遠城副都統。以原任正白旗護軍統領殷扎納。為正藍旗蒙古副都統。○安徽布政使李學裕故。調貴州布政使陳惠榮為安徽布政使。以吏部郎中愛必達。為貴州布政使。○丙子。諭軍機大臣等。通倉撥運宣化等處米石。需用車輛甚多。遂致百物騰貴。已降旨直督。分別緩急。飭屬善為辦理。朕思此項米石。已運過一萬有餘。其未運糧石。尚須陸續輓運。仍恐車戶聞風不前。查通州至宣化。一帶附近州縣。驛遞皆設有站車。過往差使。近亦無多。可以通融酌撥。

協濟遞運。庶車戶不致畏避。商販可以流通。更為妥便。可寄信與那蘇圖。令其籌酌經理。○吏部議覆。江蘇巡撫陳大受奏稱。發塚之案。開棺見屍者。例有明條。止見棺槨者。並未定有承緝處分。恐遇開棺見屍之案。不肖有司。捏稱止見棺槨。不行通報勒緝。請嗣後發塚見棺槨之案。亦照開棺見屍例。通報緝究。應如所請。發塚見棺。地方官隱匿不報。照諱竊案例議處。承緝不力。照逃竊察訪不力例。罰俸一年。人犯照案緝拏。至承緝發塚案犯。向未分別扣限咨參。請嗣後開棺見屍者。地方官初參。照命案緝兇。扣限六個月。止見棺槨者。照不行查訪逃竊。扣限六個月。咨部查議。從之。○戶部議准。四川巡撫紀山疏稱。樂山。犍為。彭水。西充。等四縣。竈民。開淘鹽井。十六眼。產鹽二十一萬四千三百六十觔。應配水引二十張。陸引二百十六張。自本年始。共徵稅銀一百二十兩有奇。從之。○以四川故

金川寺土司湯鵬之子澤旺襲職。故紅卜直土百戶刁安氏無子。以其夫姪刁維藩襲職。○丁丑。申命各省督撫詳慎讞獄。諭秋審為民命攸關。最宜加意詳慎。必使情罪相符。始足以成信讞。而昭法紀。朕於直省招冊。必加詳覽。一秉虛公。以求其情理之當。是以刑部推勘及九卿等會核。有各持意見。未能協中者。亦必據理裁斷。以歸平允。至外省督撫。屢經降旨訓諭。上年復將九卿等改擬各案內。情跡顯然者。畧舉一二。再加訓飭。伊等果能平情剖斷。悉心推究。自必情與罪協。無畸輕畸重之處。則九卿覆勘。何至改正甚多。今閱直省秋審冊內。經九卿等更改者。多至二百六十五案。其改擬情實各案內。如廣西之莫蒂清。楊付服。湖廣之楊國鳳。傅和尚。江蘇之陳豪。袁生。關興儀。盛雲祥。河南之牛四。劉文。馬氏。山東之劉坤。王四。馬五等案。或蓄意謀殺。立斃人命。或縱姦輪姦。敗倫濟惡。或因竊

起釁。害命斃役。或逞兇追截。連毆致斃。種種殘忍兇惡重囚。必應明正典刑。以彰國法。乃竟入於緩決。又改擬緩決各案內。如湖廣之張德顯。彭東日。曾世英。江蘇之郭兆珍。河南之孫黑。山西之李國升等案。俱係疊毆多傷。有心犯法。情無可原。而槩列入矜減。殊屬寬縱。至於情罪稍輕。自宜斟酌矜緩。以示法外之仁。又或失於推勘。應緩決而置情實。應矜減而置緩決。比比而是。夫律設大法。固不可過嚴而失之濫。禮順人情。亦不可過寬而流於縱。是以易稱明慎。書慶咸中。惟在扶植良善。警戢兇暴。使凜然知法令之難犯也。各督撫等宜仰體欽恤之心。於刑名事件。詳晰定擬。若僅視為具文。則大非朕慎重民命。明刑弼教之本意矣。著該部再行傳諭申飭之。○吏部議准。雲南總督兼管巡撫事張允隨疏稱。姚安府屬新開安豐井。所設大使。請鑄給安豐井大使字樣條記。從之。○戶部議准。四

川巡撫紀山疏稱。進勦瞻對。應行籌備各事宜。一。官兵借支行裝。并馱馬鞍。雇銀。總兵。照雍正九年。西征例支給。副。叅遊守都司。千把。外委。馬步兵等。均照雍正八年。進勦瞻對例支給。惟馱馱馬匹。此次應每馱一位。添馬二匹。弁員跟役。照乾隆八年。出師郭羅克例。跟役三名。合給馱馬一匹。鞍雇一副。一。奉派瓦寺木坪等處土兵。每名賞銀五兩。月給家口坐糧銀九錢。米三斗。每斗折銀八分五釐。其遠在瞻對以西之冷宗。疊德。爾格。土兵。移令領兵總統。彙具總領。即於糧務處。就近支給。漢土兵丁。百名。賞牛一隻。折銀三兩。二十名。賞羊一隻。折銀五錢。官兵鹽菜口糧。照雍正八年例支給。一。糧餉宜籌備。查雅爐二倉。現貯米七千八百餘石。需米孔急。即於雅屬就近辦運。可稍緩者。於通水次之嘉眉。二府州屬。或動碾倉穀。或發銀採買。六七十石。轉運接濟。炒麵於上下木鴉。渣壩。魯密等處採買。

司庫存銀不敷。即借用貯備司庫銀。俟安慶。江西。湖廣等三省。協川軍需銀解到日。歸還。一。辦運軍米。宜按程准銷折耗。給發腳價。分南北二路。先各運米二千石。南路交中渡收貯。北路交子龍收貯。並令總統。於糧運要道。酌留官兵護守。一。打箭爐為出口總匯。請添委佐雜一員。聽差外委兵十五名。運糧解餉。兵三十名。通譯二名。斗級倉夫二名。裏塘。巴塘。章谷。甘孜。各設正糧務官一員。裏塘。添撥協辦雜職一員。德格地方。設正糧務官一員。子龍。設辦糧外委二名。總理糧務。派委幹練大員。駐爐督辦。并撥給弁兵十五名。以備差遣。一。打箭爐至德格。應按道途遠近。酌設隨營軍臺。每臺安馬六匹。蠻夫四名。自爐之折多塘。至巴塘。添設漢塘。每塘安馬四匹。蠻夫二名。自裏塘至擦馬所。安設蠻塘。每塘安馬五匹。共撥土兵二百名。一。章谷。甘孜。春科。德格。四渡。每渡造渡船二隻。設管船外委一名。

兵丁四名。通事一名。水手四名。龍察壩建立橋梁。設管橋外委一名。兵丁四名。中渡。原設渡船四隻。自換用鑿水手後。撐駕未熟。請仍調內地水手四名幫渡。撥外委二名。兵丁八名管理。並設護運糧餉兵三十名。得旨。依議速行。○又議准。山西巡撫阿里衮疏稱。大同陽高。天鎮。馬邑。定襄。應州。渾源。懷仁。山陰。靈邱。廣靈。朔州。崞縣。太原。榆次。平定。遼州。榆社。等十八州縣。先後被旱。被霜。被雹。成災。戶口查明。照例賑恤。本年錢糧。并春借倉穀。暫行停徵。俟勘明成災。項畝分數。分別題請蠲緩。現種二麥。乏籽種者。酌量借給。明秋免息還倉。應需賑濟糧石。動碾倉穀。不敷於鄰邑酌撥。酌量情形。銀米兼賑。得旨。依議速行。○又議准。甘肅巡撫黃廷桂疏請。將向無額設孤貧之平羅縣。照中衛孤貧例。額設二十名。每名月支口糧三斗。並建養濟院房六間。從之。○御史沈廷芳奏。恩蠲錢糧之年。凡州縣祭

祀牲牷。驛站草料。孤貧養贍。暨廩給役食等項。須赴藩庫領給。請勅下督撫。轉飭藩司。及時給發。不得扣剋留難。致州縣藉口短給。貽累小民。如州縣有別項庫貯應解銀兩。准即借支抵兌。得旨。著照所請行。該部知道。○貴州總督兼管巡撫事張廣泗奏。夏如春等結黨謀逆之案。黔省應緝人犯。黔西州九十二名。已故二名。初獲六十三名。續獲二十四名。貴筑縣二十二名。現獲二十一名。綏陽縣二十七名。現獲二十六名。修文縣四十四名。全獲。餘未獲數名。飭文武各官。上緊躡緝。並即提取各犯。逐名細鞫。除劉金榜。吳大桂。二名。無辜拖累。確訊省釋外。餘雖所犯情罪。輕重不同。並無誣枉。此外亦無另有黨羽。至夏如春。供出在川夥黨八十餘名。經該省文武官弁查緝。未獲人犯。亦祇數名。得旨。欣悅覽之。卿自能辦此事也。西南保障。卿實堪當。至於苗疆。更無出卿右者。因思無人學習。恐新手

難繼其後。今用愛必達。為貴州布政使。此人以朕視之。甚可造就。卿其盡心指示作成之。即將來別有用。卿處亦有人當此巖疆方面矣。○盛京戶部侍郎雙喜年老休致。調盛京工部侍郎蘊著。為盛京戶部侍郎。以鑲白旗漢軍副都統鼐滿岱。為盛京工部侍郎。○湖北巡撫晏斯盛。母老請養。以兵部侍郎開泰。為湖北巡撫。國子監祭酒鄂容安。署兵部侍郎。○戊寅。

上詣

皇太后宮問安。○大學士等議覆甘肅提督永常奏稱。肅州鎮屬之金塔寺口。北通喀爾喀。蒙古等處。從前西安甘肅一帶營馬。俱就近由此口赴買。嗣緣署肅鎮黃正位。借名採買馬駝。差人前往貿易。經總督馬爾泰奏議革職。後雖有蒙古商人持票入口交易。馬少價昂。缺馬時。需赴歸化城等處採買。道路遙遠。請嚴立章程。仍准肅州等處兵民。每歲出口。

交易一次。應如所請。並令該督將如何定限給票。指明地方。不致滋擾之處。妥議請旨。從之。○吏部議覆山東巡撫喀爾吉善奏。稱沿海之樂安諸城掖縣昌邑膠州。即墨蓬萊萊陽寧海文登等十州縣。缺現值海宇寧謐。所有該員三年保題之例。應請停止。三年內政績卓越者。仍准確覈保題。否則停其報滿。與內地州縣一體較俸陞轉。應如所請。並行文江南浙江廣東福建等省督撫。凡沿海各缺。均照議准山東例。畫一辦理。從之。○戶部議准漕運總督顧琮疏。稱派兌江寧府屬漕糧之江淮九幫。興武二幫。內有船六十三隻。應免勾容六令。漕糧與在上元江寧兌漕之船。每年不能一同開行。運隨各官。勢難兼顧。請嗣後輪年派兌。如江淮九幫。輪免勾六漕糧之年。缺船三隻。如數撥興武二幫額船。歸江淮九幫受兌。即屬江淮九幫隨運官管押。興武二幫。輪免之年。缺船十一隻。亦照江淮九

幫例。撥兌管押從之。○又議准。顧琮疏稱。淮安四幫水次。原在宿遷之皂河。距夏鎮視大河衛前幫較近。今淮安四幫調兌贛邑漕糧。竟令該幫於回空時。留八船住泊夏鎮。俟該幫全幫重運兌竣。開行到鎮日。交兌歸幫從之。○又議准。甘肅巡撫黃廷桂疏稱。靖遠安定。會寧等縣。夏禾被旱。並無秋田者。勘明被災地畝分數。分別極次貧民。照例賑借。其錢糧按災分蠲緩。舊借籽種口糧。寬至丁卯秋後。分年帶徵。尚有秋田者。除借給一月口糧外。應否再行賑借並蠲緩之處。俟秋成確勘辦理得旨。依議速行。○己卯。軍機大臣等議。覆駐藏副都統傅清奏請更定駐藏辦事大臣章京筆帖式。換班成例。查哈密。瓜州。西寧。辦事大臣章京筆帖式。均係三年一換。其駐西藏辦事大臣章京筆帖式等。令錯綜更換者。原為新舊相參。易於辦事起見。今該副都統既稱藏內事務。可隨到隨辦。無庸交代。嫻

習。且錯綜更換。必須撥兵護送。轉多勞費。應如所請。嗣後駐藏大臣章京筆帖式等。皆酌量於綠營換班之期。三年一換。更替之大臣等。自成都帶領換班官兵至藏。清查交代後。舊駐大臣等。帶領原駐官兵。同回內地。不必錯綜更換。從之。○吏部等部議准。甘肅巡撫黃廷桂等疏稱。甘州府經歷。向無衙署。請將甘城舊有公議府一所改建。從之。○戶部議覆。陝西巡撫陳宏謀奏稱。陝省銀少錢多。而錢價亦貴。民間交納錢糧。率多用錢。不止一錢以下。方收錢文。前督尹繼善酌定通照時價收納。現值恩免錢糧。止徵耗羨。據御史范廷楷奏准。完耗銀一分。收錢九文。準之陝省各處錢價。每兩尚多收錢數十文。百餘文不等。請仍按各處時價扣算。查徵收錢糧。雲南省數在一二錢內者。准納制錢。照各屬時價折收。願完銀者聽。二錢以外。不准收錢。陝省應徵耗羨等銀。令該督照雲南例辦理。從之。

○刑部題已革西安布政使帥念祖多收稅糧已於審後完繳請照例減等發落得旨依議帥念祖著發往軍臺効力○庚辰

聖祖仁皇帝忌辰遣官祭

景陵○

上詣

奉先殿

壽皇殿行禮○諭大學士等現在駐藏官員經軍機處於議覆傳青摺內令換班官兵於丁

卯年九月自成都起程前往更換朕已降旨准行可寄信詢問紀山換班官兵據彼地情形應於何時自成都起程沿途行走有益令其具摺奏聞尋奏換班官兵自成都起程約計兩月餘方能到藏從前每於四月前往正值暑雨沿途高山峻嶺泥濘難行若於九月起程塞外早寒霜雪頗大且烏拉牛隻時值疲瘦難於跋涉應於七月內自成都起程約九月內抵藏沿途行走較為有益報聞○戶

部議准雲南總督兼管巡撫事張允隨疏稱威遠寧洱思茅鎮沅分駐各兵歲需米惟威遠足供三年無庸採買寧洱思茅鎮沅俱不敷二年支放請支發司庫收存阿迷等州縣抵條長折米價並庫貯正款等項銀採買備放從之○又議准貴州總督兼管巡撫事張廣泗疏稱天柱縣屬之相公塘東海洞二廠自乾隆七年十月開採至八年十二月俱三七抽課撤散在內九年二月始奉部覆四六抽課外抽撒散三分所有未奉部覆前已抽之課請免其補抽仍照原題三七抽課造報從之○禮部議覆兩廣總督策楞疏報暹羅國遣商船帶貢樂國生丹藥五千丸查南北燥濕水土各異所進藥丸令該督交還齋回齋貢夷商量為犒賞至附帶貢品商船所有商貨標頭與專差陪臣入貢例有間仍令照例徵稅從之○辛巳戶部議覆河南布政使趙城奏稱捐貯穀石原議本處捐收足額

即令生俊赴鄰近州縣報捐。但有穀之家。運穀需費。糶銀而往。則他縣糶穀。又多未便。請凡額滿之處。聽便仍於本地捐收。逾額穀至千石。即於青黃不接時。出糶以濟民食。應如所請。並令將糶賣逾額穀價。存貯府庫。俟秋成穀價平減。酌發採買。以備鄰封水旱。如所屬內。額未滿而穀價平。即將逾額糶貯銀。轉給未滿額之州縣。買穀補貯。從之。○工部等部議准。直隸總督那蘇圖疏稱。遵化州馬蘭鎮。龍洞口等處。新添馬守兵。應建營房。經前督高斌題准予建。但有應行續添各款。從前未經估報。請一併估計興修。從之。○以鑲黃旗護軍統領烏俠為鑲白旗漢軍副都統。○賑貸廣西思恩興業等縣旱災貧民。並分別蠲緩本年錢糧。○壬午。命西北兩路將軍大臣等。籌備防範事宜。諭軍機大臣等。據安西提督李繩武奏稱。昨據由準噶爾脫回之吐魯番回民海底里。稟稱噶爾丹策零於今年

九月內。業已病故。彼於各處卡倫。俱添兵防守等語。應寄信密諭西北兩路將軍大臣等。噶爾丹策零病故之信。伊雖未遣使具奏。而固我邊境。防範豫備之處。斷不可忽。至於乘伊有喪之際。發兵征討。此事朕斷不為。但恐伊部落內。彼此心離。易生變亂。或潛至邊境。偷奪牲畜。或有意投入我境。窺伺情形。均未可定。惟當示以大義。固守邊疆。嚴謹卡倫。一切應行豫備之處。令將軍大臣。悉心籌畫。妥協辦理。豫為防範。

大清高宗法天隆運至誠先覺體元立極敷文
奮武孝慈神聖純皇帝實錄卷之二百五十二

實錄卷二百五十二

三七

大清高宗法天隆運至誠先覺體元立極敷文
奮武孝慈神聖純皇帝實錄卷之二百五十三

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十年乙丑十一月癸未以冊封

實錄卷二百五十三

純貴妃

嫺貴妃

愉妃

令嬪遣官祭告

太廟後殿

奉先殿○

上御乾清門聽政○詣

皇太后宮問安○吏部帶領原任湖北漢川縣
革職知縣曹運等引見得旨曹運著以教職

用。俞泰龍著以縣佐貳用。看來曹運人甚平常。晏斯盛出具考語。以為資性質直。才堪辦事。其瞻徇之習。往往如此。著飭行。○戶部議准。江蘇巡撫陳大受疏稱。江蘇各標營。乾隆十一年。正閏兵米十一萬七千餘石。除將額編實徵南鳳等米撥給外。不敷米三萬石。請動支司庫存銀。按各營駐劄州縣。發交印官買給。從之。○兵部等部議覆。湖廣總督鄂彌達疏稱。長安營係新闢苗疆。楚南極邊。召募抽撥各兵軍裝。均應修製。其烏鎗請照邊營例添設。查定例內省兵千名。設烏鎗三百桿。沿海沿邊兵千名。設四百桿。長安營應照沿海沿邊例製設。從之。○甲申。冊封

純貴妃。

嫺貴妃。

愉妃。

令嬪。命大學士查郎阿為正使。禮部左侍郎木和琳為副使。持節冊封純妃蘇氏為

貴妃。冊文曰。朕惟贊椒塗之雅化。德重幽閒。協彤管之令儀。質推柔順。式稽彝典。用錫綸言。咨爾純妃蘇氏。祇奉女箴。凜遵內則。動嫺禮教。久膺象服之榮。佩協珩璜。宜錫龍章之彩。茲仰承

皇太后慈諭。以冊寶封爾為貴妃。爾其益修淑慎。迓景福於方來。彌事謙沖。荷鴻禧於有永。欽哉。命大學士史貽直為正使。禮部右侍郎覺羅勒爾森為副使。持節冊封嫺妃那拉氏為

貴妃。冊文曰。朕惟化起璇閨。克佐肅雝之範。勞襄椒掖。聿彰淑慎之聲。爰考彝章。式頒綸綍。咨爾嫺妃那拉氏。性生婉順。質賦柔嘉。秉德罔愆。協珩璜之矩度。服勤有素。膺綸翟之光榮。茲仰承

皇太后慈諭。以冊寶封爾為貴妃。爾其益懋溫恭。尚祇承夫休命。彌懷謙抑。庶永集乎繁禧。欽哉。命禮部尚書來保為正使。工部左侍郎

索柱為副使持節冊封愉嬪海氏為

愉妃冊文曰朕惟化理肇於宮闈令儀是式功容凜夫圖史位序宜崇爰賁徽章用昭懿典咨爾愉嬪海氏性生淑慎質秉柔嘉力佐椒塗恒服勤而弗懈榮分象服早敬慎而無違茲仰承

皇太后慈諭以冊印封爾為愉妃爾其祇承休命愈懷謙抑之衷式荷鴻禧永迓駢繁之祉欽哉命工部尚書哈達哈為正使內閣學士

實錄卷二百五十三

四

伍齡安為副使持節冊封

貴人魏氏為

令嬪冊文曰朕惟仰事璇闈必選柔嘉之質佐徽椒掖久推淑慎之姿載考彝章特加錫命咨爾

貴人魏氏久嫺姆教長奉女箴禮法是宗凜小心而嚴翼敬勤弗怠導內則以溫恭茲仰承皇太后慈諭冊封爾為令嬪爾其祇膺異命迓景福以咸綏益懋壺儀荷鴻庥於方永欽哉

各正使跪受節起於各冊前依次行副使隨行。至景運門外捧節授內監冊寶冊印入宮。冊封禮成內監持節出景運門授各正副使。至後左門復命。○吏部等部議覆江蘇巡撫陳大受等奏稱松江府金山衛向隸婁縣距城寫遠設經歷專管衛民詞訟自分立金山縣衛民詞訟歸縣管理經歷閒冗請裁應如所請。裁缺經歷胡光祖請仍留江南補用。與例不符。應飭令離任咨部另補從之。○以刑

部左侍郎兆惠兼管正黃旗滿洲副都統。○以江南鎮海將軍標中軍副將張接天為廣東碣石鎮總兵官。○旌表守正捐軀之江西金谿縣民馮啟秀妻教氏。○乙酉協辦大學士劉於義等奏廣利渠北岸。

禹王祠傾圯僅存正殿請撥水利各工節省銀交地方官修葺得旨是應修葺以展潔誠之意祈利濟之福。○戶部議准兩廣總督策楞疏稱粵東南海番禺東莞新安新寧清遠

花縣增城。歸善高要恩平等十一縣。入秋猝被風雨。損傷沿海田禾。又化州陽春羅定三州縣。及南澳同知所屬之隆澳田畝被旱。所有應徵錢糧。一併緩徵。並借給貧民社倉穀石。秋後免息還倉。至南海等十一縣。風雨碎船坍屋。壓沒人口。照例分別撫卹。城垣衙署等項。確估興修。得旨。依議速行。○又議准策楞疏報濱海之海埕香山歸靖東莞等四場猝被風雨。寮竈房屋鹽舫等項。倒壞消化。煎丁間有淹斃。除委員會同各場大使確勘。照例分別賑恤外。其寮房等項。請於收鹽帑項內酌借竈丁修復。得旨。依議速行。○丙戌諭山東濟南武定東昌青州四府屬內。自乾隆四年至十年。有被災之處。所有緩徵帶徵銀兩。例應按限徵收。今歲該省收成雖頗豐裕。但積歉之餘。元氣未復。若新舊並徵。民間未免拮据。著將濟武東青四府屬內積欠之州縣衛所除四五兩年未完無幾。仍照例徵收。

外。其乾隆六七八九十等年被災案內緩帶錢糧。自乾隆丙寅年起。分作五年帶徵。每年徵完一年之欠。其歷年出借口糧籽種。亦著一例分年分案徵還。以紓民力。該部即遵諭行。○又諭曰。吏部尚書高斌著兼總管內務府大臣。趙宏恩既有部務。而又兼理旗務。著不必在總管內務府大臣上行走。○工部議准。兩江總督尹繼善等奏稱。上江鳳陽一帶州縣。毗連豫省。粟麥花豆根其。難供炊爨。且連年被災。民力拮据。查懷遠鳳臺三縣交界之舜耕山。煤線頗旺。懷邑外窩地方。向曾採煤。乾隆四年封禁。宿州之徐溪口。亦有山產煤。無關城池龍脈等項。俱應令民開採。於採煤處。照保甲法。各設窩頭。並遴員稽查彈壓。從之。○雲南總督兼管巡撫事張允隨奏報。酌撥官兵土練。防堵翁書關等隘卡。以遏瞻對賊番奔竄。應給口糧鹽菜賞號等項。請照乾隆四年防堵交匪矣長例支給。土練口糧。

照本地時價折給。又嚴冬邊地寒冷。每兵俱請豫借一月口糧。以昭體恤。凱旋後。分四季扣還。下部知之。○又奏報。拆修安寧舊井。增築井臺。不令淡水浸入。滷味復鹹。每年可煎鹽四十二萬八千九百九十六觔。仍撥原銷之安寧。新興。岢嵐。三州縣領運。其因舊井滷淡。傍開新井。每年所出鹽一百萬觔。著運省添撥。迤東各屬鹽少處行銷。報聞。○命青州將軍欽拜回京。在內大臣上行走。以西安副都統額爾圖為青州將軍。○以故四川祖卜柏哈土百戶七林之子達布。郭宗土百戶安初之子大太。襲職。○丁亥。

上詣

皇太后宮問安。○諭軍機大臣等。黃廷桂奏摺內。將歸化城沿邊蒙古。稱為夷人。夫夷人乃非內地所屬。如準噶爾之類。至於沿邊蒙古。皆係內地所屬。應稱為蒙古人。不應以夷人稱之也。嗣後應改正。爾等可寄信與黃廷桂。

知之。○禮部議准。福建巡撫周學健疏稱。前任總督姚啟聖。克復臺澎。肅清海島。士民懷德。於該省洪山橋。建祠崇祀。其祠宇年久損圯。請予修葺。從之。○予故大學士伯原任貴州總督鄂爾泰。入祀貴州賢良祠。○戊子。

上詣

雍和宮行禮。○幸圓明園。○還宮。○吏部等部議准。川陝總督公慶復等奏稱。渭南縣屬之下邽鎮。富平縣屬之美原鎮。俱人煙稠密。離縣遠。蓋屋縣屬之祖庵鎮。路通漢中。商民湊集。且逼近南山。易藏奸匪。請將各該縣縣丞。移駐各該鎮。應建衙署。確估動項。建造關防。照各該職守字樣鑄給。從之。○禮部議准。直隸學政呂燾奏稱。唐山屯地方。分隸順德府。唐任。二縣。新進童生。撥入正定府。且由正定府學教官考送。殊未允協。應將唐山屯額進文武童生。并從前撥入正定府學之文武生員。改歸順德府。又唐山屯地方。隸唐山。

縣者十七八。隸任縣者十二三。應將任縣童生移少就多。統歸唐山縣考試。申送用府學之唐山屯廩生暨唐山縣縣學廩生保結從之。○己丑。戶部議准直隸總督那蘇圖奏稱。保定雄縣駐防兵。丙寅年歲需米共一萬二千七百六十一石。本應各屬採買。但本年二麥歉收。幸獲秋成。若採買兵米。恐市價漸長。請動保定各屬分貯漕米。將原估價銀扣存司庫充餉。從之。○又議覆。安徽巡撫魏定國疏稱。宿州鳳陽臨淮懷遠虹縣靈璧鳳臺阜陽潁上霍邱亳州蒙城泗州盱眙五河全椒和州含山建平合肥太和等二十一州縣。鳳陽鳳陽中宿州廬州長淮等五衛。秋禾被水成災。最重之宿州靈璧虹縣亳州蒙城應徵漕糧漕項。請按分蠲免。蠲剩者緩至來秋帶徵。次重之鳳臨等二十一縣衛。本年災田應完漕糧漕項。并上年緩徵漕糧。均緩至來秋補徵搭運。未完節年漕項。分年帶徵。所奏與

確勘實在情形。臨時請旨蠲緩例相符。應請旨遵行。被災各屬應支俸工驛站等項錢糧。既准蠲緩。應如該撫所請。於匣費內借給。來歲徵還。至鳳潁泗等府州屬。丙寅年應解河工錢糧。准借支司庫地丁銀開徵歸還。得旨。依議。宿州等州縣衛應徵漕糧漕項等項。著照該撫所請速行。○又議准。雲南總督兼管巡撫事張允隨疏稱。鶴慶府屬之金登孝廉等沿河村莊被水。除動項遴員齎往查賑外。俟勘明成災分數。將應徵錢糧照例題豁。並將河水設法疏通。以便補種豆麥。缺乏工本籽種。動支常平倉穀接濟。得旨。依議速行。○禮部議覆。浙江布政使潘思渠奏請嚴禁吏員僭穿補服。干謁地方官。應如所請。吏員僭穿補服。干謁地方官。照違制例革去職銜。至州縣佐雜等官。均有地方之責。理宜關防嚴肅。如有與在籍吏員往來請託。有玷官箴者。事發。照因事囑託例革職。從之。○兵部等部

議准直隸總督那蘇圖疏稱。

端慧皇太子園寢新設千把外委各一員。馬守兵共五十九名。所需衙署營房等項。均請建設。從之。○工部議准。護江蘇巡撫安寧疏。稱寶山縣舊城灣等處土塘。於本年秋。被風潮衝損。請分別搶修。從之。○庚寅。大學士等議覆。江南河道總督白鍾山。覆奏陳家浦隄工一摺。查陳家浦隄工。該河督既稱於舊隄向裏接築。一律合龍完固。辦理尚屬合宜。至稱河工漫口。雖經合龍。而河勢坐灣。直逼隄根。恐致將來汕刷。請加築重隄一道。應如所請。並令將陳家浦北岸河形。是否兜灣。河頭相去幾許之處。相度情形具奏。以便酌量開挑引河。從之。○戶部議准前任湖北巡撫晏斯盛疏。稱宜鎮左後營。穀鎮左營。施南遠安等營。乾隆丙寅年。應需春季白中米折銀。統計尚不敷銀八百七十兩有奇。請於司庫本年地丁銀內撥支。俟本年各季估餉清冊到

部日。撥給扣還。從之。○兵部議准。奉天將軍達勒當阿奏。稱南金州。陸路漢軍披甲三百名。雍正十二年。經前將軍那蘇圖。奏分三班。每年令該佐領。輪流率往旅順。水師營操演。查南金州。距旅順。往返二百四十里。兵至旅順。並無棲身房屋。且水師營操演。俱駕三板。在海汊內演放鎗礮。若不隨戰船出洋巡哨。止在汊口操演半年。仍回金州。陸路當差。於洋面水性。水師陣勢。仍未諳悉。請將漢軍披甲三百名。撥派一百名。給水師營。令於該營戰船十隻。各派十名。隨同出洋巡哨操演。從之。○辛卯。

上詣

皇太后宮問安。侍膳。○壬辰。

皇太后聖壽節。遣官祭

太廟後殿。○

上詣

壽康宮。行慶賀。

皇太后禮。王大臣於

慈寧門。衆官於午門。行禮。○

上奉

皇太后幸靜怡軒。重華宮侍宴。○癸巳。諭宣屬
今歲被旱。歉收地方。經朕降旨加賑一月。閭
閻尚不致失所。第念天津府屬慶雲縣。僻處
海濱。頻年被旱。恐明歲停賑之後。青黃不接。
貧民餬口無資。著加恩於明年三月內。再行
普賑一月。以示朕重恤災黎之意。該部即遵
諭行。○直隸總督那蘇圖奏。宣化府屬被災
州縣。除業經題明賑恤外。遵旨酌量情形。請
於明年三月內。無論極次貧民。再加普賑一
月。並將銀米豆三項兼賑。得旨。著照所請行。
該部知道。○是日起

上以冬至祀

天於

圜丘。齋戒三日。○甲午。諭八旗暨內務府步射
人等。中三箭以上。及以弓強射優記名。年久

効力保舉者。每人俱賞一月錢糧。其食五兩
四兩錢糧者。中五箭。加賞銀九兩。中四箭。加
賞銀六兩。中三箭。加賞銀三兩。其食三兩二
兩錢糧者。中五箭。加賞銀六兩。中四箭。加賞
銀四兩。中三箭。加賞銀二兩。此內執事人。有
食四兩錢糧者。亦有食三兩二兩錢糧者。伊
等所當之差。既屬一體。所賞一月錢糧。俱著
給與四兩。其計射中數目。加賞銀兩。仍照本
身錢糧。食四兩者。照護軍例加給。食三兩二
兩者。照馬甲例加給。○乙未。

上詣

南郊齋宮齋宿。○諭。年節較近。所有八旗。及包
衣兵丁等。本年應領明年正月分錢糧內。應
扣支借庫銀之本利。著加恩免其坐扣。其射
布把。曾經記出之兵丁等。朕已加恩獎賞。著
即開除。朕施此恩。原為補助伊等。設不知體
朕委曲恩恤。隨所得奢侈糜費。不惟負朕施
恩之意。而國家定額帑項。亦不能屢邀賞賚。

也。著交各該管大臣通行曉諭兵丁等知之。

○丙申冬至祀

天於

圜丘。

上親詣行禮。○遣官祭

永陵。

福陵。

昭陵。

昭西陵。

孝陵。

孝東陵。

景陵。

泰陵。○遣官祭

端慧皇太子園寢。○詣

皇太后宮問安。○丁酉

上以冬至節詣

壽康宮行慶賀

皇太后禮。王大臣於

慈寧門。眾官於午門行禮。○御太和殿受賀。○

是月。直隸總督那蘇圖奏。各屬得雪。得旨。若

於臘底春前。再得盈尺之瑞。則感荷上天之

賜矣。此時不無望蜀之念。○直隸提督保祝。以

補授正紅旗蒙古都統。具摺謝恩。得旨。覽。因汝

有病。故令來京。庶得將養。速痊也。○兩江總督

尹繼善等奏。查邳宿一帶河道。徐塘口以上五

十餘里。曾建河清河定河成三閘。徐塘口以下

至十字河百里。並無關攔。自應於馬莊集曹家

店二處。各添建石閘一座。就灘開河。承接河清

等三閘。遞相啟閉。收蓄水勢。並將駱馬湖口門

改從乾車頭地方。建閘挑渠。導湖入運。又十字

河之竹絡壩。原以減黃濟運。但開放後。黃水湍

激。橫截運河。再與上游之清水會合。其勢更盛。

糧船至此。提溜頗難。應將竹絡壩內之東黃壩

接隄堵斷。由南向東。另開河頭。接入蘇家閘。閘

河并於閘南挑越河一道。從此導黃入運。至徐

塘口。承東省蒙沂諸山之水。挾沙易淤。前河督

齊蘇勒另開新河。留舊河為囊沙之地。年久積沙漸漾。新河應將舊河停沙量加挑挖。無使遞漾新河淤塞。運道得旨。著照所請行。該部知道。○江南河道總督白鍾山奏。陳家浦隄工。有人言四次稟請發帑。祇給銀數百兩之語。蒙旨諭知。查陳家浦外灘離隄甚寬。因溜勢南趨。六月間。即面諭該同知豫防。兩次據稟。水落溜緩。下埽簽椿處平穩。至七月初四早。始據稟溜勢南徙。秋汛未過。即令淮揚河道。攜銀千兩。星往妥辦。是日晚。又接來稟。連日西風緊逼。汕刷堪虞。復即令河庫道發銀四千三百兩。委員齎解赴工。初五日。親身赴該處搶護。得旨。亦不必如此置辯。朕前諭已明。但此後諸事。擴充識見可耳。且汝本摺尚云。以工程錢糧為重。殊不知河臣重任。豈止工程錢糧而已哉。○護蘇州巡撫安寧奏。辦理賑務。例動常平米穀。因飢口衆多。有折銀給賑之例。但地方被災。米價必貴。終不若

放給本色。於貧民更為有益。本年淮徐等處被災。查明各該處原有常平及監穀共四十七萬一千四百餘石。陸續撥運江蘇等屬穀十九萬六百餘石。嗣奉諭旨。截留上下江漕糧十萬石。本色充裕。因令各屬察看情形。如米價尚平。兼給折色米貴。即給本色。得旨。知道了。督率屬員。妥協為之。又批。此係朕本意。向來亦曾諭各督撫。而彼等總以銀米兼施為便。此朕所不解。汝奏正合朕意。○署兩淮鹽政吉慶奏。伍祐場試開池畦二十面。地脈生疎。產鹽不多。試鑄盤角二十七副。較鐵煎費省產多。請令商竈量力備資自鑄。報官察核。得旨。知道了。○江西布政使彭家屏奏。請州縣倉概用漕斛。無漕州縣。每年赴糧道領用。次年繳換。各府知府。亦每年領道斛一張。稽察屬員收漕。兼盤查常平倉穀。得旨。知道了。○浙江巡撫常安奏。賑濟一事。地方偶值旱澇。災黎待哺。倉皇奸民挾飢民為護符。

從中鼓惑。遂不免有開堂開市之事。上年辦理浙省賑務。親釐冒濫。訪拏百有餘案。奸黨歛跡。實在災民。並無遺漏。自始至終。亦皆安帖。至工程一項。浙省大者海塘。其餘城垣隄堰。議修議築。俱係實驗。給赴工者。並無領帑潛逃等弊。得旨。所奏已得大體。但尚須以忠厚惻怛之心。實力行之而已。○浙江提督陳倫炯奏報。巡查浙西營汛。技藝訓練漸熟。軍器火藥無虧。經過地方。晚稻登場。民皆寧謐。得旨。此恐出於粉飾之奏耳。且汝標下之兵。即有為盜者。汝尚不能察出。據實奏聞。何況其他耶。戒之。○閩浙總督馬爾泰等奏報。撫恤本年七八兩月。漳浦雲霄平和澎湖等處。先後被水。被風情形。得旨。此等賑恤為惠已小矣。若再不實心查察。使災黎實受其恩。則汝等所司何事耶。慎之。勉之。○巡視臺灣給事中六十七等奏報。臺灣熟番。假生番名焚掠。旋即擒獲。地方寧謐。得旨。平時疎縱之咎。

不可辭其責。而即速緝獲。並不掩飾之處。稍足自贖其愆。然不可不慎也。○又奏報。閱驗營伍。並巡視南路地方。至茄藤社。有瑯嶠傀儡。二社土目。率領生番三十四名歸誠。得旨。此不過虛應故事耳。若云生番向化。何以復有熟番焚掠之事。此後一切務實。邊海要地。汝等其慎之。○湖廣總督鄂彌達奏。洞庭湖舵桿洲石臺。功成時。節省銀三萬餘兩。交商生息。為歲修之用。嗣經前督阿爾賽。以石臺無用。奏停歲修。將節省銀。別充公用。查舵桿洲。接滇黔兩省。冬春賈船絡繹。遇風俱泊臺邊。且現在石臺。安有岳營龍協水師塘汛。若歲修竟停。則石臺必圯。無論前功盡棄。撥兵亦必盡撤。恐藏奸匪。請即於節省銀內。酌撥五千兩。作一分生息。為石臺歲修之資。得旨。著照所請行。○湖南布政使長柱奏報。本年收成。除湘陰武陵桃源等縣。被災五六七分不等。通省計算。尚在七分以上。入冬。又得盈

尺瑞雪得旨。覽奏欣慰。其被災之處。留心料理。○湖廣提督王無黨奏報。巡視苗疆營伍官兵技藝優者給賞。劣者斥責。軍裝不如式者。飭令改修。得旨。是。武備應不時留心者也。○河南河北總兵丁山。奏報整飭營伍情形。得旨。當時常留心訓練。不可久而懈也。○川陝總督公慶復等奏報。現辦瞻對軍務事宜。并續攻各寨情形。北路領兵官宋宗璋進攻靈達。先後殲賊數十名。緣碉堅道險。未能前進。暗分兵另由嚙多一路。會合現攻楚壩哇官兵。進攻班滾巢穴。中路總統袁士弼。九月二十五日。分遣官兵。復攻底朱戰碉。殺傷賊二十餘名。二十七日。進攻木魯山。攻克山左蠟蓋地方。戰碉四座。燬碉三座。在碉男婦盡斃。在外拒敵者。殲百餘人。十月初十。十一日。連攻底朱。先後殲賊二十餘人。傷逃者不可數計。現分兵輪番攻打。務期必克。直攻班滾巢穴。南路領兵官馬良柱。先後攻克直達。熱

泥。擦嗎擦牙等處。百十餘寨。餘賊膽落。投出喇嘛二名。土目五名。生番頭目二名。僉稱並非夾壩。其做夾壩數人。多被官兵燒斃。餘者逃散。情願擒賊獻賊。內投出邊多土目丹批。隨擒獻夾壩二名。嗣班滾亦屢懇德爾格土司等。作保投誠。因不敢草率了事。務擒首惡。為一勞永逸之計。仍催官兵進攻。李質粹前月已自東俄洛。移駐章谷。就近與中路總統商籌進剿。得旨。所奏俱悉。不可恃勝以輕敵。更不可草率以了事。觀其投誠者。皆云作夾壩止數人。又且已被燒燬。所擒獻者。實不過二三人而已。此即其投誠之不可信矣。將此諭令李質粹等共知之。一切熟籌詳酌。毋貽後悔也。○又奏。進剿瞻對。除將攻克各寨番衆。分別良奸。妥為辦理外。並飭行間將士。毋恃勝輕敵。亦不得藉持重為名。游移觀望。南路領兵馬良柱。勇敢且饒智略。近裏塘一帶要口。將次蕩平。現飭進攻班滾巢穴。中路總

統袁士弼因抵拒班滾。隔江難進。需俟南北兩路兵到夾攻。乘機前進。北路領兵宋宗璋與總統等不睦。有欲見長之意。節次嚴飭。業已改悔。現經李質粹改令赴噍多一路進攻。或再推諉觀望。即當叅奏。至四朗所屬各寨。先惟阿斯。羊雀二處。未經投誠。現俱招撫得旨。覽奏俱悉。○陝西涼州鎮總兵哈尚德奏。報改造軍器情形。得旨。覽。軍營之訓練。固不在軍器壯觀之一端也。勉之。○甘肅巡撫黃廷桂奏。稱赤金衛之青頭山。野馬兔。白楊河。大通衛之黑林口等處。邊牆閣門木柵等項。年久傾圯。均請即行修理。嘉峪關倒塌兩腋邊牆。入於緩工。徐修得旨。明歲普免天下錢糧。正宜節用。此等可緩之工。又何必亟亟耶。○又奏。大通衛屬燕麥川黑番。丙寅年應貢馬折銀一百九十二兩。肅州黎園營等處番民。應貢馬一百二十九匹。涼州莊浪所管黑番及華守仁等番族。應貢馬五十二匹。納折

馬糧一百二十二石。請降旨蠲免。得旨。似此瑣碎之事。為惠亦小。不如姑仍其舊耳。○甘肅安西提督李繩武奏報。分遣弁兵堵禦隘口。以防瞻對逆番窮竄。準噶爾地方。得旨。知道了。諸事留意。○署四川提督李質粹奏。進勦瞻對前月。親自東俄洛進抵章谷。所屬仁達地方。駐劄就近與總統籌酌。令各路官兵相機攻勦。早歲軍務。官兵俱各平安。強壯土司番目。悉皆恭順。番民運送軍糧。及供給烏拉差遣。並無貽誤。得旨。大捷尚未奏。元惡尚未獲。何能慰朕南望之念耶。然又不可姑息了事。以貽後患。汝其慎之。勉之。○兩廣總督策楞奏報。廣東巡撫準泰到任。除遵例移交撫篆外。並將地方要事一一告知。旋即自省起程。抵肇慶。駐劄衙門。得旨。雖督撫各有所司。然一省之事。皆國家之事也。諸凡留心可耳。○廣東巡撫準泰奏報。接辦粵海關事務情形。得旨。粵關章程。策楞所辦已屬盡善。汝

但守而弗失可也。○又奏廣東省本年七月開鑄以來存銅僅七萬餘觔。赴滇採辦之銅。又須省貯高銅數萬觔配搭。粵省雖開銅礦。尚難懸擬。請將夷商喇喇時載到紅銅一萬九千七百十八觔。免其輸稅。照閩省官買洋銅例。每百觔給價十七兩。收買配鑄。得旨。知道了。○雲南總督兼管巡撫事張允隨覆奏查修通省城垣。總計完固者五十六座。已興工改建者一座。現飭粘補者九座。題明以工代賑者十座。惟順寧、劍川二府州城垣年遠殘缺過多。必須重建。得旨。近復有旨。以明年豁免正供。各省工作不急之務。應節用以徐待有餘時辦理。卿其查照此旨行。○又奏營伍之設。例不容各項匠役冒佔名糧。但如鐵匠、木匠、弓箭匠、裁縫、獸醫等項。皆行軍必需。滇省地處極邊。設遇調遣。猝難雇募。請嗣後除毛皮匠、廚役、水火夫。仍嚴行禁革。鐵匠等項。弓馬生疎。人材懦弱者。亦不准留伍。其材

技本屬可觀者。准其留營。並嚴禁鎮將備弁私事役使。得旨。祇可去其已甚者爾。然此意惟可使由之。不可使知之。○雲南昭通鎮總兵董芳奏報昭通、東川鎮雄各地方收成分數。得旨。收成尚有七分。可無乏食之虞。然一切不可不留心。綏靖邊方。實汝之責。勉之。○貴州總督兼管巡撫事張廣泗奏報。開修赤水河工程。已竣十分之八。俟明春工程將竣時。親赴查勘。便道巡察上游之威寧、大定、黔西、遵義等府州屬地方情形。兼閱驗各鎮協營伍。得旨。好。卿一巡閱。自必於工程地方均有裨益也。○貴州鎮遠鎮總兵冷文瑞奏報所屬地方年歲收成。米糧時價情形。得旨。覽奏稍慰。但恐不無粉飾之意耳。奏報收成。惟應據實。慎之。

大清高宗法天隆運至誠先覺體元立極敷文
奮武孝慈神聖純皇帝實錄卷之二百五十三

大清高宗法天隆運至誠先覺體元立極敷文
奮武孝慈神聖純皇帝實錄卷之二百五十四

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂
總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務
世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次
尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十年乙丑十二月戊戌朔諭向例軍政

糾叅年老有病休致官員及都守以下老病
告休者如有曾經出兵之員准令子弟一人
入伍食糧如無子弟給守糧一分以資養贍
其各省甄別候補守備之年滿千總因年力
漸衰咨部休致者亦照此例辦理如因漢仗
平常或弓馬生疎則例不准給朕思此內亦
不無曾經出師著有勤勞之員應一體加恩
以示優恤嗣後著各該督提等查明該員實
有出兵効力之處於題咨內聲明亦照前例

准令子弟一人入伍。無子弟者。給與守糧一分。俾不至於失所。該部即遵諭行。○戶部議准甘肅巡撫黃廷桂疏報乾隆元年。赤金衛戶民開墾乾硤地六十畝。應徵小麥草束。令於本年照例升科。從之。○己亥。工部議准協辦大學士劉於義等奏稱。查勘永定河。本年水勢甚小。濁流微細。河身淤高。中多兜灣。恐阻水生險。請自五工以下。於開年桃汛後。分段搶挑。其河身兜灣十處。均裁灣取直。將句灣之處。截築攔水壩。兩岸殘缺卑薄者。酌培高厚。至八工范甕口以下。令疏濬以暢入淀之路。並將兩岸閘壩。修補堅固。得旨。依議速行。○又議准川陝總督公慶復等奏稱。天全川舊有紫石關。請移駐距關四里。險要之仙人橋。建築高厚關牆。城樓。堞口。捲洞。關門。將原有塘房哨樓。拆移修葺。即令紫石關分防汛兵移駐。又峨眉縣之太平墩一關。山川險要。請修建城堡。令現駐縣城守備移駐。並於

事簡兵多營汛內。撥兵四十名彈壓。將捲木池經制把總移駐縣城太平墩外。委把總移駐捲木池從之。○御史胡蛟齡奏。內外大小官員。議處罰俸之案。請按部覆題。結年月。分別扣除。得旨。事君敬其事而後其食。此奏殊不知輕重。著飭行。○庚子。

上詣

皇太后宮問安。○幸瀛臺。○吏部等部議覆盛京兵部侍郎敷文奏稱。驛站官員書吏。馬乾馬匹等項。舊例未盡合宜者。酌量更正。一驛站監督缺出。請照奉屬各差例。揀選正陪送部引見。欽定。查從前驛站監督缺出。正監督例保三員。副監督例保二員。由盛京五部堂官。於郎中員外郎主事等官內。公同揀選。送部引見。雍正十二年。以保送多員。有曠職守議。令嗣後缺出。各堂官揀選題補。停其引見。該侍郎所請。無庸議。一盛京西路北路等站馬乾。請分別地方量為增減。應如所請。暫將

北路開原等驛。每馬裁馬乾銀一分攤貼去。省寫遠之西路沙河等驛。開原等處將來如或不敷。仍題明照舊支給。一奉天倒馬之例。向定額三分。但差使勞逸不等。倒馬有過分不及分者。請核實辦理。其不及分者。驛丞量予議叙。查驛馬倒斃。雖有定額。並非任其儘額開報。冒支價值。應令該侍郎嗣後嚴查各驛馬匹。實在倒斃者。額內准領價買補。侵冒價值者。叅處。至驛馬原係驛丞專責。倒不及額。亦分所宜然。該侍郎請少倒馬三匹。紀錄一次。無庸議。一各驛馬匹。宜計差役繁簡。酌請調撥。應如所請。鳳凰城等八驛。每驛裁馬二匹。以十五匹添撥穆奇等三驛。餘一匹裁一。盛京兵部檔房。左司向無書吏。挑選識漢字之驛丁充當貼寫衣食之資。各該驛丞於驛丁名下攤派幫貼。恐滋弊竇。請於驛丁內選設書吏發司寫辦。應如所請。照盛京刑工二部例添設書吏二名。從之。○戶部議准。黑

龍江將軍傅森等奏稱。齊齊哈爾地方被旱。黑龍江地方被水。計禾稼失收戶口。齊齊哈爾。不敷糧九千五百十九石有奇。請於存公倉糧撥給。黑龍江。不敷糧一萬二千二十八石有奇。除撥給公倉細糧一千石。不敷糧數。於備存倉糧內。動支借給。俟次年將本處公田。及兵丁本身地。耕獲糧石補還。得旨。依議速行。○又議准。山西巡撫阿里衮疏稱。曲沃翼城。猗氏。萬泉。虞鄉。解州。安邑。夏縣。絳州。絳縣。聞喜。垣曲等州縣。本年秋被水。業經題明分別賑恤。所有缺乏籽種工本。各戶查明於來春酌借倉穀。應徵地丁錢糧。分別蠲緩。其應加賑之猗氏。萬泉。聞喜。將賑給口糧一月。一發賑三四月者。十一月初十開賑。兩月者。十五開賑。一月者。十二月十五開賑。衝塌城垣。倉廩。墩臺。營房。祠宇。養濟院。及浸損倉穀等項。確查後。題請修補。得旨。依議速行。○工部等部會題。直隸。山東。河南。三省。協濟江南。

河工銀兩。現據各該總河查覆。請各留本省。充河工之用。應自十一年始。俱免其撥解江南。從之。○辛丑。

上御乾清門聽政。○大學士等議覆雲南總督兼管巡撫事張允隨奏稱。金沙江通川河道。開濬完竣。化險為平。惟上游之蜈蚣嶺等十五灘。因極險。未議開濬。請一并開通。以免盤剝之煩。應如所請。仍令該督確查。果否一勞永逸。詳慎辦理。得旨。依議。速行。○吏部等部

議准。湖南巡撫楊錫紱奏稱。岳州府屬之巴陵縣。水陸交衝。且有徵南米漕米。水利隄工。一切庶務。現止知縣一員。典史一員。辦理竭蹶。查寶慶府屬之邵陽縣。雖附府。而地非衝要。請將該縣縣丞改設巴陵。佐理糧務。專管隄工水利事宜。官役俸工等項。移彼就此。無庸增添。現在邵陽縣縣丞吳德元。人頗明白。即以改補巴陵。從之。○以吏部尚書高斌。左都御史劉統勳。內閣學士伍齡安。充經筵講

官。○以詹事德通為通政使。○以寧夏協領貴楞渣為西安右翼滿洲副都統。○廣西羅陽土知縣黃恩憲故無子。以其弟宏憲襲職。○壬寅。吏部等部議覆安徽按察使都隆額奏稱。採生折割兇犯。請嚴究黨羽。並定官弁兵役里隣等。議叙處賞罰之例。應如所請。除拏獲正犯。已得採割確據。別無疑實。應訊者。即照例題請正法。並傳授學習。同惡相濟。律有明條。無庸更為定例外。買藥之人。非合夥而知來歷者。照勾引來歷不明。窩藏竊盜五名以上。坐家分贓例。發邊衛充軍。藏匿妖書者。照私有妖書不送官律治罪。南省包頭船。最易藏奸。應行令各省嚴查飭改。違者。照違制律治罪。船入官。地方文武官弁。捕獲正犯者。照拏獲隣境首盜例。分別議叙。該地方不行查拏。經犯事地方。及別州縣拏獲。或指名赴籍關拏者。將專管之文武官弁。兼轄統轄之道府州。均照不實力編排保甲例。分別

議處。該犯經過地方。及潛匿幽僻處所。不能拏獲者。該地方文武官弁。照盜賊經過伊汛。不行窮追例。降一級。照舊管事。該管各上司。罰俸一年。兇犯潛住境內。經地方首報。或被別州縣關拏。該地方官並不查拏。且捏稱無其人者。照諱盜例革職。兵捕盤獲者。首犯。照捕役盡心緝訪。瓜賊例。賞銀五十兩。夥犯減半。首告得實者。照此例給賞。誣拏誣首者。照律例分別治罪。地保里隣。知情容隱者。照本律杖一百。再加號一月。失於查察者。照不應重律杖八十。密首得實。照規定兵捕例。分別給賞。受賄匿報者。照枉法律。計贓從重斷。挾嫌妄告者。照誣告例治罪。同居親屬首告者。緣坐之妻子。及同居家口。均免治罪從之。○兵部等部議覆奉天將軍達勒當阿奏稱酌定水師營巡查訓練一切事宜。一海洋宜定會巡之例。請撥旅順戰船五隻。每年六月至天津天橋廠會巡。查旅順水師營戰船原為

巡查海警而設。但自旅順至天津。計程若干。途中有無島嶼沙線泊船處所。六月內。果否可以尅期會合之處。俱未聲明。應令該將軍會同天津都統。妥商會題再議。一水師營缺出。未便將陸路官員。概行補放。應如所請。嗣後水師營協領缺出。令該將軍。於佐領內揀選。佐領。於防禦內揀選。防禦。於驍騎校內揀選。驍騎校。於領催內揀選。引見補放。陸路官員。通曉水師者。亦准一體揀選補放。一旅順戰船。停泊處所。宜因時改設。應如所請。每年二月。停泊金井山北。派官兵看守。遇賊船。即行追捕。至冬季。仍回娘娘廟停泊。一水師營兵。宜添設官弁。教習訓練。應如所請。照天津水師營例。行令閩浙總督。於水師千把外委內。揀選熟習外洋者。十員。送部。發往奉天教習。應支餉項。亦照天津水師營例給發。有成效。照天津教習水師例議叙。一奉天將軍熊岳副都統。巡查海疆。操驗水師。宜定年限。應

如所請。令熊岳副都統。每年二月初旬。往旅順操演水師官兵一次。牛莊蓋州。熊岳復州。南金州。旅順岫巖鳳凰等城。陸路官兵。令奉天將軍。三年考察一次。至西錦州。所屬海口。無多。即令西錦州副都統。不時就近查察。從之。○癸卯。

孝惠章皇后忌辰。遣官祭。

孝東陵。○諭內閣。從前廣西收買餘銅。每百觔。給價八兩三錢。前任巡撫楊錫紱。布政使唐綏祖。因商人工本不敷。加價至十三兩。後經部議。令照滇省廠價。每百觔九兩二錢支給。朕聞該省銅價。每百觔實需銀十三兩。部議之數。仍屬不敷。其楊錫紱任內加價銀兩。既無侵蝕情弊。著准其核銷。可傳諭該部知之。○甲辰。工部議准。兩江總督尹繼善疏稱。無為州濱臨大江。舊有大壩一道。抵禦潮汐。緣江中續生三洲。洲頭支水。逼衝壩根。大壩屢經衝坍。請於鱗魚口。鮑家橋。二處。加築一壩。

但逼近大河。無地可築。應先另開河道。讓出餘地。請將王家渡一帶河道堵塞。別開新河一道。并挑挖白米塍河。於秋冬水落後興工。從之。○江蘇布政使安寧奏。江都要縣金山等縣紳士黃履昊等。因丙寅年恩蠲錢糧。呈請減免佃租。得旨。據安寧奏報。江省紳士減免佃租。體朕賜復之恩。動彼任卹之誼。堪嘉許焉。著該督撫傳旨獎諭。該部知道。○豁除河南祥符陳留中牟陽武封邱儀封考城等縣栽葦地。地丁漕糧。共十三頃三十三畝有奇。○乙巳。

上詣

大高殿行禮。○禮部等部議准。江西巡撫塞楞額疏稱。省會學政考棚。近年應試童生漸多。坐號不敷。請動支鹽規銀添建。從之。○丙午。

上詣

皇太后宮問安。○大學士等議。覆吏部右侍郎蔣溥奏稱。各部院保題郎中員外郎所遺員

缺。在雙月截缺前到部。則有雙月應陞應選人員。單月截缺前到部。則有單月應補應選人員。班次不同。各衙門任意先後。雙月者不難延至單月。單月者不難趕入雙月。請酌定限期。應如所請。嗣後各衙門遇有保題之缺。不拘保奏先後。總視保題之本缺。出在何月。按照定例。歸次月銓選。其各衙門遞行保題後出之缺。應歸月選者。無論同日及先後引見。俱按原題之缺。出在何月。分別歸月銓選。從之。○戶部議准。漕運總督顧琮疏稱。東昌衛之平山前後兩幫。永減船隻軍丁內。有糧地一項四十畝有奇。間運軍地內。有糧地十七頃二十五畝有奇。請照本幫於津貼銀八分內。除二分完糧。每年每畝實津貼銀六分。其兩幫共墾地九十畝有奇。民人曾費工本。應照本幫有糧地。除完銀二分外。每畝酌立津貼銀四分。濟寧東昌臨清三衛。各幫典出贍運地畝。按契照原價取贖。至德州正左兩

衛屯地二千四百二十九頃有奇。從前每畝雖貼租銀二分一釐二分七釐不等。但地戶照例給租者。十無二三。請每年概以一分起租。從之。○豁除陝西郃陽縣水衝地折色糧及折色均徭銀二十七頃九十畝有奇。○貴州沿河祐溪長官司副土官冉永洽患病。以其子冉裕泰襲職。○旌表守正捐軀之直隸元氏縣民路成旺妻王氏。○丁未。諭朕愛養黎元。於三年內。普免各省錢糧一週。明年應免湖南正賦。彼地隸有苗民。其歸化已久。一例輸納地丁銀兩者。已在蠲免之內。查有乾州鳳凰營永綏三廳苗民雜糧。共三百八十三石六斗。城步綏寧二縣苗米共五百三十七石七斗。每年俱徵本色。湊給兵米。及孤貧口糧等用。朕思此等苗民。既無完納之地。丁其所納米糧。亦應一體蠲免。使之均霑恩澤。又城綏地方。新聞長安營有入官叛產一千三百八十餘畝。召佃收租。以為公事之用。此

項官田亦應免租十分之三。著該部即速行文。傳諭該巡撫知之。○戶部議准。河南巡撫碩色疏報。陽武縣乾隆七年開挖引河。衝坍灘地九十九頃四十五畝有奇。折實行糧地四十九頃七十二畝有奇。銀糧均請豁免。從之。○以故一等伯鄂爾泰子鄂容安襲爵。○戊申。諭國家崇報之文。明裡肇薦。考議周詳。凡祀典所關。羣神咸秩。即如雩祭諸禮。事繫農桑。近復議行有舉無廢。皆以為民也。邇年以來。諸臣工每以蜡祭為請。朕追維舊制。酌古準今。有宜於詳慎者。考大蜡之禮。昉於伊耆。三代因之。所以報萬物之成也。雖咏於詩。詳於禮記。周官。而古制夙遠。傳註參錯。難以折衷。所謂八蜡配以昆蟲。後儒謂其害稼。不當與祭。月令祈年於天宗。蜡祭也。註云日月星辰。則所主又非八神。至謂合聚萬物而索饗之。其神甚多。尤難定位。且蜡與臘。冠服各殊。有謂臘即蜡者。有謂蜡而後臘者。是古制

已不可考。終無定衡。至於後世。自漢臘而不蜡。此禮已湮。魏晉以降。迄於唐宋。時行時止。或溺於五行之說。甚且天帝人帝。及於龍麟朱鳥。多至百九十二座。議者以為失先王之禮遠矣。蘇軾曰。迎猫。則為猫之尸。迎虎。則為虎之尸。近於倡優所為。是以子貢觀於蜡。言一國之人。皆若狂。以其沿習日久。迹類於戲也。蓋祀於南郊。已不合於古制。而蜡於四郊。則惟順成之方。始祭。較量區別。叢雜瑣細。於義有乖。於禮未洽。於神為褻。自元明以來。停止此典。實有難於舉行之處。況蜡祭諸神。如先嗇司嗇。日月星辰。山林川澤。今皆祀於各壇廟。原於典文無缺。即民間秋成之後。休息農功。祀神報賽。大抵借蜡之遺意。以盡其間井歡洽之情。猶有吹豳擊鼓之風。亦皆聽從民便。未嘗禁止。是蜡祭原行於民間。但田夫草處。雜以嬉戲。各隨其鄉之風尚。初不責以儀文。若朝廷議祀。潔蠲虔享。必嚴肅整齊。何

至有一國若狂之論。可知此祭。即古亦閭閻相沿之舊俗。詎可定以為郊廟典禮。如以為有祈無報。則方春而祈穀。冬又有事於園丘。禮謂郊之祭為大報天。又云。萬物本乎天。大報本也。豈得謂之有祈無報乎。況二仲薦馨。並崇社稷。班固所謂為天下求福報功者具在。陳祥道所謂大社國社。農之所報在焉。今

社稷壇春秋兩祀。祈報之禮已備。至義近於重複。事涉於不經者。即下之禮臣亦難定議。因諸臣但泥古制。多未深考。是以特降此旨。俾共知之。○又諭近聞侍衛官員內。賭博者甚多。該管大臣。不惟不行管束訓戒。竟有相聚同賭者。夫賭錢乃卑賤惡習。向來禁止已久。而大臣官員。又皆承受朕恩。已升官階之人。自當不違國禁。勉正躬行。況疊經施恩賞賚。原欲伊等生計有益。當差充裕之意。乃伊等不感朕恩。不顧品行。竟忍為此不肖之事。亦

大負朕教養之恩。所有大臣中。何人賭錢。朕未嘗不知。然若指出治罪。於伊等畢生名品。不無關係。伊等縱不自愛。甘為不肖之行。朕仍念已將伊等擢用大臣之任。不肯顯出其名。以存其顏面也。伊等聞朕此旨。自當痛改前非。自勵自新。倘昧朕寬容保全之恩。仍不悛改。朕自得知之。彼時必明降諭旨。加倍從重治罪。侍衛官員等。諭令該管大臣。不時嚴加查察。似此之人。若不查拏治罪。則衆人亦不知警戒矣。著交步軍統領。加意嚴行查拏。包衣官員。著交內務府大臣等。亦嚴行查拏。○又諭曰。原任山海關稅務監督四達子。違例額外徵收之處。據新任監督奏稱。向俱如此徵收。但伊有浮用銀七千餘兩等語。是伊徵收課稅。係遵奉舊例。並非自伊創始。且將前任監督等。所有浮收數目。俱據實報出。亦未肥己。情尚可原。四達子著從寬免其治罪。賠銀將伊交總管內務府大臣具奏請旨。○

戶部議准貴州總督兼管巡撫事張廣泗疏請將南江等寨絕產田畝按各該處價值令順苗認買各給印照為世業從之○乙酉

上詣

皇太后宮問安○吏部議准貴州總督兼管巡撫事張廣泗疏稱黎平府屬之赤溪司舊管上下衙等寨鎮遠府屬之邛水司瓦寨清江所屬之那磨等寨請就近改隸清江通判其寨民應納糧米及詞訟等件俱歸該通判徵收管理從之○戶部議准四川巡撫紀山疏稱乾隆六年駐防西藏撤回官兵六格等從前借支製備行裝銀一千三百兩請照乾隆三年賈成林等之例免追從之○補行寧古塔乾隆七年軍政卓異官三員不及官二員年老官一員分別陞賞處分如例○庚戌諭軍機大臣等各省回空漕船抵次遲延專催督催各官例有處分今據湖南巡撫楊錫紱奏稱該省本年回空漕船約須十二月初中

二旬方得到楚尚應修艤即上緊受兌恐難趕赴冬開之限等語今歲湖南漕船回空何以遲滯若此其在何處逗遛以致違限可寄信漕運總督顧琮令其查明照例叅奏○又諭今年上下兩江有被災之州縣朕已諭令該督撫加意撫恤其室廬坍塌無所棲止者俱賞給修房之費於常例外加增銀兩俾得及時繕完屋宇以安其身今聞淮安所屬之阜寧縣連被水患因係渾水所過之地淤高數尺柴草淹沒於泥沙之中採買艱難倍於他邑官賞之銀恐不敷用著於草房一間賞銀六錢五分之外再加增三錢以資窮民繕葺該部即遵諭行○和碩莊親王允祿等奏遵旨詳審周禮六樂清濁同均之理謹按禮記月令鄭康成註云日月之行一歲十二會聖王因其會而分之以為大數觀斗所建命其四時又周禮六樂註亦以斗建日躔為說則六合之義由來舊矣至賈公彥疏云奏據

出聲而言。歌據合曲而言。唐宋以來。無有能辨其訛者。夫和聲依永。自古為然。若歌奏合為一均。則聲不依永。律不和聲。必不可以為樂。伏讀乾隆七年正月二十八日諭旨。歌奏各為一事。曠若發蒙。伏查儀禮燕禮。鄉飲酒禮。並云工歌鹿鳴。四牡。皇皇者華。卒歌笙入。奏南陔。白華。華黍。則歌奏各為一事。經有明文。方其歌時。未嘗奏也。及其奏時。未嘗歌也。歌自歌。奏自奏。聲調未嘗相妨。義理自然相合。正如斗建左旋。日躔右轉。時行物生。有相成而無相礙也。古人用樂。制不可考。臣等不敢妄議。而據經論樂。則誠如

聖諭。義蘊深融。無所為礙。難施行者矣。請勅發三禮館。昭揭經義。永迪來茲。得旨。朕從前上諭。原為律書而發。今莊親王等奏請勅發三禮館。著交與大學士張廷玉。尚書高斌。看閱所發上諭。是否允當。並應否頒發三禮館之處。一併具奏。尋奏。伏查周禮樂制。註疏家聚

訟繁多。不可勝考。惟儀禮所載燕射諸禮。工歌合樂之節甚詳。蓋歌者人之聲。奏者樂之節也。故陳氏樂書曰。工歌。則琴瑟以詠而已。笙不與焉。笙入。則象笙而已。歌不與焉。歌之與奏。其為兩事無疑。又夾漈鄭氏曰。古者歌鹿鳴。必歌四牡。皇皇者華。故曰工歌鹿鳴之三。用南陔。白華。華黍。三笙贊之。然後節奏有屬。歌自為歌。奏自為奏。顯然明白。自唐賈公彥混歌奏為一事。以致說經者。隔閡難通。我皇上履中蹈和。聲律身度。闡康成之說。則前人之未詳者。於今益詳。指賈疏之訛。則後儒之沿誤者。爽然無誤。臣等祇誦之下。渙然冰釋。怡然理順。敬謹尋繹。義蘊昭融。實足以補經義之所未備。允宜如莊親王等所請。勅發三禮館。纂入成書。垂教萬世。查三禮義疏。原纂體例。敬採

御製日知薈說。

樂善堂文集內。論及三禮者。彙為

聖制一門。冠於卷首。今應將欽奉諭旨纂入。其本篇各有案語。應將莊親王及臣等奏帖中語意融洽採取。以廣發明。俾研經習禮之家共知。

聖訓昭垂。實為千古定論。則教澤之所被。更無窮矣。從之。○戶部議覆陝西巡撫陳宏謀疏。稱陝省連年米價昂貴。所有增貯豫備兵米。若執定乾隆四年定議。每石給價銀七錢一分四釐。不敷採買。請咸長二縣米每石定價銀一兩。近省州縣米每石連運費給銀一兩一錢。如價再昂。即行停止。價平陸續買足。應如所請。咸長二縣米一石給價一兩。近省州縣米價如咸長二縣支給運費。令該撫按程遠近分別核銷。從之。○刑部侍郎雅爾圖奏。據本部侍郎彭啟豐奏稱。山東聊城縣民王瑞徐二胡被毆身死。三年未獲正兇。請特遣賢能御史部員前往審理。奉旨允行。但以數年不結之疑案。欲其昭雪於一時。且從京乍

到之員。即欲得閭閻隱秘之私勢。亦不易。倘仍不敢定斷。亦請另緝正兇。跡近附和巡撫。若因特遣之員。必欲指定正兇。擬抵結案。則必用刑煅煉。恐成冤獄。不若仍交該撫揀選賢員詳審。務得正兇。再彭啟豐奏內。稱風聞該縣及承審各官在京營謀。希圖草率結案。既有所聞。自應勅步軍統領嚴行查拏。並令御史訪叅得旨。雅爾圖此奏。似得情理。其特派御史等前往查審之處。不必行。即交與該撫喀爾吉善揀選賢能大員詳審密訪。務得實情。至在京在部有無營謀情弊。著步軍統領不時查拏。該部知道。摺併發。○旌表守正捐軀之湖南武陵縣民淡次蘇妻張氏。○辛亥諭軍機大臣等。張允隨叅雲南永順鎮左營守備陳尚賢容留匪類。請旨革職。夫守備一官。原以查拏奸宄。肅靖地方。乃陳尚賢將匪類朱瑞廷留住衙門。且贈以盤費。法紀何在。張允隨叅本內。祇請革職。並無拏問字樣。

甚屬不合。可傳諭申飭之。○又諭各省城垣開隘日久不無傾圯。應行修葺者。前已降旨令各督撫酌量本地情形。分別先後緩急。奏聞修理。今因三年之內。普免天下錢糧。所有一定經費。正在籌畫撥補。從前部議外省如有可緩之工程。暫且緩之。朕已准行。近看各省督撫尚有以可緩之務奏請者。可密寄信與各省督撫查察彼地情形。如城垣等工。若有必不可緩者。則奏請興修。其稍可緩者。則待至二三年後。亦不為遲。○大學士福敏以老病奏請解任調理。得旨。卿才品優長。老成端諒。內廷講誦多年。恪慎小心。實有裨益。特簡綸扉。正加眷倚。覽奏情辭懇切。朕勉從所請。著解任調理。加銜太傅。以示篤念舊學之意。卿善自頤養。以承恩澤。遇精神康健。風日晴和時。仍詣宮門請安。並到內廷書房看視。該部知道。○戶部議覆護江蘇巡撫安寧疏。稱江蘇每年鼓鑄需用黑白鉛觔。向由楚辦

現聞黔省鉛廠甚旺。請照江西改辦例。亦改由黔省辦買。並酌動錢本銀兩。專員齎解黔省。交該省委辦京鉛之員帶辦。協同蘇省委員運到儀徵換船交卸。查黔省黑鉛於江西改辦時。已據該督咨覆並無多餘。江蘇鼓鑄需用黑鉛。應令該撫另行籌辦。所需白鉛。准改由黔省辦買。但該護撫所稱動項委辦辦運之處。是否可行。應令貴督酌籌咨覆。蘇撫妥協辦理。從之。○又議准雲南總督兼管巡撫事張允隨疏稱。辦運本年京銅。工本不敷。請將收存江浙二省採買鉛銅工本銀全數借用。俟部撥銅本到日歸還。從之。○旌表守正捐軀之浙江奉化縣民黃殿疑女黃氏。○壬子。諭軍機大臣等。瞻對用兵一事。十一月二十四日。接到慶復十一月初六日奏摺。畧悉彼地情形。此後便未見慶復再奏。且伊奏內稱中路班滾賊巢隔江難進。惟俟南北兩路兵到夾攻。使班滾反顧。方可進兵。而北

路又復險阻難進。現議於寨後再為加兵夾攻等語。即奏報克捷。亦祇焚燬碉樓數座。殺傷賊徒數人。其餘大率逃入箐中。未見有覆巢壓卵之勢。今賊勢頗衆。素性狡猾異常。天兵壓境。尚敢負險拒敵。看此情形。似難尅期勦滅。此番進兵。原期殲滅根株。為一勞永逸之計。若草率結局。不但國體有關。且將來又費周章矣。爾等可密寄信與慶復等。令其酌量情形。若果難於制勝。李質粹似當領兵前進。以壯聲援。其李質粹所駐之處。即令慶復前往駐劄。就近調度。若需添兵前去。即將滿兵帶數百名去亦可。朕意如此。令伊等即速妥議。總以萬全安速克奏膚功為要。一面辦理。一面奏聞。並將近日情形。詳悉速行具奏。○又諭曰。慶復著補授大學士。仍留川陝總督之任。高斌著協辦大學士事務。○戶部議覆甘肅巡撫黃廷桂疏。稱隴西。秦州。等州縣夏被水旱等地畝。成災五分以上者。按分數

分別極次貧民。先賑加賑。並將不能復種秋禾地畝。照秋災例賑恤。其隴西縣沙壓園地。借給工本墾復。緩至丁卯年分二年清還。肅州九家窰等處被災屯田。承種戶民拮据。請將傷存夏禾免其平分。舊欠口糧緩徵。所下籽種豁免。勘不成災之狄道。金縣。渭源。隴西。西和。伏羌。通渭。平涼。崇信。華亭。涇州。靈臺。固原。鎮原。真寧。階州。山丹。鎮番。平番。西寧。碾伯。等州縣之村堡。應借籽種口糧者。酌借接濟。得旨。依議速行。○又議准貴州總督兼管巡撫事張廣泗疏。稱黔省僻在邊徼。環處萬山。不通舟楫。每歲產米。不能更供隣近州縣。赴糴。況隔境採買。腳費較本境過倍。請嗣後有應買米穀。各就本屬地方採買。從之。○刑部等部議覆通政使張若靄奏。稱本年秋審。各省罪犯。因調姦致本婦羞忿自盡者甚多。請嗣後凡圖姦未成者。即於三日內。將該犯枷責。以平本婦羞忿。不致輕生。該犯亦可免抵

償。應如所請。嗣後似此案件。固無許鄉保聞風稟報。但本家投明。鄉保不即稟官者。照竊盜等事。甲長不行轉報例治罪。鄉保已稟。而該州縣不即審理。致本婦懷忿自盡者。照違令律叅處。再端方婦女多畏到官。拋頭露面。往往因此反致戕生。應令地方官虛衷詳審。毋得濫拘。並出示曉諭。凡遇調姦情事。即令報官審理。慎勿輕生。從之。○奉恩將軍尚嘉納故。以其子隆泰襲職。○以故貴州沙營司土官沙濫美之子沙鍾琯襲職。養龍長官司蔡燕故。無子。以其弟蔡魯襲職。○旌表守正捐軀之安徽阜陽縣民謝三得妻訾氏。

大清高宗法天隆運至誠先覺體元立極敷文奮武孝慈神聖純皇帝實錄卷之二百五十四

其詞著張允隨留心辦理又諭曰雲南楚

外籍視為建巫頂冒愈多。請將太宛兩縣額

進五十名。令該學政憑文取錄。其順天府學額進二十五名。照各省府學。勻予合府州縣撥取。查大宛學校。為四方冠冕。進額自應從優。即一時應試人少。宜照寧缺無濫例考取。未便將現定府學額數。歸合府州縣勻撥。又奏本籍廩生。宜先期選擇。應如所請。令大宛知縣教官。擇行優廩生。申送府丞查核。臨期認保。又奏。審音宜特派大臣一二員。或滿洲御史一二員。協同詳審。樂舞生一例。審音。查審音。向專責太宛知縣及府丞。今以兩縣童試。特派大臣。似非政體。應於府試時。該府丞移咨都察院。奏派滿漢御史各一員。會同審音。樂舞生。令知縣教官一體審音。聲音不合。究出冒籍情弊。將本生廩保。照變亂版籍律治罪。受財計贓。從重論。申送之知縣。照徇庇例議處。教官婪贓者。計贓定罪。又奏直隸各州縣皆有冒籍。請飭下總督學政。加意整飭。應如所請。令轉飭各屬州縣。嗣後州縣官有

招集鄉人。或受人囑託。硬派廩保等弊。提調等官。瞻徇者。該督該學政。查叅。又奏從前冒籍。應仕外任者。請無論官大小。俱令呈明上司。改歸原籍。應如所請。各省大小官員。由冒大宛籍入學中式出身。非入籍二十年。無原籍可歸者。俱令呈改逾限不首者。議處得旨。大宛兩縣考取生員。額多人少。實有冒濫情弊。或照勵宗萬所奏。變通辦理。或裁減額數。以收真才。著大學士等妥議具奏。餘依議。尋奏順天府府學。撥取二十五名。嗣後照外府例一體通融。酌撥至大宛縣學。各取二十五名。府學既議通撥。則人數尚不過多。未便遽行議裁。應令該學政科試時。憑文拔取。核其實數。果應酌裁。另行奏請。從之。兵部等部議。覆據湖廣總督鄂彌達等冊開。湖南湖北等省。出師城綏。擒剿逆苗。在事有功文武官弁兵丁。并徇難陣亡受傷病故漢土官弁兵丁。題請議敘。議卹。應如所請。在事有功員

弁兵丁等。分別議敘。陣亡之千總張文英。把總張章。王宗江。鄧廷瑞。李三省。歐國璋。林玉。外委鄧岐山。汪自成等。照例給予卹銀。並廕子弟一人。以把總用。遇苗被害之巡檢王淦。加贈縣主簿。照例給予祭葬。一二等軍功病故文武官弁。廕一子七品監生。以把總補用。三等軍功病故者。廕一子八品監生。以外委把總。分別補用。其傷亡官弁。及陣亡傷亡兵丁鄉勇等。分別賞卹。從之。○刑部議准甘肅按察使顧濟美奏稱。向來甘省官員。犯徒罪者。俱照各省流寓人。犯徒例。即在所犯地方充徒。而各省官員犯徒。則有遞回原籍。定地發配者。辦理既不畫一。且遞回原籍充徒。祇該地方官與行文之上司。知其犯事罪由。其餘各官。俱不能知。惟於犯事地方充徒。上下同僚。觸目警心。俱知懼憚。請嗣後各省俱畫一辦理。從之。○工部等部議准甘肅巡撫黃廷桂疏稱。西寧縣舊有倉廩一百四十五間。

內鎮海威遠。北川等處共一百二十五間。年久損壞。應請修理。從之。○川陝總督公慶復奏。松潘鎮總兵邵銓。曾經該鎮中營遊擊張允敬。揭報營私取利各款。奉旨解任質審。當即飭龍安府知府。轉移松潘同知。就近提齊各官証研訊。已據証佐供吐確鑿。而邵銓恃係有職大員。矢口狡展。應請旨革職。交川撫確審定擬。得旨著照所請行。該部知道。○一等男張松齡故。以其子張英襲爵。三等男秀林故。以其弟玉林襲爵。○一等鎮國將軍永煥故。以其子儀啟降一等。襲封一等輔國將軍。○旌表守正捐軀之河南虞城縣民李克明妻陳氏。○甲寅諭曰。駐藏副都統傅清奏。扎薩克頭等台吉齊旺多爾濟病故。據郡王頗羅鼐請將齊旺多爾濟職銜賞給伊姪旺對。伊係合家受恩之人。令其管轄兵丁辦理諸務。實為有益。朕前加恩將烏鎮和碩齊。作為扎薩克頭等台吉。給伊弟承襲以來。所交

諸務奮勉出力。今齊旺多爾濟病故。請將伊兄訥顏和碩齊之子旺對承襲。著照所請施恩。令旺對承襲扎薩克頭等台吉。○戶部議覆署河東鹽政衆神保奏稱。山西夏縣。陝西蒲城。引鹽難銷。請將夏縣減引一千三百十道。蒲城減引一千九百二十九道。俱改歸河南唐縣。作餘引行銷。查餘引一項。每年儘銷存剩。仍行繳部。並無額定考成。若將夏蒲二縣減引。改作餘引行銷。恐虧正課。應令該鹽政會同河南山西陝西各督撫酌議。或即撥歸唐縣。作為額引。或通查額引不敷之州縣。量為酌撥。得旨。依議速行。○又議覆甘肅巡撫黃廷桂疏稱。肅州原建倉廩五十三間。因潮倒塌十五間。乾隆五年。移建高燥處。所七年。又生潮。現剩糧石。借貯寺廟民房。請將損壞倉廩。移建本城大倉東北高燥處。所。應如所請。並令該撫轉飭該州詳勘。實係高燥處所。妥協建造。從之。工部議覆協辦大學士

劉於義等奏。會勘直屬水利河道。酌定應修應濬各事宜。一還鄉河隄。卑薄淺缺處。請加修築。許家橋等處。加展月隄。河身狹隘。河形屈曲處。加開寬濶。裁灣取直。果園廠兒莊各建滾壩一座。壩下開引河一道。一寶坻境內。薊運西隄。并袖鉞舊河。宜分別修築。張青口以下。宜接挑支河。以分淀河水勢。一新安縣新河。宜開挑寬深。并將歸淀河路。一律疏濬。四工閘中。建砌涵洞。一唐完滿城。三縣境內。前議每五里。設涵洞一座。今相度地勢。應酌量開建。不必拘五里一座。至方順橋之通會閘。宜加高。保定府之保城河。宜加深。唐完滿城。清苑各縣境內。應建大小木石等橋共三十五座。一慶都以下。沿白草溝河至清苑。安肅。宜開濬道溝。並建閘座木橋。一廣利依城二河。宜挑減河。分洩水勢。定興安肅泉水。宜疏濬。以廣灌溉。均應如所請。來歲春融。動項興工。從之。○予故倉場侍郎呂耀曾。前任兩

廣總督孔毓珣。江蘇巡撫徐士林。安徽巡撫張楷。陞任安慶府知府徐士林。常州府知府包括。建德縣知縣裘君弼。嘉魚縣知縣龐穎。監利縣知縣郭徽祚。并明鄆陵縣典史杜邦舉。俱入祀各該地方名宦祠。直隸兵科掌印給事中常紳。二品廕生李舜臣。江南無錫縣教諭任文煒。台州府知府孫奏。並明兵部尚書盧象昇。父盧國霖。弟象晉。象觀。象同。安徽碭山縣訓導畢天台。江西刑部尚書劉吳龍。少詹事梅之珩。國子監祭酒王傳。贈中憲大夫。雲南麗江府知府管翔麟。廩生劉冠春。湖南吏部尚書楊超曾。梧州府同知張仲璜。寧國縣知縣陳養元。河南山東按察使李珣。候選知州李震普。偃師縣教諭張桐叟。雲南兵部主事尹文熾。貴州鴻臚寺少卿張應詔。直隸營田觀察使黃世發。並明潮州府同知朱應旌。俱入祀各該籍鄉賢祠。○加賑淮北板浦。徐瀆。中正。莞瀆。臨洪。興莊等場水災貧竈。

並分別蠲緩本年應徵上年折價錢糧。其乾隆八年夏災未完麥價銀。緩至來年帶徵。本年並丙寅年帶徵七八兩年折價銀。緩至丙寅丁卯年帶徵。○乙卯

上御乾清門聽政。○諭軍機大臣等。貝勒允禩等奏請。

泰陵菓品。改用柑橘。以備供獻等因。夫

陵寢供品。與

壇廟所陳。皆有定制。乃典禮攸關。時品雖多。亦

不得妄議更易。允禩等若未知大義而為此奏。猶可。倘輕信承辦之員。捏詞聳聽。以為將來開銷之計。其心殊不可問。此摺不便批示。可寄信與允禩等知之。○又諭曰。張孝桢奏稱。喀爾吉善請留吳芳猷於東省。辦理幕務。將來奏請酌量補用。喀爾吉善身為大臣。嫌疑俱不必避。則當咨部銓選時。何不竟以留東奏請。而於吳芳猷掣選廣東遠省。始起辦公需人之見。難免規避之議等語。張孝桢此

奏亦是吳芳猷著仍補廣東原缺。○又諭曰：高斌、蔣溥俱著在軍機處行走，海望精力亦不如前，且所辦事務繁多，不必兼軍機處。○工部議准：江南河道總督白鍾山等疏稱江南之興鹽界河、紀家港支河並車路海溝東官西官閘下歸海之丁溪、小海、八竈、大團等河俱係洩水要道，應先挑濬從之。又議准四川巡撫紀山疏稱上年水衝之按察使科房、司州府縣監獄及各祠壇等項應請修理從之。○調工部左侍郎勵宗萬為刑部右侍郎，以內閣學士涂逢震為工部左侍郎，通政使張若靄為內閣學士兼禮部侍郎，少詹事阿琳為詹事府詹事，太僕寺卿赫瞻為太常寺卿。補行山西本年軍政卓異官三員，年老官一員，有疾官一員，陝西不謹官一員，罷軟官一員，年老官一員，有疾官一員，分別陞賞處分如例。以四川故霍耳東科長官司達漢格隆之師弟缺合拉完布襲職。丙辰

上詣

皇太后宮問安。○諭軍機大臣等：張允隨將保舉總兵之叅將龍有印咨送來部，經朕降旨，不必帶領引見。龍有印原因不勝總兵之任，降調，張允隨保舉總兵，理應遵旨於副將內保薦，乃竟敢越次將叅將保題，彼時即應嚴加處分。朕念張允隨數年在滇居官尚好，是以祇照部議降級抵銷爾等，可將從前寬宥之處寄信與伊知之。兵部議奏山西巡撫阿里衮奏報巡查蒲州一帶營汛弁兵弓馬技藝生疎過半，已勒限操演陸續委驗，如仍不能振作，據實叅劾總兵馮吉品不能整頓，應照例革職得旨。馮吉品著來京，該部帶領引見，再降諭旨。餘依議。御史黃元鐸奏請勅九門提督順天府尹巡城御史等嚴拏殘害幼孩惑人賺利之兇犯得旨：著照所請行。該部知道。旌表守正捐軀之江蘇丹徒縣民解堯傑妻劉氏。丁巳軍機大臣等奏遵

旨詢問阿勒楚喀副都統巴爾品拉林移駐滿洲情形據稱孤寡年老及十五六歲以下不能力作者百餘戶年力雖強耕耘未諳不能盡地利者十六七力勝耕耘兼有協助之人者十二三大約以五口計之種一頃者日用外所餘不過三四十石種五六十六七十畝者所餘不過一二十石再下僅堪餬口緣初學耕種且無協助之人安家銀兩漸次用完不能多種牛隻等項斃壞無力置買不免拮据查移駐滿洲每戶原議給地三頃因甫經移駐一時未能全種先給成熟地一頃餘俟量力漸次開墾此內有子弟偕往或帶有奴僕者均可協助耕種其無子弟奴僕者上年曾議令於附近民人內置買為僕至孤寡及老幼不能力作者生計艱難餘或勉力耕作而尚未諳習或農具牛隻損斃不能置立均應量為補助請每年賞銀五千兩交該副都統查實係無力之人隨時隨事酌量補助

如一年內所用尚有餘剩令存為下年添補之用每年總以五千兩為率俟居處已定無須補助時奏明停給從之又議覆御史西成奏稱各省將軍副都統城守尉等屬下隨印筆帖式向例俱於在京旗人內擬用外省旗人除披甲當差外無路上進其中或有堪備任使者請照在京八旗都統衙門挑取印房筆帖式例考用本處旗人應如所請天津等處將軍副都統等衙門筆帖式共四十九缺即於各該處兵丁內考取無庸賞給養廉其如何定缺考取及作何陞用之處交吏部分別定議從之戶部議准長蘆鹽政伊拉齊疏稱滄州慶雲鹽山海豐等州縣歸併裁場竈地及嚴鎮場海豐場坐落滄州慶雲鹽山海豐等州縣境內竈地并海豐場劉家莊等村莊淨竈地秋禾被旱除劉家莊等村莊離縣寫遠淨竈戶口業經就場普賑加賑外其餘各州縣場被災竈戶應同災民一體撫

卹額徵銀兩。各按成災分數蠲免。蠲剩者照例分年帶徵。得旨依議速行。○又議准甘肅巡撫黃廷桂疏稱。靖遠會寧安定等縣。夏禾被旱。業經題明賑借。今秋禾復被災。應將極次貧民。分別初賑加賑。額徵銀草。並新舊借糧。照例蠲緩。得旨依議速行。○又議准黃廷桂疏稱。寧朔縣建城。占用民田二千一百四十二畝。有奇。內因燒磚占用。共二百八十五畝。有奇。地形低窪。又經取土。遇雨水即成汪洋。難以墾復。應分別上中下則。與建城圈占田畝一體給銀。額賦豁除。俟地形填平。招民墾種。另題升科。從之。○工部議准閩浙總督馬爾泰等覆奏。查明浙屬除向無城垣及現在堅固並尚可緩修者。無容置議外。其沿海近海之平湖。鄞縣慈谿奉化鎮海象山山陰會稽臨海寧海太平等十一縣城垣緊要。應即修理。從之。○又議准甘肅巡撫黃廷桂奏稱。寧夏四堆子一帶。埂外閒田。曾招民墾種。

查四堆子地方。雖有月隄三道。距黃河大溜甚近。恐水大泛溢。衝刷傷田。請於月隄後。自馮家廟至五堆子。再築遙隄一道。並將六堆子以下。殘缺舊隄。加培高厚。至昌潤以西。惠農尾梢出水小渠。淤墊淺窄。夏秋宣洩不及。恐致黃水倒漾。請一體展挖寬深。從之。○御史湯聘奏。部臣同堂辦公。宜和衷共濟。近見各部大臣中。有原屬本部之事。儘可公商。乃必單名具奏。及至奉旨。仍下該部議奏。夫必一人先奏。而令同堂之人。議覆於後。何不於未奏之前。先出所見。公同商確。如果衆意不合。然後單名具奏。並將業經公商意見不合之處。申明請旨。得旨。湯聘此奏。頗得大體。著照所請行。該部知道。○以由西寧更換回京之副都統莽古賚為正白旗滿洲副都統。○以四川故上阿壩土千戶獨賴林柯之子拆旺邦襲職。○大計直隸河工。卓異官二員。福建卓異官十員。不謹官三員。罷軟官一員。年

老官二員有疾官二員才力不及官一員浮躁官一員河南卓異官十二員不謹官二員罷軟官一員年老官四員有疾官四員才力不及官四員山東卓異官十二員不謹官五

員罷軟官二員年老官一員有疾官二員才力不及官三員山西卓異官八員不謹官五員罷軟官一員年老官二員有疾官三員才力不及官三員浮躁官一員陝西卓異官十一員不謹官二員罷軟官一員年老官一員

有疾官一員才力不及官二員浮躁官三員均分別陞賞處分如例○豁免山東濟寧州乾隆五六兩年因災借給貧民未完籽種銀一百七十兩有奇社倉穀五百三十石有奇豆一千九石有奇戊午

上詣

皇太后宮問安○安西提督李繩武奏準噶爾進貢使臣到境派撥弁兵照料由烏克爾過山但查明歲丙寅係該夷赴京貿易之年今

並未言及且所帶人畜駝馱減少恐有別故進京奏請容俟確查另摺奏聞得旨知道了所帶貨物既少彼若求售可示以朕恩許其貨賣耳○己未

上詣

皇太后宮問安○大學士等議覆兩江總督尹繼善等奏稱黃河南北兩岸舊時大隄離河頗遠近因溜勢偏趨逼近隄根請增築高厚豫防衝刷坐蟄至月隄本為保護險工而設其迎溜頂衝處須與大隄一律寬高目今溜勢或上提或下坐舊築月隄不能適當衝溜且較大隄卑矮請分別應加高者加高應接築者接築況江南濱河地方今年曾被水災雖蒙蠲賑兼施明春青黃不接時再興此工俾窮民傭工度日實為一舉兩得應如所請並令該督等委員分段詳勘酌量形勢緩急動項興修得旨依議速行○庚申諭向來外省降調旗員遇有本處駐防缺出咨送應陞

人員引見時。將降調人員。一併咨送。列於應陞人員之後。帶領引見。如引見不用。至第三次引見時。將緣由聲明具奏。但廣東。福建。四川。甘肅等省。距京遙遠。屢次咨送。未免長途拮据。嗣後廣東。福建。四川。甘肅等省降調人員。著於第二次引見時。該將軍。都統。副都統等。即將該員降調緣由。併出具考語。聲明具奏。不必至第三次。以省跋涉之勞。該部即遵諭行。○又諭曰。副都統烏察喇。著交將軍巴靈阿。如可補用。該處協領城守尉。即行補用。如不可用。將伊以協領原品休致。○辛酉。欽定朝會燕饗樂名。元旦中和樂。升座。元平。還宮。和平。冬至中和樂。升座。遂平。還宮。允平。萬壽中和樂。升座。乾平。還宮。泰平。上元中和樂。升座。怡平。還宮。昇平。常朝中和樂。升座。隆平。還宮。顯平。內庭行禮。丹陛樂。雖平。諸王百官行禮。丹陛樂。慶平。外藩行禮。丹陛樂。治平。皇太后三大節中和樂。升座。豫平。還宮。履平。丹

陛樂。益平。

皇后三大節中和樂。升座。淑平。還宮。順平。丹陛樂。正平。○諭曰。兩淮鹽政吉慶。因山。清等八州縣。食鹽壅滯。屢次奏請通融酌銷。以三分留運本地。以七分撥於綱鹽口岸行銷。戶部照例議以不准。朕思通融撥銷鹽引。自於商人有益。第其夾帶影射之處。該鹽政等亟當實力稽查。以清弊竇。著暫准其所請行銷。俟一二年後。食鹽疏通之日。該鹽政奏聞。仍照定例辦理。○大學士等議奏。鑲白旗滿洲暨正藍旗滿洲。鑲白旗蒙古都統等各奏稱。按月所收房租銀。俱不敷各項公費應用。應請動用何款。抑或在本旗變賣官房價內動支等因。俱奉旨交臣等一併議奏。查各旗數年來。取租房屋。全行租出。年分甚少。公費取用雖有定額。但各旗多寡不一。即一旗內辦理一事。亦有前後用數不等者。又有不應動用事件。而一旗竟行獨支者。此皆各該都統。並

不留心辦理所致。臣等酌議護軍統領處支領拉帳房車脚係酌道路遠近用銀多寡不一。此項所用甚多。嗣後不必動用房租。即在從前八旗交戶部收貯賣房價銀三十九萬四千一百三十六兩零內動支。修房即在各旗應得租內酌支。若現餘銀兩不敷。可緩修者。俟續收租銀再修。不能緩修者。該旗奏明交工部估修。亦在部存房價內動支。餘各項公用。應飭交八旗大臣照臣等所議應用。毋得浮用。不應一概停取租房。交該管官員切實取租。該三旗所請應用公費。准在各該旗房價內動支。從之。○壬戌。

孝莊文皇后忌辰遣官祭

昭西陵○

上詣

皇太后宮問安○以少詹事雷鏞為通政使司通政使○調河南布政使趙城來京。以京員用。以直隸按察使嚴瑞龍為河南布政使。清

河道王師為直隸按察使。○癸亥。諭直省文武生員三年歲考一次。若臨場不到。即行黜革。其遊學患病者。皆取結開報。限三月內補考。違限者。分別降黜。定例。綦嚴。所以考優劣而示勸懲也。近聞各處士子。有任意遷延。屢次欠考者。江蘇為尤甚。此風漸不可長。嗣後除無故臨點不到。即行黜革外。凡係病假生員。其上屆開報者。下屆果係遊學未歸。患病未痊。該教官查驗確實。再行詳請展限。一俟病痊回籍。即送補考。如欠至三次以外。俱不准展限。竟行黜革。倘有扶同捏報。不行詳請展限者。該學政嚴查。將教官叅處。以專責成。○是日起。

上以歲暮裕祭

太廟齋戒三日。○甲子。諭軍機大臣等。直隸總督那蘇圖。成效摺內。奏稱宛平縣富戶。廣放印子錢。重利盤剝。甚為民害。今止許取息三分。漸知禁制等語。現在步軍統領衙門。訪有

宛平縣居住民人侯有躬兄弟放債利民。竟有至加三利息者。重利如此。安得謂之漸知禁制。那蘇圖所奏成效第一條內。即無實際。則其餘款條。大抵皆屬空言。詎朕令督撫履奏成效之本意。爾等可寄信與伊。嗣後務須實力奉行。毋得仍事空言。以為粉飾。○又諭曰。熊岳副都統鄂齊爾。不稱職任。著留京以本旗護軍叅領補用。所遺員缺。著什勒們調補。什勒們員缺。著納木占補授。所有辦理青海夷情事務。著忠佛保授為副都統。職銜前往辦理。○大學士張廷玉等奏本月二十四日。三禮館恭進儀禮禮記義疏。奉旨交臣等閱看。但查該館奏內。據稱三禮義疏。卷帙浩繁。開館迄今。總裁屢易。前進周禮義疏。中有抵牾駁雜之處。尚須重加釐正。該館既有此奏。則此儀禮禮記與周禮。恐有異同。應請并發該館互加校正。校畢。遵旨詳加閱看。以歸畫一。得旨。著張廷玉、高斌會同該館辦理。○

乙丑。以歲暮祫祭。遣官祭

太廟中殿。

後殿。○丙寅。祫祭

太廟。

上親詣行禮。○遣官祭

永陵。

福陵。

昭陵。

昭西陵。

孝陵。

孝東陵。

景陵。

泰陵。○遣官祭

端慧皇太子園寢。○遣官祭

太歲之神。○諭軍機大臣等。粵關岸口。向係委派地方官員稽查。未能妥協。自改用旗人之後。積弊漸次剔除。今準泰管理關務。各口仍用旗人辦理。但旗員甲兵。均非巡撫所轄。

選派差弁容有呼應不靈之處可寄信將軍錫特庫等令其於旗員內慎重選派稽查分別勸懲仍不得干預權政○丁卯

上詣

皇太后宮問安○御保和殿筵宴朝正外藩左翼科爾沁親王羅卜藏袞布郡王阿旺藏布敖漢貝勒羅卜藏科爾沁額駙色布騰班珠爾貝子喇錫喀爾喀貝子喇布坦輔國公策布登札布烏喇特輔國公達爾瑪奇立第喀

爾喀鎮國公恭格喇布坦科爾沁輔國公瑪哈瑪玉爾輔國公喇錫色旺喀爾沁輔國公札喇豐阿科爾沁和碩額駙喇錫納木札勒右翼喀爾喀札薩克圖汗巴勒達爾郡王德木楚克厄魯特郡王色布騰旺布喀爾喀貝勒拉旺多爾濟貝子多爾濟旺舒克貝子旺札勒科爾沁貝子銜達爾瑪達都喀爾喀輔國公齊旺厄魯特鎮國公古楚克喀爾喀輔國公密什克喀爾喀札薩克台吉烏穆布濟

台吉旺多爾濟台吉里木丕勒多爾濟等及領侍衛內大臣大學士等召羅卜藏袞布阿旺藏布羅卜藏色布騰班珠爾喇錫策布登札布巴勒達爾德木楚克色布騰旺布拉旺多爾濟達爾瑪達都等至

御座前賜酒成禮○是月直隸古北口提督馬爾拜奏古北石匣密雲等處自八月平糶迄今市集米價每倉石價銀一兩三四分不等較之未開糶前頗減應暫停平糶俟來春青黃不接時糧價昂貴再行咨會督臣將存剩米石減糶接濟得旨是知道了○兩江總督尹繼善奏查賑徐鳳泗等屬並分別資送被災流民得旨古云救荒無善策惟在實心辦理耳○又奏恭謝聖訓並蒙委臣以河工之事戒不得推諉白鍾山亦不得為之隱飾臣聞命感悚自愧知識短淺究未能熟諳河工惟有殫竭心力冀効涓埃斷不敢稍萌推諉之意至河臣白鍾山歷任河員深悉冒銷積弊於稽核錢糧未免

過嚴雖辦公勤慎有餘而識見未能開拓共
事以來亦經屢加規勸第相隔較遠即臣之
心力實愧多有未周今惟當益砥公忠事事
確實辦理不敢一毫隱飾以仰副委任責成
之至意得旨覽奏俱悉○又奏歷勘上下江
河道情形並詢問該處耆老將所以被水之
由及作何修治之法已反覆講求其應修應
浚工程定有成局惟因各處河道支分派別
頭緒繁多其寬窄淺深必須逐一測量方可
定議目下河冰凝結難施丈估若一欲速必
至辦理草率已揀員分留各處俟冰融即覆
勘繪圖具稟臣等再加確核縷晰妥議請旨
遵行得旨知道了欲速固不可因循亦不可
也○江蘇巡撫陳大受奏銅山縣呂梁莊一
帶秋間被災最重今復因冰凌阻塞黃水陡
長三四尺淹及已涸麥地漂沒民房所領賑
糧又成烏有已查明被凌人戶不分極次貧
民俱補給一月口糧俟水涸再借給籽種補

種目下天氣晴暖積凌已消河水漸落民情
寧帖得旨是應加意撫綏者○又奏前奉諭
旨截留淮徐海各屬漕米接濟災區伏查淮
屬之安東例不徵漕阜寧係全災並無熟田
清河桃源熟田係瘠土止徵折銀並無漕糧
除此四縣外所有山陽鹽城銅山沛縣蕭縣
碭山邳州宿遷睢寧海州贛榆沐陽等十二
州縣熟田並豐縣應徵漕贈等米約共六萬
數千石俱遵旨截留其海州贛榆二處漕糧
係徵折價官為採買起運時價高昂每米一
石折徵常在一兩以外今奉截留應畫一定
價每石一兩徵收即作折賑之用停其採買
至先奉截留之十萬石擬派秋成豐稔之府
州等屬截留酌量撥運淮徐海三屬貯倉備
用其淮徐海帶徵緩漕飭緩至明冬帶辦得
旨所奏俱悉○又奏淮安府屬之阜寧縣因
陳家浦決口黃水漫溢被災較他邑為重先
經委員查造饑口正值水勢日長居民遷避

高處難於按莊問戶。遂有刁猾之徒。及奸書蠹役。乘機捏冒混報。當即委員確查。從前捏冒各戶。現有自行首繳者。有銷毀不敢赴領者。其舞弊捏造之書役地保。俱經查出提訊究處。統計刪除捏冒大小口三萬二千有零。其餘飢口。皆覆核確實。依期散賑。民情帖服。至陳家浦漫溢之地。水已斷流。悉經種麥。其缺口止築越隄。無應行另做之工。得旨覽奏俱悉。又批。此非小弊。應重處若輩。以示警。且豈無失察之屬員乎。何未奏及耶。○又奏。接准四川巡撫紀山密寄一件。內開查有奸徒在川省混貼偽示。文義不通。詞語狂悖。且稱河南等省俱有稱王稱公者。駐劄招兵。示尾蓋偽印一顆。不成篆文。似係道家符上之木印。現在密拏。尚無踪跡等語。臣查川省現有夏逆一案。此偽示或即其逆黨所為。妄稱各省有人。以為聳動煽惑之計。若一張揚窮究正墮其術。因密諭各屬。留心查察。勿得聲張。

漏洩亦不得藉鎮靜為名。致奸匪潛匿地方。轉滋日後隱害。得旨是。應如此辦理。閩浙總督馬爾泰等奏臺灣番薯蔡溪浦民人被兇番連次夥衆焚殺。業經緝獲數名。其逸犯現在嚴飭勒緝。得旨。此等兇係地方官平時疎縱之故耳。即武職亦應查叅。以示警。○福建巡撫周學健奏省會烏龍江以南閩縣所屬之南洲尚幹串墩房三村。面江負山地居偏僻。為盜賊淵藪。南洲一村尤為潛藏巢穴。其窩盜以薛能太為渠魁。三村皆聽指揮。因密令中軍叅將李兆查辦。訪知各賊四出行竊。每於冬至前後必回家歇息。隨令督帶弁兵及熟識線路之人。馳往南村。各賊猝不及備。將薛能太擒獲。并獲案賊十九名。復至尚幹擒獲賊首。並夥賊九名。其串墩房賊首已先出外行竊。搜捕無獲。僅獲餘賊四名。並訪出烏龍江峽兜塘汛兵朱貴。素為薛能太潛通消息。是以官役不能弋獲。業經鎖拏究辦。

其各犯擬以三等定罪。如審係積窩積賊。即照積匪猾賊例充發。次者問徒。再次者或帶小枷。或墩鎖充警。不使復聚一處。並飭令搜捕夥黨。不留餘孽。得旨。此事辦理甚屬可嘉。知道了。○湖廣總督鄂彌達奏蒙恩實授總督。恭摺奏謝。奉硃批。以滿招損。謙受益。為戒。祇領。

聖訓。惟有省愆戒滿。虛心集益。期仰副鞭策。駕頑之盛意。得旨。汝雖能為是言。然朕聞汝借巡查為名。使子拜客。收受饋遺。是誠下愚不移也。汝尚何顏對朕面欺乎。○河東河道總督完顏偉奏。受任河東。三年以來。工程水勢。頻經危險。仰蒙

聖諭周詳。獲免愆尤。自顧才識短淺。時虞隕越。現今老母七十八歲。祇臣一子。且自江南大水之後。時有驚悸之疾。懇恩賞一在京差使。俾得侍母回京。効力行走。得旨。一時不得其人。河東汝亦尚可勉勉支持。不必辭。若以為

勝任而愉快。則實未見慎之。○川陝總督公慶復奏。前於十月十四日。會同川撫臣紀山。具奏三路官兵。連克瞻對一摺。荷蒙硃批。戒勿姑息了事。務成一勞永逸之計。伏查賊酋班滾。雖負固抗敵。但抗拒日久。其勢亦蹙。現在乞降。雖非實心。臣前經差弁。由其巢穴經過。查探情形。懈於守備。似因糧食並鉛藥短少之故。我兵奮力前進。自能攻克。賊酋授首。餘孽雖衆。亦易擒制。惟在善後料理得宜。不敢姑息了事。以期一勞永逸。又奉硃批。以賊入箐者多。將來作何了局。查瞻對番人。雖稱允頑。然其始未必盡為夾壩。良頑亦當有別。伊等既為班滾所屬。大兵壓境。班滾敢於抗拒。勢不得不荷戈相從。得計則咸各鳴張。失計則滾箐藏避。首逆一除。伊等自俱解體。然後於辦理善後之際。查其向為夾壩而有案者。按律究擬。其餘另設土目。責令稽查管束。似可化頑為良。不致有人衆難制之虞。得旨。

覽奏俱悉。○又奏攻剿膽對之北路領兵官宋宗璋報稱自十一月十七日至十九日復連克阿斯奪取山梁碉座。剿殺賊番。大獲全勝。復據中路總統袁士弼報稱十月十一日夜復攻克底朱。占獲要口大路一處。十二日又遣官兵往攻碉樓。自寅至酉。連斃多賊。仍俟陸續再為輪攻。其南路領兵官馬良柱已於十月二十八日起營。進攻班滾巢穴。但先議南北兩路夾攻。今北路既不由然多前進。復回靈達。而馬良柱前攻破之松多熱賽擦嗎所。擦牙所等處。又留兵防守。軍勢少分。難以輕入。在途緩行。等候新調德爾格兵五百名到日。再行前進。至班滾乞降。雖已擒獻賊賊。呈繳盔甲。但終懷疑懼。尚未親出投見。適准提臣李質粹札商。宜乘其畏懼乞命之時。暫准投誠。擒獻夾壩。供出一名。再令擒獻一名。供出十名。再令擒獻十名。稍有支吾。即為攻擊。庶夾壩可以盡得。意在以逸待勞。然未

進兵之先。當以除夾壩為事。既進兵以後。班滾敢於屢為抗拒。則當先治其標。班滾一經投首。羣賊自即解體。若令班滾身處其地。則羣賊有所倚恃。更不能盡除。況僅令擒獻賊賊。彼不難詭指數人以應。仍屬草率了事。且班滾果係畏威乞降。總統先既許以不死。後又有德爾格土司作保。尚何不敢詣營叩求。明係藉詞觀望。協力進攻。彼或畏威而出。否則仍負固抗拒。以緩時日。豈可因此即懈。臣現派將弁到彼。酌看情形。知會南路。或俟歲底乘懈協攻。或另作何設法剿辦。務期必克。以靖地方。如須臣親往。俟差往將弁等具稟到日。即一面具奏。一面起程。得旨覽奏俱悉。又批。甚好。昨為此事諭卿。今卿此奏。與朕不約而同。嘉是之外。無可批諭。卿其照前諭酌量為之。總之此番當期一勞永逸之謀。不可遺患日後也。○又奏三路官兵自十一月二十日至十二月初一日。復攻克阿斯。羊雀。並

臘蓋下寨及下密卡倫各情形得旨所奏亦不過小小擒獲耳賊未大破安得謂之武功耶其督令將士奮勇前進務擒班滾明正典刑以靖地方○兩廣總督策楞奏安南夷匪莫康武等初猶止竊踞夷境之文蘭驅驢等處茲據沿邊稟報夷境之處東處南宣光清化安廣太原等郡俱為莫康武所有以莫登庸子孫復讐為名所到並不殺戮凡拏獲夷目即令招安所管之民追逐時或稍近內地邊隘立置於法條教文詞俱遵

天朝法度安南僅有處西處北力漸不支等語查安南連年以來構兵不已在內地惟有嚴我邊防示以鎮靜並嚴飭加謹防範各隘亦酌量添兵總期外匪內奸不致一人潛出竄入米穀等項以及違禁貨物悉力稽查得旨所見是知道了雲南總督兼管巡撫事張允隨奏普洱鎮總兵崔善元因疎縱橄欖壩要犯刁慍刁先經臣叅奏請旨革職留普勒

緝伏查橄欖壩袤延千里接壤外域自雍正五六等年及十年間逆目刁正彥等倡亂用兵討平經今十有餘年久獲寧謐今刁慍刁先二犯乃刁正彥之子先逃在外國南納地方甫回壩地即派收各寨銀兩招集舊日民人等代為具稟求管地方自應早圖弋獲已令署普洱鎮鄭文煥會同崔善元及新任普洱府知府谷確著令思茅土千總刁輔國等前往相機擒拏茲復接奉諭旨崔善元革職仍留原任勒限三年緝獲准其開復如逾期不獲兵部奏聞請旨臣當即欽遵知會該鎮崔善元當感激

聖恩高厚務期早為弋獲勿令久居壩地滋事得旨覽奏俱悉崔善元如不能辦此事或復掩飾以釀患則將來何以善其後卿宜留心體察○貴州總督兼管巡撫事張廣泗奏前因古州鎮總兵崔傑疎縱弁兵業經叅奏惟是古州一鎮係新闢苗疆必需老成練達鎮

臣調補彈壓查黔省各鎮中惟安籠鎮臣宋受詳慎周密統率將備尤極嚴明且年力正壯請調補古州鎮至古州鎮臣崔傑人雖輟弱而操守謹飭年力未衰可否即以之調補安籠鎮藉觀後効得旨卿既如此奏已有旨諭部矣但宋愛為人恐在好事喜功一邊卿可時常留心策勵之彼若能去此結習固是一好鎮材也○是年旌表孝子江寧等省管增等三十名孝友安徽錢雲鳳善士湖南江承燧孝義山西等省蘇陵等五名孝婦湖南張氏等二口孝女湖南賈氏守節合例宗室馬岱妻伊爾根覺羅氏等六口八旗滿洲白達色妻傅察氏等二百十八口蒙古六十妻齊拉克忒氏等四十一口漢軍郎應甯妾宋氏等一百十二口順天等省余天儒妻錢氏等一千七百七口夫亡殉節滿洲花尚阿妻覺羅氏直隸等省殷壯猷妻李氏等五十一口烈女山東等省辛靠山聘妻梁氏等六口

未婚守志宗室瑤海聘妻那拉氏廣東等省黃存生聘妻沈氏等三十口百歲壽民婦奉天等省崔金彩等二十二名口各給銀建坊如例○一產三男直隸等省姚良等十四家○會計天下民穀數各省通共大小男婦一萬六千九百九十二萬二千一百二十七名口各省通共存倉米穀麥三千五百五十八萬六千六百十三石三斗一升有奇

大清高宗法天隆運至誠先覺體元立極敷文奮武孝慈神聖純皇帝實錄卷之二百五十五

大清高宗法天隆運至誠先覺體元立極敷文奮武孝慈神聖純皇帝實錄卷之二百五十六

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十一年丙寅春正月戊辰朔

上詣

奉先殿行禮○詣

堂子行禮○率王以下文武大臣詣

壽康宮慶賀

皇太后禮成御太和殿受朝作樂宣表如儀○

詣

大高殿

壽皇殿行禮○遣官祭

太廟後殿○庚午

上詣

雍和宮行禮○恩恤刑獄減等諭古帝王治天

下之道以省刑薄賦為先朕臨御以來愛育

黎庶惟日孜孜於茲十年矣仰荷

天

祖眷佑海宇乂安萬民樂業朕心慶慰特沛曠

典與民休息上年夏月頒發諭旨將天下正

賦普免一週是間閭閻已均被惠澤矣惟念各

省獲罪之犯於上年勾到之後現在羈禁囹

字第 八 字 十 六

圜者雖伊等孽由自作法無可寬而其中情

事不同輕重亦有差別國家赦宥之典或因

行慶施惠或因水旱為憂間一舉行今朕哀

矜庶獄不忍令其淹滯圜扉所有刑部及各

省已經結案監禁人犯除情罪重大及常赦

不原者無庸查辦外其餘著大學士會同刑

部酌量案情輕重分別請旨減等發落其軍

流徒杖以下人犯一併分晰減等完結俾伊

等同霑肆赦之恩勉圖自新之路以副朕協

中欽恤本懷。欽定祭祀中和樂章名。

圜丘樂迎神始平。奠玉帛景平。進俎咸平。初獻壽平。亞獻嘉平。終獻永平。徹饌熙平。送神清平。望燎太平。

方澤樂迎神中平。奠玉帛廣平。進俎合平。初獻大平。亞獻安平。終獻時平。徹饌貞平。送神寧平。

祈穀樂迎神祈平。奠玉帛綏平。進俎萬平。初獻寶平。亞獻穰平。終獻瑞平。徹饌渥平。送神滋平。望燎穀平。

雩祭樂迎神霽平。奠玉帛雲平。進俎需平。初獻霖平。亞獻露平。終獻霑平。徹饌靈平。送神霽平。望燎霽平。

太廟時享樂迎神貽平。奠帛初獻。敕平。亞獻敷平。終獻紹平。徹饌光平。還宮又平。

太廟祫祭樂迎神開平。奠帛初獻肅平。亞獻協平。終獻裕平。徹饌誠平。還宮成平。

社稷壇樂迎神登平。奠玉帛初獻茂平。亞獻育

平。終獻敦平。徹饌博平。送神樂平。望瘞徵平。社稷壇祈雨報祀樂迎神延豐。奠玉帛初獻介豐。亞獻滋豐。終獻需豐。徹饌綏豐。送神貽豐。望瘞博豐。

朝日壇樂迎神寅曦。奠玉帛朝曦。初獻清曦。亞獻咸曦。終獻純曦。徹饌延曦。送神歸曦。夕月壇樂迎神迎光。奠玉帛初獻升光。亞獻瑤光。終獻瑞光。徹饌涵光。送神保光。

歷代帝王廟樂迎神肇平。奠帛初獻興平。亞獻崇平。終獻恬平。徹饌淳平。送神匡平。

文廟樂迎神昭平。奠帛初獻宣平。亞獻秩平。終獻敘平。徹饌懿平。送神德平。

先農壇樂迎神永豐。奠帛初獻時豐。亞獻咸豐。終獻大豐。徹饌屢豐。送神報豐。望瘞慶豐。

先蠶壇樂迎神庥平。奠帛初獻承平。亞獻均平。終獻齊平。徹饌柔平。送神洽平。

神祇壇樂迎神祈豐。奠帛初獻華豐。亞獻興豐。終獻儀豐。徹饌和豐。送神錫豐。

太歲壇樂迎神保平。奠帛。初獻。定平。亞獻。嘏平。終獻。富平。徹饌。盈平。送神。豐平。

太歲壇祈雨報祀樂迎神需豐。奠帛。初獻。宜豐。亞獻。晉豐。終獻。協豐。徹饌。應豐。送神。洽豐。

○辛未。命蠲賦之年。緩徵耗羨。諭朕愛育黎元。格外加恩。將各省錢糧。普免一次。以為休養萬民之計。經大臣等酌議。國家每年一定之經費。皆取資於正賦。應將各省分作三年蠲免。則經費有賴。而先後之間。萬民均霑膏澤。至於耗羨。乃有司養廉及辦理公務之所必需。應令照舊輸納。朕已允行。今思朕之逾格蠲免。天下正賦者。所以藏富於民。且使閭閻之間。終歲不聞催科之聲也。今正賦既蠲。而耗羨又令完納。是官民仍有交關。猶不免有追呼之擾。若將蠲賦之年。應徵耗羨。一併緩至開徵之年。按數完納。使小民於交官之便。完此些須。不必兩次伺候於公庭。亦體恤民情之意。著該部即遵諭行。並將公用不敷

之處。作何撥抵。酌議辦理。各省督撫。當董率有司。善為之。勿因此又別生弊端也。○壬申。上以孟春享

太廟。是日起齋戒三日。○甲戌。

世祖章皇帝忌辰。遣官祭

孝陵。○諭軍機大臣等。朕看近來福建督撫光景。諸事皆周學健主持。馬爾泰不過依順而已。周學健急公認真。固屬可嘉。然諸事越俎。亦非所宜。若一省之事。悉聽巡撫主持。則總

督豈非虛設耶。從前那蘇圖與周學健大相水火。有礙公事。是以朕降旨。將二人俱行訓飭。凡督撫原當和衷共濟。然聖人云。君子和而不同。馬爾泰一味順從。則是流於同矣。可傳旨與馬爾泰。周學健。當思國家設官體制。勿但博和衷之名。有乖中道。以那蘇圖從前較之。所謂過猶不及也。○又諭曰。西藏郡王頗羅鼐。素効忠誠。勤勞懋著。自朕御極以來。一心靖共。凡事俱竭力奮勉。辦理妥協。殊屬

可嘉。著加特恩。將伊子內封一長子。長子係日後襲王爵總理彼處事務之人。關係緊要。著諭知駐藏辦事之副都統傅清。將朕此旨曉諭頗羅鼐。在伊二子內。擇一才堪繼續。悅服衆心。裨益公務者。保奏候朕降旨。尋經駐藏大臣傅清等。詢明奏覆。命封其次子珠爾默特那木扎勒為長子。諭曰。前以西藏郡王頗羅鼐一心肫誠奮勉。特施恩於伊二子內。封一長子。命伊指出具奏。今據頗羅鼐以伊長子珠爾瑪特策卜登已屬殘疾。次子珠爾默特那木扎勒堪以奮勉出力。伊兄弟互相遜讓。並無爭競。即彼處噶卜倫第巴大喇嘛等亦皆心服。等因具奏。應如所請。將珠爾默特那木扎勒封為長子。珠爾瑪特策卜登因從前帶兵在邊境出力。曾施恩封為輔國公。今雖有殘疾不能効力。並著加恩封為鎮國公。該部知道。○定外省副都統分年陞見。諭各省將軍大臣等。俱係選擇進用之人。其每

歲輪班來京。祇循年例陞見。並無應辦之事。內如將軍都統均係豫奏請旨。准來與否。經朕臨時酌定。至副都統並未具奏。於報部後。即行來京。其遠處者亦與近處之人一體輪班請覲。並有將軍副都統二人同來者。伊等往來不無需費。嗣後廣州福州涼州三處每處副都統各二員。著間年輪一員來京。設遇將軍陞見之年。副都統即不必來。俟次年再來陞見。杭州西安綏遠城右衛歸化城之副都統各四員。每年著各來京一員。綏遠城歸化城程途較近。遇將軍都統陞見之年。副都統亦可照常來京請訓。至青州地方較天津等處稍遠。青州將軍副都統二人著於三年內每人來京一次。○盛京戶部侍郎宗室蘊著奏。雍正五年三月。大學士尹泰奏請將盛京倉務交巡察盛京之御史兼行稽察。是年五月。又經御史博鼐奏請會同該部侍郎稽察。均經部議准行。節年遵照辦理。惟是倉庫

並重。盛京銀庫。未便專由該侍郎率同所屬司員稽察。應請照查倉事例。交巡察御史會同稽察。得旨。知道了。妥為之。○乙亥。享

太廟。

上親詣行禮。○詣

皇太后宮問安。○遣官祭

太歲之神。○丙子。

上詣

大高殿行禮。○御紫光閣大幄次。賜蒙古王公

等宴。○丁丑。召諸王大學士內廷翰林等茶

宴。以重華宮錫宴聯句。○諭據慶復奏稱總

統哈密防兵加總兵銜副將瑚寶丁母憂。例

應回籍守制等語。總統哈密駐防官兵著大

同鎮總兵王能愛去。瑚寶俟夷使回巢後。再

行交代回旗。○兵部議覆漕運總督顧琮奏

稱鹽城營額設沙船四隻。備巡哨之用。但外

洋水勢隨潮消長。難以預定。造船惟在適宜。

沙船平底方頭。體骨重大。不甚利便。且洋匪

乘坐快船。搶風折戣。出入靡常。凡官兵巡緝。若非帶有外洋快船。萬難奮追。請將鹽城營二號沙船一隻。改造外洋快船二隻。船長七丈。較沙船所短無幾。出洋入港。甚為利便。年例既當排造。以一改二。價無加增。船得實用。檄飭營縣及時辦料興工。無誤巡期。應如所請。從之。○戊寅。

上以祈穀於

上帝。是日起齋戒三日。○己卯。諭向來歸化城

都統副都統到任之後。俱賃民房居住。未曾

設有官署。著交與巡撫阿里衮會同綏遠城

將軍補熙。定議酌量建造。○諭軍機大臣等。

朕聞鄂彌達在楚。聲名不好。操守亦不謹。即

如出巡各府。令其子往拜屬員。收受餽遺。彼

已身不受。而令其子收受。與自收何異。驗看

兵丁。不過挑選幾名。以應故事。並未實心驗

試。其膜視營伍。又如此。從前鄂彌達在廣。聲

名不好。已經罷斥。朕宥其過愆。復加重用。且

將伊應完之帑項令其逐年扣抵償還免交房產。伊受恩若此自應痛改前非力圖報稱乃舊習復萌罔知儆惕可謂下愚不移矣。因念伊上年方膺實授之恩旨此時驟行更換有關用人治體爾等可傳旨嚴行訓諭令其速行悔改以圖後效。倘再不知悔悟則朕必加處分難望復行寬宥矣。○以山東布政使圖爾炳阿雲南布政使阿蘭泰對調。○庚辰

上詣

南郊齋宮齋宿。○諭軍機大臣等朕聞鄂彌達在楚聲名不好操守亦不謹即如出巡各府令其子往拜屬員收受餽遺已身不受下屬之禮而令伊子收受與自收何異至於看驗兵丁不過挑選數名以應故事並不實心驗試其忽視營伍又如此鄂彌達出巡既到湖南各郡楊錫紱身在地方知之必悉何以竟未奏聞可寄信詢問之。尋據湖南巡撫楊錫紱奏覆鄂彌達於上年九月內前來湖南巡查所有澧州營官兵聞係委官考

驗常德府為提臣駐劄之地所有官兵係會同提臣王無黨全行考驗鎮草官兵係商令提臣前往考驗龍陽水師營係督臣親閱水操長沙撫標及各協官兵係全行考驗其兵丁係抽摘考驗又岳州水師聞係全看城守營官兵係全看兵係摘看至督臣出巡帶有幼子隨行在長沙曾來拜臣並回拜在省司道所有司道致送酒席其子收受屬實府廳以下並無餽遺收受之事謹據實覆奏得旨俟朕問及敢不據實此等據實誰則不能○辛巳祈穀於

上帝

上親詣行禮。○是日立春順天府進土牛春山寶座。○以山西殺虎協副將那爾泰署大同鎮總兵官。○壬午

上詣

皇太后宮問安。○詣

壽皇殿行禮。○御箭亭賜朝正外藩等宴召科

爾沁親王。羅卜藏衮布。郡王。沙津德勒格爾。教漢郡王。吹木丕勒。貝勒。羅卜藏。科爾沁固倫額駙。色布騰巴爾珠爾烏珠穆沁護國公。朋蘇克。拉布坦。喀爾喀世子。成衮扎布。喀喇沁郡王。拉特納錫第。烏喇特郡王。色布騰旺布。喀爾喀扎薩克台吉。阿保賚春扎布。拉布坦等。至御座前。賜酒成禮。○順天府行鄉飲酒禮。

大清高宗法天隆運至誠先覺體元立極敷文奮武孝慈神聖純皇帝實錄卷之二百五十六

大清高宗法天隆運至誠先覺體元立極敷文奮武孝慈神聖純皇帝實錄卷之二百五十七

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次尋常紀錄十四次臣德瑛經筵講官太子少保工部尚書紀錄六次臣曹振鏞等奉

教修

乾隆十一年丙寅正月癸未

上奉

皇太后幸瀛臺。駐蹕。○諭軍機大臣等。進勦瞻對一事。據慶復奏報現在情形。伊等尚屬盡心。事平之後。班滾抗拒首惡。及伊妻孥。自應照例治罪。其餘番衆。固無盡行殲滅。即其地方。亦無設立郡縣之理。祇可倣照苗疆之例。選擇頭目管束。以番治番而已。但其風土形勢。及番衆之強弱奸良。俱須熟悉。方可辦理。合宜一勞永逸。李質粹不能辦理此事。必得

慶復前進相度機宜庶幾料理有益至於進
勦軍務已閱數月之久尚未搗其巢穴現在
李質粹已經進至章谷若慶復再為前進俾
得聲勢聯絡相機調遣於軍務自可速竣可
寄信與慶復令其酌量前進既可以壯目前
聲勢日後平定又得就近往彼察看情形妥
酌辦理○實授多綸為山西按察使○甲申
上奉

皇太后還宮問

皇太后安○乙酉諭軍機大臣等據江蘇布政使
安寧奏稱江蘇各屬自乾隆元年至乾隆九年
未完錢糧不下二百餘萬今丙寅年錢糧全行
蠲免趁此餘閒可以料理請委員徹底清釐等
因經大學士會同該部議以丙寅年係與民休息
之期若逐一清查不無滋擾非休養萬民之意
應俟開徵之年查辦朕已降旨依議但江蘇錢
糧從前舊欠最多自雍正年間清查之後積弊
已除此後即當隨時查察節年清楚何以復有

拖欠即如安寧奏稱若不及早設法清理恐年
分愈久弊實愈深役故官更莫從究治斷非徹
底清查不可又奏稱及早清理猶可設法追償
即使役蝕無幾亦可儆惕將來并請定清查之
法酌委總協查辦人員等語此項舊欠或係役蝕
或係民欠在安寧且不能明悉是以奏請清查夫
清查徒致滋擾耳若果能隨時留心辦理何至拖
欠如此之多與其事後清查何不於徵收錢糧
時隨年清楚乃於休息之年始請清釐不特非
除弊之法亦非為治之體况尹繼善陳大受
歷任督撫已久安寧在布政使任亦已多年
竟將地方要務置若罔聞皆伊等因循玩忽
全不實心查辦之所致爾等可寄信與尹繼
善等俟開徵之年即行設法清釐按年查察
毋使積習相沿逋欠愈重更須妥商辦理使
閭閻不致滋擾○以貴州安籠鎮總兵宋愛
古州鎮總兵崔傑對調○丙戌
上幸瀛臺駐蹕○諭貴州拏獲夏如春一案辦

理甚屬可嘉。張廣泗著交部議敘。其在事出力文武員弁著該督查明咨部一併議敘。○刑科掌印給事中程盛修奏。枷杖以下人犯多有赦而復犯。犯而又赦者。乞勅下直省督撫通行所屬。凡恩赦人犯。於減等發落之日。各取改過自新甘結。再犯加等治罪。并於通衢僻壤將罪名詳細昭揭。使知肆赦實出特恩。不但身受者潛消桀驁之情。即聞風者亦早泯覲覲之念。得旨著照所請行。○丁亥。

上詣

皇太后宮問安。○還宮。○戊子。諭軍機大臣等慶復李繩武奏請三角城建城添兵一事。經軍機處議令繪圖呈覽。到日再議。朕已降旨速行。但大通設鎮數年之後。因其地處極邊。最為僻遠。聲勢不能聯絡。是以改鎮為協。酌建四堡。迄今十有餘年。亦俱安靜無事。今慶復又請建城添兵。朕思當日設鎮駐兵數千。尚且不能聯絡。今三角城一處。即使添兵五百。較之

從前營制。仍屬減少。於邊防未必有益。且大通西南。乃青海蒙古平日往來地方。伊等現俱寧謐。今忽於此建城添兵。反啟伊等疑議。以為有意防範隔絕。亦屬非宜。可寄信與慶復。令其體悉此意。再行斟酌。或伊回西安時。便道再行往彼細查情形。或已深悉其地不必再去之處。具摺奏聞。○軍機大臣等奏。遵旨查辦奉天流寓民人一案。前奉恩旨。令情願入籍之民。取保入籍。不願者定限十年陸續回籍。迄今五年有餘。該府尹霍備莅任數載。其各州縣流寓民人。並未取保入籍。亦未令其回籍。漫無稽查。而定議後出關人數。續添四萬七千餘口。聚集益衆。是奉旨立限之案。該府尹既不實心辦理。又不將不辦緣由奏聞。實屬怠玩。請將霍備解任來京。交部議處。至將軍達勒當阿同任地方。咎亦難辭。但到任未久。且旗人所居之地。尚無流寓民人。應令該將軍回任後。作速委員。會同地方官

實力查辦。毋得仍事因循。從之。○己丑。諭軍機大臣等。清理奉天民人一案。府尹霍備懸擱不辦。朕已照議交部議處。奉天風俗向來淳厚。後因民人聚集日衆。漸染澆漓。臣工奏請定議。勒限半年。俱令回籍。朕以關內關外皆係赤子。伊等寄寓日久。一旦驟令搬移。未免失業。是以定限十年。令其陸續查辦。其山海關給票查驗之處。朕照臣工所議允行。今府尹霍備不行辦理。解任來京。交與將軍達勒當阿。會同新府尹查辦。誠恐因朕處分霍備。不能體會朕意。將現在奉天之民。俱勒令入籍。抑或盡令回籍。以致百姓不安。於地方不無滋擾。不知朕之所以處分霍備者。其不編查奉天寄寓民人之過。尚輕。為其出關人數。添至數萬。漫無查察。實屬怠玩。爾等可將朕意傳諭將軍及新府尹。善為辦理。至於山海關出關民人。將來若能查察照會。不致逐漸增多。則奉天現在寄寓民人。亦可漸次清

理。該將軍等自應遵照原議。實力奉行。并寄信與那蘇圖。令轉飭地方官員。留心查察。不得仍前怠忽。○以工科給事中蘇昌為奉天府府尹。○庚寅。

上詣

皇太后宮問安。○鑄給湖北宜昌府分防漁洋關同知。長樂縣分防灣潭縣丞。關防從湖廣總督鄂彌達請也。○辛卯。諭去年上下江被災州縣。經朕降旨加恩賑恤。并截留漕米。以資接濟。閭閻諒不至於失所。惟是各屬賑期俱至正月而止。今春逢閏。計去麥熟尚遠。恐災重州縣百姓。難免拮据。著加恩將被災較重之宿州。靈璧。虹縣。亳州。蒙城。阜寧。安東。清河。桃源。銅山。邳州。睢寧。海州。等州縣。極貧。加賑兩個月。次貧。加賑一個月。被災次重之泗州。盱眙。鳳臺。懷遠。太和。宿遷。蕭縣。沛縣。沭陽。等州縣。無論極次貧民。俱加賑一個月。其各衛隨坐落州縣。一體加給。俾窮黎不致乏食。

該部即遵諭速行。○戶部議覆福建巡撫周學健奏稱福州府屬長樂縣十六都十七都二十三都二十四都四里民田七百餘頃。瀕海環山水至則宣洩無餘。旱乾則灌溉無術。唐天寶間邑人林鷄有田四千餘畝。盡捨已田。瀦而為湖。以資灌溉。四里民田遂成膏腴。原稅四千餘畝。湖糧攤入四里民田均輸。至今四里民田帶納湖稅三分。是湖皆有糧之地。無容再墾報升。自唐以後至明嘉靖年間近湖奸民先後占墾湖田數百畝。至本朝康熙初年忽執有順治九年價買湖基之照。積年久遠真偽莫辨。惟是康熙三十一年題報升科加增銀一十七兩三錢零米二石四斗七升零。湖田三百畝。彼時因奸民黃修等以湖邊墾出荒田。朦混報升。遂致凡執有照者日事壅築。現在丈量湖內墾成熟田已有千餘畝。占去原湖四分之一。總因此三百畝已經升科。效尤影射。懇勅部查明豁除其湖面

凡隄埂以內原屬林鷄所捨之田。並無尺寸官荒。可以墾升。查照原湖丈尺。盡行剷除。廣資蓄洩。並立石碑。長禁近湖奸民藉端壅築。侵占湖面。犯者按律嚴加治罪。應如所請。從之。○癸巳諭普洱鎮總兵崔善元疎縱叛目之子刀愠。刀先經該督張允隨叅請革職。朕從寬留任。令其勒限緝拿。今據張允隨奏稱。刀愠刀先自回橄欖壩。即派收各寨銀兩。又復往來南納。招集夷人。種種滋事。崔善元在彼不能設法查拏。看此即留總兵之任。亦無益於事。崔善元著解任。來京候旨。普洱鎮總兵員缺。甚屬緊要。著該督於通省總兵內遴選一員調補。令其將刀愠刀先嚴緝務獲。其所遺之缺。著將黃士俊補授。○諭軍機大臣等。託庸叅奏唐綏祖一案。現經總督策楞審理所叅各款。有在唐綏祖未任藩司以前者。有在唐綏祖離任以後者。並有非藩司所管者。惟託庸員代買人參及向屬員取償逋欠。

照關防不謹之例。議以革職。其餘皆屬子虛。朕思督撫固封疆大臣。藩臬亦一省大吏。倘有過失。督撫原不可徇情隱庇。但刻意吹求。過於苛覈。有乖秉公持正之道。亦大不可。託庸之待唐綏祖。列款糾叅。究無實蹟。未免吹求太過。爾等可寄信訓飭之。○又諭據那蘇圖查奏涑水。涑州。冒開安營墊道銀兩。現將該州縣另行查叅。并咨商工部。作何立定章程等語。直隸辦差各案。久歷年所。至今尚未清結。揆厥所由。大抵從前辦理各案之時。未免草率。以致駁查。迄今不能清楚。今那蘇圖將找發銀兩扣存。其承辦各員。另行查叅。自應聽其照例查辦。但思

陵寢孔道。乃常年經由之地。一切辦理事宜。固不可任地方官浮冒開報。若過於嚴緊。辦差各員。又恐難免賠累。必須斟酌得宜。方為妥協。現在那蘇圖咨商工部。作何立定章程。爾等可寄信與伊。令其體會朕意。務須斟酌妥

善立定章程。以為永遠可行之計。○鑲白旗滿洲都統奏請補授

福陵防禦員缺。帶領正陪人員引見得旨。

福陵防禦員缺。著擬陪之于雷善補授。今後此等員缺。將情由聲明。繕摺照常奏聞外。其應放擬陪人員之處。另繕摺一併奏聞。將此傳諭八旗一體遵行。○甲午

上詣

皇太后宮問安。○禮部題朝鮮國王李昫遣使

表賀

萬壽冬至元旦三大節。及進歲貢方物。賞賚筵宴如例。○乙未。甘肅巡撫黃廷桂奏。向來沿邊蒙古及哈密瓜州回民。并準夷人等投誠。或令本處團聚。或於別處安插。今聞噶爾丹策零病故。恐其部落內亂。致生事端。嗣後辦理投誠夷人。應請少加分別。如蒙古番回原非準夷所屬。仍照前例辦理。若有準夷頭目率眾來款。應請旨定奪。如不過一二無關緊要夷人前來歸

命或羈管哈密。候夷使進貢。曉諭帶往。或即于卡倫外賞給口糧。令自行回巢。得旨。軍機大臣議奏。尋議。查噶爾丹策零病故與否。未有確信。如彼處有事。酋目率衆款關投誠。應如所奏。請旨定奪。至尋常投誠之人。仍照舊例辦理。無庸令夷使帶回。及令自行回巢。致失懷遠之義。從之。○丙申。恭繕尊藏盛京。

歷朝實錄告成。議敘校對。收掌謄錄。供事各官有差。○吏部奏請新授大學士慶復應授何殿閣。兼何部尚書銜。得旨。慶復著授為文華殿大學士。兼禮部尚書。○江南道監察御史范宏賓奏。八旗官兵習射之日。該管大臣應照例親往校射。如遇奏事會議。應留副都統校閱。不許擅委叅領。仍令查旗御史不時稽察。得旨。每逢習射之期。著查旗御史親往稽查。餘照所請行。○喀爾喀輔國公密旺扎布故。以其子格勒克襲爵。○是月。直隸總督那蘇圖奏。前赴龍泉正定等處沿途查勘道路。

所有應修各工。均已將次告竣。得旨。所奏俱悉。朕幸五臺。大約於八九月間起程。不必急遽也。○兩江總督尹繼善等議。覆漕運總督顧琮奏。稱黃河北岸。蘇家山迤西一帶。民築土堰。請盡行徹去。以洩盛漲。免致徐州上下受險等語。查黃河由豫東入江南。至徐州上游。兩山夾峙。河身陡窄。激溜直逼徐城。是以郡城以上。蘇家山迤西一帶。九十餘里。向不設隄。以為減洩黃水。保護下游徐郡之計。乾隆七年。因石林口衝決。築隄十餘里。以防漫漲。其餘八十餘里。仍舊不設隄防。聽其漫灘過水。惟是近灘居民。間有挑積土堰護衛田疇之處。遇水勢漲發。未能宣洩。應如所奏。將土堰全行徹平。並查禁續行私築。得旨。知道了。○又會同安徽巡撫魏定國奏。覆前奉旨。抄寄署廣東巡撫廣州將軍策楞奏。稱清查各屬倉廩。註明採買年分一摺。令臣等酌議可否。做行之處。查安徽省各州縣常平倉穀。陸

續購補缺額無多。每年俱按存倉年款挨次平糶交代。委員監盤。即有以糶價貯庫者。亦各彈兌接收。並無如廣東之移新作舊。私相折價侵虧情弊。但各屬實存倉糧。亦須逐年查核。應照策楞所奏。嗣後盤查案內。造具嚴口清冊。註明採買年款通報。得旨。此事汝等所辦。亦可謂遲延之極矣。○江蘇巡撫陳大受奏。阜寧縣飢口捏冒一事。經臣陛見時面奏。惟失察各員。尚未奏及。隨於回任辦賑時。將典史湯成鈺。巡檢張世鑣查辦。未能妥協之處。一併於摺內附奏。是否有無串捏情弊。現在確究得旨。此事辦理。殊為姑息市恩。此後戒之。○又奏。銅山。邳州。蕭縣等三州縣。上年被災地畝。續被黃河凌水淹浸。現飭各屬設法宣洩。貧民酌量撫卹。借給得旨。覽奏俱悉。督率屬員加意妥為之。○漕運總督顧琮奏。湖南回空幫船。因北河水勢微淺。並直隸山東。江南等處。沿途守風候潮。以致遲延逾

限。現咨行倉場侍郎及直隸等省。查取應參職名。得旨。知道了。雖其遲滯有由。亦汝姑息所致。○江南河道總督白鍾山議奏。陳家浦隄工。原議正隄後接築重隄。業經勘估趕築。至該處河勢坐灣。隄下河流湍激。應於對岸開挑引河。以分水勢。但必須河勢兜曲。形如倒鉤。方可施工。今查北岸河形。雖稍有灣曲。乃係淤淺坦坡。並無兜曲倒鉤之勢。施工甚難。現指示道廳等。飭令兵夫。在對岸坦坡之處。相機挑挖。以順河勢。並令不時察看。如有可乘之機。即上緊辦理。得旨。知道了。○江西巡撫塞楞額奏。江省各州縣。一切應興應禁事宜。除遵照原定條例。令道府州縣實力奉行外。尚有因時制宜。酌擬數條者。一。江省地窄民稠。而荒僻山場尚多。宜廣為開墾。一。江右山多田少。查南贛二府。種植桐梓。出產油勛。其利甚溥。請飭別府屬勸民栽植。一。謀葬掘塚之案。審係地師煽惑者。除軍流以下仍

照詐誘律擬罪外如犯人犯罪至死地師罪同不得減等。一民間春秋祭祀雖例所不禁然因此迎神賽會遂成惡習嗣後春秋祈報止許於本社內迎賽不得越境生事亦不得數村合奉一神致滋爭鬪。一鄉民爭訟雖由訟師教唆然又有無賴之徒充當歇家唆使成訟應照訟師例一體治罪以上五條請敕部議覆施行得旨所以令汝等摺奏者欲其務實而去文今觀此奏正所謂務文而去實交部何為留覽而已。○江西按察使翁藻奏江浙四川所屬及江西之德興宜黃等縣屢被水患多係蛟發所致臣考月令季夏有伐蛟之文其法雖不傳然詢之野老皆言生蛟之地冬雪不存夏苗不長烏雀不集其土色赤其氣朝黃而暮黑夜視之氣沖於霄候雷雨而興其時在夏末秋初若於未起之前察氣觀色掘地得之其害可絕請通行各省令地方官曉諭居民留心察看如法搜捕得旨

且告之撫臣於汝省試行之。○福建巡撫周學健奏閩省各營兵丁及各衙門書役向例凡遇歲暮與青黃不接之時皆有豫借倉穀並銀兩之事查節年出借兵役米穀雖扣價存庫而未經買補者不下十餘萬石皆緣扣還之價太少購補不敷以致倉項虛懸請嗣後兵丁豫借之項願借銀者借穀一石折給銀六錢於餉銀內按月扣還願借穀者借穀一石於月糧內分季扣還米五斗其書役等借穀一石者亦折銀六錢即在應領工食鹽菜銀內扣還得旨所辦頗妥知道了。○湖北巡撫開泰奏謝新授恩得旨聞督臣精力不及簋簋亦有不飭之處汝雖新任在同城諒無不知若有實據密行奏聞。○又奏潛江沔陽天門荊門當陽漢川江陵枝江等八州縣荊州荊左荊右三衛上年夏秋被水成災雖經查明賑卹然貧民耕作無資請動用倉穀借給得旨是此等處宜留心者也。○又奏誣

告越訴定例。綦嚴。然刁徒往往挾嫌上控。及批發府州縣審理。又故匿不出。致被告守候拖累。現通飭各屬。凡臣衙門批審詞狀。必原告投到。始准拘被告。如原告經旬不出。即申覆存案。遇該犯再行捏控。照例懲治。得旨。此所謂不動聲色而警刁風。甚可嘉也。○山東巡撫喀爾吉善奏。前奉旨鈔寄張孝捏奏稱聊城縣民王天瑞。徐二胡被毆身死。訪聞具奏一摺。命臣盡心緝究。查此案在乾隆七年該縣令蔡蒞驗傷不實。經臣委員覆檢。將蔡蒞題叅。復委員研審再四。至今未得正兇。現又委濟東道陀諾查辦。得旨。屬員互相掩飾之弊。亟當加意。至其事。惟有據理無枉而已。○又奏。東省本年籌辦平糶。請照各屬現在糧價。分別酌減。其從前派撥截留漕米。及所買麥。尚有存剩。量行出借。秋後照一米二穀徵還。得旨。辦理甚是。尚當督率屬員。實力妥為之。則民受惠矣。○川陝總督公慶復奏。臣

節准提臣李質粹咨稱。前因駐劄仁達。凡三路攻擊機宜。與總統往返會商。稽延時日。現移駐木魯工軍營。查北路漢土官兵。進攻靈達。連日奪山梁五道。賊卡十二。燬戰碉六。碉樓二。賊番出碉投誠。隨令其擒賊獻贓。拆燬各碉。現已確查戶口。辦理中路官兵。於攻克臘蓋下寨後。又進攻底朱。燬石砌三層戰碉二。隨會同總統建昌鎮索士弼。酌看形勢。查木魯工。地處河東。逼近河西班滾賊巢。而河東又有甲納溪。底朱。臘蓋。納洪多。茹色等寨。救援。是以班滾弟兄得以并力拒守。若俟勒平河東。再行進攻河西。有曠時日。現今北路靈達。既已投誠。其前途又阻雪難進。因咨移松潘鎮宋宗璋。酌留官兵二千名。防守北路之木魯工軍營。餘兵帶至中路。協力并攻。分為四路。一攻上臘蓋。一攻中臘蓋。一攻底朱。一攻納洪多。共燬碉五十五座。賊酋班滾。乞命河西。並令伊母赴營叩求。但該酋狡黠多

端不可遽信。現在相機進剿。南路夔州協副將馬良桂。自攻克下密卡倫等處後。因雪阻糧運維艱。而西藏台吉冷宗鼐。又因病回江卡。所帶各土兵亦各散歸。其應添官兵若干。亦令酌量派調等語。查靈達既經投順。應暫准安撫。其北路官兵。分半歸於中路協攻。各寨辦理亦屬妥協。但班滾既於河西乞命。伊母又親出叩求。自當乘勢直搗如郎。立擒班滾。何得仍令伊母回巢。現咨撫臣嚴飭總統等速行攻剿。至南路官兵深入重地。冷宗鼐所領兵已撤回。亦咨提臣飭調德爾格及附近等處土兵前往接應。得旨觀此。則李質粹全無調遣。即如班滾之母已至軍營。何以令其復回。此皆失機宜之處。可傳旨申飭。以此觀之。卿不可不親身前往。以善其後也。總之不可存姑息了事之念。為要務耳。○又覆奏。北路靈達因兵進剿。現已投誠。其官兵大半徹赴中路協攻。南路雖因兵單未能直入。然

邊多等處亦經投順。中路現有提臣李質粹前往。與總統建昌鎮袁士弼。北路松潘鎮宋宗璋會合夾攻。連克河東各礮。自可渡江直搗如郎。第臣遠隔軍營。與提鎮等商辦稽遲。查章谷地方為中北兩路糧運要道。提臣前駐東俄洛時。尚可就近應援。今已往赴軍營。臣擬親至東俄洛駐劄。不特保護糧運。並可與提臣等就近督催各路相機攻剿。至添派官兵已酌定滿兵一百名。提標兵二百名。撫標兵一百名。泰寧協。阜和營各調兵五十名。並臣陝標隨帶兵數十名。一同出口。統委四川城守營叅將李中楷管領。得旨覽奏俱悉。一經卿往。此事必當速奏膚功也。○又奏。西藏台吉冷宗鼐帶領江卡土兵協攻賊番。甚為出力。嗣因冷宗鼐回卡養病。而土兵等亦各散歸。殊違功令。現咨駐藏都統飭知郡王頗羅鼐將為首倡回之土兵懲治。又聞冷宗鼐回至江卡。因各土兵已回。隨另派兵前往

更換。如果前赴軍營。未便阻其悔過報効之心。應聽在營効用。得旨。知道了。有旨諭頗羅鼐。○廣東巡撫準泰奏。粵省逼近海洋。山多田少。全藉外洋內港商船。以資民間生計。但番衆來廣貿易者。亦間有生事之徒。臣酌立條示。於撫循之中。加意防範。其行商通事人等。果能盡心約束。分別獎賞。至沿海一帶。東連福建。西界交夷。尤宜嚴飭文武員弁。慎密巡防。再廉州所屬之欽州。與安南接壤。該國近因奸臣竊柄。自相戕害。雖未敢侵犯內地。然亦應慎固邊陲。並查察漢奸。毋許透入彼地。教誘生事。其連界隘口。前經議設關柵。以時啟閉。一切交易民番。總歸柵口出入。界限井然。兼有龍門協副將帶兵彈壓。廉州府同知移駐龍門稽查。得旨。一切實力為之。

大清高宗法天隆運至誠先覺體元立極敷文奮武孝慈神聖純皇帝實錄卷之二百五十七

大清高宗法天隆運至誠先覺體元立極敷文奮武孝慈神聖純皇帝實錄卷之二百五十八

監修鴻臚寺卿延清官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄六

尋常紀錄十四次臣德瑛經筵講官太子少保工部尚書紀錄六次臣曹振鏞等奉

較修

乾隆十一年丙寅二月丁酉朔

中華書局影印

上詣

雍和宮行禮。○諭駐劄西寧辦理青海番子事務之副都統莽古賚駐藏辦事之副都統傅清爾等陳奏事件莽古賚每次俱用漢摺傳清亦間用漢摺各省督撫提鎮內有滿洲大臣用漢摺奏事者原因辦理地方民情及綠營事務今莽古賚傳清係滿洲大臣且係辦理蒙古唐古忒事務所有事件理應用清字奏摺伊等竟仿效外省大臣用漢字奏摺殊

屬非是著飭行嗣後奏事俱著繕寫清字奏摺並寄諭衆佛保知之○奉恩將軍錫通額故以其弟慶阿泰襲職○戊戌

上詣

皇太后宮問安○諭山西大同等州縣去年偶被秋災經該撫查明分別題請賑恤朕已降旨允行今思大朔等屬地瘠民貧近處邊陲較之他處更為寒苦其被災各屬賑期俱至三月為止今歲適逢閏月恐停賑之後正值

中華書局影印

青黃不接之時貧民餬口無資朕心軫念著將大同懷仁廣靈應州渾源山陰靈邱陽高天鎮朔州馬邑定襄等十二州縣極次貧民俱於閏三月再各加賑一月俾小民不致失所該部即遵諭速行○又諭河南永城鹿邑夏邑三縣乾隆四六七年未完帶徵緩徵銀一十四萬餘兩朕前降旨自乾隆甲子年為始均作三年徵收今該三縣上年秋禾復被水災應徵錢糧現在分別蠲緩帶徵所有

前項舊欠銀兩若仍復按限催徵民力未免拮据著將永城鹿邑夏邑三縣乾隆十年分應徵舊欠銀四萬五百九十餘兩准其緩至十一年麥收後補徵另扣年限造報以紓民力該部遵諭速行○又諭從前朕巡幸直隸地方見城垣多有殘缺皆因不能隨時堵築以致出入踐踏踰越成路因令大學士等寄諭各督撫令其督率有司留心整飭嗣據巡撫碩色奏請分別工程一千兩以上者俟以工代賑之年動項興修一千兩以內者令各州縣分年修補除土方小工酌用民力外其餘即於公費項下支修朕將伊摺令各督撫閱看俾其仿照辦理但須善為經紀勿致累民而各督撫中遂有因此奏請開捐土方並將各官養廉合力捐修者或經批示或經議駁俱未准行今鄂彌達覆奏摺內又稱按田起夫誠恐占田之戶必派之佃田之家不若暫借稅銀生息以備修補等語此奏甚屬錯

誤全不知朕本意矣蓋城垣為國家保障其責專在地方官員其所以酌用民力者蓋因各處城垣偶有坍塌地方官並不查禁任民踐踏甚且附近居民竟將城磚竊取以供私用是以令於農隙之際酌用本地民夫補葺使民知城垣之設原以衛民己身曾用力於其間則遇有坍塌自然護惜不肯任意踐踏且隨時修補亦易為力此上下相維之義並非令其按田起夫竟成賦額之外增一力役之征也如鄂彌達摺內所稱者恐各省督撫亦錯會朕旨或致辦理未善致有累民之處用是特頒此旨曉諭各督撫知之○兵部議覆直隸總督那蘇圖疏稱髯髻山行宮請於平谷汛派兵八名額外外委一員看守三家店行宮請於舊有看守額兵外再於順義營派兵二名額外外委一員各前往分防蟠龍山行宮外圍舊有經制外委一員兵丁八名請照烟郊之例常川看守所派弁兵仍令平

谷順義。二營統轄均應如所請。從之。○授多羅順承恪郡王之第二女為縣主。壻二等侍衛圖拉為多羅額駙。○己亥。諭軍機大臣等。朕閱看安徽巡撫本章。見宿州等處地方盜案甚多。此事切須整頓。魏定國未必能辦理。及此。可傳諭尹繼善。令其加意稽查捕緝。務使盜風止息。以除民害。○又諭從前李方勉在洮岷道任內。朕聞其於地方不甚相宜。令查郎阿等於通省道員內。揀選調補。嗣經查郎阿等奏稱。李方勉循飭有餘。而剛果不足。請調補平慶道。朕降旨准行。後經丁憂回籍。近已服闋。朕因其係候補道員。用為廣東糧驛道。但看李方勉甚屬平常。似非方正之人。可傳諭該督撫留心試看。○庚子。諭軍機大臣等。從前策楞奏請清查倉糧造具數口註冊一摺。朕令各省督撫閱看。查明各處情形。或可仿照廣東之法辦理。今遲至半年有餘。尹繼善魏定國始行陳奏。凡交軍機處傳諭

之件。原欲各省督撫將應行應止之處。速行回奏定奪。今尹繼善等如此遲延。甚屬不合。其他寄諭之件。如地方補葺城工。分別存撥。閒款銀兩等案。各省督撫回奏先後亦不一。有經久不到者。有離京甚近而較遲於遠省者。朕思外省欽部案件。俱有一定限期。稍有遲延。便干處分。是以各督撫自顧考成。尚不敢留滯。至於傳諭之事。便以為無從稽查。任意擔擱。是特交之件。轉不若尋常案件之得以速結也。尹繼善等此次姑免處分。爾等可寄信申飭之。並傳諭各省督撫。嗣後如有仍前因循怠緩者。朕必加以處分。○兵部議覆廣州將軍錫特庫等疏稱。八旗馬乾餘銀五千七百兩。原奏交鹽道借商二分生息。營運足數後。其原本仍留道庫生息。充修軍裝。今軍裝業經全修。此後不過隨時粘補。需費無多。請減生息之數。每兩以一分五釐起息。俟息銀充裕。另行題減。應如所請。從之。○一等

侯朱震故以其子朱紹美襲爵○辛丑諭軍機大臣等漕運關係緊要回空糧艘俱有一定限期不得稍有遲誤以便各省收兌米糧上年湖南糧船回空遲延曾經降旨與顧琮令其將督催官員查叅今新漕陸續過淮務須嚴催北上沿途勿致逗遛俾抵通交兌及早回空爾等可寄信顧琮令其嚴飭官弁盡力督催毋仍蹈上年因循怠忽之故轍也○軍機大臣等奏直省每年題奏成效之例所以稽查政績課其實效使不至因循立法原為盡善乃歲底具題漸成故套是以令該督撫等詳核悉心條對今各督撫陸續奏到成效事件前案後案分合各殊用摺用本亦不畫一且所奏條款雖臚列分明其實在教養等事未嘗確有證據若仍令照常彙奏則條件紛繁臨時湊集易於粉飾殊非務實之意應令各督撫悉心詳查務從實政不必尅期程效仍以空文塞責亦不必分案辦理轉至

繁雜至二三年後再將實在有無成效彙齊一摺核明陳奏再查前於御史史積琦條奏案內奉旨於各督撫奏到後令大學士九卿再行詳議應請勅交大學士九卿將如何立定章程畫一辦理之處遵旨一併詳議具奏得旨各省奏報統以明年年底為準餘依議○以駐劄青海辦事副都統莽古賚為鑲紅旗護軍統領○北路軍營叅贊大臣拉布敦烏勒登期滿以護軍統領塔爾瑪善副都統銜努三代之○壬寅大學士公管川陝總督慶復具摺謝恩並懇辭補授大學士新命得旨以卿公忠幹濟德望素著故俾掌綸扉以風庶位宜從新命毋執前辭○旌表守正被戕之直隸安平縣民陳直心妻秦氏○癸卯上詣皇太后宮問安○幸南苑行圍○是日駐蹕舊衙門至乙巳皆如之○甲辰戶部議覆漕運總督顧琮疏稱鳳陽中衛二幫旗丁鈕張美

裝運宜興縣乾隆十年起運漕糧正耗平米六百三十三石三斗八升零五米三十一石六斗六升零。於乾隆十年二月初八日行至清河縣黃河中流。陡遇暴風。板片米石盡行漂沒。查無捏飾。請予豁免。應如所題從之。○乙巳諭停運漕船。例給一半月糧。以資苦蓋。上年兩江被水。朕降旨蠲緩。並截留漕糧。以備賑卹之用。其減歇船隻。自應照例支給。但念該地方被災之後。丁力未免艱難。一半月糧。虞不敷用。著加恩於常例五分之一外。增給二分。俾窮丁不至拮据。該部遵諭速行。○戶部議覆湖南巡撫楊錫紱奏稱湖南地濱洞庭。民間築隄墾田。與水爭地。常有衝決漫溢之憂。先經大學士議准浙江布政使潘思榘條奏。凡湖蕩蓄水之處。禁民開墾。第從前止指湖蕩官地。未及民業塘池。應請一併飭禁。查塘池雖小。民自有之業。然其中或為蓄水之溝。或為通水之徑。若皆培土為田。一遇旱

潦。水無蓄洩。既無益於己業。轉為害於鄰田。應如所請。除已經開墾之田。毋庸清釐滋擾外。嗣後無論官地民業。凡有關水道蓄洩者。概禁報墾。從之。○又議覆福建巡撫周學健疏稱閩縣侯官長樂連江羅源晉江惠安順昌等八縣。共無著漁課銀六百九十一兩零米二石三斗零。確查屬實。請依原題年分。分別豁免。應如所題。嗣後如有新開澳地。新造船隻。應行升課之處。再照例報部。從之。○丙午。戶部議覆陝西巡撫陳宏謀疏稱。陝省各州縣。每年出陳易新。糶少借多。即糶後貯額。仍須買補。所有收捐監糧。實無空倉收貯。前請建廩九百七十六間。並宜川貯糧一千四百八十三石零。亦應建廩三座。均應如所請。從之。○是日。駐蹕南紅門。翌日如之。○丁未。孝康章皇后忌辰。遣官祭孝陵。○戶部議准廣東巡撫準泰疏報乾隆十年分被水之新寧縣田五百六十一頃五十

二畝零。被旱之潮州府隆澳田一十六頃三十八畝零。潮陽縣田四百二十五頃七十五畝零。陽春縣田九十二頃三十一畝零。化州田三百五十一頃四十五畝零。羅定州田三百七十五頃七十三畝零。勘俱成災。請緩徵蠲賦如例。其乏食貧民。及被風被水倒壞房船壓斃人口。分別賑卹。並動項修造。得旨依議速行。○又議准。雲南總督兼管巡撫事張允隨疏報乾隆十年分鶴慶府屬金登等二十六村被水民屯田共三十三頃六十畝有奇。應免額徵銀米十分之七。並賑借如例從之。○調山東膠州營副將馬負書赴部引見。○戊申。兵部議覆貴州總督兼管巡撫事張廣泗疏稱苗疆平定已久。各鎮協營兵已兩次裁減。原設塘哨船亦應量減節帑。請裁都勻協哨船三。塘船十一。裁上江協哨船十四。改設塘船三。裁古州鎮標哨船三。改設塘船三。裁下江營哨船三。裁朗洞營哨船二。改設

塘船一。裁台拱營哨船一。改設塘船一。裁鎮遠鎮標哨船三。塘船一。裁凱里營哨船二。塘船四。裁銅仁協哨船二。改設塘船三。均應如所請從之。○四川巡撫紀山議覆布政使李如蘭奏稱前撫臣憲德飭令同城兵餉等項搭錢二成。今請將同城滿漢兵餉搭放一成等語。查憲德原奏設鑪一十五座。嗣因滇銅不敷。止開八鑪。歲鑄錢除支給工料等項外。尚不敷搭配一成之數。今自乾隆七年設鑪一十五座。鑄錢已多。同城滿漢兵餉應如該布政使所奏搭放一成。又奏稱各鎮協營餉無論遠近。每銀一百兩搭錢八千文。其運費動支公項等語。查各鎮協營情形互異。如夔協巫山。梁萬忠州各營。向因赴省領餉維艱。題請於夔關就近支領。今又以搭錢為未便。即應毋庸搭放。此外無論營汛遠近。均請如該布政使所奏。概以每百兩搭錢八千文。如有支錢回營。仍稱未便者。即僅搭以在省需

用錢數。以順兵情。至運費一節。查領銀一兩。搭錢一千。較之市兌。長銀幾及二錢。應請即以所長之銀。定為運費。其公項為修整軍裝所必需。未便動支。又奏稱鑪鑄錢文。除搭放兵餉外。餘請留為修補鑪座房屋。酌給囚糧並零星工程之用。各官養廉。應毋庸搭給等語。查從前設鑪鑄錢。憲德原議。養廉與兵餉並搭。經部覆准。今應仍照原議。酌量配搭。其修補鑪座等費。請劃出一千串。已屬敷用。均

下部議行。○奉恩輔國公廣齡故。賜祭葬如例。諡敦僖。○三姓副都統崇悌故。賜祭葬如例。○是日駐蹕新衙門。翌日如之。○己酉。戶部議准。署廣西巡撫託庸疏稱。乾隆十年分。思恩興業二縣原報秋禾被旱各村。今確勘雖有六七分不等。然核計不過十分之一。其餘收成均有六分。晚禾雖僅三分。其本年早稻收成實有八分。所有貧民。於每戶借給常平倉穀一石。並借銀俾購麥種。俟春間再糶。

借兼施。毋庸另議。加賑至被災各戶。應徵乾隆十年分地丁銀一百二十六兩零。本色米四百四十八石零。請照例緩徵。所借銀穀。緩至秋收後免息還款。得旨依議速行。○庚戌。上自南苑還宮。○詣

皇太后宮問安。○辛亥。諭本月十六日月食。三月初一日日食。且自上冬以及今春。雨雪稀少。土膏待澤。朕敬天勤民之心。倍增乾惕。所望大小臣工。共體朕意。加修省。迓天和。夫修省之道。以實不以文。其有關於民生國計者。當盡心籌畫。竭誠辦理。以盡職守。若朕躬有愆。謬政事有闕失。應行陳奏者。即據實以聞。不得避忌瞻徇。亦不得牽引虛文。負朕諮詢之意。○又諭皇后親蠶典禮。於不行親祭之年。經該部議照舊例。遣太常寺堂官致祭。朕思從前建立蠶祠。未議皇后親蠶之禮。是以照祭祀例遣官。今既舉行皇后親蠶典禮。若遇不行親祭之年。自應遣妃內一人。恭代致

祭西陵氏之神。以昭誠敬。為是。所有行禮位次。及一切儀注。應如何酌定之處。著大學士會同各該衙門。妥議具奏。尋奉

皇后不行親蠶之年。既遣妃恭代行禮。應令禮部屆期照例兩請具題。其致祭前期齋戒二日。不進銅人。行禮位次。應照

先農壇遣官恭代之例。設拜位於壇階下正中。不設幄次。升壇由西階登降。除仍用

先蠶壇樂章。不飲福受胙外。一切贊引導引。

實錄卷二百五十八

五

拜跪奠獻儀注。俱照遣官例行。再遣妃恭代行禮。應令文武大臣命婦。照例陪祀。其需用執事女官。及所用祭品。由各該衙門豫備。養蠶交奉宸苑蠶宮令。丞率蠶母蠶婦飼養。所得絲勛數。仍照例呈報內務府具題。從之。○諭軍機大臣等。從前策楞奏稱。左江鎮總兵楊剛。人雖粗有才情。而不無輕舉妄動之意。恐將來或生邊釁。似應調用內地。特簡老成之員。鎮守邊境等語。朕看楊剛於事體不甚

明白。但漢仗尚好。且在粵省已久。尚為熟習。若一時更換。未必即能得人。朕已面加訓諭。之爾等可寄信與策楞。令其隨時教導。再行試看。若果操守不妥。舊習不改。實於地方不宜。策楞自必據實奏聞。

實錄卷二百五十八

五

大清高宗法天隆運至誠先覺體元立極敷文奮武孝慈神聖純皇帝實錄卷之二百五十八

大清高宗法天隆運至誠先覺體元立極敷文奮武孝慈神聖純皇帝實錄卷之二百五十九

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅大學士大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十一年丙寅二月壬子月食○諭軍機

平定縣志卷之二十九

一

大臣等上年直隸有被旱州縣而宣屬為尤甚朕已令撥運豫東二省麥糧二十萬石又截留尾幫漕米三十萬石又撥通倉米運往宣化五萬石以資賑糶今思目前正當青黃不接之時而閏月節氣稍遲去麥收較遠或尚有須為接濟之處亦未可知上年豫省通屬豐收爾等可寄信與那蘇圖令其酌量如有應需豫省接濟之處可一面奏聞一面與碩色商酌辦理又諭上年江浙等省拏獲

採生折割諸案慘毒最甚地方官自應實力躡緝聞得各州縣因畏避從前處分多方迴護兇徒每致漏網即如浙江烏程縣知縣羅懋承審富大等一案因平時失察遂致容隱被叅此外未經發覺者諒復不少夫地方大吏果能實力督率留心訪察則有司迴護因循之習又何能施此等容隱以致兇徒免脫皆督撫平時疎忽所致也爾等可傳諭尹繼善常安令其嚴飭各屬盡心緝獲嗣後如有

平定縣志卷之二十九

二

能查察弋獲在都隆額條奏定例以前其處分奏請量加寬免失察在奉文以後仍照部覆新定之例題叅如此則各屬知督撫大吏留心查辦自必實力緝拏而量寬其已往亦不致有如從前迴護隱藏也該督撫身任封疆鋤奸除惡是其專責況採割極惡之犯何可稍為寬縱務須淨絕根株以靖地方○軍機大臣等議奏駐藏副都統傳清奏稱西藏自徹臺站官兵後搶刦殺傷各案疊疊而裏

塘一帶夾壩更甚於昔西藏既隸內地駐有官兵豈無往來人員焉能逐起護送漢夷商販豈可盡使隔絕數月內往來公文遺誤擦損之事甚多仍請照舊安設官兵等語應如所奏自藏至爐一帶臺站照舊設兵總在一千數內酌量派撥至所請將巴塘守備移駐乍了江達千總移駐拉里拉里外委移駐江達乍了糧務移駐拉里并沿途塘汛官兵與藏內官兵折色口糧等項不敷者酌增浮多者量減等語查從前駐劄員弁原酌地方情形安設今若移駐其營房衙署等項俱須重新建葺且兵丁月支折色口糧等銀均屬當日酌給今所議應增之數浮於應減數目事關營制應詳慎舉行請交總督慶復就近詳察情形所有應行事宜會同巡撫紀山妥議請旨從之○工部議覆河東河道總督完顏偉疏稱商邱縣汎五堡隄工乾隆八九兩年冬春間北岸漸長淤灘河身坐灣大溜由北

岸曹縣汎劉家樓東北折向西南衝激乾隆十年桃汎長發全河直射該工甚屬危險當於五堡西大河坐灣之處建築挑水埽壩一以資抵禦五堡東舊有斜土壩急須加幫高寬進埽簽樁挑溜循軌以保隄工應如所題從之○湖廣道監察御史沈景瀾奏頃奉恩旨將直省地丁銀兩蠲免一年朝野額慶查向來蠲免地丁清冊州縣造報藩司書吏借端勒派視縣分大小自數十金至數百金不等總吏派之里胥里胥派之甲戶不遂其欲不止請勅下直省督撫嚴行禁止并取各州縣並無科派冊費甘結詳報再有漕之省舊例地丁漕項編為一律徵收不分細數愚民無從查考恐不肖官吏每戶暗加分釐多收入已並請勅下督撫徧飭州縣於造報漕項清冊時即填明各甲戶應完細數豫給一單庶小民一覽易知浮派之源可杜得旨允行下部知之○癸丑以舉行仲春經筵遣官告

祭

奉先殿

傳心殿

上御文華殿。講官暨侍班之大學士九卿詹事等行二跪六叩禮。分班入殿內序立。直講官四人出就講案前。行一跪三叩禮。復位。直講官阿克敦彭維新進講中庸致中和天地位焉萬物育焉一節講畢。

上宣御論曰。天地萬物本一體。致中和而天地自位。萬物自育。其理自然。不待勉強。夫所謂大本不可不立。達道不可不行。豈非教人以戒懼謹獨之意乎。然究而言之。有不可則有可者在。是尚出於勉強也。出於勉強則不能致中和而位天地育萬物矣。蓋天地本無不位也。萬物本無不育也。元黃分而清濁奠。形色章而動植殊。歷混茫以來。有不位不育之時乎。其不位不育。皆自人心不能致中和而然。初非天地萬物之過也。孟子得子思之正。

傳故其言曰。萬物皆備於我矣。反身而誠。樂莫大焉。強恕而行。求仁莫近焉。反身而誠。致中之道也。強恕而行。致和之道也。信矣。致中和而天地自位。萬物自育也。講官暨侍班官跪聆畢。興。直講官索柱劉統勳進講尚書關四門明四目達四聰三句講畢。

上宣御論曰。從來釋書者。率云關四方之門。以來賢俊。明四方之目。達四方之聰。以去壅蔽。夫明目達聰。以去壅蔽。似矣。而所云關四方之門。使賢者由此而入。則是門當設於何所。乎。舜制九州。幅員不為不廣。四岳十二牧之徒。內外弼亮。豈必設之閭闔。以限量之哉。蓋目為視之門。耳為聽之門。闢門者闢此耳。明達者明達此耳。苟其視聽無所壅蔽。則賢材亦由是而升。民隱亦由是而達。使不能兼聽並觀。則所謂賢者未必賢矣。故闢門明目達聰。本為一事。不可歧而二之。且兼聽並觀。尤以得賢為要。設不能得賢。則兼聽並觀。適滋

叢脞又何民隱之能周知乎故為君者以天下人之聰明為聰明則公以一二人之聰明為聰明則私言之易而行之難此吾所以望勲華之世而興歎也講官暨侍班官跪聆畢大學士訥親等奏曰

皇上履中蹈和求賢籲俊故施諸政事而天地民物位育於一心垂為謨訓而精義微言昭回於雲漢臣等不勝榮幸奏畢諸臣出就拜位行二跪六叩禮禮成

上還宮賜講官侍班官等宴於協和門○諭曰楊高士看來人甚平常年力衰鈍著照部議革職晏斯盛出具考語以為年力尚健居官謹飭其瞻徇之習往往如此著飭行○又諭向來州縣等官經部議降級調用並革職者若事屬因公朕有降旨於該員交代離任時令該督撫出具考語送部引見其原缺例歸部選朕於引見時閱看其人若尚可用往往命發還原省仍以州縣用者有之或即補原

缺者亦有之今思此等人員既用原官若發往他省或即發本省而不用原缺不獨人地不能相習而該員亦有守候之苦終不若將伊原缺暫委署理不必開選俟引見後倘或其人果屬平庸或督撫姑息市恩將劣員妄行保奏亦不能逃朕之洞鑒今日飭行晏斯盛即其例也若其人尚屬可用俾該員仍回原任駕輕就熟似屬有益再該員原有應得之處分即令帶於本任將來照例開復○甲寅

上御乾清門聽政○詣

皇太后宮問安○諭月朔之期朝臣例穿補服若值日食仍穿補服殊非敬畏之意嗣後月朔如遇日食著穿常服永著為例○又諭太僕寺卿喬學尹年老且有目疾著以原品休致○又諭據駐藏辦事之副都統傅清奏稱郡王頗羅鼎詳報前因總督咨稱冷宗鼎在彼縱酒妄為理宜嚴行訓飭曾將冷宗鼎所

領兵丁著宰桑納親等管理。令伊回藏。茲據納親等報稱。冷宗鼎不肯交付兵丁。自己回去。兵丁亦皆跟隨回去等情。冷宗鼎為人糊塗。恐於事無益。前已稟明。今聞伊所領兵丁回來。不勝惶恐之至。頗羅鼎原係微末之人。蒙主上加恩。封為郡王。凡事敢不奮勉。今冷宗鼎喪心病狂。帶領兵丁回來。倘該大臣等具奏。係因吾言。致冷宗鼎帶兵回去。頗羅鼎實無生路。不勝惶恐。冷宗鼎又係奏派之人。

懇請奏聞。將冷宗鼎正法等語。近據總督慶復等奏聞。郡王頗羅鼎將冷宗鼎調回。伊所領兵丁亦皆相繼回去一摺。朕以頗羅鼎諸事甚屬謹慎。即此次除派往瞻對兵丁外。復派伊素所信任。曾經行陣之宰桑等前往。無非感戴朕恩。輸誠効力。今將冷宗鼎調回。必係酌量於事有益。兵丁等皆係冷宗鼎帶往之人。邊地番兵不知法紀。因伊首領回去。亦一同隨往耳。是以朕未特降旨。祇諭令大臣

等將總督等所奏。曉諭使臣。令伊回去。告知頗羅鼎。所有兵丁回去。並非伊之指使。朕早已洞鑒矣。今觀頗羅鼎所云。若具奏江卡兵丁。因伊言回去。伊竟無生路。不勝惶恐之語。朕心愈加軫念。著將朕從前辦理緣由。札寄副都統傅清。傳旨明白曉諭。再據頗羅鼎所奏。冷宗鼎為人甚屬糊塗。現犯軍法。著交大臣等議罪。候朕降旨。將此一併曉諭。頗羅鼎知之。○戶部議准。兩廣總督策楞疏稱。海晏姓尚香山。三場於乾隆十年八月內。陡被颶風暴雨。潮水湧漲。消化鹽二千二百六十九包。零勘明屬實。共竈價銀八百二十八兩有奇。應請豁免。即於本年場羨銀內撥補還項。得旨依議速行。○又議准。湖南巡撫楊錫紱疏報。巴陵臨湘華容武陵四縣共新增洲地一十六頃八十畝。零並巴陵縣又增基地一百七十丈零。又屋後空餘基地二頃一十一畝。零共增課銀一百三十二兩有奇。應於乾

隆十年起科。從之。○大計乾隆十年分奉天
年老官一員。有疾官一員。湖北年老官四員。
不謹官一員。罷軟官二員。才力不及官四員。
河南年老官四員。有疾官四員。不謹官二員。
罷軟官一員。才力不及官四員。山東年老官
一員。有疾官二員。不謹官五員。罷軟官二員。
才力不及官三員。河東河員。年老官一員。山
西年老官二員。有疾官三員。不謹官五員。罷
軟官一員。才力不及官三員。浮躁官一員。陝
西年老官一員。有疾官一員。不謹官二員。罷
軟官一員。才力不及官二員。浮躁官三員。甘
肅年老官二員。有疾官二員。不謹官二員。才
力不及官三員。四川年老官四員。有疾官六
員。不謹官五員。罷軟官三員。才力不及官三
員。浮躁官三員。雲南年老官四員。不謹官五
員。罷軟官一員。才力不及官一員。浮躁官二
員。貴州年老官六員。有疾官三員。不謹官二
員。才力不及官二員。分別處分如例。○以翰

林院侍讀介福為太僕寺卿。命翰林院侍
讀張泰開以原銜充日講起居注官。予原
任文華殿大學士謚文端伊桑阿保和殿大
學士贈太傅伯謚文穆馬齊入祀賢良祠。
乙卯諭國家立政首重得人朕留意人才以
備任使而大員中尚未見濟濟之盛著大學
士尚書等將可以勝尚書侍郎督撫之任者
秉公舉出各自密奏侍郎則舉可以勝侍郎
者亦自行密奏候朕採擇所舉人員不必分
別滿漢亦不必太拘資格但據真知灼見以
盡以人事君之義務秉公忠勿徇情面。○又
諭御史楊開鼎奏河道總督白鍾山款蹟
種種請嚴飭河臣痛洗前非期有實濟等語
果如所奏則重治白鍾山之罪豈但嚴飭使
之改過而已若楊開鼎所奏屬虛或係懷私
妄奏或係誤聽人言則楊開鼎亦有應得之
罪河工關係民生極重向來浮言甚多若不
查勘明白無以服衆人之心將來大臣等何

以辦事著高斌帶楊開鼎馳驛前往會同尹繼善將摺內各款一一確查明白具奏高斌接到諭旨不必來京請訓即赴南河查辦其直隸河務工程即交劉於義辦理楊開鼎摺併發○諭軍機大臣等楊開鼎奏白鍾山一摺此事甚有關係是以特命高斌帶楊開鼎前往會同尹繼善查勘明白具奏南河情形高斌素所熟悉近年以來屢有水患黃河隄岸現在奏請大加培築其清水下游亦現興工挑挖即著高斌就便查勘有應斟酌辦理者與河臣等斟酌辦理具奏以聞高斌到時並傳與尹繼善知之○是日起

上以祭

社稷壇齋戒三日○丙辰諭據御史薛澂奏稱雲南省向有供應學臣轎馬損失日用薪水等項每一州縣費數十兩至百餘兩不等學臣即借端需索多方周旋認州縣為年誼世好種種弊端不可究詰復又奏稱歷來積習

相沿非始於一人非始於一時未便指叅請勅下該省學政自行禁止等語該省學政果有如此弊竇薛澂既知其認為年誼世好母論前任現任俱可指叅乃既不實指其人又復奏請勅令自行禁止如此陳奏是欲博敢言之名而又示寬解之意有此事君之道乎夫言官風聞言事如大小臣工等蓋蓋不飭之類若實有確據明目張膽見之彈章國家自有憲典焉可如此信口譏彈以一言污人

名節而又不足以示國家法度在伊等不過有意取巧殊非朝廷設立言官之意也昨御史楊開鼎奏白鍾山一摺內稱請旨訓飭今薛澂又為此奏與楊開鼎情事相同此向來科道習氣今則連日見之此風斷不可長特行降旨申飭各科道務當各自省改毋蹈前轍薛澂此摺著交與雲南總督張允隨秉公確查據實具奏○戶部議准河南巡撫碩色疏報永城鹿邑夏邑商邱柘城等五縣乾

隆十年分秋禾被水成災地共一萬五千五百三十七頃四十四畝零額賦應分別蠲豁勘不成災額賦均應緩徵得旨依議速行○
丁巳祭

先師孔子遣慎郡王允禧行禮○吏部左侍郎田懋奏頃奉諭旨著大學士尚書侍郎等各舉勝任之員自行密奏伏念自古帝王服休服采不憂任用無人者惟其儲才之豫也即以今日之制言之中書機務之地序進者必首七卿納言喉舌之司簡授者率由卿貳至於侍郎員缺大都採之列卿之班卿寺乏人亦必選之京堂之內儲之不豫將臨時擢用每難其人端本澄源當先慎用庶僚以為大僚之地仰請勅令在廷大臣於遵旨保舉外再將翰林科道部郎及外省之道員知府內不拘滿漢各舉堪勝卿尹之任者或一人或二三人自行密奏以備京堂缺出臨時簡用如所保非人惟原保官是問得旨允行下

部知之○戶部議覆四川巡撫紀山續奏籌辦進剿瞻對賊番事宜○西安督標副將張元佐前奉調帶兵出口在途患病今病痊仍飭赴營添撥千把外委各一員應如所議給口糧行裝銀並馱馬鞍屨如例○進剿瞻對北路官兵現在攻克阿斯羊角等寨清理戶口又進攻靈達恐領兵之員不敷復委永寧協副將王曜祖前往北路協同松潘鎮辦理軍需其兵役行裝等項應如所議照例支給○派管土兵二員一係原任漳臘營都司張懷遠一係原任陝西黑城營遊擊紀勇各暫予守備職銜其官役行裝等項勢所必需又裏色二塘土司及西藏地方各帶土兵協剿應給口糧鹽菜均應如所議各如例動支○官兵攻剿靈達逼臨大江必須密防後路今添調孔撒麻書土兵四百隨師進剿應如所議照放哨土兵之例於抵營進征之日支給茶麪羊折○德爾格土司願於奉派土兵一

十外添兵五百。隨營調遣。祇求給予坐糧。及軍營口糧鹽菜。又駐劄東俄洛提標兵一千。除調征中南北三路外。留營兵不敷分布。於阜和營泰寧協各調馬二步八兵一百。均應如所議。口糧鹽菜各如例支給。一陝甘派赴軍營叅遊守官五員。各於跟役外多帶兵丁數名。行抵軍營。該兵等告請出征。應如所議。其口糧鹽菜。即照征兵例支給。一此次進剿三路獎勵兵勇撫恤傷亡。需賞甚多。應如所議。於原撥賞功銀三千兩外。另添撥銀交提督總統備用。一奉委建昌道石杰隨營監紀功過。並獎勸土司。賞項勢不可少。應如所議。於道庫軍需銀內動支五百兩備用。一礮架車輪火藥鉛彈等項。需用馱載馬騾及烏拉鞍屨之費。應如所議。於糧務軍需銀內儘數支給。一攻擊瞻對。必需地雷大礮。原帶火藥鉛彈不敷。陸續添運甚多。自省至爐。自爐出口。並分送各路軍營所費不貲。應如所議。均

照例支給。得旨依議速行。○以北路軍營叅贊大臣拉布敦為正白旗滿洲副都統。○戊午祭

大社

大稷

上親詣行禮。○

皇后千秋令節奉

皇太后懿旨。停止行禮筵宴。○己未

上詣

皇太后宮問安。○幸瀛臺。○諭協辦大學士吏部尚書高斌。差往江南有查勘事件。著給與欽差大臣關防。吏部主事何曰熙。內閣中書胡廷樞。俱著帶往辦事。給與驛馬。其關防即著何曰熙。胡廷樞齎去。○庚申。通政使雷鋐奏。頃奉諭旨。令大小臣工各加修省。敬迓天和。凡事有關於民生國計者。據實陳奏。伏讀乾隆十年十月內諭旨。戒飭臺諫諸臣。處心積慮。總不外名利二途。夫論臣子之分。不惟

不可計利並不可好名而在朝廷樂聞讜言則不必疑其計利並不必疑其好名果其言為德為民即當采而納之昔孔子稱舜之大知曰隱惡揚善則知當舜之時進言者不皆有善而無惡惟舜隱之揚之所以嘉言罔伏爰成執兩用中之治也得旨雷鉉此奏朕嘉納之前謂臺諫不外名利是圖者亦謂彼一時有此習耳今則漸知省改矣若夫大舜之隱惡揚善固朕所日勉焉而未逮者也所奏知道了該部知道大學士公訥親等議奏副都統傳清請將冷宗鼎正法一摺查冷宗鼎原係派出率領江卡兵丁扼據瞻對近要地方堵禦之人曾經該王頗羅鼎聞伊在軍前酒後任意妄為恐其誤事令將所屬兵丁交付宰桑納親等回歸本處冷宗鼎並不遵諭交明竟敢委之而去應將冷宗鼎照該王頗羅鼎所請即行處斬以為違犯軍令者戒至冷宗鼎所屬兵丁見伊回程即一同隨去

亦屬有干法紀其起意倡行之人理宜查出懲治請咨行駐藏副都統傳清飭交郡王頗羅鼎嚴查究辦得旨前經總督慶復奏稱冷宗鼎初到軍前尚屬効力今據頗羅鼎奏伊糊塗酒後妄為恐在軍前於事無濟令伊換回伊並不遵頗羅鼎所諭交付納親兵丁即行回程蓋因愚魯無知以致獲罪其情尚屬可矜著施恩免其處斬交頗羅鼎酌加懲處餘依議戶部議覆漕運總督顧琮疏稱揚州衛二幫有應裁汰船二十四隻前經題請留存以抵江興二衛貧疲之船部臣慮有未便覆咨確查今查江興三七八幫實在貧疲丁船應裁二十四隻即請以揚州衛應裁之船抵補其在次受兌以及沿途催趲稽查歸江興三七八幫管轄僉丁修造事宜仍歸揚州衛辦理並無未便應如所請又稱揚州衛二幫船隻係撥抵兌運松屬之糧一切費用與領兌本地漕糧不同其行月錢糧請照江

興二衛額編之數。准支四分之三等語。查江興二衛幫丁。因無屯田幫貼。其行月銀米。是以較多。揚衛二幫。原有額徵減存行月。又有屯田濟運。應仍令該督予以本幫原給之數。造冊查核。從之。○辛酉。

上御太和殿視朝。文武陞轉各官謝恩。○是日祭。

先蠶之神。遣妃恭代。

皇后行禮。○壬戌。

孝昭仁皇后忌辰。遣官祭。

景陵。○戶部議覆。四川巡撫紀山疏稱。覆查沙溝。紫古喇二銅廠礦內。夾產銀星。採煉維艱。與全出金銀者不同。已委員試驗。詳計實虧商本。難以照會典四六之例抽課。請照前議。以二八抽收。用紓商力。應如所請。從之。○又議覆甘肅巡撫黃廷桂疏稱。中衛縣舊倉。除通融滿貯各糧外。統計無廢存貯之糧。共六萬餘石。內乾隆九年採買糧二萬石。應於通

省需建廠座案內。另請估建。尚有無廢收貯糧四萬餘石。請添建倉廩五十間。應如所議。從之。○癸亥。

上詣

皇太后宮問安。○吏部議覆。調任雲南布政使阿蘭泰奏稱。八品以下佐雜等官。初選例停赴部。至終養告病丁憂起復。則又令赴部候補。此等微員。貧乏者衆。若必屆期赴部。資斧既艱。在京又多守候。及至得缺。往往不能如期赴任。且所補總屬原缺。亦非陞轉可比。請嗣後照初選之例。令該督撫咨部。依次代為掣補。至在籍得缺。該督撫驗看給憑。有精力衰憊者。仍予休致。應如所奏。其中有由知縣以上降為佐雜者。例得與月選官一同引見。應仍令在部投供驗到。其缺與在籍各員通較挨補。俟命下日。各省均以接到部咨為始。其現在到部與各省未接部咨而已給文赴部者。仍照舊例辦理。從之。○戶部議覆甘肅

巡撫黃廷桂疏稱平慶寧各府承辦花馬池鹽勛向係商給脚販圖記今其行銷恐難為據請嗣後令鹽捕通判按引給發印票等語查通判給票作引將來各處行鹽俱可給票無需部頒引目於定制有違應毋庸議又稱寧夏有口外夷鹽以及各池土鹽請於平慶寧三府屬要地設四廠抽收夷鹽土鹽稅課以抵補官課之不足查設廠收稅於官鹽舊制並未更張似屬可行惟商辦官鹽向係按引完課積年無缺今增收夷鹽土鹽之稅自宜另報充餉應令該撫將官課仍照舊辦理其新收之稅儘數造報另款具題至徵收之數即照官鹽例俟試辦一年再定章程又稱渭源縣素不產鹽從未設有鹽引本處係食狄道州民人負販土鹽向不收稅額銀俱官為墊解今請於販鹽每斗收銀三釐完額應如所議又稱狄道徵收稅銀向係吏目赴熬鹽處所收解除交正課外尚餘錢八九十千

不等其按丁加引銀二十六兩零請即於此項贏餘內充抵免里民攤徵此外贏餘並留為添補該員養廉之處應如所議又稱武威縣食鹽向係拽運永昌鎮番二縣土鹽來武聽民購買商引俱無每歲武威縣於永鎮二屬徵收額稅殊多未便請嗣後令各該地方官就近徵解以免隔屬差催之擾應如所議從之○管理宗人府事務和碩履親王允禔等遵旨議奏養贍宗室六事一向例宗室年

至二十月給銀三兩但子姪中年未及歲者尚多一分錢糧不敷養贍請自十歲以上月給銀二兩至二十仍給三兩一年賞賚向無分別不惟素封之家徒為繼富亦非獎善懲惡之道請由府確查現任王公子弟侍衛章京官員及家道殷實並素不安分者不必賞給餘於生息項內動支一萬兩分賞一造就宗室以清語騎射為重不在僅習漢文現在左右二翼宗學生二百二十六人讀書未

見成效清語騎射尤屬生疎徒多無益請加考核定為額數每翼五十名其不必習學讀書者即令出學交與族長專習技藝清語每翼滿教習仍用三名漢教習請定五名再宗室錢糧既添有二兩所有宗學生公費應照向例仍給三兩其續添之一兩不必再給。一。閑散宗室喜喪等事請一體賞給銀兩。一。宗室官員照八旗例借與資生銀兩指俸扣還。一。諸王等周恤宗盟除家道殷實不必資助及期服以內自行資助外其大小功服及總服宗支或生計窘迫或遭遇事故應令酌量資助至貝勒貝子公等雖非王爵可比亦應隨力資助近派族黨俱於年終報府倘宗室內有素不安分及不知饜足者無庸資助從之。旌表守正捐軀之河南鄧州民姚進忠妻張氏。甲子諭三月朔日日食二月三十日節屆春分朕親祭朝日壇是日乘禮轎前往不必設鹵簿大駕還

宮亦不必作樂以昭敬畏之意著傳諭各該衙門知之。○又諭據御史馮秉仁奏稱通政司堂官收本每日僅以辰刻為期交已刻即散各省題本有不及趕到者不得不交却提塘官存貯過夜請嗣後照內閣六部之例派司官一員值宿各省本章進呈者不拘時刻直送通政司交收等語通政司衙門堂官甚多而所司惟有接受本章之事該堂官懶惰成習著降旨申飭嗣後每日即著堂官一人在衙門值宿馮秉仁摺併發。○戶部議覆福建巡撫周學健疏稱臺灣府屬乾隆十一年額徵供粟一十六萬餘石先奉恩旨全蠲惟此項係撥支內地及臺澎各營兵糧之需雖現查臺粟積存項下尚有二十餘萬石儘敷動撥但海外重地兵糧倉儲宜充裕貯備未便全數動用請將臺澎二處乾隆十一年各營兵應領月糧九萬八千八百餘石仍於臺郡積存項下動支其內地所有應支兵糧共

八萬六千餘石請於各營就近地方新捐監穀內。照定數碾給。應如所請從之。○又議覆甘肅巡撫黃廷桂疏稱。甘肅通省應建倉廩一千四百餘間。已准部咨彙題。共估需工料銀七萬八千八百一十餘兩。有奇。食為民天水旱俱倚倉儲為備。勢難俟。經費有餘。再行動修。查前奏准興修之甘州。河州。狄道州。城工。目前尚可暫停。請即以修城估項移作建倉廩之用。應如所請。得旨依議。速行。○予原

任太傅大學士伯鄂爾泰。入祀雲南省賢良祠。○乙丑。諭曰。通政使司左通政張映辰。詹事府少詹事西成。通政使司叅議雙鼎。御史海明。孫灝。戶部郎中永貴。理藩院郎中六智。內務府郎中申祺。俱著吏部隨便帶領引見。○又諭。今日因前日保舉一事。欲召諸臣等面降諭旨。乃朕辦事已畢。諸臣久之不至。在外。部院衙門尚遠。近不一。至於內閣。則在紫禁城內。可以頃刻赴召。而大學

士查郎阿。陳世倌。史貽直。竟未入署。獨不思今日朕以黎明閱視祝版。而辰巳之間。閣臣尚逍遙私第。可見向來所奏。每日入署辦事。粉飾之虛辭耳。爾等身為大臣。當以早朝勤政。進規於朕。方無忝責。難於君之道。而先自偷安。有是理乎。況三月朔日日食。示儆正我君臣。省愆思過。實心修省之時。而諸臣怠玩。若此。其可垂之史冊乎。朕從不肯諉過。臣下乃至此刻。與諸臣相見。非朕之晏朝也。諸臣捫心自問。平日之言忠言孝者。謂何夙興夜寐者。謂何其何以自解。至舉薦人才。有以為畏者。亦有以為喜者。其畏者。惟恐所舉之人。或有咎戾。貽累於己。從利害起見。固非公爾忘私之義。其喜者。則就此可以市德徇私。一聞降旨。即覺技癢。如大學士陳世倌。保舉十人。史貽直。至十四人。趙宏恩。亦保十人。夫人材實為難得。而尚書侍郎督撫。任尤重。果有如許勝任之人。可以簡用不盡。則朕亦不

必鯁鯁過計。令廷臣各舉所知矣。今茲所舉多屬朕所素知者。試畧舉一二。如查郎阿保德齡可勝尚書之任。德齡嗜酒糊塗。從前不勝巡撫之任。來京授為護軍統領武職。後因其本屬文臣。姑用為工部侍郎。伊嗜酒之習。尚未能改。在部辦事亦屬尋常。即教習庶吉士。亦未見其所成就。侍郎猶可姑容。豈能稱尚書之職乎。即如有保阿克敦可勝尚書之任者。若甚無人。阿克敦實堪續貂。此薦尚書屬不謬也。又保二格徐杞為侍郎。二格為副都御史。已屬勉強姑息。何能勝侍郎之任。徐杞任布政使十餘年。經手錢糧頗能清楚。乃不自努力。思京堂安逸尊榮。無倉庫錢糧之責。自求解任來京。與范璨同一氣習。蓋求其過則不得。論其心則實偽。所謂鄉原也。用此等人為侍郎。於國事何補乎。陳世倌保楊嗣璟。楊嗣璟從前差往山西審事。回時於朕前痛貶喀爾吉善。朕洞燭其隱。直欲得山西巡

撫一席耳。彼時即向大學士等言之。由今觀之。喀爾吉善豈非巡撫中之錚錚者。則楊嗣璟之居心尚可問乎。史貽直保吳應枚。于振可為侍郎。吳應枚曾任奉天府尹。辦事草率。被叅調用。且人亦昏庸。平常豈可用為侍郎。于振文學雖或尚可觀。將來如正詹閣學之類。自屬可用。至侍郎則可定其不能勝任。即勝任亦不過鄧鍾岳陳惠華之流耳。於部務有何裨益乎。趙宏恩保李如蘭。翁藻海望亦保翁藻。李如蘭現任布政使。亦屬平庸。翁藻小巧之才。無大器量。封疆重任豈可輕付乎。李元亮保舉李世倬。伊曾任布政使。甚屬不及。今姑用為京堂。豈可勝侍郎之任。盛安保舉金溶。金溶不過一聰明見機而行之人。前為御史時。有過罷斥。朕棄瑕錄用。一無建明。此豈侍郎之選乎。劉統勲錢陳羣俱保嵇璜。內廷行走。其人亦未必安靜。伊等同在內廷。不免瞻徇之私。至雷鉉雅爾哈善二人則保

之者甚多。雷鉉勸襲道學陳言。總不脫好名習氣。雅爾哈善自附正直。器量褊小。性亦偏執。此等人即加擢用。亦惟務一己虛名。豈能實心任事。即如顧琮。昨具奏摺。謂捐納封典一事。斷不可行。不思康熙雍正年間。開捐款項頗多。今已盡行停止。惟封典係人子榮親之舉。廷臣議准御史條奏。允其暫留。顧琮康熙年間即在內廷行走。嘗蒙

召見。未聞摺奏。然尚可諉曰職卑。至雍正間。則已擢任大僚矣。何無一言及於捐納。獨至今日而沾沾以封典為言。豈顧琮學問至今日而始悟捐納之必當停乎。謂今日而必當停。則其視昔時為何時。其心更不可問矣。且今日之捐納封典。生俊實出於朕昔之停捐。而九卿所議存者。然較之昔日之事例。蓋存一二於百十耳。有何輕重。其意以諫停捐納。自是正論。惟思邀取聲名。無關國家切要之務。總由朕喜聞正言。是以敷陳古道。沽取美名。

亦屬自為。非為國家起見也。朕從不求全責備於人。其不知者。亦不臆度其是非。即如所舉。有朕未知者。數人已諭吏部帶領引見。俟引見後。亦惟徐觀其人之當否。以定保舉者之是非而已。而適所論者。數人則實係朕所知者。斷不可用。尚書侍郎督撫之人。不知汝諸臣以為何如耳。總之保舉一事。必須真知灼見。問心無愧。其但顧一己利害。不為國家留意。人才已失。大臣薦賢之道。至邀譽市恩。

草率從事。不論其人之勝任與否。姑舉以塞責。以人事君。尤不當如此存心。前日雷鉉尚謂朕宜隱惡而揚善。隱惡揚善。固大舜之美德。朕所勉焉。而未逮。但如今日保舉一事。諸臣頗有以朕為不知。而可以於中成事者。朕有見如此而不言。是匿怨而友其人也。朕寧為孔子之不匿怨。不能為雷鉉之隱惡而揚善矣。帝廷疇咨庸違。方命者。不能為之諱。此豈放勲不能隱惡而揚善。蓋用人之際。與夫

修德涵養之事固不可一例論矣用人乃國家至要之務將來有應行保舉之時仍惟廷臣是詢此番既確見其未當不得不為諸臣明白曉切言之若朕言果有未協亦不妨明悉陳奏朕不自護也○諭軍機大臣等據李錫秦奏託庸辦理銅勛回護原議差役搜拏藏匿私銅每五日無獲將該役重責又太平府龍州土民周勝孚殺死大功兄周勝舉一案供證確鑿而託庸以無辜之農成黃壇收

監拖斃之故執意欲開脫周勝孚為非正充自乾隆九年正月起至今兩年未結此外尚有辦理過刻以致屬員受累而每聽先入之言牢不可破地方含怨李錫秦係該省按察司奏其巡撫偏刻之處未必屬虛究係屬員不便即降諭旨可密諭策楞將單內情由秉公確查具摺速奏○工部議覆湖廣總督鄂彌達疏稱荊門州屬之沙洋地方逼近江漢隄岸最為危險前經題建石磯並增月隄歲

修料理需員請移安陸府黃蓬山同知駐其地以收險工實效潛江縣四面皆隄如澤口蘆荻等處在在緊要請移荊門州麗陽司巡檢改駐潛江與該主簿分地管理天門鍾祥二縣俱當漢水之衝請移天門縣縣丞駐岳家口移鍾祥縣縣丞駐石碑俾各管要工應如所請各官應建衙署應令該督於沙洋隄工生息銀內動用從之○丙寅春分朔日於東郊

上親詣行禮○諭軍機大臣等查辦官莊地畝被災一事朕恐內務府官員往查未清且滋弊端是以面諭那蘇圖留心稽察近據伊奏報轉多遺漏現在交伊另行查奏又如查辦間款銀兩俱未明晰經部駁查伊覆奏時仍未清楚現在該部查核那蘇圖不數月間辦理此等事件俱未能詳慎其從前在廣東任內叅奏融懷營叅將馬國柱年近七旬精力衰憊朕聞其時該叅將實止五十六歲現在

尚未衰頽。已降諭旨。令其赴部引見。總督統轄全省。所辦事務。皆關緊要。而直隸地方。旗民雜處。並無巡撫分理。更不同於他省。任專責重。必事事詳慎。乃於地方有益。爾等可傳諭那蘇圖。嗣後務須加意經理。毋得仍前疎忽。○是月。兩江總督尹繼善。議覆提臣吳進義奏。請將川沙營所轄海岸之老洪墩。擇地重建。俾商船營艘有所標指等語。旋飭該地文武各員。履勘據稱。南匯縣境內海灘舊有老洪墩一座。歲久坍塌。尚存基址。此處南通大洋北達湖巷。為商船營艘收口之區。誠不可不立以標準。且對渡即係崇明。又為私鹽潛頓之所。巡防亦不可不嚴。應如所請。於舊墩之西南隄內。築臺一座。並建營房二十四間。派兵防守。得旨著照所議行。○尹繼善會同魏定國。議覆安徽按察使都隆額條奏。酌借社穀。修浚陂塘。一摺。查社穀藉以補助。例不移作別用。雖借修陂塘與別項挪用不同。

但陂塘原應民力自修。如概許按畝指借。則穀少處既難徧給。充餘處亦恐滋冒濫。陂塘未收利益。倉儲先致空虛。臣等公同酌議。應令州縣官每年躬巡境內。凡舊有陂塘處。或疏浚寬深。或增修隄埝。勸民廣為興舉。即江北向少池塘。亦宜相度濬治。以資灌溉。仍照民修向例。業佃自為經理。毋庸概借倉穀。惟遇旱澇。民力實屬艱難。或窮民自為耕作。並無業戶資其工本者。均准借給倉穀。成熟後免息還倉。并令該管道府按冊履勘。如有修浚不實。捏報情弊。即將州縣叅處。得旨所議是。妥為之。○江蘇巡撫陳大受。奏前據布政使安寧奏。稱江蘇各屬。自乾隆元年。至九年。未完錢糧。積二百餘萬。今丙寅年。錢糧蒙恩蠲免。趁此餘閒。可以料理。請委員徹底清釐。續奉諭旨。清查錢糧。徒致滋擾。俟開徵之年。妥商辦理。竊思未完錢糧。如俱實欠在民。惟應設法催徵。毋庸滋擾。但其內役蝕之數。非

按戶查對。不能明晰。本年蠲免錢糧。印官閒暇。宜令從容查辦。擬飭州縣設局內署。將節年簿串彙齊查核。如有積弊。即將經手胥役究問。不得擾及糧戶。得旨。總在汝等平時實力稽察耳。今欲趁此官有餘閒。而為清釐之舉。亦可。但不可使百姓知有此事。而滋擾則善矣。○福建巡撫周學健奏。閩省上年七月天時亢旱。雖續經得雨。而被旱稍久之福州。福寧。泉州。三府屬。間有收成歉薄處。現飭各該縣親行巡察。其有實係貧戶。即借給倉穀。趕種春花。以資接濟。若米價昂貴。再酌減價平糶。至澎湖地方。上年八月被風後。業飭道府加意撫綏。無使民食缺之現。惟諭令撥運倉穀。豫籌平糶。熟察通省情形。上游各府米糧尚屬充裕。至福興。漳泉一帶。青黃不接時。必得大加平糶。方於民食有益。自當隨時酌量。以平市價。而濟民艱。得旨。觀諸籌畫之策。足慰朕懷。○湖南巡撫楊錫紱奏。欽奉恩旨。

蠲免湖南本年地丁錢糧。耗銀亦緩至明年帶完。浩蕩之恩。曠代罕有。查湖南徵糧冊籍。並不逐戶按產開造。族大者數十家總一戶名。族小者數家總一戶名。每年州縣雖報通完。實則民間完欠。在官不能細分。吏胥因得包攬入已。挪新掩舊。積弊叢生。今年錢糧既免。挪掩之技已窮。勢必仍誑花戶重完。或更捏造名色。科派需索。以抵侵項。現檄藩司轉飭各屬。務於上年未完錢糧內。將包攬侵蝕之弊。逐一查出。并於總戶之下。督開細戶。以杜攬侵弊源。得旨。惟在實力妥辦。勉之。○川陝總督大學士公慶復奏。瞻對軍營。自提臣李質粹移駐中路木魯工之後。節據咨報。松潘鎮宋宗璋。建昌鎮袁士弼。分攻底朱等寨。雖稱燒燬碉樓多座。并稱土酋班滾自燒碉房乞降。並無作何攻敵情形。及臣咨催進攻。又復兩請添兵。不思尅期奏捷。其松潘鎮等前赴納洪多等寨攻擊之處。亦第虛張聲勢。

具報不實。并因官兵乏水。不能久駐。暫回臘蓋大營。至南路夔州協副將馬良柱。自進攻下曲工之後。因道險雪阻。糧運維艱。并冷宗鼎土兵私回。兵力愈單。亦未即前進。查南路兵威素震。惟因中北兩路不能進攻。而眾番并拒南路。兼以冷宗鼎之兵私回。兵勢單弱。遂為賊番窺伺。現在提臣已調巴塘土兵前往。冷宗鼎亦派土兵千名協攻。如兩路兵已到營。則南路無須添兵。臣即撥建昌鎮泰寧協二屬兵。星赴中路。奮力協攻。得旨覽奏。俱悉。李質粹等全無調遣奮勇之志。甚辜朕恩也。○又奏前奉諭旨。李質粹似當領兵前進。以壯聲援。其李質粹所駐之處。即令臣前往駐劄。就近調度。因於本月初四日。至打箭爐。即擬出口。緣聞軍營辦理不實。糧餉亦需豫籌。擬調該管道員詢問。暫駐數日。據明正土司稟稱。自上年提臣兵駐東俄洛。已及五月。就近柴草俱已用完。今若駐彼。一切柴草須

至爐地購覓。而冰雪蓋地。駝運實艱。應請就爐駐劄。嗣據爐同知查覆屬實。隨於口外四馬塘暫駐。與東俄洛相距百餘里。諸事自可相機調度。請俟雪消草生。再為酌量前進。得旨。此事應速為定局。況出師已逾七月。而軍餉用至百萬。不知李質粹等所為何事耶。宜傳旨申飭之。卿其益殫嘉謀。鼓勵士氣。庶膚功早奏。邊境永寧。方不負朕委任之意。若夫苟且了事。以顧目前。朕知卿斷不出此。而李質粹等若有此意。卿不可不督責之。○又奏。瞻對軍務。久未告竣。皆由軍營提鎮因循捏報所致。經臣叅奏。並請添調官兵接應。區區小醜。自當立殄。但賊酋負固死守。以老我師。須得一熟悉賊營形勢之人嚮導。庶擒滅更易。臣抵西爐。訪有監犯革松結。原係瞻對之喇滾副土官。與班滾有仇。願出死力。務擒班滾。以為報効。再有班滾之異母弟二班滾者。前被班滾謀害。其同母弟俄木丁。現居賊巢。

亦懷怨圖報。當傳明正土守備汪結詢問。汪結亦願保革松結前往舊巢。暗會伊家屬。并俄木丁糾合土兵內應。一鼓可擒。臣因軍機嚴密。恐致洩露。即冒昧密交汪結具領保出。前往辦理。倘有疎失。臣咎難辭。懇敕部嚴加議處。得旨。此係卿權宜辦理之事。何罪之有。知道了。○陝西巡撫陳宏謀奏陝省常平倉穀共三百三十萬餘石。定例每年存七糶三。出陳易新。但民間利於借。不利於糶。前與督臣酌定規條。及時出借。每當青黃不接。米價不致大昂。窮民頗得其益。春借秋還。欠者亦少。惟西、同、二府積欠日多。其中捏冒包侵。皆所不免。幸去秋豐收。可以暫停出借。乘此亦得清查舊欠。倉儲不致有虧。至社倉穀本亦經酌定條例。及時出借。接濟農民。并慎選社正副。分別勸懲。民間就近借穀。取攜甚便。始知社倉之有益。適值豐收。輸捐踴躍。自此經理得人。斂散如法。源源生息。積漸加多。可備

救荒一策。得旨。惟在得人辦理而已。知道了。

大清高宗法天隆運至誠先覺體元立極敷文奮武孝慈神聖純皇帝實錄卷之二百五十九

大清高宗法天隆運至誠先覺體元立極敷文奮武孝慈神聖純皇帝實錄卷之二百六十

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣等謹

總纂官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級直隸內大臣戶部尚書鑲藍旗滿洲都統軍功紀錄五次

尋常紀錄十四次臣等謹將經筵講官太子少保工部尚書紀錄六次臣等謹將經筵講官

敕修

乾隆十一年丙寅三月丁卯朔日食○遣官祭

實錄卷二百六十一

關帝廟○省釋軍流年久人犯諭自古明罰勅法所以弼教而大辟之外又設有軍流之條此即移郊移遂屏諸寄焚之遺意也朕今歲特沛恩綸將斬絞人犯量加酌減大辟人犯情罪較重尚已從寬典而軍流者從前所犯情罪較輕使之遠離故土殊堪憫惻其令直省督撫各就所在地方將從前軍流人犯內已過十年安分守法已無過犯者分別咨部核議該部奏請省釋其有居住已久自

能謀生不願回籍者聽○又諭據湖廣總督

鄂彌達等奏稱湖北按察使石去浮父母年

俱八旬懇恩終養等語石去浮准其回籍養

親湖北按察使員缺著徐杞前往署理○廣

西安平土知州李肇故以其子李伯襲職○

戊辰

上詣

皇太后宮問安○諭軍機大臣等鳳陽關監督

普福應追免過銅觔水腳加艙剝船等銀一

實錄卷二百六十二

案伊奏請將伊在京房產交官并請回京朕

已降旨加恩寬限十年令其還項此案因普

福有意市恩於前又復多方掩飾於後自應

如數追賠以還官項已於伊摺內批諭矣爾

等可傳諭普福伊現在監督任內令其於養

廉內酌量十分節省一年可交還幾何定數

交爾等轉奏○禮科給事中劉方藹奏前因

直省城垣多缺諭各督撫留心整飭據撫臣

碩色奏請分別工程一千兩以上者俟以工

代賑之年。動項興修。一千兩以內者。令該州縣分年修補。除土方小工。酌用民力外。餘於公費項下支修。夫同此城垣。同為編戶。固當一視同仁。乃彼縣工程多者。給以夫直。此縣工程少者。俾任空勞。明明歧視。此疆彼界。何以平其心。而使之帖然服役。且地方官。以酌用民力之呼應艱難。或寬估以就千兩以上之興修動項。則工程轉至多費。碩色所奏。原未能周詳允協。各督撫難於照辦。不得已而開捐土方。或官捐養廉。又請按田起夫。暫借稅息。紛紛摺奏。在各督撫皆熟計土方小工。酌用民力。必不免偏累佃田之家。傭力之民。於勞則未均。於勢則難強。於事則難濟。所以合羣策而不得一用民。勿累民之善術也。臣愚以為酌用民力。又窘於無法可設。勢必至增征力役。可否將州縣城垣。無論工程千兩上下。統令動項修補。俾天下佃田食力之窮民。勿致苦累。得旨。劉方藹所奏是。著照所請。

行。該部知道。○戶部議准。署廣西巡撫託庸疏稱。鼓鑄青錢。所需銅勛。點錫等項。應遵題定之額配搭。所需耗銅。照依湯丹廠銅之例。每百勛補色八勛。覈算加結。彙入各廠加耗項下動支。再粵西客銅。俱從滇南販來。各商銅本需貲。應照時價。每勛給銀一錢三分。與原議收買餘銅十三兩之價相符。應照數動給。從之。又議准。漕運總督顧琮疏稱。各省漕白糧船。淮放行月錢糧。奉部議。此項銀兩。例應糧道親帶赴淮。於各幫過淮時。照數給發。不得仍交弁丁領解。查各省糧道。所押幫船。多少遠近不同。兌開遲早不一。必俟最後之幫開竣。方得赴幫督察。且各幫過江後。每有別省幫船間雜行走。稽查督儻。往來靡定。若將淮放銀兩。飭令帶解。先期到淮。恐後進各幫。無員約束。若令儻押後幫。則首進之幫。又難免守候領銀之累。應請仍令糧道兌準。封給領運千總解淮。俟過淮時。呈驗散給。從

之。○又議准直隸總督那蘇圖疏請直屬州縣回贖民典旗地酌定各條款。一贖價宜按年遞減查原議在十年以內者照原價十年以外者減十分之一必至二十年始減十分之二所給價值未免偏枯應令按年遞減其原價較時價過重者令該督查照原題務使地畝價值兩得其平。一詳驗原契較對原冊并查明原典分別作準查從前造報冊內有與契載年分不符銀地各數多寡互異者自應驗契據實更正應令逐案詳查質証時價造冊報部并將轉典地畝無論價值多寡總以原典價為準按年減價取贖其轉典價重者原典之人完補。一依次取贖毋得攙越查原議行令挨次取贖民典旗地者恐有爭先告贖臨時規避如典主果事故遠出而泥於鱗序辦理非惟回贖無期抑且虛懸帑項自應挨次取贖倘典主有意支延中保通同徇隱者查究。一原典莊窠場園等地宜一例取

贖查前項莊窠場園原係老園旗地無論典價多少均照原價一例減贖則旗地歸旗不致牽混其有民人於原典旗地內已造墳塋者丈明畝數照頭等租數聽民租賃造清冊二本一送該旗一存部備考。一業主備價回贖之案宜查明辦理查直屬各州縣民典旗地有原業備價自行回贖者各該旗咨部即於原冊內開除應令將現在報稱原業贖去者造冊送部倘有私相典售即照隱匿官田例治罪該叅佐領并地方官議處從之。○工部議准直隸河道總督高斌疏請香河汎狼兒窩縷隄大溜頂衝應急建築月隄一道以資捍禦從之。○賞卹南河陳家浦下埽身溺兵丁錢永泰等十一名如例。○四川龍安府土通判王懋恩故以其子王沆襲職。○已巳遣官祭昭忠祠。○諭曰湖南布政使長柱著來京候旨徐杞朕昨降旨令其署湖北按察使伊尚未起行且原係布政使著補授長柱

之缺。其湖北按察使員缺。著登州府知府徐琳補授。登州府知府員缺。著華斌補授。青州府知府員缺。著德州知州劉元錫補授。○又諭。據尹繼善奏稱。江寧府知府官保不宜外任。可否送部引見。作何酌用。伏候欽定。揚州府知府高士鎰。年近七旬。精力衰憊。相應請旨。勒令休致等語。知府承上接下。一郡民生休戚繫焉。所應留心甄別。不可使不稱職者廁位。重累吾民。尹繼善所奏。是官保著來京。以京員用。高士鎰著以原官休致。江寧府知府員缺。著蔡長澐補授。揚州府知府員缺。著曹涵補授。○蠲免直隸鹽山。鉅鹿。保安。萬全。蔚縣。西寧。懷來。昌平。八州縣。乾隆十年分。水災額賦有差。○庚午。工部議准。署兩淮鹽政吉慶疏請。三汊河道。袤延六十餘里。深淺不一。有水勢過淺。應挑濬者。有水勢略淺。止須撈濬者。共二十六段。長三千五百五十丈。俱應及時通濬。從之。○辛未。

上詣

皇太后宮問安。○戶部議覆。福建巡撫周學健奏稱。臺灣供粟。自乾隆元年。至十年。歷欠穀九十九萬九千餘石。完補無期。另行籌畫各事宜。○未運內地平糶穀。宜酌變通。查臺運平糶穀。年額徵解一十六萬九千六百七十餘石。自二年至十年未運。是平糶已無藉此。而臺郡積存粟穀。更無可撥。其年額徵收供粟。又僅敷臺澎內地兵食。嗣後倘有應在臺購買運補內地平糶之處。隨時酌辦。毋庸定額撥運。○節年未運補內地兵米穀石。宜分年帶運。查撥運穀。係臺厦往來商船。按梁頭搭運。赴內地交收。每船自一百石至三百石而止。從未整船裝運。是以歷欠穀三十四萬九千餘石。應請嗣後隨年額運穀。每年帶運七萬石。自十一年為始。分五年運完。○嚴定運粟遲延處分。查從前撥運歷欠。固由運額太多。徵買未足。亦任意遲延所致。此後畫清

年款止就實存穀石。按年撥運。自該年正月為始。至歲底通完。倘該廳縣未報通完。或已報通完。而臺防同知。歲內仍不全行配運者。一併報參。一在洋遭風。宜覈實題豁。查船商已至內港。因駕駛不慎。漂失穀石。及雖在外洋。而擊碎船隻。無實在形跡可驗者。仍著落行保船戶。照時價賠補外。其有在外洋遭風船隻。舵水漂失無跡。及在外洋衝礁擊碎。有實在形跡可驗者。俱切結報部。俟歲底彙案題豁。一各倉積貯。宜酌定實數。以備撥運。查福興、漳泉、四府倉儲。不能不仰藉臺郡。然必臺郡積穀先充。方可隨時撥運。應請十一年春間。將司庫現銀。撥七八萬。運交臺灣府庫。分發各廳縣。於秋成後。向里民收買餘粟。二十萬石。分貯各倉。并俟民欠供粟。及應買穀石。徵完買足後。湊足四十萬石。作為定額。遇有撥發。隨時發價赴臺買補。從之。○壬申。軍機大臣等議奏。據順天府尹蔣炳奏稱。民典

旗地。令地方官領帑回贖。交官徵租。徒為土豪胥役侵漁。不如於贖出時。即交旗人管業。不必更定官租。查贖出地畝。皆先儘原主取贖。必原主不願取贖。始令各旗官兵認買。或贖或買。必查覈明確。方按名給與。其間必須時日。斷難於甫經贖出時。即交旗人管業。應仍照在官徵租之例辦理。至該府尹又稱。向日旗地。每畝收租。係二錢三錢者。今所定官租。每畝自六分至錢許不等。土豪胥役。遂將地畝包攬。仍照原額。轉租佃民。從中取利。再地畝多寡。必原業旗人。方知實數。去冬贖地。但憑民人首報。未經傳問旗人。以致隱匿。查該部原議內。地方官於贖地時。查明現種之人。與現出之租。將佃戶租銀數目。造冊三本。一存地方官。一送戶部存查。一咨該旗備案。又令該督通飭各地方官。毋得草率徇縱。滋弊。倘有旗民夥開浮價。誣報分用情弊。照例治罪。地畝入官。種種獎竇。皆立法剔除。何以

去冬贖地時。祇憑民人首報。致仍有如該府尹所稱等弊。現在總督那蘇圖。酌定條款。復將從前所送冊內錯漏之處。俱令驗明契紙。據實更正。其從前遺漏之案。亦令另行續報。該部定議覆准。應令該督嚴行查察。照例妥辦。毋得仍前草率。再查該督現在報部所贖之地。自必照原議現出之租辦理。今所報固安。滄州。赤城。三處租數。每畝自二三分起。至二錢不等。誠如該府尹所稱二三錢者。僅六分至錢許。則現租與原租。太覺懸殊。侵隱包攬之弊。勢所不免。此項租銀。留為將來贖地之用。豈可過於減輕。且旗人贖買之後。照此收租。必較原租短少。於旗民均無裨益。徒為土豪胥役中飽。應請一併勅交該督詳悉查核。妥協辦理報部。得旨。現今高斌。劉於義。在直隸地方。辦理水利工程。於各處情形。知之必悉。著會同那蘇圖。妥商辦理。高斌此時差往南河。有查勘事務。即著劉於義先行商辦。

○癸酉。諭軍機大臣等。叅革同知周涌虧空一案。於雍正九年。業將伊弟周潼田產入官變價。陳大受。誤引十三年恩詔豁免。請將變價在先之產。於別款內撥還。似此辦理。殊屬市恩。部駁甚是。爾等可傳諭申飭之。○鑄給新設蒙古卡倫站。拉林多渾站。驛記。從寧古塔將軍巴靈阿請也。○雲南南澗土縣丞阿抱琛故。以其子阿紹唐襲職。○甲戌。

上詣

皇太后宮問安。○詣

大高殿行禮。○詣

安佑宮行禮。○幸圓明園。○遣官祭

先醫之神。○遣官祭賢良祠。○諭據鄂彌達

叅奏湖南長沙府知府葉建封。為考場提調。

視考試為無足重輕之事。一切委之善化典

史沈心培。而提調則與學政罕得會面。并點

名送學等事。亦不到。以至如掉包搶銀招搖

撞騙等事。不一而足。其所取案首。多係傳遞

代倩之人而武童尤多不公。士論不服。且有一處府首。係有人包伊進學。嗣因招覆無名。本生吵鬧。府署之人倒賊退銀。方得安息。又學政汪師韓縱容妻弟家人。向各學需索門禮。及供給硃油等項。致各教官勒限生童幫助雜費。種種滋弊等語。汪師韓葉建封俱著解任。交與湖南巡撫楊錫綏。貴州布政使愛必達。將各案情由。及有名人犯逐一案審明。確秉公定擬具奏。○賑給雲南白鹽井地方。

乾隆九年分災民。并豁除補給各竈新本銀四百七十八兩零。○乙亥。諭據陝西巡撫陳宏謀奏稱。西安府知府藍欽奎。以母年逾八十。遠在粵東。不能迎養等語。藍欽奎人尚可用。著調往隣省江西。交與巡撫塞楞額。遇有知府缺出題補。俾得就近迎養。其該撫所請西安府等缺。著該部議奏。○夷使哈柳至京。進表請安。並貢方物。準噶爾台吉策妄多爾濟那木扎勒表稱。蒙

大皇帝加恩我父。內外和好。我父因仰體大皇帝宣揚黃教。奠定蒼生之意。恭順遵循。今我父已故。竊欲勉繼父志。照舊行事。以承恩典。現擬遣人往西藏念經。為我父修行善事。循例先遣數人。輕騎前往。懺悔獻茶。而回。繼令念大經人衆進藏。以宣黃教。伏祈

大皇帝睿鑒。謹遣使臣恭請萬安。並貢貂皮四十一張。報聞。○丙子。諭據大學士慶復奏稱。瞻對用兵。中路總統建昌鎮總兵袁士弼。以招降為事。雖屢經據報攻克多寨。而逆酋班滾。尚未授首。經臣親行出口。始知其所報之處。俱不著實。請將袁士弼革職留任。并革去總統。仍帶原領官兵。實力効用等語。總統為領兵之大員。須同心共濟。奮勇當先。方稱任使。袁士弼既觀望於前。復又捏飾於後。著革職。并革去總統。姑從所請。仍留總兵之任。効力贖罪。至北路總統松潘鎮總兵宋宗璋。始雖意在招降。後能聽從調遣。姑免處分。令其

協力進攻。以觀後效。若再因循推諉。即行叅奏。提督李質粹三路總統。俱其管轄。乃隨聲附和。漫無可否。實負任使之意。著傳旨嚴行申飭。即令其統領各路官兵。會合擒剿。速奏膚功。如仍有瞻顧怠玩之處。朕不姑貸也。○又諭軍機大臣等。瞻對用兵一事。慶復、紀山等。初辦理時。並未將彼處地勢。番子情形。詳悉籌畫。視為極易。旋經陸續奏報。招降數人。燒毀樓房數間。並搜獲軍器。朕仍批諭以此等小捷。不足言功。務期拏獲賊首。迅奏膚功。使地方安堵。今覽慶復所奏。從前奏報此等小捷。尚有李質粹捏報之辭。至慶復身臨其境。方知此等情弊。李質粹、袁士弼等。即應治罪。但慶復請令伊等効力贖罪。著照所請。暫行寬免。以觀後效。伊等皆係棄瑕錄用。著慶復留心察看。倘仍不知奮勉。於事無濟。將伊等。即交塔爾瑪善弩三管轄約束。不過勒捕一么麼小醜。致調兵萬餘。動帑百萬。而班滾

尚抗拒我兵。今事已如此。務將首匪拏獲。平定該處地土方可。慶復雖竭力奮勉辦理。但用兵以深悉敵情。迅速進取為要。固不可輕舉妄動。然亦不可老師不戰也。今我軍進攻七月有餘。尚未能破其巢穴。此皆由伊等從前未曾詳悉籌畫之故。著密諭慶復。看此情形。伊等蓋以為巢穴難破。倘仍前因循辦理。不但非伊等辦理初心。且於國家威名。亦大有關係。伊務須加意遵奉此旨。籌畫迅速。肅清地方。將此事率兵進剿。竭力掃除餘孽。肅清地方。將此旨亦密諭紀山知之。○丁丑。上幸靜宜園。駐蹕翌日如之。○遣官祭歷代帝王廟。○以陝西潼關協副將金貴。為河州鎮總兵官。○戊寅。軍機大臣等議覆。川陝總督大學士公慶復密陳瞻對情形。併續調官兵一摺。據稱上下瞻對。在打箭爐口外地既險阻。人復兇頑。上年初剿。提臣李質粹調遣尚屬合宜。將士亦各奮勇。是以上瞻對

應襲肯朱。即交印投誠。下膽對賊酋班滾。雖言詞不遜。而心膽怯懦。亦屢乞降。隣近各土司。俱畏威不敢附和。不料軍營提鎮。始而玩忽。繼而捏報。號令不一。賞罰多不嚴明。兵丁病孱者。不知裁退。器械銹壞者。不知更換。將弁氣沮。士卒離心。現在賊勢益張。夾壩四出。而我兵因循株守。或言待其鎗藥已盡。自必困窮。或言阻其春耕。自必缺乏。細訪該地原產硝黃。賊番多用原根等草為食。且隣近附和土司。及野番等。亦有暗相遺贈。要皆揣度之詞。豈可執為困賊之計。提臣亦自知其誤。始連請添兵。另行妥辦。臣今既出口。訪悉前情。急為籌辦。所有各將士。查覈向來功過。分別獎斥。有患病孱弱者。查驗發回調養。以前功績。仍行備錄。原調時有老弱充數。並未立功績者。即行發回。器械銹鈍廢壞者。即於徽回兵丁內挑換。其無可挑換者。即於隣近營分選撥。但揆厥形勢。即班滾就擒。辦理善後。

亦屬不易。而現兵不無勞疲。自宜酌添。以備更換差遣。況今班滾後路雖有防兵。尚屬單薄。須速為接應。而西寧等處。為其後路接壤。自應即調西兵協濟。惟是添兵又須籌餉。查現在軍糧。僅可支至三月間。續議籌辦。寧使有餘。除先後所調漢土各兵外。今擬就近密調川省松潘。川北重慶三鎮所屬。共兵一千名。先赴軍營進攻。并調甘省提標兵一千名。西寧鎮標兵一千名。作為後勁。約計三月杪。俱可到齊。總期五六月間。勦辦藏事等語。應照所請調撥兵丁。酌辦糧餉。得旨依議。速行。○吏部等部議准。山東巡撫喀爾吉善奏。稱惠民縣。為附郭首邑。地濶政繁。須設佐貳分治。查有樂陵縣舊設縣丞一員。應裁歸惠民縣。其官俸役食。仍照原額。應得養廉。亦於各該縣耗羨項下扣除增添。毋庸另給。銜署應於惠民縣另買民地建蓋。從之。○工部議准。直隸河道總督高斌奏。稱查辦直屬水利工。

程應乘春融興舉各事宜。○天津塌河淀之東有舊河形一道。至寧河縣七里海。長三十里餘。七里海之東亦有河形一道。長十九里餘。直達薊運河。應一併開挖。引流歸海。○津城東北一帶瀝水。由高家嘴。經宜興浦。燕家口。賈家口。入於海河。年久淤塞。請就舊有河形開挖。○靜海縣蘆北口一帶。地勢低窪。雨多苦潦。土性斥鹵。乾旱又苦無水。請於蘆北口。接挑河渠。庶村莊瀝水。俱有去路。○南運河捷地汛。宜改挑引河。以免減壩分溜過多之患。得旨依議速行。○以湖南靖五協副將薛璠為浙江黃巖鎮總兵官。○予故一等侯朱震祭葬如例。○奉恩將軍霄格故。以其子慶善襲職。○己卯。諭朕愛育黎元。特降諭旨。將直省錢糧。輪年通免。使之均沾惠澤。查浙江溫台二府所屬玉環山地方。從前棄置海外。雍正六年。設立文武官弁。招徠開墾。現在田地山場。每年額徵本色穀一萬六千四百

九十餘石。又海寧縣有錢塘江海口。南大疊。中小疊之間。天漲沙地。給佃承種。每年應徵銀五千五百二十餘兩。以上二項。與腹內地丁無異。因名為租穀租銀。是以不在所蠲之內。彼邊海之地。土瘠民貧。自當一視同仁。俾免輸將。以安作息。丁卯年。係該省輪免之期。著將此二項一體蠲免。該部即傳諭該督撫知之。○庚辰。諭曰。烏拉齊索倫新滿洲侍衛前鋒護軍。拜唐阿。長槍台站人等。內有身材好馬上步下皆精者。著各該處保舉。令軍機大臣挑選四十名。交護軍統領塔爾瑪善。副都統職銜努三。帶領馳赴總督慶復駐劄處所。聽伊撥往瞻對軍營。慶復所帶成都滿兵。如可撥往。即同此兵一體酌撥。至李質粹等。雖遲緩不前。但塔爾瑪善努三。不知綠營兵丁情性。難以專管。既留李質粹在彼効力。可否仍令李質粹管理之處。交慶復斟酌辦理。俟瞻對事竣後。塔爾瑪善努三。即由彼前赴

北路軍營換班伊等所帶之官兵仍著回京。此次前往塔爾瑪善努三各賞銀四百兩。侍衛等各賞銀一百五十兩。護軍拜唐阿等各賞銀一百兩。俾資治辦行裝作速起程。○辛巳清明節上詣

安佑宮行禮。○遣官祭

永陵

福陵

昭陵

昭西陵

孝陵

孝東陵

景陵

泰陵○遣官祭

端慧皇太子園寢○諭朕子惠元元將直省應徵錢糧輪年蠲免查滇省有官莊地畝一項向係文武各官招佃開墾收租取息又有各營生息田畝及義田等項著照湖南城綏入官田畝之例

俱免租十分之三。使農民均沾恩澤。今歲係滇省免賦之年。該部即遵諭速行。○又諭據雲南總督張允隨奏稱。昭通鎮總兵董芳現任丁憂。例應回籍守制。開化鎮總兵賽都患病。呈請解任調理等語。賽都著准其解任回旗調理。所遺開化鎮總兵員缺著臨元鎮總兵鄭文煥調補。其臨元鎮總兵員缺著湖南永綏副將徐啟新補授。昭通鎮總兵員缺著楚姚鎮總兵冶大雄調補。其楚姚鎮總兵員缺著廣西新太副將張廷柱補授。○又諭太原鎮員缺緊要。馮吉品不能勝任。著天津總兵羅俊調補。其所遺員缺著馮吉品前往革職留任。効力贖罪。○又諭護軍統領塔爾瑪善現在患病。著派內大臣班第前往。所有照管李質粹効力之處。俱遵照前諭辦理。俟瞻對軍務告竣。班第帶領官兵回京。著賞銀六百兩。以資治裝。其塔爾瑪善痊愈時。著即赴北路軍營。○江西道監察御史范宏賓奏。各省未

完之案甚多。若不清釐。日積月累。官吏更易。必致久懸無考。且不肖者得就中舞弊。請勅六部。將各省未完案件。造冊奏明。行令各督撫。嚴行催辦。各部將一切移咨之案。令各該司。每月造冊詳記事由。及行文日期。隨完隨銷。仍於每月註銷。照例分送科道查核。其未完積案。遵照各省州縣奉到部文查審事件。定限辦理。如不能依限完結。督撫聲明題請展限。逾限不完。又不聲明緣由。該部即行叅處。若該部不行查出。或被科道叅奏。將該部一併察議。得旨允行。下部知之。○工部議准。直隸河道總督高斌議覆。漕運總督顧琮奏。稱添設堡船。疏濬北河各事宜。一。北運河挖淺。係用刮板。所刮仍復漾歸河槽。請排造堡船一百二十隻。與刮板兼用。一。淀河杈夫。每月給銀五錢。遇撈淺之月倍給。照北運河餉銀之例。一。北運河既經添造堡船。杈夫淺夫俱需員督率。應照東西兩淀之例。添設千總

二員。一。北運河長三百六十里。河寬流漫。水無正槽。應照束水壩之法。束水歸槽。於支汊漫灘橫淺之處。層層截障。用通倉變價舊米袋。囊沙緊紮。三路層鋪壩外。水大時聽其漫壩暢行。每袋需變價銀八分。先備用二萬條。試行有效。再請加增。若有餘剩。留備下年之用。一。每年額徵紅剝銀一萬四千五百餘兩。今應動用置造堡船器具。支給夫役工食標竿。買備米袋。共需銀九千八百三十餘兩。餘銀四千七百餘兩。仍留為旗丁起剝之用。從之。○予故二等子兼佐領班代。致祭如例。

大清高宗法天隆運至誠先覺體元立極敷文
奮武孝慈神聖純皇帝實錄卷之二百六十

實錄卷二百六十

三

大清高宗法天隆運至誠先覺體元立極敷文
奮武孝慈神聖純皇帝實錄卷之二百六十一

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次 臣 履桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級 臣 董誥內大臣戶部尚書鑲藍旗滿洲都統軍功紀錄五次

尋常紀錄十四次 臣 德瑛經筵講官太子少保工部尚書紀錄六次 臣 曹振鏞等奉

敕修

乾隆十一年丙寅三月壬午

實錄卷二百六十一

上詣

皇太后宮問安。○還宮。○御紫光閣大幄次賜
準噶爾使臣哈柳等宴

上召見哈柳。諭曰。朕覽爾新台吉奏章欲效法
伊父體朕宣揚黃教奠定蒼生之意冀承恩
典朕甚嘉悅爾老台吉比年以來甚屬恭順
遵循朕旨是以屢加恩眷今已病故深為軫
惜爾新台吉又為伊父懇請遣人往西藏念
經行善事乃理所應為朕自當准其所請但

作為兩次前往。事覺繁瑣。且爾等進藏之人。艱於跋涉。當已深悉。不若作一次前往為妥。朕仍加恩。照前賞給牲畜口糧。中途資助。且為爾老台吉作布施禮。及施恩賞賚之處。現交大臣等查辦豫備。俟爾回時齋往。哈柳跪奏。

大皇帝之旨。大人等先經曉諭。今又面聆

聖訓。俟回時當告知我台吉。敬謹遵行。

上特賜玉如意一枝。謂哈柳曰。此名如意。乃克

遂心願之謂。特賜與爾新台吉者。爾可齋往。

並命賞哈柳玉如意一枝。哈柳叩頭祇領。

上親賜酒三爵。哈柳跪飲而退。○戶部議准甘

肅巡撫黃廷桂疏。稱庫貯官茶。除蘭州廳所

管之甘司。並無番族本地居民。食茶無幾。毋

庸易糧外。其西莊河三司地方。番民錯處。惟

茶是賴。自乾隆八年奉文以糧易茶。共計用

過茶六萬五千五百餘封。易獲雜糧三萬八

千一百餘石。試辦已有成效。嗣後遵照辦理。

從之。○癸未。諭曰。工部侍郎范璨。現告假回籍。伊年力就衰。即來京亦不能辦理部務。著以原品休致。○又諭曰。田懋。朕因其為大學士。田從典之子。加恩擢用至吏部侍郎。乃秉性輕浮。語言不謹。在朕前所奏之事。常洩漏於外。且嗜酒務博。不自檢點。少年而不老成。紈袴之習。至今未除。豈可以居卿貳之首。著解任回籍。令其閉戶讀書。交與該省巡撫管束。不許出外生事。倘日後改過自新。朕再加恩錄用。○又諭曰。刑科給事中程盛修。一摺。內稱六部司員。有從州縣行取推陞者。其中不無可用之才。俾以理繁治劇。似屬駕輕就熟。請於此等人員內。簡用知府等語。夫知府一官。承上接下。最關緊要。朕無時不留意選擇。至於行取知縣一途。朕留心體察。大抵偏僻小邑。並無叅罰案件。以及中等謹慎人員。該上司遂爾保送者居多。其實有卓越之才者。現在必膺繁劇之任。轉未免有處分案件。

而該督撫亦必留於本省。以備臂指之使。此等情形。朕知之最悉。年來並不以行取為要者。職此之由。餘著該部議奏。○諭軍機大臣等。據李繩武奏夷使哈柳來時。向都司閻相師云。此次回去時。求與將軍一見等語。李繩武自調補安西提督以來。尚未奏請巡閱邊界。可傳諭令伊約計夷使回巢之時。前往哈密等處巡視。哈柳回巢經過。欲求見面。不妨與之相見。備飯款待。酌量給與物件。一切相見儀節。務存體統。不可草率從事。○甲申。

上詣

奉先殿。

壽皇殿。行禮。○詣

皇太后宮問安。○諭朕日理政務。不時召見文武大臣。面加諮詢。以期或有裨益。前因九卿奏事到乾清門。朕正在召見諸臣之際。而續降旨召見之臣。以為已事既畢。竟不候而歸。是朕心機務維勤。不敢暇逸。而大臣則已退。

食自公。優游閒適矣。比經降旨申飭。並令奏事官員俟朕辦事畢。傳諭各散。然後退直。近聞得九卿中。有因祇候稍久。而以為勞苦含怨者。夫以候朕理事之頃。不能等待。而急遽若此。古人事君之道。夙夜匪懈。諸臣獨不知之乎。為此特行訓飭。諸臣思之。當自愧於心也。○

賜準噶爾台吉策妄多爾濟那木扎爾勅書曰。朕總理天下。無分內外。一視同仁。惟期普天生靈。各得其所。台吉爾奏稱遵照爾父。仰體朕廣教安生之意。朕甚嘉悅。前爾父仰知朕意。定界以來。敬謹遵奉諭旨。朕屢次加恩體恤。今聞溘逝。深為軫惜。爾奏稱遣人往西藏。諷經。先輕騎減從。前往懺悔。熬茶。回時令諷大經人等。續往諷經等語。為爾父懺悔諷經。理所當行。豈有不准。但分作二次。徒覺繁瑣。爾之人行。走艱難。爾亦知之。當一次全往為妥。朕仍照前施恩。派人照看。賞賜牲畜路費。

又為爾父作布施禮。特恩賞銀滿達。茶桶察喇各一。紅黃香一百束。交與使臣哈柳帶往。又大手帕百條。小手帕千條。茶葉千包。令爾諷經之人。往藏時。由邊界支取。應往人數。何時起程。何日可至邊界。先期豫行報明。又爾使臣哈柳口奏。延請西藏喇嘛。及今年例應來京貿易之人。祈就近在肅州貿易二事。延請西藏喇嘛。前據爾父奏請時。朕即以不便准行。明白降旨矣。至今歲貨物。欲於肅州隨便貿易。此可行之事。准爾所請。交與該地方官。照看貿易。台吉爾一切事務。惟當遵照爾父仰體朕廣教安生之意。敬慎奉行。互相和好。愈敦信實。俾邊氓永享安樂。特勅交使臣哈柳齎回。隨勅賜爾各色緞十端。蟒緞粧緞各八端。玻璃磁器瑤瑯器四十八事。爾其祇領。○乙酉。諭吏部左侍郎員缺。著蔣溥轉補。吏部右侍郎員缺。著歸宣光補授。兵部侍郎員缺。著內閣學士王會汾補授。工部侍郎員

缺。著尹會一補授。俟服闋來京赴任。○諭軍機大臣等。廣東正黃旗協領王文敏。來京引見。朕看其人尚明白。才具亦屬可用。若只就本任陞用。副都統猶覺可惜。可傳諭策楞於叅將副將等缺。酌量奏請轉補。俾得及時效用。○吏科掌印給事中鍾衡奏。候補候選八品以下等官。近奉部議。於本籍地方驗看。應諭直省督撫。照月選官例。詳慎甄別。庶佐雜皆堪効用之人。得旨允行。下部知之。○江西巡撫塞楞額疏報。南昌新建進賢萬載新喻龍泉玉山弋陽鄱陽樂平等十縣。乾隆九年分。開墾老荒續荒。及額外新生田地塘共二十一頃六十六畝。又贛縣開墾贛州衛老荒屯田六十一畝零。○命翰林院侍讀學士朱蘭泰。以原銜充日講起居注官。○丙戌。諭軍機大臣等。瞻對一事。前因慶復紀山奏請用兵。以為一勞

永逸之計。朕是以允行。今遣發兵丁。已陸續增至二萬有餘。兵餉已撥至百餘萬兩。自去年七月進剿。至今春已歷九月。兵衆糧多。曠日持久。尚未奏厥膚功。先次奏報焚毀碉樓。殺傷賊徒。及慶復出口。密加體察。知李質粹等所報之處。並不著實。多係捏飾。慶復不為隱諱。據實叅奏。此處可嘉。但現據慶復又以添兵為請。並奏稱五六月間。務期必克。不知慶復果有真知灼見否。近有人奏稱賊番所居碉樓。或在山頂。或居山腰。地勢險惡。牆垣堅固。藉此抗拒官兵。我兵難施技勇。不知現在彼地情形。果如此否。朕思瞻對不過一隅小醜耳。即盡得其地。亦無改為郡縣之理。可密傳諭與慶復。彼地現在情形。果能如伊所奏。五六月間。全竣軍務否。如若不能。剋期奏功。又將如何布置。著伊通盤籌畫。悉心計議。一一具奏。不可勉強一時。亦不可迴護前說也。尋慶復奏。查瞻對恃其碉樓礮石。肆無忌

憚。前此官兵初到。未諳攻法。近日仰仗天威。攻克兆烏石。甲納溝等處。勢如破竹。俟納洪多溝口。碉寨一克。即可直趨如郎。逆酋班滾勢已窮蹙。其異母弟俄木丁。並從前投誠之上瞻對頭人。騷達邦喇嘛。甲爾溫布。俱願効用。暗為嚮導。臣已密令土守備汪結。由茹色過江。接應大兵。搃其巢穴。五六月間。必能克取。再臣出口以來。留心訪查。番類不一。地方遼濶。事平後。駐兵設營。亦屬無益。臣當仰遵訓諭。盡心籌畫。以期久遠寧謐。得肯卿所見自有成竹。足慰朕懷。然善後之事。不可不豫籌也。○吏部議奏。各省督撫陸續奏到成效事件。雖臚列分明。實無確據。應令嗣後凡奉行案件。現在行有實效者。實力舉行。不使終懈。現雖奉行而急切未見效者。則電勉以期有濟。其每年陳奏之例。改為三年一次。分別繕本具題。不必用摺。其酌量地方。不甚相宜者。隨時聲明具奏。至大學士公訥親原奏內

所稱興學校。端士習。振民風。及農桑樹藝。河渠水利。諸政之應行。興舉造麴燒鍋。賭博健訟。及盜竊打降。崇尚邪教。諸事之應行禁飭者。務令督撫將各州縣境內。某事某事。向日情形若何。今自某年月起。至某年。興舉禁飭若何之處。逐州逐縣。按款分晰。造冊登註。祇須簡明切當。無事鋪張。至各省提鎮。尚有應具題成效事件。亦令就所轄協營。奉行事宜。一體按款分別具題。再部院轉行各省之案。今既責成督撫。其本衙門每年成效事件。本章不必複題。從之。○丁亥。

上耕耤。詣

先農壇行禮。更服至耤田所。

躬耕三推。復加一推。

御觀耕臺。從耕三王各五推。九卿各九推。畢。順

天府府尹率農夫終畝。賞賚耆老農夫如例。

○詣

皇太后宮問安。○軍機大臣等議覆。四川巡撫

紀山具奏軍營糧運事宜。一。據稱軍營糧務。已飛飭地近雅郡之州縣。趕碾軍米一萬五千石。飛運打箭爐接濟。至口外炒麴。去秋採買幾盡。倘有不敷。勢必暫給全米。需米又多一倍。尚須碾米二萬石。趕運備支等語。應如所議速行。一。奏稱各路烏拉缺少。若內地採買騾馬運糧。勢必不及。內地民夫出口。攬運亦恐紛擾。請將運糧蠻夫。按照部落大小。均派人夫。擺列臺站。改長途為轉運。或在爐地稍遠之各土司及各喇嘛寺內。發銀買備烏拉。交現在之運夫管押馱運。現飭糧道妥議詳到酌辦等語。應令於詳到時。斟酌地方情形。務使便於攬運。軍食可以接濟。人夫不至苦累。即行酌定。作速僱辦。得旨。依議速行。○戊子。

上御乾清門聽政。○大學士等議覆。江南總督尹繼善等奏稱。上下兩江河道。應行疏濬。改挑並堆築子堰。修補缺隄。酌建涵洞橋梁。各

事宜查洪溝河現在寬深無庸議挑惟自毛城鋪起東至蕭縣之張家灣西至宿州界止應於兩岸離河稍遠處堅築子堰各一道層層潑水夯礮堅實並將舊有之沈家隄缺處修補完固仍於堰內酌建涵洞開座使民田積水得洩入河過此則為濉河崖高河低無庸議挑惟河形彎曲兩岸淤灘應行挑濬自灰谷堆至霸王城地愈卑窪兩崖高不過一二尺且有與水面平者汛至即溢應於兩岸各築子堰一道至兩岸內地若湖若窪若溝若坡若渠或上接豫省永夏等邑來源或旁納下江銅蕭等處支流並本境各路山泉河渠之水均滙聚於濉通河口門在在皆塞以致民田積水日久不消應疏濬深通並視口門寬窄分建涵洞斗門相機啟閉宣洩其北則蕭縣之王家山天然開河亦由濉溪口入濉前因形勢不順每虞倒灌將開河尾閘另於大山頭南挑河出彭家溝入濉今查大山

頭下地係礪石河底高仰出水不暢仍致灌淤水從窪地東漫若再加挑深則礪石難鑿應於開河舊尾向南改挑使水仍由濉溪口滙流下行將舊尾口門築壩堵截倒灌大山頭下河頭與漫水東注之窪地並築壩築堰彭家溝入濉口門亦應疏通並將天然開河朱家祠堂上下新淤之處一律疏通其下則楊疇陵子土山孟山崔家等五湖原為受水之區現在寬深無庸置議至睢寧之峯山四開其減納之水亦趨五湖開下引河由小朱營至富家窪入孟山湖河勢彎曲多淤水從小家營漫刷溝槽直趨崔家湖形勢頗為直捷應就漫刷溝槽之處再挖寬深以挑河之土培築兩岸子埝併將開下舊埝一並修築至五湖以下之謝家溝由汴河出臨淮口歸洪澤從前雖經挑浚底尾仍高應將謝家溝再加挑挖使入汴順利五湖下流益暢若潁州府淝河出河南之花子坡由鹿邑經上江

之亳州太和等州縣入淮。年久淤塞。夏秋漫溢為患。應擇淺窄處。間段挑挖。改建高大木橋十七座。並將分洩淝水入茨河之宋湯河。一併挑浚。兩岸築土埂。以衛民田。遇田間積水。聽民開放。隨令堵築。又蒙城縣南鄉有黃河北鄉有北淝河。乃通縣坡水所會。淤淺不能容納。應挑挖深通。此上江水利之宜辦理者也。至下江水利。亟應修者。莫如六塘河。上承宿遷縣駱馬湖。至沭陽縣錢家集。分二股。俱入鹽河歸海。從前將上游及南股河岸。均築子堰。但未建涵洞。一遇雨多。積水無出。北股河未築子堰。遇水輒淹。應補築子堰。並各建涵洞。但查駱馬湖發水時。奔騰浩瀚。六塘一河。宣洩不及。查六塘上游有港河一道。自桃源縣河頭集。分承六塘河之水。年久淤淺。應照舊挑通。仍建閘座。酌減三分之二水。即將挑河之土。築成兩岸子堰。至淮屬之山陽鹽城阜寧清河桃源安東等六邑。濱臨黃運兩

河。重壩疊障。民田積水。無路宣洩。雖舊有河溝。又多淤淺。查山陽之吉家橋河。鹽城之九曲河。阜寧之橫溝河。放生河。清河之民便河。史家蕩古河。安東之尤家蕩河。桃源之劉老澗河。學城積水河。俱應挑通。重隄格礙者。酌建閘座涵洞。相機啟閉。築子堰以資收束。建橋梁以便行走。又徐屬之邳州沂河。上承東省邳沂諸水。兩岸舊堰卑薄。應加高培厚。其海州一屬。大川惟沭河為最。發源於東省之馬耳等山。至沭陽縣龍王廟。分為前後二河。前沭河由十字橋出陸家口。歸漣河入海。後沭河由孫家口濫泥洪。歸漣河入海。前雖估築子堰。但前沭河十字橋以下。未經估築。後沭河向無子堰。應一律接築。並建涵洞橋梁。再將湯家溝滂溝蕩。酌量疏浚。其次則海州之青伊湖。上承沭河及諸山之水。下由薔薇河至洪門口入海。但薔薇河淺窄。應大加挑挖。仍於洪門口。改建三洞閘座。以禦海潮。並

將通湖各口挑濬。此下江水利之宜辦理者也。此外尚有支河小港應添修者。另請續辦。其溝渠圩埝有應用民力自行經理者。飭地方官督率料理。其分員管理以及酌定官修民修之處。亦即令該督詳悉妥議。再查協辦大學士高斌久任南河。熟悉河務。現在奉差江南。請將臣等所議交與高斌再行酌覈。分別定議具奏。得旨依議速行。○又議覆江南總督尹繼善等奏稱海州境內鹽河分洩運河之水。由武障義澤六里等河歸北潮河入海。因濟運鹽柴俱行築壩。每遇水漲致南鄉一帶頻年被災。應於武障義澤六里三河口各設石滾水壩數十丈。以高於河底五尺。低於鹽河西岸民田一尺為度。水滿則滾水平則止。有利民田無妨鹽運。令海州州同就近管理。至贛榆縣之三公河係分承縣境小沙河之水。由縣城北入海。年久堵塞致各鎮時有被災。應一律挑浚。均應如該督所請。至所

稱沭河發源於山東莒州馬耳等山。分為二支。入海州漣河歸海。請於馬陵山並沙河兩岸開挑引河。誠為永除海沭水患起見。但查分洩沭水俱由贛邑入海。利沭妨贛。應將馬陵山等處引河無庸議。惟贛榆之圍子河上段淤淺處應開挑深廣。再大沙河兩岸低窪處須加築子堰。以上各工應請一併交與高斌就近查議覆奏。得旨依議速行。○以詹事府詹事沈德潛為內閣學士兼禮部侍郎。以通政使司左通政張映辰為太僕寺卿。○己丑協辦大學士署直隸河道總督劉於義奏天津府屬之慶雲鹽山兩縣災民應行補救事宜。一慶鹽兩邑雖有鹹池及苦水之處。而甜水可以澆灌之地甚多。但百姓無力砌井。查每砌磚井一須物料銀八兩。每井一可灌地五畝。若廣為穿井。小旱之年百姓竟可不餒。可否於水利節省項下。慶雲縣賞給銀一萬兩。可砌磚井一千二百五十。鹽山縣賞給

銀八千兩。可砌磚井一千。再令百姓每年多開土井。以助澆灌。慶雲縣百姓牛少。查直隸布政司庫貯商捐銀十萬兩。原議留為水利城工之用。可否於此內賞銀三千兩。交天津府知府胡文伯委員赴張家口買牛。趕至慶雲縣。令該縣知縣散給無力貧民。田多者戶給一隻。田少者兩三戶共給一隻。庶藉牛力以廣播種。慶雲縣土宜棗杏。每年百姓採取。以助饔飧不足。近因積荒。斫伐稀少。查天津縣庫現貯商人牛兆泰捐賑項下存剩銀二千兩。可否於此內賞銀九百兩。以三分之一株計算。可栽樹三萬株。不論棗杏榆柳。令百姓看管成活。數年後。棗杏可食。榆柳可備材用。得旨著照所請速行。並諭軍機大臣等。協辦大學士尚書劉於義查辦水利。回奏慶雲鹽山兩縣土瘠民貧。積歉之後。種種困苦情形。朕心深為軫惻。其陳奏穿井買牛種樹三條。俱有關於耕作。朕已降旨照所請速行。

矣。惟是立法固欲其利民。而經理當籌其盡善。其種樹一事。尚易辦理。如穿井一事。有苦水甜水之分。惟甜水可資灌溉。官為穿井。分給於民。其地之遠近。何以均霑。民之貧富。何以分別。誰應給以官井。誰應令其自開土井。隨時修葺。何以保無傾圯。永遠為業。何以不起爭端。又如買牛以助其耕種。其自有耕牛者。固不必散給。其無牛力之戶。如何分別給與。至一切餽養收管之法。亦應豫為籌及。以上二事。其辦理之初。固須經理得宜。奉行之後。亦須永垂利益。此時正當東作緊急之時。不可稍有遲緩。著總督那蘇圖率同地方官悉心籌度。派委幹員。作速辦理。一切實心行之。勿視為民間瑣屑之事。可以苟且塞責。務使良法美意。歷久無弊。庶於瘠土民生漸復元氣。可即傳諭知之。有應速辦者。一面辦理。一面奏聞。尋據那蘇圖奏覆。籌辦鹽山慶雲二縣穿井給牛種樹各事宜。並親赴天津查

看情形得旨覽奏俱悉卿親身查察甚當一切妥協為之○庚寅諭軍機大臣等總兵馮吉品年力就衰前在山西太原任內不肯實心辦事營伍廢弛今調用天津再行試看著傳諭那蘇圖留心教導並時加察訪至半年一年之後果能更改從前之習實心効力即據實奏聞若仍前廢弛即行題叅○福建道監察御史朱續經奏法司衙門會覈之案有兩議並陳者主稿衙門或另備夾片中明前議之是指駁後議之非迹涉爭競有關政體主稿之臣所見果確何妨即以夾片所陳再同在議諸臣平心商確在異議者亦當心折或往復論議其言果有可採主稿者亦當屈已聽從共期平允不必存獨是之見昔宋臣程顥與吳師禮談王安石學問錯處曰為我盡達於介甫我亦未敢自以為是如有說願往復此天下公理無彼我果能明辨不有益於介甫必有益於我竊謂宋室諸臣醇正和

平莫如程顥雖以王安石之拗執聞其論事往往心服此正諸臣所宜則倣也請自今會議之案間有異同務於進本前各盡已說平心商榷彼此不存獨是之見倘必不能畫一則兩議並陳靜候聖裁不得另加夾片豫為申說得旨此奏是著照所請行該部知道○辛卯

上詣

皇太后宮問安○諭從前交部議覆事件科道等官往往不待部覆紛紛具奏甚屬非體經鄒一桂陳奏此時朕已降旨訓諭諸臣並令嗣後議覆時將條奏意見參差之處聲明請旨昨據張允隨陳奏卡瓦一事朕已交議政王大臣速議乃未經議覆之先御史彭肇洙即行陳奏以為事不可行前一日少詹事裘曰修亦為此言是從前攙越瀆奏習氣至今未改也人臣從政有體進言有序分職宣猷者廷臣之事也繩愆糾繆者言官之責也即

如一事既已交議。即應候其覆奏。待朕降旨。若廷議未當。而朕旨允行。不妨據所見再行陳奏。亦未為遲。朕不難收回成命以從之。此時廷議未上。朕旨未下。則有何愆可繩。何繆可糾。而豫料廷議之不當。爭先入告。竟若迫不及待者然。若果各據所知。與其拾遺於事後。毋寧匡正於未行。亦未為不可。但此案朕聞議政處羣以為不可行矣。則是人所共知之事。何待急急敷陳乎。若不訓飭。則徒滋紛擾。非政貴有恒。辭尚體要之意也。彭肇洙摺並發。○壬辰。遣官祭黑龍潭。

昭靈沛澤龍王之神。○諭戶部右侍郎傅恒據汝兄傅清奏請踏看藏內附近山中產煤處所等語。此並非伊任內應辦之事。蓋因該處駐劄綠營人等。欲藉此希圖獲利。開挖銀礦。亦未可定。即該處柴薪價值昂貴。實有產煤山廠。亦當作伊自己主見。告知彼處人等。京師之人。皆係挖煤燒用。汝等何不尋產煤

處所挖取。實伊等有益之事。其挖與否聽其自便可也。奚用具奏請旨耶。況西藏乃極邊之地。非內地可比。其生計風俗。自當聽其相沿舊習。毋庸代為經理。所奏非是。汝可寄信曉諭之。○和碩裕親王廣祿等議覆雲南總督張允隨奏稱。永順東南徼外卡瓦葫蘆酋長蚌筑稟稱。其地有茂隆山廠。礦砂大旺。內地民人吳尚賢。赴廠開採。議給山水租銀。不敢收受。情愿納課作貢等語。查卡瓦遠居徼外。獻礦投誠。自宜准其歸附。但祇取慕化之忱誠。何計貢獻之有。無應令該督將在滇夷目人等。善為撫綏。曉諭大義。令其回巢。至吳尚賢以內地民人。潛越界外開礦。並該管官失察之處。均干例議。應查明具奏。從之。○貴州鎮遠府屬土推官楊再瀚故。以其子楊再苾襲職。○癸巳。

上御乾清宮。賜準噶爾來使茶。○甲午。軍機大臣等議覆直隸總督那蘇圖奏稱。嚴禁民人

出山海關酌議四條。一向例近關民人出口。俱由臨榆縣給票。遠方流民。因關口盤詰。有租賃貨物假冒商販。賺票出關之弊。不若從本籍給與印票路引者。更有根據查各省貿易出關人等。既經山海關地方官給票查驗。原議已屬周詳。該督所稱租賃貨物假冒商販。賺票出關之弊。乃是地方官稽察不周。止應令遵照原議實力稽查。若通行各省。將貿易人等俱從本處給與印票路引。事屬紛煩。

應毋庸議。至所稱出關之人。未盡如期回籍銷票者。原議俟年底查明驅逐。應令臨榆縣與守關官弁按季造冊二本。一由永平府轉報存案。一移知該民人所往之州縣。俾其查對。俟應行回籍之時。即可遣逐進關。應如所請。按季造冊。以便隨時稽查。一出邊道路。除山海關外。尚有喜峯口等十五處。向來商販往來。並無給票放行之例。稽查未為嚴密。或有流寓之人。夾雜偷越。亦未可定。應如所議。

喜峯口等十五處。亦照山海關之例。令守口官弁會同各該地方官。逐項查詢。給票放行。仍與奉屬地方官按季關會。其古北口龍井關青山口榆木嶺擦牙子等處。一切外來商販執票赴奉者。俱令從山海關出口。不准由此經行。一各省海船出洋。亦有隨帶民人至奉天者。自應一例稽查。應如所議。行令山東閩廣江浙各督撫。通飭各海口。設法嚴禁。其洋船到奉時。亦令該將軍等查察。如有夾帶

流寓人等。照例遞回。一山海關至古北口沿邊坍塌邊牆。及九關台中後所等處。或易冒險偷越。或係往來稠密。或為各口出入總路。自應一體稽查。應行令古北口提督奉天將軍府尹等。照例辦理。從之。○吏部等部議覆。湖南巡撫楊錫紱奏。稱臨湘縣城陵磯巡檢章彥前往華容縣。免湖垸督築隄工。舟行播鼓臺地方。因風溺斃。應加贈縣主簿銜。給予祭葬銀兩。應如所請。又奏。稱臨湘縣長安驛

驛丞竺文輝往府購買馬匹與章彥附舟同溺亦應酌加賑恤查湖南病故微員回籍向例如原籍直隸者給與銀四十五兩今竺文輝因公溺斃情更可憫應於常例外再給銀四十五兩在公項銀內動支從之○又議覆詹事府少詹事西成奏稱州縣為親民之官不可一日乏人自開缺至題達到部已需時日若遇衰老不稱者改歸下月或別有事故又歸下月未免稽遲請嗣後掣缺官內遇有庸劣不勝任者吏部於過堂時記出合計共有幾缺雙月將其次應選單月將其次應補之人每記一缺擬出二人如本月無應記之員亦擬出四人豫備於考試履歷驗看月官時一體考試驗看另為一本隨月官本一并進呈引見如月官內有改教休致之人即於備員內簡用等語查知州項內應補應選之人甚少除有人時亦每缺擬備一人外若遇無人例歸推陞其推陞者多係外任不能隨

本月月官一同引見難以擬備至知縣單月用應補應選雙月用應補應陞臣等酌議除雙單月內如開復鹽場期滿各學教習滿洲漢軍舉人孝廉方正保薦幕賓外用三品廕生等項俱係插班遇無人即應過班并應陞班內亦多係外任俱無庸擬備外請於月選時各按月分如遇單月將應補捐納進士新進士舉人俸滿教職等項每項各擬一人共六人如遇雙月將進士新進士舉人俸滿教職捐納等項各擬一人共五人此內因本班無人例應抵選者即照例擬抵附於月官末另為一排以備扣除遺缺之用得旨依議速行○兵部議准貴州總督張廣泗疏稱貴州一省與滇川楚粵四省交界處所多係猺獠販棍往來要路應添設汛塘弁兵以資防範事宜查黔省與滇省接壤之區久經安設營汛派撥官兵毋庸更張至黔省與川省接壤之區如合掌礪原設一塘撥兵五名外應再

撥隊目一名。小河壩原設一塘。撥兵二名外。應再撥隊目一名。又鹿池壩應設一塘。撥兵四名。黃家壩應設一塘。撥兵四名。祇坊坪錫廠壩應設一塘。撥兵四名。大田壩應設一塘。撥兵四名。壩得應設一汛。撥外委把總一員。兵五十名。冷水溪應設一塘。即撥壩得汛兵五名。黔省與粵省接壤之區。如西隆州巖戛要隘。應設一塘。撥兵五名。泗城府長隘汛。應撥兵十五名。雅亭應設一塘。即撥長隘汛兵五名。再於中索等處。分設五塘。每塘各撥兵五名。河屯等處。分設五塘。每塘各撥兵五名。黔省與楚省接壤之區。應於藕團增設一塘。將原防不通大路之姚家鄉塘兵。移撥五名。大梁坡。應設一汛。撥弁兵三十名。捍子坳。應設一塘。撥兵十五名。潮水溪。應設一塘。撥兵十名。再黔省荔波縣與粵省慶遠府南丹土州所屬之總王。拉邑。二村接壤。總王。拉邑。舊輸荔波。南丹。兩處錢糧銀各一兩。恐遇有案

件互相推諉。應將兩村就近割歸荔波縣管轄。其舊納南丹錢糧。亦歸併交餉從之。○乙未

上詣

皇太后宮問安。○諭軍機大臣等。朕聞福建水師提督王郡。身體瘦弱。諸事勉強支持。近又頸患熱瘡。精神疲憊。廈門地方。關係緊要。爾等可傳諭詢問馬爾泰。現在王郡病勢如何。不致貽誤地方否。令其據實具奏。○又諭。上年宣化一帶。被旱歉收。朕心深為軫念。屢籌撫恤。加賑。至本年三月為止。前據該督那蘇圖奏稱。加賑之後。正須借糶兼行。以資民食等語。不知現在借糶之事。如何辦理。該處雨雪仍未霑足。且向不種麥。每年止有一熟。停賑後。去秋成尚遠。民食未免艱難。尤宜加意籌畫。或應再加賑一個月。方能接至秋收。著那蘇圖。即行定議奏聞。前降旨撥動通倉米五萬石。運至宣化。續據該督奏明。分派宣化。

懷來保安延慶四州縣以備賑糶。又據奏此項漕米三月內可以運竣。此時均已運到與否。那蘇圖並未奏報。再該督曾奏慶雲縣不敷賑米。並借糶所需。咨部撥運北倉截存漕米二萬石。均已敷用。但該縣地瘠民貧。連歲歉收。今已屆停賑之期。將來小民餬口之資。急應籌畫。可傳諭那蘇圖。令其將經理借糶等事及該處情形。悉心查察。是否仍須接濟之處。一併速行定議奏聞。○又諭曰。福建提督武進陞奏整頓營伍一摺。著抄寄總督馬爾泰。令其閱看。從前閩省營伍一切兵丁技勇軍裝器械支放錢糧馬匹等事。何以廢弛一至於此。豈無有應受其責者乎。今武進陞到任以來。陸續整理之處。果否如摺內所稱。令其查察奏聞。○戶部議覆貴州總督張廣泗疏稱。水城運鉛至威寧州屬柞子廠相距兩大站。運鉛腳價應照威寧之例。每鉛百觔。每站給銀一錢二分零。再該廠四面環夷。通

判駐劄水城。經理地方。勢難逐日赴廠抽查。應添設協辦坐廠之員。其養廉照蓮花砂硃等廠之例。支銀一百二十兩。應如所請。至所稱永寧收兌鉛觔處所各廠俱設書巡辦理。裸木底廠應設書巡四名。給予工食等語。查蓮花砂硃二廠書巡各一名。今裸木等廠應照蓮花等廠之例。毋庸多設糜費。從之。○予故致仕鑲白旗蒙古都統奇爾薩祭葬如例。○丙申。蠲緩湖北省漢川潛江當陽江陵枝江等縣乾隆十年分水災田賦。○予故奉恩輔國公功宜布祭葬如例。謚恪勤。○是月直隸總督那蘇圖奏。接准部咨。以所報官莊被災分數與內務府委員所報不同。行令查覆。查近年官地莊頭多有不報地方官。徑赴內務府自行呈報者。內除香河一縣業於上年咨部。是以前奏未經列入。其靜海縣現在飭查未到。至南皮容城獲鹿房山四處均無詳報被災之案。又新城交河二縣前據該地方

官勘不成災。臣據結聲敘。故與委員所報不同。得旨朕所以令汝密察者。恐地方官與內務府差員作弊也。若如此苟且了事之查察。則多此一事。反不如無矣。且苟且尚可粉飾。甚不可慎之。○又奏臣前辦理官莊被災一案。業經另摺具奏。外其查辦開款銀兩。實因直省歷年借墊款項。至為繁雜。非件件根尋案據。實難得其頭緒。以致尚未明晰。至臣前任兩廣總督時。訪聞叅將馬國柱年近七旬。

不能辦理營務。因札提臣豆斌覆查。無異。隨經據揭題叅。臣疎忽之咎。實所難辭。謹具摺恭謝天恩。得旨以後諸凡留心。直隸總督尤不比他省。事倍繁而地切近。非實有幹濟材。而又公正無私者。率難稱此任。勉之慎之。○福建巡撫周學健奏。向來特旨傳諭事件。未定覆奏限期。每致遲延。現奉嚴旨訓飭。通諭各省督撫。請嗣後凡遵旨寄信查議查奏事件。均分別通行與否。並內地與苗疆海外酌

定期限。逾期者議處。至各省督撫每年奉到廷寄上諭。無論應覆奏與毋庸議奏。請照歲

底彙奏上諭條奏。准行事件之例。每歲二月內將上年所奉廷寄事件。彙摺奏報。得旨此不過於密行事件中。寓勤理政務之意。若明定章程。豈非於法律之外。另生一法律乎。為政在人。正不必以此為亟亟耳。○湖北巡撫開泰奏。遵旨密查總督鄂彌達。現在血氣雖衰。而辦理事件。精神尚能貫注。至於居官聲名。臣到任後。即聞伊跟隨家人中。有受人門包之事。臣留心訪聞。為數無多。督臣似屬不知得旨。非但此也。彼往察南省。令其子拜各屬員。亦間有收受禮物者。操兵則全不閱看。朕亦降旨申飭矣。但此其過尚小。求全責備。朕從不為。若過而弗改。並欺朕而益肆者。亦不肯稍寬。此朕意也。汝應知之。但看其如何耳。○湖南巡撫楊錫紱奏。楚南民習刁頑。屢飭不悛。本年正月內。各屬漕糧。在岳州交兌。

巴陵縣知縣薛澍恐以擠碰壞船濕米論令退讓內有長沙船戶將差役毆打並恃衆辱官三月內安鄉縣民與武陵縣民爭控洲地安鄉縣知縣張綽前往踏勘丈量武陵縣民熊廷士等即糾衆將該縣擁跌并毆傷衙役又花園汛巡檢周元滋因雇夫短價牌頭不肯轉雇差役催督衆鋪戶即關鋪罷市除周元滋業飭司查揭外其餘各犯均應盡法究處得旨不三月而愚民之玩法者凡三見則

平定人字二一

二四

汝湖南之吏治可知尚恬不以為怪全無愧悔則汝不但不能少勝廣西且不如在廣西矣朕甚自愧無知人之明也○又奏楚南嶽麓書院離城十餘里中隔湘江春夏水長士子多因畏涉不肯肄業書院即秋冬水退亦皆因循不往臣查宋時有城南書院與嶽麓並稱業已廢為僧舍城南有長沙協都司舊署臣等各捐廉修葺即改為城南書院現將舊在嶽麓書院各生遴選入內肄業俟仲秋

後仍歸嶽麓歲以為常得旨好書院之說惟期育材不期美譽此意不可不知○大學士管川陝總督公慶復奏臣自二月中出口因東俄洛柴草未便先於四馬塘暫駐今奉旨令臣前進查有靈雀地方離木魯工大營二百里擬就駐劄至軍營將弁因前議招降各圖將就了事而賊酋班滾又因從前誘降窺透底裏益肆鴟張若臣率為前進不足懾其心膽必須振興將士計籌萬全方可一鼓成

實錄卷二六二

三五

擒又糧運為行軍要務今續辦軍糧俱已到爐必須將本月下月之糧運出西爐趕赴軍營第西爐烏拉無多臣起身前往凡駝載軍裝等項俱須雇用及臣到彼烏拉回轉而續調官兵又已到爐更須烏拉應用糧運勢難兼顧現應先儘趕運軍糧約閏三月初可畢臣即於閏三月初前往靈雀此時續調各路兵俱可到齊當就近度機乘勢嚴飭各路官兵直搗賊巢約五六月間即可告竣得旨朕

日夜望卿奏摺。覽奏始畧悉梗概矣。卿所云五六月間必成功者。想卿胸中自有成竹乎。抑亦約畧言之乎。瞻對之役。朕本無興兵之志。皆汝等守土之臣。以為必當為一勞永逸之圖。今永逸尚未可必。而一勞已太勞矣。若果如此奏。則尚可謂收之桑榆。若復尾大不掉。朕與卿等。皆不能免嘉兵勤遠之譏矣。奈何。慎之勉之。

實錄卷二百六十一

三十六

大清高宗法天隆運至誠先覺體元立極敷文奮武孝慈神聖純皇帝實錄卷之二百六十一

大清高宗法天隆運至誠先覺體元立極敷文奮武孝慈神聖純皇帝實錄卷之二百六十二

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加三級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十一年丙寅閏三月丁酉朔諭歷代帝

實錄卷二百六十二

二

王陵寢及聖賢忠烈墳墓向來俱令修葺防護陝西為自古建都之地陵墓最多有不在會典之內者既無圍牆又無陵戶著交於該督撫查明酌築圍牆以禁作踐以資保護該部可傳諭知之○又諭京師冬春以來雖間有雨雪究未霑足朕心久為廛念今穀雨已過未沛甘霖農田待澤甚殷朕憂惕日加計雩祭之期尚在四月此時正當肅修祀典以祈恩膏著該部察例定議敬謹舉行○諭軍

機大臣等。今年直隸地方。春雨不甚調勻。春麥佈種較少。恐將來麥收未必能豐。山東河南二省。冬春雨雪霑足。二麥可望有秋。且彼地麥收較早。著傳諭喀爾吉善。碩色。各豫備麥十萬餘石。以為直省將來接濟之用。其該省有存倉麥石。或另須採辦酌量之處。該撫即行定議具奏。○又諭四川巡撫紀山奏稱。本年正月十四日。貴州銅仁府知府在松桃協差遣弁兵。將黃板寨苗頭龍見布家圍住。放火燒房。打死三四命。龍見布等脫逃。隨即拏住龍見布長子龍老六等二十八名口。至於因何被拏之故。聞係龍見布去歲勾引匪類楊繼美在家教他兒子龍老方等符水迷法抗拒拒提等語。此事尚未見張廣泗奏到。想伊意俟辦理就緒。方行陳奏。但此事因何而起。現在如何辦理。爾等可寄信張廣泗詢問之。○律呂正義後編書成。

御製序曰

皇祖聖祖仁皇帝。建中和之極。通聲氣之元。欽定律歷淵源一書。審推步以明象緯。研數理以備成法。至律呂正義。凡所以定尺考度。制器審音。與夫五聲二變應和之原。析其精微。區其訛舛。古樂之大義明。而千古有定論。今樂之至理具。而千古有正聲。誠所謂惟聖人能之者。顧七政授時。九章布算。至今遵循罔斁。而律呂尚未暇施行。太常之司和聲之署。習其器而不能究其所以然。遂并其所習者而失之。襲謬承譌。不協不度。篇章音節。非重為釐正。不可。和碩莊親王親承皇祖指授。貫徹樂義。尚書張照研窮律本。博習往訓。因命協同考正。朕親加釐定。為器為音。為宮為調。聲之高下。節奏之短長。分判而節比之。合則仍其故。不合則易其辭。更其調。或出自臣工撰述。或出自幾暇親裁。必考義理之原。究制作之本。夫而後

郊

廟所陳。朝會燕饗所奏。律呂各得其宜。歌奏不淆其序。八音克諧。無相奪倫矣。爰詮次成編。俾垂永久。更參稽前代。因革損益之異。為樂器考。樂制考。樂章考。度量權衡考。以備律呂之條貫。復推闡為樂問三十五篇。以申明其旨趣。於是而

聖祖之所為審音定樂。制器協均者。一一施諸實用。自漢魏以迄元明。是非得失之故。瞭然可述。名之曰後編者。實以徵

皇祖天縱聖神。通極造化。千古作者。無能出其範圍。亦無能窺其涯涘。至於繼述

先緒。則在我後人。益疊焉而弗敢忘。○戊戌

上詣

皇太后宮問安。○幸圓明園。○諭軍機大臣等。今年直隸地方。春雨不甚調勻。春麥佈種較少。恐將來麥收未必能豐。已經傳諭山東巡撫喀爾吉善。河南巡撫碩色。令其各豫備麥十萬石。以為接濟直省之用。未知此十萬石。

足資接濟與否。爾等可傳諭那蘇圖察看各府情形。即行據實具奏。尋奏各處麥苗正順。以南長者五六寸。短纔二三寸。保定一帶均止長二三寸。蓋因節候本遲。現在地尚潮潤。若月內再得時雨。二麥均可有收。設天時難定。必需豫東二省麥接濟。查上年麥收甚歉。所撥二十萬石之數。已足敷用。似可照上年之數辦理。得旨覽奏。有紓慰朕懷之意。不知立夏將屆。時雨未霑。朕憂何能釋。亦願卿體

朕心。以為心勤求民瘼。凡事為未雨之綢繆。方足大慰朕懷耳。○軍機大臣等議覆。四川巡撫紀山奏酌辦糧運。據司道等議得。擺站轉運之法。未便行於蠻地。惟有以兩蠻抵一烏拉。於所定腳價外。給以炒麵茶油。尚可權宜辦理。至發銀購買蠻地。別部烏拉一事。實有不得不然之勢。查明正土司。為糧運總匯。分運北路至子龍計七站。一月轉回。南路至裏塘計十一站。四十五日轉回。每月共應運

米三千餘石。又有解運火藥軍裝雜差。且現調兵日增。止存疲乏。烏拉二千五百頭。蠻夫一千名。抵烏拉五百頭。不敷運送。應發價與明正土司買烏拉一千五百頭添運。再子龍糧務。每月應轉運米一千八百餘石。中北兩路官兵將來有增無減。止存烏拉五百頭。每月三運。僅可一千五百石。應請發價與孔撒麻書二土司買烏拉三百頭添運。其裏塘章谷等處。各按烏拉不敷之數。酌核買用。如將來口外炒麵不接。加運全米。倍增烏拉。亦照此購辦。惟是現在辦運各土司部下。所有烏拉。既經倒斃過半。又向別部購買。勢必昂貴。且運糧烏拉。日夜奔馳。較驛遞尤疲倦。請照驛馬之例。每烏拉一頭。無論馬騾牛。給價八兩。准十分倒三。再查驛馬例。以年計。今運糧烏拉。久暫難定。應以月計。每月准報倒二釐五毫。又買備烏拉。既係官物。應請每一頭照例日支草乾銀八分等情。到臣。臣因軍糧緊

急。已照議飭辦等語。均應如所奏辦理。但蠻夫於額外給以炒麵茶油等項。保無侵溢。烏拉一頭。果否應給價八兩。再駝運烏拉。似應牧放。何須餵養。今復議給草乾銀。或有浮開多給之弊。俱應令該撫查核。得旨依議速行。○工部議准。協辦大學士署直隸河道總督劉於義等奏。續勘慶雲鹽山二縣疏濬事宜。六條。一慶雲縣滙水。俱賴馬頰河宣洩。應與山東樂陵海豐等縣交界之處。并大巨河入海河道。開挖寬深。再馬頰河原係直隸山東兩轄。此次開河。令慶雲縣督率辦理。以專責成。仍令山東巡撫轉飭海豐縣協同照管。一慶雲縣城北。應從趙魁斗莊。經高橋賈家莊。白廟海子。王家窪。王可忠等處。開渠一道。引水入老黃河。以為歸宿。並於窪口築高。添設涵洞二。以防黃河倒灌。一慶雲縣高慕臺窪。應照舊挑挖深通。引水入老黃河。以消積潦。一慶雲縣四鄉民溝十六處。前經勸民開挖。

疏通今紀家鋪北等七溝現在深通無庸挑挖外其後馬家莊等溝九處或照前開挖或應接長開挑分別引水入老黃河亭子河及無棣溝等處均應照議開挖並應建設木橋二以便行旅一鹽山縣宣惠河前經挑濬但河身尚淺應再加挑深務期通縣瀝水悉歸老黃河至東省海豐縣應挑河道俱令鹽山縣督率一律挑濬所用土方鹽邑積荒之後民力不敷應照河工定例給與工價一鹽山縣東之明泊窪西北諸水俱匯於此無路宣洩窪內地五百餘頃每致淹沒應挑洩水河一道由釣魚臺程村橋起通至宣惠河俾歸老黃河并將程村橋一律修整工價統於直賑項內動撥從之○命禮部郎中陳豫朋提督湖南學政○己亥諭上年宣化所屬地方被旱歉收朕已疊沛恩施俾災黎不致失所查從前定議賑濟之期至今年二月停止經朕復加恩不分極貧次貧於二月之外再普

行加賑一個月以資接濟今思宣府被災之後春間雨澤又少且彼地不種二麥此時去大田收穫之期尚遠青黃不接窮民難以餬口朕心深為廕念著於三月加賑一月之外再加賑閏三月一個月著即傳諭該督那蘇圖遵旨速行辦理○諭軍機大臣等進剿贍對一事前此未及詳籌勞師費餉曠日持久未奏膚功已降旨傳諭慶復令其通盤計議矣但慶復自二月十七日具奏以後已及一月有餘並未將軍情奏報從來行軍之道貴乎神速況進剿之兵非守防之兵可比其相度機宜督率前進如何調遣如何攻剿之處必須隨時奏報今遲久不奏何由備悉爾等可傳諭慶復令其將現在情形作速陳奏嗣後務須隨時奏聞毋得遲緩並將何以速了此事以善其後令其速議奏聞○又諭朕因宣化被旱歉收加賑之後作何接濟再慶雲縣地瘠民貧連歲歉收今已屆停賑之期令

那蘇圖悉心籌畫。速行定議。於二十九日傳諭之後。至今五日之久。尚未覆奏。從前高斌在直隸時。凡有賑濟傳諭之件。不過三日即行回奏。事關賑恤要務。不可稽延時刻。嗣後務須加意趕辦。其宣化等處。朕已降旨。再加賑。閏三月一個月。並傳諭那蘇圖知之。尋奏宣化慶雲賑務。於本月初一日奉到諭旨。謹於初三日奏覆。至宣化等處。蒙恩再加賑一月。照前銀米豆三色搭賑。其糶借等項事宜。仍各按地方情形。隨時酌量辦理。得旨。以後勉之。慎之。不然。則中言官之窺伺。又將以卿為玩視民瘼矣。○諭從前八旗侍班官員等。酌定一年一週。帶領引見。今值事少之日。該都統大臣等。並不帶領。大約積至年近。始帶引見。何如。及此事少之日。漸次奏帶。令引見之人。不至叢集。而一年內亦可輪班一週。將此諭都統大臣等遵行。庚子。諭上年淮徐等屬被災州縣。經朕屢降諭旨。加恩賑恤。今

春因麥熟尚遠。亦已再行分別加賑。俾間閭不致失所。但思阜寧縣鄰近海濱。地勢窪下。被災較重。非他處可比。聞上年被淹之後。至今淖深數尺。尚難耕種。麥收已復無望。著將被災民戶。竈戶。無論極貧次貧。於停賑之後。再行普賑一個月。俾窮黎接濟有資。不致乏食。該部遵諭速行。○又諭長蘆所屬各州縣。所有乾隆七八九年緩徵帶徵銀兩。今屆開徵之期。雖應依限催輸。以完正課。但念該處連歲荒旱之後。上年雖獲秋收。竈戶究未充裕。若令其並完數年舊欠。未免拮据。著將長蘆所屬各州縣。應完乾隆七八九年帶徵緩徵銀一萬一千一百餘兩。自丙寅年起。分作三年帶徵。以紓竈力。該部遵諭速行。○又諭據高斌尹繼善查奏。楊開鼎奏。白鍾山各款內。任意駁減需索供應等款。俱無實在証據。惟陳家浦漫口一款。其衝刷丈數。興工時日。與夫淹沒受害之處。尚屬有因。而高

斌另摺則稱於陳家浦一工。白鍾山先事之網繆。臨事之措畫。以及善後之機宜。畧無一當。至於深夜水發之時。人口亦有淹斃者。工員解體。輿論不服。不宜仍留總河之任等語。是楊開鼎所奏。並未全虛矣。楊開鼎所奏非虛。則高斌尹繼善此摺。又何必左右便旋。兩為調停耶。朕謂淹斃人口。非災。而諱言淹斃人口。乃真災也。朕之前旨。亦惟開誠布公。欲明其事耳。豈有護於白鍾山。而惡楊開鼎之進言乎。為大臣者。宜悉朕此心。白鍾山著解任來京。交部嚴加議處。其總河印務。著顧琮速往署理。顧琮未到任之先。著高斌暫行管理。俟顧琮到任。將諸務面加講論。明晰。交伊妥辦。至顧琮不必押運北上。其總漕印務。著劉統勲前往署理。高斌尹繼善奏摺併發。○諭軍機大臣等。據那蘇圖奏。稱宣屬地方。向無麥秋。惟期大田收穫。即加賑一月。計秋收之期尚遠。現在宣屬創沙挖河等事。原屬以

工代賑。此外惟有借給口糧籽種。出糶倉穀。一經停賑。於閏三月內。即應接續舉行等語。宣化所屬。朕已降旨。再行加賑。閏三月一個月。其摺內所奏。借糶各事宜。著於四月停賑之後。酌看該地情形。接續辦理。轉飭地方官。加意經理。務使災屬貧民。得資接濟。以待秋成。不致失所。可傳諭那蘇圖知之。○又諭高斌另摺。奏白鍾山辦理河工。種種不妥。應請解任。即其會同尹繼善查奏摺內。其淹斃人口。並未奏報之處。既已確實。自應遵照朕從前所降諭旨。會同尹繼善據實奏。待朕降旨。乃兩摺所奏。語氣不同。顯有遲回瞻顧之意。高斌協辦大學士。專為此等案。前往查勘。事關重大。不應尚存此等識見。著傳旨密行訓飭。○戶部議覆貴州總督兼管巡撫張廣泗疏報。天柱縣屬相公塘東海洞金廠。自乾隆八年開採。至十年以後。礦砂淡薄。廠民工本虧折。日漸散去。相應取結保題封閉。應如

所請從之。○欽差協辦大學士吏部尚書高斌奏查勘陳家浦漫口情形。河臣白鍾山辦理錯誤。以致隄被衝潰。復任其塌卸。至二百餘丈。直俟內地淤高。河溜自回。方興工圍隄。八百餘丈。又築遙越隄一道。工長一千六百餘丈。費銀九千餘兩。殊屬無益。得旨。此奏內陳家浦漫口工程。白鍾山辦理錯誤。所有虛費錢糧。俱著白鍾山賠補。○辛丑。諭陳豫朋年已七十。精力就衰。恐不能勝校閱奔走之勞。提督湖南學政著翰林院編修吳嗣富去。○又諭河南南陽鎮總兵官蕭良金。年逾七旬。精力衰憊。著以原品休致。其員缺著福建興化營副將哈攀龍補授。○又諭直隸州縣中。惟慶雲縣最為寒苦。近年以來。連遇荒歉。朕心深為廕念。昨據那蘇圖奏稱。三月停賑之後。查明成災村莊。酌借口糧。以資接濟。朕又經降旨。發帑買牛。穿井種樹。俾瘠土得有起色。今思本年適值閏月。當此青黃不接之

際。小民謀食。更屬艱難。著於停賑之後。再加賑一個月。可即傳諭那蘇圖。速行辦理。○又諭廣東高雷廉等府屬。多有山場荒地。未曾墾植者。經該督撫委員查出。可墾荒地七萬餘畝。分別等則升科。召民開墾。但聞此等地畝。大抵山岡磽瘠者居多。開墾原非易易。小民未霑收穫之益。先慮升科之累。是以未墾者多。聽其荒蕪。即已經承墾者。亦生畏縮之意。朕思各省生齒日繁。地不加廣。貧民資生無策。前經降旨。無論邊省內地。零星地土。聽民開墾。今高雷廉三府查出可墾山場荒地。實與平埔沃壤不同。著將此項可墾荒地。令該地民人墾種。一概免其升科。并令地方官給與印照。永為世業。以杜紛爭強占之弊。俾小民咸知有利無累。踴躍開闢。庶壤地不致曠閒。窮民食用有賴。著該部傳諭該督撫。知之。○壬寅。漕運總督顧琮奏報米麥價平。民間安貼情形。得旨。欣悅覽之。今令汝署理總

河亦一時不得其人。姑令代俎耳。若仍似直隸總河之為。則不但誤名。兼且誤實。一切虛心諮問高斌而行。慎之戒之。○兵部等部議准廣州將軍錫特庫等議。覆粵東添設水師添防事宜。○兵丁六百名。應於左翼鎮所轄各協營內。照閩省例。撥諸練水師一百名。每名月給餉銀一兩五錢。米三斗。教習行走。再於將軍標各營食餉之旗丁內。撥出一百名。以資挑選頭目領催之用。餘四百名。均於八旗壯丁內挑補。其左翼鎮撥出兵缺。照數募補。一所挑壯丁。領催五百名。仍令居住原舊房屋。將從前裁退各防禦官署。畧加修葺。給與新設協領等官及挑來教習兵丁居住。所需大小船隻。於附近各標營內。撥給操演。一南石頭村地方。水勢寬濶。足以演習水師。該處港汊多歧。即令兵丁。於此處嚴加巡緝查拏。並於村後建造看操廳五間。軍器局。火藥局。各一座。看守兵丁住房三十間。○教習兵

丁百名之盛。甲器械。另行造給。所需礮位在。各營內抽撥。○添設協領一員。佐領二員。防禦二員。驍騎校六員。令該將軍於現駐防官員內。保題補放。嗣後水師缺出。俱於本營官員內。揀選送部引見補放。如駐防陸路官員內。有通曉水師者。亦一體揀選補放。○所挑領催旗丁。照閩省例。每月領催餉銀三兩。披甲二兩。米各一石。○大戰船六隻。每船設木匠艚匠一名。於各營內抽撥。照例給與銀米官房。○協領等官。應照乍浦水師營之例。各養馬匹。以資騎操。其馬乾及協領心紅紙張銀兩。照例支給。○兵六百名。應分兩隊。一隊留營操演。一隊赴船演習。輪流更替。其餘八旗官兵內。除弓匠銅鐵等匠。每庸乘船演習外。所有領催甲兵。及協叅防校等。分為八班。輪流操演。該將軍等。不時稽查。仍於每年春秋二季。輪流親往查看。○新設協領等官。於水師事務。未能熟悉。應於通省熟練水師之

千把內揀選六員令其教習如有成效著該將軍等分別保題送部議敘。○水師協領關防禮部鑄給從之。○癸卯。

上幸瀛臺○詣

皇太后宮問安。○還宮。○戶部議覆貴州總督兼管巡撫事張廣泗疏報思南府屬之天慶寺大河之西九皇閣一帶山內土人挖石淘砂可得金末如有自備工本情願承辦者准其續開具報照例納課又天慶寺山嶺之後即係銅仁地界亦屬深山并無田園廬墓聞有金苗可採亦聽民人試採俟有成效具報升課均應如所請從之。○賑恤甘肅隴西秦州伏羌華亭靜寧金縣涇州皋蘭平涼西寧碾伯肅州十二州縣水旱雹霜等災民。○甲

辰

上御乾清門聽政。○起原任光祿寺卿莊有恭為內閣學士兼禮部侍郎命俟服闋來京辦事。○以詹事府少詹事徐以烜為詹事。○旌

表守正捐軀之浙江富陽縣民宋士錦妻潘氏。○乙巳吏部疏請國史館承辦奏議人員應照八旗志書館之例分別議敘得旨依議。興泰德保周正思郭肇鑽俱著加一級。○戶部議准山東巡撫喀爾吉善疏稱榮城縣被風沙壓各項地畝共一十三頃二十畝有奇額賦無出應請豁免從之。○盛京將軍達勒當阿奏前因盛京宮殿東西紅牆應行修築添設堆撥七處看守現在翔鳳樓飛龍閣銀庫均應修葺所貯金銀書籍等物均移貯鳳凰樓請暫添十八堆撥晝夜巡察工竣撤去四處留十四處長遠看守得旨知道了此係一時添設尚屬相宜若永遠添設則兵丁不免差多受累矣。○丙午

上詣

皇太后宮問安。○甘肅巡撫黃廷桂奏向例準噶爾夷人於子辰申年在肅貿易寅午戌年在京貿易今歲例當在京貿易經夷使哈柳

奏懇將夷貨在肅就近貿易得旨准行查向
年夷貨在肅貿易派委叅將及知州等員照
看并飭委肅州鎮道督率稽查今照例委肅
州鎮許仕盛甘肅道鈕廷彩等就近照看又
經臣等奏明動銀一萬五千兩往江南採辦
紬緞已抵蘭州現在夷貨將到將此項紬緞
交商人李永祚先行交易扣價還官俟伊自
製商貨運到再與夷人兌換庶夷人不致稽
遲回巢時日報聞○命刑部尚書汪由敦署
理都察院左都御史事吏部右侍郎歸宣光
署理工部侍郎事○丁未轉通政使司右通
政胡中藻為左通政○吏部議准直隸總督
那蘇圖疏請永平府屬之七家嶺驛榆關驛
驛丞均兼管巡檢事務并添設弓兵換給鈐
印從之○戊申諭軍機大臣等朕聞直隸今
年雨水不敷之處恐將來麥收未必豐稔諭
令山東河南巡撫各豫備麥十萬石以備直
隸接濟之用並令那蘇圖酌量敷用與否具

奏以聞旋據那蘇圖奏稱直隸各府正順以
南麥苗甚好保定一帶節候本遲大約四月
初旬方能定局容臣屆期再行酌看奏請聖
訓等語朕思此時將交夏令去收麥之期不
遠二省接濟之麥運到直省時必須分撥各
州縣借糶著傳諭那蘇圖早為籌畫豫行定
議奏聞庶不致辦理稽遲○己酉諭詹事府
少詹事員缺著左通政胡中藻調補其左通
政員缺著江西按察使張師載補授江西按
察使員缺著貴州按察使黃岳牧調補貴州
按察使員缺著古州道孫紹武補授○吏部
議准江南總督尹繼善等疏請裁汰銅山縣
東岸驛驛丞改設巡檢一員歸銅沛豐碭兩
廳及銅沛兩縣統轄以河工雜職註冊鑄給
銅山縣鬪虎店巡檢司印所管縷水隄工應
設堡夫堡房及移建衙署確估造冊送部查
覈原管驛馬一百二十匹歸該縣兼管從之
○旌表守正被戕之陝西永壽縣民趙會妻

盧氏守正捐軀之廣東增城縣民陳奇昌女
陳氏。○庚戌。

上詣

皇太后宮問安。○諭軍機大臣等。山西太朔等
屬。去年被災。朕特降諭旨。於賑恤之外。加賑
閏三月一個月。續據阿里衮摺奏。太朔兩府
與內地不同。所種春麥。須遲至六月終旬。方
能收穫。除加賑及借給倉糧外。請將太朔二
府所屬。應修城垣八處。以工代賑。一面具題。

聖訓卷一百六十二

三

一面備料興修等語。但朕念此十二州縣。遠
處邊陲。民貧土瘠。今歲雨澤稀少。所種二麥
不廣。惟恃夏田一次收成。不知現在布種齊
全否。或後此得雨。尚可普種否。著傳諭阿里
衮。將彼地情形。據實奏聞。并令伊留心體察。
有應行籌畫辦理之處。隨時具奏。

大清高宗法天隆運至誠先覺體元立極敷文
奮武孝慈神聖純皇帝實錄卷之二百六十二

實錄卷一百六十二

三

大清高宗法天隆運至誠先覺體元立極敷文奮武孝慈神聖純皇帝實錄卷之二百六十三

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十一年丙寅閏三月壬子諭曰欽天監

監正戴進賢病故員缺著監副劉松齡陞補

其所遺監副員缺著欽天監揀選西洋人咨

送吏部帶領引見○又諭福建提督王郡老

成練達專閫多年和輯兵民並著勞績海疆

重地實資料理今因老病乞休情詞懇切朕

勉從所請准其原官致仕著加太子少保銜

賞給全俸以示優眷該部知道○又諭福建

水師提督員缺著臺灣總兵張天駿補授臺

灣總兵員缺著總督馬爾泰於通省總兵內

揀選一員調補所遺總兵員缺著河南南陽

鎮總兵哈攀龍調補南陽總兵員缺著項朝

選補授○諭軍機大臣等前據馬爾泰疏稱

南澳鎮總兵何勉染患頭暈眼花難以辦事

懇請休致朕降旨令其解任調理俟病痊之

日來京請旨不知伊近日曾否病愈著傳諭

馬爾泰等俟何勉病愈之日令其來京○癸

丑諭曰左都御史杭奕祿上年以老病乞休

朕諭令在任調理今伊行走仍屬艱難著以

原官致仕其左都御史員缺著吏部侍郎阿

克敦補授仍兼管翰林院掌院事務○刑部

議覆山東巡撫喀爾吉善奏民人金瑞持刀

戮傷傅爾溥等三命身死應擬斬立決查律

載殺一家非死罪三人者應凌遲處死該撫

依殺三命而非一家擬斬立決與律不符未

便率結俟該撫按律妥擬具題到日再議得

旨向例外省具題刑名案件經部議覆其由

重改輕者該部即行定議請旨完結由輕改

重者。駁令該督撫另行改擬具題。今山東省金瑞戮傷傳爾溥等三命身死一案。該撫將金瑞擬斬立決。部議以律載殺一家非死罪三人者。凌遲處死。駁令按律妥議具題。夫擬斬監候。改擬立決者。雖同一死罪。尚有立決緩決之分。至凌遲之與斬決。均屬立即處死。若經駁詰。則文移往返。耽延時日。兇犯轉得偷生。不即正法。且本犯自知不免。或畏罪自盡。或染病身死。又或勾通禁卒。踈縱脫逃。是欲伸國法。反不得明正典刑矣。金瑞著照部議凌遲處死。餘著照該撫所奏完結。○甲寅上詣

皇太后宮問安。○大計江南省年老官五員。有疾官二員。不謹官五員。罷軟官一員。浮躁官一員。分別處分如例。○乙卯。諭昌平州為去年被旱之區。前據總督那蘇圖奏稱於八溝採買米石內。撥運昌平五千餘石。以備春月借糶之需。今聞該處雨澤稀少。米價漸次增

長所撥米石。恐不敷用。著將京通倉每年例撥五城平糶色米內。酌量分撥該處。以資平糶。其應需若干石。及如何運往。分廠出糶之處。交與該督那蘇圖。一面奏聞辦理。一面咨會倉場侍郎等速行撥給。○旌表守志捐軀之四川渠縣民符賓妻劉氏。○丙辰。諭順天所屬之延慶衛。上年被災雖屬少輕。然彼地只賴秋收一次。百姓此際未免艱難。著照延慶州一體加恩賑濟一個月。該部遵諭速行。○諭軍機大臣等。劉於義所奏。可抄錄寄與那蘇圖閱看。令其酌量。有續賑之所不及者。即行借與口糧。以資餬口。倘再不雨。有誤耕作。應如何接濟之法。著那蘇圖悉心籌畫。豫行奏聞辦理。毋致後時。尋奏接濟之法。米穀最要。宣屬災後米貴。民食艱難。即使今秋豐稔。亦未便採買。如或歉收。已不比上年有儲積之可恃。而急需之際。宣郡山路迴環。輓運亦甚不易。可否撥通倉粟米十萬石。分發

宣屬倉貯缺少之州縣。倘秋收歉薄。則有米接濟。不致臨時急迫。如秋收有望。即補足均貯。亦可暫停官買。使民間米穀寬餘。其通倉動撥米穀。如須補足。則八溝。鞏。匠。屯。一帶。連歲豐收。採買尚易。至輓運等事宜。應行令通永。霸。昌。口。北。三道妥議。如宣屬民間車輛。當此草豆昂貴之時。得藉輓運脚價資生。亦不無補益。再查宣屬芒種前得雨。則秋禾播種齊全。霜前可望收穫。如芒種後得雨。則節候已遲。惟有補種豆。糜。油。麥。蕎。麥。等項。但恐貧民一時不及購種。應每畝借給籽種銀四分。令地方官豫查有地無力之貧民。分別開記戶口畝數。一遇得雨。即分遣佐雜教官。分投下鄉散給。俾得及時補種。如得雨在芒種前。仍應照借給籽種之例辦理。得旨有旨諭部。先事之豫籌既備。則臨事之鎮靜更要。民可使由之。過猶不及。辦理此等災傷。不可不慮及此也。○又諭。山西。大。朔。等屬。上年被災。朕

已特降諭旨。於賑恤之外。加賑一個月。又據阿里衮奏。稱請興修城垣。以工代賑。朕又降旨。令其察看本地情形。有應行籌畫辦理之處。隨時具奏。朕思該地方。因上年被災較輕。於宣化。是以將二府州縣。分別加賑。但彼地與宣府接壤。土瘠民貧。又當歉收之後。今春雨復愆期。著傳諭阿里衮。遴選妥員。速赴被災地方。察看此時實在情形。即行奏聞。其應作何籌畫之處。仍遵前旨辦理。○丁巳。諭朕加惠黎元。將天下錢糧。分年蠲免一次。今歲係直隸輪免之年。宣化府屬各州縣。所有應徵屯糧。例不在蠲免之內。但念宣屬地處邊陲。上年被災較重。今春雨澤又復稀少。現在降旨加賑。與常時不同。著將各該州縣本年額徵屯糧。蠲免三分之一。以紓民力。該部諭令該督那蘇圖。速行辦理。○重修明通鑑綱目書成。議敘提調纂修等官。加級紀錄有差。御製明史綱目序曰。編年之書。奚啻數十百家。

而必以朱子通鑑綱目為準。通鑑綱目蓋祖述春秋之義。雖取裁於司馬氏之書。而明天統正人紀。昭監戒。著幾微。得春秋大居正之意。雖司馬氏有不能窺其藩籬者。其他蓋不必指數矣。嘗謂讀書立言之士。論世為難。非如朱子具格致誠正之功。明治亂興衰之故。其於筆削。鮮有不任予奪之私。失褒貶之公者。自綱目成。而義指正大。條理精密。後儒有所依據。踵而續之。由宋迄元。釐然方策。至明代君臣事蹟。編輯之難。更倍於諸書。蓋明史已成於百年之後。而世變風漓。記載失實。若復遲待。將何以繼續編而示來許。爰命儒臣法朱子通鑑綱目義例。增損編摩。大書以提要。分注以備言。每一卷成。呈覽。朕於幾暇。亦時御丹鉛。為之參定。雖於天人一貫之精微。未之能盡。而惟是謹嚴之義。守而弗失。簡正之旨。志而必勉。書既成。羣臣舉唐太宗之事為言。勉從其請。而為之序云。○以鑲黃旗護

軍叅領什圖。為

孝陵總管。○戊午。

上詣

皇太后宮問安。○幸圓明園。○諭軍機大臣等。前因鳳陽關監督普福誤免銅觔水腳等銀。部議著令賠補。經朕傳諭寬限。令伊於養廉內節省還項。今據普福奏稱。今歲徵收盈餘數目。比較七年以前。更多十數萬兩。通融彌補著賠之項。不需三年。可以清完等語。甚屬乖謬。伊不知感朕寬宥之恩。而尚敢為是謬妄之語。是自取罪也。況查伊管關以來。盈餘並未加多。且有缺額之年。伊不過借免過米豆之稅。以充數而已。即此可見其於關稅。未必全無隱匿。伊若如此設心。必至辦理不妥。重獲罪譴。將來亦斷不能逃朕之洞鑒也。著傳諭嚴行申飭之。○大學士等議。覆直隸總督那蘇圖奏。稱直隸各處糧價。惟麥最貴。奉旨。令豫東二省。各備麥十萬石。運直以備借

糴現值青黃不接之時。豫東採買恐市價不免昂貴。請將該省追還民欠現成麥石運直。先儘麥價最貴之處。派撥借糴。餘俟二麥收後。再行辦理等語。查豫東二省接濟直隸麥石。河南巡撫尚未奏到。山東巡撫喀爾吉善已經奏報豫備。今直隸麥價騰貴。京師麥價亦日漸增長。宜早籌畫。應令該督速將直省應行接濟各州縣需麥若干石。即為酌定。并如何運送之處。咨令豫東二省撥運。此內有餘。即運送京師。如僅敷撥濟直隸。并令豫東二省另備數萬石運京。以備平糴。得旨。依議速行。○已未。

上詣黑龍潭祈雨。○諭軍機大臣等。福建沿海一帶。福興。漳泉。福寧。五府。皆逼近海洋。港澳繁多。在在可通海泊。不獨廈門。閩安。二口。為船隻出入門戶也。朕聞各該處一應查緝禁約之方。奉行日久。未免廢弛。保無有偷漏禁物。及偷渡過水等弊。著傳諭總督馬爾泰。巡

撫周學健。轉飭文武汛防。加意稽查。毋得疎縱。亦不得借端需索。致滋擾累。○授恭勤貝勒允祜之長女為郡君。壻馬實為多羅額駙。

庚申。

上幸瀛臺。○詣

皇太后宮問安。○還宮。諭曰。上年宣化府所屬地方。被旱歉收。今夏雨澤又復稀少。朕去歲巡狩經過。知彼處為邊區保障。不可不豫籌接濟。雖現存米豆尚足敷用。恐將來或有急需。一時難以猝辦。著將通倉粟米撥運十萬石。分發所屬州縣。以備撥給。倘今歲秋成豐稔。即將此項為補實倉儲之計。其如何陸續輓運之法。著倉場侍郎會同該督妥議辦理。○諭軍機大臣等。直隸總督那蘇圖奏請撥運通倉粟米十萬石。以備宣屬倉儲。豫籌接濟。朕已降旨允行。但此項米糧原為豫備秋成以後之用。可以從容辦理。務須慎選幹員。酌量陸續輓運。不可如上年辦理未善。以

致車輛短少。價值昂貴。於商民又有未便。爾等可傳諭知之。○辛酉。諭據杭州織造蘇赫訥奏稱。母年已逾八十。請回京侍養。情詞懇切。蘇赫訥著來京供職。杭州織造員缺。著內務府郎中申祺補授。兼管南北新關稅務。○諭軍機大臣等。戶部議覆江蘇採買米石一案。以定例每米一石。腳價在一兩以內。每穀一石。腳價在五錢以內。方准開銷。該撫請每米一石。以一兩二錢。每穀一石。以六錢報銷。水腳一項。另行覈銷之處。仍照例駁追。但念此案在乾隆七年以前。往返駁詰。已非一次。為時既久。地方官屢經更換。難以責令追賠。陳大受與安寧身在地方。悉心籌酌。所奏自屬實情。朕意所請。每石以一兩二錢報銷之處。尚屬可行。但價值既增。所有運費。自應即在一兩二錢之內。不必另請覈銷。如此則採辦各官。既不至於苦累。而歷年舊案。又得藉以速結。爾等可傳諭陳大受。令其遵照此意。

再行具摺奏請。候朕降旨施行。○予故太傅大學士伯鄂爾泰。入祀廣西省賢良祠。○壬戌。戶部議覆署廣西巡撫託庸奏稱。粵西開爐以來。銅觔每不能接濟。臣前請三分抽課。七分聽商自賣。仍於商本不敷。今試辦八月。不能有濟。懇將商辦銅觔。仍照加二收課。餘每百觔。給價銀十六兩二錢收買等語。查粵西開採銅觔。前據該署撫奏請三分抽課。餘銅聽商自賣。原冀銅觔充裕。今既無裨益。應如所奏。仍照例加二抽課。餘銅官買供鑄。至收買餘銅。從前每百觔。只給價銀六兩八錢。原任布政使唐綏祖奏請加價。臣部議將軍山响水等廠。每百觔給銀八兩三錢。回頭山廠。每百觔給銀九兩二錢。已屬加增。今遽請加至十六兩二錢。與前定價懸殊。應令該署撫另行確核妥議。具題到日。再議得旨。依議。此案從前託庸奏稱。唐綏祖收買客銅。及地腳渣銅之請。不過借此名色。多獲價銀起見。

並非果有其事。其收買銅觔。增價十三兩有零之處。應行停止。請將二八抽課之例。量加一成。作為三七抽課。餘銅聽商自賣。商民自必爭先認採。課銅日增。可得源源鼓鑄等語。朕交大學士等。面詢楊錫紱。據稱將來銅廠果旺。每年出銅七八十萬。或二百萬觔。方可抽課二三十萬觔。若如數年以來。抽課不及十萬觔。則於官銅轉絀。朕交部一併定議。部議謂照三七抽課。恐不敷鼓鑄之用。應令該署撫妥議具題。嗣據託庸議稱。商人趨利如驚。有利可圖。孰不踴躍從事。請將三七抽課之處。試行一年再定。今則奏稱三分抽課。七分聽商自賣。於商本不敷。已試辦八月。不能自濟。仍應加二抽課。并請加增至十六兩二錢。方敷收買之價等語。此案經朕往返致詢。託庸堅執已見。以為事屬可行。今試行八月。不能有效。仍請照前辦理。不但與唐綏祖所請之意相同。而價值更為增多。此又何說。可

見託庸彼時。不過因叅劾唐綏祖之後。有意將此事更張。以顯唐綏祖之過耳。朕又聞得粵西辦理此事。自託庸奏准以來。各處搜查民間藏銅。定限比役。甚為擾累。而伊奏摺中。並不自知辦理未善。引過任咎。巧於迴護。掩飾前非。著將託庸交部察議具奏。○諭軍機大臣等。託庸辦理銅觔一案。因豫存私意。以致種種不妥。而摺內奏請照舊例辦理。又不引咎自責。巧為迴護。朕已降旨。將伊交部察議。如此辦理不公。多方掩飾。其於國帑。必有濫用之處。著傳諭總督策楞。令其詳加查察。如有不應動支。而擅行糜費者。即據實指叅。令其倍償。○癸亥。諭軍機大臣等。據四川巡撫紀山奏稱。貴州松桃協圍拏黃板寨苗頭。龍見布家一案。銅仁協遣苗百戶四人。往會龍見布。各將已子為質。包伊無事。龍見布隨同四人赴松桃城。銅仁協訊據供稱。前因誤聽人言。不敢進城。隨將龍見布薄責數棍。賞

給花紅酒飯。將前所捉獲男婦二十餘口。給與龍見布領回等語。朕從前因紀山具奏時。業將此事因何而起。現在如何辦理。降旨詢問張廣泗。此時尚未奏到。茲閱紀山奏摺。既稱薄責數棍。又稱賞給花紅酒飯。銅仁協辦理如此。朕思若龍見布果如紀山前奏。用符水迷法。抗玩拒提。則拏獲之後。自當重治其罪。若審係無涉。又不應加以責懲。似此賞罰互相矛盾。是何緣由。今此完結之後。果能使之畏懼法度。不致別生事端否。著傳諭總督張廣泗。令其詳酌情形。勿得姑息養姦。以貽後患。亦不可懲治太嚴。蔓延滋事。總期善為辦理。寧靜地方。黔地與川省接壤。並諭紀山同為留意。尋據貴州總督兼管巡撫事張廣泗覆奏。查松桃雖係夷疆。苗情尚為懦弱。乾隆十年十二月內。該府胡式瑗面稟。坡西黃板寨百戶苗人龍見布。招住匪苗。私藏鎗械。縱子娶占人妻。屢經差拘。逃避山箐。臣諭以

移營會差兵役。設法務獲。旋於本年三月內。據該府等稟稱。該犯因兵役擒捕。自燒房屋逃遁。迨家口被執。畏罪投首。經臣批飭嚴訊在案。但念該犯尚無兇頑貽害地方之處。惟就其應得之罪。按律定擬。不敢上煩聖慮。茲蒙諭旨垂詢。理合據實覆奏。得旨覽奏俱悉。○又諭。朕前加恩寬免米豆稅。原欲使百姓實受其益。嗣因免稅之後。米糧價值並未稍減。經朕降旨各該督撫。令其確查據實奏聞。而各該督撫。不過以並無情弊一語覆奏。朕亦未曾究詰。今覽戶部所奏。該監督等俱將免過米豆稅銀。以抵盈餘之數。而各省過關米糧船隻。日見其多。價值終未平減。可知從前各督撫查奏。必有不盡確實之處。或胥吏作奸。於米船攜帶他貨。混作米豆蠲除。又或偷漏影射。舞弊營私。留心體察。此等積弊。勢所必有。豈有捐國家之正賦。以飽胥吏之私橐者。而該督撫與監督等。皆膜外視之。有是

理乎。著傳諭伊等務須悉心查察核實辦理。如有前項情弊斷無久不敗露之事。經朕訪聞該監督必加以重處而不據實查察之督撫亦決不寬恕也。○甲子直隸總督那蘇圖奏將豫東二省運到麥石二十萬留直一十六萬就現在麥貴州縣均勻分撥四萬石即運至京以備平糶其麥價運費核定成本確數歸還報銷如有借麥還穀者照時價核算抵收歸入倉儲項下成本銀兩存留司庫得旨此議甚妥矣知道了。○是日起

上以孟夏享

太廟齋戒三日。○乙丑戶部議准直隸總督那蘇圖疏報固安縣水衝沙壓地畝應照例除租又昌黎縣衝壓地畝盡成白沙斷難再行開墾租賦無出應概予豁免從之。○工部議准協辦大學士署直隸河道總督劉於義奏勘明張家口衝塌水洞城垣應鑿去石嘴先建石堤築壩以資捍衛從之。○是月直隸總

督那蘇圖奏報各屬得雨及麥苗滋長情形得旨覽奏俱悉即如順天左近雖得雨尚欠霑足已命該部祈禱大凡雨暘為勤民第一要務不可緩視之其有望雨處所一切事宜速為料理慎之。○又奏前查辦官莊地畝被災遺漏靜海南皮香河獲鹿容城等五縣荷蒙恩宥不加譴責今已查明歉收分數咨部核辦得旨以後凡事留心屢邀朕宥於汝何顏但直隸總督實倍難於各省朕亦知之而

卿則不可不自勉也。○又奏覆宣屬地方向無麥秋惟期早種大田可望霜前收穫貧民常年生計傭工外全在刨採煤炭柴薪家畜一驢堪任馱載即可免饑寒邊民老幼皆習勤苦不盡恃農田農田所產高粱為多豐年用以燒酒化賤為貴歉歲奉禁即可充食是以目下糧價多昂而西寧龍門赤城等處高粱時價每石自五錢一分至五錢五分即甚貴之區亦至九錢而止貧民買食尚易今即

再加賑一月。計至秋後仍遠。與其聚而賑之。惠難續繼。不若令散而力作。可以自營。現在宣府創沙挖河等事。原屬以工代賑。此外惟出借口糧籽種。以資貧農耕作。出糶倉穀。以平市價。一經停賑。即應接續舉行。業已分檄各屬。豫籌借糶事宜。除本處倉穀足用之區。其食穀兼有兵米支銷。而糧價又復昂貴。如宣化。萬全。二縣。已將懷來存貯通州漕米撥用。節據各該州縣詳出借口糧籽種。俱已酌辦。其減價平糶。有於常例外。應大加核減。如蔚州蔚縣懷來。張家口等處。業經奏明飭辦。仍通查上年被災各處。如應大加減糶者。遵例奏辦。至向後糧價。諒屬有增無減。惟平糶可以常行。不論米豆雜糧。分廠零星糶賣。窮民即可恃無恐。容查明各屬。如倉穀不敷多糶。所有存剩通倉運到米二萬餘石。並由八溝撥貯昌平。密雲之粟米一萬五千一百餘石內。均可撥用。其通倉米五萬石。已於二月

十三日運竣。至慶雲縣於三月停賑後。貧民不免拮据。已飭該縣查明被災村莊。酌借兩月口糧。歛收村莊。酌借四十日。再慶邑土脈磽鹵。冬春雨雪稀少。麥田無多。今擇地氣窪濕。及開有土井之處。督令趕種大麥。按畝借倉粟米四升。使易大麥籽種。加以現議開河掘井等項。定於閏三月內興工。無地貧民。皆可赴工傭趁。復蒙恩發帑買牛種樹。雖經停賑。亦可無慮。再查慶邑現在糧價。粟米每石一兩一錢有零。高粱每石六錢八分。並未昂貴。現備減糶米石。飭該縣存俟應糶時。從緩查辦。得旨。已有旨了。此事所辦遲疑。非勤恤民瘼之意也。○江蘇巡撫陳大受奏。阜寧縣麥苗受凍。難望有收。現將存倉米穀減價平糶。陸續接濟。其餘各邑收成豐歉。查明後再行奏聞。得旨。此奏已遲矣。濟民之事。豈可待時乎。阜邑已有旨加賑一月。其餘速行查奏。有應酌加撫卹者。一面辦理。一面奏聞。○調

任漕運總督顧琮奏。淮安城守營叅將永柱奉部推調陝西叅將。臣因該員諳習漕務。題請留任。經部議駁。查淮安為五方雜處。糧艘往返。稽查匪易。永柱歷任有年。熟悉風土。請將該員仍留原任。於漕務實有裨益。得旨。若應照汝所請者。於部議不准時。即降旨照汝所請矣。而反覆執意必行。小而言之。可謂下愚不移。大而言之。則犯無將之誅矣。以此識見。安望其能勝總河。實因一時無人。汝莫得意。塞翁之馬。正不知為福為禍耳。戒之慎之。

○湖南巡撫楊錫紱奏。善化縣員缺緊要。查有署湘陰縣知縣徐梁棟。可以調補。但該員現有承緝盜案未獲。不但與例不符。且似規避處分。因據實奏明。可否准其調補。恭候欽定。得旨。湘陰亦屬要缺。何必調補為哉。且闔省屬員中。豈無一堪勝善化者。汝以為彼規避處分。朕將謂汝代彼規避矣。○又奏。原任孝感縣知縣曹鑒。係臣進士同年。前在福建。

屢任劇邑。皆著賢聲。後任孝感。民懷吏畏。實為才守兼優之員。現在丁憂。已屆服滿。請發湖南。俾臣酌量題補。得旨。此風不可開。山東巡撫喀爾吉善奏。現聞京師農田待澤甚殷。上煩聖心憂惕。但時值春暮。一得甘霖。猶可播種。將來或收成稍歉。隣省尚可接濟。伏願聖懷寬釋。以迓休徵。得旨。屢年以來。朕為各省雨暘。亦亟憊精勞神矣。至於直隸。春旱十年而九。亦知北方春雨甚艱。常以自解。而對此風霾日作。良苗未生。實切憂懷。不能自已。非忽遠而詳近也。將以慰朕。朕懷何日得慰耶。山西巡撫阿里衮奏。大朔兩府。今春雨澤愆期。二麥不甚發生。秋禾亦未播種。現飭地方官借給口糧。並修理城垣。以工代賑。如終乏甘霖。有應行接濟事宜。一面辦理。一面奏聞。得旨是。勤求民瘼。乃為政第一要務。汝日侍左右之人。當深悉朕意也。京師向甚望雨。今則四野霑足。朕憂大釋。獨尚為汝省。

屢念耳。○陝西巡撫陳宏謀奏。據布政使慧中奏稱。各關抽稅。俱有定則刊示。獨陝省同州府屬大慶關。向來收稅。另有照部則減少者。亦有照部則浮多者。迨至秦銷。始將一年所收之銀。按照部則造報。現雖查無以多報少情弊。但則例既不畫一。奏冊尤非實在。考核竟成虛設。請嗣後大慶關商稅。務遵部頒則例徵收等語。應如該布政使所奏辦理。并將部則勒石收稅之所。得旨。如所議行。○大學士公仍管川陝總督慶復奏。報攻克兆烏石。甲納溝等寨情形。得旨。尚無全勝之音。不過稍振兵威耳。安得易視耶。○又奏。節奉硃批。訓飭現嚴飭提鎮將弁。奮勇爭先。勉贖前愆。得旨。既已失之於前。不可文飾於後。此一事。我君臣皆不得辭。未曾妥酌。而率爾興戎之咎。若能如初願。犁庭掃穴。迅速成功。固佳。若竟不能成功。亦惟有籌一旋轉之機可耳。豈有為此一隅。而虛糜數百萬帑之理乎。○

兩廣總督策楞奏。右江鎮總兵。駐劄百色。向因該處水土惡劣。三年俸滿。即調回內地。現任總兵畢映。閱俸已滿三年。例應徹回。查該處此時正值草深霧毒之際。若令俟部覆到日再行離任。尚須數月。恐有不測之虞。今先委員署事。令畢映交代清楚。即回省候旨。得旨。所奏俱悉。又批。果如此利害。則此三年之間。畢映何以當之。更聞此等瘴甚之地。地方官率不在彼。每值瘴發之時。或至省。或托故他出。果如是乎。且土著之人。又當何如。再既為此等惡劣水土之地。想亦非甚衝要處矣。當時何必建此重鎮而設州縣乎。朕不過欲悉其實在情形。可緩行查明具奏。○又議覆廣西提督豆斌奏。稱通省烏鎗。輕重大小不一。請照陝省纏絲鎗式。一律改造。并請借動藩庫銀兩。分作五年。在各營公費內扣還等語。查粵西烏鎗舊式參差。難收實用。應如該提督所奏。一律改造。但廣西地丁錢糧。現輪

應蠲免。藩庫存項。難以借動。惟西省額兵百
名。祇扣二名。作為公費。請自乾隆丁卯年為
始。另扣一名。每年通計。可得餉銀四千八百
兩。作為修造鳥鎗之費。統限兩年修竣。即各
補足額。得旨。扣糧之說。不必開此例。若火器
必應改造。俟過蠲免之年。為借動之舉。可耳。

○雲南總督兼管巡撫事張允隨奏。普洱鎮
總兵崔善元。前因疎縱逆犯刀愠。刀先奉旨
革職留任。勒限緝拏。今崔善元已將該二犯

實錄卷一百六十三

三十五

拏獲。現在解省審辦。得旨。若非朕嚴督爾等
擒拏。何能即獲。然崔善元。豈能免向日疎縱
之罪耶。○又奏。普洱鎮總兵崔善元。因未能
將逆犯刀愠。刀先。即行拏獲。嗣奉諭旨。令崔
善元解任來京。查該鎮年逾七旬。久歷戎行。
現已將逆犯全行拏獲。可否准其休致。候旨
遵行。得旨。此奏市恩。朕所不取。一之為甚。不
可再也。崔善元。仍遵前旨行。○又奏。滇省昆
明。晉寧。等州縣。豆麥被雪。現飭地方官動撥

倉穀。減價平糶。並出借社倉穀。以濟民食。得
旨。平糶出借。酌行撫恤而已。不尚有失所者
乎。若有成災景象。究以賑恤為要。滇南萬里。
不可少稽恩澤。使朕懸念也。

實錄卷一百六十三

三十六

大清高宗法天隆運至誠先覺體元立極敷文
奮武孝慈神聖純皇帝實錄卷之二百六十三

大清高宗法天隆運至誠先覺體元立極敷文奮武孝慈神聖純皇帝實錄卷之二百六十四

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次 臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部主事事務

世襲騎都尉軍功加十九級隨帶加二級又加二級 臣董誥內大臣戶部尚書鑲黃旗滿洲都統軍功紀錄五次

尋常紀錄十四次 臣德瑛經筵講官太子少保工部尚書紀錄六次 臣曹振鏞等奉

敕修

乾隆十一年丙寅夏四月丙寅朔享

實錄卷二百六十四

太廟。

上親詣行禮。○詣

皇太后宮問安。○丁卯諭軍機大臣等。據巡撫

陳大受奏稱。江南阜寧縣水涸之後。陸續種

麥。今春凍傷。不能暢發等語。朕從前因阜寧

地方。隣近海濱。上年被災較重。已於閏三月

初四日。降旨加賑一箇月。想陳大受具奏之

日。尚未接到此旨。著傳諭陳大受。於加賑之

外。或借給籽種。趕種秋禾。或減價平糶。以資

民食。令其悉心體察。善為辦理。其餘被災州

縣。現在情形若何。有應須接濟之處。一體照

此撫恤。速行奏聞。尋奉阜寧被災較重。已遵

旨加賑一月。足資接濟。至已種二麥。凍損之

低田。及未種續涸地畝。無力乏種者。約計四

千四百餘頃。均經借給籽種。趕種秋禾。又縣

境放生橫溝二河。正在興工挑濬。飭令多雇

本邑民夫。以工代賑。其存倉米穀。不拘常例

減價出糶。並於隣邑協撥穀石濟糶。又徐州

實錄卷二百六十四

府屬銅山。豐縣。睢寧。雨雹間損二麥。貧戶借

給籽種。其餘上年被災州縣。並無應照阜邑

辦理之處。得旨覽奏。稍慰朕懷。○大學士等

遵旨議奏。各學教習期滿。即予議敘。較伊等

原班。選用已速。若再予即用。則比各項議敘

人員。選用更速。實為過優。查各學教習。並無

議敘即用者。惟咸安宮景山。向有即用之例。

應請嗣後。除奉特旨即用外。其以知縣用之

教習。交吏部歸伊本學議敘班次選用。至咸

安宮。景山教習選用班次。請一併交吏部酌定辦理。得旨是。尋議咸安宮。景山教習選用班次。除進士教習期滿奉旨以主事用者。仍照舊例辦理。其進士舉人教習期滿。以知縣用者。應照各學舉人教習之例。歸雙月各按本班。於兩班後選用一人。以教職用者。亦照各學舉人教職班次。四選一升後。選用一人。並請各按本班。以從前所積之缺。一併計算選用。從之。○旌表守正被戕之四川射洪縣

民張吉安女張氏。○戊辰。

上御乾清門聽政。○兵部議准。山西巡撫阿里衮疏稱。右衛駐防旗營內。正紅。鑲紅。鑲藍。三旗官署兵房。在兔毛河之東。三旗並列。貼近河身。實為危險。應請將正紅。鑲紅。鑲藍。三旗官署兵房。移建於鑲紅。鑲藍。兩旗空地之內。其正藍旗圍牆外。應築土壩。正黃旗圍牆外。應築石隄。從之。○工部議准。協辦大學士吏部尚書兼管直隸河道總督高斌疏稱。通州

張家灣二處。於水利案內。新建板壩要工。必須專員經營。查通州州同一員。州判一員。每歲糧船抵通時。照看過壩。此外並無事務。請將通州新建板壩。及隄岨排椿各工。責令州同管理。仍駐通州。張家灣新建板壩。及隄岨排椿各工。責令州判管理。分駐張家灣。歸務關同知統轄。於務關楊村。兩廳河兵內。各抽撥二十名。分發州同。州判管轄。一切修防事宜。均令該員督率河兵辦理。其土壩。石壩。二處催趲糧運。土壩仍委州同管理。石壩仍委州判管理。俸廉役食等項。槩仍其舊。但二缺向由部選。今管河務。非諳練之員。不能勝任。請改為兼河之缺。於河員內照例揀補。并請換給通州分管土壩兼河務州同。通州分管石壩兼河務州判關防。從之。○己巳。以太僕寺卿介福為內閣學士。兼禮部侍郎。○庚午。

上詣

皇太后宮問安。○戶部等部議覆。大學士川陝

總督公慶復等奏稱。川省三齊等三十六寨番民。歸隸茂州管轄。籌酌管束事宜。一。查明番地四至。立碑定界。俾民番各安疆土。一。三十六寨。每寨擇老成謹慎者。設正副頭人各一名。將所管戶口。造冊送州稽查。其戶婚錢債細事。令頭人秉公排解。不服。赴州控斷。并將頭人功過。立簿查覈。年底分別賞罰。一。番民每歲納麥糧六十石。編入賦役全書。責令各頭人督催完納。就近免支威茂協營兵米。

一。番寨山頭地角。曠土儘多。飭地方官令各頭人。按戶分段給墾。免其升科。一。番民既入版圖。即與編氓無異。應於該寨適中之地。設立講約所。該州暨儒學等官。朔望輪往。傳集番民宣講。

聖諭廣訓。及整飭地方利弊文告。并於律例中。擇其易犯之條。繙譯講解。曉諭化導。其子弟秀異可讀書者。送州義學肄業。果能漸通文理。照土司苗徭子弟應試之例。准其考試。

新附生番。未便驟繩以法。或犯命盜等事。暫照夷例歸結。十年後照內地一體辦理。均應如所奏行。從之。○授多羅淳郡王第三女縣君之壻寶林。為固山額駙。○旌表守正捐軀之江蘇邳州民趙起志妻顧氏。○辛未。諭據山東巡撫喀爾吉善奏稱。按察使王芥園於上年冬月抱病。迄今醫治未痊。懇請解任。回籍就醫調攝。免致有誤公事等語。王芥園著准其回籍調理。俟病痊之日來京。該部奏聞請旨。其山東按察使員缺。著唐綏祖補授。諭旨到日。即速赴任。不必來京請訓。唐綏祖未到任之先。著照該撫所請。令趙晃暫行署理。○諭軍機大臣等。據準泰奏稱。廣東潮州府屬之饒平縣。與福建漳州府屬之詔安縣。壤地毗連。二月十二三日。有詔邑婦女幼孩人等。經過饒邑黃岡地方者甚多。訪因該處百姓。先聞福建將軍擬於二月內。自興化泉州漳州。抵漳浦龜鎮下船。由銅山。南澳。黃岡。回

閩。又稱福建巡撫委漳州府知府到詔安查點保甲。又汀漳道及漳州府通判亦奉委查地方營汛礮臺等項。有詔安縣屬白葉等鄉并附近縣城百姓紛紛搬走。漳浦百姓亦紛紛搬逃等語。臣隨即批令文武官弁稽察防範。不得驚張滋事。旋又據稟稱詔安縣民因從前有賴石之事。漳浦縣有陳作之事。今見官員到境。恐為舊案欲行抄殺。故致驚疑逃走。今已寧帖。將軍到詔。即由漳浦之雲霄一帶查察稅務旋省。亦未至南澳黃岡等語。朕覽準泰所奏。福建官員查點保甲及營汛礮臺。將軍查察稅務。俱係地方常有之事。何至民間指稱舊案。驚惶逃走。此皆民風不淳。民心不靜。積習蠹凌之明驗也。此案現據準泰奏稱。民情已經寧帖。而馬爾泰周學健並未奏聞。可傳旨詢問之。並諭伊等身為封疆大臣。教養斯民。是其專責。當時時留心。善為經理。務思化導安輯之法。使之移風易俗。革薄

從忠。共為良民。毋蹈法網。此凡為督撫者之所當加意。而在閩省乖謫之區。尤為切要之務。何得忽視之。尋據馬爾泰奏漳浦詔安毗連粵省。人情素為澆悍。頃奉廷寄。始知準泰奏有漳浦詔安民人驚竄入粵一事。除一面密行嚴詢該管鎮道。有無漳詔二邑百姓搬逃之事。并令詳加察覈。若果有指稱舊案。因而惶怖逃竄。文武官員匿不具報。當一併據實劾奏。如或別有他故。亦當廉得實情具奏得旨。毋隱毋飾。據實詳查。速行辦理。又據周學健奏漳浦詔安民人驚竄入粵一事。據準泰原奏二月二十三兩日。詔邑婦女幼孩經過黃岡者甚多。其地其時確鑿可據。臣當即密飭該道府據實查覆。僉稱實無其事。且將軍新柱於本年二三月間。在漳泉一帶巡查稅口。亦毫無聞見。現在嚴諭道府各官實力安輯地方。毋得紛擾。仍留心察訪。據實奏報。得旨覽奏俱悉。○軍機大臣等議覆。四川

巡撫紀山疏稱。駐藏糧務同知。并撫標在藏隨糧兵丁。應同駐藏大臣。一齊更換。但現在糧務同知于學謙及撫標在藏隨糧兵丁。限滿之年。與各官兵更替日期。不能恰合。請畧為變通。令其於滿限後。仍在藏多駐歲時。俟換班到日。一齊撤回。所支藏餉。計三年。并豫儲銀通計二十萬兩。途長難解。亦應俟換班之年。照例請撥。即交糧務同知隨駐藏大臣。及綠旗官兵等同行。以免零星單運。再西藏辦理糧務。原議於同知內揀選派往。今查川省同知十員中。除地方緊要者。共有六缺。不便差派。其餘四員。不敷委用。請將通判十員。一體揀派。均應如所請辦理。從之。○士申上詣

皇太后宮問安。○諭軍機大臣等。浙江拏獲採生折割等犯。窮兇極惡。其慘毒之處。為人所不忍聽聞。自應從重治罪。以快人心。以斷後患。乃常安審擬過於寬縱。不足蔽其辜。部駁

甚是。已於本內批發。可傳諭常安。令其悉心研究。另行定擬。以成信讞。尋據常安奏。採生折割一案。除將未題各犯。悉心研鞫。其正犯俟奉到部駁情節。嚴究辦理。得旨。此案汝特過疎縱。不經心矣。若再如此。朕不汝貸。至辦理此案。豈可似尋常命盜案。任意遲延。當行審擬具題正法。以快人心。看汝全不似從前勤敏之心矣。戒之。汝非不知朕者。○工部議准。山西巡撫阿里衮疏稱。大同朔平二府所屬州縣。乾隆十年。夏雨愆期。秋禾復被偏災。業經題請賑卹。并將新舊錢糧。分別蠲緩帶徵。復於閏三月。加賑一月。小民已承厚澤。惟是地近塞垣。砂土瘠薄。氣候較遲。麥收須俟六七月。秋獲則在八九月。值災歉後。謀食艱難。該州縣地處邊疆。城垣自宜修整。若以工代賑。地方民生。均有裨益。查應州大同山陰靈邱陽高天鎮朔州馬邑等八州縣城垣。均應修葺。飭令各州縣。務於四月初旬。同時興

舉該道府稽查催備完竣。庶災地窮黎餬口有資。邊方城郭乘時修葺鞏固。得旨依議速行。○甘肅莊浪土司指揮僉事魯甸邦故。以其子魯萬策襲職。四川八烏籠土百戶羅藏丙朱故。無子。以其姪羅藏七立襲職。廣西永定長官司韋廷璧病廢。以其子韋日隆襲職。貴州小平伐長官司宋光遠故。以其子宋德彰襲職。○癸酉。

上詣

皇太后宮問安。○皇七子永琮生。○欽差協辦大學士吏部尚書高斌等議奏。上下兩江衆水滙聚。地勢低窪。每遇伏秋汎漲。一時宣洩不及。頻年時有水患。經督臣尹繼善等將江南被水地方。一切河道隄堰。應行修築事宜。查明奏請挑濬各河。興修隄堰開壩等工。部議擇最急者。先行估修。餘分別緩急。次第辦理。并以臣高斌曾任南河。現奉差江南。奏交臣再行酌覈。臣接到部咨。即親赴各處查勘

源流。相度形勢。同督臣尹繼善。河臣顧琮。逐加覈議。如原奏毛城鋪迤下之洪溝河一帶。於離河稍遠處。堅築子堰。并修補舊有隄堰。酌建涵洞。濉河自灰谷堆至霸王城。兩岸築堰。今細按形勢。應自灰谷堆迤上之符離橋起。一律接築。并疏通湖窪溝渠各口。分建涵洞斗門。相機啟閉。天然開河。挑濬河身。改順河尾。并於大山頭築壩。不使東注。疏通彭家溝。以洩積水。其邳州沂河兩岸。加培子堰。以資捍衛。海州前後沭河兩岸。接築子堰。酌建涵洞。以資啟閉。阜寧之放生河橫溝河。清河之史家蕩民便河。安東之尤家蕩桃源之劉老澗河。學城積水河。挑通築堰建洞。以免泛溢。以上均應列為急工。照部議一面辦理。一面奏聞。至濉河自濉溪口至灰谷堆以上。挑切灘嘴。查該處崖高河低。並未通身阻塞。且河形彎曲。非挑切所能直順。無庸議舉。但河身間段淤淺之處。應酌量挑濬。方能暢流無

阻並應入急工。其五湖以下之峯山閘河挑直河身。培築子堰。謝家溝挑挖寬深。分洩灘水入汴。與淮河南北兩岸黃壘橋等處。疏河建洞。以及潁州之淝河。宋湯河蒙城之黃河。北淝河。挑淺築埂。建設橋座。汴陽以下之南北六塘河。接築子堰。酌建涵洞。港河挑濬河身。築堰建閘。通青伊湖之高墟口。王家溝通舊徽河之王官口下坊口。并鹽城之九曲河山陽之吉家橋河。一律挑濬。酌建橋洞。以上均應列為緩工。俟急工辦竣。今冬水涸。再加確估辦理。又沭陽之滂溝蕩湯家溝。酌量疏濬。并濫泥洪上下增築子堰。酌建涵洞橋座等工。多係村莊小水。不甚緊要。今應列為次緩。俟緩工辦竣。再加詳審奏辦。其餘如海州之舊徽河。已於水利案內。挑濬寬通。即三洞閘座欲改建於洪門口。亦為捍禦海潮起見。但閘門建於河尾。有碍宣洩。此二段工。應毋庸議。得旨。大學士會同該部議奏。尋議應如

所請。行令該督等陸續確估題報。次第興修。得旨。依議速行。○又議奏。江蘇省海沭贛三州縣。地處海濱。最為窪下。每至伏秋水發。山東沭沂諸水。奔騰直注。宣洩不及。易於淹漫。此撫臣陳大受。所以有分疏之請也。查沭河發源於山東馬耳等山。由馬陵山折入沭陽。會歸連河入海。中間雖有佃頭嶺地勢稍平。查即馬陵山腰斷處。山根石腳。難以開通。且分入贛榆之沙河。河小水大。亦難容納。實可毋庸開濬。至沂水由駱馬湖洩入六塘河。至錢家集。分南北二股。俱由運鹽河入海。查鹽河係鹽柴並運。將入海之武障義澤六里等河。煞壩蓄水。以致不能暢洩。今酌議於武障義澤六里三河。添建滾水石壩。誠屬蓄洩兩便。原議高於河底五尺。係壩下尺寸。恐鹽河淺深不一。應以上下河身。一律俱有五尺之水。酌定準則。建立壩脊。又贛榆之三公河。係分承縣境小沙河之水。由北入海。近因淤塞。

自應挑濬深通。又園子河在贛榆之東南。經仙邱鎮。范家口入海。上段多有淤淺之處。亦應開挑深廣。又大沙河發源蒼山。經黃家圍。大沙河鎮入海。迤下一帶岸低。水泛難免淹浸。應於南岸添築子堰。以上均應行修築之工。惟是水利案內。工程既多。未便同時並舉。應將武障義澤六里等滾壩。並挑挖三公河。先為興工。其園子大沙二河工程。俟壩工竣續辦。得旨。大學士會同該部議奏。尋議應如所請。行令該督撫分別先後。確估題報興修。得旨。依議速行。○是日起。

上以常雩。祀

天於

園丘。齋戒三日。○甲戌。諭軍機大臣等。據總督策楞查奏。寧明州知州蔣曰棠。裁賊燬煉土。知州閉有光。賄和教供一案。不必發往東省審理。託庸前已降旨交部察議。現在部議革職。尚未具題。俟新撫臣到任後。聽其審理。爾

等可傳諭策楞知之。○乙亥。

上詣

南郊齋宮齋宿。○準噶爾部人博克等來降。賞給安插如例。○丙子。常雩祀

天於

園丘

上親詣行禮。○丁丑。諭曰。兩淮鹽政吉慶。請將寧國等九縣。壅積食鹽。派撥淮南綱商。於江廣口岸。分年報運融銷。戶部照例議以不准。從前淮北山清等八州縣。食鹽壅滯。經該鹽政奏請通融酌銷。曾降旨暫准行銷。今淮南寧國等縣。壅積食鹽。通融行銷。事同一例。著准其所請。交與該鹽政。遵照淮北之旨。一體辦理。○又諭曰。白鍾山身任總河。乃怠玩河工。匿災不報。深負朕簡用之恩。已經降旨革職。但伊係河員出身。於工程尚為諳練。著發往江南。交與尹繼善。顧琮於現議修工程內。擇要緊之處。派伊管理監修。不令出貲。亦不

必給與養廉。如伊實心効力。俟四五年後。酌量以同知題補。○諭軍機大臣等。白鍾山現已降旨革職。朕念其平日熟悉河工。特發往江南。交與尹繼善等。派工効力。以贖前愆。爾等可傳諭尹繼善。伊向與白鍾山交好。朕所知悉。此番若仍有護庇之意。徇情寬待。令其優游河干。以待年限。朕必有所聞。彼時惟向尹繼善是問。○又諭軍機處。乃係機要重地。凡事俱應慎密。不容宣洩。今乃有在京直隸江南浙江等處提塘。串通軍機處寫字之人。將不發抄之事件。抄寄該省督撫者。朕看此情節。在提塘等微末之人。不過以此博督撫之歡心。在督撫亦樂其不時私遞。得聞京師信息。此皆淺陋之見。且非始於今日。朕已將督撫等從寬免其查究。但那蘇圖。尹繼善。陳大受。魏定國。常安等。俱為封疆大臣。似此行私報密等事。甚不光明。若有見聞。即當據實查辦。何得身蹈其事。不能自檢。尚得謂之正

已率屬乎。著密行傳諭申飭之。○命翰林院侍講學士周長發。侍講蔡新。以原銜充日講起居注官。○戊寅。兵部議奏。官員廢弛營伍。定例革職。但在任久暫不同。如任事日久。不實力操練。以致廢弛者。自應議革。倘到任未及一年。營伍久已廢弛。雖盡心訓練。一時驟難見功。若與在任已久之員。一併議革。似未平允。請嗣後武職官員。經該督撫以廢弛營伍題叅者。令於本內將該員任事久暫。及該處營伍向來情形。據實聲明。如到任已滿一年者。照舊例革職。半年以上者。革職留任。三月以上者。降四級留任。令其加意整頓。以觀後效。三月以下者。暫免議處。從之。○調雲南臨元鎮總兵官鄭文煥。為開化鎮總兵官。○墨爾根城副都統阿爾賽故。賜祭葬如例。己卯。

上詣

皇太后宮問安。○軍機大臣等議覆直隸總督

那蘇圖奏稱熱河喀喇河屯。化育溝等處駐
劉新舊滿兵官房。節年坍塌。共二千七百二
十一間。亟需修理。應如所請。備辦工料。於明
春興工。即令熱河總管就近料理。悉心妥辦。
從之。○吏部議奏。署廣西巡撫託庸。於鼓鑄
銅觔一事。從前奏請三七抽課。屢經奉旨詢
問。以為事屬可行。及至試行八月。不能有效。
復請照前辦理。而價值更為增多。始則有意
更張。繼又迴護已短。巧為掩飾。全無大臣之

平定本三六四

一

體。殊屬溺職。應照例革職。得旨。託庸著革職。
廣西巡撫員缺。著布政使鄂昌署理。布政使
員缺。著按察使李錫泰署理。按察使員缺。著
湖南驛鹽道鍾昭署理。○戶部議覆。四川巡
撫紀山疏請。資州并資陽縣梓被水災。計淹
浸倉穀三千八百七十餘石。俱霉爛無用。請
照例豁免。其水浸色變穀共二萬五千四百
四十餘石。請減價糶賣。除將糶價銀兩。買穀
貯倉。抵補原額外。其不敷穀石。亦請一併豁

免。均應如所請。從之。○旌表守正捐軀之河
南陝州民李添。命妻王氏。○庚辰

上御太和殿視朝。文武陞轉各官謝恩。○諭軍
機大臣等。湖南驛鹽道鍾昭。已命署廣西按
察使。但從前有永州府革職知府曹琛。揭部
文內。有寧遠縣民周希玉。毆死盧仲義身死
一案。該府審係冒風身死。擬流。署臬司以初
報額顛偏左傷深三分。若引傷風。必干部駁。
將傷風身死情由刪去。批示該府。來歲秋審。

平定本三六四

一

自必寬減。司中如此辦理甚多。不必過慮等
語。此係鍾昭所批。自必有向伊詢問之處。爾
等可傳諭楊錫紱。愛必達。伊等詢問後。再令
鍾昭赴廣西新任。○兵部議准。湖廣總督鄂
彌達疏稱。提鎮統轄地方。必須營制聯屬。氣
勢相通。方於控馭應援有裨。湖南永順一協。
舊屬提標管轄。嗣於乾隆六年。署督臣那蘇
圖。以鎮筵鎮東南之乾州。與永順協東南之
土蠻坡相接。將永順一協。奏准改隸鎮筵鎮。

管轄。查永順至鎮筵陸路五百餘里。崇山峻嶺。天晴尚行六七日。陰雨溪漲。則難計日。若由永順至常德。止三百里。其水路至常至筵均五百里有奇。赴筵。從辰州逆流而上。總須八九日。赴常。從辰州順流而下。不過四五日。至於中文考缺等事。由鎮而提。或二十餘日。或一月有餘。若徑至常。不過數日。應請照舊制。永順協。仍屬常德提標管轄。至辰州一協。又在永順之下游。至常水陸俱止三百餘里。鎮轄尤多不便。應請一併改隸提轄。從之。

清錄卷二百六十四

三

一

大清高宗法天隆運至誠先覺體元立極敷文奮武孝慈神聖純皇帝實錄卷之二百六十四

清錄卷二百六十四

三

大清高宗法天隆運至誠先覺體元立極敷文奮武孝慈神聖純皇帝實錄卷之二百六十五

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十一年丙寅四月辛巳

上奉

皇太后居暢春園○

上幸圓明園○諭曰○

泰陵總管內務府大臣覺和托年老有疾奏請

解任覺和托著原品休致總管內務府大臣

事務著佛倫署理○又諭曰進愛人本糊塗

氣量亦小並不通曉天文任意妄言惑人聽

聞以致革職似此不安靜謬妄之人豈可留

其在京著發往莊浪披甲効力行走○大學

士等議准欽差協辦大學士吏部尚書高斌

等奏查勘海防廳五墩等處所築越隄俱較

大隄低一二尺不等應照式加高與內隄相

平又宿虹廳屬蔡家樓臨河縷隄自郭家灣

起至彭家堡止二百二十五丈隄根外灘積

水隄身卑矮窪腰與上下隄工不能一律從

前未經估入應加築與上下隄工一律高寬

得旨依議速行○兵部議准閩浙總督馬爾

泰疏稱閩省陸路副叅遊都守各員應題調

者八十三缺部推者二十五缺通計部推之

缺不及十分之三是以本省之人多陞本省

之缺應將題補各缺實係沿海要地勢難酌

改者仍留題補外其稍近腹內之缺除督撫

提鎮中軍并外協標營營務較繁未便酌改

者亦仍留題補至督標左右二營叅將守備

撫標右營遊擊守備陸路提標後營遊擊守

備福寧鎮左營遊擊守備桐山營遊擊守備

漳州鎮右營遊擊守備興化城守右營遊擊

守備福州城守右軍都司共十七缺。或營務尚簡。或駐劄就近。易於調度。均改為部推之缺。從之。○壬午。

孝端文皇后忌辰。遣官祭。

昭陵。○諭江南海州知州員缺甚屬緊要。宋楚望尚未到任。現在汪文坦署理。著各部堂官。於主事內揀選才幹之員。咨送吏部帶領引見。候朕簡用。其宋楚望著該督撫以相當之缺另行題補。○諭軍機大臣等。據張廣泗奏。

稱開修河道工價。原估銀四萬七千餘兩。約以三年運鉛腳價節省銀兩補還。不必另動帑項。今河工已竣。用過銀三萬八千餘兩。較之原估。節省將及萬金。所有開河工費。祇須二年即可補苴還項等語。可傳諭詢問張廣泗。此項節省銀兩。既係從前張廣泗所奏。改陸運為水運。通計鉛銅兩項。每年可節省一萬三四千兩之內。今河工告竣。較之原估。又有節省。作何歸結。并將來開河工費歸還之

後。所有節省。如何辦理之處。令其具摺以聞。○協辦大學士吏部尚書高斌奏。乾隆八年。詳籌河工案內議准。邵伯以南。金灣滾壩之下。東西灣地方。添建滾壩二座。壩下挑濬引河。即於鹽河對岸。加挑石羊溝引河一道。河頭建滾壩。以應東西灣二壩。並將鳳凰橋諸下流。俱挑濬深濶。歸石羊河以達於江。今臣查看南河。由芒稻閘至八江口。見石羊河距江不過十餘里。若以分洩湖水歸江。最為直捷。其形勢與芒稻閘無殊。第建壩滾水。必俟水長過壩。由壩滾下。方可通流。若水小。則壩內斷流。江湖來往。易於停淤。應照芒稻東閘之式。改建三孔閘。水長既可起板分洩。即閉閘時。板縫細流活動。自可汕刷潮沙。請勅下河臣。再將石羊河身。一律挑濬深通。從前議建滾壩之處。改建閘座。於通江河道有益。得旨。允行。下部知之。○又奏。徐州府城一帶。河道緊窄。每伏秋水發。較他處易於生險。皆因

上游河流直瀉無灣。而徐城以下七里溝等處。河勢接連數折。曲屈太多。以致來流迅速。去路紆迴。水湧波全。驟生險漲。臣細度形勢。應於七里溝等處。共開引河六道。俾上下一律通順。隨囑河臣顧琮。委員照式興挑。以為伏秋水發豫防之地。報聞。○安西提督李繩武奏。貿易夷人賚木瑚理等到境。言語恭順。策妄多爾濟那木扎爾來文。詞婉意和。但此次帶來牲畜較多。該夷等懇求在哈密變賣。

臣與肅州鎮道等札商。肅屬牧廠。既屬狹小。而嘉峪關外之花海子等處地方。逼近赤靖等營汛。南通青海各路。北接北路卡座。及往準噶爾之大北路。亦有不便留牧之處。且時屆夏初。正田畝長發之時。該夷等亦知牲畜衆多。口外水草有限。求在哈密售賣。臣已行令哈密副將瑚寶。將馬駝貨物。先令起行赴肅。其牛羊暫留卡外牧放。并札詢肅州鎮道。上年貿易夷人牛羊。在肅售變價值數目。或

應先在哈密議價。豫差員弁領商出口迎收。抑或商人必須親自出口議價之處。俟覆到。飛飭辦理。報聞。○癸未。

上詣暢春園問

皇太后安。大學士等會議兩廣總督策楞疏。議前任總督那蘇圖條奏兩廣鹽務章程。戶部行查各款。一原奏積年商欠。宜立法查追。據稱各商挂欠鹽價準羨等項。截至乾隆九年。共銀三十八萬三千六百三十七兩零。經前督臣奏明按照欠數多寡。分別年限帶徵。但各商本有急公急情之別。故欠項亦有多寡之分。如按現欠之數。以分帶徵年限。是急公而欠少者。轉不若急情而欠多者。得以多展年限。請於乾隆十一年為始。分限四年。覈定分數。分年帶徵。查此項舊欠銀兩。原因商力不能一時清繳。是以分別寬限完納。若不分欠多欠少。一例四年帶徵。是本易完者。反致遲延。應請將此內欠項多者。照該督所定。

自乾隆十一年為始。分限四年帶徵。其少者令該督按數另定年限。并分別帶徵數目。報部覈議。一原奏催追商欠。宜酌定勸懲。前督臣奏准。州縣承追商欠。令道府直隸州督催。今查兩粵商人。多住廣州。潮橋商人。多住潮州。商人承領餘鹽。上納價羨。均以運使運同為職掌。一切發鹽收銀。承追督催等事。該道府全未與聞。議敘固屬濫邀。處分亦屬寬抑。似不必舍專辦之運使運同。別有所屬。應如該督所請。嗣後帶徵商欠。本管直隸州。州縣照承追例。議敘議處。省河各埠。即以運使督催。廣西各埠。即以西鹽道督催。潮州各埠。即以潮州運同督催。高州茂名埠。即以本管知府督催。如催徵不力。即將運使等官。照道府例分別議處。一原奏現在埠商。宜秉公甄別。據稱粵東鹽務。自招商以來。應辦正餉無誤。即乾隆九年分正餉。業於奏銷前全完。其舊欠。亦立限分年帶完。次第清楚。倘有未完者。

即行革去商名。分別追究。查各埠商人。除乾隆九年正餉。業經全完外。其各商舊欠。是否即係前款內欠項。抑或另有舊欠之處。應令該督查明報部。一原奏誠實埠商。宜量加矜恤。據稱粵東產鹽日盛。前督臣那蘇圖就省河潮橋等處。冊報未配鹽餉。分委道府盤查。並無虧缺。至存倉陳鹽。如何撥銷之處。現在商人配兌生鹽時。議將易銷之埠。每封搭銷二百包。難銷之埠。每封搭銷一百包。如各商中有願領寄貯者。亦准領運。每封搭過黑色陳鹽。仍准九折繳價。以符加一折耗之數。大概兩年後。陳鹽可清。應如所奏辦理。一原奏收買場鹽。宜另撥帑本。據稱粵省鹽場。現存帑本銀三十三萬兩。通年鹽漏日開。存鹽愈廣。需項愈多。設遇帑本不敷。即須通融墊發。應請於現存帑本及續收商欠銀內。通融轉輸。毋庸另撥餉銀。查粵省現存帑本。數已充裕。如再於續收商欠內通融。殊屬未協。應令

該督將粵省收買鹽觔竈價等項。統在現存帑本內。輓轡轉運。毋得於別項挪移。一原奏鹽羨名色。宜歸併畫一。據稱兩廣正引餉銀。本有經徵督銷定額。至於陸續所報羨餘。按其完納銀數。有各項多寡不等。入冊造報。亦有年分先後不齊。若欲合而為一。必致牽混不清。且領銷正額額外餘鹽兩項。係聽各商自便。若如前督臣所奏。總照八年徵收數目。定為額數。恐易銷之埠。有缺鹽之虞。難銷之埠。啟派領之弊。是兩廣各項鹽羨名目。歸併畫一辦理之處。均有未便。應如該督所議。仍循舊例。按款徵收。其領銷正額額外餘鹽兩項。凡殷實之商。易銷之埠。准儘力領運。如疲乏之商。難銷之埠。毋得濫給。致滋拖欠。一原奏加贈鹽包。宜盡行革除。據稱江西省之贛縣等埠。楚省之郴州等埠。配運粵鹽至江楚盤山過嶺。必須改捆小包。拋撒走滷。在所不免。江省小包。加贈耗鹽四觔。楚省加贈二觔。

留為腳夫折耗之需。前督臣原奏。龍南等埠。按加二五私贈鹽包。係屬傳聞之誤。惟廣西之博白等埠。因乾隆元年減去鹽價二釐。詳准加二五配給。至商人承領正額額外餘鹽。又緣從前初定場羨埠羨之時。皆浮於正額。商人賠累。是以節經督臣折中酌辦。按價羨浮多之數。定以加一加二配兌。其離省最遠之鬱林等埠。加二五配兌。又廉州府屬合浦等三埠。加三配兌。今若將前項加包等項全革。商人勢難賠本領運。餘鹽不領。又難繩之以法。可否照舊加給。抑或將餘鹽應納價羨。均照正引餉價。一律上納。鹽觔亦照正引一樣配兌。贈包悉行革除。查前項加贈鹽觔。究係額外增添。並非向來定制。是否與鹽法有礙。及各商有無藉加包名色。任意多運。以及如何稽察。不致滋弊之處。戶部難以懸擬。應令該督確查。定擬具題。一原奏緝捕私鹽。宜頒賞格。據稱潮橋餘鹽項下。除場埠二羨之

外。另有充公銀兩。節經奏明。為地方辦公之用。應即於此款內。每年撥銀二千。為緝私賞需。至文武兵役。尋常拏獲私鹽。既有賞鹽之例。若於常賞外。再行議加。誠恐巡役兵丁。貪賞滋事。除將尋常拏獲私鹽。照例賞給外。其有拏獲水陸巨販大梟。場竈積私囤戶。以及出力受傷等項。按實在功績。分別給賞。并總督衙門。差委武弁兵丁。緝私盤費。亦在此內動支。應如所議辦理。一。原奏各屬。向有鹽規。

宜責令首報。據稱南海等七十三州縣。向未收受鹽規。三水等二十七州縣。向有鹽規。均已自行禁革。尚有廣東龍川等十州縣。留存鹽規。飭司嚴行禁革。其廣西興業等二十一州縣。福建寧化等五縣。江西信豐等兩縣。該督既稱各有鹽規。多少不等。應否酌留裁減。現在分咨各省撫臣辦理。應俟查明報部覈議從之。○貴州總督兼管巡撫事張廣泗奏。雍正年間。有雲南大理府妖人張保太。倡習

白蓮邪教。後流入貴州。四川傳及各省。近聞貴州省城。有魏姓齋婆。招引徒眾習教。黨類甚多。並聞四川涪州有劉權。雲南有張二郎。皆係為首之人。現已將黔省魏齋婆。拏獲審辦。并密咨川滇二省。一并嚴拏。劉張二犯。從嚴究治。得旨。此等事。惟應殲厥渠魁。脅從罔治。為得之。而又在神速。不露為妙也。○甲申。上詣暢春園。問

皇太后安。○諭軍機大臣等。據總督尹繼善摺

奏。請將邳州知州韓桐。調補海州直隸州知州。所遺邳州員缺。以山陽縣知縣金秉祚陞補。又一摺。請將吳縣知縣姜順蛟。陞補太倉州直隸州知州。皆聲明若具題請補。部臣必照例議駁。其語氣似強。朕以必應准彼所奏者。然此三員。猶為朕平日所知之人。是以令其送部引見。督撫題補人員。必須循照定例。若不論合例與否。概行奏請陞調。則銓選定例。不幾於虛設乎。爾等可將此意傳諭尹繼

善知之。其海州知州員缺。昨已降旨交部揀選矣。○又諭曰。張廣泗奏。白蓮教招引徒衆。一招可鈔錄密寄與四川雲南督撫閱看。留心辦理。此等邪教惑人。乃地方不應有之事。何以近日屢見之。務須辦理得宜。毋縱毋濫。以除後患。殲厥渠魁。脅從罔治。而又在神速不露為妙也。○又諭據張廣泗奏。稱黔省錢局及採買銅觔。內有運鉛秤頭及錢局公費。可以節省。餘鉛可以獲息。每年可得二萬餘金。以為通省開河修城之用等語。黔省開局鼓鑄。以及採運銅觔。歷年已久。並未奏報節省。著訥親於家信內。將原摺抄錄寄與愛必達。令其將從前何以並未奏聞。至今始行陳奏。有無情弊之處。查明具奏。○大學士等議准。巡視歸化城等處郎中伍寧奏。稱上年口內歉收。貧民就食歸化。無力回籍。請勅下山西巡撫。飭令該道查明酌給口糧。委員護送至朔平。交該州縣照例安插。毋致失所。從之。

○吏部議准。御史章佑昌奏。稱庶吉士散館。以主事用者。歸單月輪班四缺。後補用一人。非數年不得補缺。似宜畧為變通。請將雙月學習進士輪用二人。班內酌減一人。改用學習進士一人。散館庶吉士一人。庶不壅滯。從之。○戶部議准。閩浙總督馬爾泰議。覆巡視臺灣給事中六十七等奏。內地民人有祖父母。父母在臺。子孫欲來侍奉。或子孫在臺。祖父母。父母妻子內地無依。欲來就養者。准其給照來臺。入甲安插一案。接准部咨。詳議具題。查臺灣編氓多係內地之人。其在臺年久。置有恒業者。往往不能棄產回籍。應如所奏。在臺人民。果有祖父母。父母在籍。准其赴臺就養。如祖父母。父母在臺。准其子孫赴臺侍奉。若本人在臺。而內地妻少子幼。並無嫡親可托者。亦准其搬移聚處。即赴臺侍奉祖父母。父母之子孫。果有幼少妻子。亦准一體赴臺。仍照從前搬養成例。令臺防廈防各同知。

於登簿換文時。留心稽察。驗明人照相符。方准配船渡臺。并令內外地方官。先行關查明確。方准給照。如有藉稱伯叔兄弟及妻之兄弟族戚。一概不許濫給照引。倘朦混影射越渡。立即解回。并將濫給照引之地方官。嚴叅議處。徇隱具結之地鄰族保。一併嚴究。其荒僻口岸。嚴飭各員。弁常川巡察。如有游曠之徒。作弊偷渡。擒拏重究。倘有疎縱。照徇縱偷渡例叅處。從之。○乙酉。諭向來江西省每逢編審之年。丁男之外。又有婦女。蓋緣從前有鹽鈔一項。分給小戶。計口納鈔。既有婦女應徵之項。則不得不稽其存亡增減。是以入於編審之內也。今食鹽課鈔。久經攤入地糧。而該省尚循舊例辦理。朕思從前照鹽納價。編審尚屬有名。今鹽鈔既已攤入地糧之內。則是婦女已無可徵之項。何必存此編審虛名。徒滋擾累。嗣後編審婦女之處。著行停止。○諭軍機大臣等。廣東省賦役全書內。有男婦

丁口。并官吏隨住人口。共派鹽鈔銀一萬七千一百餘兩一項。婦女亦入編審。殊多未便。查江西省向有婦女鹽鈔銀兩。於雍正五年。已經巡撫邁柱。奏請攤入地丁項下。其編審婦女之處。近已降旨停止。爾等可傳諭總督策楞。令其將該省婦女鹽鈔一項。仿照江西之例。查明奏聞辦理。尋策楞奏覆五年編審。原以稽察戶口之殷繁。滋生人丁。例不加賦。至原有丁口應徵之鹽鈔等項。又久經攤入地畝。而婦女口數。仍循舊例入冊。實與體制不符。應遵諭旨。嗣後編審。俱查照江西省之例。畫一辦理。祇載丁數。其已經攤入地糧之男婦。並官吏隨住人口。食鹽課鈔。以及男丁應徵之徭差民壯均平驛傳等項銀數。概免造入冊內。其缺額未復丁口。亦俟墾復田畝之日。隨稅編徵。亦不必查造婦女口數。統以乾隆十一年編審為始。長遠遵行。報聞。○豁免江蘇沛縣昭陽湖水沈民賦田地漕等項

銀三千二百六十兩有奇。米一千二百一十八石有奇。麥二百三十六石有奇。又湖地租銀一千二百七十兩有奇。又麻地額徵麻一千八百六十七觔有奇。○丙戌諭軍機大臣等兵部議覆顧琮薦舉遊守一摺。以條例內並未開載兩運事竣二年舉劾。且文職舉劾久經停止。其武職自應畫一辦理。請旨勅議等語。武職舉劾雖有此例。率以無可舉劾而停止。今顧琮有舉而無劾。顯係市恩。非大臣

秉公辦理之道。爾等可傳諭申飭之。尋經大學士會同兵部議奏。武職催漕均係該汛應辦之事。實無殊績。可膺薦舉。況既有各省督撫提督二年半舉劾之例。亦未便重複請薦。應照催漕文職一併停止舉劾。從之。○大學士會同兵部議准雲南總督兼管巡撫事張允隨疏稱。順寧府屬之猛緬長官司奉廷徵父子獲罪革審。其親支內並無可承襲之人。并據猛緬五十村寨夷民僉稱。向被土司殘

虐。民不聊生。懇求賞立流官等語。自應俯順夷情。將猛緬土司裁汰。其所管地方改設流官管轄。一切善後事宜。詳酌妥辦。續奏從之。○旌表守正被戕之直隸蠡縣民劉思孔女劉氏。○丁亥諭軍機大臣等浙江拏獲採生折割等犯窮兇極惡。最為慘毒。審擬之時。必當嚴究惡黨。盡法處治。以絕根株。方足以快人心而斷後患。昨見常安審擬具題之本。過於寬縱。部駁甚是。已經傳諭常安矣。今朕聞得此種兇徒夥黨甚多。所有匪船已至百有餘隻。承審此案官員。有明知而不緝捕者。亦有到案而不詳究。即行釋放者。甚至匪類中頗有家計饒裕而行賄得以倖免者。此等惡犯不但邪藥迷人。傷殘童稚。而逆天悖理。聚眾肆虐。竟有謀為不軌者。江浙之輿論如此。從前朕已屢次批諭常安弗使疎忽。以致漏網。今看辦理情形。是常安先有寬縱之意。以圖草率了事。而屬員承辦種種不安。常安亦

不究詰。全不計及貽患於將來。除惡務盡之道。不應如是。著再傳諭常安。不可因此案已經具題。稍存迴護。務期嚴密詳查。盡法處治。並絕根株。以彰國法。且更不可辦理不善。以致別生事端。尋常安奏覆採生折割人犯。梟獍不足喻其惡。斬絞不足蔽其辜。臣審擬此案。豈肯少留餘地。致令貽害將來。惟謀逆情形。並無確據。自係公惡在人。形容太過。臣現飭嘉湖二府。嚴密偵緝。斷不敢草率了結。稍涉寬縱。得旨。本犯共事之婦。尚行開脫。如此而謂不少留餘地。其誰信之。看來汝大不似從前慎之。戒之。此事亦應速行具題。看汝總有將就了事之意。非朕用汝之本意矣。○戊子。兵部議准貴州總督兼管巡撫事張廣泗疏稱。前因普安州屬之捧鮓。黃草壩等處。均關緊要。奏准將安籠鎮標左營原駐捧鮓之遊擊千把外委帶兵駐防黃草壩。以原駐安籠鎮城之左營守備把總外委帶兵駐防捧

鮓。并以千把帶兵分防白雲壘。汛法巖。奎染汛。羊上等處。又於裁減平伐營兵丁內。撥添貴陽營分防城汛。今安籠鎮標左營官兵。全行撤改於黃草壩捧鮓一帶。分布駐劄。所有各汛塘新添衙署營房。并貴陽營新撥兵丁營房卡房。均應亟為修建。從之。○蠲免湖南湘陰。武陵。桃源。龍陽。沅江等縣。十年分旱災額賦銀二千九十三兩有奇。米二百二十七石有奇。並緩徵銀一萬二千五十八兩有奇。米九百八石有奇。○奉恩輔國公麟魁。緣事革退。以閒散宗室興受子九如襲爵。○旌表守正捐軀之河南尉氏縣民任良信母田氏。○己丑。上詣暢春園。問皇太后安。○上還宮。○諭據三陵總理事務貝勒允祁奏稱。昭西陵因連日陰雨。

寶城後北面。坍倒磚牆一進。東西約寬十二丈。自垛口以下。高二丈有餘。兩旁現皆閃裂。為此奏聞。或勅交該部照例辦理。或欽派大臣前來查勘。敬謹修理等語。此事關係緊要。和親王現奉差彼地。著戶部侍郎三和。即刻馳驛前往。會同和親王。敬謹相視。速行定議。請旨辦理。○諭軍機大臣等。四月初七日。據碩色奏稱。河北之彰德衛輝懷慶等府。雖經節次得雨。然止有一二寸三四寸。不能深透。且自閏三月初旬以來。已及一月。甘霖未降。至省城亦未得雨。現在率同屬員。虔誠祈禱等語。計碩色此奏。距今將二十日矣。現在彼地曾否得雨。未見奏報。若尚未得雨。碩色作何籌畫辦理之處。可傳諭詢問之。令其速行具奏以聞。○大學士九卿等議覆。刑部奏。嗣後凡聽從下手。毆本宗小功大功兄姊及尊屬至死者。除實係迫於尊長威嚇。勉從下手。邂逅致死。並非助毆傷多情重者。將下手之卑

幼。仍照例減等科斷外。其雖有尊長主使。毆打而輒行疊毆至死傷多情重者。將本犯擬斬監候。秋後處決。從之。○添建雲南河陽縣典史衙署。從總督張允隨請也。○旌表守正捐軀之直隸靜海縣民王世龍女王氏。○庚寅。諭。向來各織造。每歲例應一處押運。今歲係杭州織造押運之年。申祺甫經到任。此次著蘇州織造圖拉押運來京。○又諭。曰。江南河庫道吳同仁著調補山東兗沂曹道。因吳同仁熟悉河務。雖離本籍五百里以內。不必迴避。兗沂曹道輝色著調補陝西榆葭道。榆葭道高晉著調補江南淮徐河道。淮徐河道姚廷棟著調補河庫道。○蠲免廣東新寧潮陽陽春羅定等州縣被水田地額賦銀三千八十五兩有奇。穀價銀二十四兩有奇。米八百九十石有奇。穀一百二十石有奇。○辛卯。兵部議准。湖廣總督鄂彌達疏稱。興國營原設塘船七隻。小巡船三隻。并留內河巡船一隻。

足供操防巡緝。其興字一號二號巡船二隻。應請裁減從之。○鑄給安徽安慶池州二府江防捕盜同知關防從巡撫魏定國請也。○旌表守正捐軀之河南唐縣民岳泰妻王氏。江蘇贛榆縣民呂津女呂氏。壬辰。

上御乾清門聽政。○吏部議覆建威將軍補熙等奏稱。現准部咨。各省將軍副都統衙門隨印筆帖式。停其由京補放。於各該處兵丁內考取補用。綏遠城滿洲筆帖式二員。蒙古筆

帖式一員。俱由該處考取補用。查綏遠城地處邊外。與各部落蒙古接壤。往來文移。俱用蒙古字話。而蒙古旗分通曉漢文者較少。請將滿洲筆帖式二缺。仍照舊例考取滿漢繙譯。其蒙古筆帖式一缺。改為滿洲蒙古字話繙譯之缺。於八旗蒙古內考取。應如所請。辦理。並行知內閣。擬定試題。由該將軍考試。封卷送部。奏派理藩院蒙古堂官。覆加校閱。進呈歸部註冊補用從之。○旌表守正捐軀之

河南中年縣民董士信妻蒿氏。○癸巳。諭曰。雲南總督張允隨奏請。緬甸改土設流一案。經部議准。朕已降旨允行。將來設立流官管理。第新附之衆。必得賢員加意拊循。方於邊地有益。可傳諭張允隨。將應設之流官。務揀平日賢聲素著。可以安撫新疆者。題請補授。○甲午。太常寺奏請此次致祭

地壇。是否詣齋宮齋宿。得旨。今歲夏至致祭地壇。齋宮樹木漸次成陰。扈從人等已有憩息之所。況逢時雨之後。天氣清涼。朕仍照原議前往。

壇內齋宮住宿。○太常寺卿赫瞻奏。臣署庫房存貯祭器。向祇責成庫兵庫吏看守。未昭慎重。請照工部節慎庫之例。添派旗官二員。兵二十名。分班值宿。得旨。允行。下部知之。○戶部議覆護理江西巡撫布政使彭家屏奏。稱調任江西按察使翁藻條奏。江省爭控墳山。令地方官察勘段落四至。驗契繪圖立案。以

杜復控翻告。查江省習俗。偏信風水。爭端構衅。訟獄繁興。請嗣後州縣辦理爭控墳山案件。親履察勘。確訊保鄰。詳驗契券。秉公剖斷完結。將事由節錄。并取具兩造允服甘結。申報該管道府存案。以杜翻案。訐訟。倘查勘不明。剖斷不平。照例叅處。應如所議。從之。○乙未。諭軍機大臣等。據總督策楞奏。稱原任融懷營叅將馬國柱。年未衰頽。送部引見。請賞發來粵。以原官酌量題補等語。今該部帶領

引見。朕看馬國柱。實係年老。不堪任用。策楞竟為彼所欺瞞矣。爾等可傳諭知之。○是月。直隸總督那蘇圖奏。報各屬得雨。糧價驟為平減。得旨覽奏俱悉。秋成尚早。不可於此時。即為滿足之言也。○又奏。保定郡城復得透雨。河間。天津。向南一帶。未得透雨之區。亦各報得雨一二寸不等。得旨覽奏。河間。天津。究屬待澤。不可因他處霑足。而置此二處於度外也。○又奏。河間。天津。二府所屬各州縣。均

已續報得雨。連次霑濡。均可插種秋禾。惟鹽山。慶雲。二縣。尚未報到。得旨覽奏俱悉。鹽山。慶雲。及天河。二府。若尚有缺雨。成災景象者。卿此番查察。應留心妥辦。○又奏。慶雲地方。及宣化所屬。加賑閏月口糧。分給完竣。鹽慶。二邑。興修宣惠馬頰。二河水利工程。均於前月分段動工。並報前赴天津。慶雲。鹽山。日期得旨。便道至河間。一查更佳。○又奏。報直省各屬節次得雨。均已霑足。惟天津府屬之慶

雲。鹽山。河間。府屬之寧津。三處。得雨僅寸餘。又大名府所屬地方。得雨甚微。不成分寸。正定府屬之藁城縣。南鄉七村莊。雨帶冰雹。所種棉花嫩苗。不無傷損。委員勘明。酌借籽種。勸令乘雨。佈種穀黍。得旨覽奏俱悉。天河。所屬州縣。連年歉收。朕所廑念。卿其善為體恤。妥辦。毋以他處現經得雨。而置此二處於膜外也。○直隸宣化鎮總兵李如柏。奏報各屬同日得雨。均已霑足。得旨欣慰。覽之。民情米

價。作何光景。何不詳奏以慰朕耶。○署漕運總督左都御史劉統勲奏報經過地方得雨情形。得旨。即京師亦於二十八等日。得雨霑足。誠可謂

天恩浩蕩。朕甚欣慰。迥非汝臨去時光景矣。○安徽布政使陳億榮奏報到任日期。得旨覽。諸事但求自善自守。以苟延時日。總不如實心辦政務。以求朕知鑒之為得計也。汝頗中此病。今調此任。宜痛改前習。○江西巡撫塞

楞額奏報任卹途次得雨情形。得旨京師則四野霑足。朕憂大釋。汝應同此喜也。○護理江西巡撫布政使彭家屏奏學政按試各郡。每有積猾棍徒。隨棚撞騙。在學臣關防內署。無從覺察。應責成各府提調。實力查禁。但提調官失察。棍徒隨棚撞騙。向未定有處分。無所顧畏。應請酌定。得旨交塞楞額。聽其議奏。○福建巡撫周學健。密奏閩省知府直隸州各員優劣。得旨。如此留心甄別。知府吏治自

然整頓。且據汝所論。合之其人。實覺允當。無偏見。此更朕所喜也。○又奏閩安海口。商漁船隻。出入絡繹。透漏米糧。不特為省會民食漏卮。且非慎重海防之道。今酌定章程。實力查辦。務使永除積弊。○出口船隻。分定地方。切實查驗。○查驗各口。輪派文武監察。以杜賄放。○南臺江面。派員巡查。船戶牙行。連環取保。以絕私買。○船戶食米。與閩安口外村民食米。定數給照。以杜影射。○水道小港。與陸路捷徑。令該地文武一體堵截。以防透越。得旨。有治人。無治法。尚在實力行之。○福州將軍兼管閩海關事務新柱奏報乾隆十年分。收過正稅銀二十六萬六千五百七十兩零。比乾隆八九兩年。俱有增溢。得旨。所奏殊未清。既云多餘。不知多幾何耶。朕非必欲知其多餘之數。但汝辦事之人。反事不清楚明白。即行奏聞。甚不可也。○又奏各屬雨水糧價情形。得旨覽奏俱悉。若有旱象。地方官所

辦妥協與否。據實奏聞。○福建建寧鎮總兵蕭琅奏陳整頓營伍規條。得旨。惟在實力行之。不在空言之無補。看汝頗有聽信幕賓。舞文粉飾之意。戒之。○湖廣提督王無黨奏。操練兵丁。並教習鋼叉長棍。於攻取苗寨。可收實效。得旨。士卒自應教練。亦惟用之得其法耳。○又奏。燂洗礮位。派撥要汛。並捐造纏絲神鎗。加意教演。請勅各省一體照辦。得旨。惟在實力行之。不在空言也。○湖北巡撫開泰

奏。湖北一省。為四達之區。向多外省流丐。及本省游民。結伴乞食。往往恃其夥眾。肆行無狀。更有一種流棍。托跡傭工。往來鄉僻。動輒逞兇拚命。現據應山縣拏獲二十餘名。除批飭訊究。并通飭各屬。實力查辦。得旨。此等視之。雖似小事。然亦足為閭閻之累。所宜時刻留心稽察。○又奏。各屬賑務告竣。復借給籽種口糧。減糶倉穀。以資接濟。并查荊州衛及枝江。潛江。天門等縣。查辦飢口時。有書吏希

圖需索之弊。飭令該道等分別懲辦。得旨。知道了。○又奏。湖北為水路通津。凡雲貴川廣江浙等處船隻往來。如織。長江風濤不測。兼多急溜險灘。患生呼吸。不獨商民貨載。易有疎虞。即官運料物。亦間有沉失之案。本省水摸。入水不能久耐。聞閩省沿海水摸。慣習水性。波底游行。取攜甚便。若選募十數人來楚。補充江漢兩縣水手。風土漸熟。聽其入籍。於公私船均有裨益。得旨。甚妥之舉。知道了。

○湖廣宜昌鎮總兵陳綸奏。臣原籍宜昌孫家溪。臣祖世良。遭明季之亂。率臣父所學奔逃散失。臣父幸為同姓撫養。僑居武昌。因而隸籍江夏。茲臣補授宜昌鎮總兵。公事之暇。訪之故老。於孫家溪之龍潭坪荊莽中。得臣先世塋墓。得展誠敬。實皆聖恩高厚。錫類深仁之所賜。得旨。此亦汝孝念精誠所感。知道了。○河南巡撫碩色奏。查明南陽府屬之裕州。葉縣。汝州。直隸州。并所屬之魯山縣。二麥

被雹。分畝借給籽種。并確查無力農民戶口。借給倉穀。以資接濟。得旨。雹災不為大害。酌量撫恤可也。○山東巡撫喀爾吉善奏。四月初七八等日。濟南等府所屬。均報得雨。惟濟武。東三府屬少雨之數州縣。雖各得雨。尚未霑足。得旨。覽奏。雨澤分數。尚欠霑足。目下無望雨之意耶。○又奏。四月十六日。近省各州縣。均得透雨。得旨。覽奏。欣慰。但不知德州一帶如何耳。速查奏。以慰朕念。○又奏。臨清

高宗實錄卷二六五

三

一

德州一帶。四月初七八等日。得雨二三寸不等。十九日。德州。齊河。長山等處。復經得雨。雖未能一律深透。當望雨正殷之際。二麥實屬有濟。其德州以南各州縣。沿河地畝。多種棉花。出土較遲。目下正在吐茁。尚未憂旱。又直東游惰貧民。拾麥覓食。習俗相沿。現飭各屬妥酌安插料理。得旨。覽奏。德州一帶情形。頗有諱飾之意。以朕所聞。此處望雨頗殷。若五月內得透雨。尚可。若復遲時日。恐成旱象。一

高宗實錄卷二六五

五

切政務綢繆之計。汝其留心。○又議奏。東省豫備麥十萬餘石。接濟直隸借糶。此內或有多餘。即運送至京。應俟麥收後。總視各屬收成分數。酌籌妥辦。得旨。覽奏。俱悉。今京師仰賴天恩。已得透雨。此不過為存倉之用耳。非亟務之需矣。○山東兗州鎮總兵官王朝輔奏。報協同漕臣。催趲重運。尾幫全數。已過臨清。板二閘日期。得旨。覽奏。近來雨水。何無一言奏及耶。○山西巡撫阿里衮奏。交城。陽城。平定。孟縣。平陸等州縣。勘有銅鉛礦所。飭屬招商試採。俟有成效。再將開採鼓鑄事宜。列款具題。得旨。開礦固屬便民之舉。而滋擾則不可。一切留心。毋致生事可耳。○又奏。各屬均得透雨。禾苗暢茂。尚有屯留等二十五州縣。四月以來。未報得雨。得旨。覽奏。欣慰。其四月內未報得雨之數州縣。近來光景若何。不致成災否。陝西巡撫陳宏謀奏。陝省為幽岐舊

地蠶桑之事。自昔為盛。日久漸替。查西。同。鳳。漢。邠。乾。等府州。皆可養蠶。近令地方官身先倡率。廣植桑株。雇人養蠶。并於省城製機。覓匠織縑。此次呈進之縑。即係省城所織。民間知種桑養蠶。均可獲利。今年務蠶桑者。更多於上年。計通省增種桑樹。已及數十萬株。從此漸加推廣。陝省蠶桑之利。可以復興。其山東放養山蠶之法。現已令各屬導民試養。得旨興農桑。乃為政之要務。毋始勤而終怠。毋空言而行違。勉之。○又奏陝省民情。大概質直。而任氣逞刁。目無官長。亦多有之。查西安府之藍屋縣南山。出產木植。每當三四月間。水發。木方出口。有黑峪。黃峪地方。木客人等。在彼雇人運木。人烟輳集。知縣彭紹珩前往巡查彈壓。有工人倨坐不起。反與衙役爭嚷。知縣加以薄責。乃有同夥任快。蘇三等。糾眾毆差。搶犯辱官。殊為不法。此等近山地方。素多兇悍。必須嚴加懲創。以儆刁風。現飭臬司

提審按擬。又長安縣生員郝濬等。因生員周大化欠糧應比。不戴頂帽。不稱生員。致知縣按欠責打。郝濬等傳帖約眾。齊集府堂理論。士習攸關。亦難姑息。隨即提審。將為首之郝濬等斥革。分別責懲完結。蓋所宜作養者。在讀書立品之秀士。而不在抗糧多事之劣衿也。得旨。此見甚是。尚恐汝過縱耳。○甘肅巡撫黃廷桂奏。河東各州縣。入夏得雨透足。河西各州縣。積雪融化入渠。水勢盈滿。足資灌溉。惟蘭州府屬之皋蘭金縣。靖遠。狄道。鞏昌府屬之會寧。涼州府屬之平番。一帶山田。雨未深透。并鎮番縣風沙屢作。現在望雨。得旨。既有望雨之州縣。則恐致遂成旱象。甘省路遠。若必待奏報。濟民之事。何可遲時。一切政務。為未雨之綢繆。留心辦理可也。○甘肅布政使阿思哈奏。鼓勵兵心。尤貴衣食充裕。查從前未定養廉公費時。凡千把員弁。往往有多食數名兵糧者。即馬步兵。亦有倍食名糧

者在營中兵額。不過每百名多空數名。而將備之賞賚有資。兵丁之窮乏無慮。應請勅下管兵大員。從長計議。如有兵困情形。作何調劑。據實陳請。得旨待朕緩酌之。○又奏禮重諱名。查清書還音。祇係一字。甘省所轄之真寧鎮原兩縣。印文清篆。竟與

世宗憲皇帝聖諱同字。其鎮番縣印。係屬新頒。已經改正。又查陝省之鎮安。河南之鎮平。山西之天鎮。江南之鎮江。浙江之鎮海。廣東之

實錄卷二六五

五

鎮平。廣西之鎮安。雲南之鎮沅。貴州之鎮遠。等府縣。各印信均應一律改鑄頒換。以昭誠敬。得旨禮記不曾熟讀。○大學士川陝總督公慶復等奏。督率漢土官兵。連克脈隴岡。曲工山梁。上谷細等處賊寨。撲燬險要碉樓。前後一百五十餘座。並據上甲納曲個等十餘寨頭人。畏威投誠。各將子弟獻出作質。并繳馬匹鎗刀等物。又據逆酋班滾之異母弟俄木丁。並北路靈達已投喇嘛甲爾溫布。並上

瞻對應襲肯朱頭人騷達邦。俱願出力。暗為嚮導。臣已密差遊擊王世泰。羅於朝。督令土守備汪結等。由北路茹色一帶。暗約渡江。并派甘西之兵。夾攻噉多後路。仍移咨提臣李質粹。督催官兵。進攻納洪多溝口。務期必克。以取全勝。得旨覽奏俱悉。雖兵威稍振。尚當督催迅速成功。以慰朕念。至賊番之敢於抗我師顏者。皆恃碉樓。此番既經費力攻克。則後此不宜復聽其建造。於善後案中。卿其留

實錄卷二六五

六

心妥議。○又奏官兵攻克納洪多溝口。由茹色會合渡江。已破如郎大寨。逆酋班滾攜家逃遁。飛飭各路鎮將。并各土司。分佈要隘。嚴密擒捕。欽差大臣班第等。即於是日到營。招撫遺番。乞降甚衆。得旨覽奏。曷勝欣慰。但班滾未獲。究未可謂成全功。卿其督令務獲正犯。慎防假冒之弊。其一切善後事宜。卿其詳酌。悉心妥議具奏。○又議覆布政使李如蘭奏。稱川省西南一帶土司。每因細事。同類殘

殺。雖各土司野性不馴。實係漢奸主文播弄。請嗣後如雜谷等土司需用主文。令稟明管轄州縣。於考職典吏內。選擇誠實者。具結遣往。倘該土司仍前不法。查係主文唆使。與土司一併嚴辦。如六年內毫無過誤。給與議敘。即用等語。查典吏賢否不一。在本管州縣。尚須稽查約束。若縱入蠻寨。或恃有職銜。欺壓土民。或熟識衙門。勾通滋事。且主文原係該土司延請幫助之人。非差遣化導可比。以有職人員。為土司効用議敘。亦於銓法有礙。所奏應毋庸議。臣慶復前在雲南時。曾刊木榜。示諭土司。凡所延主文。及在署辦事書識。將姓名開送管轄衙門。遇有更換。隨時申報。如敢簸弄土司。滋擾地方者。立即嚴拏。照書役舞文作弊例。從重治罪。其有能秉公安靜者。酌量獎勵。川陝事同一體。請照此辦理。得旨。著照所議行。○四川巡撫紀山奏。新都。江油兩縣。奸民吳守忠。彭章。鄒泮生。趙道人等。借

實錄卷五十五

五

施藥為名。降神念咒。聚眾演習邪術。謀為不軌。當即獲首夥要犯。并起出符咒器械桃枝藥葫蘆等件。訊供定擬。得旨。此等事惟應辦理迅速。早正典刑。不可稽遲。至夥黨不可漏網。而又不致株連無辜。為尤要也。汝其勉之。○廣東巡撫準奏。粵省廣州高州等處。雨水霑足。田禾茂盛。早稻可望豐收。惟南雄韶州。潮州。一帶。閏三月河水驟漲。間有被淹田畝。業已涸出。不誤農時。其衝損民房。已給銀修葺。又城垣隄岸。亦多衝損傾圮之處。現在估報修理。所有被水地方。俱經確查撫卹。并酌行平糶。民人均各安業。得旨。覽奏實堪欣慰。其被淹之處。雖屬偏災。亦應量為撫卹。

實錄卷五十五

五

大清高宗法天隆運至誠先覺體元立極敷文
奮武孝慈神聖純皇帝實錄卷之二百六十五

實錄卷二百六十五

五月

大清高宗法天隆運至誠先覺體元立極敷文
奮武孝慈神聖純皇帝實錄卷之二百六十六

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十一年丙寅五月丙申朔諭畿輔地方

平定六年五月

自閏三月四月以來屢次獲有甘霖四野霑
足惟是鹽山慶雲寧津三縣雖亦各得雨澤
究未深透鹽山慶雲原屬上年災重之地彼
地貧民先經借給籽種口糧料此時想已告
匱著按照大口小口再借口糧一個月以資
接濟其寧津一邑上年雖非災歉而目今雨
澤稍愆著按畝借給籽種粟米四升以資耕
作再此三邑民間米糧未免短少市糴艱難
著於糴三之外多撥倉糧每石大為減價城

鄉設廠糶賣。俾閭閻不至乏食。該部遵諭速行。○大學士等議覆協辦大學士吏部尚書高斌奏稱黃河自入江南。兩隄夾束。溜勢逼緊。一經兜折。隄根受險。全賴埽壩防護。固不可玩工惜費。亦不可無故生工糜帑。乃近有無故生工。美其名曰包灘下埽。水未近隄。於隄外河灘接築撐隄。迎水作壩。臺下埽引溜。甚至有挺出河心。其撐隄有接長四五十丈者。其下順埽。有拖長至二三百丈者。此端一開。將來兩隄在在生工。迄無底止。臣已切囑河臣顧琮。於已經下埽做工者。毋庸廢易。其尚未下埽做工者。當細察情形。詳慎妥辦。不得仍前任意生工。及做不如式。應如所奏。勅下河臣。悉心經畫。庶搶護悉合機宜。埽壩皆歸實用。從之。○以刑部尚書盛安為都察院左都御史。吏部左侍郎阿克敦為刑部尚書。刑部左侍郎雅爾圖為吏部右侍郎。禮部右侍郎覺羅勒爾森為刑部左侍郎。○是日起。

上以夏至祭地於

方澤。齋戒三日。○丁酉諭朕覽大學士等議覆高斌埽壩規宜一摺。其近日做過工程多係不應做工之處。無故生工。虛糜帑項。白鍾山辦理如此。不無聽信屬員。借端開銷。以為侵冒錢糧之計。著將已經築壩下埽之化村鋪雙廟及已築壩臺尚未下埽之安東西門曹家莊韓家山等處。令總河顧琮分晰查明。所有虛費帑項。俱著白鍾山賠補。○諭軍機大臣等。馬爾拜自擢用提督以來。任內應辦之事。未見留心經理。即如前任提臣保祝奏明緝拏盜犯宋義一案。馬爾拜到任之後。並未奏聞。現在如何緝拏蹤跡。此案係朕所深知者。其他匪竊潛藏。不知凡幾。至於查閱營汛。整飭戎行。訓練兵丁。亦不過虛應故事。有失緝盜安民之意。似此習於懶惰。怠玩職守。諸事漸致廢弛。殊負朕簡任之恩。爾等可傳諭

申飭之。尋馬爾拜奏。宋義一犯。經臣飭訪竄匿蒙古地方。當令守備李良帶領幹役。改裝往拏。續又風聞該犯潛藏喀爾沁貝子地方。復密諭該備赴彼偵緝。近復聞其逃往瀋陽。當又密差外委田弼設法捕捉。未據報獲。臣因正犯未獲。不敢妄瀆聖聰。今蒙訓飭。惟有實力躡緝。稍贖愆尤。得旨着汝如何實力改悔耳。○大學士等議覆協辦大學士吏部尚書高斌奏稱。黃淮為川澤歸宿。閘壩實黃淮門戶。過蓄則盈。過洩則虧。所宜斟酌定則。查清黃二水。每遇伏秋盛漲。總以老壩口水誌為驗。應酌定以乾隆七年最大水誌連底水一丈四尺七寸為準。令河臣將每年水勢較量奏報。其各處閘壩附近水誌。黃河則有徐州城外石隄可驗。清河則有洪湖山盱石滾壩可驗。以此較量酌定啟閉。各工俱有遵循。如黃河南岸碭山縣之毛城鋪壩。洩水由洪溝河入濰。下達五湖。匯入洪澤。助清刷黃。近

年多開少閉。以致濰河一帶民田受淹。今應俟徐城石隄連底水長至七尺始開。秋汛過後即閉。其壩外引水支河四道。止留三道。內蔣家營一河。河頭直順。應改為倒勾。從前太順之口門。並應堵塞。又王家山天然閘。原為分洩盛漲。以保徐城。近亦經年不閉。以致蕭縣宿州地方常被水患。今應俟徐城石隄連底水長至八尺始開。漲退即閉。至睢寧之峯山四閘。地近洪湖。不宜多洩。且在徐城之下。不遇異漲。毋庸開放。至黃河北岸。如宿遷縣之竹絡壩。引黃入運。原為中河水弱時濟運。非為洩黃而設。近亦經年開放。是以黃水灌入中河。轉入運鹽河。致海州一帶河道淤淺。此壩口門原寬六丈餘。應收二丈餘。其內外臨黃東黃二壩。亦一律收小。酌定每年十月東省煞壩後始開。至來歲重運過完即閉。其清河縣之王營減壩。洩水入運鹽河。安東縣之馬家港。洩水入民便河。俱洩水無多。非遇

異漲不得開放。又中河之劉老澗壩洩水入六塘河。每遇水漲。六塘河有駱馬湖水盈注。不能容納。外水亦不得常時開放。至清水。則以洪澤一湖為灌輸蓄納之地。其洩水之處。山盱三滾壩外。如盱眙之蔣家閘。由金釵罕貽等澗。直抵高郵老湖。久經堵閉。上年居民請開。民情甚便。自不必常閉。但恐宣洩太過。湖水有虧。應以洪湖水長與山盱南壩相平。始開。一不過水即閉。其南北天然二壩向係

清實錄卷一百六十六

用土堵築。臨時挖開過水。上年南滾壩過水二寸。將天然南壩放開。初開僅三十四丈。後刷寬四十四丈。壩下溝深尺餘。水落後堵閉。糜費不貲。且減洩太過。湖水受虧。今應俟南滾壩過水三尺。始將土壩開放。南滾壩一平即閉。又運口分淮入運。水勢不宜過大。每遇水長。高寶一帶。水即盈隄。由運口草壩口門太寬。今酌定四尺為度。併將二壩三壩一律收小。其南壩壩墩斜長。重運挽行不便。應酌

改作磨盤式。總之黃水宜合不宜分。清水宜蓄不宜洩。臣詳勘河湖水勢。通盤籌定。至形勢偶遷。因時損益。則在司河者之相機斟酌也。以上各條。均應如所請行。臣等並查老壩口。為清黃交會之處。其清水實在水勢。必就洪湖隄身較量。方能驗度有準。應令河臣於地勢最低之古溝。龍門壩。六安溝。高家堰等處。立定水誌。照式奏報。至運河之水。係湖水分入。不應較湖水為渾。於運道甚有關繫。亦

平定縣志卷一百六十六

應令河臣將水色清渾。并一年內黃水有無倒灌。及灌入次數。時日。或係東北風起。或係黃水甚大。實在情形。俱於奏報水誌時。一體奏報。得旨。依議。速行。○戶部議覆。巡視臺灣戶科給事中六十七等奏。稱臺郡供粟之外。尚有官莊一項。按畝徵納。與正項錢糧無異。今閩省丙寅年地丁錢糧。並臺屬額徵供粟。已全蠲免。此項租銀。應否照舊徵收。奏聞。請旨。查臺灣官莊租息三萬餘兩。自題報歸公。

後撥充內地養廉之用。原非耗羨銀兩，亦非正項錢糧。實與雜稅無異。自應照舊徵收。惟查本年三月奉旨蠲免滇省官莊義田等項租銀十分之三。農民均霑恩澤。今臺灣官莊事同一例。可否照滇省蠲免。請旨得旨依議。速行。○戊戌。

上詣

北郊齋宮齋宿。○

孝誠仁皇后忌辰遣官祭

景陵。○諭山東濟南東昌二府所屬州縣內。從前因雨澤未能霑透。二麥歉收。今秋禾又復望雨。豐歉難以豫定。將來平糶借給等項。恐各州縣倉糧不敷。著於未過天津漕糧內。截留十萬石。於德州水次有倉之州縣。分貯六萬石。於天津水次有倉之州縣。分貯四萬石。以備就近接濟。該部遵諭速行。○己亥。夏至。祭地於方澤。

上親詣行禮。○詣暢春園問

皇太后安。○幸圓明園。○大學士等會同工部議覆署江南河道總督顧琮奏稱。山安廳屬之安東西門。因黃河溜勢埽灣。直逼隄根。最為險要。現於隄外接築壩臺。下埽搶護。查該處尚有隙地。可以圈築越隄。應令河臣於埽灣迎溜處所。緊靠縷隄圈築小越隄一道。以為重障。至所稱海防廳屬之童家營護灘壩工。不應在淤灘之上。祇須切坡。即免汕刷。且縷隄高厚。毋庸築壩。業飭該道廳督令切坡。停其修築壩工。又陳家浦漫口圈隄比舊隄較矮。應照式加高。其圈隄下至工尾。尚有舊縷隄一千九百餘丈。隄身狹矮殘缺。應於陳家浦口門圈隄接至重隄。俾隄身聯絡。不致內水蕩刷。均應如所奏辦理。得旨依議。速行。○辛丑。河南巡撫碩色奏前因河北各屬雨澤稀少。省城望雨尤殷。恭摺奏聞。今二十餘日。尚未得雨。現仍率屬虔誠祈禱。得旨虔誠。

祈禱固屬目下之急務。而一切未雨之綢繆。尤不可不盡人事也。若將來成災。即不至成災。亦應於此際豫為周詳妥議。庶不致臨事周章也。別有旨。向大學士處頒發。○以故奉恩輔國公廣齡子博爾忠武襲爵。○廣西田州土知州岑應祺故以其長孫岑宜棟襲職。○旌表守正捐軀之廣東靈山縣民黃世莊妻陳氏。○壬寅。

上詣暢春園問

皇太后安。○諭軍機大臣等從前降旨。令豫東二省各備麥十萬石。運送來直。分發借糶。今據碩色奏稱河南之開封彰德衛輝懷慶等府屬雨澤稀少。現在祈禱等語。朕思直隸各屬均經得雨。既有山東麥石運送。近復降旨截留漕糧四萬石於天津。以備接濟。而河南望雨甚殷。朕屢念民瘼。直隸河南均屬朕之赤子。自應一體籌畫。如豫省運直麥石已抵存貯之所。著酌量收貯。若未曾起運者。不必

起運。其起運而未經抵通者。著仍存留豫省備用。爾等可傳諭那蘇圖碩色。令其速行會同商酌。一面辦理。一面奏聞。○戶部議覆山西巡撫阿里衮疏稱大同懷仁廣靈應州渾源山陰靈邱陽高天鎮朔州馬邑定襄崞縣太原榆次遼州榆社平定等十八州縣乾隆十年分秋禾被旱。復被霜雹成災。共應蠲免銀一萬三千七百一十九兩零。米穀共三千五百十三石零。豆麥共九百九石零。應帶徵銀四萬二百二十九兩零。米穀共一萬九千三百七十四石零。豆麥共三千七百八十四石零。又應緩徵銀四萬七千六百七十六兩零。本色米穀共二萬四百七十二石零。豆八千三百二十六石零。應緩徵乾隆九年分未完米穀共一萬四千七百九十八石零。豆四千八百八十石零。所有應蠲錢糧隨徵耗羨及應免糧石。隨徵運腳。均一體蠲免。至各州縣已完應免銀兩。准抵作乾隆十一年正賦。

其緩徵錢糧。於今歲麥熟徵收。均應如所請。從之。○兵部議准。浙江巡撫常安奏稱乍浦地方。通達外洋。為濱海要區。駐防滿兵一百六十名。又有熟練船務綠旗兵四百名。會同滿兵演習水操。一切營制事宜。俱照天津水師例辦理。此項綠旗兵丁。係由本省沿海各營抽撥前往。原以綠旗而占滿兵之缺。今滿兵駐防將及二十年。舟楫已能嫻熟。可無藉於漢兵之同操。而人丁家口。滋生日漸蕃衍。餉銀兵額。均有定制。未便議增。若照天津雇募水手之例。遽將漢兵發回。又恐各兵去伍失業。再四籌酌。請就綠旗兵四百名內。撥留二百名。仍歸叅將管轄。其餘二百名。俟有事故缺出。停其另募。即在滿兵餘丁內。挑選補用。從之。○廣東巡撫準泰奏。雷瓊道駐劄瓊州。與雷州隔越海洋。往來須候風汛。瓊郡地廣事繁。海嶠民性蠢愚。黎岐雜處。拊循稍有未當。轉滋驚擾。若令四季越海巡查。不特奔

走不遑。且恐顧此失彼。請照臺灣之例。每年巡查一次。至瓊屬崖州感恩陵水昌化四州縣。水土惡劣。瘴癘最甚。應令於每年冬月。道府挨年輪巡一次。其餘非烟瘴地方。令該道府一年各巡一次。得旨允行。下部知之。○甲辰。

上幸靜宜園駐蹕。○諭勵宗萬前在山西巡察任內。居官不謹。已經廢棄。蒙

皇考天恩。棄瑕錄用。至於大員。乾隆元年。朕簡用為侍郎。又因徇私濫舉。經部議革職。閑居數年。朕仍念其為大臣之後。復加恩用至今職。冀其改悔前愆。黽勉効力。今覽大學士等審訊沈文傑行賄作弊一案。內稱勵宗萬賂私未受。形跡顯然。而聽許之處。衆供確鑿。應將勵宗萬照例革職。杖一百。徒三年等語。朕細閱此案情節。現在實未得財。而知勵宗萬平日之為人。將來事後酬謝。伊斷無不收受之理。朕此諭旨。令勵宗萬捫心自問。不切中

其隱微乎。但朕思伊之所以敢於踰越規矩。不守官箴者。固勵宗萬之罪。而其間亦尚有故。蓋因朕前歲纂修秘殿珠林一書。張照、梁詩正薦勵宗萬等。在懋勤殿行走編輯。朕或召見。講論書籍。勵宗萬遂恃此虛張聲勢。縱放自恣。朕不曾早加誡飭。以致罹於罪愆。今勵宗萬縱容伊弟門客。招搖生事。受託行私。已犯革職之條。著革職。從寬免其杖徒。令回原籍。閉戶讀書。餘依議。秘殿珠林一書業已

告成。懋勤殿無庸多人。其張若靄、裘曰修亦不必在內。各回原處行走。○總管內務府大臣等奏。八旗公產地內。向有未經認買。以及存退餘絕地畝。於乾隆七年。戶部議定。凡內務府莊頭牲丁等。當差地畝瘠薄。應行換給。或賞給新滿洲。並撥補挖河占用等項。均在此內動撥。將存退餘絕等項地內。酌留一千頃。以為各案撥補之用。查此項地畝。未經撥用之前。仍係地方官收租徵解。官租為數既

輕。且不免土豪胥吏。包攬侵漁等弊。況自酌留以來。撥補僅數十頃。與其置之閒地。經理不得其宜。不若酌籌安置。以收實用。請將此項未撥地畝九百餘頃。照例全數安設莊頭。將來遇有應行撥用之處。即於各莊頭名下。按照數目指給。其應如何安設分給之處。并請勅部會同內務府。詳悉妥辦。從之。○以安徽巡撫魏定國。為刑部右侍郎。浙江布政使潘思榘。為安徽巡撫。直隸按察使王師為浙

江布政使。河南糧驛道胡紹芬。為直隸按察使。○旌表守正捐軀之直隸武強縣民劉玉河妻呂氏。○乙巳。

上還圓明園。○戶部議覆盛京戶部侍郎宗室蘊著奏稱。奉屬旗倉米石。於乾隆三年。直隸省奏准。採買五千七百餘石。共價銀三千一百四十兩零。於乾隆四年、十年。兩次買補米一千二百餘石。仍未買補米四千四百餘石。又乾隆六年。因義倉存米變色。咨部照時價

糴賣二千四百餘石。共價銀七百七十餘兩。節年米價昂貴。未經買補。去年奉天收成豐稔。米價平賤。請將前二項庫存銀。照時價採買米石。各按原數還倉。應如所請辦理。又盛京內倉收貯米石。連義倉現存。及應買之米。共二萬六千餘石。不敷兵丁三年之食。請動用節年糴賣米豆等項價銀。一萬三千餘兩。陸續購買米二萬六千餘石。連次年應收米。共得六萬餘石。以足倉儲。於地方久遠有濟。

平糶奏

查從前原任侍郎雙喜以內倉添支文員俸米。所收糧石。不敷支放。奏准將遼陽開原廣寧三城地畝。各移三萬晌。共交內倉米二千三百餘石。今內倉酌請購買米石。與其動項採買。莫若仿照改撥遼陽等處地米之例。就近在三城餘剩米內。酌量分撥。以免此糴彼糴之煩。但移撥祇為一時之計。其內倉每年餘剩。及義倉應徵外。實需添貯若干。應令該侍郎通盤查覈。定議奏辦。從之。○旌表守正

捐軀之河南商邱縣民張林妻李氏。○丙午。諭據大學士管川陝總督事慶復等奏報。四月十四日。官兵進剿。瞻對。連獲大勝。已克如郎。盡毀賊人巢穴。首逆班滾先分家口遠藏。本身乘暗潛逃。提臣李質粹即駐如郎大寨。查追班滾下落。發兵擒拏。並飭各路鎮兵。并各土司。嚴密查捕。不過如釜底游魂。自必計日就擒等語。亮番班滾窮兇肆虐。擾害地方。及遣官兵申討。輒敢抗拒王師。罪無可赦。今據大學士慶復奏報。官兵進剿。已直搗巢穴。渠魁班滾暫時逃匿。計日授首。從此邊地可以寧謐。慶復調度有方。紀山籌畫轉運。甚屬可嘉。著交部從優議敘。其提鎮諸臣。並官弁兵丁等。現在奮勇。不避險阻。直抵賊巢。亦屬可嘉。著交部亦從優議敘。其如何分別功過。覈定等次之處。著慶復查明具奏。善後事宜。亦令慶復酌看本地情形。詳悉妥議。一併奏聞。請旨。尋經兵部議。大學士公慶復巡撫紀

平糶奏

山應照例各加三級。得旨慶復著加太子太保。仍加三級。紀山著加三級。○又諭從前降旨令豫東二省各備麥十萬石運送直省分發借糴。今畿輔地方仰蒙

上天疊沛甘霖。秋禾徧插。糧價漸平。復經降旨截留漕糧四萬石存貯天津。足資接濟。而河南山東據報有春末雨水不足之州縣收成不無少減。朕廑念民瘼。三省均屬一體。其豫東二省豫備麥石均不必起運。如有購買者。

實錄卷一百六十六

六

即留於本處備用。該部遵諭速行。○諭軍機大臣等。進勦瞻對一事。自慶復到彼以來。實心整頓。克振軍威。今已直抵賊巢。首逆逃竄。計日可擒。甚屬可嘉。朕已降旨將慶復並任事官弁兵丁等從優議敘。其善後之計尤為緊要。必須加意籌畫萬全。朕思土番之地荒僻險遠。不但不可改為郡縣。即改設流官亦恐非其所宜。但目前平定之後。若漫無查察。任其復建碉樓。互相勾結。私放夾壩。搶奪行

旅為進藏兵民之害。則此番經理似覺徒勞。或於要隘之處暫撥官兵嚴加彈壓。其險峻之地不許建造碉樓。而官兵又可深入其地。不時稽查。使番眾無險可恃。庶故智不敢復萌。再照四川西寧各番之例。給以劄付號紙。設立頭目。使之管束眾番。不致滋事之處。可否如此辦理。大學士慶復現駐軍前。去如郎不遠。可親至彼地詳察情形。周詳籌算。務期佈置萬全。為一勞永逸之計。可詳悉定議。速奏請旨。並將現在交部議敘在事官弁之旨一併寄與知之。○丁未。

實錄卷一百六十六

七

上詣暢春園。問

皇太后安。○戊申。遣官祭

關帝廟。○吏部議准。署直隸河道總督劉於義奏稱。天津道屬子牙河通判駐劄大城縣。距所轄新築子牙河格淀長隄七十餘里。一經大汛。巡查防護。鞭長莫及。請將該通判衙門移駐適中之王家口地方。從之。○戶部議

覆。閩浙總督馬爾泰等議奏。布政使高山條奏臺地民番事宜。一。民墾番地。雖久經禁止。但不分別定罪。小民不知畏懼。請嗣後番地均聽各番自行耕種。如有奸民再墾。告發之日。將田歸番。私墾之民人。照盜耕種他人田地律。計畝治罪。荒田減一等。强者各加一等。若奸民潛入生番界內私墾者。照越渡緣邊關塞律治罪。一。番社地界。從前地方官原各查禁。而奸民不顧戕殺。每覲侵越。僅委佐雜微員。不足彈壓。應令地方官。於農隙親勘。傳同土目。通事。鄉保業戶。立表定界。統限一年內造冊報竣。一。臺地沿山二千餘里。到處皆有生番。若遍設汛防。臺兵不敷分撥。亦恐徒滋繁擾。請令該處營汛弁兵。各土目通事。加謹巡查。均應如所議辦理。至生番乘秋穿越林莽。出界戕殺。其迫近番地零星散處之莊民。該督等議令於秋冬移附近大莊居住。恐民情不便。應飭地方官善為勸諭。毋庸立定。

章程。其設法隄防之處。應如所議。令貼近生番莊社。各設望樓一。懸挂銅鑼。每樓分撥五人。晝夜巡邏。近社者派番。近莊者派民。十日一輪。各自保護。鄰莊有警。互相救援。倘有坐視不救者。即行究治。從之。○免甘肅靖遠安定。會寧三縣。乾隆十年旱災。蠲賦銀二千一百四十五兩有奇。額糧一千一百六十六石。額草共八百四十四束有奇。已酉。諭直隸慶雲縣土瘠民貧。連年荒歉。朕心深為軫念。多方籌畫。蠲賑頻施。以甦民困。惟是該縣當積歉之後。一時元氣難以驟復。必須大沛恩膏。俾小民永霑實惠。著將慶雲縣每年額徵地丁銀兩。蠲免十分之三。永著為例。該部即遵諭行。○又諭曰。三陵總管內務府大臣巴圖。年老。著原品休致。此缺著郎中蘇赫訥補授。蘇赫訥未到以前。著總兵官布蘭泰暫行署理。○諭軍機大臣等。前據那蘇圖於四月內奏稱鹽山。慶雲等。

處。四月初十。二十五等日。兩次得雨。俱未霑足等語。迄今該處曾否續得雨澤。及霑足與否。爾等傳諭那蘇圖。令其據實速奏。尋奏鹽慶寧三邑。自本月初五。至初十日。均先後報得透雨。四野霑足。得旨。欣悅覽之。○又諭前據喀爾吉善奏。稱武城。清平二邑。收成尚有六分。不致成災。惟是該二邑。於閏三月內。得雨稀少。收成究屬歉薄。量予接濟等語。朕聞武城沿途一帶地方。有貧民乞食者。麥收亦

實錄卷三百六十六

三

不及半。地方甚覺早象。爾等可傳諭詢問喀爾吉善。毋被屬員欺隱。致蹈諱災之咎。併此時雨水曾否霑足。地方官作何安插料理之處。令其將該處實在情形。速行奏聞。尋奏。四月中旬。武城一帶。原有直東貧民拾麥。嗣聞直東已得透雨。均陸續回籍。現在實無流移乞食者。五月初旬。武邑連得透雨。霑足。早禾暢茂。晚禾悉已種齊。其麥收歉薄。貧民已蒙借穀接濟。時雨普霑。輿情歡戴。至前報收成

六分。係經多員查勘出結。不致成災。似難欺隱。得旨。此語恐不實。汝再留心訪察奏聞。若屬員有諱災之意。即當妥辦。所奏目今情形。足慰朕懷。○以甘肅肅州鎮總兵官許仕盛署固原提督。洮岷協副將史宏蘊為肅州鎮總兵官。○調雲南鶴麗鎮總兵官康世顯為開化鎮總兵官。以貴州銅仁協副將溫朝宰為雲南鶴麗鎮總兵官。○庚戌。軍機大臣等議覆貴州總督兼管巡撫事張廣泗奏。稱內

實錄卷三百六十六

三

廷寄信。郵遞數千里。難免擦損。且恐沿途人役。私行拆閱。關係匪輕。請照吏部頒發文憑。用匣之制。以昭慎重。應如所請。嗣後奉旨密交各督撫事件。照吏部憑匣之制頒發。令於覆奏恭繳。其各省總督。向無憑匣鑰匙者。照式頒發一副。將軍。提鎮。藩臬。及欽差各員。一併給與。收存交代。其餘尋常封寄事件。令兵部通行各省。按站登號嚴查。從之。○又議覆大學士川陝總督公慶復奏。稱。大通界甘寧

之交。地最緊要。從前改鎮為協。議建四堡。嗣臣復有建築三角城之請。奉旨傳諭再行斟酌。查十餘年來。地方寧謐。邊人熙熙往來如一家。今於閒曠之地。建城設兵。或啓青海蒙古有意防範之疑。三角城建築之議。自應停止。惟令沿邊營弁。加謹遊巡。足資防範。至原議建堡之處。查白塔至大通。已屬聯絡。惟永安。大通。相隔甚遠。黑石頭灣一處。尚須建堡。即於該協營。派兵五十名巡防。應如所請。從之。○旌表守正捐軀之浙江仙居縣民張日和妻金氏。

實錄卷二百六十六

三十四

一

大清高宗法天隆運至誠先覺體元立極敷文奮武孝慈神聖純皇帝實錄卷之二百六十六

實錄卷二百六十六

三十五

大清高宗法天隆運至誠先覺體元立極敷文奮武孝慈神聖純皇帝實錄卷之二百六十七

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣等謹

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣等謹將內大臣戶部尚書鑲藍旗滿洲都統軍功紀錄五次

尋常紀錄十四次臣等謹將經筵講官太子少保工部尚書紀錄六次臣等謹將尋常

敕修

乾隆十一年丙寅五月辛亥諭軍機大臣等

實錄卷二百六十七

據工部議覆安徽巡撫魏定國估修徽州等處城垣一本內稱徽郡等處原估外雖有續坍應修之處所需銀兩不過少為加增何至續估銀一萬六千八百餘兩之多且徽郡城垣原估銀四千八百餘兩今續估銀四千九百餘兩較原估轉多其中不無浮冒之處應令該撫另行委員確勘大加核減等語朕已降旨依議魏定國平日待屬員失之過寬看此案續估之數較多於原估伊不加詳查即

行具題顯有被屬員朦混浮開情弊爾等可

傳諭潘思渠令其另委幹員據實確勘詳悉

查核題估外將伊查辦情節具摺奏聞○兵

部議准湖廣總督鄂彌達疏稱湖南長安營

新闢苗疆最為阨塞巡邏搜捕林密山深弓

箭籐牌皆難展其長技惟烏鎗摧堅陷銳涉

險憑高於苗疆最利原額照沿江沿海之例

每兵一千名設烏鎗四百桿不敷應用查算

永保靖各鎮協營均係苗疆重地前督臣邁

實錄卷二百六十七

柱題准每兵一千名設烏鎗六百桿今長安

地處四塞事同一揆該營廳標額兵一千名

除召募外其由各鎮協營抽撥兵丁皆有隨

帶之烏鎗通計已有五百七十餘桿請照算

永保靖營制增設六百桿從之○旌表守正

捐軀之河南寧陵縣民焦玉妻王氏○壬子

諭軍機大臣等段士英等採辦穆納山木植

一案年久未結皆因從前辦理此案查核未

明以致往返駁詰稽遲歲月使所存木植愈

加朽爛。今該部等議覆。仍令該撫將穆納山、大青山、砍運買運價銀。各半均分。及應行扣給賠抵之處。再行確查。並穆納山堆積木植。是否實在朽爛。俱令查明題覆。朕已降旨依議。此案已經十有餘年。至今未結。毋再遷延時日。可傳諭阿里衮。令其留心查察。遴委幹員。詳悉確查。務期此次完結。並將此案始末緣由。具簡明摺奏來。○浙江巡撫常安奏。奉到廷寄。直隸、江南、浙江等省。在京提塘。將不發抄之事件。抄寄該督撫等。似此行私報密。甚為淺陋。傳諭申飭到臣。臣才識短淺。不能據實查辦。罪無可逭。仰蒙寬宥。實深慚懼。得旨。此事尚不僅汝。故不罪耳。○管理出青副都統瑚畢圖等奏。兩翼出青馬駝。向由古北口。張家口往返。沿途俱係民田。並無牧場。路途遙遠。多需時日。請將此項馬駝。並上三旗內務府馬匹。改由獨石口往返。得旨。本年爾等試看一次。再行奏改章程。可將此旨令該

部知之。○癸丑。

上詣暢春園。問

皇太后安。○

上還宮。○甲寅。

上御乾清門聽政。○諭各省叅將。例應將軍督撫提臣。分別等次。五年舉行一次。送部引見。今屆舉行之期。除照定例舉行外。著各省將軍督撫提臣。於所屬叅將內。擇其可以勝副將之任者。秉公各保。具摺奏聞。將所保之員。酌量送部引見。以備朕之陸續委用。○諭軍機大臣等。從前降旨。令各省督撫提督。於所屬副將內。保舉可勝總兵之員。經各督撫等陸續保奏。朕俱調來引見。現在將次到齊。如江南河標副將葛世雄。陝西永昌副將和明。貴州遵義副將周廣。數人盡皆平常。非大材料。其餘所保。亦祇中平。並無卓犖之材。即其中。有朕簡用過數員。亦不過就伊等保舉人內。將就錄用。朕思總兵為將弁之表率。必實

在才具出衆者。方可勝任。爾等可傳諭各督提。及兼管提督之巡撫等。令於所屬之副將內。再行留心選擇。據實保舉。具摺奏聞。待朕降旨。○又諭。前有提塘串通軍機處寫字之人。將軍機處事件。抄寄該省督撫。朕降旨申飭。今據浙江巡撫常安覆奏前來。那蘇圖近在畿輔。道路匪遙。至今並未覆奏。著傳諭詢問之。尋奏。臣平日刻自勉勵。今提塘抄送偏報一事。未能即時察辦。愚昧之罪。幸邀寬宥。

實無可措詞覆奏。惟有檢身檢心。隨事省察。得旨覽。○諭大學士訥親。前據阿里衮奏。太原府屬之交城等處。勘明銅鉛等礦。俱與民間田舍邱墓。毫無妨礙。現令殷實礦商。雇夫開挖。查明附近里民。連環具結。一切外來游手。不得混雜其中。俟試採半年之後。果有成效。另行具題等語。朕以開礦固屬便民。而滋擾則不可。已於伊摺內批諭矣。但開礦一事。非本地有業之民所願。惟游手無賴之徒。藉

此獲利。聚集多人。往往易致滋事。爾可將此等情形。傳諭阿里衮知悉。令其遴委幹員。嚴加約束。並令其時刻留心。善為經理。勿致絲毫滋擾。再段士英等採辦穆納山木植一案。歷久未結。昨已寄諭阿里衮。令其速行查辦。在該部以事關錢糧。砍運價值數目。未能明晰。屢次駁查。往返駁詰。木植堆積歲久。日漸朽爛。終於錢糧無益。爾可一併傳諭阿里衮知之。○吏部議准。甘肅巡撫黃廷桂疏稱。鞏

糧通判。改為西寧府通判。駐劄擺羊戎地方。三清灣主簿。改為西寧縣主簿。駐劄丹噶爾地方。均經題准。欽遵在案。該通判主簿。均係駐劄口外。督課墾種。經收番糧。應作為部選之缺。鞏糧通判。原養廉銀六百兩。今移擺羊戎地方。請照柳林湖通判之例。增公費銀三百六十兩。丹噶爾主簿。仍照三清灣之例。給養廉銀二百兩。通判衙門。額設書吏四名。主簿衙門。額設書吏一名。該通判管理命盜等

案。應添設監獄。再擺羊戎。距郡城一百七十里。丹噶爾。距郡城九十里。山路崎嶇。往來文報。必資驛遞。應將碾伯縣之巴古驛夫二名。馬三匹。改設擺羊戎地方。於西寧。碾伯。二縣。撥夫四名。馬五匹。分設丹噶爾。及鎮海堡。二處。從之。○戶部議准。盛京戶部侍郎宗室蘊著奏稱。岫巖城八旗兵丁。去年所種地畝。雨水過多。收成歉薄。所買糶三米。至六七月間。已覺乏食。請照乾隆七年之例。於該城旗倉存貯米內。借給一千五百石。交城守尉。勻借兵丁。秋收後照數還倉。得旨。依議速行。○以工科給事中書山。為太僕寺卿。○以太常寺卿李世倬。為鑲紅旗漢軍副都統。○乙卯。上詣

大高殿行禮。○詣暢春園。問

皇太后安。○幸圓明園。○以右通政熊學鵬。為太僕寺卿。○丙辰。諭軍機大臣等。前據慶復奏報。四月十三日。攻克如郎。現在飛飭將弁。

搜擒班滾等語。迄今已越旬餘。未見奏報。不知此時曾否擒獲。現在軍營情形若何。今駐藏副都統傅清奏。據達賴喇嘛班禪額爾德尼頗羅鼎等。呈請遣使人等前往曉諭班滾。令其擒獻夾壩賊番。許以自新。撤回大兵等語。朕已批諭。不准所請。可將傳清原摺。並朕批示。一併抄錄。寄與慶復閱看。班滾係瞻對首逆。罪無可逭。今看達賴喇嘛。代為懇請寬宥情形。班滾與西藏自兵興以來。竟屬聲息相通。至事窮勢迫。計無所出。達賴喇嘛等。是以為之懇恩寬免。其素日暗相勾結之處。從前已失防範。伊等情意既相聯屬。則班滾勢窮。無路可逃。或竟潛竄入彼。私行藏匿。亦屬事之所有。可將此種情形。速行傳諭慶復。令其竭力堵拏。勿使免脫。若此番稍有疎虞。或致班滾漏網。朕惟於慶復是問。再將來善後事宜。已屢諭慶復矣。今既有此情形。又不僅如向之所辦。即可謂了事。可並諭慶復。務須

加意籌畫。詳慎辦理。尋奏查西南一帶土司。崇奉藏喇嘛。熬茶供獻。達賴喇嘛。代班滾求情。尚無足怪。頗羅鼎亦為轉懇。殊屬愚妄。去臘江卡兵。從南路馬良柱。進攻下曲工。路險雪深。冷宗鼎帶兵逃歸。迨續派江卡兵前來。藉端遷延。直至如郎既破。始報到營。茲頗羅鼎又代求情。前後情意顯然。惟念西藏界距準夷。事體重大。

皇上如天之量。自可優容。瞻對距藏四千餘里。班滾勢窮。前往藏匿。亦不可不豫防。已塘裏塘。為通藏要路。欲通聲息。舍此不能飛越。臣條議善後。請專設土兵三百名。以聯站兵聲勢。今奉指示。尤當竭力妥辦。為久遠防範之計。得旨覽奏俱悉。○又諭。據駐藏辦事副都統傅清。轉遞達賴喇嘛。頗羅鼎等。奏請寬宥。瞻對逆匪班滾之罪一摺。逆賊班滾玩法。顯肆攘奪。抗拒官兵。悖逆之罪。國法難追。為中外所共知。今賊勢大敗。班滾隻身逃避。巢穴

俱毀。早晚即當就擒。達賴喇嘛。頗羅鼎等。必平日彼此通信。始為班滾乞恩具奏。似此代叛國賊。匪奏請之事。傳清理宜不接。伊等如再三求告。謂恐壓擱其事。始可據情轉為陳奏。乃傳清率爾接摺代奏。甚屬糊塗。不知大體。況令伊駐藏。原於照料之中。寓以防守之意。今逆賊班滾。與藏人彼此關通信息。伊豈不知之。伊既明知。又代為轉奏。罪即不赦。若云竟不知曉。又奚用伊在彼駐劄為耶。今班滾勢窮。往求於藏。達賴喇嘛等。容留潛匿。事所必有。傳清既有兵五百名。務須留心。詳細查拏。倘有疎忽。使賊赴藏。復致遠颺。即將傳清在彼正法。斷不寬貸。著迅速發往。將傳清嚴行申飭。○又諭戶部侍郎傅恒。札寄汝兄傳清知悉。所以令伊駐藏辦事者。一則為照料地方。再則為欲知彼處情形消息。伊陛辭時。朕曾如何訓諭。自伊到彼以來。於應奏之事。並未具奏。不應奏之事。妄行具奏。如達賴

喇嘛頗羅鼎等。為瞻對逆賊班滾乞恩一事。伊原不應接受。即或接摺。亦應據情奏明請旨。伊乃如此冒昧具奏。朕已降旨申飭矣。再伊陛辭時。朕曾降旨訓諭。以朕屢年加恩於藏人者甚重。不知伊等情景如何。再準噶爾熬茶人等到彼。皆給衆喇嘛布施。伊等抑或欣悅。抑或企望。衆論如何。逐一詳悉訪詢。據實奏聞。迄今二載。未據陳奏。朕所諭之事。並未留心辦理。現在領兵在彼駐劄。倘或賊匪班滾潛逃赴藏。伊若不能督兵拏獲。將伊即在該處正法。將此寄諭知之。○丁巳。山東巡撫喀爾吉善奏。臨清營副將徐大成廢弛營伍。叅革遺缺。請旨簡放。得旨。此案固屬汝整飭營伍之意。然全營叅革。亦屬太過苛矣。以後戒之。至此事有旨諭部。諭曰。山東臨清營副將員缺。著該部將應用副將人員。揀選帶領引見。候朕簡用。○旌表守正捐軀之河南孟縣民毛永泰妻楊氏。○戊午。

孝恭仁皇后忌辰。遣官祭

景陵。○諭直隸通省。今年地丁錢糧。已全行蠲免。其慶雲鹽山二縣。本年應徵電課銀。例不在蠲免之內。朕念該二縣當積歉之後。屢次加恩。今雖得透雨。但收成尚難懸定。若此項電課銀兩。照例按期催納。民力未免拮据。著將慶雲鹽山二縣。本年應徵電課。暫緩徵納。俟秋收豐稔。該督奏明開徵。該部即遵諭行。○又諭。據尹繼善奏稱。江南上江之靈璧。下江之銅山。沛縣。睢寧。沐陽。蕭縣。於四月初八十三等日。間有被雹之處。打傷二麥秋禾。已委員確勘。照例出借口糧。並借給籽種。令其及時補種。以望有秋等語。朕思靈璧等六縣。皆係上年成災之處。今復被雹。實堪憫惻。若所借口糧。秋收後仍令完納。民力未免艱難。著將現今出借一月口糧。作為撫恤。免其償還。該部即傳諭該督撫知之。○諭軍機大臣等。有人奏稱。猛緬新改土歸流。但滇黔等省。

新開苗疆。武弁等往往喜於滋事。以為邀功上進之階。從前滇省之烏蒙。改流之後而復叛。黔省之古州。歸化之後而復反。其啟衅皆由於此。可為猛緬前車之戒也。事端一開。不得中止。國家廩帑。半為空虛。而所開拓之疆土。尚未有寸絲斗粟。以供地方之用。徒為武弁等梯榮冒功之捷徑耳。請勅下該督。凡一切分防駐劄。設汛安營。稽查匪類諸事宜。務選老成持重之人。勿取少年喜事之輩。庶可綏輯境土。鎮服夷情。不致苗民反側。以啟他日紛擾之漸等語。武弁好事喜功。亦屬有之。爾等可將此傳諭張允隨。張廣泗。令其留心辦理。○鑲紅旗漢軍副都統張鳳翔故。賜祭如例。○己未。諭據安徽巡撫魏定國奏稱。鳳。潁。泗。三府屬。上年夏秋被災。去冬今春。有借給口糧籽種等項。應於本年麥熟及秋收後歸還。但查此三府屬。尚有乾隆六七兩年借給未還各項。前奉恩旨。於丙寅戊辰年分完。

是本年已有應徵借領之項。若再加以去冬今春所借。一併徵還。積困窮民。實難完納。仰懇聖恩。緩至己巳。庚午。兩年分徵還項等語。著准其所請。將鳳。潁。泗。三屬。去冬今春借項。均緩至己巳。庚午。兩年分還。以紓民力。該部即傳諭該督撫知之。○又諭江南上江之鳳。潁。泗。三屬。上年被災各州縣衛。已加恩蠲賑頻施。今春又降旨分別加賑。今當麥收之後。所有舊欠錢糧。例應催徵完納。從前降旨宿州等州縣舊欠錢糧。俟年歲屢豐後帶徵。鳳陽等州縣衛。舊欠錢糧。俟六七八等年民欠全完之後。起限徵收。但念宿州。鳳陽。臨淮。懷遠。虹縣。靈璧。鳳臺。阜陽。潁上。亳州。蒙城。太和。泗州。盱眙。五河。霍邱等十六州縣。並鳳陽。鳳中。長淮。宿州等四衛。皆六七等年連被災侵之區。上年又值歉收。若帶徵積年舊欠。民力未免拮据。所有宿州等二十州縣衛。今年麥收後。著只帶徵十年一年未完之項。其六年

起至九年舊欠。均緩至戊辰年起。分年帶納。其霍邱縣五年以前舊欠。亦著俟六七八等年舊欠徵完之後。再行啟徵。該部即遵諭行。○諭軍機大臣等。據廣東高廉道甘士琇奏。貴州貴陽府所轄白納。中曹。養龍。虎墜。四土司額田。一萬一千二百餘畝。應徵條銀內。改徵本色米一千二百四十餘石。查此項米石。原係徵銀。乾隆三四年間。苗疆添設兵丁。口糧不敷。因議改徵米石。但貴陽所管各土司地方。山路崎嶇。每一人止可負米三斗有餘。上納殊為艱辛。今新疆台拱與湖南沅州接壤。古州與廣西慶遠接壤。節年採買米石。俱足支放兵糧。而貴陽議改之米。但貯府倉。不須撥用。若將此項米石。仍照舊例改徵銀兩。則窮民易於完納等語。貴陽所屬白納等土司額田。向係徵納條銀。今改徵米石。輓運艱難。甘士琇如此陳奏。爾等可傳諭詢問張廣泗。果否如此情形。此項米石。應否仍照舊例

改徵銀兩之處。令其確查。據實奏聞。○旌表守正捐軀之河南尉氏縣民馬受。有妻王氏。○庚申。諭刑部奏浙江兵丁夥刦。該管武弁在都探問行賄。請將在京各犯。勅交該省督撫等提齊一千官犯。研審確情。按律定擬等語。營兵為盜。該管之武弁。現在鑽營行賄。冀免重處。而該撫等審擬。竟以營員訪拏具題。事關武弁營私。通同行賄。馬爾泰甫自浙回閩。不必令其復來。此案著交與江蘇學政崔紀。布政使安寧。前往浙江。秉公確審。定擬具奏。所有刑部奏摺。鄒鈐等私書四件。一併封發。○諭軍機大臣等。浙江兵丁夥刦。該管武弁等。在都探問行賄一案。現交崔紀。安寧。前往審理。從前審訊盧焯一案。辦理未甚妥協。以致地方不能安靜。物議紛紛。今伊等亦前往該處審理。而此案內事關武職多員。並提標外委。以及各犯。提審多人。伊等務須安靜妥協辦理。毋致滋事。再此案夥刦。乃提督陳

倫炯任內之事。且俱係提督親標兵丁。今該撫等審題為營員拏獲。似有代為該提督及營弁等開脫情節。可傳諭崔紀安寧。令其詳細查辦。秉公確審。○調雲南永順鎮總兵官張聖學。為普洱鎮總兵官。以雲南督標中軍副將黃士俊。為永順鎮總兵官。○辛酉。上詣暢春園。問

皇太后安。○吏部議覆御史歐堪善奏稱。州縣事務殷繁。即殫日勤勉。尚恐精力不繼。若日事奔走。欲其從容奏績難矣。向來附省州縣。每日趨謁各上司。以請安為名。自辰至申。竟無寧晷。號為才能。而迂謹之士。留心民瘼。罔知逢迎者。或不免因此獲咎。竊思地方如有緊要公務。在州縣原可隨時面稟。該上司亦可傳入署中。因端指示。何必每日趨謁。無益荒政。請勅下各督撫轉飭司道府。嗣後附省及附府州縣。不得無事日赴上司衙門謁見。倘督撫不嚴行禁止。一經訪聞。即行指叅議

處等語。查州縣官非公事謁見上司。著有嚴例。督撫不行禁止。瞻徇隱匿。俱有應得處分。但恐日久懈弛。在督撫身任封疆。察吏是其首務。雖不盡以趨謁迎合之員。號為才能。而省會官員。或上司利其便於傳見。屬員守候需時。於自辦公務。未必不致荒廢。應如所奏。勅令各督撫嚴飭屬員。非地方公務。不得無事趨謁。以致徇私誤公。從之。○調福建海壇鎮總兵官陳汝鏐。為臺灣鎮總兵官。河南南陽鎮總兵官哈攀龍。為福建海壇鎮總兵官。○旌表守正捐軀之江蘇丹陽縣民朱柏先妻貢氏。○壬戌。鑄給山東東昌府清軍水利督捕監兌同知關防。從巡撫喀爾吉善請也。○癸亥。旌表守正捐軀之廣東始興縣民林觀養妻劉氏。○甲子。諭。朕特行赦宥之典。將刑部及各省已經結案人犯。令大學士會同該部。酌量案情請旨。分別減等發落。軍流徒杖以下人犯。一併分晰減等完結。後經大學

士等將已經定案者分別查辦。其各省審題案件經法司衙門駁詰尚未題覆者。凡自乾隆十一年正月初三日以前。羈禁人犯仍准於該督撫定案之日分別減等。惟是外省人犯該督撫審題。法司駁查者。既得邀恩。而在外督撫駁查未結者。其犯罪羈禁年月同在恩旨以前。亦應一體霽恩。著將在外督撫駁查未結各案。及恩旨以前已經督撫定案尚未題達者。自乾隆十一年正月初三日以前俱令刑部查明。仍著大學士會同該部分別減免請旨。其各省所有尚未具題之案。著該督撫於題本內將事在恩旨以前之處聲明。法司隨本分別請旨。○諭軍機大臣等。浙江兵丁為盜一案。係乾隆九年十一月內行劫。至十年六月拏獲。及拏獲之後。至今又將一載。該撫始行審擬具題。甚屬日久。其因何不行按限具題。以至遲延若此。可傳諭詢問。常安令其具摺奏聞。尋奏查承辦盜案。例於獲

犯後扣限一年。審擬具奏。但事關營兵夥劫。案情重大。自應速行審結。此案於乾隆十年六月拏獲營兵沈光耀等一十二人。追起原贓。因文武詳稟互異。經督臣馬爾泰於九月間將草率飾混之慈谿縣知縣倪知本糾叅。飭將各犯提省。委員會審。經府司覆審轉詳。於本年閏三月招解到臣。隨親提審訊。於四月初七日具題。因尚未逾一年之限。是以未行附叅。得旨知道了。此案汝不能免瞻顧之習。非朕任使之意也。○又諭。據鄂彌達奏稱。陝西西寧等處住居之喀什噶爾各處回民。於康熙五十四年以前陸續來西寧貿易者。共有百十餘人。自五十四年大兵駐劄阻住。不能各回本處。俱留居內地。數十年來。除病故並往西藏貿易未回外。現在尚有三十人。臣在陝時見其流離失所。竟有沿途求乞者。曾奏請每人給土房二間。耕具一副。並籽種口糧。共需銀五十兩。統計三十戶。需銀一千

五百兩。於公項內動給。嗣臣離任。未竟其事。等語。此係鄂彌達任內之事。今已隔數年。不知該督撫如何安插辦理。現在所存者。尚有幾戶。爾等可傳諭詢問。慶復令其查明具奏。○刑部等衙門奏。雲南總督兼管巡撫事張允隨題。李文貴毆死胞兄李文遠一案。刑部等衙門將李文貴依弟毆胞兄致死律。擬斬立決具題。又據御史宜兆熙等後議。以此案李文遠之傷。俱由自行挫跌。及奪爬所致。情節顯然。究與實在弟毆胞兄者有間。可否量為末減。得旨。此案著九卿定議具奏。弟毆胞兄致死。例應斬決。三法司照例定擬。原未差謬。所以重人倫也。然立決案件。具題時皆三覆奏。其中情節稍有一綫可原者。朕必交九卿定議。以期至當。向似此等改從監候者。不知凡幾。御史等宜無不知。即此案稍涉疑似。部堂兩議。而御史亦各從而列名於後。未為不可。今乃部堂御史各分門戶。置定例於不

問。而伊等即行另議。改為監候。於理甚屬不合。況從前因伊等兩議具奏。屢經降旨訓飭。乃伊等並不遵旨奉行。非無心錯誤。可比。此風斷不可長。著將後議之御史等。交部嚴察議奏。○是月。直隸總督那蘇圖奏。直隸鹽慶寧三邑。已沛甘霖。農民乘雨佈種。得借籽粒。收穫。歡聲遍野。其各府屬。已種禾黍等項。值此透長之際。均霑雨澤。尤為得益。糧麥各價平減。臣飭令各屬停止平糶。為下半年青黃不接之備。四月中暑氣頗盛。民間多有時疾。諭令各屬製捨丹藥。及於涼亭多備痧藥。涼漿。以救暑疾。並勸諭農民。田功稍暇。搜滅蝻種。得旨。好諸凡留心。朕所嘉許。但須實力行之耳。○又奏。烟郊。白澗。桃花寺。隆福寺。四處行宮。外圍添設千總一員。外委四員。帶兵七十六名。攜眷長駐。內圍兵丁奉旨。每名賞搬家銀五兩。其外圍兵丁。未經議入。請於藩庫內借給。兩個月俸餉。得旨。外圍雖不比內圍。

每兵亦賞給三兩。其如何辦理坐扣處。另議奏聞。○又奏薊州玉田河水漫溢。設法疏洩堵築。並查明被水村莊。捐銀撫恤。得旨覽奏俱悉。加意撫恤。毋致失所可也。○兩江總督尹繼善等奏請動項挑掘坍山崖土。免致頽卸。壅塞運河。得旨應興修者。照例辦理可也。

○江蘇巡撫陳大受奏蘇太所屬愚民傳習燃燈教。現據拏獲寶山太倉等處民人王徐氏男婦各犯。審訊屬實。除將供出傳教之疑

山道人等。嚴拏務獲外。查各犯目下雖止託名燒香禮懺。經文亦不過尋常勸世之語。然防微杜漸。誠不可忽。且江蘇濱海地方。防範尤宜嚴密。得旨所見是。亦不止是。當時常留心。除此惡習。以靖閭閻。○署理江南河道總督顧琮奏報查閱淮徐一帶。黃河兩岸工程。遵旨查明。不應做工之曹家莊等處埽工。飭令該道廳等。分別應停應築。詳晰查辦。又改挑蔣家營倒勾引河。並於各工淤灘切坡。以

免大汎生工。得旨伏秋汎正臨。深慮汝遲疑迂執。致誤事機。一切勉力為之。○署兩淮鹽政吉慶奏。兩淮鹽法誌一書。自雍正六年纂輯後。已閱十八年。所有引目場竈各事宜。增損興革不同。應請急為編纂。得旨知道了。○閩浙總督馬爾泰奏。浙東營制漸弛。寧郡營兵。甚至相率為盜。台協等處亦多私販。臣擬先往寧紹一帶。查閱營伍。帶便察看民情。再赴溫台等府。分別操閱水陸營汛。得旨覽奏俱悉。浙省採生一案。常安所辦甚覺過寬。聞其有勾通兵役。謀為不軌之事。卿宜留心細察。據實奏聞。○浙江巡撫常安奏。准戶部咨查北新關應徵乾隆十年盈餘銀。四萬六千八百九十餘兩。因何較上年短少一萬三千八百五十餘兩之處。臣查嚴衢一帶。上年秋冬久晴。溪水淺涸。商販阻滯。稅虧並無別情。得旨此等竟成鐵板公案矣。另行詳查具奏。○福建巡撫周學健奏。據福寧府知府董啟

祚稟報該屬福安縣境內崇奉天主教者甚多。竟有西洋夷人在彼傳習。當即密遣臣標弁兵會同該府鎮等嚴密查拏。據獲到夷人費若用堂主陳廷柱等男婦各犯。並搜出畫像經卷等件。嚴審辦理。得旨。辦理甚妥。知道了。董啟祚尚能如此留心。亦屬可嘉也。其人究如何。○湖北巡撫開泰奏楚北風土卑濕。入夏以後。炎威酷烈。各屬解審案犯。於烈日炎蒸中。桎梏趨行。情殊可憫。應將尋常案犯。照盛暑停遣之例。暫緩解審。得旨。此見所謂好行小惠也。楚北雖炎暑酷蒸。豈尚烈於閩粵乎。且汝未到任之前。數十年之人犯。又何以當之。況易完不完。彼其有公事而待於本地者。轉不若一至省而速了之為愈也。再楚省之人。自習楚省之熱而不為苦。亦如黑龍江之人。自習黑龍江之冷而不為憂。想汝旗人。未經南方之熱。故為是言耶。此皆拘墟而不達時務。莫若遵照定例。矜恤本意。固不在

此。因汝尚可教導。故偶及之。○又奏。湖北民田。最資塘堰灌溉。愚民往往任其淤墊。日久荒湮。竟有改田種穀。希圖升斗者。應將各處所有塘堰。令業戶等各乘農隙。次第修濬。得旨。此見甚是。而正實力行之。○湖南巡撫楊錫紱。貴州布政使愛必達。奏覆會審原叅長沙府知府葉建封。為考場提調。於已獲代倩傳遞之生童王邦畿等案。並不按例究視。僅予責逐。且署旁一任棍徒吵鬧倒賊。毫無聞見。應照溺職例革職。其原叅學政汪師韓。失察家人收受門包。票取硃油紙張。應降二級調用。臣楊錫紱。未能查出叅奏。並請議處。得旨。覽。不能查出。非楊錫紱之罪。而有意兩可調停。及奉朕交查辦。而尚敢瞻徇。則是汝向來好名習氣。以為得計。而反失計者也。以是問汝。汝其何辭以對。○湖南巡撫楊錫紱。奏請將臣標現存廢壞腰刀。刷刀。烏鎗。百子礮等項。鎔鐵變價。改鑄威遠礮十位。令臣標兵

丁學習施放。查臣標刷刀兵。所習縱跳砍扎之技。與弓箭鳥鎗較易。儘有餘功。可兼演礮。得旨。總在實力。不在虛言。又批。此皆書生不識事機之語。技豈有難易乎。精益求精。易者亦難。苟且了事。難者亦易。凡事無不如此。今令滿洲習刷刀。彼必以為弓箭易而刷刀難矣。○湖南布政使徐杞奏。報長沙等屬被水情形。請酌借籽種口糧。分別動項賑卹。得旨。雖屬偏災。亦應會商撫臣。加意撫恤。料理毋致失所也。○山東巡撫喀爾吉善奏。濟南武定等府所屬之德州等十州縣。被旱歉收。又青州府屬壽光縣。被水村莊。田禾間有衝坍淹損之處。當即委員查勘。尚俱不致成災。應分別酌借口糧。量為撫恤。得旨。覽奏俱悉。雖云不致成災。其一切接濟撫恤之方。當加意料理。庶小民稍得霑實惠耳。○山西巡撫阿里衮覆奏。段士英等採辦穆納山木植一案。查口外大青山。與穆納山。同產木植。大青山

准商出賃砍伐。穆納山久奉封禁。乾隆元年。綏遠城興建城工。衙署營房。於穆納山招商砍運。後因黃河凍結。令該商段士英等就近在大青山買用。是以穆納山存剩木植。二十八萬有餘。乾隆四年。前撫臣石麟議定。運至托克托城等處。招商購買。仍給砍價。後經拏獲陳養溥等。偷運木植。將陳養溥擬罪。木植入官。招商孫旺等認買。續查出穆納山存剩木植甚多。將工商段士英等陸續私賣木板。入已價銀。照數監追。數載未繳。嗣奉旨交臣等審擬。臣等以段士英私賣木植銀。係奉官採辦。原有應得之砍運各價。自當酌給。以抵應追之數。餘銀再行著追。至所稱趕辦城工木料。俱從大青山購運。腳價未給。部議按依大青穆納兩山。各半均分。酌給扣抵。又該商運至托克托城河口。木植私賣銀。臣等議給砍運價外。餘銀追繳。部議原價太少。令再確查。此段士英應追銀兩。盈千累萬。未完之由

也。至招商孫旺等認買木植。並無朽爛。現委員作速會辦。其穆納山餘剩木植十三萬六千零。業飭另行招買。並委員前往確查。有無朽爛。據實題報。此案延今十餘載。文牘紛繁。臣等遵旨趕緊辦理。不敢稽遲。得旨。此事汝所辦殊屬寬縱。汝固無他。屬員中必有作弊者。可留心。又批。既盈千累萬。何不派員查封其家產。將來定案時。餘者給還。而任其展轉延挨耶。○四川巡撫紀山奏審訊江油縣奸民吳守忠。據供向在該處金光洞修行。學習降神咒。後因哄騙彭章等修廟開礦。起意招人。將廠內舊鐵器。雇匠打造刀戟鎗矛等項。要搶劫新都地方。旋因出首被拏。彭章等供亦相符。俟司道等解審後。臣即當確訊辦理。得旨。速行審明正法。以快人心。即平時類此者。仍應常為訪察緝拏。毋致滋事可也。○四川布政使李如蘭奏軍務告竣在即。節次動用軍糧。計碾運各屬倉穀七萬石。為數頗多。

川省本年收成豐稔。捐監民人亦甚踴躍。請將前項穀。仍收捐監穀補額。毋庸動項買補。得旨。所見亦是。與撫臣議行。○兩廣總督策楞奏。安南匪徒莫康武等。為番兵所敗。領男婦數千人。在七源夷州居住。日事搶掠。臣現飭各邊悉心防範。嚴禁米糧出口。再廣西寧明州所轄之五十三村土蠻。歸化未久。本年三月內。因役田爭競。有黃文珍等。竟將隣寨之林文松捉回。用木刻傳人。立時殺死。并將其子林德昭。綁縛勒贖。不許報官。臣以該土蠻既經向化。即屬朝廷百姓。何可聽其自相讐殺。隨經勒限查拏。茲已據該地方文武。拏獲首犯黃文珍。其林德昭亦經放出。得旨。如此認真。實合朕意。○署廣西巡撫鄂昌奏。桂林所屬之臨桂等縣。被水災區。查勘照例賑卹。並分別極次貧戶。酌借口糧。其衝壞民房堰壩。俱酌給公費修治。得旨。覽奏俱悉。粵西遠在邊陲。一切水旱賑恤。必待奏報而後施。

行。則緩不及矣。汝等封疆大吏。但無沽恩市譽之心。何妨擔當辦理。使澤必下逮。惠不久稽。可耳。○貴州總督兼管巡撫事張廣泗奏。拏獲大乘教逆犯魏王氏。唐世勲等。男婦一百四十餘名口。搜獲與首逆張曉。劉奇來往密札。格簿赦帖。又據魏王氏之徒弟鄧光熙。呈首妖書等項。審訊該犯等傳習邪教。創立種種名目。陰謀不軌。黨羽衆多。請敕下川。滇。湖廣。江南等省。嚴密訪拏。毋致漏網。得旨。此所辦。可嘉之外。無可批諭。有卿在黔省。雖百妖人邪教。亦能查拏。實可令朕無南顧之憂也。

實錄卷二百六十七

三十一

大清高宗法天隆運至誠先覺體元立極敷文奮武孝慈神聖純皇帝實錄卷之二百六十七

實錄卷二百六十七

三十一

大清高宗法天隆運至誠先覺體元立極敷文奮武孝慈神聖純皇帝實錄卷之二百六十八

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級重誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十一年丙寅六月乙丑朔吏部月選正

備官引見得旨擬備知縣原為扣除遺缺之

用今按班擬備之內即有年力衰庸應以教

職改補者非擬備本意矣嗣後著吏部九卿

於驗看時亦一併甄別帶領引見聲明請旨

其擬備人數仍挨班豫備足額候朕簡用○

吏部議准浙江巡撫常安疏稱浙省沿海州

縣各缺定例三年俸滿即准保題陞用但不

分晰有無實效惟以缺為憑未為允協請嗣

後浙省沿海各屬亦照山東之例三年中教

養實有成效政績卓越可考者方准題陞若無即照舉人借補鹽庫大使循分供職之例咨部停其報滿與腹地州縣較俸陞轉從之

○丙寅

上詣暢春園問

皇太后安○諭九月初十日朕奉

皇太后恭謁

泰陵即由易州前往五臺所有應行豫備事宜

著傳諭各該衙門照例豫備○又諭今日景

運門護軍統領法丑參奏拏獲

壽康宮蘇拉腰藏緞子兩匹出門稱係

壽康宮太監王瑞官緞既係官緞即應向故事

房與景運門給票因何暗藏出門爾等太監

不知大體何苦無端干犯功令著傳與各處

太監嗣後凡官物出門俱向敬事房景運門

給票照驗若官物不明出即同偷盜著將

壽康宮總管議罪○大學士川陝總督公慶復

奏報會同欽差大臣班第努三提臣李質粹

等進攻了魯泥日寨。生擒賊番塔巴四交。訊明班滾現藏匿寨內。漏夜催兵攻撲。施放地雷。連燒大小戰碉五十餘座。燒斃賊番男婦七八百人。逆酋班滾并泥日寨頭目姜錯太等。俱經燒斃碉內。隨傳訊各寨番人。僉稱班滾實係燒斃。並未逃出。現仍飭各鎮將弁。並附近土司。嚴密訪拏。其沙加邦丹批等。向為惡黨。亦宜設法勦捕。不使稍留餘孽。此外番衆。俱各畏威投誠。不日即可蕆事。得旨。此賊甚狡猾。尚應留心踪跡。語云。適百里者半九十。里。言收局之應慎重者也。今如此。亦可謂之成功。但彼既與藏中暗通信息。保其不設計逃往乎。卿其速行留心訪查辦理。若將來班滾復出。此局何以了之。○欽差大臣兵部尚書班第等奏。臣等於四月十四日至軍營。遂赴班滾所居如郎寨。彼時班滾與伊弟惡木勞丁。攜妻子逃脫。臣等詢土守備汪結。並新降之班滾弟俄木丁等。班滾逃往何處。有

無潛身處所。據稱班滾母舅沙加邦。並伊妻兄姜錯太。俱在了魯地方居住。今班滾勢必逃往彼處。此外斷無可逃之處等語。臣即同提督李質粹帶領官兵。於二十日追至了魯地方。將大小碉樓四十餘座。全行燒燬。碉內所居男婦老幼。俱被火燒。一人未能逃脫。臣等誠恐逆酋班滾詭詐多端。乘黃夜雨霧之便。又復逃脫。當遣官兵四處詰詢。土人俱云班滾實係燒死。再四訪查無異。此皆仰賴天威。將賊首等全行撲滅。軍務蒞竣。臣等帶領官兵。即日回京報聞。○丁卯諭此番征勦瞻對。四川各土司率領番衆。承辦軍糧。催雇烏拉。莫不踴躍從事。將及一載。急公趨義。甚屬可嘉。該土司等本年應納貢賦。已經普免。今軍務告竣。著再加恩。將打箭爐口內外効力之各部番衆。應納貢賦。再行蠲免二年。以示優卹勤勞之意。該部即遵諭行。○諭軍機大臣等。前經降旨。瞻對首逆班滾。倘逃竄赴

藏著副都統傅清緝拏務獲。茲據總督慶復奏報官兵進逼賊巢。不分晝夜奮勇攻擊。將賊匪巢穴全行攻克等語。但念賊匪班滾素與藏內人等彼此交通。有往返致信情事。今窮蹙竄奔該處。或隱匿容留。均未可定。著迅速札寄傅清於賊匪遁藏一帶道路。分遣妥幹人員各處詳加訪查。倘有確信。即一面擒拏解京。一面奏聞。不可輕忽。○又諭據大學士慶復奏稱。四月二十日官兵到了魯圍攻泥日寨。至二十三日夜一更時分。齊撲碉下。直衝碉門。劈開挖孔。施放地雷。連燒碉樓。賊番盡行燒斃。雖犬無存。班滾及伊家口並惡木勞丁姜錯太等一齊燒斃等語。看此奏瞻對一事。業已成功矣。雖未拏獲班滾。明正典刑。若果係燒斃。亦與正法無異。但據報燒死情形。尚有可疑之處。班滾係衆酋頭目。危急之際。未必即坐以待斃。其潛逃藏匿。自必有之事。即使燒斃。想其形跡亦必與衆人不同。

實錄卷一百六

五

實錄卷一百六

五

斷無俱成灰燼。不可辨識之理。又據俄木丁等回稟訪聞。班滾於四月十四日逃赴沙加邦家。住過三天。姜錯太以沙加邦寨小。難以久匿。暗為接赴伊寨藏匿。大兵圍困。四面攻打。班滾實在燒死。我等情願出結。又稱沙加邦與丹批等向為惡黨。亦經檄飭速為設法查捕。務盡根株。不使稍留餘孽等語。奏內止稱設法查捕惡黨餘孽。並未查及班滾實在曾到沙加邦寨與否。又係何日逃至泥日寨。此種亦未根究。又據奏投誠各番咸供班滾逃往姜錯太家。官兵圍攻。並未逃出事屬可信。惟是班滾家口不止數人。豈能概為攜帶。自必另有潛匿。現飭各鎮嚴拏等語。班滾家口既可以潛逃。而班滾狡猾異常。反不為逃生之計乎。以上種種可疑情節。慶復不應遽信為確然。現在瞻對業已勦撫。官兵自應陸續滅徹。惟班滾渠魁斷不可容其漏網。倘稍有疎虞。遊魂未盡。則此番用兵。何能免收功

不慎之譏耶。可密傳諭與慶復務必留心踪跡。毋留遺孽。毋墮擒計。至於善後事宜。最關緊要。衆番總恃碉樓為負隅之計。此次我兵攻打亦甚費力。其未經勦焚之各寨。自不便令其拆燬。若既燬之碉樓。任其復行建造。則將來伊等故智復萌。未必不又恃此為三窟也。從前業已降旨。令慶復親至彼地。籌畫定議。今可速行再寄諭與慶復。如何布置。不使復建碉樓。而衆番又得棲身安業。詳看彼地情形。妥協辦理。以期萬全。尋奏臣初聞班滾燒斃並無確據。不敢遽信。是以遲至半月。尚未奏報。迨各降番等細向各寨躡探無蹤。而漢土官兵暨遠近番衆萬口一辭。歌呼稱慶。臣見此光景。班滾燒斃似屬實情。且山箐崎嶇。捕空窮迫。勢有所難。是時各路輕齎之糧。不及十餘日。不得不乘勢捲徹。以收大局。留兵四千。辦理善後。恐事竣留兵全撤。魑魅露形。亦事理所或有。故但聲言查拏家口。而密

令汪結陰為察訪。汪結與瞻對仇讐。誓以必殺。班滾為事。又令各土目分佈瞻地。復使隣近土司分其地勢。即使班滾復出。臣可保汪結等必能擒殺。是以專屬汪結以備意外。至班滾危急。必無坐以待斃之理。緣是時四路兵力齊集。班滾猝不及逃。以致圍困燒斃。并據俄木丁等認出班滾隨身烏鎗銅碗等物件。但以數千人圍燒碉寨。大火數日。賊衆俱成灰燼。實難辨識。識其碉樓一節。臣已列入善後條內。不敢草率了事。得旨覽奏俱悉。吏部議覆雲南總督兼管巡撫事張允隨疏稱。元江府知事并東川府移駐木欺古之則。補巡檢二缺。均請定為烟瘴要缺。三年俸滿。如果稱職。保題陞用。應如所請。從之。

戊辰

上詣暢春園。問皇太后安。還宮。奉恩輔國公功宜布故以其子如松襲爵。已已。

上御太和殿視朝。文武陞轉各官謝恩。○幸靜宜園駐蹕。○諭工部奏稱廣大兵備道陳法揭稱去年陳家浦隄工漫溢以致淹斃人口是本道失於查察未及詳報若止將總河議處本道以調任倖免雖吏議可逃而清夜難安理合檢舉飭部一併議處。至黃河水勢倏忽變遷河官不過補偏救弊原無萬全之策若責令白鍾山賠補則任事益難其人等語。黃河水勢不常朕所深知。凡工程潰決之處司其事者向有追賠定例亦非自朕創為。然遇此等案件降旨豁免者甚多。此則因其平日居官尚優或實係臨時不能搶護是以加恩於格外耳。白鍾山身任總河而措畫布置畧無一當及搶救之時又不如法以致虛糜帑項且淹斃人口隱匿不報如此負恩溺職之大臣尚可邀格外免賠之恩乎。況交部議處之旨已經兩月陳法近在畿輔彼時聞知即應檢舉何以遲回觀望以至於今伊原係白鍾山保薦之屬

平定奏言六八

員顯有受其囑託代為申辯情弊且借檢舉之例以博直誠無隱之名而行其徇情袒護之私意似此小臣巧偽存心阻撓公事其風斷不可長況彼時淹斃人口未曾詳報陳法之罪已無可寬著該部嚴加議處以示懲儆。○添建直隸忠順營清風店汛撥防弁兵營房從總督那蘇圖請也。○庚午。

上幸圓明園。○吏部議覆江南總督尹繼善議奏安徽鳳、潁二府界連徐、豫幅隕遼濶奸匪易藏是以臬司都隆額請於三省適中之地移駐同知一員專司捕務查三省交錯適中之地已有鳳、潁二府通判及宿州州同分駐安屬職司捕盜並非乏員該臬司所請應毋庸議。惟是積盜之藪緝捕不可不嚴弭盜之法不在設官多寡惟在任用得人該二府通判及宿州州同向係部選之缺不皆精明強幹之才應請將鳳、潁二府通判及宿州州同俱改為調補之缺再該通判州同衙門俱止

平定奏言六八

設民壯十名。并請通判衙門。各添設捕役六名。州同衙門。添設捕役四名。至於稽查督緝。不可無大員董率。應就近責成鳳廬道。嚴督印捕各官。勤加查緝。平時則申嚴保甲。失事則上緊擒拏。即有逃匿隣省者。令其不分疆域。一面密行知會。一面差役追捕。不得歧視。應如所議。仍令該督。將改為調補之通判二缺。酌擬四項三項相兼字樣。州同一缺。定為要缺。報部註冊。從之。○四川巡撫紀山奏。准

貴州督臣張廣泗咨。拏大乘教為首掌教之劉權。暨伊等手下辦事之齋頭人等。查川省地雜番蠻。習俗佞佛。男婦皆然。臣蒞任後。訪聞有一種無極教名色。一面查拏。一面曉諭自首。并於朔望宣講

聖諭廣訓後。即將禁止師巫邪術律文。明白開導。凡遵示自首者。俱經開齋。銷燬邪書。其執迷不悟之徒。節經法處。如涪州等處。拏獲盧子林。劉奇等數案。俱分別充徒。枷責完結。今

貴州咨拏之劉權。即劉奇。又名劉元亨。妄稱教祖。私設度牒圖記。捏造妖言。現據涪州知州拏獲。據供當年曾學無生最上一乘教。原是雲南張保太傳與瀘州鄭文元傳授的。不過吃齋念佛。並無邪說惑人。為害地方。并據合江等縣。拏獲齋頭駱東升等五人。已批飭押解赴省。所有黔省咨拏邪教。均已獲全。查此案較從前拏究各案。情罪似重。現在委員嚴究辦理。得旨。此事汝辦錯了。有旨向大學士等處頒發。○辛未。

上詣暢春園。問

皇太后安。○諭軍機大臣等。據張允隨拏獲不軌要犯。搜查字跡。究出謀逆情由。奏聞一摺。朕已細閱。可抄錄密寄各該省督撫。令其將摺內供出各省人犯。速行嚴審。按律定擬。其再有供出人犯。亦應拘訊。務絕根株。若情罪重大者。訊明口供。各省彼此關會。即行定案。在本處正法。使本地匪類。有所畏懼。免致解

往他省稽遲時日。或有疎虞。其次情節稍輕。應行發遣者。若照例充發。又在近地。伊等惡習終不悛改。不免煽惑人心。蔓延滋事。當發遣黑龍江等處。以杜復行勾結之患。此等事件。雲貴川省居多。張允隨張廣泗尚能盡心查出。不使隱匿為害。此處可嘉。但未見惡風止息者。揆厥所由。蓋因從前查拏審究之時。未免過寬。以致匪犯玩視國法。不知儆戒。人心縱肆。習為固然。而犯法者愈衆矣。如此內之張二郎劉奇皆以為從漏網。而故智復萌。反為教首。伊等身犯謀逆之罪。自應置之於重典。著傳諭各該督撫務須時刻留心。早為查察。消弭於未形。其事發之後。更當按法懲治。不可稍存寬縱之意。以貽患於將來。庶地方寧靖。良善不致拖累矣。○又諭據雲南總督張允隨奏據匪犯劉鈞供稱。掌教是保定唐登芳。請令直隸督臣就近查拏等語。張允隨此摺。著鈔錄寄與那蘇圖閱看。令其留心

密訪。即行查拏。務在緝獲。毋致漏網。仍將辦理情由。速行奏聞。○又諭從來左道惑衆。最為人心風俗之害。理應嚴加懲創。庶足儆頑。悖而安善良。今紀山摺內奏稱。從前辦理邪教數案內。有劉奇一名。止以充徒枷責完結。今據張允隨奏稱。劉奇乃大乘教為首重犯。圖為不軌。情節顯然。此乃斷斷不可輕縱者。紀山奏稱業經拏獲。現在辦理。而又稱此等邪教愚民難以驟悟。若治之太嚴。展轉牽引。則人心惶惑。易致生變等語。紀山從前於劉奇一案。既未能究出實情。處治已屬過輕。今又恐治之太嚴。則必草率完結。不能盡法處治。辦理甚屬錯誤。爾等可速傳諭紀山。令其將劉奇一案。務必嚴行根究。依律正法。以快人心。此旨。即隨伊奏摺發去。爾等仍從兵部飛遞。再行寄去。令伊得於兩處內。先接到一處。以便即行辦理。張允隨摺。一併鈔錄寄去。○又諭據張允隨奏稱。接准貴督張廣泗咨

稱四月十五日係火官會期。在教之人聚集必多。密咨將張保太之弟張二郎拏獲研訊。隨於四月十一日拏獲。並訪得自張保太拏禁之後。鄉民咸知畏法。即四月十五日火官會。亦未有人舉行等語。又前據張廣泗奏稱。四月十五日係邪教人等做火官會期。在教之人必多齊集。一面飛咨雲南四川督撫各選差弁。務於四月望日前後將涪州為首之劉權滇省之張二郎以及兩處妖人相機擒獲。臣即於四月十五日乘該犯等會聚之期將黔省為首之魏齊婆勒拏到案等語。看來火官會乃滇黔四川等省常時舉行之事。即滇省據稱自張保太拏禁之後亦未有人舉行。則從前竟係公然聚集。蓋此即聚眾生事之漸也。張允隨等身任封疆。似此聚眾結會理應嚴行禁遏。何以平日漫無查察。一任妖民借端滋事。其火官會獨非邪教。可以聽其私相糾集乎。爾等可傳旨詢問之。○又諭據

張允隨摺內奏稱。准江蘇撫臣陳大受來咨。有宜興縣亮僧吳時濟倡立龍華會。供指伊師張保太在雲南。希將張保太現在存歿有無查明移覆。當將張保太久經監斃緣由咨明江蘇等語。從前陳大受具奏匪僧吳時濟之案。因未根究張保太。經部駁令查審。至今尚未覆到。可速傳諭詢問之。再伊審理此案時。曾否問及時濟伊師張保太傳授徒弟。尚有何人。時濟又再傳何人。著陳大受將從前辦過情由一一詳明摺奏。又本年五月十八日據陳大受奏稱有燃燈教一案。傳自雲南犯案之張保太。習其教者有震澤縣寶山縣嘉定縣等處之民人。現在拏獲。已飭按察使分別情罪。嚴加懲治等語。是張保太之教附從之人甚多。其意亦非止誘人入教。騙財淫亂而已。今據張允隨將張保太邪黨緝獲。審理陳大受所審亦係此案之黨羽。可將張允隨原摺鈔寄陳大受。令其留心查審。勿得寬

縱使奸徒漏網。○壬申。直隸總督那蘇圖奏准雲南督臣張允隨札稱。拏獲邪教劉鈞。供出唐登芳。係保定人。密咨嚴緝。前來臣密札布按二司。在保定境內。設法訪拏。并以原札未將唐登芳之年歲面貌。及所居州縣鄉村。有無同夥。親屬更有何人。詳細開載。已密咨張允隨。詳訊聲覆。以便查拏。首犯劉奇。現在四川。如現已就擒。於唐登芳住址年貌。自必熟悉。又密咨川省督撫訊覆。臣思此等邪教煽誘。易滋事端。必須豫為嚴禁。盡法懲治。但地近畿輔。不便行文出票。致駭聽聞。惟有慎重緝密。妥協辦理。得旨所見甚是。但應差可信之人。密行偵緝。似此徒行布按。恐無戈獲之日也。一俟要犯就擒。即當速為摺奏。朕日夜望之。○鑄給江西南昌府管理糧鹽水利通判關防。從護理巡撫布政使彭家屏請也。○癸酉。諭軍機大臣等。朕閱馬爾泰巡察浙東營伍摺內。奏稱俟六月中旬。天氣稍涼。起

平定文官三八

實錄卷三百六

六

程前往寧紹一帶。查閱提標營伍等語。所奏含糊。其於何時回閩之處。摺內未經聲明。爾等可寄信詢問之。浙江營兵夥刦。該管武弁。在都行賄一案。前有旨因馬爾泰甫自浙回閩。令其不必復來。交與崔紀安寧前往查審。今看來馬爾泰尚在浙省。著伊會同審理。此案從前雖係督撫會題。馬爾泰不過列銜會稿。此次會審。務必秉公研訊。以得實情。不得稍為常安迴護。再前次審理盧焯一案。辦理未妥。以致物議紛紛。地方不能安靜。此案事關武職多員。更宜詳慎。已傳諭崔紀等。令其鎮靜妥協辦理。馬爾泰係該省總督。尤當加意彈壓。勿致滋事。可一併傳諭知之。○又諭據直隸總督那蘇圖奏稱。准雲南督臣張允隨札開。滇省拏獲匪犯劉鈞。供出四川妖賊劉奇。倡立邪教一案。內有唐登芳一名。係保定人。尚未訊明年貌住址。查劉鈞供出首犯劉奇。現在四川。該犯唐登芳住址年貌。劉奇

定皆熟悉。必應確訊等語。前據紀山奏報。劉奇已經拏獲。唐登芳既係劉奇同夥。其蹤跡定劉奇之所素知。可速行傳諭紀山。令其提訊劉奇。將唐登芳居住保定。係何州縣鄉村。是何年貌。家中尚有親屬何人。離家赴川。有無同行夥伴。現今是否尚在四川。曾否回籍之處。逐一嚴究。毋許狡詞庇黨。希圖隱漏。務取確供。即速奏聞。尋紀山奏嚴訊劉奇等犯。供內有曾瑞芳一名。係親見唐登芳身故之

實錄卷二百六十八

七

犯。現在上緊緝拏。並准貴州督臣張廣泗咨魏王氏。唐世勲。俱稱唐登芳於乾隆三年。在同風店身故等語。查唐登芳之子唐世勲。係魏王氏招贅在家。則唐登芳存歿。伊等自必深知。或前供尚有狡飾。復飛咨貴州督臣確訊具奏。得旨覽。○又諭朕覽張廣泗所奏會緝邪教一摺。因雲南故犯張保太。繼子張曉。接法開堂。其黨魏王氏。劉奇等。傳播妖言。招人入教。連結貴州。四川。雲南。湖廣。江南。江

西。山西等省。不法已極。應通行嚴緝。可將此摺鈔錄。密寄各該督撫。令其速行躡緝。查拏將布散羽黨。跟蹤弋獲。不得稍有洩漏。以致匪徒聞風。兔脫。亦不得張揚驚擾。貽累善良。但此教流傳已久。失察官員甚多。若按照定例處分。恐各官自顧考成。反致諱飾。其各省失察之員。暫緩處分。令其實力查緝。或現在供出人犯。不行跟追。以致漏網者。倍治其罪。總期盡絕根株。毋致漏網。拏獲到案。即訊取

實錄卷二百六十八

三

口供。一面奏聞。其應關會之他省督撫。即行關會。各督撫皆有封疆之責。似此邪教盛行。包藏禍心之人。平日既不能查察。以靖地方。若奉旨之後。復辦理不善。以致滋事。或忌人之功。而欲將就了事。苟且塞責。自問於心。能無愧乎。○又諭據張廣泗奏。稱開修赤水河一道。所有用過銀三萬八千餘兩。係於黔省鉛觔腳價內二年補足。其滇省銅運腳價。每年可節省若干。應聽滇省查辦等語。可傳旨

詢問張允隨滇省銅觔由赤水河運送較之從前陸運每年腳價可節省若干之處令其查明具奏○步軍統領衙門奏翼尉出派官差請照副都統給與幫貼銀兩步軍協尉步軍校等由本衙門資生銀內酌量辦給得旨出派官差之翼尉等著照副都統賞給幫貼銀兩餘依議○甲戌諭曰刑部革職郎中李鍾份著發往山西交與巡撫阿里衮酌量差遣如果實心効力三年無過以知縣題補○

乙亥

上御勤政殿聽政○戶部議覆山東巡撫喀爾吉善疏稱壽光縣瀾河水決附近村莊遭水房屋多坍應令該撫確查無力修葺者照例給費缺乏籽種口糧者酌量借貸令其趕種秋禾得旨依議速行○以刑部侍郎兆惠兼管鑲紅旗護軍統領○以原任河南布政使趙城為通政使司右通政○命翰林院侍讀學士龔渤以原銜充日講起居注官○以廣

西義寧協副將魏文舉為右江鎮總兵官○

丙子

上詣暢春園問

皇太后安○戶部議覆湖南巡撫楊錫紱疏稱各屬社倉穀散貯私家侵挪不免請於適中之地建總倉工料並基地及看守住房等項估銀二萬一千八百三十五兩查自乾隆三年起九年止共收息穀四萬五千七百七十六石零照各屬時價約計可變價銀二萬二千四百八十五兩零足敷動用至社穀既建總倉自應歸併收貯而原貯處所距新倉遠近不一請照撥運常平倉穀水陸程途之例分別給運即在各該年息穀內支發不敷於前項辦工餘銀內撥給若時價平減盈餘無多即動本穀找給至社穀原貯各鄉每年春借秋還祇就各處斛斗出入應令各州縣照依常平倉斛每總倉製造一二副較準印烙轉發各社悉以官斗為定多者作盈餘存貯

少者作虧折豁除。又每總倉設看守斗級一名。即於息穀內每年給工食銀六兩。每倉選殷實良民。承充正副社長。均應如所請辦理從之。○兵部議准。山東登州鎮總兵譚行義奏稱。登鎮所屬。除標下三營外。東西南三路十營。向例鎮臣於三年之內。通巡一次。半巡二次。凡遇半巡之年。親查東南五營。及水師東南二汛。其西南五營。委員考查。是東南年年親查。西南止通查之年。親查一次。考覈不均。請嗣後於半巡之兩年內。一年親查東南路之寧文。即膠萊五營。一年親查西南路之濟武。青壽安五營。至萊州一營。路當孔道。往返經由。照舊親查。餘各營不應巡查之年。仍委員考查從之。○湖廣總督鄂彌達湖南巡撫楊錫綬奏報湖南長沙府屬益陽縣。岳州府屬平江縣等處。山水漲發。隄坑民房。間有被水倒塌。沿河田禾。亦有淹浸。飛飭該司委員查辦賑恤。再寶慶府屬之新化。永州府屬

之道州。辰州府屬之沅陵。乾州廳等處。日內亦報被水。飭司飛查。是否成災。據實詳報。得旨覽奏俱悉。但此事所奏遲而偽。已向大學士等降旨矣。○以正藍旗蒙古王府長史圖拉。為正黃旗滿州副都統。○丁丑。

上詣暢春園問

皇太后安。○諭昨夜戌時。京師地覺微動。朕返躬思之。或因春夏以來。雨暘時若。禾稼茂盛。朕心乾惕少疎。或大小臣工。見休和有象。揆朕悅豫。應行陳奏者。不行陳奏。以致政事有所闕失。

上天示警。著詢問九卿科道等。如各有所見。令其據實奏聞。如無實事敷陳。不必公同以虛文覆奏。○諭軍機大臣等。四川邪教一案。巡撫紀山。辦理過寬。已降旨訓諭矣。劉奇一犯。乃教中之首惡。其所有逆書邪說。紀山並未搜查陳奏。此等邪教書本。應查出銷毀。以免蠱惑人心。爾等可傳諭。令其上緊辦理。務將

伊逆書邪說。悉行搜出。應行陳奏者。鈔錄進呈。並將書板焚毀滅跡。以杜後患。其現在如何辦理之處。可速行奏聞。○戊寅。諭軍機大臣等。楊錫紱奏報。岳州府平江縣等處被水一摺。內稱會商該督鄂彌達。飛飭該司查勘賑恤。並列該督鄂彌達之名具奏。夫賑恤災荒。乃刻不容緩之事。湖南湖北相距千有餘里。若果會商該督而後撫恤。則賑務稽遲。窮民其何以堪。尚可謂之臣等飛飭乎。可謂漠

實錄卷百六

五

視民瘼矣。若未曾會商。而楊錫紱竟列該督之名。則又偽而不實矣。況發水在四月二十八日。以及五月初旬。而六月中旬始行奏到。是朕視民如傷之意。楊錫紱全不知之。朕平日以和衷訓飭督撫。原指辦理公事。以及舉劾屬員而言。至於賑恤災荒。此等急切之務。焉有俟文移往來。輾轉相商。然後辦理之道乎。爾等可傳諭嚴飭楊錫紱。至於鄂彌達平日習氣。常以為地方遙隔。凡有奏事。不妨竟

行列名。今則又蹈此轍。可一併申飭之。○又諭曰。準奏秦太平關徵收貨稅。內有則例未載。比照徵輸者。有因貨物貴重。酌加細料者。有因則例稍重。量從輕減者。歷任相沿。商民悅服。若概為改照舊例。均有未便。請仍照現在之數徵收。一摺。經部按冊查對。其量增量減之處。尚屬合宜。惟比照徵收各條。如珍珠玉器。等貨。比照潮綢例徵收之處。均屬未協。議令該撫準奏會同總督策楞另行酌議。造

實錄卷百六

五

冊具題等語。該部所議是。夫比例徵收。原因例無正條。酌量貨物貴賤。以此較彼。價值相等。始可比照。今珍珠玉器貴重等貨。非潮綢可比。準奏豈不知之。乃如此比擬徵收。輕重不倫。或係準奏未經細心查察。或係胥吏朦混。借此行私。均未可定。爾等可傳諭準奏。令其留心查辦。○直隸總督那蘇圖奏。保定以南之天。河正太。順廣等屬地畝。有黑土白土之分。黑土性多滋潤。白土挾砂礪磽。若十日

不雨。即覺土乾灰動。查各屬自六月初五日得雨後。將及旬日。土氣微覺乾燥。今於初九等日。各得甘雨。尚可接續均勻。所種黍稷高粱。可期次第揚花垂實。省城現亦得雨一寸。得旨覽奏俱悉。看此則保定以南。似屬望雨。不知此數日內。得霑足否。速奏以慰朕懷。此處則十分優渥。霑足。只虞其多。不愁其少耳。

實錄卷二百六十八

三

大清高宗法天隆運至誠先覺體元立極敷文奮武孝慈神聖純皇帝實錄卷之二百六十八

大清高宗法天隆運至誠先覺體元立極敷文奮武孝慈神聖純皇帝實錄卷之二百六十九

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理吏部理藩院事務兵部旗滿洲都統世襲騎都尉軍功七級隨帶加一級尋常加二級軍功紀錄一次臣慶桂總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務世襲騎都尉軍功十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次尋常紀錄四次臣德瑛經筵講官太子少保工部尚書紀錄六次臣曹振鏞等奉

教修

乾隆十一年丙寅六月庚辰諭朕聞廣西桂

印錄卷二百六十九

林等府屬於四月二十七八等日雨水過多江水暴漲沿江一帶之臨桂靈川等縣低窪地畝多有被淹之處兵房民屋間有倒塌者朕心軫念著署巡撫鄂昌遴委幹員分行查勘加意撫卹務令妥協辦理毋致失所再此外或有被水州縣亦著查明一體辦理並將實在情形現在如何辦理之處即具摺奏聞該部遵諭速行○又諭曰倉場侍郎吳拜之母病故例應治喪百日此際重運抵通正當

料理之時。其倉場侍郎事務。著內閣學士塞爾赫暫行署理。○諭軍機大臣等。據那蘇圖奏稱保定郡城。前於初五日得雨。不及一寸。今於十三日午刻。得雨一寸。高原卑隲。所種黍稷高粱。尤見肥長稠密。保郡以南之天河。正大廣順等府州。於初五初九。各得甘雨。最為接續均勻等語。保定兩次得雨。據奏俱不過一寸。即保郡以南各府州所得之雨。但稱最為接續均勻。亦未將實在分數奏報。現在

實錄卷三十九

二

正值中伏。禾稼數日之內。即望雨澤霑灑。今看那蘇圖所奏情形。似未霑足。而摺內又稱最為接續均勻。可傳諭那蘇圖。令其將保定以南所屬地方實在情形。據實速奏以聞。尋奏保定以南所屬地方。自五月十五日至六月十三日。連次得有透雨。接續均勻。悉皆霑足。並無望雨之處。保定郡城。六月中。接連三日得雨。在地莊稼。十分得益。得旨覽奏俱悉。若有覺旱光景。不可粉飾。○又諭曰。馬爾拜

具摺請安。並無別奏。想伊聞知十二日。京師地覺微動之故。古北口密邇京師。彼處若亦稍覺。馬爾拜即當陳奏。即較京師稍重。更當奏聞。候朕降旨。倘彼處不覺。亦當奏明。今但具摺請安。似有掩飾之意。不得封疆大吏之體。著傳諭令其將實在情形。據實奏聞。尋奏古北口地方。本月十二日亥時。無風。牕紙微響。頃刻即止。臣覺為地動。飭查營中兵民。有言微覺地動者。亦有全未知覺者。復查沿邊

實錄卷三十九

三

居民。亦俱寧靜如常。臣因事屬恍惚。未敢妄陳。迨聞京師地覺微動。具摺請安。又未將口上情形聲敘。實屬愚昧。並非敢稍有掩飾。得旨覽。○吏部議准。湖廣總督鄂彌達疏稱。宜昌府長樂縣縣丞。改駐灣潭。辦理兵米。前經奏准遵行。查該縣丞。原駐漁洋。在縣之極東。今改駐灣潭。在縣之極西。應請從長樂縣城分劃。自北門外仁育之西。半鄉霞口溪起。並禮教。智慧信孚。三鄉。歸縣丞分管。自縣起。並

仁育之東半鄉。以及義正一鄉。歸典史分管。凡清查保甲。緝拏逃盜匪類等事。均照調換界內管理。從之。○戶部議覆雲南總督兼管巡撫事張允隨疏。稱東川府屬之者海鉛廠。礦砂旺盛。離東局止二站。開採供鑄。腳價甚屬節省。請照卑塊鉛廠事例。收買抽課。應如所請行。至所定運腳。查自廠至局。路止二站。因何每鉛百觔。給運腳銀三錢。應令查明報部。從之。○辛巳。禮部議覆御史沈廷芳奏。稱

宋臣謝枋得

四

宋臣謝枋得。以直言忤賈似道。被謫。尋授江東提刑。江西招諭使。守饒信撫三郡。督軍與元兵力戰。後隱於閩。元臣程鉅夫薦宋遺民。以謝為首。固辭。尚書留夢炎辟召不赴。叅政魏天祐累薦之。不為禮。強之而北。至京師。問瀛國公所在。再拜慟哭。居憫忠寺。不食死。又其妻子弟姪在閩。俱為守將執送建康獄。妻李氏自經。弟姪及女瘦斃。其伯父徽明為富陽尉。與元兵戰亡。二子同難。其弟禹不屈死。

君澤君烈俱死。闔門忠節。宜於授命之所祠祀。至明僅謚文節。奉祀弋陽。而憫忠寺未設像主。請勅禮部。即於憫忠寺內立專祠。設像置春秋祭。闔門諸節從祀。祠成賜額等語。查宋臣謝枋得。大節孤忠。闔室殞命。該御史宜有是請。但史載忠烈甚多。國家褒旌有典。江西弋陽縣。原有謝文節專祠。久經該省編祀在案。惟祠宇未入防護冊內。應照雍正七年定例。忠烈祠墓。造入防護冊。隨時修葺。闔門諸烈。應請附祀。行令該撫遵照辦理。從之。

宋臣謝枋得

五

○壬午。

上詣暢春園。問

皇太后安。○吏部議准。胡北巡撫開泰疏。稱。蘄水縣地方遼濶。有上。下。南。北。永福五鄉。周三百餘里。向由典史稽查巡緝。不免顧此失彼。查有巴河。蘭溪巡檢二員。堪以就近分管。應將附近巴河之北鄉。歸巴河巡檢專汛。附近蘭溪之永福鄉。歸蘭溪巡檢專汛。其上。下。南。

三鄉。仍令典史照舊管理。從之。○癸未。諭直隸通省。今年應徵地丁錢糧。已加恩全行蠲免。固安霸州。二防守尉所轄。應徵屯糧。例不在蠲免之內。但朕念耕種井田之旗戶。按畝輸穀。在縣交納。與民田正賦納銀者相同。著將固安霸州。二防守尉。本年應徵屯糧穀石。一體加恩蠲免。該部即行文該督知之。○諭軍機大臣等。據步軍統領。拏獲宏陽教人犯。供稱其教。先係河南衛輝府道人。傳與右安門外居住趙姓旗人。授持茶葉。與人治病。各處散香作會。託名靜養工夫。教人右手扣著左手。右脚扣著左脚。舌頭抵著上牙根。可以療疾延年。其道。人姓趙姓恁。記不清了等語。此等邪教。例應查禁。可傳諭巡撫碩色。令其訪拏此人。再豫省現在興行此教與否。著伊嚴飭該地方官實力查察。妥協辦理。不得被屬員掩飾。以貽盡惑人心之患。仍將查辦情形。具摺奏聞。尋奏嚴飭衛輝府密拏去後。據

實錄卷三十九

六

稟備訪所屬八縣地方。並無傳授宏陽教之趙姓道人。亦並無此教名目。與信從附和之人。并行按察使嚴飭各府州查訪。亦無其教其人。查豫省從前曾有書符治病。哄騙鄉愚匪徒。經臣緝獲懲辦。今宏陽一教。雖據各屬查無影響。誠恐稽察或有未周。仍飭各屬再為嚴查。即此外別有邪教。亦應實力查辦。得旨。此奏甚屬草率了事。汝向來即不肯留心整飭地方。此亦無怪耳。○又諭。據步軍統領。拏獲宏陽教人犯。供稱伊等作會時。有別教道人來喫齋。問及。說是永平府屬石佛口地方。無為教道人。其會首何人。及何如行事之處。不能知悉等語。無為名色。與張保太所傳教名相同。畿輔近地。非他省可比。可密傳諭與總督那蘇圖。令其差妥協之人。密行訪查。是否即係張保太流傳之教。現在該處掌教之人。係何姓名。其如何開堂作會。招引徒眾之處。務須根究明確。據實奏聞。不可聲張滋

實錄卷三十九

七

擾尋奏遵旨選派妥人赴永平密訪并於保屬四路偵緝凡有聚集誦經之處即細加盤詰近於通州地方訪有宏陽教名色拏獲誦經歸教民人張三道供出傳教即係步軍統領拏獲之犯并錄供詞呈覽報聞○甲申諭軍機大臣等從前慶復保奏筆帖式噶爾瑪老成練達辦事勤敏請以理事同知陞用朕是以用為廣州府理事同知今將軍錫特庫奏稱該員辦事舛謬才力不足不勝理事同知之任可傳諭詢問慶復似此不勝理事同知之人伊緣何專摺保薦隨便令其回奏尋奏臣保筆帖式噶爾瑪因其在臣衙門二十年節次領兵運米頗著勞績遇有滿洲蒙古事件均能料理初不慮及其不通漢文遷地立形拙鈍愚昧之咎實所難辭報聞○給事中周祖榮奏進經史講義恭錄易經坤文言君子敬以直內義以方外二句引宋儒黃榦之言疏解進呈

上召入諭曰此內引黃榦所云乾言德業坤言敬義實相為經緯欲進乾之德必本之以坤之敬欲修乾之業必制之以坤之義數語及爾所釋俱未達韋經本義蓋德業無定體而敬義有恒功故德有君子之德有小人之德業有大人之業有小人之業文言所云進德修業蓋發明九三君子終日乾乾夕惕若之義是即敬義也坤之直內方外蓋本諸此豈可謂乾之德業反本於坤之敬義乎乾包乎坤坤承乎乾猶之地承天臣奉君子遵父妻從夫不可倒置也修身齊家治國平天下一以貫之耳○乙酉

上幸靜宜園駐蹕至丁亥皆如之○戶部議准浙江巡撫常安疏稱雲和縣向有產鐵砂坑每年徵稅銀五十八兩解司充餉但開採日久或致藏奸現飭封禁其額徵解坑爐稅銀兩請自乾隆十一年起照數豁除從之○丙戌諭曰御史薛澂奏稱雲南總督張允隨保

舉幕賓候選縣丞邵岷。吏部以該督並未先將該員履歷報部。與定例不符。應毋庸議。等因議駁。張允隨不知而為之。謂之不明。知而為之。謂之不公。不公不明。何以寄封疆而膺察吏安民之任。請勅部察議等語。張允隨未曾豫先報部。即行保薦。是伊錯誤之處。然保薦幕賓。尚屬遵照向例。非有意行私可比。薛澂遽加以不明不公之語。如有徇情舞弊者。又將何辭以指摘乎。此奏過於苛刻吹求矣。

實錄卷五十九

十一

張允隨不必交部。餘著該部議奏。摺並發。○又諭。此次巡幸五臺。雖止一月路程。但均從內地行走。與口外木蘭圍場不同。未免費用繁多。著加恩將隨往大臣侍衛官員等。應行坐扣之俸銀。展限一季。俟下季再行坐扣。護軍校護軍執事兵丁等。著賞給兩個月錢糧。

○丁亥。遣官祭

火神廟。○諭軍機大臣等。朕覽鄂彌達奏報雨水禾稻情形。摺內稱現在各屬米值稍增。

稍減不一。照常核計。猶屬平減。人民亦俱寧貼。等語。又一摺。奏稱飛飭各府州縣將常平倉穀添設廠所。減價多賣。但期於民有濟。不妨儘數儘糶。如使倉有餘穀。塗有飢民者。立即查叅等語。湖北湖南壤地相接。如果米值平減。人民寧貼。不過沿存糶之常例。則何至塗有飢民。又何須將倉穀減價多糶。若百姓待哺孔迫。必須接濟。則應急籌撫恤。妥協辦理。俾百姓不致失所。一面將實在情形奏聞。

實錄卷五十九

十二

乃所奏俱未明晰。顯有掩飾之意。爾等可傳諭鄂彌達。令其據實速行陳奏。○兵部議覆寧古塔將軍巴靈阿等奏稱。南海烏蘇里德克登伊等處。查拏藏匿創參人等一案。今欽派大臣侍衛等前往巡查辦理。該處幅員遼濶。山林廣大。所有原派協領等官十五員。兵五百名。分路跟隨。尚不敷用。臣等會商南海等處。令寧古塔琿春地方。添派官三員。兵一百名。烏蘇里德克登伊等處。令三姓地方。添

派官三員。兵一百名。跟隨欽派大臣等前往。嚴密巡查。於本年四月內起程。即令存留。來年四月青草發生時。派撥官兵更替。現今都統阿蘭泰寧古塔副都統伊倫泰在南海雅蘭西楞地方安營。副都統那木扎勒三姓副都統富僧阿在烏蘇里德克登伊地方安營。俱由彼處自派官兵。編隊前往。其自烏蘇里德克登伊直至三姓沿途皆有卡座。雅蘭西楞至寧古塔所屬綏芬地方。安設之末卡。隔六七百里。令吉林烏拉地方。派官二員。兵六十名。自雅蘭西楞至綏芬卡座。酌量遠近。添設三臺。專管遞犯送文。所有此次派添跟隨大臣等及安設卡座臺站官八員。兵二百名。一切馬匹口糧行李等項。應與從前奏派協領等官兵一體賞給一季俸餉。均應如所請。從之。○定邊副將軍額駙策凌奏。喀爾喀四部落游牧處。所備揚威兵。今歲應派軍營叅贊大臣前往閱看。但四部落內。在戈壁居住

之扎薩克等游牧處。因雨水不調。至今青草未發。牲畜未能肥壯。若緩至八九月間閱看。為時已遲。請暫停止。令各副將軍盟長等就近在各游牧處自行查閱。明年仍派叅贊大臣前往。從之。○科爾沁扎薩克多羅貝勒多爾濟故。賜祭如例。○戊子。

上詣暢春園。問

皇太后安。○迴圓明園。○諭軍機大臣等。據陳大受奏。稱太倉州王徐氏等。倡行邪教一案。已飭臬司翁藻。將左允文收禁候訊。并摘提數名杖懲。其餘人犯。飭令府縣差押解回本籍安插。毋許出外。又生事端。又據太倉知州高廷獻稟稱。聞王徐氏本非正經。入其教者。多係浮蕩無賴之人。查從前乾隆五年。查辦燃燈教一案。止為愚民被誘。妄希獲福消災。今其流弊。愚頑者陷溺既深。執迷不悟。而刁黠者藉為奸利。勾誘主謀。近之則為人心風俗之害。遠有恐有奸宄不測之虞。未可概信

為喫齋念佛而已。其餘士節等先經懲創。乃敢怙惡不悛。若仍留於該處。將來故智復萌。必致又行煽惑。現飭兩司速將該犯並提徐周二氏究審。按律分別定擬。另奏等語。覽其所奏。前後辦理情節。失之寬縱。張保太倡立邪教。被惑之人。各省有之。此事甚有關係。不止於誘人入教。騙財淫亂而已。聞江南行教之人頗多。即係張保太之黨羽。從前陳大受辦理此案時。即未曾究出根底。今伊出郊勸

農。即有如許人。攔伊健訴。顯係聚眾有所別圖。想伊不知如何文飾以掩其事耳。將誰欺耶。今雖奏稱。飭令兩司拘提審訊。看來陳大受之意。又欲就案分別懲治。所為滋事不如省事耳。此等緊要之件。草率辦理。甚非朕委任之意。前此張允隨、張廣泗二人奏摺。已抄錄寄諭陳大受。想伊尚未接到。爾等可再傳諭嚴行申飭之。令其遵照前旨。會同尹繼善親提速訊。盡法嚴治。毋使奸民漏網。又生將

來事端。○又諭陳大受摺奏太倉王徐氏等一案。辦理寬縱。朕降旨嚴行申飭。並令尹繼善會同審理。可將朕批諭之旨抄錄寄與尹繼善閱看。雲南張保太設立邪教。招集多人。竟有謀為不軌之意。前張廣泗奏摺。敘述頗詳。朕已令抄錄寄與尹繼善矣。今王徐氏案內人犯。即係張保太傳教之黨羽。公然於巡撫前聚眾健訴。不知畏懼。誠為法所難宥。尹繼善身任總督。封疆攸繫。此等案件。正當留

心查緝。不應專聽巡撫辦理。以為與己無與也。今審理此案。當徹底究訊。毋得稍有寬縱。又似陳大受之文飾欺隱。草率竣事。負朕委任之意。張允隨前奏張保太之案。可一併抄寄尹繼善知之。○吏部議奏鑲白旗漢軍都統咨稱。三等輕車都尉崔國輔因重典房屋得價一事。刑部議以革職枷責。所遺世職。例以其子承襲。但崔國輔現在乏嗣。又無應襲之族人。應作何辦理之處。由吏部定議。查崔

國輔所犯並非枉法婪贓等罪。所遺世職應俟其生子後仍令承襲。其原得輕車都尉係伊祖崔大成隨左夢庚歸順及圍大同等處有功所立並非陣亡所得之官。若崔國輔終身無嗣應令該旗將該員原領勅書送部註銷嗣後八旗世職有與崔國輔情事相類者俱照此畫一辦理通行遵照從之。○工部尚書公哈達哈等奏據江南葦蕩營叅將韓烈通揭河工道廳各款。一淮揚道葉存仁上年

在銅沛同知任內玩視修防河水不能下洩將徐州大壩隄工冲漫三百餘丈淹延二百餘里葉存仁並不申報大吏亦無所聞今歲欽差按臨又經曲為掩護實為玩工殃民。一河庫道吳同仁支發錢糧除兵餉外俱每百扣飯銀五兩又扣平二兩零查本年河工水利二項銀該庫支發百餘萬通計扣剋不下十餘萬必應嚴行清查。一裏河同知施廷瑞承挑鹽河叅將奉委催工查所挑工程口底

寬深俱不足估工所亦人夫寥寥隨將夫頭責處移催該廳添夫償挑詎該廳心懷仇恨回文語多詈罵叅將即具稟總河顧琮未經批發後經訪得該廳原領銀三千九十餘兩係七折交夫頭包挑又未全給以致挑不如式而淮揚道葉存仁復模糊量收該道廳侵帑徇情罪均難逭。一裏河乃施廷瑞專管而葉存仁吳同仁均有兼轄之責自本年五月初黃水直注裏河該道廳並不往清口一看

適值葉存仁祖母生辰吳同仁率通工文武前赴葉存仁署內張筵演戲數日竟置河庫錢糧於膜外以上各款通工週知伏乞據揭轉奏等語查該叅將揭報各款事關河務相應請旨確查究辦得旨這摺內所揭各款著署漕運總督劉統勳會同總督尹繼善巡撫陳大受秉公查審具奏。○大學士川陝總督公慶復奏瞻對已平賊首殲滅現在清除餘黨招撫逃散次第就理大局既定善後為急

恪遵節次諭旨。詳查地勢。熟察番情。籌畫善後事宜數條。一。分地以絕盤踞。瞻對地方遼濶。而班滾所居。負山帶江。尤屬險阻。今既犁巢掃穴。自應遵照原議。剖散其土宇。割裂其形勢。撥給効力之土司。並分賞投誠有功之土目。分隸管轄。一。設官以資管束。瞻對接壤効力之土司。原有職銜。其投誠有功之土目。若不藉朝廷名分。則體統不尊。請將前項土目。分別酌授長官司千百戶等職銜。給以號

實錄卷一百九

十八

紙。果能撫馭有方。所屬三年無過。該管官考核保題。准與承襲。一。統轄以專責成。賊酋既滅。畫界分疆。另設土職。勢已渙散。其貢賦承襲。一切查剖事件。愈分愈繁。應於就近土司內。擇其循謹幹練。夷衆素所信服者。酌派一員統轄。一。納貢以昭恭順。蠻疆貢賦無幾。然非此則無以示羈縻。而覘順逆。從前班滾不法。不納貢賦。恣意妄為。而內地竟無由向彼查察。此其明驗。應請查照蠻例。隨其地利。或

青稞或馬匹。或皮張酌折銀兩。交統轄之土司完納。一。巡察以警愚番。新分土目衆多。既不設兵彈壓。又無文員稽查。恐歲久積玩生奸。應於每年秋末。令該管文武大員前往。隨帶茶封賞號。於適中之地。傳集大小土司土目。公同考核。有無夾壩。並一切案件。隨與剖結。安靜者賞。違犯者罰。均照松潘巡察之例辦理。一。定禁以防負固。班滾所恃者戰碉堅固。高至七八層。重重鎗眼。藉為戰守之資。今

實錄卷一百九

十九

俱檄飭拆毀。惟留住碉樓止。嗣後新定地方。均不許建築戰碉。即修砌碉房。亦不得高過三丈。違者拆毀治罪。其鄰近良善土司。舊有高大碉樓。原以防外寇。而嚴守禦。相沿已久。不必一例禁遏。一。立法以清夾壩。班滾積惡。多在夾壩。今惡黨殲滅殆盡。終恐不無一二犯法之人。應請斟酌夷例。嚴立賞罰。如番人夾壩。搶劫財物者。為首。以三九罰服。為從。以一九罰服。追賠失主。致傷人命者。另議抵償。

牽線窩藏者。同罰。該管土司土目。縱容失察者。分別記過降革。仍照諱盜例議罪。刊刻番漢字木榜。置立各口。通行曉示。得旨。議政王大臣議奏。尋議。均應如該督所請辦理。其禁止建造戰礮一條。巡查之員。每年前往一次。地方遼濶。週徧為難。保無有私行建築之處。其餘土司。現有高大礮樓。若至傾圯。亦不便復准建造。應如何巡查禁止之處。仍令該督詳議奏辦。至籌畫經理之方。總在相其地土

實錄卷二百六十九

三

形勢。順其夷情風俗。措施得宜。乃為久遠安全之計。應令該督會同川撫紀山。詳籌妥辦。此外再有應行酌辦之處。另行具奏。得旨。依議速行。○又奏。中路領兵官建昌鎮總兵袁士弼。前以捏報軍情。叅奏革職留任。并革去總統。今復據提臣李質粹咨揭。袁士弼留任以來。並不實心効力。怠緩規避。貽誤軍機。理合據實密叅。得旨。袁士弼著革職。拏交刑部。從重治罪。該部知道。○又奏。原叅河州鎮總

實錄卷二百六十九

三

兵張豹。在川省軍營効力。攻礮殺賊。屢著勞績。可否送部引見。量為棄瑕錄用。得旨。張豹著送部引見。該部知道。○己丑。諭軍機大臣等。據陳大受奏。稱署太倉州事高廷獻。查捕邪教之王徐氏。及伊甥女周氏等。尚未飭結。突有數十人。持香齊至州堂。聲言周氏係觀音轉世。王徐氏係活佛臨凡。我輩來迎接供養。適高廷獻往鄉相驗。未回。各犯即赴蘇。於臣下鄉勸農時。有太倉嘉定寶山崑山新陽青浦等處民人。一百數十名。焚香跪稱。伊等皆賣產入教之人。今活佛被拏。不可得見。求提來一見。死亦甘心。因此并追出張保太所傳經帖等件。現飭兩司提究。按律定擬等語。張保太在雲南設立邪教。招集多人。竟有謀為不軌之意。王徐氏等即係張保太傳教之黨羽。今在江南肆行勾結。煽惑人心。竟敢倡率百有餘人。健訴於巡撫之前。或係欲保王徐氏等釋放。或別有強橫之狀。必不止如陳

大受所奏。求提收禁之人一見也。奏摺中顯有粉飾。非係實情。安寧身在地方。知之必悉。可傳旨密行詢問。令其據實具奏。尋安寧奏。太倉邪教一案。經撫臣委臬司嚴審。王徐氏及徐樹績等。實係劉奇黨羽。並又究出多人。現仍研訊。至衆人到蘇。求見周氏。皆王徐氏及左允文等。商謀號召。意在徼倖求寬。並無別故。其跡雖似挾衆要請。然於撫臣前。實是執香懇求。並無強保王徐氏之言。亦別無強橫之狀。但人多嘈雜。有似喊鬧。是以外間有邪教多人。閑閑撫臣之訛傳。其實撫臣所奏。並無粉飾。此案關係極重。臣斷不敢稍涉瞻徇。報聞。○又諭曰。韋蕩營叅將韓烈。揭報河道葉存仁等一案。已降旨令劉統勲會同尹繼善陳大受秉公查審。爾等可傳諭劉統勲。韓烈所揭道廳。俱係該省文員。而各款又係該上司應行查察之事。伊不得稍有瞻顧偏向。務須查出實情。公平妥辦。○戶部議准。浙

實錄卷三百九

五

江巡撫兼管鹽政常安疏稱。三江東江兩場。坍沒草蕩灘場。共缺正課銀五百五十三兩零。隨徵車珠銀九兩零。請自乾隆八年為始。照數豁除。從之。○庚寅。

上御勤政殿聽政。○諭昨據韓烈揭葉存仁吳同仁各款。現交劉統勲會同該督撫秉公查審。茲顧琮所叅韓烈貪劣不職各款。著將韓烈解任。亦交劉統勲等。一併嚴審究擬具奏。○諭軍機大臣等。朕聞浙江定海一帶地方。

實錄卷三百九

五

自仲夏以來。雨澤愆期。直至六月初旬甘霖未沛。將來秋收必至歉薄。馬爾泰現在浙省。常安身任地方。此等水旱關係民生之事。自應刻刻留心。何以俱未奏報。可傳諭詢問。令將該處實在情形。及如何料理之處。一併奏聞。尋常安奏查定海縣。五月間雨水稍缺。至六月初旬後。連沛甘霖。田野霑足。早禾約有七分收成。臣前因該縣孤懸海外。豫撥省米四千石。隨於五月內減價平糶。復動倉穀酌

借。是以米價照常。民情寧帖。得旨覽奏俱悉。
○又諭。現在福建福寧府屬。有西洋人倡行天主教。招致男女。禮拜誦經。又以番民誘騙愚氓。設立會長。創建教堂。種種不法。挾其左道。煽惑人心。甚為風俗之害。天主教久經嚴禁。福建如此。或有潛散各省。亦未可知。可傳諭各省督撫等。密飭該地方官。嚴加訪緝。如有以天主教引誘男婦。聚衆誦經者。立即查拏。分別首從。按法懲治。其西洋人俱遞解廣東。

實錄卷三百十九

三

東。勒限搭船回國。毋得容留滋事。倘地方官有不實心查拏。容留不報者。該督撫即行叅處。○戶部議覆黑龍江將軍富森疏。稱呼蘭左近溫得亨山。地土寬廣。水草佳美。可設官莊。請於奉天將軍查送願種地開戶人內。能種地之壯丁。每十名設官莊一座。仍歸舊官莊領催管轄。應如所請。從之。○安西提督李繩武奏。哈密三堡之西南。西喇諾爾地方。西通準夷。魯克察克闢展之來路。自徹卡後。準

夷多有從此潛過被獲者。防範不可不周。請照舊設卡。又烏拉臺卡座之北五十里。有畢柳大坂一處。係走鹽池通哈喇溪洛等處之路。而烏拉臺卡座。瞭望未能及遠。亦請添設卡座。得旨。軍機大臣議奏。尋議。應如所奏。西喇諾爾地方。准設一卡。派兵二名。間以纏頭三名。每年八月起至次年四月止。坐守瞭望。畢柳大坂地方。亦准設一卡。派兵二名。間以纏頭二名。從之。○調福建海壇鎮總兵官哈

實錄卷三百十九

三

攀龍為漳州鎮總兵官。○辛卯。諭。據江蘇布政使安寧奏。稱自免米豆稅銀以來。弊竇叢生。不可枚舉。即如豆餅應稅。今則載豆過關作餅矣。香油有稅。今則載芝麻過關矣。此據大關而言。至其餘口岸。藉稱免稅。不服查驗。往往恃衆搶關。只得任其所往。莫可如何。且商賈維利是圖。受免稅之恩。不肯減數以售之民。胥役乘奸作弊。以飽無厭之橐。米數日多。國課日少。而米價之貴。較甚於前。應請仍

照舊徵收等語。朕思加惠商民。恩施格外。於乾隆七年四月內。特降諭旨。將各關向來例應徵收之米豆稅課。悉行蠲除。原因小民朝饔夕飧。惟穀是賴。免其輸稅。則百穀流通。糧價必減。民食可得充裕。恤商正所以惠民也。乃自免稅以後。各關所報過關之米。果日見較多於前。而價值並未平減。且反增加。朕細加諮訪。皆因商人惟利是圖。不知朕恩。並不肯因免稅之故。稍減價售賣與民。且過關之

實錄卷五十九

三

時。隱匿夾帶。種種偷漏。胥吏又乘勢為奸。刁蹬勒索。以致米價轉昂。百姓並未受益。安寧所奏。確係實情。此亦臣民所共知。即朕亦不能謂彼言非是也。是減稅之舉。惠未及民。徒使奸商胥吏。飽其慾壑耳。崇本抑末。乃古帝王治天下之常經。商賈貪利病民。亦國法之所當懲者。但朕念衆商乃無知愚人。當先加以化導。冀其醒悟。不忍於未經曉諭之先。降旨遽循舊例。著各該督撫。仰體朕心。愷切訓

諭。俾各商感發天良。悉除私弊。督撫等仍設

法查察。妥協辦理。庶幾足食便民。閭閻均受其福矣。嗣後如果年歲歉收。而米價昂貴。尚屬情理中事。若遇豐收之年。米糧販運者多。其價仍未平減。則明係奸商教而不改。怙過不悛。此減賦之恩。專為商人之所壟斷。不能使草野均霑。是朕以國家之制賦。為無益之蠲除。轉不如照例徵收。使帑項有餘。得以大沛恩膏。民受實惠。為挹彼注茲之用也。但輕徭薄賦。朕之本懷。凡受賜者。果能改其嗜利欺公之惡習。勉為良善。自可永承惠澤。朕實有厚望焉。○軍機大臣議奏。定邊副將軍額駙策凌。將自準噶爾投來之俄羅斯人伊番解京。查雍正十二年。俄羅斯婦人伊納博克來投。因向與俄羅斯定議。不相容留逃人。仍命送還。今應照此例。令理藩院行文俄羅斯。并派員將伊番解送至恰克圖地方。交俄羅斯守邊頭目。從之。○癸巳。

實錄卷五十九

三

上詣暢春園問

皇太后安。○諭軍機大臣等據那蘇圖奏稱通倉運宣粟米因道路泥濘車馬重載坑塹難行暫請停運等語從前原因宣化被災之後恐米糧不能接濟是以酌籌撥運以備倉儲今自閏三月以來該處連得雨澤田禾茂盛可望豐收將來米糧自不至於缺少可傳諭詢問那蘇圖此項運到之米若已敷用則通倉之米即可停其轉運或尚須撥濟令其酌

實錄卷二百六十九

三

看道路及本地情形相時辦理其已經運到若干尚須轉運與否一併奏聞尋奏宣屬自閏三月以來雨水調勻田禾茂盛口北一帶均可有秋臣前因時屈農忙復以夏雨過多擬俟高秋路坦再行運米與順天府府尹蔣炳札商意見相同暫令緩運復諭宣化府知府就近酌看秋收情形米糧是否充餘近地可否購買口外買運較通倉運腳節省若干從長核計俟秋成後詳酌定議奏請辦理或

尚須撥運若干彼時再為起運又據宛大二縣及宣化府各報到運送過祿米倉米一千九百四十八石接收貯倉得旨既有此意何不早奏明耶○又諭據蘇昌奏稱奉天所屬地方六月初旬大雨連綿承德等縣山水驟發禾稼被淹夏麥歉收現在設法賑恤等語朕上年降旨將奉天海禁展限一年以接濟畿輔民食今直隸雨水均調秋成可望而奉天有被水情形若將海禁俟九月限滿之時

實錄卷二百六十九

三

方行停止恐商販衆多本地米價必致昂貴有妨民食可傳諭達勒當阿蘇昌斟酌本地情形應否即行停止之處速行奏聞辦理至於賑恤災荒原以惠養本地土著民人各省定例以造入烟戶花冊為憑流寓之人不在賑恤之內不知奉天向來此等之人一體賑恤與否著蘇昌查明舊例速行具奏待朕降旨尋達勒當阿蘇昌會奏奉屬自被水之後糧價日增若俟限滿始停海禁恐兩月餘源

源販運。米價益昂。有妨民食。似應即行停止。臣等酌議行文沿海地方。查商販米糧已載船者。聽其販運。其囤積存貯者。令即在奉屬照市價糶賣。於商民兩有裨益。報聞。○甲午諭軍機大臣等。據鄂彌達開奏。所奏拏獲襄陽居民王榮崇。奉邪教。捏造謠言一摺。朕已批諭。前據張廣泗奏報雲南張保太。貴州魏齋婆。四川劉奇等。彼此勾結為奸一案。朕已降旨抄錄。寄與鄂彌達。開泰閱看。留心辦理。

實錄卷一百九

三

今覽鄂彌達等搜出邪書。內中所載。與張廣泗所奏邪書相同。看來此等匪犯。顯係彼此連結。聲息相通。蔓延各省。非一鄉一邑之邪教。誘人錢財者可比。著鄂彌達等嚴加審訊定擬。不可稍有寬縱。並將單內所開姓名。抄錄寄去。務將實情究出。若有他省之人。即行開會該督撫。緝拏審理。勿令免脫。○議政王大臣等議覆。先據雲南總督張允隨奏稱。滇省永順東南徼外。有蠻名卡瓦。其地茂隆山

廠。因內地民人吳尚賢。赴彼開採。礦砂大旺。該酋長願照內地廠例。抽課作貢。計每歲應解銀一萬一千餘兩。為數過多。可否減半抽收等語。臣等以卡瓦遠居徼外。吳尚賢越境開礦。似屬違例。並有無內地民人。前往蠻地滋事之處。行令該督查明具奏。茲據復稱。滇省山多田少。民鮮恒產。惟地產五金。不但滇民以為生計。即江廣黔各省民人。亦多來滇開採。至外夷雖產礦。不諳煎煉。多係漢人

實錄卷一百九

三

赴彼開採。食力謀生。安靜無事。夷人亦樂享其利。查定例止禁內地民人潛越開礦。而各土司及徼外諸夷。一切食用貨物。或由內地販往。或自外地販來。不無彼此相需。是以向來商賈貿易。不在禁例。惟查無違禁之物。即便放行。貿易民人。或遇貲耗。欲歸無計。不得不覓礦謀生。今在彼打礮開礦。及走廠貿易者。不下二三萬人。其平常出入。莫不帶有貨物。故廠民與商賈無異。若概行禁止。此二三

萬人生計攸關。況內外各廠百餘年來。從無不靖。以夷境之有餘。補內地之不足。亦屬有益。今生蠻卡瓦葫蘆酋長蚌筑。雖化外未通職貢。其獻納實出誠悃。請照孟連土司輸納募迺廠課減半賞收之例。准其減半報納。仍將所收。以一半解納。一半賞給該酋長。應如該督所請辦理。至民人往來番地。巡防宜密。或有逃犯奸徒。私入外番廠地滋事。仍令該督嚴飭汛口官弁。實力稽查。從之。○以直隸

實錄卷五十九

三

張家口副將何祥書為陝西延綏鎮總兵官。○是月。奉天府府尹蘇昌條陳災賑事宜。一。奉屬州縣所轄遼瀾。每遇散賑。赴城領糧。往返維艱。請將應賑糧石。分貯四鄉適中之區。腳價每石每百里。給銀五分。一。查辦糧務。一切吏胥紙筆飯食。向無公項。請定以大州縣四名。中州縣三名。小州縣二名。日給銀一錢。自勘災日起。至賑竣止。一。委員車馬旅費。亦所必需。請將試用知縣現任經歷。州判教職

每員日給銀三錢。准帶跟役二名。每名給銀五分。巡檢典史。每員給銀一錢五分。准帶跟役一名。均於庫貯雜項內動支。得旨。所議尚屬可行。而實力稽察。妥協辦理。則汝一人之責也。勉之。○直隸總督那蘇圖覆奏唐登芳一犯。臣密飭司府等官設法偵緝在案。查大乘教係大成教改名。大成教又係空子教改名。從前天河等府被旱時。臣曾徧訪得各邪教。如聞香橋梁伏魔抹抹等名色。嚴行示禁。

實錄卷五十九

三

臣現在飭令密查。如唐登芳實係保定人。斷不令漏網。得旨。又聞此人已死。但根究其有無室家妻子。並傳受伊教之人可也。○又覆奏昌平通州各屬。六月十二日。地中微震。民間並無驚恐情形。得旨。覽奏俱悉。保定究屬微覺耶。抑無耶。此等處。汝摺奏中行文總不明悉。以後留心。尋奏。前奏昌平等處。地覺微動。摺內將保定等屬。未曾地動之處。遺漏聲明。實屬疎忽。臣自念受恩深重。學問未遑。惟

失此愚誠。斷不敢於君父之前。少存粉飾。得旨雖未嘗學問。心之思慮所及。告之幕賓。彼豈不能行文耶。若一聽幕賓主張。失之多矣。○又奏報直隸通省雨澤霑足。禾稼將次登場。民情歡忭。並多倫諾爾地方。雨水均調。游牧水草暢茂。蒙古一帶邊疆。禾黍豐盛。貿易安貼。各情形。得旨所奏光景。京師亦同。較汝處有過之無不及也。然此際朕尚不敢謂即定豐收之象。維祈

實錄卷三十九

高

天恩。照此清朗旬餘。俟萬寶告成之後。幸五臺時。與卿相見。我君臣之喜。當何如耶。○直隸提督馬爾拜奏。巡查直省各營。須三載方能一周。未為嚴密。請將臣所轄前。昌薊。永。河。屯。五協營。按春秋兩季出巡。改為年半一周。得旨。惟在實力行之。若隨例了事之巡察。反不若在鎮加意之整頓也。此奏知道了。○兩江總督尹繼善奏。江西南昌。南康。袁州。臨江。南安等府。各屬稟報。四月二十五。至五月初一

二等日。陰雨連綿。山水陡發。溪河泛漲。沿河民房多坍。城垣衙署倉監亦有倒塌。低窪田畝。豆苗淹浸損傷。間有淹斃人口。查被水各地方。雖係一隅偏災。而統計數州縣。窮民受累者。已屬不少。臣已飛飭速委確勘。分別已未成災。酌量撫恤。借給籽種。給與修房銀兩。其城垣衙署倉監等項。飭各地方勘估修整。並咨撫臣塞楞額就近妥辦。再瑞州。吉安。廣信。饒州等府各屬。亦有稟報被水之處。據稱

實錄卷三十九

主

水勢較小。田禾未甚受傷。臣恐所報不實。現在委員查勘。分別辦理。得旨覽奏俱悉。○江蘇巡撫陳大受奏報。淮。徐。海。三屬。自五月下旬至六月初。大雨時行。河湖驟漲。所有邵。宿。桃。清。海。沐。各州縣隄工民埝。均有衝決。田畝房屋被淹。飛飭司道委員分勘。查淮。徐。海。三屬。節經水患。現值秋禾徧野。可望收成。不意又被淹浸。情殊可憫。現飭將藩庫存項內。動支銀十萬兩。解交淮安。以備賑恤。得旨。淮。徐。

海所屬州縣。連年秋災。甚堪憫惻。其加意撫恤。毋致窮黎失所。○江蘇布政使安寧奏。浙江兵丁夥劫。該管武弁。在都探問行賄一案。奉旨交江蘇學政崔紀同臣審辦。應將一千人犯。撥弁押赴浙省。並將未獲要犯鄒鈴。移咨浙撫嚴拏。臣當即起程前往。其江蘇布政使及許墅關稅務。令蘇州府知府暫為代理。得旨知道了。此事甚有關係。須秉公酌中為之。不可漏網。不可滋蔓。○江南蘇松水師總兵胡貴奏。督查海洋各處寧謐。並崇邑二麥豐收。雨暘時若。得旨覽奏欣慰。巡洋之事。更當實心。不可虛應故事而已。○江西南昌鎮總兵高琦奏。整頓營伍。首在親查。若照部定成例。尚需時日。請於今冬。考校各屬官兵勤惰。分別勸懲。得旨是。既經巡查。須實力整飭。不可苟且了事而已。○閩浙總督馬爾泰覆奏。二月間。詔安漳浦二縣民人。搬逃入粵一事。彼時臣在閩省。並無聞見。當即密委標弁。

訪查確報。茲據撫臣周學健札稱。面晤將軍新柱。據云。春間正在彼處巡閱。見各屬士民彬彬禮讓。風氣安恬。並未有漳詔民人搬逃之事。惟二邑內。向有粵民流寓。近因編查保甲。相率搬去。以致訛傳。亦未可定。又據該鎮道稟稱。二月間。巡行至彼。居民安堵。此事毫無影響。或因粵省饒平所屬貧民。常來趨食。因見今春將軍查口。道府又清查保甲。此輩結隊促歸。造言怨望。容或有之。似與撫臣所述將軍之言相符。但事關民俗。未便輕信。俟密訪的實。再行奏聞。得旨。若有意掩飾。汝等皆大臣。將來何以見朕耶。亦告之周學健。○浙江巡撫常安奏。查江海潮出入之所。凡有三處。近蕭山者為南大壘。近海寧者為北大壘。蜀山之南。有中小壘一道。向來江海匯流。由此出入。南北兩壘。漲沙寬闊。杭紹俱慶安瀾。自中小壘湮塞。南大壘淤出之地。已成平陸。於是溜勢直趨北大壘。而海寧始虞泛。

溢議修議築。歲費帑金無算。乾隆九年。尚書公訥親。勘視海塘情形。擬將中小壘故道。開濬深通。分減北大壘溜勢。令臣相機辦理。臣查蜀山迤北。向有積沙。寬至四五百丈。橫亘中間。先就沙嘴開溝四道。均成坎形。以引潮水攻刷。嗣後不時疏通。節經大汛攻刷積沙。上年冬間。漸覺坍卸。溜緩潮平。開溝已有明驗。臣思趁此水勢順利。正宜及時疏濬深通。即不能全溜直達中壘。而水勢南分。北岸塘

實錄卷三十九

吏

工。不致受患。節次專派員弁督率兵目挑挖。本年春汛伏汛已過。南沙坍卸殆盡。蜀山已在水中。倘秋汛不復湧沙。則大溜竟行中小壘矣。得旨。此言安可輕出。亦再看三五年後何如耳。如果全行中小壘。固可喜之事也。○又奏。台州府屬之臨海縣。民俗素稱强悍。本年六月。雨澤偶愆。竟有屠戶朱昭奇。用鑽穿通項內皮肉。藉名為農取水。哄動城市。經該府將朱昭奇押發臨海縣取供。隨有夥黨葉

阿環。朱應鰲。朱昭林等。沿街喊嚷。強令罷市。觀看多人擁擠。鋪戶等惟恐滋事。間有收閉鋪面者。該犯等隨又擁入府縣衙門。擠塌門前照壁。經文武官查拏。始行散去。臣思海疆重地。動輒逞強。況台州地近福建。上年有杜瀆場私梟拒捕一案。閱時未久。復有此不法之事。未便少寬。業飭拏究。至文武員弁平時未能化導。臨事又未能禁戢。亦當叅處。以儆懈弛。得旨。知道了。此等事。固屬官民皆有過

實錄卷三十九

吏

失。然以警刁風為先。必當嚴治首犯。寬其隨從。而徐以他事處其辦理不善之官吏。則得矣。然總而言之。汝督撫威令若行於平時。想亦不致屢屢有此事也。返躬尤為要務。與馬爾泰共觀之。○浙江提督陳倫炯奏。據台州協副將路一鶚詳報。台郡雨澤愆期。設壇祈禱。六月初五日。突有民人朱昭奇。鎖喉沿街拜雨。當經知府拏究。復有地民開關開店。擁集府縣各署。當飭該副將。會同地方官開誠

曉諭密訪為首棍徒。嗣據報獲葉阿環等一十三人。續獲逸犯朱昭奇。審供通詳。除候督撫審辦外。理合據實奏聞。得旨覽奏俱悉。浙省頻有此事。且汝標下之兵。即有為盜者。茲所奏又復為路一鶚掩飾。足見汝平時並不以封疆為重。而徒博寬大為姑息了事之舉。甚負朕倚任之意也。○福建巡撫周學健奏。閩省五月苦旱。率屬虔誠祈禱。茲於六月初二三日得雨。連日雲氣四布。雨勢極寬。早稻

實錄卷二百六十九

四十

晚禾可期暢茂。得旨覽奏曷勝欣慰。○又奏福州等屬雨澤愆期。結壇祈禱。清理監獄。以冀速沛甘霖。得旨閩省覺旱。朕早已知之。日夕望汝之奏。茲汝二次摺奏。同日而到。閱摺時先見汝報雨之摺。後見此奏。雖奏事內侍顛倒安置不明所致。然汝此次差遣之人。亦可謂不盡心乃事矣。至既經得雨。則此奏亦不過付之知道了而已。○福州將軍新柱奏謝接管粵海關稅務恩。得旨覽。雖然如是。但

實錄卷二百六十九

五

汝所辦殊覺不如策楞。以後勉之。○湖廣總督鄂彌達等奏。准貴州督臣張廣泗咨。拏大乘邪教夥犯莫少康。劉選昇。孫其天三名。隨密飭各州縣嚴拏。已將莫少康、劉選昇二犯拏獲審明。解黔歸案辦理。查此等邪教流傳已久。黔楚毗連。入教者必多。現就莫少康之父漢先取供。受有名號夥犯。復拏獲彭貴江、陳南明二名。此外如尚有開堂接衆傳播妖言者。自當嚴行拏究。其無知被誘。止於念經喫齋者。令其自首免罪。得旨此案情頗大。不可以尋常邪教視之。屢有旨向大學士等處頒發。想汝尚未接到耳。所云無知被誘。亦必其實係無知被誘者可耳。凡係為從。概不可寬。○湖北巡撫開泰奏。湖北通省社倉現存穀麥共計五十二萬餘石。若不及時設法整頓。日久恐多虧缺。但各屬社倉散在村莊。未便特行委員遍查。致滋擾累。查州縣應行興革諸事。例應該道府按季巡查。擬飭各道府

於巡查所至。遇有存貯社穀之處。即便抽驗。倘有挪移等弊。將社長分別責革。勒限追賠。過多者。將失察之州縣揭報。得旨。此見甚好。所為不動聲色之辦理也。○山東巡撫喀爾吉善奏。泰安兗州等屬九州縣。因六月中旬大雨連綿。汶泗沂淄各河水發。衝漫隄埝。瀕河地畝。不無淹損。民房亦多浸坍。除委員確勘。加意撫恤。並將積水田畝。設法疏濬。俟涸出。仍可趕種收麥。以冀晚收。得旨。覽奏俱悉。

實錄卷三十九

聖

一切悉心料理。務期災黎均受實惠可耳。○山西巡撫阿里衮奏。臣於去秋。巡查南鎮。經過蒲絳一路。訪聞上年被水緣由。係因涑水泛漲為害。隨飭河東道周紹儒溯流尋源。條議疏濬之法。據稟稱涑水發源於絳縣。經聞喜夏縣安邑猗氏。自臨晉虞鄉西入五姓湖。河水挾沙而來。歲久未濬。沿河多淤。至猗氏之邸家營。地勢窪下。河水南潰。不復經行故道。一遇驟雨。山水長發。上游不能暢流。下游

又無歸宿。致聞喜等十二邑。多被水患。應自聞喜之河兒頭。至安邑之東陽村。兩岸淤墊。盡行挑挖。河身開濬寬深。至邸家營決口處。添築寬大土隄。自猗氏之崔家灣起。至臨晉之西智光村止。截住南潰之口。其自臨晉至五姓湖。應照舊日河形。挑濬寬深。則涑水順流達湖。無虞泛漲。臣正擬奏請動帑興工。旋據聞喜猗氏夏縣安邑臨晉虞鄉等縣稟稱。沿河居民。聞欲興工。俱鼓舞急公。各出已

實錄卷三十九

聖

力。挑濬修築。自三月初開工。業於四月內工竣。臣委員查勘。工程俱屬合式。再查從前涑水南潰。逼近猗氏臨晉二縣。若遇歲旱。轉資灌注。今水歸故道。害除而利亦廢。應於二縣交界處。建分水石閘。以時啓閉。俾得分水灌田。仍於從前決口。砌立涵洞。引灌隄南地畝。業經照例咨部。興工建築。得旨。知道了。○又奏。臣標中軍叅將蕭奏韶。整理戎伍。謹慎老成。經臣保薦。今閱兵部選單。該員論俸陞銜。

調補潞澤營參將。查潞澤係偏營簡缺。不比中軍責重事繁。懇將蕭奏韶。以陞銜仍留本任。得旨。標員從無陞銜留任之例。不准行。○甘肅巡撫黃廷桂奏。平番。河州。安定等屬。被旱被雹。各村莊。可補種者。借給籽種。如有成災處。飭司委勘詳報。又寧夏縣屬王洪堡。淹地六頃。或應借籽種。或應貸口糧。亦令查明妥辦。得旨。覽奏俱悉。具有被偏災者。題報雖有定例。而甘省遠在天末。一應辦理。全在汝

實錄卷二六九

四

妥協周詳。使毋濫母遺。災黎早受一分之賜。即早免一分之苦。慎之。不可忘也。○又奏。四堆子一帶。逼近黃河。應築二十里遙隄。並加培六堆子以下舊堤。惠農渠。昌潤廢渠。近多淤墊。應分段挑濬。並添建惠農渠口滾水石壩。永惠。永潤。永豐等閘。左右石閘。現已一律修竣。再寶豐廢地。雖經招墾。貧戶尚缺牛具。有寧夏西路同知戴國珍。急公捐給。俟秋成時。逐一勘實。再行具奏。得旨。開渠開墾。皆務

實錄卷二六九

四

農之本。實慰朕懷。○四川巡撫紀山奏。拏獲白蓮教案內。冒稱李開花之蘇君賢一犯。俟解到。與劉奇等犯。審訊明確。並將窩戶劉珍處。搜出邪經簡帖。一併查明。再行續奏。得旨。覽奏俱悉。此案當速行辦理。以正典刑。若遲待獄中。恐生他故。豈可與尋常命盜案。一例論限乎。○又奏。准貴州督臣張廣泗咨。緝邪教人犯。現將莫少康。劉選昇。拏獲。並別獲夥犯彭貴江。陳南明。二名。及偕莫少康往滇。同時被獲之夥犯李之華等六名。當即解黔歸案。惟孫其天一名。及莫少康供出偽號同夥之瞿學璜。陳世華。姚學海。周大璋。李宏道。五名。現飭州縣懸賞。躡緝。得旨。此等惡汝姑息之念。不除。而使要犯漏網也。勉為之。○又奏。拏獲匪犯吳守忠。彭章等犯。臣未親提審訊。仰蒙訓飭。罪實難辭。隨提各犯嚴訊。該犯等將打造軍器。謀劫地方各情。供認不諱。但與上乘教劉奇。並非同夥。應將吳守忠。擬斬立

決彭章擬絞立決其餘各犯分別流徙得旨
汝辦理此等事甚不滿朕意夫封疆之寄尚
有重於此者乎於此而存姑息是婦人之仁
也戒之○又奏白蓮教煽徒甚衆現又續獲
邪犯周鳳翹郭廷璧等五十餘名其中有知
情而倡為齋頭給人授記展轉相招者有聽
從邪說喫齋入夥者飛飭分別解省並據涪
州等屬將前獲劉奇等六犯陸續解到臣率
同布按兩司逐一研訊究出陰謀不軌大逆

實錄卷三十九

四六

不道確情並冒稱李開花之蘇君賢現在巴
縣墾種當即專差往拏蘇君賢有母吳氏兄
蘇君澤在金堂地方現已拏獲另行審究臣
一面將搜出邪書有隱藏悖逆語者另錄呈
覽一面將劉奇供出在川之王清真王之璧
張萬學等十四名飛速密拏在雲南貴州直
隸江南江西湖廣山西之胡大思朱牛八呂
齋婆等十九名密咨該省查拏分別辦理得
旨覽此豈汝等所能究出想接到張廣泗之

咨會耳。攘人功而為己有。甚屬無恥。不謂汝
竟如此。朕自愧無知人之明。○雲南總督兼
管巡撫事張允隨奏報滇省新開金沙汧鹽
井渡羅星渡三處通川河道。所有京銅運道
俱可改陸從水。現據督理銅運之迤東道宋
壽圖等稟報。三處水運抵瀘京銅。共計六百
五十萬三千五百餘觔。行走甚為順利。至昭
通向苦米貴。自江工告竣。米價平減。民食亦
裕。得旨。如此水運較先前陸運。每年節省幾
何。繕簡明摺奏聞。○貴州總督兼管巡撫事
張廣泗奏。雍正十三年苗叛案內。附逆之檔
愛。尚堯。尚挨。三犯。均已拏獲究辦。餘無一名
漏網。得旨。好。知道了。

實錄卷三十九

四七

大清高宗法天隆運至誠先覺體元立極敷文
奮武孝慈神聖純皇帝實錄卷之二百六十九

實錄卷二百六十九

四六

大清高宗法天隆運至誠先覺體元立極敷文
奮武孝慈神聖純皇帝實錄卷之二百七十

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次慶桂

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十一年丙寅秋七月乙未朔享

實錄卷二百七十

一

太廟遣履親王允禔恭代行禮○諭據廣東巡

撫準泰奏報廣州府屬之南海三水順德肇

慶府屬之四會鶴山開平恩平南雄府屬之

始興韶州府屬之曲江仁化英德乳源等縣

因大雨水發有被衝田畝圍基房舍之處民

人間有傾壓淹斃者定例夏災止有借貸口

糧籽種未及賑恤之條等語朕心深為軫念

著將實在乏食貧民給與一月口糧所有沙

壓田畝倒塌房屋及淹斃人口令該撫查明

俱著加恩分別撫卹其被災稍輕應須借給口糧籽種者即行借給秋後免息還倉俾被水民人均霑實惠無致失所該部遵諭速行○戶部議准原署廣西巡撫託庸奏稱百色產米有限從前價賤自設鎮後兵米數千餘石取辦一隅米價昂貴不稍變通將來兵民交困查南寧府屬與百色相近該處米價之貴春夏為甚請自乾隆丁卯年始將右江鎮春夏二季兵米於宣化等三州縣額徵內撥支本色秋冬二季仍赴司庫支領折色其左江鎮不敷之處應於潯州府屬湊撥從之○丙申諭曰直隸總督那蘇圖兩廣總督策楞江蘇巡撫陳大受福建巡撫周學健簡任封疆歷有年所實心宣力甚屬可嘉那蘇圖策楞著加太子少傅陳大受周學健著加太子少保以示優眷○丁酉

上詣暢春園問

皇太后安○

上還宮○諭據總督尹繼善奏稱六月初旬大雨時行又兼東省上游之水同時匯注以致運河宣洩不及邳州宿遷桃源清河安東各州縣水漫村莊現在委員確勘先行撫卹海州所屬贛沐二縣近河村莊亦多漫水飛飭確勘動項撫卹等語現在水漫之各州縣俱係上年被災之地今秋禾又復被淹朕心深為軫念著該督撫等加意賑卹遴委妥員善為料理俾災黎早登衽席又奏稱上江鳳臺

縣淮河水長濱河最低之田間被水淹雖為數無多受災亦輕亦著一體撫卹該部即遵諭速行○又諭據署河道總督顧琮奏稱今年運河水漲較雍正八年為大河工在在危險臣飛飭道廳等官晝夜搶護竭力防範今水勢消退保固無恙等語今年運河汎水較往年盛漲目今伏汎雖過而秋汎踵至湖黃攸關緊要著協辦大學士高斌即乘驛前往將運河一帶情形察看並將防秋事宜同顧

琮悉心妥商定議。交與顧琮豫為防範。尋高斌尹繼善顧琮等奏覆。修補善後事宜。一酌籌黃河工程。查黃河衆水匯流外河。山安海防三廳隄工尤屬險要。今年被漲衝溢。應酌量加培。至豐碭桃源各廳。或加高隄堰。或挑濬河道。或添築月隄。分別辦理。一酌籌洪湖工程。查洪澤湖山盱廳之沈家西林家西等處。向係土隄。應改建磚工。至高堰廳之六安溝。舊工卑矮。亦應加培。磚工一酌籌淮揚運

河工程

一

河工程。查淮揚之惠濟河。閘年久損壞。應行修補。至南關車邏二壩。束水隄埝尚應寬展。應開挑支河。一酌籌桃清中河以上工程。查邳宿桃清運河為衆流匯注之地。今年伏秋盛漲。隄堰殘缺必多。該處西岸緊貼黃河東岸。為糧船緯道。俱應加築高厚。其餘遙隄格隄。關緊要處亦應一律加培。下部議行。又諭據尹繼善奏稱海州一帶所屬近河村莊被水衝淹等語。朕已降旨。令該督撫加意賑

卹。惟是海州係連年被災之區。其賑卹事務及如何辦理。使將來民困得蘇。著高斌就近籌畫。一面辦理。一面奏聞。直隸河道總督印務。暫交劉於義署理。尋高斌尹繼善陳大受等奏覆。海州被水災民。凡乏食戶口。俱先行撫卹一月。坍塌房屋。照例加銀賞給興修。現飭員親駐督辦。酌撥江蘇庫銀十三萬兩。倉穀四萬石。米一萬七千石。解州備用。不敷。就近於運庫鹽課銀。及截留漕米內撥運接濟。

得旨

一

得旨。如是災黎可以稍救溝壑矣。用是稍慰耳。戶部議覆陝西巡撫陳宏謀奏稱。常平倉糧貯城中。近城窮民最需實惠。遠鄉之民遇有平糶賑借。往返維艱。查西安府屬臨潼縣之關山鎮。藍屋縣之祖菴鎮。渭南縣之下邽鎮。富平縣之美原鎮。離城隔遠。四處皆有城堡。縣丞駐防。又同州府屬之離城較遠者。蒲城縣之永豐鎮。巡檢分防興安州之恒口鋪。雖無佐雜分防。舊有官倉九間。附近防汛

兵弁足資防護以上六州縣請分建倉廩即著各鎮堡兵弁等就近稽查其建倉之費除恒口鋪毋庸另建外餘在倉費內動支應如所請從之○移江南崇明縣縣丞駐五滌右營守備駐七滌與左營調換管轄從兩江總督尹繼善請也○移直隸靜海縣奉新驛驛丞駐獨流鎮從直隸總督那蘇圖請也○戊戌諭軍機大臣等巡視吉林御史塔坦所奏該處兵儲倉穀並未完納又擅賣牢獄房屋

拉林拏解人犯四十名至發特哈驛站全行脫逃三款朕已批交阿蘭泰納木扎勒查議具奏矣看來吉林地方官兵頗流於積習將軍巴靈阿自到任以來惟圖了事御下寬柔辦理事務率多瞻顧並未實力整飭陋習剔除積弊爾等將此情節寄諭阿蘭泰納木扎勒令查明塔坦所奏情由秉公妥協辦理並將所查情節即行奏聞○刑部議覆江西道御史王應綵奏稱舊律總注一家三人皆無

應死之罪而殺之為首者凌遲為從加功者斬三人內有一人實犯死罪或不係一家者不用此律再聚眾共毆而斃一家三命者將率先聚眾之人不問共毆與否斬決為從下手傷重至死者絞候若殺一家非死罪二人及非一家而殺三人者與謀殺一人之情罪較重應擬斬決細繹注意一家三人皆無應死之罪一段係注解本律正文聚眾共毆一段係因共毆而致死一家三命分別定擬蓋原無必殺之心所以別於謀殺也至殺一家非死罪二人一段即前注所云三人內有一人實犯死罪或不係一家乃仍指謀殺故下文緊接與謀殺一人之情罪較重所以別於共毆也今新頒律內於殺一家三人本律後另立聚眾共毆及殺一家二人條例者原以補律之未逮第情罪較重一語恐問刑衙門錯會概照謀殺例擬毆死一家二命者斬決毆殺一家三命者凌遲輕重不侔請敕下刑

部叅考酌改應如所請。將凡殺一家非死罪三人句下於律注內添謀殺故殺放火行盜皆是字樣。其聚衆共毆一條下若殺一家非死罪三人及殺三人而非一家一節另立一條。仍將與謀殺一人之情罪較重十字補入。詞意更為明顯。援引自無歧誤。又稱律內一家不同居之五服專指父子兄弟至親。不得旁推竊思五服專指父子兄弟。則不同居之祖孫及期親伯叔反不謂為一家。情理未協。所奏毋庸議。惟將律注內父子兄弟改為本宗五服四字。實為彙括從之。○工部議准兩江總督尹繼善疏稱。淮揚徐海四府州水利工程非有專員責成。易致廢弛。應令派定工段各員。於每年秋汛後週巡確勘。設有坍塌。即分別官民估修。倘該員不實心經理。總轄官指名揭叅。大計年將所管工程河道是否深通堅固之處列入事實冊內一體考察。從之。移湖北施南協千總一員駐宜都營。從

湖廣總督鄂彌達請也。○旌表守正捐軀之山東招遠縣民盛連喜妻曹氏。○緩河南永城鹿邑夏邑三縣被水田畝。本年應徵并四六七年帶徵額賦。已亥以直隸河間協副將鄂海為福建海壇鎮總兵官。○庚子諭軍機大臣等。據紀山具奏查審川省邪教二摺。朕已詳覽批發。看紀山始初辦理此案之時。甚屬寬縱。經朕降旨訓諭。今覽所奏。仍存開脫之意。即現在訊明各犯口供。亦因接到張廣泗等知會。始究出匪黨根由耳。而奏摺內又將朕從前批諭之處隱匿不錄。顯有前後回護含糊取巧之意。輕視重案。若此。有負封疆之寄。可傳旨嚴行申飭。此等奸民。廣通聲氣勾結各省匪類。肆行無忌。非誘騙財物煽惑一鄉一邑者可比。此時若不留心辦理。以淨根株。則首惡雖除。而為從者仍可繼起。為害如雲南之張保太。因從前遇赦釋放。今日遂至蔓延。豈非前車之鑒乎。又紀山奏內吳

守忠堅供鐵船教不與大乘教同派並非通達聲氣等語查張廣泗奏稱大乘教內僧人得文供教有三船一名法船二名瘟船三名鐵船觀此則鐵船教未必非大乘教之黨也將此一併寄與知之此案甚有關係大學士慶復此時正在四川可傳旨諭之令其暫留川省與紀山會商辦理其中或有鄉曲愚民實在被誘尚無妄亂情事者或稍可原其他則法所難宥不當以案內人衆存靜鎮姑息之見貽風俗人心之患也蓋乘此敗露之時自應徹底澄清不留餘孽庶幾地方可以永寧良民可以受福否則兇頑不知儆惕將來之蹈法網者轉多是寬之適所以害之也可令伊等體會此意悉心查審定擬此旨即隨紀山摺發去伊齋摺之人未免稽遲時日爾等仍從兵部飛遞俾慶復在成都接到以便辦理又諭紀山奏報審訊大乘教內首犯劉奇供出各省齋頭辦事之人俱係要犯著

將未獲各犯姓名鈔錄分寄各該省督撫令伊等嚴拏務獲再單內未經注明住址各犯姓名亦一併鈔寄各該督撫訪緝勿致漏網尋兩江總督尹繼善奏覆川省劉奇供出要犯名單內住籍江南者四名查黃忠清據王徐氏供即揚州府興化縣之王惟素已於乾隆五年身故邱立先即王徐氏案內之邱笠仙張理正即吳時濟供出之張履正夏天佑即前奏西來教舊案之首犯均於未奉旨之先逐一拏獲究審其未經注明住址各犯六名現飭通緝不敢疎忽得旨知道了尚應督緝查拏務獲○又奏續據蘇常各府先後緝獲邪教王徐氏黨羽姚君茂等十四名又究獲吳時濟名下黨羽杜玉梁等十一名起有授記封號一切妖書概令解蘇以便會覈提訊分別定議得旨所見是矣照此實力辦理可也仍宜速行定案以彰國法而免意外之滋事也○壬寅諭軍機大臣等前據紀山奏

稱大乘教首犯劉奇供內有呂齋婆。王志仁俱係直隸掌教齋頭。并開明王志仁在京城報國寺住。常與魏王氏往來。朕已降旨查拏。尚無蹤跡。可傳諭紀山。詢問劉奇。將呂齋婆。王志仁。籍貫年貌。實在住址何處。係何年月。并有無同夥之人。一切情形。詳細究問。明確。速行奏聞。尋奏覆呂齋婆。王志仁。下落。訊鞠劉奇等犯。俱堅供不知。必須弋獲。張天序。曾瑞芳。始知蹤跡。容臣等密飭訪拏。報聞。又諭前據紀山奏稱。審訊大乘教內首犯劉奇。供出各省齋頭。有呂齋婆。王志仁。係直隸掌教。已將姓名寄與那蘇圖。令伊嚴拏。內王志仁一名。據劉奇供稱。住在報國寺。常與魏王氏往來。朕降旨查拏。尚無蹤跡。王志仁等。係直隸掌教。自必在直隸地方藏匿。可再傳諭與那蘇圖。令其速選妥協之人。將呂齋婆。王志仁。留心密訪。嚴拏務獲。速行奏報。尋那蘇圖奏覆。王志仁一犯。注有在京城報國寺。常

與魏王氏往來字樣。魏王氏係女流。諒必近在報國寺。除另選妥人。分頭躡訪外。一面密札順天府尹。就近訪拏。一面移咨川撫。紀山。將首犯劉奇。訊明各犯住址年貌。俟有確蹤。到日另摺具奏。得旨。若在京者。何待汝等查拏。以言其在外者耳。應於所屬留心密訪。嚴緝。亦不必張皇滋事。癸卯。諭軍機大臣等。據陳大受奏稱。上年淮徐海三屬。夏秋被災。倉儲動用多缺。統計三屬所存。不過二十七萬餘石。徐海二屬。所缺尤多。自應豫為籌備。查該三屬現存。歷年糶價十四萬兩。似應通融酌撥。徐海二屬。令該府州督率所屬。毋拘本境鄰封。購麥存貯等語。淮徐海三屬。連年被災。自應早為籌畫。陸續購買。以裕倉儲。何以糶價積至十四萬兩之多。而不補足乎。況此三屬。今歲又復被水。若在本境購買。是以災地之麥。接濟災民。徒增時價。有何裨益。今年江南豐收之處甚多。何不委員於麥價平

減之地。酌量購買。陳大受辦理此事。識見未能周到。可傳旨訓諭。令其委員。於所屬豐稔地方採買。或麥或穀。以足三屬倉儲缺額。并將辦理之處。具摺奏聞。尋陳大受奏覆。淮海徐三屬倉穀。緣夏秋兩災。廣為平糶。價銀存至十四萬。現遵旨委員。齎價前赴上江米糧聚集處。擇價平者酌買。惟是淮徐海一帶。賑需緊急。現存倉穀二十七萬餘石。又江南倉穀陸續撥運二十萬石。共計四十七萬餘石。目下撫賑搭銀兼放。差足敷應。將來豫備儲蓄。俟買回運貯後。酌量緩急。隨時查辦。得旨覽奏俱悉。○工部議覆湖廣總督鄂彌達奏稱湖北濱江水勢衝激。今金沙洲已建石岸。收麥灣又築月隄。可以互資捍禦。惟武昌望山門外王惠橋為金沙洲江口入水之區。請添建石閘一道。依時啟閉。外防江漲以免衝淹。內蓄湖水以備旱潦。應如所請。從之。○旌表守正被戕之河南嵩縣民毛永會妻郭氏。

○甲辰

孝懿仁皇后忌辰遣官祭

景陵○

上詣

雍和宮行禮。○幸圓明園。○諭軍機大臣等。軍營換班人員。皆自到日起限扣滿年分。方准呈請更換。其發往臺站効力人員換班。亦應俟期滿日。再行奏請更換。今觀保劉廷錫一係七月杪。一係八月初旬。始滿年限。伯泰先期輒行代為奏請。殊屬非是。著申飭。便中寄諭知之。○乙巳。諭朕思淮徐海所屬州縣。連年被災之由。蓋緣該處地形。有本屬低窪者。而海州為衆流入海之區。較他處尤甚。歷年經理河務。凡疏通宣洩之方。俱隨其形勢挑挖。前經陳大受奏稱六塘南北湖河之水。盡由沐陽海州入海。宣洩不及。以致為災。經大學士等定議辦理。是應行籌畫之處。俱已加意料理。而仍不免於水患者。蓋因從前被災稍輕處所。俱不奏報。

遂覺被災之時少。今則無論災之大小。悉令奏聞。是以災傷屢告。其實非今多於昔也。海州為水之所蓄。若該處免於滯。則是本年雨少。而高阜之地。被旱必多矣。惟是小民屢困沈災。朕心深為憫惻。所當多方籌度。以圖善策。即地勢低窪。不能全去其患。然去其太甚。則受災之民少。而數年積困。亦可漸甦。前高斌去時。已令將此後如何辦理之處。悉心計議。大學士等。可再行傳諭。令其會同尹繼善。顧琮。陳大受等。務須商推妥協。俾將來水患。可望漸除。再前據陳大受奏。稱倉儲多缺。現存糶價。積至十四萬兩之多。未曾買補。朕思三屬乃係常被水患之處。積貯尤關緊要。何以存貯銀兩。不豫於豐收之地買補。及至被災。仍欲於本地採買。徒增時價。於民何益。已降旨訓諭。令伊於所屬豐收地方。或麥或穀。委員採買。尹繼善共有地方之責。將此一併傳諭知之。諭軍機大臣等。朕閱總督尹

繼善。參奏沐陽縣知縣羅士瓚一本。因該縣衙役毆死生員王煥。以該縣庇役無能。請旨革職。內稱縣令職司教化。首重作養斯文。至於凌辱士子之風。漸不可長。等語。夫人命重大。律有明條。州縣等官。縱役殃民。在官人役。干犯法紀。改換姓名。曲為徇庇。自有一定之處分。初不因毆死者之為士為民。而有所區別也。疏內作養斯文。凌辱士子之語。屢見。此乃尹繼善素日存好名之見。今為此蛇足。不過冀博士子之歡心。以蹈襲虛聲耳。向來紳士多有在地方。倡率愚民。滋生事端者。近觀士習。尚知歛跡。今尹繼善身為督臣。乃為此奏。則不肖士子。窺知此意。必致故習復萌。強縱肆橫。致罹法網。非徒不能保全之。而轉致滋事。貽累地方矣。實尹繼善有以啟之也。凡督撫大吏。移風易俗。是其專責。而於士習尤當首先防檢。不至令其澆漓躍冶。使百姓觀感成風。尹繼善豈不知之。何為徒務虛名。不

求實政。殊非整飭地方之道。爾等可傳諭與尹繼善。令其痛改此習。諸事務實辦理。○又諭曰。內大臣班第。副都統銜努三。差往瞻對軍營。率領侍衛官員拜唐阿等。督催綠旗官兵。晝夜奮勇攻擊。焚其巢穴。逆寇悉平。班第等著領侍衛內大臣。會同兵部議敘具奏。其帶往人員。俟班第查明勞績。分別等第後。亦著一併議敘具奏。○戶部議准。川陝總督公慶復奏稱。哈密撤防後。留兵二千。軍屯糧食。尚存十三萬石。零且客民與回民交易。詞訟繁多。兼之回民屯田。四六分糧。碾打收割。務須專員稽查。其防兵口糧錢糧。經官收支。事務尚繁。該處管糧文員。若裁減僅留一員。定難兼顧。應照原議酌派更換。從之。○陝西道監察御史白瀛奏。江寧布政使安寧奏稱。米豆稅之免。無益有損。請照舊徵收。仰蒙斷自宸衷。却其所請。安寧職司旬宣。如所稱胥役賄縱。商民欺隱。自應立法防弊。乃不能悉心

辦理。而反肆無稽之言。阻格仁政。伏願皇上斷以勿疑。持之悠久。不為浮議所惑。得旨。安寧所奏。不過在關言關。白瀛此陳。亦係在諫言諫。至於事之應行與否。朕自有定見。摺中引古譏誹。立言過當。至勸朕以勿惑浮議。朕若果為浮議所惑之主。白瀛未必敢為此奏也。敬讀。

皇祖實錄。謂明代之亡。實亡於言官之肆為譏訕。各為門戶。以致尾大不掉。不可不慎。此誠洞見千古治亂之幾。言官進言。亦直陳其事之可行與否耳。敷衍鋪陳。所謂欲加之罪。何患無辭耶。○調廣西右江鎮總兵官畢暎為四川建昌鎮總兵官。○丙午。命督撫留心積貯。諭各省積貯。原以備地方荒歉之用。賑卹平糶。俱仰資於此。而地方官每以倉貯足額為畏途。惟以年來米價昂貴。恐增時價為詞。是以各省有未即購買者。即如江南淮徐海三屬。貯價甚多。平時並不買補。朕念此三屬

乃時常被水之區。積貯尤關緊要。已諭令在所屬豐收之地採買。其他貯價未買者。自不獨江南一省。今歲豐收之處尚多。正宜趁此時留心籌畫。豫為倉貯民食之計。俾不至穀賤傷農。但必以本地之穀補本地之倉。恐收成分數不齊。產米多寡不一。或因一時採買米價又致昂貴。有妨民食。著各該督撫酌量所屬地方情形。有二麥既豐。而秋成又稔者。動撥歷年所存穀價。分路採買。亦不必迫期足額。務須妥協辦理。使倉儲可以漸充。而米價不至增長。○諭軍機大臣等。大乘教一案。據各督撫審出人犯姓名。已密諭查拏究訊。務盡根株。但此時未經發覺者。固不可使之聞風遠遁。即現在供出姓名可指者。亦不得任其匿跡潛逃。如雲貴省所供出四川之人。而四川本省。轉未究出。四川省所供出雲貴之人。而雲貴本省。每多遺漏。可見奸匪易於漏網。則辦理之法。須得其頭緒。方可根究。前

四川巡撫紀山摺奏。現在投首者紛紛。又據楊錫紱亦奏。稱入教之人。令其自首。此等自首之人。搜緝有線。盤詰有根。正可於此根尋蹤跡。再其中情罪不一。惟實在無知被誘。覺而自悔者。方准其自首。量為末減。仍須交與地方官。不時稽查。其始事之兇。為從之黨。自當分別按律治罪。即情罪似乎稍輕。而有附助之形跡者。亦當充發。以散黨羽。朕看此案各省辦理不同。可傳諭各該督撫。令其遵照此旨查辦。使邪黨盡除。而定擬亦得畫一。尋據川陝總督公慶復。四川巡撫紀山奏覆。查黔滇兩省。移咨川省。應拏教匪共五十六名。已獲三十五名。川省審出應拏一百二十四名。已獲九十四名。餘犯現飭各屬上緊查拏。至三船邪教。名雖有三。其實則一。皆奉大乘教之邪術。今法船之劉奇。先獲審擬。瘟船之雪峯。已獲旋斃。而鐵船首惡朱牛八。現據邪黨胡衡供出。移咨滇省會緝。未准回覆。現在

根尋黨羽不使漏網至緝奸之方定罪之法。臣等遵諭分別妥辦報可。○丁未工部議覆廣東巡撫準泰奏稱潮州府海陽縣東南北等處隄工業已興作查有蔡家園沿隄一段係屬險要前因有礙民居遂不入估冊內今率同府縣工員查勘此段委係首險若不一律修築猝有疎虞全園村田廬舍大有關係并據該地居民情願將傍河水樓拆去修築懇請動項興修應如所請從之。○貸直隸武

清吳橋寧津天津青縣滄州南皮慶雲鹽山固安永清昌平通州三河薊州寧河河間獻縣阜城肅寧任邱故城東光獲鹿平鄉廣宗鉅鹿內邱威縣清河磁州蔚州西寧蔚縣冀州南宮新河武邑衡水栢鄉臨城高邑寧晉深州武強饒陽安平易州涞水延慶衛喀喇河屯等五十一州縣衛屯被旱災民寶坻薊州寧河灤州東光西寧萬全玉田豐潤八溝同知等十州縣廳被水災民井陘平山贊皇

葉城獻縣唐山保安蔚州宣化萬全懷來西寧蔚縣赤城武強饒陽易州廣昌曲陽等九州縣被雹災民○賑貸安徽靈璧縣被雹災民并予緩徵○戊申

上詣暢春園問

皇太后安○旌表守正捐軀之河南永城縣民趙九妻張氏○已酉中元節

上詣

安佑宮行禮○遣官祭

永陵

福陵

昭陵

昭西陵

孝陵

孝東陵

景陵

泰陵○遣官祭

端慧皇太子園寢○皇八子永璇生○諭朕

聞洪澤湖周圍寬廣五百餘里。一遇風起浪湧。船隻每有漂溺之患。康熙年間蒙

聖祖仁皇帝特設救生椿釘於石工之外。使被溺之人得以攀援而上。全活甚多。今夏家橋地方有舊葦壩一座。并高堰迤南順水壩一座。俱有口門。為遭風船隻躲避之所。於行舟甚屬有益。著再於高堰廳屬之老隄頭山。盱廳屬之高澗壩迤南。及徐家灣周橋等四處。各添設護隄救生壩。俾沿

湖一帶人船。恃以安全。該部即行知署河道總督顧琮。令其遵諭妥協辦理。○又諭曰。白鍾山在總河任內。辦理河工種種濫用。應賠帑銀甚多。查伊在京房產所值不過數千金。聞其宦資皆寄頓於淮揚鹽商之家。代為營運。朕降旨與吉慶令其訪察。奏聞。今據吉慶奏稱。有淮北商人程致中收存白鍾山銀二萬兩。又程致中女婿汪紹衣在清江開當舖收存白鍾山銀四

萬兩。又商人程容德收存白鍾山銀二萬兩。又商人程遷益收存白鍾山銀二萬兩。代為營運等語。白鍾山身任總河。乃與鹽商交結往來。以貲財託其營運。甚屬無恥。計伊為河東江南總河以來。不過十一二年。每年所得養廉除用度之外。所存未必能多。何以餘積之物。寄頓商家者。據吉慶現在開報已有十萬之數。看此則巧宦欺公。暗飽私橐。究不能不敗露也。著尹繼善將吉慶開報者一一追出。以補白鍾山應賠之項。其他或再有寄頓之處。亦著尹繼善細加嚴查。毋得徇情隱漏。前陳法在工部具呈。以白鍾山力不能賠。代為申辨。且稱總河並無冒銷侵蝕之弊。今查出白鍾山巧取多金。暗為營運。陳法向為河官。若全不知覺。則糊塗昏憤可知。若知而故為此奏。則明係袒護上司。自蹈欺罔之咎。陳法其又何辭。將此並諭臣工等知之。○諭軍機大臣等。白鍾山應賠濫用河工銀兩甚多。

查伊在京房產所值不過數千金。聞其宦資皆寄頓於天津淮陽鹽商之家。代為營運。今據吉慶查出。所寄淮揚商人銀兩已有十萬之數。其寄頓天津各商代為營運者亦所必有。可傳諭伊拉齊令其密加訪查。勿容稍有隱匿。查出即行奏聞。尋據長蘆鹽政伊拉齊奏覆。臣遵旨一面密訪。一面諭運使鄧釗細查。據稱查訪並無影響。尚恐或有隱漏。隨據各商出具隱匿坐罪甘結。再白鍾山曾任河東總河。亦經密差妥人往濟南樂口等處暗訪。亦無寄頓之事。報聞。○又諭據朝鮮國王李吟奏稱。臣聞今於鳳凰城邊外開墾莽牛哨地方。設兵屯田。信如臣所聞。墾田設兵耕種。則中間界河不能禁人往來。竟成通衢。將禁之難周。戒之弗從。臣國邊疆獲罪者自此始矣。臣國上下人民不勝惶懼。不得不據情陳奏等語。現已交部妥議。俟具奏時。朕酌降諭旨。觀該國王所奏。蓋以其境內之人素有

乘間偷越挖參者。若我設兵巡察。則伊等不得任意往來。所奏亦屬卑鄙。小國之人不識大體。惟知縱下謀利。不思寧定邊疆。而故謂難行以示我。亦未可知。再伊疏內有從前鳳凰城立界時。曾留沿江曠地百餘里等語。此蓋恐我於原留空地駐兵屯田。逼近彼疆耳。此等情節達勒當阿於從前具奏時並未聲明。殊屬錯謬。且去年熊岳副都統鄂齊爾欲帶兵出鳳凰城行圍。經守邊章京等以與朝鮮國止隔一江。所關重大。未許其行。達勒當阿亦曾將此事奏聞。今此二處惟莽牛哨應行巡察。遣副都統什勒捫親往察看。據稱中江東北哨二十里。江中有一洲。其北支水一曲。即莽牛哨地方。江中有石一條。即係與朝鮮分界處。現在添撥官兵巡防。皆在吾界內。每年三月間。遣舟師四名巡察。於冰釋後撥二舟往守莽牛哨要隘。其二舟輪流巡察。所有官兵俱不許踰江中界。若彼此各加嚴禁。

不致相通等語。著仍照原議行。勿從其請。其鳳凰城邊疆。向外餘地開墾耕種一事。著照所請行。再達勒當阿前奏請巡察莽牛哨時。部議另詢之朝鮮國王。再行定擬。經朕批改准行。今朝鮮所奏若此。則於彼國必有所不便。且雍正九年。那蘇圖曾奏此事。因朝鮮諄懇。是未果行。迄今十餘年。並無他故。其巡察此處。於我邊境有無裨益。或於伊國實有妨礙之處。著再行詳查。俟文移往來。得其情形。辦理亦易。此次達勒當阿若親往巡察。誠恐聲張。致啟疑端。著不必去。再令副都統什勒捫前往確察。達勒當阿亦當留心。務將察看情形。據實奏聞。不可回護已往。將此寄諭將軍達勒當阿。嚴飭邊界官兵。加意防察。倘伊屬下人等。妄滋事端。達勒當阿即便宜行事。一面奏聞。一面酌辦。不可姑息。亦不可輕率。無論有事無事。惟當以防守邊疆為務。○命派青海扎薩克等。更替巡守卡座。

實錄卷三十一

天

實錄卷三十一

天

大清高宗法天隆運至誠先覺體元立極敦文奮武孝慈神聖純皇帝實錄卷之二百七十

大清高宗法天隆運至誠先覺體元立極敷文奮武孝慈神聖純皇帝實錄卷之二百七十一

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事務處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣謹

總纂官經筵講官太子太傅文華殿大學士文淵閣領閣事稽察欽奉 上諭事務處管理理部三庫事務

世襲騎都尉軍功加十九級隨帶加二級又加二級臣謹書謹錄滿洲都統軍功紀錄五次

尋常紀錄十四次臣謹隨經筵講官太子少保工部尚書謹錄欽奉 上諭事務處管理

敦修

乾隆十一年丙寅七月庚戌

實錄卷二百七十一

上御勤政殿聽政 諭曰戶部尚書海望現在

出差侍郎三和傳恒兼管內務府事三人又

俱圓明園行走不能時常到部辦事戶部不

可無坐辦之堂官著將吏部侍郎雅爾圖調

補戶部侍郎其吏部侍郎缺著將德齡調補

三和熟悉工程著即補工部侍郎則兩部皆

得人矣 諭總理

三陵事務著蘇和訥與貝勒允祁等協同辦理

○大學士等議覆順天府尹蔣炳奏拏獲宏

陽教董應科等一摺內稱此教傳習百餘年

牽引十四州縣據大興縣訪得京南紫各莊

三教堂為宏陽教聚集之處塑有邪教神像

宛平縣訪得宏陽教會頭郎堡村係連玉惠

坎檀村係任一魁大井村係劉氏等并據拏

獲各犯訊供稟報除將董應科按律治罪外

所塑邪教神像應行毀棄改為寺院田產即

為該寺香火至各村會頭連玉惠等供認祖

父以來傳習此教當即重責枷示將所藏經

實錄卷二百七十一

卷圖像銷燬等語應如所奏辦理惟查三教

堂係邪教聚會之所若僅改為僧寺恐日後

結連香會積久復萌請勅該府尹會同直隸

總督就該地情形酌量撥為公所隨時稽查

其田產亦酌量充撥從之 軍機大臣等議

覆福建巡撫周學健奏福安縣潛住夷人以

天主教招致男婦二千餘人書役等俱被蠱

惑請從嚴治罪等語查天主教係西洋本國

之教與然燈大乘等教有間遽繩以法似於

綏遠之義未協。應令該撫將現獲夷人。槩送澳門。勒限搭船回國。從教男婦。擇其情罪重大。不可化誨者。按律究擬。若無知被誘。量予責釋。毋致滋擾。從之。○吏部議御史宜兆罷等於會議雲南總督張允隨奏李文貴毆死胞兄李文遠一案。該御史不遵定例。兩議具奏。應將御史宜兆罷等分別議處。得旨三法司之設。原以公同商榷。俾情罪相當。以慎重民命也。今大理寺不過隨同畫題。並未見盡心改正之處。惟御史內尚有留心商酌者。此案宜兆罷等竟分門戶。並未遵奉朕從前所降諭旨。是以將伊等交部議處。但九卿既仍照伊等所議覆奏。朕已允行。思丕著銷去紀錄十六次。免其降調外。宜兆罷等俱著照部議所降之級。從寬留任。又聞此案將宜兆罷等交部後。御史等有將已經兩議之案。微名者。此不特非秉公辦理之道。抑且全未喻朕教訓伊等之本意矣。著一併飭行。○調廣東

左翼總兵官索政為福建海壇鎮總兵官。雲南永順鎮總兵官黃士俊為廣東左翼總兵官。福建海壇鎮總兵官鄂海為雲南永順鎮總兵官。○辛亥。諭軍機大臣等。伊拉齊奏報關稅一摺。朕已批令該部核議。但內稱贏餘比上年缺少之故。俱因本年春夏之交。天時亢旱。河道水淺等語。關稅缺少。果有實在情形。自應據實奏聞。亦不在乎盈絀也。京師每年春雨甚遲。今歲直隸地方。春夏之交。較之往年得雨尚早。伊拉齊此奏。不過欲掩飾短少之故。作此脫卸之辭耳。所見甚小。爾等可傳諭申飭之。○又諭蘇尼特等游牧處所。今年雨水短少。水草平常。牲畜多致傷損。恐貧苦蒙古等不無失所。令玉保往查沿途駐防官兵之便。由彼馳赴蘇尼特等旗。會同扎薩克等查勘。如實有貧乏不能度日者。應如何加恩賑濟之處。詳議具奏。尋奏詢據盟長索諾木拉布坦等稱。現在各處水草稍歉。然以

貧苦之人與富裕之家通融兼食尚可不致困乏。應令蘇尼特等旗貧富通融。即於富家牲畜內抽取十分之一以賑貧乏。報聞。壬子諭。此次征勦瞻對業已蕩平巢穴。軍務告竣。所有運糧員弁漢土官兵從前雖無議叙之例。但念此番進勦將及一年。為日既久。糧運各員漢土弁兵等皆能始終實心出力。甚屬可嘉。著該部分別議叙具奏。○癸丑上詣暢春園問。

皇太后安。○諭曰。奉天將軍達勒當阿等奏稱。廣寧地方五六月間陰雨連綿。山水驟發。兵丁房舍所貯米糧均被淹沒。業與侍郎蘊著會議。一面奏聞。一面將本城倉米借與兵丁等每人一月口糧。以資接濟等語。此項借支米糧著加恩作為賞給。免其償還。至用過米石數目著盛京戶部查明。俟應買補時動項照數採買還倉。○甲寅諭軍機大臣等。前據四川巡撫紀山審訊逆犯供內有金友端知

道呂齋婆下落等語。今金友端已經拏獲。可傳諭鄂彌達等令其研訊金友端。務將呂齋婆現住何處根究明白。具摺速行奏聞。不得任其狡飾。再鄂彌達奏內有拏獲金友端並同行之夥犯曹定祥祝邦寬嚴正士等語。而前次楊錫紱摺內何以未將拏獲夥犯曹定祥等三名奏聞。可詢問楊錫紱令其明白具奏。尋鄂彌達開泰等奏。臣等將金友端追提回省會同嚴詰。委實不知呂齋婆下落。又據

黔省咨拏之汪士傑供稱。當日呂齋婆係涼水驛馬牌子王老二跟隨進京。必知下落。現已飛咨黔省嚴拏究訊。報聞。又楊錫紱奏查貴州咨拏邪教各犯。湖南係莫少康劉選昇孫其天。湖北係金友端。原分兩省查拏。因湖北差役跟緝金友端至湖南寧鄉縣查獲。並獲金友端同行之曹定祥等三人。即將該犯速解湖北收審。其是否金友端夥犯應聽督臣同湖北撫臣究明具奏。是以未及瑣叙。報

聞。○又諭四川巡撫紀山奏報審訊逆犯譙元魁供內稱魏齋婆下川時曾說貴州有箇呂齋婆在唐登芳之前進京去勸教等語是呂齋婆現居何處實在下落魏齋婆必知詳細可傳諭張廣泗務必訊取呂齋婆實在蹤跡即速奏聞尋奏臣將魏王氏并呂齋婆壻張天序嚴加究訊據供呂齋婆前在京城西便門外白雲觀內寄寓現今不知存亡已移咨直隸總督飭拏務獲報聞○旌表守正被戕之直隸蔚州民劉生花女劉氏○乙卯諭江南山安海防兩廳屬所轄黃河南北兩岸隄外灘地如遇水漲之年田禾不免被淹聞今年秋汎之水較往年更大灘上居住之民房俱被淹浸幸未淹之前居民見水勢漸長陸續搬移隄上搭蓋蓆棚以蔽風雨但田禾無收將來難以餬口著該督撫即速委員將被水窮民確查明白加意妥協賑卹毋令失所該部遵諭速行○兵部議覆朝鮮國王李

吟奏稱近聞熊岳副都統來中江查閱邊界欲於莽牛哨添設屯兵鳳凰城展柵開墾伏念鳳凰城柵外曠地百餘里禁人居住以免混雜今若墾土設屯則衣帶之水不足以限往來之路易於相通查康熙五十四年上國民人等有在土門江岸結屋居住者蒙聖祖仁皇帝徹毀雍正九年草駿河匯流欲設卡防守蒙世宗憲皇帝停罷乾隆二年內地商民議與中江交市又蒙皇上諭令中止今副都統來查之地即雍正九年停罷防汎之所而今此設屯墾土之事比土門中江等事輕重相懸仰懇降旨停罷等語查奉天將軍達勒當阿原議於莽牛哨添設官兵原因該處係內地邊界應駐官兵彈壓復經查明江心有石嶼一道與朝鮮東西分界所議駐兵處與該國界址尚隔巨浸即開展邊疆墾闢地畝亦係內地不至雜擾且

原議兵船於西岸停泊。不許擅侵東界。惟期查拏奸匪。以為久遠安全之計。則設汎之議。不特邊境肅清。於外藩亦大有裨益。應將該國王所奏。均無庸議。得旨。莽牛哨添設官兵。巡查一案。前據部議。應再令該將軍悉心妥酌。續據達勒當阿奏稱。令熊岳副都統什勒。親往查看設汎之處。與朝鮮實不相通。無慮混雜滋擾。且於內外俱屬有益。經部覆准。朕已允行。茲據該國王陳奏前來。以墾土設汎。於伊國未便。朕又勅交部議。該部以無庸議覆奏。朕思我朝加恩朝鮮。從來優渥。今莽牛哨添設官兵巡查一事。既經什勒查明。與該國界址無慮混雜滋擾。且於內外俱屬有益。而該國王又陳奏其不便。情詞懇切。究未知該地實在情形如何。著兵部尚書班第。馳驛前往。率同什勒。將彼地情形。詳加察勘。如果設汎之處。係中國界內。與彼國毫不相涉。則設兵置汎。以杜奸宄。所以肅靖邊防。

自屬應行之事。即該國王懇請。亦不便准行。若其地界或有犬牙相錯。難免混淆之處。亦即據實奏聞。候朕另降諭旨。至從前議准達勒當阿所奏。展邊墾土一案。該國王既稱鳳凰城樹柵之外。向留空地百餘里。務使內外隔截。以免人烟輳集。混雜滋事之患。此奏尚屬可行。著將鳳凰城展柵之處。照該國王所請停止。並令該部傳諭該國王知之。○貸直隸滄州。鹽山。寧津。河間。東光等五州縣。並興國。富國。豐財等三場。旱災竈戶。○丙辰。諭軍機大臣等。據湖廣總督鄂彌達等奏報。六月初八日。棗陽縣因豫省上游。蛟水大發。沿及該處。以致被淹。又據安徽巡撫魏定國奏報。鳳。潁。泗。所屬懷遠。阜陽。五河等處。因六月初旬。至十三四日。連降大雨。而上游豫省地方。水發。下注湖河。以致漫淹等語。是江南湖廣之水。皆發於豫省。巡撫碩色。何以不行奏報。查伊六月摺內。但有雨水霑足之奏。爾等可

傳諭詢問令其將現今該省實在情形並如何料理之處即速奏聞尋奏查豫省東南一帶歸德陳州汝寧等府與湖廣江南接壤並無蛟水大發之事惟六月中接連大雨三屬秋禾被淹現將被災貧戶酌借口糧籽種俟查明成災分數後再行加賑得旨汝近來諸事頗不認真戒之至於查辦賑卹尤當加意妥辦不然汝所司者何事耶○丁巳諭曰御史張孝捏以學校科舉等事具摺陳奏朕臨御以來孳孳以作養人材為念凡所以鼓舞振興誘掖獎勸設立科條亦既明且備矣今覽張孝捏所陳皆屬必不可行之事即如伊稱天下貢監令國學不拘人數隨考隨收等語夫聚天下之貢監於國學無論勢不能容即教者亦何由而得遍為訓迪況到監之人原係隨考隨收其在監肄業者不可不加以分別亦所以示鼓勵也至所稱科舉額數不必限定之處尤屬舛謬朕因士子平日不能

盡心向學徒務科舉虛名以致文藝拙劣者混入其中殊非激勵之道是以斟酌再四限定額數庶免薰蕕無別而務虛名者知所罷勉皆向實學也況所定之額大省中式舉人一名科舉至八十名中省亦有六十名已不為少若如張孝捏所奏則不論其人之能終場與否概令混入則是等賓興鉅典為兒戲力學者不知所勸不向學者不知所懲可以為法乎張孝捏所奏皆屬紛更定例邀譽沽名甚屬不合著嚴飭行○諭軍機大臣等從前慶復以官兵進克如郎具奏朕曾降旨將慶復紀山交部從優議叙其提鎮諸臣並官弁兵丁亦行議叙彼時正當攻克如郎之際是以加恩鼓勵以作士氣而振軍聲然諭旨內已將提鎮以至兵丁功過之處著慶復分別覈定具奏誠以賞罰貴於分明而功績不可以冒濫也此次征勦瞻對兵丁等不甚奮往直前皆由統領之提鎮等遠巡畏縮以致

曠日持久。將及一年。甫克底定。今當軍務告竣。正當使功過分明。然後官兵知所懲勸。李質粹從前隨聲附和。漫無可否。負朕任使之意。曾經降旨申飭。今伊摺內尚有克獲如郎之語。而據班第奏稱。攻克如郎之時。班第已經脫逃。僅得空寨。則知李質粹全係虛辭欺飾。且總兵以下官兵。臨事皆不能奮勇爭先。則伊等平日之廢弛營伍。可知。爾等可傳諭慶復提鎮大員。為弁兵之表率。尤當加意。此次征勦。瞻對自提督以至兵丁。一切功過。務須秉公覈實具報。不可絲毫瞻徇。庶使人人知所懲勸。將來或有出兵之處。官弁兵丁等咸有所儆惕矣。○又諭朝鮮國王李昉奏請停止鳳凰城邊外墾田。莽牛哨地方添設巡察兵丁。表內援引康熙五十四年奏請折毀土門江岸所建廬舍。禁止種田。蒙聖祖仁皇帝恩准。雍正九年。奏請停止莽牛哨地方設立卡座。蒙

世宗憲皇帝恩准。乾隆二年。請罷中江互市。亦蒙朕恩准。各情節。歷查舊案。實係皆俯准所請行。可知我欲舉行之事。因伊奏請。俱已停止。此固懷柔小邦之意。但屢以難行之事。俯准所請。輒為停止。於國家體制。亦有不合。轉為輕視。曷若不舉行之為愈也。此等情節。著即曉諭達勒當阿。凡事俱遵照舊制辦理。似此有名無實。礙難辦理之事。著勿舉行。其後任將軍大臣。不知復恐有欲如是辦理者。著存記該處檔案。以便永遠遵行。○吏部帶領降調同知圖璽引見。得旨。圖璽著仍發河南。以同知用。嗣後府佐貳等官。如有因公降革。經朕降旨調取來京引見者。亦照州縣之例。不必開缺。○閩浙總督馬爾泰奏。覆浙江營兵夥劫武弁在部行賄一案。臣秉公會訊。并慎選弁員。往寧郡探聽。該處人情。悚懼懷疑。且官兵上下相侮。毫無鈴束。提臣陳倫炯。實不能彈壓。仰懇速簡提臣。以肅戎行。至叅將

連英夥同標弁在部打點招搖。遊擊嚴雄遣子入都。鑽營行賄。今審出實情。一併嚴叅。得旨所見亦小矣。兵丁滋事。國法具在。此皆地方大吏向日怠緩。以致釀成此風耳。審如是。則一任兵民犯法。朝廷不得過而問之矣。成何政體。光天化日之下。彼即鼓譟。亦惟明正典刑而已矣。○賑貸山東東平魚臺濟寧汶上蘭山郟城益都博興高苑樂安壽光安邱諸城昌邑濰縣膠州高密寧海等十八州縣被水災民并予緩徵。○戊午。

上詣暢春園問

皇太后安。○諭據閩浙總督馬爾泰奏稱營兵夥劫武弁在部行賄一案。若俟會審定案。將陳倫炯題叅未免有稽時日。提督為專閫大臣寧郡係海疆重地。仰懇速即遴簡來寧等語。陳倫炯著解任候審。其浙江提督員缺著江南提督吳進義調補。速赴新任。江南提督員缺著山東登州鎮總兵譚行義補授。登州

鎮總兵員缺著膠州營副將馬負書補授。○又諭曰。李元亮現有母喪。戶部辦事乏人。其侍郎員缺著蔣溥暫行署理。○又諭軍機大臣等著寄信與阿忒依。以中江稅課。往往虧缺。始令伊前往試收。今觀所報二年稅銀數目。較前歲所收轉少。此或因伊辦理人參事務。以致疎忽。或係伊不認真辦理。阿忒依係朕簡用試收之人。如果難辦。必至虧缺。亦當據實奏聞。或札知訥親。令其代奏。乃二年皆如此。苟且辦理。殊屬不合。著申飭行。並令伊將如何少收情節。據實陳奏。○吏部議覆監察御史李兆鈺奏稱直省大小衙門案牘紛繁。該管經承查辦檔案。其尋常事件有一定程式者。間或發房擬批外。其有關刑名錢穀及查災辦賑等要事。令該房檢查原案。仍歸本官辦理。不得概令擬批。又有司衙門審理詞訟。僉差固所不免。乃竟有發房擬差者。請俱從署內僉點。不得留房開擬。均應如所請。

至該御史所奏缺主白役兩條。久經嚴禁。但胥役最易藏奸。日久每至廢弛。應再請旨通行嚴飭。從之。○兵部議覆大學士川陝總督公慶復奏。奏將滿倉遊擊孫鏗捏冒戰功。遊擊楊之祺被賊刦營。守備郭九皋遺失礮位。應照謊報溺職例革職。得旨。大學士慶復。奏奏將滿倉等捏飾戰功遺失礮位一案。該部比照謊報溺職等例。俱議以革職。蓋以瞻對不過小醜。行軍紀律。可以從寬。不知國家承平之時。焉有大興軍旅之事。且小醜與大敵縱殊。而軍法原無區別。如礮位明係被賊搶奪。捏稱遺失。營壘防範不嚴。被賊攻刦等事。正當進剿之際。按之軍律。即應於本地正法。始為用兵之道。不然。何以使之奮勇爭先。効折衝禦侮之用乎。夫兵可百年不用。不可一日不備。此古今不易之理。近觀征勦瞻對一事。似此小醜。不能迅速成功。以致曠日持久。而且有種種捏報之弊。是平日將弁無

精銳之氣。臨時又無敵愾之心。若再將應得之罪。草率議結。則戎行玩縱之習。自必更甚於前。何能望其振作耶。該督僅請交部議處。已屬姑息。而兵部又止議以革職。尤失之過寬。其定議此案之兵部堂官。著飭行滿倉等著交刑部定擬具奏。○己未。諭大學士等。本年九月內。朕躬謁

泰陵。並往五臺。著莊親王。平郡王。大學士。訥親。張廷玉。在京總理諸務。其月選文員內之通

判州縣等官。武員內之八旗護軍校。驍騎校。及外省送到之補放水手官。驍騎校等官。並年滿千總。俱著在京之王大學士。照從前之例驗看。可即傳諭該部知之。○諭軍機大臣等。四川巡撫紀山。審擬邪教逆犯劉奇供內。有西來正宗一犯。據稱西來正宗姓徐。係廣東人。是箇和尚。乃達摩西域過東土。傳至六祖慧能。被七十二魔人趕至廣東。故此叫西來正宗。後白來玉祖師。從江西起教。與張保

太同祖分派。張保太死後。與正宗合為一了等語。所叙供詞。甚不明晰。看來西來正宗。又似另一為首之犯。其現今存亡與否。并有無夥黨。俱應根究確實。可傳諭紀山。令其將西來正宗真實姓名。并現在蹤跡。逐一查究明確。毋致漏網。仍將查詢情由。具摺奏報。再紀山審出霖龍係瘟船教主。伊徒弟一梅供內稱伊師霖龍說。如今該彌勒佛管天下了。皇帝是李開花。他將來要做他的軍師等語。是霖龍即係瘟船掌教之人。其言詞甚屬叛逆。乃謀為不軌之首犯。今雖已伏冥誅。具題時亦應引戮屍之律。以昭國法。尋據慶復。紀山等奏查霖龍一犯。言詞叛逆。雖伏冥誅。實為法所不容。應引戮屍之律辦理。至西來正宗一事。據大足縣呈送於吳瓊家搜獲為劉鈞布散偽劄之黃世睿寄藏邪書。查內有抄錄承天諭下一簡。詞句妄誕。另有西來正宗其人。應請密飭雲南督臣將劉鈞嚴訊跟緝報

聞。○鑄給山西朔平府常豐庫大使。兼管常盈庫務印記。從巡撫阿里衮請也。○福建巡撫周學健奏琉球國難夷多良間。親雲上等船隻遭風漂流。照例撫卹安插。下部知之。○庚申。諭各部院帶領人員引見。朕降滿洲旨意處居多。昔

皇祖時。凡遇滿洲尚書出差。俱係滿洲侍郎領進。班第現已出差。今日兵部引見人員。著照舊例。令舒赫德居首領進。嗣後即照此遵行。至於吏部。則大學士張廷玉年久。其進退亦熟嫻滿洲儀節。著仍在前行走。○又諭曰。戶部侍郎李元亮。丁母憂。伊係旗員。著照滿洲官員之例。過百日後。到衙門辦事。不必開缺。○又諭貴州逆犯魏王氏一案。著刑部派賢能司官一員。馳驛前往。與總督張廣泗會同覈擬。並著乾清門二等侍衛達清阿。馳驛同往。俟定案後。一面照例具題。一面將應行正法重犯。著達清阿監斬。俾逆犯速正典刑。以

彰國法。雲南逆犯張曉之案。亦著張允隨。照貴州一體辦理。達青阿貴州事竣。即著前往雲南監看行刑。○又諭軍機大臣等。張保太首倡邪教。勾結數省匪類。謀為不軌。實為罪魁。今雖已伏冥誅。尚未明正國法。該督定擬之時。應按戮屍之律具題。可傳諭張允隨知之。○又諭前據張廣泗奏會緝邪教摺內稱。臣閱劉奇所造悖逆之言。不禁為之髮指。至黔省之魏王氏。以一女流。公然接伊夫之教。受保太之封。以右中宮。兼管左中宮。加陞總統宮元佛權。而伊子魏之瑗等三人。俱授為果位金剛名目。凡有進教之人。悉到魏堂掛號。復於乾隆八年內。前往四川謁見劉奇。兼與蘇君賢。即李開花。暗通聲息。實皆罪無可逭等語。今據紀山審訊郭獻純供內。有魏王氏說。蘇君賢要受刑戮。恐做不得皇帝之語。是魏王氏顯係謀為不軌案內主持之要犯。不特邪教內倡先惑人之首惡也。可傳諭張

廣泗務必嚴加研訊。按律正法。以昭國憲。不得任其避重就輕。祇以邪教定擬完結。○又諭廣東瓊州府屬。有應徵牛新等項稅銀四千二百餘兩。據該督撫查奏。此項稅銀內有無著銀一千七百餘兩。實係畸零小戶。難以照舊派徵等語。朕思牛新等項稅銀。雖載在全書。例應徵納。今既查明此內有無著銀兩。若按額徵輸。民力未免拮据。著將廣東瓊州所屬應徵牛新等稅內無著銀兩。加恩永行豁免。俾邊海貧民。不致有追呼之擾。該部即遵諭行。○賑貸山西太原陽曲二縣。被水災民。並予緩徵。○辛酉。諭曰。御史戴章甫奏請續修吏部現行則例。以備章程。俾法制周詳。按冊可考等語。朕思為政之要。貴於端本。本既立。則總持大綱。使萬目無不條貫。自免叢脞之患。此臨下以簡。正諸務之所由就理。非屏棄一切之謂也。夫經理庶政。整飭官常。自不得不立定章程。定章程。乃所以昭法守。書

曰其爾典常作之師。欲其遵守而無事紛更也。國家所定法制。皆盡善盡美。原極純備。因簿書日繁。其事偶有一二難於畫一者。不得已而稍為變通。不過隨時酌辦。因事加詳。豈能遠勝於前。即斟酌妥協。亦不出前人範圍之內。若必欲每事立一成規。無論勢難畢備。而條分縷析。屢易屢增。實亦無此政體。晉杜預云。簡書愈繁。官方愈偽。不揣其本而齊其末。其失滋多。且條件繁瑣。則官司不能記憶。考覈難以遍及。以類相混。不知何所適從。而書吏之緣以為奸者。匿其正條。出近似者以逞其欺弊。尤易於上下其手。其弊可勝舉乎。又據稱刑部則例館。曾奏明三年一次纂輯。今吏部則例。積至五年。似宜先行纂輯等語。刑部為讞決之司。動關民命。其條例擬議之處。較別部為多。但現在律例。皆再三詳定。以期協中。亦不宜輕於損益。從前所定三年。朕意亦謂太速。嗣後刑部似應限以五年。至於

吏部等部則例。即限以十年。亦不為遲。著大學士會同九卿。將如何分年纂輯之處。定議具奏。○又諭今年直隸通省雨暘應時。田禾豐稔。惟近日宣化縣所屬之村莊有被雹之處。輕重亦不等。被雹雖向無賑濟之例。朕念彼地上年被旱。百姓度日艱難。今年夏月幸獲雨澤。秋成有望。而此被雹之處。又復不免向隅。朕心軫念。著該督委員確查。將被災較重之地畝。酌量賑恤。該部即遵諭行。○諭軍機大臣等。逆犯魏王氏一案。已差刑部司官前往貴州會辦。著將劉奇消息主張供解。並詰問劉奇供單。抄錄密寄張廣泗。究訊明確。速行定案。再應正法之各犯內。如魏齋婆等決不待時之重犯。著達青阿監看行刑。餘著照例具題。於本內仍將已經正法之犯。按律定擬聲明。可傳諭刑部司官。並寄諭張廣泗。照此辦理。所有一應邪教書本圖籍簡帖字跡。此案已結之後。不便存於該處。達青阿回

京之日。交伊帶來。並諭雲南總督兼管巡撫張允隨。辦理張曉一案。四川巡撫紀山。辦理霖龍一案。亦如之。○又諭從前奉天越獄盜犯宋義。乃係積惡要犯。朕已降旨諭令嚴拏。乃數載尚未弋獲。官弁等甚屬怠玩。聞得此犯行蹤詭秘。出入無常。每探信息。即便遠颺。近聞逃回錦州本家藏匿。未知果否。可傳諭那蘇圖達勒當阿。嚴飭屬員。設法上緊捕緝。務期速獲。○予故禮部尚書銜兼國子監祭酒。加贈太子太傅謚文定。楊名時。入祀雲南省賢良祠。○以故奉恩將軍格爾賓子瑤章襲職。○以杭州鑲白旗滿洲協領西勒訥為杭州左翼滿洲副都統。○旌表守正被戕之直隸三河縣民辛仲舉女辛氏。○壬戌。

上奉

皇太后還宮。○詣

大高殿行禮。○詣

皇太后宮問安。○熱河副都統索拜等奏准直

隸總督那蘇圖咨喀喇河屯化育溝等處。修補兵房一案。臣等查獅子溝等處。現在拆毀官房。除可用之磚瓦擇用。餘碎破磚瓦。就近運往不敷。再行買補。兵房各處散置。俱應派員監修。臣等仍不時察驗。一切紙筆及監修等飯銀。照例於餘平項下動用。得旨。若委之地方官。必致糜費。爾等如此辦理甚好。另有諭旨。已交軍機矣。諭曰。駐防官兵。俱於派往駐防之初。建立官房居住。如有剝爛朽壞之處。皆係伊等自行修補。各省皆然。此特因賞給伊等居住之房。即係伊等自有之產。若仍官為修理。伊等轉恃有官修。反致任意毀壞。但熱河兵丁居住房產。向有舊房未曾修理者。故此俯准所請修辦矣。不可援以為例。著寄諭副都統索拜。並那蘇圖等知之。○賑貸湖北漢川。潛江。雲夢。應城。江陵。襄陽。棗陽。七縣。被水災民。鄖縣。被雹災民。並予緩徵。○癸亥。諭據蘇州巡撫陳大受奏。稱淮徐海三屬。

先於六月初旬。因東省沂蒙等處之水並發。以致江南沂沐六塘運河。一時俱漲。又因本地雨水過大。邳宿清桃安海贛沐八州縣田地被淹。銅沛豐蕭碭睢六縣俱報被水。又因河湖異漲。水趨下游。寶應阜寧濱水田地復被淹浸。山鹽等處低田亦在所不免等語。江南本屬水鄉。而此十數州縣逼近湖河。常有水患。今年水勢較前更大。是連年歉收之地。又被災荒。朕心深用憫惻。著該督撫加意撫恤。不必拘於成例。務使災民不致失所。從前降旨令該地方官於豐收之處採買穀麥以備賑濟之用。著再將本年漕糧截留二十萬石。令該督撫酌量分給被災州縣以資接濟。該部即遵諭速行。○戶部議覆御史馬燦奏稱。邪教煽惑人心。地方官苟能稽察嚴密。自可潛弭。如劉奇等犯匿跡黔省。盡惑愚民。久而敗露。前此十餘年間。未聞有鄉保舉首有司究治。則黔川等省保甲有名無實可知。應

令直省督撫將現行保甲冊籍嚴飭稽查。其有形跡可疑。鄉保不得徇隱。地方官立即查拏。月終令鄉保出結。地方官按季結報。督撫訪覈彙奏。應如所請。得旨依議。張保太一案流傳既久。盡惑煽誘。以致蔓延數省。惡積而不可掩。逆跡終於敗露。已將首惡劉奇等按律正法。其餘皆分別治罪。惟愚民無知。實係被誘入教者。俱寬其既往。予以自新。但妖書偽識。實為煽惑之端。被誘之人所在多有。應定以限期。令將一切圖像妖言。赴地方官自首。立即焚毀。免其究治。如逾限不首。仍有私立教堂。誘人附和。廣集匪黨。以喫齋誦經為名。希圖生事者。立拏嚴究。不得仍前姑息。以致釀成悖逆之罪。今雖部議嚴行保甲。但為治之道宜端其本。稽察保甲猶屬末節。地方大吏以及羣有司。果能留心化導。使小民咸知忠孝大義。則平時尊君親上之心。睦婣任卹之誼。皆根於至性。油然自生。豈有復從此

邪說與羣不逞之徒為伍。甘蹈法網者。此皆由化民成俗之風未臻。亦各有封疆之責者。所宜引為已咎而自慙也。嗣後尚其留心訓迪。以治其源。俾奉法者益堅其嚮善之誠。躍冶者頓改其不馴之習。斯不愧父母斯民之責矣。○又議覆署兩淮鹽政吉慶奏稱。自定額以來。高郵州甲子乙丑丙寅等綱。鹽多壅滯。寶應縣乙丑丙寅等綱。亦難督銷足額。緣路當孔道。鹽艘往來。貧難老少。多以零星換食。是以民間鮮買官鹽。惟泰興一縣。與場竈隔遠。又非往來大路。民間盡食官鹽。額引不敷銷售。請於高郵額引內。撥出六百引。寶應額引內。撥出四百引。入泰興縣行銷。應如所請。從之。○又議覆兩廣總督策楞署廣西巡撫鄂昌奏稱。粵西銅廠。開採年久。隴路深遠。挖取維艱。工費實繁。若照原定二八抽課外。每餘銅百觔。給價八兩三錢。及九兩二錢之數收買。實在不敷。應請即遵諭旨所定十三

兩之價。作為定價收買。俟將來礦旺銅裕。即行據實覈減。又商人出銅百觔。除抽課外。餘銅八十觔。每百觔給價十三兩。核計祇該價銀十兩零四錢。商民實無餘利。請將餘銅官買一半。其一半給商自賣。獲有餘利。庶踴躍開採。應如所請。從之。○刑部議覆大學士公訥親等奏稱。旗婦趙王氏。因伊夫趙宗普在日。曾行宏陽教惑眾。夫故趙王氏即傳其教。招引民人孔芝華等。作會散香持咒。以治病為名。盡惑詭騙。殊屬不法。請將趙王氏擬絞。孔芝華等擬流等語。查左道聚眾煽惑人民。為首者絞監候。應如所請。照例分別辦理。至近畿州縣。此教已行數年之久。應將失察之地方官。交吏兵二部議處。從之。○江西道監察御史歐堪善奏。在部候選廕生人員。請試以古論時務等策。簡派大臣閱卷。定其甲乙。交吏部帶領引見。以等第先後為銓選次序。若文理荒謬者。令回籍讀書。三年後再行赴

部考試武臣之後。有文字未諳。而弓馬熟習。願改武職者。聽其呈部改補。得旨允行。下部知之。○又奏六部衙門。惟吏戶兵工書吏。最為弊藪。請嚴飭各部堂司官。留心檢察。一應謁選引見官員。公文當堂投遞。不得私通書辦。違者。官則從重處分。吏則按律究擬。得旨。所奏是著照所請行。該部知道。○是月。奉天府府尹蘇昌奏。承德海城蓋平廣寧四縣被水。先經奏聞在案。續據遼陽復州寧海錦縣寧遠義州等六州縣報稱。六月間陰雨連綿。河水漲發。田禾被淹。廬舍坍塌。查奉屬被水十州縣。惟廣寧地低災重。臣委員查勘。先給一月口糧。餘照例次第辦理。得旨。覽奏俱悉。如是。則成災與不成災分數。究屬輕重若何。何不。明悉奏聞耶。尋奏據承德海城遼陽復州。蓋平寧海義州寧遠等州縣。陸續勘報。係不成災。惟廣寧地勢最低。成災約七八九分不等。而義州錦縣。於查報後旋被雹災。成災

僅止一隅。分數與廣寧相仿。現經查明戶口。分別賑恤。得旨。知道了。督率屬員。善為妥辦。奉省吏治。頗屬廢弛。汝宜加意也。○欽差協辦大學士吏部尚書高斌奏報。江南淮海徐邳一帶。自五月中。陰雨連綿。低窪處積水。嗣因六月中旬。山東山水陡發。汶河盛漲直下。是以淮屬之桃源安東清河徐屬之邳州宿遷與海州沐陽等州縣。被災最重。山陽睢寧贛榆沛縣。次之。阜寧銅山蕭縣豐縣。碭山與揚屬之高郵寶應。又次之。所幸黃運湖河。順軌安瀾。受惠不致倉卒。較乾隆七年水災稍輕。督臣尹繼善。撫臣陳大受。已撥司庫銀十萬兩。貯淮安府庫。以備撫卹之用。臣先令海州知州。查明被淹戶口。動用庫銀。俾災民得早安插。俟尹繼善陳大受到淮日。再將作何辦理處。會商具奏。得旨。覽奏稍慰。七十大災。賑濟不遺餘力。朕恐今年全免正項錢糧。若復似七年。即恐國用亦有所不足矣。今知災

重不比七年。用是稍慰。然究有幾成災。賑項至幾許而足耶。○又奏。今年黃運湖河。於六月中旬後。秋汛日增。清江浦黃河南岸。與山安海防一帶。較乾隆七年之水。更長一丈五尺。及數尺不等。其宿虹廳屬黃河北岸之朱家閘。七月十五六等日。汛水陡長。下壩埽工。墊陷一百八十餘丈。河臣顧琮率員晝夜搶修。並挖開下壩之孫家塘。放入下塘。裏戩與河水既平。溜勢隨經順軌。再海防廳屬之戴家馬頭老隄。年久滲水。加以十八九日風雨連綿。撈土幫築。不能堅實。危險非常。幸河臣先期委員駐劄該工。督率兵夫。隨坍隨築。今亦幸保無虞。再今年中河。自東省決。泗沂諸水。異漲奔騰。至駱馬湖口。是以全湖之水。灌入中河。臣與河臣商酌。將六塘河入海之五丈車軸。六里義澤等河口。各圻開十數丈。分減駱馬湖水中河。亦無添漲之患。至洪澤湖於伏秋二汛。水長至一丈四尺餘。雖將蔣家

閘天然壩俱行開放。而南滾壩過水。尚至五尺五寸。幸下游屢經修濬。河道深通。尚無泛濫。並將通河之芒稻等閘。通海之天妃等閘。星速全行開放。務俾洪湖減下之水。即日消退。毋致阻抑為患。得旨。覽此奏。始稍慰近來南顧之憂耳。近年異漲。實屬異常。而未致有衝沒之患。實

上天眷佑。河神默助也。曷勝額感。然朕命卿前往。亦不無小補。今既經此一番。則情形自復不同。與顧琮詳議善後之策可也。○江蘇巡撫陳大受奏。王徐氏倡行邪教。臣具奏時。祇知照左道惑人律。嚴究黨羽。實不料張保太之黨。竟有謀為不軌之事。迨黔省事發。臣遵旨逐加研究。始據王徐氏供出劉奇逆謀。則凡與聞逆謀各黨羽。自應徹底根究。據實辦理。不敢稍涉文飾。得旨。覽奏俱悉。以後遇此等事。當慎其始。必俟已發而後覺知。則所謂封疆之寄者何在。○署漕運總督左都御史

劉統勲奏報雨水情形摺內並陳會審韓烈揭報葉存仁等一案。遵諭不敢瞻徇偏向。得旨。是此案韓烈所得罪者多矣。非一不顧利害之直士。必一鋌而走險之小人。汝一秉公辦理。其情自見。若有所瞻顧偏倚。豈朕差汝審理之本意乎。○欽差江蘇學政崔紀布政使安寧奏會審浙江營兵沈光耀等夥劫一案。係該府同叅令倪知本訪獲。並非營員覺察拏送。乃提臣陳倫炯竟據營員捏飾自行訪拏之詞具題。又恐部駁。隨差武弁到部行賄。冀免重處。再臣閱案內。倪知本先稟縣獲後詳營。獲情節互異。據供係遵撫憲批示。文武和衷。不可貪功。視為秦越等語。因改稟具詳。是撫臣常安亦有代提臣及營弁開脫之意。得旨。好。所辦甚公平而妥。照例具題可也。若以此案論。倪知本有功無過。其為何叅革之處。令馬爾泰秉公查奏。○浙江巡撫常安奏督臣馬爾泰平日不能約束兵弁。辦理夥

劫一案。庇護營員。前既特叅知縣倪知本等。後見營員行賄敗露。轉左袒文員。並欲以臣之批稟。實臣以瞻顧之咎。希圖諉卸。得旨。此奏甚愚而險。汝所指馬爾泰之處。朕不能為之諱。實皆有之。然汝之過處。汝何不明言耶。將以巧辭欺朕。朕豈被汝等所欺之主哉。不思以國家政務為重。和衷辦理。而為是先入之言。甚屬無恥。以汝平日於地方尚屬安靜。故姑留之。知愧。知改。汝之福。遂非遂過汝之禍。慎之戒之。○福建巡撫周學健奏臺灣土地膏腴。一歲數獲。餘粟足供福興。漳泉盤運。近歲商船運糶內地者漸少。每發價赴臺採買。經年不能買足。臣再四密訪。知臺郡採買官價。發於有田業戶。所發之價。祇令一半穀石歸公。為奉文採買之數。餘並不令繳穀。至次年青黃不接時。按時值繳價還官。獲利加倍。以故各官私買之穀。轉多於公買。私買既多。遂置公買於緩圖。此節年相沿陋弊。臣訪

知即應奏革除。但臺郡遠隔重洋。各官幕賓脩脯。以及巡臺供應。費倍內地。是以各官惟藉此以補養廉不敷。若驟革除。恐官員不給。即生無窮弊端。是以於本年奏准採買餘粟二十萬石。遴選妥員赴臺。發價採買。一則杜地方官乘機私買之弊。一則即令該員將臺郡採買積弊。並革除後不至掣肘之處訪實。再行斟酌具奏。得旨。所奏奉公除弊之中。而復情理允當。嘉許之外。無可批諭。酌量妥為之可也。○湖北按察使徐琳奏。五刑之有流徒。其罪本不至死。第此等人犯。在配所守分者鮮。無賴者衆。蓋名為交地方官。實則地保收管而已。防範既疎。難免別生事端。為地方之累。伏思大辟而下。既有充軍一條。其罪至流徒者。與其安插遠鄉。不若即羈管原籍。地方官按月點卯稽查。如三年後果能悔過自新。即取具地保鄰族甘結。申報上司准免。既省有司案牘之繁。並可減道途囚糧之費。免

兵役遞解之勞。得旨。此見可謂奇特。朕亦知其有名無實。但以成例相沿。不肯輕改。俟朕再酌之。○湖南巡撫楊錫綬奏。臨武藍山二縣。七月間蛟水陡發。田禾廬舍被淹。委員查勘。動項興修。分別賑卹。報聞。○河南巡撫碩色奏。豫省入夏以來。甘霖疊沛。可望有收。嗣據開封府屬之鄆陵。歸德府屬之商邱。寧陵。永城。虞城。睢州。考城。柘城。汝寧府屬之新蔡。陳州府屬之淮寧。扶溝。商水。沈邱。許州屬之鄆城等州縣。先後報稱。自六月初一至十三四等日大雨。低窪積水。比時節氣尚早。猶可補種晚禾。菽麥。詎料六月二十至七月初九等日。復經大雨。河流泛溢。難免成災。俟各屬勘明分數。及應賑戶口。奏請蠲緩加賑外。現動社倉穀石。先給一月口糧。得旨。至此時而始行奏聞。非玩視而何。既已失之於前。若查辦復不妥協。以致或濫或遺。汝罪其可辭乎。且汝安居省城。不太逸乎。旨到。即日親往被

災處所詳查妥辦奏聞。○甘肅巡撫黃廷桂奏報合水縣之邢家坪安定縣之秤鈎堡磨石溝漳縣之魚卜池。河州之柴東嶺永昌縣之河西壩平番縣之曹家堡打柴溝莊浪廳之一眼井寧夏縣之通貴堡等處。夏間先後被雹傷禾。又中衛縣之白馬灘暴雨衝決。高臺縣之柔遠堡四號屯。禾苗生蟲。臣即委員查勘。賑卹借貸照例分別辦理。得旨是妥協為之。○大學士川陝總督公慶復四川巡撫

實錄卷三百三

三二九

紀山奏稱。大乘教首犯劉奇。造作逆詞。陰謀不軌。實屬大逆不道。應從重照謀大逆律凌遲處死。蘇君賢冒認李開花。狂悖惑人。妄圖非分。譙元魁周鳳翽附逆誘衆。散布邪言。亦非尋常從犯可比。均照妄布邪言煽惑人心。為首例。斬立決。仍請梟示。四犯家屬查明解部。賞給功臣家為奴。下部如所議行。○四川巡撫紀山遵旨奏覆。川省五方雜處。商賈每以聚會聯絡鄉情。會名亦多。不僅有火官名

色。其中不無藏匿匪類。臣莅任後。即飭屬禁止。但於劉奇等渠魁。未能查出究治。疎忽難辭。嗣後惟有時刻留心。以期鋤奸除弊。得旨一之為甚。豈可再乎。以後遇此等事。當留心慎籌。此正汝封疆大臣之要務也。○貴州總督兼管巡撫事張廣泗奏覆。臣查邪教根源。多緣假托做會名色。招徒惑衆。臣密飭察訪。前於四月十五日。適值火官會期。遂將魏王氏乘機擒獲。訊供張保太大乘教內。於天官地官水官三會外。又添一火官會。每逢會期。齊集建醮。自張保太問罪後。衆人漸散。臣恐餘黨竊發。仍飭各員弁查訪。如借做會名色。糾集徒衆者。即行嚴拏究治。得旨覽奏俱悉。此番重處示警之後。想邪教自當稍斂。然總應時常留心防範者。

實錄卷三百三

四

大清高宗法天隆運至誠先覺體元立極敷文
奮武孝慈神聖純皇帝實錄卷之二百七十一

實錄卷二百七十一

聖

大清高宗法天隆運至誠先覺體元立極敷文
奮武孝慈神聖純皇帝實錄卷之二百七十二

世襲總管經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

欽修

乾隆十一年丙寅八月甲子朔諭據將軍巴

實錄卷二百七十二

一

靈阿題補佐領之防禦那爾善人甚糊塗且
年已老邁凡題補人員原欲擇年力精壯心
地明白者方可以管兵辦事乃巴靈阿題補
此等衰老糊塗之人安能管理佐領之事耶
並不詳查率行塞責保題甚屬非是著飭行
○乙丑諭軍機大臣等據貴州總督張廣泗
奏稱詢據呂齋婆女婿張天序供有個江南
人年尚科向丈母說你還勸化得人我到雲
南對張祖說叫你去開道他轉來時帶一張

委帖。一張授記。與丈母。叫往京城開道等語。又魏王氏供。呂齊婆到江南。遇着黃中清。一齊到京。後來曾瑞芳自京轉來。說王志仁在京沒有來。那黃中清清還賬目。還他儀徵縣去了。又供。黃中清已死在江南等語。年尚科。係引進呂齊婆到京開道者。黃中清係同呂齊婆到京者。此二犯必知呂齊婆實在下落。既係江南人。爾等可傳諭尹繼善。陳大受。嚴緝務獲。黃中清是否身故。並令根究明白。具摺奏聞。尋奏。據儀徵縣查報。年尚科已於本年七月十四日病故。興化縣查報。黃中清已於乾隆五年身故。復經飭訊同案各犯。咸供並不知呂齊婆下落。報聞。○又諭據貴州總督張廣泗奏稱。魏王氏供。曾瑞芳自京回來。說王志仁在京沒有來。那黃中清清還了賬目。回到江南儀徵縣去了。曾瑞芳隨上雲南張保太處報信。就從雲南下四川。小婦人於乾隆八年。在川時見過。他在重慶府河壩。做裁

縫生理等語。此犯係進京見過呂齊婆。又報信與張保太之人。呂齊婆現在何處。該犯必定知之。且八年尚在重慶地方。為時不久。爾等可傳諭紀山。令其嚴緝務獲。跟究呂齊婆下落。奏聞。○又諭。江蘇巡撫陳大受奏報。乾隆七年起至十年止。由開徵免稅銀數目不符。經部駁查。今據覆奏。不但從前題報之數與各該年經徵底冊不符。而此次覆奏所開數目。覈之底冊。又各短少。由開稅務。係巡撫管理。今兩次駁查。而數目多有舛錯。則其中不無情弊。而陳大受於此事。並不實心料理。可知。爾等可傳諭申飭。令將前後數目。務須覈實清楚具奏。毋得仍蹈前轍。○戶部議覆。江蘇巡撫陳大受奏稱。江蘇額賦外。雜辦錢糧。編徵年久。恐有缺額無徵。官民交累。遵旨行查。除尚可留徵之款。仍行照額徵收外。惟城租吏農班餘米碾餉。折穀等銀六百二兩零。現經飭司查明。實係有款無徵。懇恩豁免。

應如所請。從之。○兵部議奏廣東巡撫準泰奏稱督撫提鎮諸臣。凡接到兵部所發內閣寄字。應於遞到後。即將接到日期備文咨部等語。固屬慎重。但接到者易於查覈。如或沿途沉匿未遞到者。在督撫提鎮無從查考。臣部亦難覺察。臣等酌議。嗣後各省督撫提鎮諸臣。凡接內廷封發事件到日。即將原遞火票。并接到日期。於驛遞之便。備文繳部。臣部按各省程途詳核。有逾限不繳者。即係沿途沉匿。照原發火票之號簿。挨站行查。至封發事件。有由軍機處交發者。亦有由內閣轉交者。俱係臣部加封轉發。如有沉匿未遞到者。查出將該管官叅處得旨。依議速行。○是日起。

上以祭

社稷壇齋戒三日。○丙寅。兵部帶領革職雲南普洱鎮總兵官崔善元。引見得旨。崔元善著

交與貴州總督張廣泗。以總兵副將酌量補用。○丁卯祭

先師孔子。遣慎郡王允禧行禮。○諭曰。巴靈阿自補授將軍以來。諸事推委。並不認真辦理。巴靈阿著來京候旨。所遺員缺。著阿蘭泰補授。所有令阿蘭泰。那木扎勒等查審事件。著交阿蘭泰辦理。那木扎勒。由寧古塔即行來京。○諭軍機大臣等。據步軍統領舒赫德奏稱。張廣泗所奏。呂齊婆住在白雲觀之處。

臣查詢觀內道士張本誠等供。乾隆五年冬。有一道姑。四川人。同伊子并伊姪來到觀內。王道的祠堂內住下。過了半個多月。就到平郡王府內去了。後從王府回去了等語。朕隨降旨詢問平郡王。據王奏稱。乾隆六年正月內。有一道姑。係四川重慶府人。同行有一子一姪。曾從白雲觀看過。在京約住一月。即回四川去了。這道姑說是宋門李氏。曉得些坐功。此時約有六十餘歲等語。看此與貴州張

天序供。白雲觀王真人處居住之語相同。惟姓宋姓呂之處互異。但此輩行蹤詭秘。或改易姓氏。亦未可定。其現在四川無疑。可傳諭紀山。令其遴選幹員。密行查拏。務獲。即速具奏。尋據慶復。紀山。奏覆。據成都縣稟報於省。城白衣菴女觀內。拏獲道姑宋李氏。訊供夫家母家。都不姓呂。不過自己做此坐功。原不與人來往。白雲觀的呂齋婆。實不知道。除訊過供詞具奏外。容臣等設法訪緝。報聞。○又諭。今歲山東兗。沂。曹。泰等府屬。雨水過多。沿河被水州縣。一應賑卹諸務。必須大員稽查。方為妥協。現在濟東泰武道陀諾。委署布政司印務。而兗沂曹道吳同仁。又前往江南。著巡撫喀爾吉善。添委道府大員。速赴被災各處。所有應行賑卹諸務。董率州縣。妥協辦理。毋致災民失所。該部即遵諭行。○吏部議覆。浙江道監察御史曹秀先奏。稱本月十二日戌時地震。降詔求言。臣思地體屬陰。宜靜不

宜動。今日之動。度亦卑下不循分義所致。或緣疆宇遼遠。人性難齊。文告不修。而教化未廣也。夫所謂教化者。非僅城設一學。村設一塾。以課凡民之俊秀也。其在喬野小民。所易曉者。莫若文告之詞。今直省布貼勸民告示。多向通都大衢。以飾耳目。城市巧慧之人。畧識之。窮鄉僻壤者。且不得一見。臣愚以為守土官吏。各有教民之責。應令各直省督撫。將有關於忠信孝弟禮義廉恥。扶尊抑卑。正名定分等事。擇其明白淺近者。刊刷告示。每年分發所屬府州縣衛。於大小鄉村遍貼。朔望宣讀。

聖諭後。以方言諺語。為愚民講說。行之日久。則感發天良。戾氣消而和氣聚矣。應如所請。從之。○定邊副將軍策凌奏。駐防宣化大同軍營官兵等。業經五年。一切差務。勤勞出力。俱無貽誤。仰懇將庫貯備賞緞布內賞給。報可。○賑貸直隸青縣南皮慶雲衡水冀州五州

縣并嚴鎮海豐二場旱災竈戶。○戊辰祭

大社

大稷

上親詣行禮。○詣

皇太后宮問安。○諭山東省今夏被水各州縣。據巡撫喀爾吉善先後題報。查勘分別辦理。除勘實成災各屬。已加恩蠲賑外。其勘不成災州縣。雖被淹稍輕。晚禾收成。究屬歉薄。朕心軫念。著喀爾吉善查明各州縣。實在無力貧民。按戶酌借口糧。按畝酌借麥本。俾得及時播種秋麥。所有借給麥本銀兩。於來歲麥熟後徵還。出借口糧。於來歲秋收後免息徵還。此等被淹地畝。本年應徵錢糧。著緩至來歲啓徵。以紓民力。該部即遵諭行。○諭軍機大臣等。據阿蘭泰奏稱。去年奉天將軍達勒當阿。前往吉林。會同將軍巴靈阿等。提集領催佛斯泰等九人審訊後。仍將伊等釋回本地等語。此等情節。從前達勒當阿等並未奏

聞。將佛斯泰等如何審訊。伊等所供招詞如何。其後因何釋放。令其各回本地之處。著寄信阿蘭泰查明具奏。尋據奏覆。訪得領催佛斯泰等九人。緣每年將米麪布靴等物。販運南海。與偷參人交易。去年奉天將軍達勒當阿至吉林。與將軍巴靈阿審過後。即應嚴加約束。不令出境。乃仍令回歸。致案懸莫結。容臣將佛斯泰等九人再行提訊。併將通易南海及偷參逃避之奸匪。查緝審擬具奏。得旨。甚是。今即放爾為吉林烏拉將軍。凡事悉心辦理。○又諭據四川巡撫紀山奏稱。鐵船教之夥犯胡恒。供出鐵船掌教之朱牛八。在貴州羅貢生家。招為女婿。羅貢生家佃戶甚多。都是苗子等語。朱牛八明係鐵船掌教之首逆。羅貢生招伊為婿。以主呼之。且佃戶俱係苗子。甚有關係。爾等可傳諭張廣泗嚴緝務獲。一一究出夥黨。速奏以聞。并將胡恒供詞鈔錄寄去。尋據張廣泗奏覆。鐵船教主朱牛

八臣疊次差弁會同川省委員。於仁懷黔西一帶。細訪無蹤。至仁懷縣安羅里。雖有羅姓。並非貢生。原係衣食充裕之家。佃戶計有六七十戶。多係苗人。該處歸化數百年。風俗安靜。並無一人入教。報聞。○己巳。諭曰。署四川提督李質粹。統兵進剿。瞻對並不勇往向前。但知觀望。且始終欺飾。難勝通省提督之任。著解任來京候旨。其四川提督員缺。著廣東潮州鎮總兵武繩謨補授。其潮州鎮總兵員缺。著史載賢補授。○又諭上年朕曾降旨。輪流蠲免天下一年地丁錢糧。今歲係奉天應免之年。但彼處旗人所種地畝。應納糧草。原不在地丁錢糧之數。仍係照例徵收。今廣寧義州。遼陽等處。俱被水災。若仍照舊交納。伊等未免竭蹶。著交奉天將軍。盛京戶部。查勘被災處所。免其徵收。該部即遵諭行。○又諭學政考試卷價。自雍正十一年。經部議定。每本價值三分。令提調官自行置辦。不許卷戶

仍前增價重戥等弊。自應遵照定例辦理。今崔紀奏。江蘇等屬卷價浮多。有貴至一錢及二三錢不等者。寒士未免拮据。此皆由書役舞弊巧取。該管官不行查察之所致。著該督撫學政等。通行各屬。嗣後童生府州縣以及院試卷價。令依部定之例。毋得違例多取。如有仍蹈前轍者。著該督撫查出。分別究治。該部遵諭行。○杭州將軍薩勒哈岱。卞浦副都統額勒登等。奏卞浦左右兩營。滿蒙閒散餘丁。自雍正十一年。前任將軍阿里衮奏准。均勻分隸各佐領後。迄今十有四年。十六佐領內。共增出二百四十餘名。其中丁多旗分。有十名至三十餘名者。丁少旗分。有止一二名至十名以內者。各旗兵額皆同。而餘丁人數不齊。挑取披甲。拜唐阿時。丁少者易得挑充。丁多者每致壅滯。請仍照阿里衮奏准之例。將餘丁二百四十餘名。均勻分隸十六佐領內。各十五六名。庶不礙將來挑取。得旨。允行。

下部知之。○庚午諭軍機大臣等。湖廣衡州府屬之安仁縣。刁民聚衆鬧堂一事。從前未據楊錫紱奏報。今該撫將該縣知縣具本題參。朕已照該撫所請。將易源革職。但此等挾衆鬧堂之事。即將地方官參處。恐轉啓刁民目無官長。聚衆生事之風。於地方深為未便。可傳諭楊錫紱。何未慮及耶。嗣後留心辦理。尋據奏覆。臣以愚民聚衆鬧堂。刁風固不可長。而州縣辦理不善。每致激成事端。是以飭拏首犯重處外。並將該縣辦理不善緣由。查明題參。今蒙恩旨優容訓飭。臣嗣後遵諭詳慎妥辦。得旨。事事皆俟朕訓。不知汝等所司何事也。○太常寺少卿鄒一桂奏。丁祭後殿四配位前。雖有陳設。而無進獻。於禮殊為闕失。應令國子監堂官。於助教內增派分獻官二員。臣寺亦酌派贊引官二員行禮。至四配前陳設四案。帛祇兩端。亦應添補。得旨。著交該衙門。○辛未諭。朕覽御史周禮奏請將戶

部侍郎李元亮開缺守制一招。所奏似是而非。且有意以行其私。國家用人。其權斷不可下移。或仿照定例。或偶爾變通。朕心自有權衡。總期得人任事耳。豈臣下所可意為進退者。如果所用之人。或有不當。所行之政。或有缺失。言官自當陳奏。以盡繩愆糾繆之責。豈可於用人大事。懷挾私心。借守禮之名。以阻撓國政乎。且守禮之議。明朝為甚。竟成門戶操戈相向。試問於彼時政務。曾有何益乎。是以雍正年間。間有令諸臣在任守制者。而亦絕無守禮之議。此正政治清明。下無浮議之善驗也。祇以外任官員。多有鑽營督撫保題之弊。幾至習為故常。朕是以降旨停止。其必不可少之人。無能相代者。仍准保題覈奪。即外任大員有丁憂者。亦令回京守制。或在內用為卿貳。或外缺又復需人。仍令前往署理。其在外必需之有司官員。斷難更易者。經督撫題請。不令回籍。間亦從允。此皆因地因人

於禮制之中。稍為權宜。並未於滿漢而有所區別也。乃周禮奏稱。李元亮雖屬旗員。究不可與滿洲並論。不知漢軍百年以來。與滿洲無異。即有事故。亦皆遵百日常服之例。過期即照舊任事。李元亮現為都統。例不開缺。豈伊可為都統。而侍郎反不可乎。周禮之意。不過以為復占漢人一缺耳。又奏稱。何必與前旨相違。以致聖謨洋洋。頓成反汗等語。朕前旨內。原有無人相代。仍准保題之例。今春令大學士尚書侍郎內。保舉能勝侍郎之員。而所舉率多不能勝任。經朕召見。一一指出。面加申飭。周禮獨不聞知。而為此奏。亦何憤憤至於此極。目前應補侍郎之人。朕再三籌度。或曾經擢用。知其不能勝任者。或新進未久。難以遽加陞遷者。是以仍留李元亮。與旗例相符。即從前韓光基亦係如此。蓋因得人之難。周禮如何輕言天下事。而遽以不惠代職。無人喋喋陳奏乎。此必有師生親舊。覬覦此

缺。授意為之者。且借朕所頒諭旨。以博敢言之名。而行其假公濟私之實。朕何如主。豈伊狡獪伎倆。所能搖奪乎。前明言官。各立門戶。互相排擊。矢口譏訕。以致混淆國是。釀成尾大不掉之患。近來御史。各逞胸臆。非借以沽譽。即意在徇私。如此等非所應言之事。而亦肆其簧鼓。大有關於政務。此風斷不可長。周禮著嚴飭行。並曉諭科道等官共知之。○諭軍機大臣等。常安奏太湖情形。摺內稱六桅大船。往往為藏垢納汙之地。恐將來匪類聚集漸多。宜分別查禁等語。江南應行辦理之處。爾等可抄錄寄與尹繼善。陳大受。令其悉心查辦。具奏以聞。○戶部議覆陝西道監察御史湯聘奏。稱查定例。貧難軍民。將私鹽挑負。易米度日者。不必禁捕。又貧難小民。年六十以上十五以下。并孤獨廢疾等。於本州縣報明驗實註冊。許其挑鹽易米。近聞外省城鄉集鎮商人。俱設有店口。官役私捕。若遇大

夥私鹽。人衆勢強。每多畏縮。一遇擔負貧民。輒借私鹽名色。阻撓索詐。稍不如意。即將鹽勛傾撒。或奪歸入己。應請嚴飭地方官。凡官商鹽店。毋許擅用私役巡鹽。其在官兵捕。亦毋許混拏貧民。又奏稱濱水之民。養魚為業。居山之民。種樹營生。近聞日久法弛。胥役恣憑長吏。或稱隄岸有妨。或稱行舟有礙。希圖嚇詐。致貧民失業。并請嚴飭究治。均應如所請。從之。○賑湖南益陽道州。江華。平江。四州縣。被水災民。○壬申秋分夕。

月於西郊。遣慎郡王允禧行禮。○

太宗文皇帝忌辰。遣官祭

昭陵。○

上詣

奉先殿行禮。○諭鑲藍旗蒙古都統事務。著尚書納延泰兼理。○建山西陽曲陽城二縣巡檢衙署。從巡撫阿里衮請也。○修理江蘇總漕衙署。從巡撫陳大受請也。○癸酉。

上詣

皇太后宮問安。○遣官祭

關帝廟。○諭今年下江之淮。徐海。上江之鳳。潁。泗。所屬州縣。多被水災。朕心軫念。已命督撫等設法加意賑卹。其居民房舍被水衝塌之處。向例給資修葺。七年被災最重。朕於定例之外。曾加賞銀兩。今當積歉之餘。百姓生計。已屬艱窘。今又遭值水患。民力自多拮据。著將上下江被水之地。於定例外。照七年之例加賞。俾坍塌房屋。及時繕葺。早得寧居。該部即遵諭行。○甲戌。

太祖高皇帝忌辰。遣官祭

福陵。○

上詣

奉先殿行禮。○諭曰。戶部侍郎李元亮員缺。目下暫令蔣溥署理。戶部事務繁多。呂熾現出學差。其侍郎事務。即著蔣溥兼理。○乙亥。遣官祭昭忠祠。○丙子。

萬壽節

上詣

奉先殿行禮○遣官祭

太廟後殿○遣官祭

福陵

昭陵

昭西陵

孝陵

孝東陵

實錄卷二百七十二

十八

景陵

泰陵○遣官祭

顯佑宮

東嶽廟

城隍廟○詣

皇太后宮行禮○御太和殿王以下文武各官

進表行慶賀禮○戊寅

上詣

皇太后宮問安

大清高宗法天隆運至誠先覺體元立極敷文
奮武孝慈神聖純皇帝實錄卷之二百七十二

實錄卷二百七十二

十九

大清高宗法天隆運至誠先覺體元立極敷文奮武孝慈神聖純皇帝實錄卷之二百七十三

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功七級隨帶加一級尋常加二級軍功紀錄一次並發給

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級巨量浩內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十一年丙寅八月庚辰諭曰碩色叅奏

學錄卷二百七十三

河南學政汪士鋐考試童生聲名平常其取錄文章多係瞻徇情面拔取搢紳子弟文氣平庸膚淺考試武童並不較射馬箭止射步箭一矢以致物議紛紛士論不服汪士鋐著解任差戶部侍郎雅爾圖前往會同該撫碩色秉公確查如有應行提審之犯即著提審○又諭山東省東平等州縣衛秋禾偶被偏災現在降旨賑卹照例銀穀兼賑惟是折賑銀兩向例每穀一石折銀五錢今被災較重

穀價必昂恐災民所領折價不敷買食上年濟寧等處被水賑濟曾降旨每石六錢折給此次東平等州縣衛折賑銀兩亦著加恩照前增給俾災民從容購買該部即行文該撫知之○又諭今歲江南之淮徐海三屬河湖水漲所有災民俱令照例賑恤但被災較重之州縣若照常加賑恐冬末春初賑期已滿小民仍不免於困苦著將被災較重之邳州宿遷桃源沭陽沛縣睢寧清河安東阜寧海

學錄卷二百七十三

州十州縣令該督撫查明應賑月分酌量加展妥協辦理具奏以聞俾民食得資接濟該部即遵諭速行○諭軍機大臣等黃中清一犯係同唐登芳進京傳教之人前令大學士等傳諭該省查拏嗣據尹繼善奏稱王徐氏供黃中清即興化居住之王維素已於乾隆五年身故今陳大受亦奏該犯已故飭令取結存案現據審訊張旻供內有伊進京時黃中清說與從前唐登芳寓所令伊居住黃中

清係王維素之姪。王維素已故。黃中清現在興化等語。與江省奏報不符。可傳諭尹繼善陳大受將黃中清查拏嚴審究擬。毋致朦混免脫。○辛巳。諭曰。逆犯張保太。倡為邪教。煽惑愚民。分布黨羽。連結奸徒。潛謀不軌。如雲南之張曉。四川之劉奇。貴州之魏齋婆等。皆罪大惡極。逆跡顯然。現在拏獲正法。脅從之犯。亦分別治罪。此等情同梟獍。孽由自作。實天理之所不容。國法之所難逭。至無知愚民。被誘入教者。若概抵於法。朕心有所不忍。前曾降旨寬其既往。予以自新。今將圖像妖言。赴地方官自首。免其究治。今此案首惡已誅。為從之犯。亦皆拏獲。其餘各省牽連者。頗眾。該督撫等尚在緝捕。未免驚擾。朕念此等皆係情罪較輕之人。前已令自首。茲特再降諭旨。除實在要犯外。其餘一概不必復行查拏。令該督撫遵照辦理。并飭地方官明白剴切通行曉示。俾小民感恩悔悟。悉改前非。各安

本業。永享昇平之福。○諭軍機大臣等。前據張廣泗奏稱。妖人張保太。係雲南景東府貢生。於康熙二十餘年間。即在大理府雞足山開堂倡教法。號道岸。釋名洪裕。妄稱此教是陝西涇陽縣八寶山無生高老祖開派。流傳到四十八代祖師楊鵬翼。係雲南騰越州已故生員。張保太得受其教。遂自稱為四十九代收圓祖師等語。可傳諭張允隨。楊鵬翼乃始倡邪教之首逆。遺害至今。罪大惡極。應行戮屍毀墓。以滅其跡。免使後來匪犯得以藉口。又復生事。即伊之子孫。亦著該地方官嚴加管束。仍將辦理情由具摺奏聞。尋張允隨奏覆。逆賊張保太。罪大惡極。雖監斃不足蔽辜。並查其邪教。係已故楊鵬翼傳授。尤為首惡。臣將該二犯埋屍處所。撥兵看守。以便於定案時。戮屍毀墓。至張曉係張保太繼子。凡悖逆妖書。多係該犯抄寫。劉鈞拜劉奇為師。謀為不軌。合依謀大逆不分首從律。皆凌遲

處死楊聲等六名。依妄布妖言煽惑人心為首律擬斬立決。餘犯按律辦理。至楊鵬翼曾孫楊上柱上進亦交地方官嚴行管束。以絕根株。得旨覽奏俱悉。○又諭朕此次巡幸五臺前經總理行營王大臣議稱扈從官兵需用薪米草豆甚多。今那蘇圖阿里衮於凡駐蹕之處務須聚集商販公平交易已降旨允行。今巡幸在邇而直隸山西今歲均稱豐稔。正當收穫之後糧草充裕可傳諭那蘇圖阿里衮轉飭所屬屆期於附近營盤處所多為豫備俾隨從人等得以便於購買毋致臨期缺乏。○又諭朕聞山東曹州府屬之鉅野荷澤單縣兗州府屬之嘉祥滕縣嶧縣俱經節次被水秋禾亦多掩損。鉅野滕單等縣被災較重。喀爾吉善從前奏報被水摺內止有嘉祥荷澤鉅野稱為收成歉薄勘不成災而單滕嶧三縣未經奏及。即鉅野亦稱並未成災。與朕所聞鉅野災重之處不符。爾等可傳諭

詢問令其將實在情形若何並如何辦理之處據實作速具奏。尋喀爾吉善奏覆東省各州縣被水情形先經題報在案其單滕二縣又於八月十六日續行具題現在照例查辦。至鉅野荷澤嘉祥雖據各該縣具稟勘不成災恐尚未實。是以前奏復請容臣詳核分別辦理。至續報未經入奏之嶧縣亦已委勘一體查辦。報聞。○又諭據那蘇圖奏稱宣化各屬秋收約計八九分以上可分買米五萬石。每石不過一兩或九錢幾分。張獨二口外現在豐收亦可分買五萬石共足十萬之數。連脚運每石不過一兩二錢較之京倉運米十萬石用脚價銀三萬三千餘兩可省糜費。所奏原撥通倉粟米毋庸再為輓運請動銀十萬兩並前經動支司庫銀二萬兩湊為買米之用等語。朕看那蘇圖所奏原為節省錢糧起見但通倉撥運只需脚價三萬餘兩若就近採買轉致撥銀至十二萬兩之多此固係

糧運價值俱在其內。然撥運通米。原係酌其有餘。以補不足。且省採買之費。國家酌盈劑虛之道。當如是辦理。與商賈懋遷有無者不同。可傳諭那蘇圖。再加籌酌。妥議具奏。○大學士等議。覆奉天府尹蘇昌奏。請奉屬流寓民人。應否賑恤一摺。查直省災賑條例。向只農戶分別賑恤。自乾隆三年。大學士伯鄂爾泰議准。御史張重光條奏以後。始將無地貧民。一體給賑。若外來流寓。偶然停住者。原不在賑恤之例。奉省流寓民人。蓋房租地多。係久居。非暫時托足可比。是以乾隆七年。賑案內。戶部議准。前任府尹霍備所請。一體給賑。今奉天寄居民人。現辦清查回籍。伊等既不入籍。又不歸家。偶被災歉。仍與土著一體賑恤。愈開觀望。逗遛之漸。臣等酌議。除一切游食之徒。不在應賑外。其實在無地貧民。被災乏食。與其動項賑恤。止濟一時。莫若即照資送流民回籍例。酌給路費口糧。俾歸故土。

得旨。此議是依議。交達勒當阿。蘇昌悉心實力妥辦。○以山西翼寧道徐以升為直隸按察使。○壬午。

上詣

皇太后宮問安。○幸瀛臺。○浙江織造申祺奏北

新關距織造衙署二十餘里。請委官一員駐關

料理。得旨允行。○癸未。以舉行仲秋經筵。遣官

告祭

奉先殿

傳心殿

上御文華殿。講官暨侍班之大學士九卿詹事等。

行二跪六叩禮。分班入殿內序立。直講官四人

出就講案前。行一跪三叩禮。復位。直講官阿克敦

梁詩正進講。大學自天子以至於庶人。壹是皆

以修身為本。講畢。

上宣御論曰。天子庶人。其分雖殊。而修身則無二

致。修身者。天子之所以為天子。庶人之所以為

庶人也。故中庸曰。修身以道。修道以仁。仁者人

也。此以見身為心之所託。而家國天下之本也。正心以上。皆所以修身。而齊家以下。則舉此而措之。亦云有其本。則末不求而自至。如影之隨形。響之應聲焉。非云我之修身。所以為齊家治國平天下也。如以謂為齊家治國平天下。則修身非為已矣。庶人無治平之責者。亦可不修身矣。不知人也。身也。心也。三而一者也。心不可見。以身而見。人亦形名。以身而名。修身要矣。明德新民。其皆以是為宗乎。講官暨侍班官跪聆畢。

興直講官伍齡安。錢陳羣。進講周易天施地生。其益无方。講畢。

上宣御論曰。蓋嘗觀於造化自然之流行。而知天地之大矣。天地之大。未嘗自言其益。而其益乃无方焉。一陰一陽之謂道。四時行焉。百物生焉。往者屈而來者伸。息復消而消復息。天地何容心哉。而惟是日進無疆之體。健行不息。化育萬物。各正性命。何其益之大也。彼惠心而勿問者。固不足稱。即心乎愛矣。遐不謂矣。而苟其內無健順藏用之功。則

不足以建知。始作成之本。外無丕冒顯仁之量。則不足以贊覆幬化育之權。然而天地無心於萬物。而萬物亦無心於天地。故其益无方焉。聖人有心於萬物。而萬物亦有心於聖人。故其益有量焉。此裁成輔相者。所以倍難於資始資生之無為也。講官暨侍班官跪聆畢。大學士訥親等奏曰。

皇上精一執中。紹心傳於二帝。陰陽合撰。溥美利於八垠。既本身以徵民。遂參天而兩地。臣等幸侍經函。親聆睿訓。不勝欽服。奏畢。諸臣出。就拜位。行二

跪六叩禮。禮成。

上還宮。賜講官及侍班官宴於協和門。甲申。諭康

熙二十年七月。我

聖祖仁皇帝。駐蹕瀛臺。特召大學士以下。各部院衙門官員。賜宴。命內大臣傳諭慰勞。賞賚有差。至今稱為盛事。朕臨御以來。仰賴

上天眷佑。海宇乂安。今歲京師雨暘應候。百穀蕃昌。畿輔共獲有秋。各省亦多收穫。

天庥滋至。我君臣應額手慶成。今當秋風薦爽。景物

咸和念茲宗藩瓜瓞。誼屬本支。大小臣工。宣猷効力。宜循往典。錫之宴享。以昭君臣一體之意。叶笙簧酒醴之歡。著於瀛臺設宴。本月二十七日。宴王公及近支宗親。二十八日。宴大學士九卿京堂翰詹科道。載考古昔君臣有賞花釣魚宴飲賦詩之事。諸臣內或文學侍從或翰墨素嫻者。著入宴賦詩。以效賡颺喜起之風焉。○又諭浙江處州府居萬山之中。士習強梗。不知禮義。罔識法度。各屬盡然而松陽青田為尤甚。此皆因聞見淺陋。錮蔽日深。是以習於愚頑。難以瞞迪。惟在地方大吏加意整飭。而職司文教者尤宜悉心化導。以挽頽風。著該督撫學政等實力訓迪。開其知識。澤以詩書。化其愚魯。俾咸知禮法。蒸蒸向善。庶幾積習漸除。士風丕振。以無負朝廷教育人材之至意。○命江西道監察御史王應綏提督河南學政。○乙酉遣官祭賢良祠。○諭曰。瀛臺筵宴王公宗室文職大臣官員等。應於何處。其如何豫備筵宴賞賚之處。著領侍衛內大臣會同內務府大臣議

奏。並帶領御前侍衛乾清門侍衛等協同照料。○賑貸山東金鄉陽穀城武定陶聊城莘縣臨清福山棲霞九州縣暨東昌臨清三衛被水災民。并予緩徵。○丙戌。世宗憲皇帝忌辰。遣官祭泰陵。○上詣奉先殿。壽皇殿行禮。○詣皇太后宮問安。○丁亥。上御乾清門聽政。○詣皇太后宮問安。○諭本月二十七日在豐澤園崇雅殿。賜王公宗室筵宴。爾等先期豫備。將崇雅殿現在所有陳設地平屏風移開。摘去牕扇。安設大地平。御座後懸掛軟簾。兩廊下設樂。殿內兩旁俱設高桌椅座。東西兩廂亦設高桌。院內張二丈四尺行臺演劇。再殿內有履親王莊親王慎郡王誠親王皆朕叔輩。

俱於地平上設高桌。較御座地平稍低。此日王公宗室。在朕前長幼列坐。俱行家人禮。二十八日在瀛臺涵元殿。賜滿漢大臣等筵宴。著於涵元殿抱厦下。滿鋪氍毹。設矮桌。張圓明園所用亭子。臺演劇設樂。此一日大臣翰林。人數衆多。若同在一處。不甚寬展。其經朕點出者。在涵元殿入宴。餘俱在崇雅殿內。及兩廊設矮桌列坐。即用二十七日行臺演劇。此二日筵宴後。著御前大臣侍衛。帶引與宴之人。隨處遊玩。并至淑清院流杯亭賞酒。果再二十七日。在豐澤園宮門頒賞。二十八日。在勤政殿頒賞。○大學士領侍衛內大臣公訥親等議奏。

皇上至五臺次日。在菩薩頂廟內。建醮講經。恩賞官員兵丁飯食。第三日往中臺西臺。其五臺山羅喉顯通塔院。殊像碧山等五寺。均賞扁額。

皇上臨謁。俱在大營左右二三里內。實為至便。

至東臺南臺北臺古南臺等四處。行走略難。而南臺道路尤險。即

聖祖仁皇帝臨幸時。亦未能一時遍至。請止行幸。再長城陵道路略窄。內務府車輛裝載官物。酌計足用。隨至菩薩頂大營外。其餘車輛。皆令附近等候。

皇上閱正定府兵。應行豫備之處。臣等札寄總督那蘇圖辦理。從之。○命倭赫仍管理淮安關稅務。○戊子。諭曰。康親王。入於履親王等

座內。一體高座。大阿哥三阿哥四阿哥亦著入宴。○又諭本月二十七日。賜王公宗室宴。著和親王果親王。大阿哥三阿哥四阿哥與王公宗室行酒。其兩廂內。並著和親王等。率永璧永璜行酒。再不與宴之。應封宗室二十人。每人賞官用蟒緞一疋。八絲緞一疋。閒散宗室六十六人。每人賞銀五十兩。○諭曰。戶部尚書梁詩正之兄。庶吉士梁啟心。因親老在家侍養。不能赴京散館。著加恩授為翰林。

院編修。○又諭江南海州及沐陽贛榆二縣。頻年被水。小民生計艱難。其應徵地漕銀米。已降旨停緩。俟屢豐之後。再行分年帶徵。惟是積歉之區。朕心厪念。今歲復遭水患。將來即遇豐收。新糧舊賦並徵。民力仍不免於拮据。著將海州及沐陽贛榆二縣。乾隆十年以前。積欠地漕銀米。概行豁免。其淮安分司所屬。坐落海贛二州縣之板浦徐瀆中正莞瀆臨洪興莊等六鹽場。乾隆十年以前。未完折價帶徵銀兩。亦一體豁免。俾瀕海災黎得霑實惠。以紓積困。該部即遵諭行。○諭軍機大臣等。浙江巡撫常安所奏。松江下沙等場。竈地積欠一摺。內稱此項未完。實係被潮坍荒。與尋常舊欠不同。懇請緩徵。惟恐所詳未確。又移咨江蘇確勘。俟覆到再請蠲免等語。朕已批示知道了。但此項錢糧。如實係坍荒。自應請旨蠲免。今既稱恐未確實。咨查江蘇。將來查明之後。且應蠲免。此時何必又請先降

緩徵之旨。爾等可傳諭常安。俟江蘇巡撫查勘確實。果係潮坍應豁。即行具奏。候朕再降諭旨。現在如有應行咨部之處。令其咨部辦理。○又諭朕聞淮安關徵收稅課。於商民未便。頗有怨言。倭赫管理關務以來。所收稅課。未見增多。何以怨聲籍籍。此必其辦理不善。不能約束家人胥役。於簽盤收納。有過於苛刻需索之處。是以物議沸騰。可傳旨申飭。近又降旨。令其接管關務。嗣後務須將家人胥役。嚴行約束。不得過於苛索。有累商民。如再仍蹈前轍。經朕訪聞。必不姑貸。○和碩莊親王允祿等議奏。本月二十七日筵宴。是日皇上出宮。設鹵簿樂懸。王公宗室等在勤政門外跪迎。駕幸瀛臺。在澄懷堂少憩。王公宗室等隨入。在崇雅殿丹墀下。左右序立。鹵簿亦隨入。列於殿外。侍衛在殿內立。設樂以俟。上升座。作中和韶樂。樂止。司儀引王公宗室等

行三跪九叩禮。各復位。行一叩禮。獻茶。作丹
陛清樂。

上用茶。賜王公宗室遞飲。行一叩禮。徹茶案。樂
止。行禮如初。展席幕。

上用膳。作中和清樂。樂止。演戲。畢。徹膳。進酒。復
作丹陛清樂。司儀捧卮。王公等進獻。飲訖。賜
王公宗室酒。行禮如初。宴畢。衆序立階下。行
一跪三叩禮。

上還澄懷堂。王公宗室等跪送如前。二十八日
筵宴。文職大臣在涵元殿坐。其餘官員坐於
崇雅殿兩旁。均照二十七日儀注。得旨。二十
七日筵宴。朕升殿時。王公宗室等行禮。宴畢
謝恩之處。著皆停止。履親王。莊親王。慎郡王。
誠親王。著不必行禮。朕親行賜飲。宴畢。著派
出大臣帶領王公宗室等至瀛臺等處遊玩。
不必送駕。二十八日。筵宴大臣官員畢。在崇
雅殿齊集。亦著派出大臣帶領遊玩。不必送
駕。其獻酒。二十七日。著派和親王。二十八日。

著派尚書來保餘依議。○奉天將軍達勒當
阿議覆盛京兵部侍郎數文奏稱盛京各衙
門及外城額設滿洲筆帖式共一百三十六
缺。向不拘旗分補用。續緣分別考取繙譯清
字二項。始經侍郎永福於乾隆元年奏准。按
旗均分。乃更定之後。各旗或有人無缺。或有
缺無人。現正紅旗尚懸六缺。無人可補。而正
白旗尚有前次之人守候無缺。皆因分定旗
缺所致。請嗣後補用筆帖式仍照舊例。不拘
旗分。但以考取名次高下。為補缺先後。應如
所請。得旨。下部議行。○己丑。

上幸瀛臺。賜侍衛等宴。○諭。二十八日。涵元殿
筵宴文職大臣官員。大學士訥親。張廷玉。福
敏。史貽直。協辦大學士尚書劉於義。尚書梁
詩正。來保。汪由敦。哈達哈。納延泰。侍郎傅恒
等。朕親賜酒。○又諭。朕普免天下錢糧。奉天
省本年係輪蠲之歲。各省定例。祇蠲地丁銀
兩。米豆不在應蠲之例。但奉天省地丁錢糧。

向來銀糧並徵。其額徵米豆。即係正賦。著將奉錦三府。乾隆十一年應徵米豆一體蠲免。該部即傳諭該府尹知之。○盛京刑部侍郎托時。以老病乞休。得旨。托時著以原品休致。該部知道。○賑貸廣東南海三水保昌。始興曲江樂昌仁化英德乳源四會恩平開平鶴山茂名等十四縣。被水災民。并予緩徵。○庚寅。

上幸瀛臺。賜王公宗室等宴。易殿名崇雅為惇。

敘。賦柏梁體詩。王公宗室咸請。

上御製分賜列名。序曰。乾隆丙寅秋八月。式宴。

王公宗室於瀛臺之惇敘殿。法。

皇祖也。惟時朕諸叔父列王。爵者四人。皇弟封王者二人。皇子三人。宗室王公有爵者三十二人。念我羣從子姪孫姓之同出自。

皇祖者。或侯封。或爵不至與宴之列。十年以來。未舉和會之典。親親之誼疎焉。則亦命入今日之座。凡六十有二人。其以事故。是日未至。

者。復五十餘人。於戲。自黃虞以來。有大德者之得其位。得其祿。得其名。壽。如我。

皇祖者。其誰耶。即子孫之繁衍。雖文王不得尚之。使目前之振振揖揖。我。

皇祖

皇考。式臨式憑。予與諸弟兄子姪孫姓。稱觴獻壽於其間。其愉悅鼓舞。又當何如。歡極而戚。固情之所必至也。然今日之宴會。我。

皇祖

皇考。實式臨之。實式憑之。諸伯叔父。自當以予言為不謬也。則又灑然以怡焉。昔漢武帝柏梁之宴。同姓者惟梁王武及宗正安國而已。其餘皆羣臣。然尚以此留詩。唐明皇改集仙殿為集賢。籲俊之義尚矣。而周親未與。亦闕典也。朕今易崇雅為惇敘。以紀今日之事。復倡為首句。以俟衆作之成。凡今茲之揆藻得句者。皆我。

皇祖

皇考遺教之所垂也。又何必舉金谷之例乎。

上倡首句曰。筵開惇敘欣同堂。續曰。顯承

祖烈宣重光。和碩親王 臣巴爾圖於赫

放勲示典常。和碩親王 臣允禩惟

聖時憲邁陶唐。和碩親王 臣允禩

重熙累洽符成康。多羅慎郡王 臣允禩敢如公旦陳不獲。

和碩誠親王 臣允禩紹庭肯構敬日強。和碩親王 臣允禩時享

太室懷秋霜。和碩親王 臣允禩樂具入奏陳羶薌。皇長子 臣

永璘假思降嘏福穰穰。皇三子 臣永璋君為臣綱父子

綱。皇四子 臣永璘序親協族覃德洋。和碩親王 臣允禩時維

八月屆白藏。和碩親王 臣允禩瑞凝仙掌零露瀼。和碩親王 臣允禩

裕親王 臣廣祿穀登萬寶真吉祥。和碩親王 臣允禩

詔賜家宴宴宗潢。多羅信郡王 臣德昭歡生棣萼與雁行。

多羅平郡王 臣福彭不須趨駕來從梁。多羅順承郡王 臣泰斐英安

屏翰之寄愧莫當。多羅浮郡王 臣弘曠以奠磐石成金

湯。多羅理郡王 臣弘曉於萬斯年景祚長。多羅寧郡王 臣弘曉

善願效東平蒼。多羅愉郡王 臣弘慶謬廁五等心徊徨。

多羅貝勒 臣弘明吉日庚寅時維良。多羅貝勒 臣球琳溫暾

朝旭上扶桑。多羅貝勒 臣永恩曉蟾留影光微茫。固山 貝子 臣

弘景金根迤邐下闔闔。固山 貝子 臣西苑匿

匝圍紅牆。鎮國公 臣弘昉途閣雲蔓繚迴廊。鎮國公 臣

廣廡寧篠連曲房。輔國公 臣弘昉映祀菊英綻冷房。

輔國公 臣伊爾登垂垂金粟西吳糧。輔國公 臣塞爾坡有

蘭茝吐有葛。輔國公 臣九如秋風太液困汪洸。輔國公 臣

恒祿爽澄瑤嶼奏微涼。輔國公 臣崧椿鳶飛魚躍水雲

鄉。輔國公 臣永璘金鰲橋畔飛仙舫。輔國公 臣永璘樓船振

舵樯歌揚。輔國公 臣達人朱簾繡柱其鵠黃。輔國公 臣吉存

彼岸不須一葦杭。輔國公 臣誠寶園名豐澤塏向陽。

輔國公 臣興寧迎鑾雀躍瞻龍章。輔國公 臣斗保徐隨

天步染御香。鎮國將軍 臣弘昂瑞雲叢擁

龍袞裳。都統兼散秩 臣弘昭伯叔兄弟躋踰蹌。奉國將軍 臣弘

泰斯皇朱芾珩有璫。應封宗室 臣弘寧觚稜鵲鵲輝

晶芒。應封宗室 臣弘富慶雲五色籠楣宗。應封宗室 臣弘富

肆筵授几

黻座旁。應封宗室 臣弘融方祝三奏鐘鼓喤。侍衛宗室 臣弘映

頃麓相和鳴丁璫臣侍衛宗室弘吟鼓我舞我虞趙

趙臣侍衛宗室弘吟夏彼雲和彈八琅臣侍衛宗室弘吟引

商刻羽低復昂臣侍衛宗室弘吟聽音非聽其鏗鏘

宗室臣弘炳大官九醞富酒漿臣宗室弘敏六清醢醢

醢醢臣宗室弘敏君子有酒酌言嘗臣奉國將軍兼侍衛臣

永臣永瑛嗤彼酤我語過狂臣奉恩將軍永瑛盤擘麟脯設

菰梁臣奉恩將軍永慶載精瓊糜以為糧臣永珍招搖之桂南夷薑臣永馨飴餒餽餽餽餽

餽臣永瑋嘉魚麗留鱗鯉魴臣永忠敦

彼行葦戒牛羊臣永恕敦弓四鍬厥禮詳

應封宗室臣永修醉酒飽德歡無央臣永興上方

織貝承以筐臣永璧臣再拜進

萬年觴臣永瑋如山如阜復如岡臣永恬

綿禧延祚歌有慶臣永珂俾熾而昌壽而

臧臣侍衛宗室永莊天家盛事垂無疆臣侍衛宗室永璞爰

笑爰語近

御牀臣侍衛宗室永堡二曹八荀奚數量臣侍衛宗室永榮鵲

鵲成頌笑三郎臣侍衛宗室永泰樓輝花萼僅五王

臣侍衛宗室永碩視茲鸞鳩搶榆枋臣侍衛宗室永瑤敦睦

篤敘

聖澤滂臣宗室永信瞻彼洛矣水泱泱臣宗室永豫天地

明察神明彰臣宗室永瑄太和遐邇將儀凰臣宗室永寧

潛魚頡而飛鳥翬臣宗室永存惠鮮懷保民胥

匡臣宗室永玘家有棟樑千萬箱臣宗室永玘歲登三

黼充困倉臣宗室永文展親宴衍以倡佯臣宗室永瑋

於胥樂兮和而莊臣宗室永安自今家法始我

皇臣宗室永晉載飛

天藻雲龍翔臣宗室永均追琢其章金玉相臣宗室永敦

元音不約宮與商臣宗室永崑振振公族胥賡颺

宗室臣永瑋迫窘詰曲慚東方臣宗室永瑋雍容玉砌

陪珪璋臣宗室永義同姓五十聯珩璜臣宗室永璉遠

軼姬周增輝煌臣宗室永達

異數得與悅以慷臣宗室永行和樂且耽樂無荒臣宗室永定

中心藏之何日忘臣宗室永玘願矢維城勉

匡襄臣宗室永順昭明有融斐令望臣宗室永玘教忠

教孝奚酬償臣宗室永慈本支百世萬葉昌臣宗室永綿

慶

上復製七言律詩三章。詩曰：露色烟光靄禁垣，
昌辰嘉宴會親藩。穀登萬寶真成瑞，菊先重
陽已泛樽。拂檻龍葱木有本，拍隄汪濊水宗
源。何須禮數拘酬酢，同是

神堯膝上孫。雁齒紅橋玉影明。壺天縱目儼蓬
瀛。拂招林牖風光美，負帶烟霞景物清。笑語
從容伯兮叔，獻酬交錯弟於兄。一堂敦睦家
人吉，却陋山河帶礪盟。綺疏晴旭麗瞳矐，樂
事天倫和氣融。徐進雕盤瓜有瓠，繁滋釵砌
樹連叢。情抒共許飛吟管，興洽偏思駐漏筩。
行葦歌成欣既醉，高秋樓閣靄春風。命王公
宗室賡和，宴畢賞賚有差。○辛卯。

上御瀛臺。賜大學士九卿翰詹科道等宴。宣示
七言律詩四章。詩曰：趵波鵲侶接鳴珂，霽宇
空澄氣色和。共喜向筵開早菊，多緣紀歲得
嘉禾。柏梁臺畔騰牋集，仙萼亭邊載筆過。緬
想虞廷傳盛事，颺言何以繼賡歌。鏡中樓閣

五雲稠。皎日楊輝素景浮。湛露詩成天酒下，
蓼蕭樂作徵招流。曲江早獻千秋鑑，梁國還
登太液舟。三世方明陪御賞，從教佳話冠螭
頭。璇霄猶覩曉蟾娟，濟濟冠裳擁慶烟。丹粟
香中陳桂醕，玉山頽處酌瓊筵。崇牙徐聽鈞
天奏，高閣遙聞畫漏傳。此日含毫多沈宋，昆
明漫數景龍年。龍葱雞樹翠華留，相悅君臣
共唱酬。鎬上宴開惟卜畫，樓前脯賜正登秋。
在陰鳴鶴方靡爵，樂藻遊魚不避鈎。試問彬
彬玉堂客，瀛臺然否即瀛洲。命羣臣賡和，宴
畢賞賚有差。○壬辰。

上詣

皇太后宮問安。遣官祭黑龍潭。

昭靈沛澤龍王之神。○命督撫訓飭刁風。諭
據福建提督武進陞摺奏。汀州府上杭縣。因
蠲免錢糧。鄉民欲將所納業戶田租。四六均
分。有土棍羅日光。羅日照等。聚衆械毆業主。
及至地方官弁。撥差兵役拘攝。復敢聚衆拒

捕等語。朕普免天下錢糧。原期損上益下。與民休息。至佃戶應交業主田租。惟令地方官勸諭有田之家。聽其酌減。以敦任卹之誼。初未嘗限以分數。使之寬減。即如朕之蠲租。賜復。出自特恩。非民間所能自主。田戶之與業主。其減與不減。應聽業主酌量。即功令亦難繩以定程也。豈有任佃戶自減額數。抗不交租之理。且輕徭薄賦。原以培養善良。使之常享樂利。庶習尚日漸淳龐。若莠民頑梗不馴。轉恃上恩。以逞其兇惡。此乃國法之所難宥。斷不可稍存寬縱者。從前御史等條奏民風漸驕。不宜任其日熾。朕尚以此言為太過。今閩省刁民聚黨抗拒。而近日高斌亦奏報江南宿遷奸徒。欲報全災。希圖普賑。挾制罷市一事。可知民氣日驕。洵屬不誣。朕乃蹈所謂莫知其子之惡矣。羅日光等借減租起釁。逞兇不法。此風漸不可長。著嚴拏從重究處。以儆刁頑。毋得疎縱。至於各省民情。固不無愚

悍之處。亦緣各督撫謂朕保赤惠鮮。止知奉行德意。遂不覺漸流為姑息。不知父母無不愛之子。而於子之賢者。自必恩勤撫育。若不肖之子。又須重加懲創。豈容任其驕縱。以長奸惡。應令各該督撫統率地方有司。留心化導。在淳良者。自應勤於撫字。如不逞之徒。必有以戢其桀驁之氣。則旌淑別慝。而稂莠悉除。風俗自可轉移。是父母斯民者之責也。并令各該督撫遵奉此旨。通行出示曉諭知之。

又諭曰。內閣學士沈德潛從前未得封典。今暫假回籍。著加恩照伊品級賞給伊三代封典。諭軍機大臣等。今年江南徐海所屬邳宿贛沭等州縣。因上游山東地方。運河水勢甚大。以致該州縣多被水災。聞運河每年水落之時。挑濬一次。或係挑濬不能如法。僅以濟運而止。河身稍高之處。不能容蓄。一遇水發。建瓴而下。沿河低窪之地。瀾漫旁溢。遂致被淹。今高斌將次回京。道由東省。著速行

傳諭令其會同總河完顏偉巡撫喀爾吉善將今歲挑濬運河事宜悉心商酌定議具奏以聞。○戶部議准廣東巡撫準泰疏稱粵東各屬皆山海交錯境窄人稠田地稀少除各府屬已經報墾外惟高州府屬之茂名信宜電白化州石城吳川等六州縣雷州府屬之海康遂溪徐聞等三縣廉州府屬之合浦欽州靈山等三州縣多有荒僻閒曠之地經前署撫策楞委員查勘共可墾荒地七百五十

七頃八十二畝有奇。但此等荒地並無泉源可資灌溉應令該地貧民實力墾種概免升科並給印照長為世業倘有富豪地棍包攬捏冒查拏治罪從之。○建鹽城營守備衙署從署漕運總督劉統勳請也。○癸巳諭嗣後堂子應行典禮著禮部具奏朕親詣

神前行禮著內務府大臣具奏。○諭大學士等從前奉天將軍達勒當阿具奏鳳凰城邊外莽牛哨設汛一案經部議覆准行續據朝鮮

國王李昉奏稱與伊國不便朕降旨命尚書班第前往查勘今據班第奏稱查勘得彼地在我朝界內與朝鮮國無涉雖與該國人等共涉一江若彼此不准越界各自約束所屬人等則不致滋擾永靖邊疆於伊國亦不無裨益此汛理宜安設等語由此觀之欲設汛之處在原定界址以內與朝鮮邊界無涉矣惟是該國王世戴國恩甚屬恭順若安設此汛彼國之無知小民倘有違禁者伊恐獲罪

是以奏請其安設此汛之處雖有江灘分界兩岸不過一二里之遙相隔甚近如伊屬下人等不能遵奉該國王禁令以致該國王得罪朕心有所不忍著照該國王所請莽牛哨地方添設汛兵之處停止令該國王將伊所屬人等嚴加約束至於查拏內地偷越之人并應行呈報之處仍照原議實力奉行不必交部再議該部即傳諭該國王知之。○諭軍機大臣等鳳凰城邊外莽牛哨地方設卡一

事。據尚書班第查勘奏稱。此地在我境內。與朝鮮無涉。自應安設卡座。但距朝鮮邊疆較近。彼此共由一江。難保不相越境。永不滋事等語。想來查拏偷越之人。惟在該管大臣等實心任事。所派之官員竭力奉行耳。如寧古塔所屬各卡。反與偷越者潛通舞弊。經阿蘭泰等查出。且朝鮮歸化已久。現在內地偷越之人。伊等守卡者見之。輒來呈報。此即彼之畏法。甚為恭順。今莽牛哨設卡一事。已降旨俯准所請停止矣。著寄諭達勒當阿。即照班第所奏。惟在本境內嚴加查禁。務將內地偷越之人。淨其根株。堵截緝捕。並於高麗人偷越路徑巡查之處。加意實力奉行。○大學士等議覆直隸總督那蘇圖覆奏宣屬貯米。輓運採買並行一摺。內稱延慶懷來保安懷安宣化萬全六州縣道路平坦。仍照原議撥運通倉米五萬石分貯。應如所請。又稱蔚州蔚縣西寧龍門赤城五州縣山路崎嶇。輓運維

艱。本年皆屬豐收。請於本處酌定米數採買等語。查撥運通米。原因通倉有餘。以補宣屬不足。蔚州等處輓運雖艱。並非不能輓運。且此項米石。若係緊急需用。恐致貽誤。今宣屬存貯原係從容辦理。且該處收成豐稔。尤可陸續輓運。何必置通倉有餘之米於不用。而另行採買。應將所奏無庸議。請仍照原議一併撥運。從之。○是月直隸總督那蘇圖疏報慶雲縣之東鄉柴林廣親等村窪地瘠薄。雨水易盈。七月初晚禾被蟲收成少減。現刈穫已竣。地氣潮潤。必須趕種秋麥。以資明春接濟。應請借給麥本。照價折領。得旨。即照所奏辦理。亦無庸另降旨矣。○安徽巡撫潘思渠奏謝訓諭。得旨。固不可玩愒。亦不必欲速。凡事酌中為之。又奏臣接辦災務。體訪情形。惟亳泗懷遠臨淮鳳臺五河盱眙等州縣為最重。現查明極貧戶口。先行撫恤。一月口糧并確勘成災分數。酌量蠲賑。具題。至江省近

年辦賑多奸胥土棍勾串捏冒窮民轉致遺漏現嚴飭屬員實心查別如有此弊即行揭報究懲得旨覽奏俱悉又批此風甚惡亦地方官辦理不善所致也當亟力整飭之陞任福建巡撫周學健奏閩省地棍竊匪俱為民害除訪拏分別辦理外其出力獲賊捕役按名給賞以示鼓勵得旨知道了交陳大受令其時常留心湖北巡撫開泰奏大乘教張保太餘黨蔓延數省現在所有經堂不為設法更改又恐灰燼復燃應請飭各省查出有名經堂酌量地方衝僻或撥作堆鋪給兵或改置社倉義塾交地方官稽查得旨知道了汝省即實力為之可也湖廣提督王無黨奏弭盜息奸莫良於保甲一法營兵與齊民雜處若概不編冊其同居之父兄子弟在文員稽核則曰營中餘丁武職查察則曰有司百姓輾轉脫卸匪類易潛應請飭令兵民一體編冊文武互相稽查得旨知道了所請

之處待朕酌量徐辦山東巡撫喀爾吉善奏覆查德州所屬邊臨鎮民王七馮海若鮑家莊民魏衍等數人被西洋人引誘入教獲有天主圖像經卷念珠等物訊係農民被誘並無聚眾勾引情事當即懲治銷燬外仍嚴諭禁得旨此亦不過愚人被誘耳非如雲南邪教之有逆跡也可薄處以示警耳陝西巡撫陳宏謀奏嚴審朝邑縣邪教張昌等犯實非雲南大乘教一派並未與張保太等往來勾結所有經卷亦無妖妄之詞伏念邪教煽惑愚民如滇黔川省等案自當嚴行究治其餘持齋供佛總由愚民偏信修福空談然開堂立教聚會斂錢風俗人心所關甚鉅現飭各屬密查並令將有無勾結情由嚴究務絕根株適接部文議覆御史馬璟條陳保甲案內奉有被誘入教愚民寬其既往予以自新定限自首免其究治之恩旨當即委曲勸化除勾結滇黔等省之犯按律辦理外其餘

統限兩月許其自首仍將入教姓名報官記檔令地方官留心查察倘逾限不首仍復附教聚會立拏嚴究得旨覽奏俱悉須實力為之不可託之空談也甘肅巡撫黃廷桂奏覆甘肅邊地氣候不齊被災之處每歲不免上年靖遠會寧安定三屬秋禾歉收本年春夏之際被水旱冰雹之處所需口糧籽種臣逐戶查實隨時貸給統計借過糧數二十餘萬之多窮民似可無虞缺乏得旨覽奏俱悉

實錄卷二百七十三

三十五

兩廣總督策楞奏覆左江鎮總兵楊剛熟練邊情著有勞績惟不和於衆好恃已長乘安南多事之秋時萌好大喜功之念經臣懇請調用內地以保全之蒙諭周詳臣於該鎮回任後屢經諄切勸導嗣據潯州協副將南天章稟揭楊剛冒支草乾並私用買馬銀項臣恐所稟未確擬俟秋冬間巡查西省再行查察不謂楊剛聞知南天章稟揭亦將南天章在任不行操兵買辦短發價值等款稟揭

實錄卷二百七十三

三十六

臣查兩人居官尚好核其互揭大概懷私挾嫌遽行題參未免人才可惜現檄委右江道楊廷璋并咨移提臣豆斌酌派委員秉公確查容俟覆到會辦得旨既有此互揭照例題參何妨此奏未免觀望矣又奏廣西右江鎮原為土獯錯雜兼內控滇黔兩省苗徭外制安南番境而設緣瘴氣甚重乾隆五七兩年曾蒙諭令量移善地或改鎮為協經前督馬爾泰奏及部議俱以地方扼要難於改移

具題現在同城尚有同知巡檢各一員其文員或因水土惡劣揀選善地暫避若武員俱有操防之責非經調遣不敢輕離本汛報聞

大清高宗法天隆運至誠先覺體元立極敷文
奮武孝慈神聖純皇帝實錄卷之二百七十三

實錄卷二百七十三

三十七

大清高宗法天隆運至誠先覺體元立極敷文
奮武孝慈神聖純皇帝實錄卷之二百七十四

監修總裁官經筵講官太子太傅文淵閣大學士文淵閣總纂事領侍衛內大臣四庫全書總纂官

吏部理藩院事務正黃旗滿洲部世襲副都統加七級隨帶加一級尋常加二級軍功紀錄一次臣等謹將

總裁官經筵講官太子太傅文華殿大學士文淵閣總纂事領侍衛內大臣四庫全書總纂官

世襲騎都尉軍功加十九級隨帶加二級又加二級臣等謹將內大臣戶部尚書鑲藍旗滿洲部統軍功紀錄五次

尋常紀錄十四次臣等謹將經筵講官太子少保工部尚書紀錄六次臣等謹將

敷修

乾隆十一年丙寅九月甲午朔

實錄卷二百七十四

上詣

堂子行禮諭昨入宴宗室內有名諸爾杭阿
者乃朕孫輩已令改名綿慶著傳諭履親王
莊親王等朕初次見孫以後永字下輩即用
綿字並將朕此旨載入玉牒乙未諭履親
王莊親王等今日朕閱瀛臺賜宴王公等進
呈紀恩詩內有名永琮者朕昨與七阿哥命
名用琮字則上下二字俱同著將外間永琮
改名永璵再敬事房所收永字輩字樣係何

年擬定。曾否向外廷傳知。如未經傳交。即是當年總管等遺漏。爾等檢查外間重用內廷字樣。或係賞出。或係王公等自行命名。如係賞出。何以不於收貯字樣摺內註銷。其錯誤自在總管等。若係王公等自行命名。明知此字係內廷擬定。因何復行檢用。王公等亦有不合。並著王等查外間所起名字。與內廷所收字樣重複者。共有幾人。現在俱毋庸另改。即將摺內字樣註銷。嗣後外間起名。不得復

實錄卷二七四

三

一

用內廷擬定字樣。○諭軍機大臣等。前據福建提督武進陞摺奏。上杭縣因蠲免錢糧。鄉民欲將業戶田租。四六均分。土棍羅日光等聚衆械毆業主。及地方官弁撥差兵役拘攝。復敢聚衆拒捕等語。朕已降旨通行曉諭。今武進陞又奏稱鄉民俱投結自首。不敢附和為匪。已經解散。首犯自必就擒。地方業經安帖等語。此案未見周學健奏聞。爾等可傳諭詢問之。令其將實在情形。詳細具奏。至鄉民

抗官拒捕。刁風亦不可長。今雖解散。其為首重犯。毋得姑息完事。必當嚴處以警刁風。可一併傳諭知之。尋奏覆。此案首犯林大喬。於該縣擒獲。羅日育等。後即驚逃潛匿。經該府下鄉。剴切開導。令各安生業。遵例交租。並親赴林大喬住所查察。該犯知難脫漏。自出投首。現在民情俱皆寧帖。至羅日光等。亦經陸續訪獲。審明。從重究擬。至於抑勒隨行之鄉衆。已經畏法改悔。似宜從寬辦理。報聞。○又

實錄卷二七四

三

一

諭朕聞住居瀚海喀爾喀等游牧地方。遇旱損傷牲畜者。每就水草多處遠徙。亦有無力不能遠徙者。其東西二路著派鄂實那齊布。與該部才幹章京。馳驛速往。會同該盟長副將軍等查明。應如何賑卹。賞給接濟生計之處。詳覈議奏。其他徙入扎薩克等旗者。且勿驅逐。俾得蕃養牲畜。若不能禦冬。有應賞口糧茶食等物。一面奏聞。一面就近或於鄂爾坤軍營。或於歸化城等處運往。即便賞給。務

使得霑實惠。戶部議覆浙江巡撫常安奏稱勘明歸安龍游建德三縣衝廢沙積埧卸無徵田地所有應徵地丁銀米請循例豁免應徵漕白二糧一併開除均應如所請從之。又議准廣東巡撫準泰奏稱廣州肇慶二府因水衝壓沙石夾雜難墾田地共三十七頃六十二畝有奇其編徵銀米請照數豁免從之。定邊副將軍額駙策凌奏乾隆五年遵旨議定將喀爾喀游牧安設內卡之齊克濟等處鄂爾海地方為中南至博羅椿集等處北至額得爾齊得爾之伯勒齊爾等處為外界此內游牧居住各按指定之界不得踰越但今戈壁地方連年少雨水草甚乏該處游牧者俱移居杭愛地狹人稠水草愈覺不足蒙古生計拮据請將該處游牧地方少加展放令在安設內卡之扎卜堪等處內游牧仍飭駐劄烏里雅蘇台叅贊大臣不時巡查得旨軍機大臣議奏尋議令額駙策凌與喀

爾喀副將軍等將喀爾喀游牧指定何處起止不許踰界仍令叅贊大臣巡查遇有越界游牧者查出治罪從之 丙申

上詣

皇太后宮問安奉

皇太后居暢春園

上幸圓明園遣官祭

歷代帝王廟遣官祭

都城隍之神移太倉州州同駐苗涇城鑄

給印記從兩江總督尹繼善請也 丁酉

上詣暢春園問

皇太后安 諭朕前降旨截留下江漕糧二十萬石以備賑糴之用今思上江鳳潁泗各屬地方亦多被水雖視淮徐海較輕而該處積歉之餘復遭水患亦應豫籌接濟著將安省起運漕糧截留十萬石令該督撫酌量分運被災州縣以儲民食該部遵諭速行 諭軍機大臣等朕覽慶復薦舉遊擊馮天錫本內

所開事實稱本官每逢朔望宣講

聖諭廣訓開導士卒咸知大義守法奉公等語宣講

聖諭乃文員專責然亦不能深明義蘊悉心開導實力奉行不過每逢朔望臨常襲故而已馮天錫武途出身何能為士卒宣講使人人皆守法奉公乎朕若召馮天錫面詢料伊必不能通曉意義今開此虛詞並非實蹟殊非薦舉之道近來諸臣辦事多不務實惟尚虛

文慶復亦蹈此習何能表率僚屬整飭地方以期臻於上理爾等可傳諭慶復知之○大學士等議覆川陝總督慶復等奏西藏復設臺站官兵案內除裏塘業經酌設土兵三百名毋庸更添外其巴塘向駐守備一員今既移駐乍了即請以乍了之把總移駐巴塘至從前賞給蠻兵牛羊滋生銀兩今蠻塘既徹自應將前項追繳但蠻兵安設二年頗為出力懇請寬免均應如所請得旨從前賞給蠻

兵牛羊滋生銀兩著免其追繳餘依議○禮部議准江西巡撫塞楞額題覆布政使彭家屏奏棍徒誘買秀才應定提調官處分一摺緣江西積棍素有尾隨學臣按試各郡哄誘士民營求入學設計掉騙等弊該提調官緣向未定有處分多存玩忽誠如該司所奏必應嚴定處分請嗣後棍徒誘買掉騙該提調官不行查拏過後別經發覺請照失於查察例罰俸一年從之○奉天府府尹蘇昌奏奏已故寧海縣知縣崇倫永虧空庫銀一千九百四十七兩應請查抄押追得旨這所參崇倫永虧空庫銀該府尹著落伊子究追具奏奉屬官員被參虧空案件甚多皆係霍備任內未經發覺者此皆由霍備不留心查察吏治廢弛所致如被參官員虧空日後不能完補俱著落霍備賠補俟賠補完日再照伊所降之級補用該部知道調廣東連陽營遊擊鄭得元來京引見戊戌訓大臣實心行

政諭曰。致治興化。必本於誠。凡為大臣者。能事事克殫其實。則易俗移風。自駸駸於上理。朕常以實心實政訓諭臣工。而諸臣仍多尚虛浮。少實際。內猶較可。外則尤甚。朕亦自愧。率先之未能也。即如督撫為全省表率。凡文武官弁。皆奉其指示。若惟事虛文。則屬員相率效尤。其於國計民生。有何裨益。朕看近來督撫。其心思智慮。多用於簿書考成。其實在政事。所以仰答乎上。而敷布於下者。往往不以為要務。不過沿襲舊文。為粉飾潤色之具而已。如川陝總督慶復。薦舉遊擊馮天錫。本內所開事實。有朔望宣講。

聖諭廣訓。開導士卒。咸知大義。守法奉公等語。夫國家整理戎政。以將畧材武為尚。必能訓練技勇。和輯兵民。始可登之薦牘。以儲干城之選。若以武途出身之馮天錫。而謂其能講明文義。闡發萬言之精蘊。其誰欺乎。此不過向來薦本中套語。填寫成文。然慶復則不應

亦如是也。又如廣西巡撫鄂昌。乃大學士鄂爾泰之親姪。竟於請祀名宦疏內。稱為甫申。周召稷契。夔龍服教。畏威行所。無事等語。在太學士鄂爾泰為宣力之大臣。朕加恩令入祀京師之賢良祠。並伊久任之雲南。亦已展祀。酬庸之典。已備。可以傳之不朽矣。至於廣西一省。有之不足。加榮無之亦不為缺。而論其實。則鄂爾泰當日。本係雲貴總督。後暫兼粵西者。不過一時彈壓苗疆。豈必有殊勲惠績。淪洽人心。足以媲美召棠。遠軼郇兩也。而鄂昌本內。稱頌之詞。有古賢臣所不克當。而非聖人不能者。若鄂爾泰有知。必以為溢美。而不安於心。料此亦不出於鄂昌之筆。皆伊之屬員。欲結歡於上司。竭力稱揚。不知其立言之過。鄂昌即據以入告。亦謂此係本章。自然照常批發。未必經朕全覽耳。不知朕日理萬幾。於諸臣章奏。及一切庶務。無一事不經心。亦無一字不過目。豈有絲綸重務。而偶有

疎忽者乎。鄂昌初加恩復用之人。宜事事勉力。而亦視進奏本章為奉行故事。即此可見各督撫中。似此存心者不少。是平日之董率屬吏。訓迪閭閻。此以虛求彼以虛應。又安望其去偽以存誠。化民而善俗乎。是以福建上抗刁佃。因蠲免正賦。自定田租。與業主四六均分。抗不交納。遂敢聚眾拒捕。而江南宿遷奸徒。開賑挾制罷市。習俗淳囂。民風驕肆。地方官平素不能化導。可知。此皆由虛飾成習。未嘗以至誠感人所致也。朕因見諸臣多蹈此習。指其一二。當知自愧。繼自今。其各崇實黜浮。俾誠心相浹。而吏治民風。進而日上。是所望於督撫諸臣也。工部議准。河東河道總督完顏偉奏稱。蘭陽縣汎北岸耿家寨隄。工本年入春以來。大溜北趨勢甚危險。查南岸西灣朱家莊南。坐成兜灣。河頭已有吸川之形。下至東灣何家莊。灘勢迴曲。河尾又有建瓴之勢。亟宜乘時挑挖。引河一道。分順水

勢。庶耿家寨一帶隄工。化險為平。並於河尾抽溝二道。以資宣洩。從之。賑貸山東滕縣單縣平度州三州縣被水災民。並予緩徵。賑兩淮海贛二州縣屬板浦。徐濟中正。莞瀆臨洪。興莊等六場被水竈戶。並蠲緩新舊額賦。已亥。

上辛靜宜園駐蹕。至壬寅皆如之。諭今年山東被水。雖不過一鄉之內。間有數區。而州縣頗多。恐倉儲所貯。不敷賑糴之用。著將該省本年漕糧內。截留十萬石。令該撫酌量分派各州縣衛。以為備用。諭軍機大臣等。朕前降旨。詢問喀爾吉善。山東被災州縣內。有嘉祥河澤。鉅野。稱為勘不成災。而單縣滕縣嶧縣三處。未經奏及。令其覆奏。嗣據喀爾吉善覆稱。滕單二縣。已經題報。其鉅野河澤嘉祥嶧縣等處。現在委勘查辦等語。至今尚未覆奏。今聞曹縣沂水二縣被災亦重。從前喀爾吉善但請借給籽種。恐撫卹未周。爾等可傳諭令其再加確查。如

果災重。作速一併題報。此外或更有未報州縣。亦著查明奏聞。大學士等議奏。奉天將軍達勒當阿奏請派員查勘新開鷓鷹等河一摺。查奉天所屬廣寧等處。地勢低窪。而新開鷓鷹等河。向無河身。遇雨水過多。漫衍四出。若開一大河引水歸海。不特孔道鄉村可保無虞。於旗民蕩田均有裨益。但盛京發祥之地。開挖河道。創興大工。不可不詳細查勘。請欽派大臣一員。並帶欽天監善看風水人等。會同該將軍查勘定議。得旨。依議。著派高斌馳驛前往。伊所帶章京官員。亦著馳驛。禮部議覆建威將軍補熙等奏稱。各省駐防將軍之隨印筆帖式。例於本省考取。臣現將綏遠城八旗兵丁內。考試滿漢繙譯。就中揀閱。祇有三卷粗通。此皆由未諳漢文之故。臣前奏請城內設立蒙古學。將近三年。俱各發憤勤學。甚屬有益。請於綏遠城內。照蒙古學之例。設立滿漢繙譯官學。令其教習等語。應

如該將軍等所請。於綏遠營八旗左右兩翼各設教習一員。教導從之。以內閣學士介福為盛京刑部侍郎。庚子諭曰。大學士張廷玉。現今在京總理事務。朕念其年逾古稀。若照例直宿。未免過勞。著日間進內辦事。不必直宿。又諭軍機大臣等。邪教煽惑多人。延蔓數省。皆藉經堂為藏納之所。此番嚴拏黨羽。務絕根株。所有齋堂祠廟。若仍留故迹。恐將來不法之徒。復藉此招引惑眾。爾等可傳諭辦理。邪教之各省督撫。令其將現在查出之經堂。酌量地方衝僻。或撥作堆鋪。分給兵丁。或改置社倉義學。令地方官不時查察。毋使餘燼復熾。俟伊等奏事之便發去。大學士等議覆奉天將軍達勒當阿奉天府尹蘇昌條奏清查流民事宜。內稱山海關至喜峯口。邊牆坍塌甚多。游民勢必冒越。請令直隸總督古北口提督再加汛守巡查。又九關臺松子嶺兩處邊壕外。與塔子溝地方相接。

每多私越入境者。亦請令督提等嚴飭巡查。又關口稽察既嚴。其由海道隨赴奉天者。勢所必有。請無論商船人渡。俱著於有官兵處停泊。以便稽查等語。均應如所請辦理。至所稱奉屬寓民。應入籍者。准其入籍。不願入籍者。令其依限還鄉。如有作奸犯科。斷難姑容。嗣後無論新報入籍。及商賈匠作傭工等。一經犯法。除例應題報者。候部覆遵行外。其餘細事雜犯。悉行遞回原籍安插等語。查奉天乃根本之地。向來風俗淳厚。今流民雜處。恐其漸染澆漓。現在入籍。必循分守法者。方為良民。其作奸犯科之徒。固難寬縱。但所犯科條。自有輕重。今該將軍所奏。無論細事雜犯。皆遞回原籍。未免竟無分別。押解亦不勝煩。應令按審情罪。分別辦理。從之。鑄給直隸唐縣管理水利主簿銓記。新城縣水利縣丞關防。滿城縣方順橋兼管河務巡檢司印信。從總督那蘇圖請也。旌表守正捐軀之湖

北穀城縣民文朝元妻劉氏。○辛丑。上御靜宜園勤政殿。賜隨從諸王侍衛。並防守官員等宴。○諭。今年朝審秋審情實各犯。著停止勾決。○又諭。江南河道總督員缺。著福建巡撫周學健補授。福建巡撫員缺。著江蘇巡撫陳大受調補。江蘇巡撫員缺。著布政使安寧署理。江蘇布政使員缺。著浙江布政使王師調補。浙江布政使員缺。著唐綏祖補授。陳大受著速赴新任。周學健。俟陳大受到任後。即赴江南。顧琮。劉統勳。各回原任。又諭。國家設立營制。所以嚴拱衛而固苞桑。務在選精銳。以儲千城。勤訓練。以資捍禦。所謂兵可百年不用。不可一日無備也。從前各標營。日漸廢弛。朕命訥親前往山東河南江南等省。先行查看。並降旨申飭。復於督撫提鎮奏摺中。時加批諭。令其實力整頓。今各省操演之法。大抵旗纛戈甲。期以飾觀。步伐陣圖。似為練習。其實在技勇精強。弓馬嫻熟者甚少。

在水師營汛。亦不過演就水陣。聊以塞責而已。即軍政薦舉。未能盡屬公當。徒為具文。以是整飭戎行。豈能使壁壘一新。士氣日奮。即如西北稱勁旅。而江浙多柔脆。不知既已為兵。自應鼓其銳氣。使弱者日進於強。豈可任其萎靡。不加振作。蓋營伍之中。兵馬錢糧。甲冑器械。俱宜事事留心。向來虛冒浮糧。私扣朋馬。夤緣拔補。挪借軍裝等弊。猶未盡除。而教訓演習。惟事粉飾。因循怠忽。尚沿舊習。殊

非設兵衛民之意。是必立定年限。專差大員查看。庶將弁知有責成。不敢怠廢。而各兵亦知有考驗。時時儆惕。技藝不致生疎。於戎政自有裨益。朕前旨。與以三年之限。著兵部請旨。並未定有分省查看之年限。今訥親查閱之省。則已過二年。其餘則並未派人前往查閱也。其如何分年分省差派大臣查看之處。著該部定議。俟臨時朕酌量。或自京命大臣往閱。或即命本省督撫查閱。則各提鎮時知

提撕。營伍永不致廢弛矣。尋兵部議奏。查閱各省營伍。其地方遙遠。營汛遼濶者。若止簡派大臣一員。勢難周遍。至甘肅地處邊省。安西提標設駐塞外。若令查閱大臣一並巡查。則幅員廣遠。亦難遍及。請自乾隆丁卯年為始。查閱直隸。山西。陝西。甘肅。四川等五省。直隸。山西差派一員。陝西。四川一員。甘肅一員。戊辰年查閱湖北。湖南。雲南。貴州等四省。兩湖差派一員。雲貴一員。己巳年查閱廣東。廣

西。浙江。福建等四省。兩廣差派一員。閩浙一員。庚午年查閱山東。河南。江南。江西等四省。山東。河南差派一員。江南。江西一員。週而復始。三年各省巡遍。從之。○命酌撥截留南漕米石。加賑山東。東平。魚臺。濟寧。汶上。蘭山。郯城。益都。博興。高苑。樂安。壽光。安邱。諸城等十。三州縣水災飢民。○賑貸河南。鄭州。中牟。正陽。三州縣被水災民。○豁免雍正九年豫省赴西兵丁借支銀一萬四百八十七兩。壬

寅恭請

皇太后幸靜宜園

上躬迎問安。戶部議覆甘肅巡撫黃廷桂條陳寶豐境外開墾並移駐分理事宜一添築遙隄展挖渠道已飭令該府會同委員於今歲春融督率民夫如式辦理俟工竣日另報一寶豐復設縣治既奉部議不准應將境外戶民一切編排保甲稽查之處暫令平羅縣管轄已墾舊地自地震水決後田畝有高低得水有難易多寡必逐漸安置至認墾戶內恐有鄉愚貪得或本一戶而分報兩戶或本一分而虛占分半者欲定科則必須徹底清查試種一二年後地畝肥磽可辨科則上下可程然後照水田例六年為期升科輸納一土地民人既議歸平羅縣管轄但寧郡地逼黃河渠岸繁多所有疏濬水道添設閘壩及一切春秋再濬四季放水工程水利同知一員斷難兼顧必須設員分理應請將隴西縣

丞移駐平羅城其惠農昌潤二渠專責該員幹辦仍屬水利同知管轄一該員新經移駐事俱創始較隴西需費尤多原額養廉不敷應請照皋蘭縣寬溝縣丞之例每年加給養廉銀二百兩即同平羅縣官役隨餉支領報銷一原奏移駐弁兵原為添設縣治令縣治既不准設平羅現有參將一員石嘴子每月三市即令該參將彈壓稽查毋庸再議分駐均應如所請從之戶部議准江蘇巡撫陳大受疏稱江省民壯屢奉部覆議裁除溧水等十二州縣先經裁減六十八名外茲復按照簡僻地方將江浦震澤青浦婁縣陽湖金匱沛縣鎮洋嘉定等九縣再行酌裁四十八名其通省實存民壯共二千三百五十九名從之兵部議覆山東巡撫喀爾吉善奏稱壽張營所轄河汎南北間隔遊擊催漕查汎由張秋一帶必越東昌始到戴家閘本汎聲勢不能聯絡請將戴家閘汎歸東昌營專防

將東昌營之周家店汛歸壽張營並將陽穀汛外委撥防周家店汛戴家閘原防把總移駐陽穀汛其東昌營原防周家店之外委兵丁徹歸戴家閘應如所請從之○翁牛特固山貝子厄爾德呢故以其子巴爾丹襲封○命大學士訥親兼管戶部事務○以甘肅洮岷道赫赫為山東按察使○蠲免甘肅隴西秦州伏羌金縣涇州皋蘭平涼西寧碾伯九州縣及九家窪屯乾隆十年分水災額賦銀一千八百零四兩糧八百一十三石○癸卯上奉

皇太后自靜宜園啟鑾謁泰陵幸五臺山○詣

皇太后行宮問安○是日駐蹕黃新莊○甲辰上詣

皇太后行宮問安○是日駐蹕半壁店○乙巳上詣

皇太后行宮問安○是日駐蹕長隄○丙午諭

軍機大臣等準奏題請將明季廣東守道洪雲蒸等八祀名宦鄉賢一本朕照例批交部議但此等事務遠隔百年何關緊要乃準奏特為具本請祀甚屬沽名且伊自調任廣東巡撫以來一切政事並未見實心經理似此沽名之事亦不止一次著傳旨申飭之○直隸總督那蘇圖奏直隸秋收豐稔所有節年本年民借口糧籽種等項應令及時交還但查各屬情形或係積歉之後元氣未復或係

被災之後地方出借數多一時新舊並追民力未免拮据今各屬借項自萬石至六萬石不等內鹽山慶雲二縣民欠最多請將所借米穀分作三年帶徵其河間故城寧津獻縣景州任邱吳橋滄州南皮靜海雄縣新城等十二州縣請將新舊借項分作二年帶徵交河阜城青縣威縣清河深州等六州縣請將本年借項全還其節年舊欠分作二年帶徵又宣化府屬十一州縣上年被災本年亦多

被電。請無論所欠多寡。統分作二年帶徵得
旨著照所請行。該部知道。○是日駐蹕石門
店。○丁未

上奉

皇太后恭謁

泰陵未至碑亭。即降輿慟哭。步入

隆恩門至

寶城前行禮躬奠哀慟王以下文武大臣官員
隨行禮○詣

皇太后行宮問安○旌表守正被戕之江蘇上海縣民康瞻庭妻陳氏○是日駐蹕東北奇

戊申

上詣

皇太后行宮問安 諭朕此次西巡與蹕所經
兵民歡慶惟念園扉之中不得一體霑恩朕
心深為憫惻著將直隸山西二省本年正月
初三日恩旨以後所有軍流以下人犯令該
督撫分別情罪請旨減等發落 又諭山東

省東平等州縣。今歲秋禾偶被偏災。已屢降諭旨。發倉賑卹。其地丁錢糧俱已加恩蠲緩。至漕糧一項。例不在蠲免之內。惟是被災之地。責令完漕。民力未免拮据。朕心軫念。著將被災偏重之金鄉魚臺二縣。無論已未成災地畝。本年應徵漕糧。均緩至乾隆丁卯戊辰二年帶徵。其被災稍輕之東平汶上濟寧城武四州縣。應完災地漕糧。著緩俟丁卯戊辰二年。每年帶徵一半。陽穀聊城莘縣滕縣單縣被災次輕。應完災地漕糧。緩至丁卯年帶徵。所有一切漕項錢糧。俱著隨漕緩徵。俾災邑貧民得以從容輸納。該部遵諭速行。又諭據阿蘭泰那木扎勒奏稱南海德克登依等處捕獲潛藏之偷挖私參人犯內。請將從前免死減等發遣人犯十四名。永遠枷號其餘俱照例枷號鞭責發落等語。但念此等人犯俱係在官禁地方潛藏偷挖私參積匪。若僅將從前免死發遣人犯數名。永遠枷號其

餘數百人。俱治以枷責釋放。恐伊等仍舊在彼復行起意偷挖。現在該處流民尚且查辦。令回原籍。此等積匪仍留該處可乎。自應令其永離彼處。各回原籍。其例應如何處治。應否發回原籍之處。著一併查明妥議具奏。○戶部議覆安徽巡撫潘思榘奏稱鳳潁泗三屬連年被災。賑糶頻仍。倉貯不敷。現今米價不昂。糶買尚易。請將加賑月糧動給一月本色。其餘月分照例每米一石折給銀一兩。所有撫卹賑濟折價等項。均需銀動用。而司庫動支正項。僅存銀一十六萬餘兩。尚有庫存封貯銀三十萬兩。又備公銀五萬兩。似應移緩就急。暫借湊用。俟續收地丁銀內歸款。應如所請。得旨依議速行。○是日駐蹕龍善村。

大清高宗法天隆運至誠先覺體元立極敷文奮武孝慈神聖純皇帝實錄卷之二百七十四

大清高宗法天隆運至誠先覺體元立極敷文奮武孝慈神聖純皇帝實錄卷之二百七十五

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十一年丙寅九月己酉諭曰山西巡撫

字錄本二百七十五

一

阿里衮現在患病其巡撫並提督印務著兵部尚書班第暫行署理即日馳驛前往○諭軍機大臣等四川巡撫紀山題請將逆犯夏如春案内附逆之舉人李含筠革去舉人一本內稱准貴州督臣張廣泗咨稱質訊李含筠供認李時吉告以逆言代伊出銀資送夏如春知情不首現將該犯問擬滿徒等語李含筠身列科名既知夏如春逆謀不行舉首更為資給盤費情甚可惡非尋常知情不首

者可比今僅擬滿徒豈足蔽辜況此等匪類充徒本省將來必仍至滋事前曾降旨發遣逆黨俱充發黑龍江等處此案李含筠一犯應即照此辦理可傳諭張廣泗知之○又諭軍機大臣等前遣侍衛富德往視巡撫阿里衮富德復命據奏阿里衮病勢不過暫時不能辦事今遣尚書班第前往署理巡撫印務辦理巡幸五臺之事復遣侍衛德山帶領御醫邵正文馳驛往視既有代伊辦事之人伊得以安閑調攝又聞朕特遣人往視想來心中喜悅漸至痊愈耳併將此寄諭大學士訥親知之○是日駐蹕五郎村○庚戌

上詣

皇太后行宮問安○

上行圍○諭朕巡幸五臺初次經過直隸各處宜沛恩施唯是直隸今歲通省錢糧既已全數蠲除無可加恩再免著該督那蘇圖查明此次經過州縣內男婦年七十以上者照從

前恩詔之例。分別賞賚。以示優卹高年之意。
○大學士伯張廷玉等奏覆。編修楊述曾所
進經史講義。內稱科舉之弊。自不可聽其日
下。而制義之行。已四百餘年。今何能驟為更
張。亦惟酌復舊式。稍為變通。臣等查設科取
士。近代試以文藝。原非專尚詞華。至考試之
法。漢唐以來。明經賢良進士諸科。初或得人。
後適滋弊。欲異其經。至於申韓老莊。皆以發
問。而抄義條誦舊策。其習不改。蓋制愈更。而
趨時好者。應之速。法方變。而爭捷徑者。術彌
工。蘇軾所謂有知人之才。雖因今之法。而有
餘。無知人之才。雖復古之制。而不足。誠篤論
也。今科場取士。試以經書制義。論表判策。求
其各體皆合程式。即老生宿儒。不能出其範
圍。若惟節抄剽盜。即朝更夕改。其術自在。從
前條奏更制者甚多。康熙五六年間。曾廢八
股。而試策論。行之一科。風氣卑靡尤甚。百餘
年來。仍復舊制。亦以取士之法。如是已足。今

楊述曾所稱制義舊制。限三百字以上。篇末
自抒所見。名曰大結。限二百字以下。後因文
日加長大結。遂廢。今請限四百字以上。許用
大結。限二百字以上。等語。查科場條例。初場
文每篇不得過五百字。原有定制。明初多用
大結。非因文長而廢。蓋大結之體。漢唐以下
之事。隨題綴入。明之中葉。每以此為關節。其
後悉行禁止。若仍用大結。弊實愈多。斷不可
行。又稱舊制考試經題。不嫌隱僻。照書義亦
用大結。先引注疏。再引宋儒注解等語。查考
試經義。原聽主司命題。無專尚冠冕。禁出隱
僻之例。如限定隱僻。則又於隱僻中揣摩。弊
亦相等。至宋儒注解。精者固足以發經蘊。若
駁雜之說。添設大結之中。有傷正旨。無補經
文。又稱表題。不論古今。隨時互出。五判易以
五言排律八韻等語。查表以標著事緒。在辭
旨明暢。聲律精切。若果學富詞充。即詩才賦
手。皆已兼之。如隨俗備擬。勉強湊成。無論古

今皆可率應。仍不免雷同。至五判。原欲士子留心律文。俾引經議制。詳慎刑章。若易以律詩。則風雲月露之詞。不免為李錡所譏。且僅僅五言數韻。尤易湊合。更難以杜勦襲。又稱策題發問太多。對者不悉。往往敷衍草率。嗣後五問。限以一經。一史。一性理。二時務等語。查科場定例。五策題字。原不許過多。其發問不拘門類。凡天文。地理。禮樂。兵農。經史子集等類。隨時策試。正欲其貫通古今。指陳得失。

如但限以一經。一史。一性理。二時務。示以定格。更易揣摩。且頭場已試經義。二場試性理論。三場復重見疊出。亦不足以窮摩擬。在楊述曾以為科舉之學。欲其難不欲其易。臣等竊謂若求其實。則今之試法。不見為易。若不求其實。即如所奏。更不見其難。且恐弊端復從此起。惟在司文柄者。精心衡鑒。實意旁求。果能不為淺學眯目。則甄拔皆佳士。不在更張舊制也。從之。○刑部議覆。川陝總督公慶

復奏稱。邪教惑衆一案。查吳珍。李老公。始而妖言惑衆。繼則附逆隨行。李綸。孫奎。雷廷香。捏造邪言。開堂誘衆。實為風俗人心之害。駱東昇等。九名。或造作妖書。或抄傳簡帖。轉相煽惑。均合依妄布邪言。煽惑人心。為首斬立決。劉月貴等三名。合依為從。斬監候。餘犯分別辦理。應如所請。從之。○是日駐蹕東都亭。○辛亥。

上詣

皇太后行宮問安。○是日駐蹕龍村口。○壬子。駐蹕王快鎮。○癸丑。

上詣

皇太后行宮問安。○是日駐蹕法華村。○甲寅。上詣

皇太后行宮問安。○旌表守正被戕之雲南元江府夷民所白妻范氏。○賑江南徐州府屬之豐縣。蕭縣。睢寧三縣被雹災民。○是日駐蹕大教場。○乙卯。

上詣

皇太后行宮問安。○諭朕臨幸五臺觀風問俗蓋欲周知閭閻利病舉登之衽席之安也山西地方風俗尚為淳樸朕此次巡行親見民情頗為寧輯但敦龐之實在民而教養之責在上尤當加意拊循化導俾登上理撫臣為通省之表率藩臬乃師帥之大員府州縣等皆有父母斯民之責其各仰體朕心力行實政教養兼施惟日孜孜罔或怠佚而在小民亦應敦行孝弟崇習禮讓共為良民毋蹈澆漓獷悍之風以成熙皞盈寧之治朕實有厚望焉○是日駐蹕射虎川○丙辰

上詣

皇太后行宮問安。○諭朕巡幸五臺一切供應皆動支正項不令絲毫擾累閭閻惟是安營除道未免有資民力且五臺係初次駐蹕宜沛恩施俾小民得沾膏澤以遂近光之願著將該縣乾隆丁卯年應徵地丁錢糧蠲免十

分之三該撫即遵諭辦理○又諭曰將軍補熙等帶來綏遠城右衛兵丁內善撲人等著賞給一月錢糧其餘兵丁等賞給半月噶爾西等帶來歸化城土默特官兵內善撲人等著各賞銀二兩其餘兵丁等賞給一兩○又諭曰太原城守尉巴蘭泰帶來兵丁每人著賞一月錢糧其存城官兵內有七十八以上者交署撫班第查明分別賞賚○是日駐蹕大營至己未皆如之○丁巳

上詣

皇太后行宮問安。○諭曰閩浙總督馬爾泰自上年病後精力不逮難以辦理總督事務著來京供職閩浙總督員缺著山東巡撫喀爾吉善補授山東巡撫員缺著江西巡撫塞楞額調補仍兼管提督印務江西巡撫員缺著陳宏謀調補陝西巡撫員缺著湖南布政使徐杞補授湖南布政使員缺著廣東按察使岳濬補授廣東按察使員缺著永寧補授○

閩浙總督馬爾泰遵旨奏覆臣前於浙江營兵沈光耀等夥劫案內將慈谿縣知縣倪知本叅革緣該縣始則自踞訪聞之名繼又為營員作開脫之計且並未根究各盜來歷革率完案是以照例題叅得旨此所謂誣善之人其辭游也朕所望於汝者豈如是遷就自居無過之地而已乎已有旨諭部矣○戊午賜隨從諸王大臣等宴○諭據福州將軍兼管閩海關事務新柱奏報本年七月內有暹羅國商人方永利一船載米四千三百石零又蔡文浩一船載米三千八百石零并各帶有蘇木鉛錫等貨先後進口查該番船所載米石皆不足五千之數所有船貨稅銀未便援例寬免等語該番等航海運米遠來慕義可嘉雖運米不足五千之數著加恩免其船貨稅銀十分之二以示優卹該部即行文該將軍知之○諭軍機大臣等前據福建提督武進陞奏汀州府上杭縣土棍羅日光等抗

租拒捕一事朕已降旨通行曉諭續據該督撫等奏報相同惟是所稱鄉民俱投結自首不敢附和為匪已經解散首犯自必就擒地方業經寧帖等語此等刁民既敢聚眾械毆業主及地方官弁差撥兵役拘攝復敢聚集千人拒捕行兇不法已極豈一時曉諭即能解散明係地方文武希圖草率完結是以前後奏報俱有掩飾之意此案首犯尚未緝獲而現在督撫已俱易新任爾等可傳諭喀爾吉善陳大受令其到任後即將此案原卷逐一詳細確查從頭根究務獲首惡盡法處治以儆刁風○戶部議覆左都御史署漕運總督劉統勲奏稱溫衛屯田前定收租上田三石中田二石下田一石六斗額數過多即豐年亦不能如數今酌定每畝除完正餉外上田徵津四錢中田三錢下田二錢係與各半平分之數相符照田定額兩無偏累應如所請自乾隆十一年起運十年分漕糧為始將

應徵前項餉津銀兩。統令該衛照數徵收。從之。○工部議覆雲南總督兼巡撫事張允隨奏稱金沙江兩岸向無道路。間有小徑。亦屬險仄異常。應請修治寬平。不獨行旅負販可免跋涉崎嶇。即銅錫商船。上下往來。亦易保護稽查等語。應如所請。從之。○已未

上詣

皇太后行宮問安。○諭軍機大臣等。爾等議奏綏遠營挑選兵丁。移駐察哈爾地方一事。朕詢知將軍補熙。據稱此項人等。不能養牲度日。到彼處將所賞產業費盡。仍至不能生理等語。此項人等移駐察哈爾地方。原為一經辦理。即無庸復為經營。但伊等既不能在蒙古邊界養牲度活。且辦理移駐所費良多。不如將伊等即作為綠旗兵。令其駐防靖遠營。俾得永遠生計。著寄諭大學士訥親查明。嗣後照此辦理。○大學士等議覆兩江總督尹繼善等奏稱。本年江省黃運湖河。伏秋盛漲。

上江之鳳。潁。泗。下江之淮。揚。徐。海等府州。所屬地方。多被淹浸。撫卹加賑。及水利工程。需費浩大。請將從前樂善好施。減定奏准各捐款。於上下江藩庫暫開捐例等語。係為濟賑。趙工起見。應如該督等所請。令急公人員。於上下兩江藩庫衙門投捐。分別錄用。如有情願就近在部投納者。亦准一體報捐。所收銀數。仍歸江賑應用。扣限二年停止。從之。○庚申。

孝慈高皇后忌辰。遣官祭

福陵。

上奉

皇太后自五臺迴蹕。○是日駐蹕射虎川。○辛酉。

上詣

皇太后行宮問安。○諭山東武定府屬海豐縣。上年秋禾被旱。經該撫奏准。於例賑之外。借給本年四月分一月口糧。并酌借籽種。又樂

陵縣。今夏二麥被旱成災。照例借給籽種口糧。海豐霑化。陽信三縣。麥收歉薄。復加恩一體借貸接濟。此項出借籽種。均應於秋收後照數徵還。但念此四縣。今歲秋禾雖屬有收。究係積歉之後。且均有新舊錢糧漕項。應行輸納。若再將前項借欠。同時並徵。民力未免拮据。著將海豐等四縣本年麥後。因災出借籽種口糧銀穀。并海豐縣所借四月分口糧籽種銀兩。一併緩至來歲麥秋後徵收還項。

以紓民力。再德州。德州衛。陵縣。德平。武城。清平。長清。高唐。八州縣衛。亦曾出借籽種。此內或有似此難以併催全完者。著新任巡撫塞楞額察看情形。酌量分別緩徵。造冊報部。該部即傳諭該撫知之。○又諭據浙江巡撫常安奏稱。松江府屬下沙頭場。又二三場。并青村場蕩地。所種晚禾。忽生青蟲。稻穗多被蝕傷。收成頓減等語。今歲江蘇錢糧。朕已全數蠲除。而場課例不在蠲免之內。此項被蟲場

地。如今其照例輸課。竈戶未免拮据。著將松江下沙等場。本年場課。按照被蟲地畝。緩至次年開徵完納。以紓竈力。該部即遵諭行。○湖廣總督鄂彌達疏。奏湖北驛鹽道曹繩柱。藉入都引見。勒借漢鎮商人銀六千兩。有總商張雲甫可証。又虧空倉穀價銀二三千兩。有倉書可訊。臣不敢以先經保薦。稍事瞻徇。請旨革職究擬。至曹繩柱。係臣與前撫臣晏斯盛薦舉卓異之員。應附疏檢舉。聽部議處。得旨。這所參曹繩柱。著革職。其勒借虧空情由。及本內有名人等。該撫一併嚴審究擬具奏。曹繩柱勒借等款。係朕得之傳聞。令大學士等傳諭。鄂彌達始具本題參。不得以自行檢舉。免其處分。其濫行保薦之處。著照例察議。該部知道。○是日駐蹕大教場。○壬戌。

孝敬憲皇后忌辰遣官祭

泰陵。○諭曰。鄂彌達行止不檢。久經廢棄。朕復加擢用。冀其痛改前非。力圖報稱。乃伊自任

湖廣總督以來舊習未除於一切地方事務並不實心經理即今曹繩柱貪劣各款亦係奉朕諭後始行查叅可見於察吏安民處並不留心且年已就衰不稱封疆之寄著來京候旨湖廣總督員缺著山東巡撫塞楞額補授山東巡撫員缺著山西巡撫阿里衮調補仍兼管提督事務山西巡撫員缺著貴州布政使愛必達補授亦著兼管提督事務貴州布政使員缺著按察使孫紹武補授貴州按察使員缺著直隸通永道恒文補授○又諭曰山西巡撫愛必達到任尚須時日現在巡撫印務即著尚書班第署理俟愛必達到任後回京辦事阿里衮俟病稍痊來京請訓後再赴新任此際山東巡撫印務布政使阿蘭泰不能護理著直隸布政使方觀承即速前往暫行署理直隸布政使印務著清河道朱一蜚暫行署理○又諭河南鄆陵等二十六州縣今歲夏末秋初雨水過多窪下之區秋

禾被淹致有偏災已據該撫奏明酌借貧民口糧麥種照例先賑一月惟是轉瞬寒冬恐災黎餬口無資朕心軫念著巡撫碩色查明該州縣被災輕重酌定加賑月分奏明辦理其加賑口糧在倉儲充裕之州縣均動支本色倉穀散給此內永城鹿邑夏邑睢州柘城淮寧太康扶溝八州縣據奏倉穀不敷散賑准其銀穀兼賑但以銀兼賑定例每石折給銀五錢被災州縣糧價必昂照定例折給恐不敷購買著加恩於定例之外每石加給銀一錢俾貧民得以從容買食巡撫碩色督率屬員悉心經理務使災黎得霑實惠該部即遵諭速行○是日駐蹕法華村○是月兩江總督尹繼善等奏審明江省王徐氏等傳習滇省故犯張保太所倡邪教附和川省逆犯劉奇等妖言惑眾并先後拏獲各要犯一案緣該氏夫王巖素宗張保太之教故後該氏接教開堂乾隆九年有江省犯案逃入雲南

之陸元祥寄書至江轉告王徐氏詭稱張保太已借四川劉奇之竅臨凡度衆王徐氏隨令同教左允文等赴川探聽陸續回家備言劉奇確係張保太轉世現在雪山梁浩聚集多人幫李開花與劉奇往來又有保太繼子張曉在滇設教將來興龍華大會推劉奇為教主聞王徐氏有德行欲令入川該氏將香金紗衣復令左允文等赴川致送劉奇等本年正月間該氏將過繼周彥章女周氏教令坐功捏造乩語指為活佛周彥章附從其說即在家內聽該氏開堂惑衆經地方官訪知臣等嚴飭拏究該氏希圖脫罪與左允文等商謀令其黨費効靈等集衆赴蘇具呈求寬當經飭拏發審究出前情應將王徐氏擬斬立決至往來滇蜀傳播妖言之左允文等分路開堂互相煽惑之黃明理等分別斬絞監候其隨同附和各犯亦分別杖流完結得旨所奏俱悉○署江南河道總督顧琮奏陳家

浦漫口工程共用銀二萬二千二百兩前經奉旨令白鍾山賠補嗣白鍾山以同知李奇齡辦理失宜所致題准著落該員賠補所有此項銀兩究於何員著賠之處請勅部議遵行得旨此何必交部議李奇齡若能賠完自應李奇齡賠補其不足者於所查白鍾山寄匿項內扣補將奉旨處咨部知之○安徽巡撫潘思渠奏接辦鳳潁泗三屬賑務臣會同督臣頒發規條委員親赴災莊按戶清查并將胥保勾串捏混刁民冒賑生事諸弊諄切嚴禁務令查辦妥實至所需撫賑銀米就通省存倉米穀核計盈絀派撥碾運業據藩司詳撥米一十七萬餘石同災屬存倉米十三萬石可敷冬月給賑其折賑銀兩先經奏請借動封貯銀三十五萬兩同司庫存貯正項銀十六萬兩現已陸續撥解應用得旨好實力妥協為之○閩浙總督馬爾泰奏浙省瑞安平陽兩縣境內有大河一道承接萬山溪

水明代設有萬全陡門導引注河今淤塞年久河水無源遇旱淺涸現據兩邑士民呈請自行興建臣委員指示督修令照舊制將浦口堵閉建造陡門四間以三間安設江潯禦鹹蓄淡如遇山溪水大可以宣洩以一間放水入河旁達支港灌蔭田疇并將居民佔墾河身查丈豁糧挑挖疏通接引山溪之水可無乾涸報聞○福建巡撫周學健奏接奉軍機大臣等議覆臣前奏請嚴治西洋天主邪教一摺令臣將現獲夷人勒限回國並分別量擬懲治然臣觀該國夷人實非守分之徒有難加以寬典者查西洋人精心計利獨於行教中國一事不惜鉅費現訊據白多祿等並每年雇往澳門取銀之民人繆上禹等俱稱澳門共有八堂一堂經管一省每年該國錢糧運交呂宋會長呂宋轉運澳門各堂散給又西洋風土原與中國相似獨行教中國之夷人去其父子絕其嗜欲終身為國王行

教甚至忘身觸法畧無悔心至中國民人入其教信奉終身不改且有身為生監而堅心背道者又如男女情欲人不能禁而歸教之處女終身不嫁細加察究亦有幻術詭行臣前於福安各堂內搜出番冊一本訊係冊報番王之姓名凡從教之人已能誦經堅心歸教者即給以番名每年赴澳門領銀時用番字冊報國王國王按冊報人數多少加賞現在福安從教男婦計二千六百餘人夫以白多祿等數人行教而福安一邑已如此之多合各省計之何能悉數是其行教中國之心固不可問至以天朝士民而冊報番王以邪教為招服人心之計尤不可測臣請將白多祿等按律定擬明正國典以絕狡謀得旨未免言之過當然照律定擬自所應當○湖廣總督鄂彌達等奏審明江夏縣民曠雲章在襄陽倡教造言一案查該犯前經投拜已故穀城縣鍾廣國為師後居襄邑倡為彌勒

邪教誘人喫齋招徒聚衆其東明邪書據稱係鍾廣國留貽然現在無憑追究又妄捏不經之說主令傳用惑人實屬不法合依造妖書妖言律擬斬監候至王榮入教招徒尚無左道不軌別情但將曠雲章所造謠言妄行傳說而黃志海等更轉相告語即所傳無幾法亦難寬合依傳用不及衆律分別定擬完結報聞○湖南巡撫楊錫紱奏查大乘邪教各犯莫少康在楚招徒最多其次陳南明等亦俱要犯瀏陽湘陰武陵茶陵等數州縣被惑從教者不下一千餘人督令各屬密訪節次拘獲多名其供出夥犯如有授記招徒者俱行拘拏究訊不敢少寬其被惑愚民遵旨出示令首勒限兩月內州縣將出首保結各姓名冊報查考至未獲要犯孫其天等遴員前赴四川躡緝并咨明該省撫鎮不使漏網得旨寬其實係愚民隨聲附和者其未獲要犯上緊緝拏可也○山東巡撫陞任閩浙總

督喀爾吉善奏遵旨查明鉅野嶧縣曹縣沂水四縣窪地被淹情形雖輕重各有不同但晚禾既有損傷自應一併題報至節次題報三十六州縣衛業經據實妥辦此外委無遺漏之處得旨此奏殊屬掩飾鉅澤曹沂非遣報而何若存此見豈朕委任之意耶浙閩之寄尤非內地可比勉力改過不可再也○山東按察使陞任浙江布政使唐綏祖奏請陞見又稱臣陞授山東臬司謝恩摺內奉到硃批勉臣以志不可隳心不可縱念臣向來辦事原覺過於勇往難免疎虞致干吏議乃蒙恩曲宥甫授提刑復畀旬宣之任惟有仰遵訓示小心謹慎倍加惕厲得旨觀汝此奏若能設誠於內而力行之亦何更待朕訓之有前所批諭朕偶忘之即令再來亦不過此二語耳適因先看汝來京請訓摺故批准來之旨今觀此奏是汝能體朕意矣所勉汝者惟一實字耳又何必僕僕道路為哉遵此旨不

必來。○兩廣總督策楞奏請陞見得旨汝在兩廣甚能體朕意一切務實而不為文飾之舉更無可訓之處再遲一二年奏請可也。○廣東巡撫準泰奏粵東西界接壤交夷該夷境內有土目潘宏曜駐劄江坪地方因年來交夷內訌夷匪散處剽劫內地商艘經由江坪一帶洋面者往往被其剽掠即如東興貼防汛兵歲需糧米由龍門協撥運接濟必由該夷洋面現據署藩司納敏以兵糧關係甚重議於運糧時撥給拖風船二隻并帶舟師加謹防護臣與督臣批行遵照在案是江坪洋面之不靖實與內地兵民皆有關碍查安南國王素稱恭順諒此必由土目之奉行不善臣現在行司確查被劫各案處所果否係在夷界其賊徒有無漢奸在內一面會檄該國王嚴飭查捕即令該管文武及巡海舟師嚴行巡緝報聞。○署廣西巡撫鄂昌奏請已故大學士鄂爾泰曾任雲貴廣西總督控制

邊陲苗民服教請入廣西名宦祠得旨鄂爾泰係鄂昌親叔伊如何題請入祠明係私心亦且稱贊太過若如所稱則似聖人矣將此本發還著大學士等飭行。○又奏接奉硃批訓飭勉揚家教具摺謝恩得旨朕前所訓家教二字恐汝尚未悉蓋謂能辦事奮勉之家教非謂好高自大之家教觀汝名宦一本蓋入於後所謂好高自大之家教矣如此不但無益而且有損汝其慎之戒之朕訓不可屢得可再而不可三汝亦知之乎。○雲南總督兼巡撫事張允隨奏滇省火官會臣自乾隆六年將張保太拏禁監斃後即檄令全省通行嚴禁並於省城各寺廟出示如有縱令男婦燒香做會者先將廟祝住持枷號仍將違禁之人責處五六年來得以止息至從前雖經禁止未能盡絕之處皆臣查察未周所致罪實難辭得旨以後總應時刻留心即此案定後遲一二年更當留心查察其未減留本

省者。與夫此案未獲者。復行此教否乎。○貴州按察使孫紹武奏。先經督臣張廣泗審訊。逆犯魏王氏等一案。緣該氏假以開堂喫齋為名。其實廣為招匪。潛藏逆志。張保太謀為

大逆。魏王氏與伊夫魏明璉。先後承領左右中宮授記。及明璉故後。公然接教開堂。又與伊子魏之璠。前往四川。投見劉奇。共謀舉事。唐世勲受張保太承中授記。呂仕聘受上統授記。皆與劉奇通同謀逆。魏之璧等曾受張

實錄卷二百七十五

三十五

保太督果位護道金剛授記。魏明璋等各受上統下統授記。雷大鳴係年滿千總。受張保太上統執事。附和魏王氏作會。身係職官。非愚民可比。李清前於張保太案內擬流。遇赦放回。仍與逆首書信往來。傳播妖言。實為怙惡不悛。督臣當將各犯情罪。妥擬送交欽差刑部員外郎德福覈明。同侍衛達青阿率臣等將魏王氏。魏之璠。唐世勲。呂仕聘四名。凌遲處死。魏之璧等六名。斬決。至魏明璉。雖伏

冥誅。曾受張保太封號。領有格簿。代為招匪。致使伊妻接替開堂。實為倡亂之首。查明該犯屍冢。發掘戮裂。其案內餘犯。均分別定擬完結。得旨。覽。

實錄卷二百七十五

三十六

大清高宗法天隆運至誠先覺體元立極敷文奮武孝慈神聖純皇帝實錄卷之二百七十五

大清高宗法天隆運至誠先覺體元立極敷文奮武孝慈神聖純皇帝實錄卷之二百七十六

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十一年丙寅冬十月癸亥朔享

太廟遣裕親王廣祿恭代行禮○遣官祭

永陵

福陵

昭陵

昭西陵

孝陵

孝東陵

景陵

泰陵○遣官祭

端慧皇太子園寢

上詣

皇太后行宮問安○行圍 頒乾隆十二年時

憲書 順天府行鄉飲酒禮 是日駐蹕王

快鎮 甲子

上詣

皇太后行宮問安 行圍 戶部議准長蘆鹽

政伊拉齊疏報石碑場境內灤水東徙開墾

地二十八頃有奇照例升科從之○刑部議覆

山東巡撫喀爾吉善疏稱平度州民趙小廝

強姦趙勝先家雇工民婦耿氏未成致氏羞

忿自縊趙小廝照例擬絞監候耿氏附請旌

表等語查耿氏係雇工婦應照僕婦例給銀

三十兩祇於墓前建坊停其入祠從之○賑

卹山西文水渾源屯留襄垣潞城壺關平順

孝義應州懷仁山陰廣靈陽高天鎮朔州馬

邑寧武定襄代州崞縣等二十州縣本年被

水被雹災民並予緩徵○賑卹山西陽曲太

原二縣。本年被水災民。○是日駐蹕羊家莊。
○乙丑大學士管川陝總督公慶復等奏。遵
旨詳訊赤龍霖龍。是否即係一人。查逆僧霖
龍前據一梅供稱。有將來要做蘇君賢軍師
之語。且在順慶地方。創造邪說。暗行招人。似
乎赤龍即係霖龍。今復詳細確查。據一梅堅
供。只曉得師父叫雪峯。又叫霖龍。並不曾聽
見說是雪山裏梁浩混名赤龍的話。師父是
江西人。姓陳。先在杭州靈隱寺出家。平日見
師父手中有八卦紋。胸前有肉瘤。腳下有七
顆黑痣。若那赤龍也有這記號。一定就是他
一人了。其實在是他與否。究不知道等語。並
查訊劉月貴等供。亦相同。應請勅江蘇巡撫
查訊各犯。赤龍身上是否亦有暗記。得旨覽。
又諭軍機大臣等。據慶復紀山覆奏。赤龍是
否即係霖龍。尚無確據。一摺。著鈔錄寄與安
寧閱看。令其將各犯復加嚴訊。所供赤龍有
無暗記。與霖龍相同之處。具摺奏聞。尋奏查

赤龍一犯。係江省附從邪教之左允文等供
出。在川時聽見附從逆犯劉奇之黃世運。陳
良壁所言。雪山梁浩混名赤龍。幫扶李開花。
又陳良壁說。曾替劉奇投書到赤龍處。經前
撫臣陳大受密咨川省緝究。並准川省咨覆。
分飭查拏在案。茲復遵旨飭提各犯。逐一嚴
訊。據各犯供稱。並未見面。有無暗記。與霖龍
相同之處。實屬不知。臣思陳良壁曾為劉奇
投書到赤龍處。黃世運知赤龍原名梁浩。諒
必共悉原委。黃世運現在川省監禁。臣現飛
咨川陝督撫。就近緝獲陳良壁。并監提黃世
運到案審訊。得旨覽。調廣東按察使永寧
為直隸按察使。直隸按察使徐以升為廣東
按察使。是日駐蹕畫壁村。丙寅。諭直隸
之贊皇鉅鹿獻縣故城四縣。今春得雨稍遲。
該督那蘇圖酌借口糧籽種米穀。以資接濟。
例應於秋收後。照數還倉。今朕經過正定。念
此等無力貧民。秋成雖屬豐稔。恐食用尚難

充裕。若所借米穀照例徵還。未免拮据。著將贊皇等四縣所借米穀一併加恩豁免。該督即遵諭行。○軍機大臣等會議。寧古塔將軍阿蘭泰等奏請嚴禁偷創人參。酌定稽查事宜。一請於穆倫河渡口。及和征河口。各添派官二員。兵二十名。放卡。毋庸冰凍後撤回。彈春之蒙古河陸路地方。應長遠設卡。每年揀員率兵三十名放卡。亦毋庸撤回。至琿春地逼海濱。與朝鮮國僅隔圖墨一江。且與鳳凰城等處水陸相通。偷參者。由海運糧接濟。原兵百九十名。除應差外。其沿海色隆吉等十四處。並無稽查。請於三姓地方。抽派官兵三百員名。駕船巡哨。佐領一併移駐。又於琿春另戶閑散滿洲內。添撥披甲十名。足五百名成數。再寧古塔週圍地方。安卡十處。距城三十里。至百里不等。因附近屯莊。每與居民通同偷放。創參人駝馱。俱請移駐屯莊。寬遠之地。又發票之年。添設堵截之卡四處。相去四

五十里至八九十里不等。難以會哨。請將兩處卡座。相去稍遠之地。派撥官兵巡防。仍委員不時稽查。以原設之卡為界。其越界墾地。安屯。長遠禁止。此項放卡官兵。一月一換等語。俱應如所請。惟所稱派撥三姓官兵。在琿春海口。駕船巡查。其船是否舊設。與朝鮮國有無交涉。并該地色隆吉等十四處。島嶼河港。相距道里。均未分晰。應令繪圖送部另議。一索倫達呼爾。越界至松阿里烏拉。打牲滋事。私將米糧裝船。出黑龍江口貿易。接濟偷創人等。應嚴行查禁。再烏鎗例。不准出邊口。帶赴參山。亦應禁止。第創夫入山。防範惡獸。未便概禁。請嗣後領票時。按號註票。回山驗票。不報察出治罪。應如所請。行黑龍江吉林將軍。將私帶米糧出賣之人。照販私鹽律。核計米數銀數定擬。其違例私帶烏鎗。照商民私造烏鎗。不報官律。杖一百。轉售者。照軍人私賣軍器。充軍律減等杖一百。徒三年。官不

查出議處。一。採取官樺皮。打牲烏拉。創參催交貂皮。官兵所帶衣糧器用。及赫哲費雅哈人等至寧古塔進貢貂皮。回時。購買物件。口糧數目。令報將軍衙門注冊。沿途驗票放行。又三姓。琿春等處。商人官兵。領票赴寧古塔船廠地方。購買物件。令呈報該管官給隨票一張。仍回本處呈驗。倘違禁帶米石物件。賣與偷創人等。并易換人參者。請照私販鹽觔律治罪。查帶物應視多寡為區別。應將米不及五十石。什物值銀不及五十兩者。照無引私鹽律杖一百。徒三年。米過五十石。物值過五十兩者。照越境販私鹽三千觔以上例。發附近充軍。官兵知法故違。加民人一等。旗人有犯罪如之。徇縱失察者。均分別處治。一。過冬偷創人犯。若僅刺臂。雖解回原籍。不能免其復逃。請將緝獲過冬人等。分別旗民。照例治罪。即刺面遞回原籍。應如所奏。嗣後拏獲過冬偷創之民人家奴。開戶人等。無論已未

得參。一體刺面。民人遞籍。交地方官管束。照竊盜例。不時點查。並將有無脫逃。季報督撫查核。其另戶正身。仍照例免刺。交將軍轉飭管束。再旗下家奴。及開戶人犯。若刺字後。仍交原主。不足示懲。應撥發拉林。給移駐種地之滿洲人等為奴。從之。○是日。駐蹕正定府行宮。翼日如之。○丁卯。

上閱滹沱河隄工。○賜隨從諸王大臣等宴。○諭朕加惠黎元。將直省應徵錢糧。輪年蠲免。粵西省桂。梧。南。太。柳。慶。鬱等府州屬。有額徵官田租穀銀米等項。俱係入官田畝。招佃承耕。收租以充公用。又桂。平。等府州。額徵學租銀米一項。因非地丁錢糧。均不在蠲免之內。茲特加恩。將粵西省額徵官租學租銀米穀石。蠲免十分之三。俾邊徼農民。均沾實澤。該部即遵諭行。○禮部議。福建巡撫周學健奏。稱閩省侯官縣屬天寧山下臨大江。是為龍潭。誌載唐廣德中有龍從地出。遇旱祈禱輒

應臣莅任後。地方苦旱。屢次親禱。俱霽甘霖。但棟宇未立。祀典無聞。現買田建廟。請動項興建。併請照雲南鹽井龍王之例。加以封號。春秋二祭等語。查祭法云。山林川谷邱陵。能出雲為風雨。見怪物皆曰神。又云。日月星辰。民所瞻仰也。山林川谷邱陵。民所取財用也。非此族也。不在祀典。是所謂能出雲為風雨。見怪物者。即指山林川谷邱陵之神。非指所見之怪物以為神而祀之。今該撫所奏侯官縣龍潭。正祭法所云不在祀典者也。且古者名山大川之祭。五嶽視三公。四瀆視諸侯。蓋祭之牲幣。視公侯饗餼之禮。非錫之命而加之爵也。今四海之龍。已封王號。若一潭偶有靈應。概得封王。揆以古禮。難免黷亂。再查古之祀典。分天神地祇人鬼為三。惟人鬼為之立廟。而神祇皆祭以壇。所謂知鬼神之情狀也。龍潛深淵而乘雲氣。顧乃像以衣冠。庇之棟宇。非其情狀明矣。且廟必招僧道以守之。

建廟買田奪民之耕。以奉游手。殊非政體。瀕海邊徼之民。惑於鬼神。正當示以常道。各省會城皆有山川壇。載在祀典。應令該撫春秋親祭。既為民請命。亦可令民聽不惑其所請。封王建廟之處。俱毋庸議從之。工部等部議覆雲南總督兼管巡撫事張允隨疏。稱東川府巧家地方逼近涼山。接壤川境。前將東川府經歷移駐其地。原建木柵防護。今金江開通。商旅衆多。應改築土堡。以垂久遠。又安機租一汛。分駐弁兵。向無藩籬保障。應建木柵捍衛。請動項興修等語。應如所請。從之。廣東巡撫準泰疏報廣惠潮肇高瓊嘉等七府州開墾額外水田沙隄地三百頃一十畝有奇。○以禮科給事中長柱為內閣學士兼禮部侍郎。○賑卹湖北漢川。潛江。沔陽。天門。荊門。江陵。監利等七州縣。并沔陽衛。荊州左衛。本年被水災民。並予緩徵。○賑卹湖南臨武。藍山。二縣。本年被水災民。並予緩徵。○戊

辰。

上詣

皇太后行宮問安。○諭軍機大臣等。原任湖北驛鹽道曹繩柱。勒借鹽商銀六千兩。虧空倉穀價銀二三千兩。現今題參革職審擬。并據該督撫等奏稱。此項勒借虧空銀兩。恐伊任所難以完結。已經咨明江西撫臣。令將曹繩柱原籍家產。查明封固。以備還項等語。陳宏謀向有沽名習氣。遇此等事件。往往瞻徇。不肯實心辦理。可傳諭陳宏謀。此案務必嚴行確查。毋致寄頓隱匿。○是日。駐蹕趙村。○已。

上詣

皇太后行宮問安。○是日。駐蹕石家莊。○庚午。

上詣

皇太后行宮問安。○諭朕自正定回鑾。固城祁水之間。有縣焉。與堯母同名。雖述古之義也。觸目踟躇。於意弗安。其易之。仍為望都。○諭

軍機大臣等。朕聞常州府知府董怡曾辦事才具。不能稱職。其操守亦多不檢之處。人言籍籍。可傳諭尹繼善。令其查明據實奏聞。○又諭浙江衢州鎮總兵李崐。請添火藥一摺。著鈔錄寄與喀爾吉善。令其查明該鎮實在情形。或應酌量添給。或應照舊給與。具摺奏聞。○大學士等議覆協辦大學士兼管直隸河道總督高斌。會同河東河道總督完顏偉奏。東省運河一帶隄岸。被水衝刷。多有殘缺。請將上。捕運。加。四廳所屬。北自臨清。南至臺莊。兩岸隄岸。凡卑薄殘缺處。間段加高培厚。其蜀山。南旺。二湖。周圍圈隄。多有損壞。應酌量增築。汶上之戴村壩石工。亦有殘壞。應修補完固。南北運河石閘。坍塌頗多。應照式修補。再何家壩迤下土埝。及濟寧州屬之橫壩。俱經衝刷殘壞。該處工程。向係民修。但現當被水之際。民力拮据。應動項補築。并於何家壩內對岸。開挑引河一道。橫壩下建築涵洞。

二座嗣後仍令地方官督率附近居民乘時修築。各等語。均應如所奏辦理。從之。○兵部議覆直隸總督那蘇圖疏稱。直屬衝繁地方。差使絡繹。夫役奔馳。馬匹損傷。請倍給工料等語。查直屬各驛支銷錢糧。多寡懸絕。自應分別衝僻。核定數目。請嗣後至衝繁驛遞。差使最多者。其馬匹草料。照臣部館所額馬之例。日准銷銀六分七釐五毫。次者照江南山西之例。日准銷銀六分。最簡僻者。照河南湖廣之例。日准銷銀五分。各驛驛亦日銷銀五分。驢日銷銀三分。至各項夫役工食。亦應酌定數目。馬牌夫頭馬頭人等。日支銀六分。餵馬夫役。日支銀四分五釐。扛轎車包驛驢緯水走遞傳報聽事等夫。獸醫車牌廚役等項。日支銀四分。抄牌字識水火門茶倉庫館防。答應執事鋤草等夫。日支銀三分。遞皂日支銀二分。著為定例。從之。○工部等部議覆山西巡撫阿里衮疏稱。晉省衝僻二路墩臺內

除祁縣趙城霍州等州縣現俱堅固外。所有通省各屬共應改建墩臺六百六十九座。請動項興修。再未經改建之僻路墩臺每座請兩年給與歲修銀一兩。應如所請。從之。是日駐蹕高庾鋪。辛未。

上詣

皇太后行宮問安。○諭此次巡幸五臺所過地方。一應營盤道路俱係地方文武有司。豫為經理。朕心厘念。所有直隸山西二省各該地方。辦差文武官員內如有罰俸住俸降級之案。俱著准其開復。該督撫等查明咨部辦理。○又諭保定府駐防兵丁內。閱操兵丁等著各賞給一月錢糧。未經入操官員兵丁內。將年及七十八十以上者。交總督那蘇圖查覈。分別賞賚。尋奏保定駐防退甲閑散內。其八十以上者。應照雍正十三年恩詔賞給七十以上者酌減。至老婦等雖恩旨內未經指明。應否頒給之處。請旨得旨。著一體賞給。○是

日駐蹕保定府行宮翼日如之○壬申。

上幸教場閱兵○賜隨從諸王大臣等宴○賜蓮池書院

御書扁曰緒式濂溪○諭據將軍傅森奏稱本年五月間黑龍江地方因山水陡發附近旗民人等田畝俱被水災七月間又降嚴霜秋收無獲請借給口糧籽種料豆以資接濟等語朕思本年黑龍江地方被災較重現在借給之糧若仍令其補還伊等未免拮据所有

此項糧米著加恩即行賞給該部知道○又諭曰將軍傅森奏摺內將穀葉生蟲清語兩處俱行誤寫黑龍江係專習清語滿洲辦事地方將軍又有訓導屬下之責乃於穀葉生蟲清語尚且不知致有舛錯可見平日不以清語為事此外奏摺多遺漏錯誤之處著飭行○大學士等議覆協辦大學士吏部尚書高斌等奏稱遵旨查勘江南河工應行辦理事宜一海州沐陽之六塘河沐河兩岸子堰

以及舊有堰工應酌量增築五丈義澤六里等河應添建滾水石壩請動項興修一海州所屬各村田畝低窪之處應圍築圩岸開挑溝洫請令地方官勸諭民間乘時修築至無力業主應酌借帑項俟年歲豐稔按數交還其有力之戶倡率修築多者題請議敘少者督撫給扁獎勵一沐陽縣事繁向無丞簿難以兼顧請添設縣丞一員專管河務定為要缺揀員調補溧水縣向有管糧縣丞一員該邑糧務無多應行裁撤均應如所請從之○戶部議覆前任山東巡撫喀爾吉善奏稱陵縣地方邇年被災歉收請將該縣漕糧自乾隆十一年為始於額徵米內量行減免查與定例不符應毋庸議得旨陵縣地方邇年疊被災傷完漕之時民力未免拮据著署撫方觀承將該縣數年被災所有積欠未完漕糧或應緩徵或應蠲免之處詳悉查明具奏○刑部議覆調任江蘇巡撫陳大受疏稱上元

縣民張爾德之婢名新蓮被尚大強姦不從勒織斃命請將尚大照例擬斬立決新蓮附請旌表等語查新蓮係婢女若於節孝祠內一體設位未免良賤不分應給銀三十兩祇於墓前建坊停其入祠從之○旌表守正捐軀之山東泰安縣民陳榮媳張氏○癸酉

上詣

皇太后行宮問安○諭曰巴靈阿係朕特加陞擢用至吉林將軍又曾在乾清門行走理宜感朕厚恩於地方諸事實心整理乃自接任以來苟且因循祇以寬待屬下沽取名譽朕降旨令其來京候旨今巴靈阿並不畏懼若將伊留京降補不足以示懲警巴靈阿著革職發往軍營自備資斧効力贖罪○諭軍機大臣等直隸總督那蘇圖請將截漕存米酌派霸州等三十三州縣分貯並酌籌通省積貯一摺經戶部議令將各該州縣內額貯倉穀缺額溢額數目查明分晰具題到日再議

朕已批依議矣第念截留漕米分貯附近水次州縣將來出陳易新於倉儲民食均有裨益事屬可行若俟往返咨查未免有需時日著傳諭那蘇圖令其一面照部議聲明具奏一面即行辦理再各州縣倉穀春糶秋收其價值貴賤不能畫一往往以此處有餘補彼處不足此亦通融辦理之法今歲直屬年穀豐收米價各處平減則糶買盈餘之價既無應補之處此項餘銀作何經理昨曾面問那蘇圖伊尚未奏明亦著那蘇圖詳查定議具奏以聞至於義倉一事乃急公慕義之人當米穀有餘輸之於倉以備緩急目下正值豐收之際宜飭地方官善為鼓舞勸導以足倉儲蓋米穀為民食攸關乘此豐年當廣為儲蓄之計可一併寄諭那蘇圖凡有並積貯之事令其悉心籌畫茲已交冬當急為經理毋致後時○是日駐蹕太平莊○甲戌上行圍○諭曰逆犯魏王氏劉奇等襲張保太

大乘邪教煽惑愚民陰謀不軌罪不容誅。今首惡俱正典刑逆黨分別懲治雖係各省查拏而發奸摘伏則自張廣泗始之甚屬可嘉著交部議敘。○吏部等部議覆調任山西巡撫阿里衮奏歸化綏遠二城乾隆六年添設靖遠營綠旗弁兵五百餘名歸殺虎協管轄該營與殺虎協相距遙遠歸綏道駐劄密邇職任分巡與營伍不相統攝請加兵備銜將靖遠一營令該道稽查鈐束遇兵民交涉事件持平裁決軍政等項仍會同殺虎協副將辦理該營俸餉向寄貯朔平府庫請領不便請於道署建庫樓二間將靖遠營俸餉即貯道庫每月令該道督同營員監放如有扣短等弊聽該道揭參應如所請從之。○兵部議覆大學士仍管川陝總督事公慶復疏稱裏塘宣撫司安本才具平庸短於撫馭近復失地容奸本應照溺職例革職姑念其辦運糧務尚為黽勉請從寬降為副土司所遺宣撫

司一缺查明正司土守備汪結上年征贍對時於招諭攻奪諸事最為出力應即以汪結陞補等語係為邊地得人起見除照例給發汪結號紙飭令任事外安本准其降為副土司又稱裏塘地方原有副土官一員管理喇嘛其事務倍於巴塘請多設副土官一員等語亦應准其添設或以安本降補或另行揀員之處令該督酌議具題又請設土兵三百名每名日給口糧銀五分亦屬以番治番之法應令將土兵造冊報部俟三年後地方寧謐題請撤回從之。○旌表守正捐軀之浙江縉雲縣民朱老會妻陳氏。○是日駐蹕定興縣大田村。乙亥

上詣

皇太后行宮問安。兵部議覆浙江提督吳進義奏稱提標所轄六營內有五營官弁多員因營兵為盜在部行賄案內現候內部議處請將沿邊俸滿旗員保送到京之遊都守備

簡發三四員。再於江省叅遊都守內。有臣深知其幹練者。准調三四員等語。查直隸山西沿邊旗員。五年俸滿保送之例。久經停止。部中現無俸滿保送之人。可以分發。該提督為整飭營伍起見。臣等酌議。請就近行令直隸總督。於現任滿員內。有閱俸二三年者。揀選遊擊二員。都司二員。守備二員。送部引見。聽候簡發。再定例督撫赴任。將平日所知人員。奏請帶往者。不准行。若調任後。於前任所知。仍准保奏。今該提督奏於江省叅遊都守內。請調。應如所請。一面列名保奏。一面咨江督給咨赴部引見。得旨依議速行。○是日駐蹕涿州包子鋪。○丙子。

上詣

皇太后行宮問安。○諭據湖南巡撫楊錫紱奏稱蒙賜

列祖聖訓各全部。計四封。先拆二封。俱係

聖祖仁皇帝聖訓。先即繕摺謝恩。隨後盥手恭

行全閱。始知

列祖聖訓俱蒙頒賜。前摺疎漏。不勝惶悚等語。從前楊錫紱謝恩摺內。疎漏出於無心。尚為可恕。今所奏未閱全函。以致疎漏之處甚屬掩飾。此欺未讀書之人則可。何則。豈有不閱首函。而閱二函三函者乎。無心之過。誰則無之。掩飾之風。斷不可長。著交部照本章錯誤例議處。○禮部等部議覆湖南巡撫楊錫紱奏稱湖南貢院。係雍正二年。通省士子公捐廩膳銀建。彼時因場期已近。趕緊修造。工程不無簡畧。已據前任撫臣蔣溥奏明。動項興修。但牆垣單薄。號舍低窪。陰雨易致傾圮。必須通行拆卸。照各省式樣。改建號舍。並添建轅門。照牆。鼓樓。瞭樓。明遠樓。以符體制。據各府州紳士呈請。願將丁卯年科舉盤纏。及廩膳銀兩。捐出修改等語。應如所請。從之。○兵部議覆奉天將軍達勒當阿奏稱。奉屬海疆島嶼。最易藏奸。請於每年五六月內。飭旅順

水師營官。乘風浪平順時。西至天橋廠巡查。其船到船回日期。令金州海口守汛放卡各官詳報。向鳳凰城巡查之時。令該城守尉詳報。所有巡防事宜。務令水師官兵等倍加嚴密等語。均應如所請。從之。○賑卹湖北棗陽縣本年被水災民。並予緩徵。○是日。駐蹕陸村。○丁丑。

上詣

皇太后行宮問安。○是日。駐蹕青塔。

實錄卷二百七十六

十三

大清高宗法天隆運至誠先覺體元立極敷文奮武孝慈神聖純皇帝實錄卷之二百七十六

大清高宗法天隆運至誠先覺體元立極敷文奮武孝慈神聖純皇帝實錄卷之二百七十七

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次 慶桂
總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務世襲騎都尉軍功加十九級隨帶加二級又加二級 董誥內大臣戶部尚書鑲藍旗滿洲都統軍功紀錄五次尋常紀錄十四次 臣德瑛經筵講官太子少保工部尚書紀錄六次 臣曹振鏞等奉

敕修

乾隆十一年丙寅十月戊寅。

實錄卷二百七十七

上奉

皇太后還宮。○詣

大高殿

壽皇殿行禮。○還宮。○詣

皇太后宮問安。○已卯。

上詣

皇太后宮問安。○諭今年進剿膽對兵丁。有奮勇擊賊陣亡傷亡病故者。俱係臨事捐軀。深堪憫惻。伊等子弟。有堪以充伍者。有雖有子

弟而幼小不能充補名糧及並無子弟親老妻單者均應加恩撫恤著該督撫查明應頂補者即與頂補有應月給銀米者即照例月給銀米至伊等眷屬多支月餉若按本兵亡故之日照數扣追未免艱苦著一併查明悉行寬免○以湖北巡撫開泰江西巡撫陳宏謀對調○命工部侍郎尹會一提督江蘇學政○庚辰諭曰大學士張廷玉服官數十年日侍內廷勤勞敬慎夙夜靖共靡間寒暑今年逾古稀每日晨興赴闕未免過勞朕心軫念古大臣有於居第視事數日一至朝堂者嗣後可仿此意不必向早入朝或遇炎蒸風雪或自度宜於少休亦不必勉強進內其有應辦事務可以在家辦理俾得從容頤養精力自加強健以示朕優眷老臣之意○辛巳諭曰大學士張廷玉步履微覺艱難吏部引見月官不必勉強帶領○諭軍機大臣等蘇松水師總兵胡貴奏自到任以來於巡洋之事皆實

實錄卷二百五十七

三

力督察巡防一摺著抄錄寄與尹繼善令其查明胡貴果否如此認真辦理并伊居官聲名如何之處據實具奏○又諭刑部奏王德純將已貯縣庫銀兩令長隨鄒鉉移會吳縣支領請將王德純並家人解赴江省令蘇撫將一應實對人犯就近審明定擬一案朕已批依議矣事關庫項出入爾等可傳諭安寧令其嚴查留心辦理○又諭前經降旨停止莽牛哨地方安設卡座諭令將軍達勒當阿在內地境內嚴加查察務將偷越出境之人堵截緝捕並於朝鮮人越境巡探等事加意實力辦理矣今據總督那蘇圖奏稱前在奉天將軍任時朝鮮人有越入內境挖參者經我兵拏獲數百名並搜出多參等語從前該國人既有結夥數百越境挖參之事今請停止安設卡座顯有縱容偷越情弊著再寄諭將軍達勒當阿飭令守卡官兵於海岸路徑嚴加防汛朝鮮有偷越挖參者實力查

實錄卷二百五十七

三

拏。○光祿寺叅奏。臣寺司庫各官。互揭虧短庫項。將堂批劄付。私行塗改挖補。以上年奏銷各款銀二千一百五十三兩零。移作本年。以圖抵飾。請將前後各司庫交部嚴訊。得旨。著交部。光祿寺司庫。將劄付私行塗改挖補。以致虧空。乃係正二月內之事。該堂官今日始行叅奏。則平日並不留心稽察。可知。此項虧空銀兩。如該司庫等不能賠補之時。即著落該堂官等代賠。○壬午。諭。據安徽巡撫潘

思渠奏。安省自乾隆元年至今。未獲盜案。共一百一十六起。而已獲各案。亦拖延未結。可見從前封疆大吏。全未留心整飭。董率屬員。以致積案繁多。似此懈怠廢弛。盜風何由寧息。著將乾隆元年以來。歷任巡撫。交部查明。察議具奏。署按察使都隆額。赴任已及二年。塵案纍纍。不能實力辦理。難稱臬司之任。著回京供職。安徽按察使員缺。著赫慶補授。其令潘思渠董率各屬。設法購緝。嚴催完結。於

一二年後。具摺奏聞。以收緝盜安民實效。○命刑部尚書汪由敦。在軍機處行走。○豁免安徽六安州廬州衛。水衝沙壓地三項八十畝。有奇。無徵額賦。○癸未。

上詣

皇太后宮問安。○幸瀛臺。○大學士等奏。據御史萬年茂。叅奏學士陳邦彥。于振。於本年八月瀛臺賜宴之日。向戶部侍郎傅恒。屈膝請安一摺。臣等查問陳邦彥。于振。俱云並無此事。及詢其同班。裴曰。修董邦達。亦云未見。至萬年茂指證之。大學士史貽直。尚書王安國。皆係大臣。若果有見聞。豈有不行具奏之理。是該御史所奏。毫無實據。應請交部察議。得旨。朕前覽萬年茂。叅奏陳邦彥。于振。一摺。在伊以持國體為言。朕因關係陳邦彥。于振。二人之名節。而傳恒若妄自矜大。致詞臣如是。趨奉亦當有應得之罪。彼日即召劉於義。汪由敦。舒赫德。王安國。面詢以此事之有無。劉

於義等三人咸以為子虛而王安國則以為傳聞彼二人實因錯認臣亦聽得此語而實未目覩朕復令大學士張廷玉訥親查問今據奏稱事屬誣捏請將萬年茂交部察議朕思陳邦彥于振皆係廢棄之員因其尚嫻於文翰復用為詞臣以備編纂之任伊二人年已遲暮亦當自知無進取之階豈尚希冀陞遷而求榮含垢乎即使躁進患得之心不息思獻媚以僥倖則凡諂媚於人者必在暮夜幽僻之時焉有於大廷廣衆之中而為此忍恥屈膝之事以自召訕謗者乎在傳恒世族舊臣可望成器是以加恩令在軍機處行走使之練習政務然官不過侍郎地未叅密勿較之大學士張廷玉訥親被朕任用已久者實異設使陳邦彥于振獻媚于求亦當在彼而不在此也且即大學士張廷玉訥親為朕素所倚任亦不過贊勦機務至於用人之際朕自主之伊等亦必俟詢問其人之賢否然

後據實陳奏初不能以己意為進退也即在廷大臣於召對之時從不敢援引所私此舉朝所共知者朕何如主豈委用人之權於臣下者哉況是日侍宴之時諸臣齊集衆目難掩朕將此詢問張廷玉訥親劉於義汪由敦舒赫德等咸稱未見亦無所聞惟王安國奏稱臣未看見但聽人言二人錯認而萬年茂又稱王安國親見若果如所奏則王安國蹈欺君之罪矣萬年茂又稱聽說史貽直彼時曾面責于振不是不知于振說甚麼只見史貽直怒目看他等語史貽直與于振朕知其向有親誼果見其如此行為必將為之容隱或於私第責讓則有之豈肯於大衆之前顯揭其短既已對衆斥責史貽直身為大學士何敢隱而不奏乎今若因萬年茂牽引口舌之事派王大臣令大學士尚書質問國家更無此體矣伊此外又牽引學士講讀編檢多人且伊所牽引之人亦稱陳邦彥等錯認人

了。夫錯誤人所難免。萬年茂既稱為錯。何以又將周長發等舉出為證乎。伊之情詞閃爍。非遁即支。而信口捏飾。污人名節。所關已非淺鮮。乃猶緝緝翩翩。假他人之口。以文其影射之工。牽引大學士尚書等官。思興大獄。其心甚不可問。從前湖廣余銓。出身不正一案。萬年茂奏稱素不認識余銓。並與彭維新亦未謀面。而彭維新私將伊名填寫文內。咨送吏部等語。朕令大學士等詢問彭維新。彭維新奏稱本年二月內。湖北人僉云余銓係程姓世僕。不當與會。並將余銓姓名塗抹。其時萬年茂身為會首。屢為附和。不得諉為不知。且萬年茂託人准出結官。先行檢舉之。呈更不得諉為不知。反奏稱與余銓遠隔。不知實據。巧為辭說。為余銓出脫。欺罔反覆。情狀畢露。至臣與萬年茂未嘗不相見。即如前二月內。祀神宴會。則竟日晤接。彼此交揖團拜。今奏稱與臣未曾謀面。又未嘗與臣一揖。誕幻

傾險等語。彼時朕因此案現在行查。且係口舌之事。有關大臣言路之體。暫存未發。今伊所奏之事。與前意相同。又係誣讎詞臣。且余銓一案。該省已審明。家僕是實。則萬年茂反覆狡詐之處。百喙難辭。著交部一併察議具奏。尋議萬年茂照奏事詐不以實例革職。從之。吏部議陞任福建巡撫周學健。咨覆調任糧驛道菩薩保。調任泉州府同知梁須樞。失察屬員收受陋規。不行揭報。均應照例降三級調用。得旨依議。向來道府因公呈誤。例應降調者。俱著詢問該督撫。如居官尚優。照所降之級留任。如係平常之員。即照部議降調。同知通判州縣。則令該督撫出具考語。送部引見。而州縣佐雜。則又係問督撫以定去留。朕思道府為地方大吏。較同知通判等官更屬緊要。未便如州縣佐雜一例。祇據督撫考語。遂以為定。現在同知通判州縣。有因公降調者。經朕降旨送部引見。不必開缺。其道

府既有應得之處分。亦應令其來京引見。不必開缺。則該員賢否。朕得再加鑒別。以定去留。伊等若得回任。亦必更加勉勵。嗣後俱著送部引見。再降諭旨。此本內菩薩保。梁須梗。即遵此旨行。○戶部議覆黑龍江將軍傅森等奏稱。墨爾根齊齊哈爾黑龍江三城八旗兵丁水手人等耕種地畝。現查明先後被水被霜情形。所獲糧石。不敷食用。請照例於不敷之月起。分別借撥倉糧等語。應如所奏行。

該將軍等。在於公倉并備存倉糧內。動支撥發。除動用公倉糧毋庸補還外。其借動備存倉糧。仍於次年如數補還。又稱博西等八站站丁地畝被水。收穫無多。請按各站坐落地方遠近。分別借糴等語。亦應如所奏辦理。至所稱黑龍江現貯倉糧止二萬二千餘石。該處需用甚多。不敷儲備。亦准在呼蘭倉糧內。動撥一萬八千石。運往黑龍江存貯備用。從之。○以廣州正紅旗漢軍協領白朝棟為廣

州右翼副都統。以故廣西定羅司土巡檢徐國丞孫爾梅襲職。○甲申諭上下江被水地方。朕已加恩賑恤。切諭該督撫實力撫綏。無令失所。其營兵惟賴月糧養贍。但該處既屬歉收。米價自必昂貴。窮兵度日。不無拮据。朕心深為軫念。著將鳳潁泗淮揚徐海等處被災地方各營兵丁。於十二月內。借給一月餉銀。明年四季扣還。以資接濟。○又諭朕前降旨。直隸山西兩省辦理營盤道路之文武

官員內有罰俸住俸降級之案。俱加恩准其開復。今思此內若無處分案件之員。未得一體霑恩。著該督撫查明咨部。各准其紀錄一次。○刑部議覆浙江處州鎮總兵苗國琮奏稱。地方刁惡之徒。遇事生風。挾私鼓衆。甚至塞署罷市。抗糧毆官。同城文武畏其勢熾。多隱忍不究。否則事定後。方敢查拏。首惡多致遠颺。請嗣後凡遇前項不法等事。許令文武即時帶領兵壯持械往捕。如若輩即能俯首

服罪不敢抗拒。則分別末減。以為畏法者勸。倘敢恃衆不服。或呼噪抵格。許即麾兵壯施放器械。照盜賊拒捕之條。殺死勿論等語。係為懲奸除惡起見。應如該鎮所請行。惟持械往捕一節。查奸民執仗公行。原與盜賊無二。自難徒手擒拏。若止赤手羣聚。隨衆呼號。尚與盜賊有間。果如該鎮所奏。恐地方官辦理不善。轉致奸民望風潛逃。或混行擒拏。或局外良民被拘不服。或帶往兵壯貪賞冒功。且一經施放器械。或將首惡捕格致死。案何由定。是則持械捕拏。必須相機而行。不得率意輕舉。請嗣後遇有奸民鼓衆之事。如該犯等持有兵仗。而文武不帶持械之兵壯擒拏。致令奸犯遠颺。及聚衆人犯並未執有器具。而文武輒帶兵壯遽行殺傷。以致激成事端。俱按律分別究懲。從之。○調盛京工部侍郎鼎滿岱。為盛京兵部侍郎。以內閣學士長柱為盛京工部侍郎。○調陝西長安縣知縣董三

錫來京引見。○乙酉。諭八旗舊營房。應每旗各派都統一員。彈壓管理。毋任官兵將住房損壞。著該部照依管理新營房之例。繕寫都統等名單呈進。○旌表守正捐軀之河南靈寶縣民毋知前妻閻氏。○準噶爾部人多拉持巴郎濟班岱等三名。婦碩賴一口來降。命賞給安插如例。○丙戌。

上詣

皇太后宮問安。○諭朕命翰林科道官輪日進講經史。本欲研究經術。闡明義理。以淑心身。以鑑興廢。而諸臣論講。往往闌入條陳。若實有裨政務。則亦何害。要不當借端立說。以逞私見也。即朕回鑾後數日內。如檢討程恂舉程子一命之士。苟留心愛物。於人必有所濟一條。因請重縣尉之選。欲以士人初任是官。而重其秩。是一縣又增一令也。成何政體。今日御史馮秉仁進講。因名山升中於天一句。摺中引宋祥符中有事泰山。往還四十七日。

未遇雨雪等語。其意蓋因朕昨登北臺。氣候晴暖。曾宣示在京大臣。故為此影射之詞。且豫擬朕今年巡幸山西。將來當有東巡之事。故為此奏耳。夫曲阜聖人宅里。自漢祖以來。謁廟行禮。流傳於史冊者。指不勝屈。我

皇祖聖祖仁皇帝瞻拜

孔林禮儀。崇重前代。莫與比隆。至岱宗喬嶽。近在魯邦。彼慕封禪之虛名。襲七十二代之故事。先儒訾議朕所熟聞。若乃觀車服禮器。以伸嚮往。因之觀風問俗。循

聖祖之家法。溯虞夏之遺規。亦屬省方鉅典。果其年歲順成。時可舉行。朕豈因人言而遽止。又豈因臣下進說而輕行。彼窺測逢迎之伎倆。舉無所施。馮秉仁果何所見而為此奏耶。朕觀近日大小臣工之弊。九卿部院諸臣。不過循分供職。自以為可立無過之地。然尚無敗檢踰分。欲有所為者。此所謂失之不及也。

至御史一官。多不得人。如萬年茂之奏于振

陳邦彥一事。牽引支離。譸張為幻。李兆鉦請惜字紙。直欲繩以官法。瑣屑不經。更屬無謂。其識見卑鄙。不可見之施行。或留中。或發還。本人者。不知其凡幾。此皆意有他欲。而借言以沽名者。所謂失之過也。過與不及。雖同。然以朝廷政治言之。臣工之弊。與其過毋寧不及。宋仁宗贊曰。國未嘗無嬖倖。而不足以累治世之體。朝未嘗無小人。而不足以勝善類之氣。此之謂也。夫言官之設。本以繩愆糾繆。激濁揚清。朝廷之得失。民生之利病。無不可剴切敷陳。內而廷臣。外而督撫。果有貪劣奸邪實據。指名彈劾。亦足表見風裁。若徒事懷私窺伺。何以克稱言官之任。比來伊等習尚如此。不可不亟為整飭。向例御史由保舉考試補授。後因臣工條奏。請朕於翰林部屬引見時。記名特用。今看來。不若仍復舊制之為妥。著九卿於應行考選人員內。秉公保舉。請

旨考試引見候朕簡用其現任科道著大學士九卿通行甄別毋得稍存瞻徇以肅言路再朕向曾留心詩賦不過學問中之一事時於幾餘遣興偶命近臣屬和亦前代翰林典故中所有並非誇耀已長與文人角勝而治天下之大經大法端不在此詞臣以文字為職業自當雅贍優嫺方不愧清華之選其中才學充裕如張鵬翀沈德潛等間或一加超擢而躁進之徒競思進獻若借此可以為梯榮之捷徑不知沈德潛優陞閣學朕原因其為人誠實謹厚且憐其晚遇是以稠疊加恩以勵老成積學之士張鵬翀則素知其敏捷且資俸已深歷陞詹事初不因進詩優擢若謂朕進用人才沾沾於文藝之末雕章琢句專事浮華此風一熾必有藉手捉刀希圖僥倖者豈不玷玉堂而貽羞文苑耶其務殫實心崇正學明大體以無負稽古論思之厚望著一併傳諭知之又諭今日禮部將郎中

陳豫朋年老乞休員缺題補引見陳豫朋於今年閏三月經朕點用湖南學政謝恩時摺內稱年已七十有餘朕因其年老恐不能勝任另派員更易今只隔數月忽以年老乞休陳豫朋若自知年力衰邁則未授學政以前便應告休及點授學政之時亦當據實陳情何以寂無一言今於朕降旨仍留部曹後忽爾告退蓋伊自知嗣後無陞遷之望並非恬退本懷也夫致身事君終始不渝乃分所當然鞠躬盡瘁之義凡為臣下者何人不當以此自勉昔

皇祖時漢臣中間有蹈此習者曾蒙訓飭今陳豫朋於進退之際少不如願即欲解組以鳴高事君之道固如是乎陳豫朋著革職留京候旨向例四品以下官員吏部入於彙題內開缺嗣後告休人員內有與陳豫朋相類者著吏部具摺請旨如徇情入於彙題查出必加以處分餘仍著照例彙題朕君臨

天下向之所學且不必論即以歲月計之十年於此矣大小臣工居心行事已無不洞悉其情偽古帝王垂旒黈纁不以察察為明朕平日之包荒不可勝數但如陳豫朋之所為若不明白曉諭則竟無以明事君之義矣諸臣工其共凜之○又諭河南永城鹿邑夏邑三縣節年疊被水災今秋又復被水所有乾隆十年十一年民欠錢糧俱應緩至戊辰年開徵但朕思積歉之區縱使丁卯戊辰二年連獲豐收民間元氣亦難盡復乾隆戊辰年各邑既有本年應納之正賦又有乾隆十年水災案內應完帶徵錢糧若再將十年十一年分未完帶徵舊欠一併催徵民力恐不能支著將永城鹿邑夏邑三縣乾隆十年分未完帶徵銀二萬八千八百餘兩緩至戊辰年徵收其乾隆十一年未完帶徵銀四萬二千四百餘兩緩至己巳年開徵俾民力得以展舒該部即遵諭行○又諭山西大同朔平二

府上年偶被旱災所有新舊應徵銀米豆麥等項俱令緩至今年秋收後徵輸在案現今大朔二府秋成各有七八分居茲開徵之期自應將新舊各欠一併催完惟是歉收之後民力尚未寬舒且為數繁多輸將未免竭蹶著將上年成災之大同懷仁渾源應州山陰廣靈陽高靈邱天鎮朔州馬邑并未成災而收成亦歉之右玉左雲平魯等十四州縣所有上年蠲剩緩徵帶徵及九年舊欠銀米等項俱暫行停徵統於乾隆丁卯己巳庚午三年內分限帶徵完納以紓民力該部即遵諭行○又諭朕不御靜宜園之時彼處宮門著添設圓明園護軍堆撥一座○又諭現在天氣寒冷著免閱看軍器俟明年三月再行閱看○子故內大臣兼正紅旗蒙古都統查克丹祭葬如例諡敏恪○丁亥

上御太和殿視朝文武陞轉各官謝恩○戊子諭軍機大臣等巡撫常安所奏松江下

砂等場。雍正十年。被潮坍荒蕩地。積欠課銀。朕已加恩豁免。但實在坍荒淹廢之地。固應蠲除。而潮退淤漲。即宜隨時開墾。年來衝壓坍荒。請免者多。而題報開墾升科之處甚少。可傳諭該撫。留心查辦。將所有淤漲可耕之地。查明勸諭。及時開墾。無致閒曠。於竈戶場民。當有裨益。○戶部議覆安徽巡撫潘思渠等疏。稱壽州、宿州、鳳陽、臨淮、懷遠、虹縣、靈璧、鳳臺、阜陽、潁上、霍邱、亳州、蒙城、太和、泗州、盱眙、五河、天長等十八州縣。鳳陽、鳳中、泗州、長淮、宿州等五衛。被水成災地畝。所有應蠲錢糧。另行題豁外。其被災貧民貧生。分別極次給賑。衝塌房屋。並予修費。被淹城垣。動項興修。五河縣漫溢壩埂。一體估報搶築等語。均應如所請。又各州縣衛。本年被災較重。請將漕糧漕項。照地丁之例。按分蠲免。至蠲剩銀米。緩至來秋帶徵。內壽州、虹縣、阜陽、霍邱、太和、天長等六州縣。被災稍輕。本年漕糧漕項。

緩至來秋補徵。各邑未完節年漕項銀米。統請分年帶徵。候旨遵行。得旨。依議。宿壽等州縣衛應徵本年漕糧漕項。及蠲剩銀米。未完節年漕項銀米。俱著照該撫等所請速行。○又議覆浙江巡撫兼管鹽政常安奏。稱松江下砂等場。於雍正十年被潮坍廢。嗣因積水未退。候丈勘明確。至乾隆五年始具題豁減。部議以現題之年為始。其五年前舊欠。仍令徵收。但此項地畝。既豁減於五年之後。實難追輸於五年之前。現准江蘇巡撫陳大受。覆查明確。應據實奏請蠲免等語。查此項竈課。係未經題准以前拖欠之項。業據該撫題請分作七年帶徵。未便又議蠲除。所奏應無庸議。得旨。此案部議不准行。但思積欠課銀。雖在乾隆五年該撫題報之前。實在雍正十年被潮坍荒之後。若照舊徵輸。竈戶未免拮据。著加恩豁免。以紓竈力。該部即行文該撫知之。○調河南布政使嚴瑞龍為湖北布政使。

以河南按察使王興吾為布政使。○已丑諭國子監祭酒為成均司鐸之長。有造就人才之責。今崔紀丁憂員缺。著吏部將應行開列。及其次應陞人員。一併帶領引見。○又諭近觀前鋒統領護軍統領等帶領引見人員。弓馬軟弱。步射生疎。撒放亦不乾淨。箭發無準。甚致擦地。我滿洲原以騎射為要務。現在朕步射之弓。即不為甚硬。不過六七力。然尚能屢穿布把者。亦在撒放如何耳。至前鋒護軍等素稱勁旅。寧有此等步射耶。前鋒統領護軍統領等並無別項應辦之事。惟訓練兵丁。是其專責。自應深維根本。各盡厥職。勤加訓練。以期兵丁皆至精銳。想來引見人員。俱係選擇其優者。尚皆如此。其餘又何足觀乎。此皆由該管大臣章京等平日廢弛。不加訓練所致。朕從前亦曾降旨訓諭。此次復加寬宥。免其治罪。著降旨曉諭伊等嗣後務各認真操演。以期精強。若仍廢弛。朕決不寬宥。必將

該管大臣章京等一併治罪。再都統等往往藉稱辦理旗務於馬甲騎射。漫不為事。即射箭日期。亦不過塞責閱看。並不留心教訓。以致怠玩成風。伊等所辦之事。能有幾何。身任管兵之責。而不以教育為要務可乎。亦著嚴行申飭。○諭軍機大臣等。向來內務府所用麥石。俱臨期購買。朕思與其在京城購辦。不若運自產麥之地為便。可傳諭河南巡撫碩色。可否於應徵漕糧內。照黑豆之例。每年改徵小麥一萬石。運送來京。其輸將妥便與否。令其斟酌辦理。如可改徵。即令酌定價值。具摺奏聞。○吏部議原任湖廣總督鄂彌達疏。叅湖北驛鹽道曹繩柱。勒借虧空一案。奉旨將濫行保薦之上司。照例察議。應將原任湖廣總督鄂彌達。湖北布政使安圖。分別降調。前任湖北巡撫晏斯盛。湖北按察使石去浮。現俱終養在籍。應於補官日分別降級調用。得旨。安圖著降三級調用。鄂彌達著降二級

調用。石去浮。著於補官日降二級用。晏斯盛著於補官日降一級用。○以陝西督糧道舒輅為河南按察使。○庚寅。

上御勤政殿聽政。○詣

皇太后宮問安。○以故奉恩將軍受克弟受權襲職。○旌表守正捐軀之廣東化州民尤顯貴妻李氏。○辛卯。

上詣

奉先殿。

壽皇殿行禮。○是月直隸總督那蘇圖奏辦理回贖旗地案內查保定府屬有旗地各州縣現在共贖過一千三百九十六案給過按年遞減價銀四萬四千五百餘兩此外各府州屬回贖之案尚未報齊臣復嚴行催辦其已贖地一面照例收租一面行知八旗官兵回贖認買俟將來租銀與贖買地價交納又可接濟官贖之需得旨好甚愜朕意但恐過於欲速耳不無滋擾耶旗固當念民亦當念也

妥為之。○江蘇巡撫陳大受以調任福建謝恩請訓得旨汝何庸再訓但將此心要之以久而行之以誠何任不可勝耶至周學健在彼可謂實力料理然善者居多當守而弗失太過者亦有當畧為損益可也。○署江蘇巡撫安寧奏本年淮揚徐海被災各州縣衛業予撫恤口糧及葺屋銀兩在案其歲內明春接賑加展銀糧約計不下二百二十餘萬現已撥運熟地常平倉米鹽義倉穀並採買截留各項及撥運司府庫銀兩淮鹽課存銀共銀糧二百二十萬可以敷抵賑需再查災地積水之區現多方疏導均漸消退無誤春耕俟冬底春初查察已未盡涸再行奏聞得旨所奏俱悉為督撫者第一應戒諱災之念旁觀者清及至身任其事無不蹈此弊者汝其常常提撕警省可也。江蘇按察使翁藻奏請嚴定地方官失察邪教限期除在半年內拏獲者免議如逾期察出究明倡教年月將

從前失察各官叅處。并令該管道府督查化導。歲底將境內並無邪教萌發緣由。結報督撫。發覺一體查叅。得旨。有治人。無治法。光天化日之下。邪教豈常有之事。所見甚小。○又奏江蘇賊重獄繁。最稱難治。必得幹才久任。始能就理。請於州縣引見時。其有曾任江南及各省人員才堪繁劇。年方壯盛者。每年飭發十餘員來江。遇缺題補。得旨。此奏固是。但以朕體察。此非汝職任內之事。若出於己意尚可。若受人意指。則於汝大有關係。此等伎倆。朕前行不得。○江西巡撫調任山東巡撫塞楞額。以陞授湖廣總督謝恩。請訓。得旨。楚省吏治。非江西可比。被孫嘉淦鄂彌達諸人廢弛極矣。汝其善為整頓料理。空云感激朕恩。而無實力施為。其何益之有。至江西一應事宜。與開泰詳言之。○浙江巡撫常安奏。臣衰老難任封疆。查調任藩司王師。心地質直。錢糧事宜。亦皆明白通曉。懇恩仍留浙江。得

旨。此奏非誠不可也。朕豈被爾等所愚之主。若汝果不勝封疆。亦何難易之之有。○又奏。浙省兵丁內安分者少。强悍者多。即如近日梗賑抗官。各省每有其事。非衙役潛作主謀。即兵丁暗為主使。臣素知浙省衙役多不安靜。有犯必懲。未嘗稍寬。至於兵丁。臣非不屢飭營員加意。究以非臣所轄。未能實力奉行。且營員錮弊。平日漫無約束。事發復多方掩飾。請密飭新任浙閩總督喀爾吉善。留心整頓。俾營員不敢庇護兵丁。則兵丁自不致恃眾滋事。得旨。此奏雖是。但汝現居浙省。此等習氣。豈得諉之不敢越俎而任其肆橫耶。○福建巡撫周學健。陞任江南河道總督。具奏謝恩。得旨。覽奏俱悉。將閩省應辦之事。備悉告之。陳大受。進京途次。若遇喀爾吉善。亦應向彼言之。○巡視臺灣給事中六十七等奏。撫臣周學健。委員齎價銀八萬兩來臺。會同各廳縣採買穀二十萬石。查臺郡今秋少雨。

米價漸增。如將來採買米穀。無礙民食。自應飭廳縣妥辦。設發買之後。米價日長。或致病民。臣等當一面據實奏聞。一面咨明撫臣。暫停採買。得旨。汝等祇知在臺言臺。全不思全閩民食之攸繫也。且此事周學健早奏臺米發買之弊。皆出官吏之作奸。汝等此奏。想又入官吏之計矣。不能察吏去弊。而惟姑息了事。以博寬大之名。至內地民食倉儲最要之處。則視為膜外。延挨一年半載。以冀迴京。汝等鄙見以為最巧。朕不知者。朕知之豈不悉哉。○甘肅巡撫黃廷桂奏。今歲洮水漲發。較往年為大。新修隄壩堅固。所有原估幫岸。實可不必再築。惟每歲春初秋末。汎水未發時。應於隄壩內外幫築黃土。護以石塊。添下柳梢。復於隄壩上。逐漸加高培厚。現在工程。三年內該州照例保固。三年外據該州士民等呈稱。情願於城中烟戶丁夫內。按照三丁出夫一名。均勻公攤等語。應照所請派撥。每年

丁夫。分作春夏秋三季修築。所需柳梢木椿器具等項。於該州公費銀內購買。並令該州於明春在隄壩兩岸種柳。俾樹根盤繞土中。益資鞏固。得旨。依議行。該部知道。○肅州鎮總兵署固原提督許仕盛奏。報疆宇寧謐。秋成豐稔情形。得旨。欣悅覽之。提督非總兵可比。而固原為西北巖疆。一切整飭營伍和輯兵民之事。汝其慎之。○貴州總督兼管巡撫事張廣泗奏。報秋成分數。米糧價值。得旨。欣悅覽之。黔省當邪教清肅之際。又值時和年豐。朕誠歡慰。然安不忘危。我君臣其共勉之。

大清高宗法天隆運至誠先覺體元立極敷文
奮武孝慈神聖純皇帝實錄卷之二百七十七

實錄卷之二百七十七

二

大清高宗法天隆運至誠先覺體元立極敷文
奮武孝慈神聖純皇帝實錄卷之二百七十八

學士劉世明官經筵講官太子太傅大學士文淵閣總纂修官內大臣稽察欽奉 上諭事作廷管理

吏部建儲處事務正書撰滿洲都統世襲廢前將軍功加七級隨帶加一級尋常加二級軍功紀錄一次臣等謹

總纂官經筵講官太子太傅文華殿大學士文淵閣總纂修官稽察欽奉 上諭事作廷管理刑部戶部事中書錄

世襲將軍都尉軍功加十九級隨帶加二級入加二級臣等謹將內大臣戶部尚書建儲處滿洲都統軍功紀錄五次

尋常紀錄十四次臣等謹將太子少保工部尚書紀錄六次臣等謹將事奉

欽此

乾隆十一年丙寅十一月壬辰朔直隸總督

那蘇圖奏

直省宣化府屬本年被雹成災及

薊州寶坻等州縣田禾被淹現委員將被災

貧民分別極次照例賑恤得旨仍不時查察

令其妥辦使災黎均霑實惠可也○癸巳諭

朕因近來言官陳奏摺拾浮囂習成風氣不

可不嚴加整飭降旨令大學士九卿甄別科

道但思伊等之不識政體敢於妄行陳奏者

亦因朕向來優容含納屈意包荒所致今若

因李兆鉦陳奏紕繆即將同官通行甄別非

朕數年來廣開言路。兼收并包。本意著祇將李兆鈺交部議處。又宜兆罷久在言路。一無建白。殊忝言官之職。亦著交部察議。朕觀諸大臣意中。亦似有以甄別為難者。在公正任事之道。不當若是。但既以為難。則甄別之時。亦不過苟且塞責。未必盡能允當。所有通行甄別之處。著停止。今補放御史。照舊例保舉考試。而後引見。可望言路之肅清。而現任之科道等。經朕降旨訓飭。自當省察警動。痛加改悔。如其復蹈故轍。朕必隨時懲治。以正臺垣風氣。勿望更為姑容矣。○諭軍機大臣等。大乘邪教。蠱惑人心。皆由伊等著有邪書。轉相傳播。以致愚民被誘。今邪教之案。已經完結。川黔滇三省所有邪書。已經彙繳。其審訊逆犯供詞內邪說稿底。亦著檢出銷燬。至江南江西湖北湖南等省邪教書籍圖記。一應牽涉邪說者。俱著該督撫于結案之後查明銷燬。毋致留存。以滋後患。可於伊等奏事之

便傳諭知之。○甲午遣官祭

先醫之神。○乙未吏部議准。欽差戶部右侍郎雅爾圖等奏審明河南學政汪士鋐考試生童徇情違例一案。緣汪士鋐衡文既多失當。辦事又復任性。以致士心不服。如原任右通政陳履平庶吉士蔣辰祥素與汪士鋐交好。其子姪俱取入學。雖查無請託情弊。究屬瞻徇。又考試武童或不試馬箭。或減射步箭。雖查係天熱之故。亦與定例不符。應照溺職例革職。從之。○廣西茗盈土知州李天蔭緣事革職。以其弟天麟承襲。○丙申。

上詣

皇太后宮問安。諭今歲山東被災州縣。朕已加恩賑恤。又經分別加賑。以濟民食。但聞壽光樂安博興金鄉魚臺汶上濟寧東平八州縣被災較重。歲內支領賑糧。尚可餬口。來春去麥收尚遠。食用未免艱難。著於例賑之外。極貧再加賑兩個月。次貧再加賑一個月。於

來歲二三月間按月給發。務使貧民均霑實惠。該部遵諭速行。諭軍機大臣等。浙江巡撫常安。從前辦理拐案。失之過寬。於案情未協。曾經降旨申飭。近聞地方官承審此案。有意深求。一經拐犯扳扯。即不敢輕縱。甚至民間偶爾聚會。亦輒疑為不軌。以致人心惶惑。殊非鋤惡安良。寬嚴得中本意。向來外省辦理政務。往往苟且因循。不當寬而寬。一經朕查問。則又不當嚴而嚴。封疆大吏。惟當實心任事。務求事理合宜。可傳諭巡撫常安。令其屏除陋習。此案妥協辦理。無得過為張皇。致滋浮議。尋奏。拐犯採生折割。慘毒逾於梟獍。自應盡法處治。是以正犯富大金等。均先後題請正法。其餘各犯。或係誘拐為從。或係售賣胎藥。原與正犯不同。亦分別審擬。軍流外。至該犯等妄供扳扯之人。俱已訊明省釋。即如陸鳴皋一犯。曾經供認在毛可奇船上。似屬拐夥。及詳審始知非確。臣並不敢稍存成

見。似此自行承認之犯。臣尚飭委員反覆研鞫。以期絲毫無枉。况被誣之人。亦何敢文致其罪。以蹈失入之咎。且此案自上年五月間發覺後。諭旨嚴切。何啻再三。臣若急於見功。深文周内。罔顧人之利害。則案可早結。無庸遲至今日。誠仰體聖心。止恐臣失於寬縱。非欲臣流於苛刻也。得旨。言似得要。但恐未由中耳。吏部議奏。現奉諭旨。御史仍復考選舊制。臣部遵照舊例。行文各該衙門。堂官於應考選人員內。秉公保舉。咨送臣部。除滿洲蒙古御史。向無考試之例。仍舊辦理外。其應考試之翰林部屬等官。臣部請旨考試。引見記名後。照現在之例。缺出各按品級俸次。每缺帶領三員引見。再查從前記名人員。現在未補者。滿漢蒙古尚有四十餘員。除乾隆七年奉旨令大學士九卿督撫各舉所知。以備選用。經臣部奏請考試。奉旨記名者。係曾經保舉考試之員。應照舊補用。其餘引見記名

人員俱係未經保舉之員。應令各該堂官詳加分別。入于應考選人員內。一體秉公保舉。如經該堂官保舉者。即與此次保舉考試人員。按照品級俸次。缺出帶領引見。其未經保舉各員。從前記名之處查銷。從之。○戶部議覆直隸總督那蘇圖奏稱。保定府城密邇京畿。兵民屯聚。商賈往來。倍於他郡。惟縣倉積穀四萬石。與省會之規。尚有未備。請於保定建府倉五十間。貯穀四萬石。如遇水旱賑糶等事。就近撥運。常年按糶三之例。以平市價等語。應如該督所請。又稱。應貯米石。於天津北倉漕米內撥運。按時出借。俟秋收後。照例一米二穀交官。毋庸動項採買等語。查天津北倉實存漕米三十六萬三千二百餘石。除該督於酌籌通省積貯案內。派撥米一十九萬石。又薊州玉田約用賑米一萬五千石。其餘米十五萬八千餘石。亦奏准作為易州陵糶。以及天津滄州兩年兵米之用。今保定府

倉應貯米石。應令該督查明通省州縣內。有派撥溢額之處。如數酌撥。易穀備用。至新建倉廩。該督既稱。即交廣盈倉大使監管。增設斗級六名。亦應如所奏辦理。從之。○又議覆調任江蘇巡撫陳大受疏稱。山陽阜寧清河桃源安東高郵甘泉興化寶應銅山豐縣沛縣蕭縣碭山邳州宿遷睢寧海州沭陽贛榆等二十州縣。鎮江淮安大河徐州等四衛。被水成災地畝。所有應蠲錢糧。另行題豁外。其被災貧民。分別極次賑卹。衝塌房屋。量予修費。逃荒外出者。令各屬招回資送。不願回籍者。聽便等語。均應如所請。至所稱山陽阜寧清河桃源安東高郵銅山沛縣邳州宿遷睢寧海州沭陽贛榆淮安大河徐州等十七州縣衛。被災較重。請將本年應徵漕糧漕項。按分蠲免。甘泉興化寶應豐縣蕭縣碭山及鎮江衛被災稍輕。應徵漕糧漕項。暫行緩徵。並山陽等州縣衛。蠲剩銀米。緩至次年麥熟後

徵收其災田舊欠漕米及原奉緩漕緩至來冬再請分年帶徵又淮揚徐各屬未完節年地漕錢糧籽種亦緩至次年麥熟後啟徵之處候旨遵行得旨依議山陽等十七州縣衛甘泉等七縣衛應徵本年漕糧漕項並蠲剩銀米舊欠漕米及原奉緩漕俱著照該撫等所請速行○換給望都縣知縣印信教諭鈐記從直隸總督那蘇圖請也○旌表守正捐軀之湖北襄陽縣民萬成妻徐氏○丁酉吏部議准調任湖北巡撫開泰等疏稱黃梅縣屬三十六鎮典史分管三十鎮清江巡檢分管五鎮新開口巡檢止管一鎮繁簡懸殊且典史所管汛地有遠至一百餘里者巡緝難周請將典史分巡三十鎮內與新開鎮附近之蔡山墩塘太白三鎮改撥新開口鎮巡檢管轄一應疎防叅處均照所分汛地查叅從之○刑部議覆戶部右侍郎雅爾圖奏臣前奉命至豫訪問從前拏獲盜犯性魁知該犯

逃匿江省時授徒百有餘人足見地方官毫無約束請敕各省將教習拳棒之人嚴行申禁等語應如該侍郎所奏如有玩法不遵該地方官將教演與學習之人查拏治罪地方官失察該督撫訪實指叅照例議處至所稱各省營伍兵丁原以技勇為事與平民不同毋庸概禁等語亦應如所請行從之○戊戌上詣

皇太后宮問安○己亥諭今歲江南上下江被水等處現在加賑需米之處甚多恐倉儲不敷所用浙江連年豐稔今秋又獲有收著將永濟倉舊存穀石動撥十萬石協濟江南其如何運往之處該督撫會商妥協速行辦理○是日起

上以冬至祀

天於

園丘齋戒三日○庚子直隸總督那蘇圖奏前奉諭旨撥運通倉米石交宣化府屬收貯經

倉場侍郎覺羅吳拜等奏。令大宛二縣。在京雇覓車輛。運至昌平州。其宣屬車輛。即於該州接領。現據該道等議。請由京直運至宣。較原議中路接卸。更覺便捷。且令宣屬州縣。自雇車輛。專差丁役。前赴京倉。一手領回。以專責成。報聞。○辛丑。

上詣

南郊齋宮齋宿。○壬寅。冬至。祀

天於

園丘。

上親詣行禮。○遣官祭

永陵。

福陵。

昭陵。

昭西陵。

孝陵。

孝東陵。

景陵。

泰陵。○遣官祭

端慧皇太子園寢。○詣

皇太后宮問安。○軍機大臣等奏。前任福建巡撫。今陞江南河道總督周學健。繳還軍機處寄信匣一個。當即收存備用。昨有密寄事件。啟匣觀看。內有奏摺一封。謹進呈御覽外。查本年議准貴州總督張廣泗條奏。凡奉旨密交督撫事件。照吏部憑匣之制頒發。令於覆奏時繳還。今周學健既有封奏事件。自應齋至奏事處。一並進呈。乃置之繳還匣內。又不行文知會軍機處。應奏明知照周學健嗣後如有寄信事件。覆奏時照常齋進。其寄信匣。另繳軍機處。得旨。知道了。並令各督撫等知之。○安西提督李繩武奏。準噶爾夷使瑪木特。於十月二十三日到境。據稱帶有馬匹貂皮等物。欲於

大皇帝前進貢。但攜帶駝馱牲畜貨物甚多。查定例進貢夷人所帶牲畜貨物。准其赴肅交

易者。實由柔懷遠人。恩施格外。此次夷使瑪木特帶駝馱牲畜甚多。到哈密後。勢必復懇到肅州交易。其可否准照所請之處。請旨遵行。得旨。彼從遠路而來。可告以朕恩所攜物。姑准前赴肅州貿易。以後似此多帶。不准交易之處。俟夷使到京。當令大臣面諭該夷使等遵行也。○癸卯。

上以冬至節詣

壽康宮行慶賀

皇太后禮。王大臣於

慈寧門。衆官於午門行禮。○御太和殿受賀。○甲辰。

聖祖仁皇帝忌辰。遣官祭

景陵。○

上詣

奉先殿。

壽皇殿行禮。○署江蘇巡撫安寧奏常州府知府董怡曾與革職問徒之原任直隸布政使張迺狼狽濟惡。經鎮江府知府黃永年秉公

審明各案緣由。查董怡曾蓋蓋不飭臣在藩司任內。早有風聞。至與廢官張迺往來親密。營私枉斷。尤藉藉人口。既得確情。據實參奏。得旨。此案實難為汝辦。嘉許之外。無可批諭。董怡曾。朕亦有風聞。已降旨令汝等查參。想尚未接到耳。張迺董怡曾如此負恩無恥。豈可仍令其保有身家。祇以此案了罪而已耶。董怡曾。另有旨諭外。汝其將張迺家產嚴加查禁。摺奏請旨。○乙巳。

上詣

皇太后宮問安。○諭軍機大臣等。張迺係屢獲重罪之人。今仍不知悔改。又復交結劣守。仗勢殃民。橫行鄉黨。今雖被參交審。若只就本案定擬。不足以蔽其辜。伊家資饒裕。仍可恃其豪富。欺壓善良。藐視國法。可密諭安寧。於此案審理後。且勿令其完罪歸家。當另摺請旨。派一大差。令其効力。不使仍擁厚資。以為貪暴者之戒。倘有參本外另有告發事件。一

併嚴行查審。○又諭本月初八日。據河南巡撫碩色奏報。十月二十三日。中牟九堡收料東廠內。突然火起。延燒所貯林楷等料物。現咨會河臣。照例將該管官查叅追賠等語。完顏偉至今尚未奏到。甚屬遲延。著傳旨申飭之。○戶部議准。奉天府尹蘇昌疏稱。錦縣

廣寧二縣。被水被雹成災。本年應徵錢糧。請查明分數題蠲。貧民分別極次加賑。衝塌房屋。量予修費。其地畝衝壓者。豁除額賦。至承

德遼陽海城。蓋平復州寧海六州縣。被淹窪地。雖勘不成災。然收成歉薄。所有本年出借口糧籽種。統俟來秋免息徵還。得旨依議速行。○刑部議准。署理兩淮鹽政吉慶奏。稱場員專理鹽務。凡商竈事涉鹽法者。許場員自行審理。至命盜等事。例歸地方官查辦。場員不得干預。但商竈作奸犯科。勢所不免。而場員又未敢違例查拏。或明知故縱。釀成重案。或奸犯遠颺。案懸莫結。請嗣後凡遇場竈命

盜。賭博姦拐。匪竊鬪毆。私宰私鑄。及海洋商漁透漏米鹽。一應事件。除已經告發者。應准場員先行申禁約束。一有干犯。立即訪拏。仍移解地方官審理。併報明鹽法上司查覈。其地方官失察者。照文武官拏獲私鑄賭具互免失察例。免其處分。從之。○丙午。

上幸瀛臺。○諭曰。總督那蘇圖扈從。一路費用甚多。著賞銀二千兩。○大學士等議。侍衛納齊布等。查拏引王車凌拜多布等六旗被災人等。辦理賑案。內除扎薩克台吉達什丕勒車布登二旗素為充足。雖遇旱少損牲畜。尚可藉以生理。至扎薩克台吉齊巴克扎布旗分。數年屢被災疫。傷損牲畜。去歲至今秋。由伊等部落陸續撥給牛馬羊。足資養贍。其過冬口糧。均毋庸賞給外。其郡王車凌拜多布扎薩克台吉旺布多爾濟遜都布三旗內失業人等。大口四千三百四十三名。小口二千六百八十五名。分別賞給。需米二千二百七

十餘石。茶五千六百八十餘觔。俱移咨歸化城都統支領。又八口以上之戶。賞乳牛二羊。十口以下。四口以上。賞乳牛一羊。八三口以下。賞乳牛一羊。六。俾長為生業。每乳牛一定為銀四兩。羊一。銀五錢。至散賑時。應仍照向例。將該扎薩克王台吉等明年俸餉。預為支領充用。得旨。散賑銀兩。不必支用王台吉等俸餉。仍用官項。餘依議。○工部議覆雲南

總督兼管巡撫事張允隨疏稱。金沙江上下

游。請各建江神廟一所。令地方官歲時祭祀等語。查金沙江河道開通。久遠利濟。自應建立廟宇。以答神庥。但分建兩廟。揆之祀典。恐涉於黷。應令該督酌量扼要之區。建廟一所致祭。從之。○兩江總督尹繼善奏。查常州府知府董怡曾居官辦事。本非正己率屬之員。臣早留心稽查。適據署撫臣安寧言於藩司任內。有董怡曾聽斷不公。行查飭審之案。批委鎮江府知府黃永年。究出該員徇情肆虐。

冤害無辜。并得受革職直隸藩司張迺銀兩各款。業與臣會商題奏。請旨究審。得旨。未可謂之早留心也。但未如鄂彌達之於曹繩柱。故不加汝罪爾。察吏安民。第一要務。而况知府為一郡表率乎。以後時刻留心。即無心之過。亦不可屢蹈也。

大清高宗法天隆運至誠先覺體元立極敷文奮武孝慈神聖純皇帝實錄卷之二百七十八

大清高宗法天隆運至誠先覺體元立極敷文奮武孝慈神聖純皇帝實錄卷之二百七十九

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書領侍衛內大臣滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十一年丙寅十一月丁未諭軍機大臣

等

等邪教案內之曾瑞芳係知呂齋婆下落之

要犯乃四川省奏九月初八日於廣安州地

方拏獲而江西省又奏十月二十一日在贛

州府拏獲於十月二十四日解川是有兩曾

瑞芳矣其中顯有冒名狡飾情弊可傳諭慶

復等務於此二犯內查出實係曾瑞芳根究

呂齋婆下落不得任其狡飾尋奏查曾瑞芳

一犯前據順慶府拏獲曾經嚴審奏明今江

西贛州拏獲之曾瑞芳解川研訊緣該犯名

姓籍貫與川省所獲曾瑞芳相同又曾至重慶府形跡可疑致被拏獲實不知呂齋婆等隨將川省拏獲之曾瑞芳隔別復訊其同王志仁代魏王氏進京送唐登芳盤費等情俱屬確鑿至呂齋婆下落仍堅供實未認得如刑不承得旨知道了又批既云確鑿何不設法根究但云茹刑不承即可了事乎○又諭原任湖北驛鹽道曹繩柱勒借鹽商銀六千兩虧空倉穀價銀二三千兩題叅革職審擬並據該督撫等奏稱此項勒借虧空銀兩恐伊任所難以完結咨查原籍朕已諭令陳宏謀嚴行確查今陳宏謀已調任湖北巡撫所有查辦曹繩柱家產之處著巡撫開泰秉公實力嚴查以清帑項毋令其寄頓隱匿○又諭直隸地方逼近京師驛站最關緊要上次因驛站貽誤差使曾令那蘇圖查奏伊即苟完此事未實力飭辦彼時調站應差尚屬有因今達青阿回京又奏直隸驛站應付遲誤

更有何說是那蘇圖並未整頓可知。畿輔近地雖差使絡繹。亦由該管官狡猾成習。積弊使然。若不叅劾一二。則流弊終無所底止。可傳諭那蘇圖。令其實力稽查。有怠玩從事者。立即題叅。以示懲儆。如再仍前玩愒。經朕訪聞。惟那蘇圖是問。尋奏侍衛達青阿過保。向臣面言新樂定州二站應付遲延。臣即提該州縣管馬辦差人等。訊係按照到驛時刻。填註印花。並無遲悞。但直省各站。向多疲玩。此

風斷不可長。臣惟有遵旨加倍嚴飭。隨事稽查。如或仍前玩愒。即據實叅處。得旨覽。諸事應留心。非謂徒於朕前也。然諸臣無不中此病者。當時以為戒。○禮部議覆順天學政呂熾奏稱。順天府學額請將大宛兩縣童生一體撥取等語。查順天府學額進文章二十五名。向例止於大宛兩縣考錄。嗣經大學士等議准。改照外府撥學之例。在闔屬各州縣內通撥。大宛仍在撥取之中。並非僅就外州縣

均撥。而大宛不與也。應令該學政遵照原議辦理。至大宛童生。向係就試通州。後復改併貢院。府學額數。既在闔屬酌撥。分棚考取。試期先後不同。難以通盤計算。請將大宛兩縣仍歸通州併考。即以東路同知為提調。其各州縣撥入府學諸生。教官遠在都城。未便約束。除大宛兩縣撥取府學生員。專責順天府學教官督率外。其外州縣撥入者。令府學教官查明年貌。經書籍貫造冊。申送府丞分發

各屬教官就近訓課。均應如所請。從之。○御史李文駒奏。今歲偶被偏災。諸省其已經成災者。業蒙賑恤有加。而未經成災之田地。與成災者鄰近。諒亦稍受水患。歉收米貴。理勢必然。況目下天寒地凍。輓運維艱。際此隆冬。將何以謀朝夕。查各省常平倉。例於二三月間開糶。而所在富民販商。每多乘間罔利。囤積居奇。斷不肯於冬月糶賣。是所謂青黃不接之時。固在春月。而尤在冬底。請敕各該督

撫轉飭被災州縣酌量通融不必拘定春月。現今冬月被災地方米價昂貴即詳報開倉平糶或昂貴過甚即大加減價以平市值。倘春月融和商賈輻輳市價漸平亦不必拘定出糶至實在貧民亦不必拘被災與否即酌借倉穀令其收成償還得旨此奏全不曉事。青黃不接在春末夏初此歷來定論而李文駒欲移之於百穀告成之冬使如其言何以為繼且奏內目下天寒地凍輓運維艱云云有如刻不可待之勢將指淮南災餘而言耶則此奏固緩矣將指直隸而言耶則直隸乃數十年未有之豐稔也此皆迂繆不通撫拾了事之見著嚴飭行。戊申諭今年廣寧等處因被水災所有旗人應交米豆曾經降旨免交此內廣寧鳳凰城岫巖復州四處所收更較他處歉薄而兵丁差務甚煩生計未免拮据著加恩於丁卯年春李應領錢糧內豫借三月錢糧分春秋二季照數坐扣該將軍

即遵旨辦理。又諭曰將軍達勒當阿奏稱奉天所屬錦州府義州境內七家屯等十六村所種米穀秋收在邇忽被雹災等語所有該處旗人本年應交米豆著查照從前被水免交之例寬免追徵其有口糧不繼者著該將軍查明亦照成災之例動用各該處倉貯之米賑濟令其不致拮据。諭軍機大臣等前據蔣溥奏稱湖南長沙府湘陰縣文洲圍地勢獨高倚山面江四圍俱築有隄垸該士民俱願自出已貲幫修其開墾成熟可得田萬餘畝等語朕以有益民生事件降旨允行今楊錫紱到任已久其如何接辦並兩年以來果否成熟之處何以並未陳奏爾等傳諭詢問之令其具摺奏聞。己酉諭內閣學士張若靄在內廷行走十餘年小心勤慎能恪遵伊父大學士張廷玉家訓深望其將來尚可有成今秋扈從於途次患病隨遣御醫調治且令其先回冀即痊可以慰伊老父之心

不意遽聞溘逝深為惻惻伊從前曾襲伯爵因其與定制未符是以令在本任供職今著加恩照伯爵品級賞銀一千兩料理喪儀大學士張廷玉年逾古稀遭此傷痛殊難為懷可傳諭令節哀自愛勉副朕軫念之意又諭今歲山東被災州縣朕經疊次加恩賑卹復念沂州府屬之郯城縣本年被水成災亦至八九分且該縣地瘠民貧來春未免拮据著照壽光等八州縣之例極貧再加賑兩個月次貧再加賑一個月俾得均霑實惠該部遵諭速行○又諭近年索倫等所進貂皮顏色頗不如先從前以俄羅斯之鄂倫春人等有越界捕貂藉詞佳者難得近據總管納木球奏稱近年並無越界偷捕之事顯係捕貂人等苟且充數將奸者隱匿該總管漫無稽察該將軍亦祇就所進內揀選呈進並不留心稽察所致黑龍江為產貂之地豈有多人捕貂而不得上等好貂皮之理著寄諭將軍

傅森嗣後務須留心稽察勿令侵漁擇上好者呈進戶部議覆本部侍郎雅爾圖奏稱臣前奉命赴豫該省民壯各執械迎送詢其技勇一無所長實於防護無益似應急裁但外省州縣以多役為便行令查議必力為支飾請徑行飭部議裁等語查民壯一項自乾隆五年裁減後統計各省尚存四萬五千餘名今該侍郎既目擊豫省情形則各省大約相同應請通行直省督撫據實查核將各州縣所設民壯虛充名數者即行裁汰毋任州縣藉詞支飾濫請存留果實在必需即將該地方難以裁減情形具題再議從之○又議准兩廣總督策楞署廣西巡撫鄂昌奏稱粵西銅廠不敷鼓鑄請於滇銅廠內每年撥十五萬觔至運費每百觔多一兩有餘成本無虧鼓鑄有益得旨依議但滇粵道路遼遠往返咨查稽延時日未免有妨鼓鑄著令該督策楞等一面先行辦理一面將運脚確數

報部核銷。○庚戌。

上詣

皇太后宮問安。○刑部議覆盛京刑部侍郎託時奏旗人敏住、勇住及民人周八、周四、王六等偷創傳天和家墳墓。應擬絞監候。得旨。向來旗人犯案。從未有發掘墳墓之事。今敏住、勇住、夥同創墳。為首為從。多至數次。情殊可惡。夫以旗人竟為此等殘忍至極偷盜之事。朕覽此本實多抱愧。凡屬旗人聞之。諒亦無不慚忿。掘墓之犯。將來秋審時。自必當在勾決之內。前康熙年間。互毆致死者。

皇祖從重加以立決。嗣後旗人鬪毆致死之案。漸少。此正適輕適重。辟以止辟之義。敏住、勇住著改為絞決。並將此旨通行八旗。及各省駐防不肖旗人等。俾共知所儆戒。其周八、王六、周四俱依擬。應絞著監候。秋後處決。餘依議。○辛亥。

上御乾清門聽政。○兵部議奏。川陝總督公慶

復奏軍營功過一案。內稱原署四川提督李質粹身為大僚。親在行間。意欲緩攻。既到木魯軍營。又捏報焚礮投誠。接任總統之後。督率勦撫三甲納、兆烏石、三谷細、納洪多、曲工等賊寨。親身督戰。然從前因循貽誤已多。仍當議處。總兵宋宗璋初到軍營。但事招撫。自調赴中路。每戰必克。遂令班滾勢窮。副將馬良柱連克賊寨。奮勇直前。軍聲大振。焚燒多寨。惟不能防範江卡兵逃。致各土兵觀望。以

上二員功多過小。仍請議叙等語。應將李質粹照例革職。宋宗璋、馬良柱均照三等軍功議叙。所有滿漢文武各員。並官兵土目土兵。均照所請。分別議叙賞卹。得旨。李質粹著革職。發往軍前。自備資斧。効力贖罪。宋宗璋著加一級。餘依議。○緩徵廣東連州、清遠、四會等州縣水災。廣寧縣蟲災。海豐、新興、澄海、崖州等州縣。及南澳廳所屬隆澳旱災。額賦賑卹飢民。○撫卹長蘆越支場水災。蠲民。○士

子以太僕寺卿書山為內閣學士兼禮部侍郎。○賜協辦大學士吏部尚書高斌在紫禁城騎馬。○癸丑

上詣

皇太后宮問安。○諭三年京察之典。激濁揚清。所以叙官方而明黜陟。自當矢慎矢公。甄別允當。上次舉行之際。恐各部院堂官有瞻徇情面。濫列一等者。曾降旨令大學士於驗看過堂時。慎重分別。有不稱一等者。俱行裁去。

嗣經大學士等分別去留。此亦權宜辦理之道。究之察核司員。惟堂官最為親切。要在平日留心體察。臨時舉劾公平。方為允協。如上次定以一等者。三年中行走平常。即當改為二三等。不得稍存姑息之心。上次原列二三等者。三年以來。知所奮勉。即當列為一等。亦不得仍拘已成之見。惟一秉至公。分別等第。庶察典肅而人人知所勸懲。明歲又屆京察之期。特先行傳諭各部院堂官知之。○又諭

山西大同朔平二府上年被災州縣前經降旨令該撫加意撫綏。隨經調任巡撫阿里衮奏請動撥司庫銀二萬六千七百餘兩借給貧民撫卹老弱。此內借給之項例應於秋收後照數催還。朕思大朔二府今年雖屬有秋。但災歉之後民力未紓。又現有應還借過米穀十萬餘石。若再追前項窮黎未免拮据。著將借給銀兩通行豁免。該部即遵諭行。

乙卯

上詣

壽康宮侍

皇太后宴。○丙辰

皇太后聖壽節遣官祭

太廟後殿。○

上詣

壽康宮行慶賀

皇太后禮王大臣於

慈寧門衆官於午門行禮○奉

皇太后幸重華宮侍宴○諭軍機大臣等萬年茂存心狡詐性喜多事今罷斥回籍或倚恃曾為職官在地方仍復滋事未能安靜可傳諭塞楞額令其不時查察留心管束毋使滋生事端○丁巳

上詣

皇太后宮問安○戊午諭理藩院具奏班禪額爾德尼之商卓特巴等向未有進獻丹舒克之例請將商卓特巴羅布藏策旺所遞丹舒克不令進獻該院雖係援例陳奏但商卓特巴羅布藏策旺及喇嘛人衆竭誠遠備而來應格外加恩此次姑准舉行其所進丹舒克不應附入班禪額爾德尼丹舒克中同進現於雍和宮熬茶即令獻於雍和宮佛前仍准照例折價賞給可諭彼使臣商卓特巴進遞丹舒克於例不符嗣後停止○諭軍機大臣等浙江定海總兵陳鳴夏自到任以來於操

練兵丁辦理營務是否實力整頓抑或不過塞責了事徒飾外觀其人若何之處爾等傳諭常安令其據實奏聞○己未

上詣

皇太后宮問安○諭軍機大臣等朕聞襄陽鎮總兵吳士英自去年到任以來一切行為繁碎褊急訓練兵馬茫無頭緒所屬將備各為一心統馭乏術每有苛刻怨聲載道是否如此爾等可傳諭塞楞額令其詳察具奏以聞尋奏查襄陽鎮總兵吳士英性情急躁為人瑣碎然操演頗勤在任亦無甚劣蹟得旨覽奏俱悉○庚申諭湖廣通省軍政廢弛已極皆因鄂彌達等積習因循不能實力整飭訓練甚而驗看兵丁不過挑選數名以應故事太平無事之時武備最易廢弛而最不可廢弛今總督塞楞額莅任伊始一切營務須極力整頓務使將弁士卒皆知操練技勇為營中實務不徒粉飾虛文庶得漸成勁旅至於

薦舉挑拔器械軍裝事事俱宜加意振作痛洗從前積玩之習以無負設兵衛民本意湖廣宜昌鎮總兵陳綸休致以湖廣沅州協副將馬大用為宜昌鎮總兵官 辛酉吏部議准調任江蘇巡撫陳大受等疏稱吳縣地廣事繁縣屬五百十二圖木瀆鎮巡檢管轄三百十八圖所轄過半地方遼闊且濱臨太湖民刁俗悍非巡檢一員所能彈壓請將吳縣縣丞移駐木瀆其木瀆鎮巡檢改駐光福鎮與縣丞分地巡查鑄給吳縣縣丞分駐木瀆鎮關防光福鎮巡檢司印再洞庭東西兩山前因太湖地寬知縣不能遙制是以設立太湖同知駐劄東山查該處地闊糧多湖面風濤險阻輸納甚艱請就近歸太湖廳催徵所徵銀米即支放附近太湖左右兩營弁兵俸餉不敷銀兩在司庫撥補餘米運回吳縣貯倉統作南米其起運漕白米於吳縣徵收米內照數兌運至太湖左右兩營弁兵駐防

震澤宜興者應支糧餉仍照舊於司庫及附近縣分撥給免致過湖支領從之 是月兩江總督尹繼善等奏遵旨加展賑期請將被災之邳州宿遷桃源沭陽沛縣睢寧清河安東阜寧海州十州縣其十分九分者極貧加展三月次貧加展二月八分七分者無分極次加展二月六分者極貧亦加展一月至貧生飢軍各隨坐落地方分別照辦得旨著照所請行該部知道 又奏查蘇松水師總兵胡貴曉暢水務巡查甚勤因初抵任時即運米赴閩水兵操演原未熟悉自蒙恩留任以來益加奮勉臣上年查看海口親閱水操與之講論外洋形勢巡哨事宜立定章程業經陳奏在案本年春秋出洋巡哨俱能不避艱險於羊山馬蹟山等處務必親到其摺內所奏情由並非虛飾臣留心察訪該鎮操守清潔辦事明白實屬有裨營伍之員得旨覽奏俱悉 浙江巡撫常安奏浙省乾隆丁卯年

地丁錢糧業經奉旨蠲免舊欠錢糧一併緩徵惟漕項錢糧無分新舊照例徵收但浙省舊欠漕項多屬零星鄉民艱於交納查江省積年漕欠經江蘇撫臣陳大受奏明同舊欠地丁一併緩俟開徵之年徵輸江浙事同一例請即遵照辦理至丁卯年應徵新漕非零星可比已豫飭州縣核明確數纂單頒給得旨此與陳大受所奏不同蓋江省係本年之漕項已經於上年開徵則本年並無漕項可徵應與地丁一例俟開徵完納汝浙省現有應徵之新漕則漕項之積欠隨漕而徵想亦不致零星瑣碎且小民無地丁之催擾正可完漕項之積零而開徵地丁所交反少豈非一舉而兩得如汝所奏皆未細心體察不過聽幕賓屬員之言耳○又奏據杭州嘉興湖州三府稟稱本年七八月間各村桑樹生有小蠶食葉成繭用以織綢較他綢更為堅緻詢之土人僉云此名天蠶又名桑蠶往年不

過數枚惟今年所產最繁各鄉村遍野皆有民間獲此餘利靡不歡欣鼓舞臣隨取繭絲查驗無異得旨覽奏俱悉此范成大詩所謂野繭可縲者也汝特未之知耳○福建巡撫陳大受奏福州將軍新柱進京陛見經營閩海關務奉旨交周學健茲臣抵任准周學健將閩海關印務移交業經題報查閩海各口事務紛繁南臺廈門泉州涵江銅山寧德等六處新柱原派有平櫃查河家人移交周學健時已經掣回周學健旋因陞授江南河道總督未派家人前往隨經咨商新柱派撥差弁前赴各稅口承辦臣途次遇見新柱告以臣從行家人皆難任以錢糧事務當詢新柱所派差弁據云皆係屢委試辦之人尚俱妥協臣即飭令各差弁承辦仍時刻留心查察得旨此事雖小然新柱之徹家人即為規避而汝二人之不派往亦非坦蕩公忠不避嫌疑者之所為也汝三人朕皆不取○福建漳

州鎮總兵哈攀龍奏漳郡風氣囂凌習俗强悍好勝。然有血性。一知非理。便自折服。要在得情。實心化導。得旨覽奏俱悉。徐徐化導。常留心。亦非速可見效之事也。又批此數句。甚中漳州之弊。不謂汝武人而能見到此好。勉之。○湖廣總督塞楞額以初莅楚省。具摺請訓。得旨前摺已批示。茲再諭者。實心妥辦。毋欲速以見長。母日久而生怠。至兩省巡撫。其人皆外似正人。而內實不無遷就者。一時無人。去之不能盡去。卿亦祇得與之和衷策勵。用其材以濟吾事而已矣。○調任湖北巡撫開泰奏。近見本省及各省辦理大吏教一。案其現在犯事者。多有地方各官。從前曾經查獲。勒令開齋之人。其平時未能加意稽查。已可概見。請飭諭嗣後凡遇查禁之事。務期設法防維。求其實際。得旨此惟在汝等實力行之耳。雖百定例。其如陽奉陰違何。汝既有見於此。即妥辦於汝省。朕將徐觀其效。○又

以調任江西巡撫謝恩請訓。得旨因江西無滿洲大員。故用汝。非為汝實經理有餘裕也。且湖北尚有總督。近可咨詢。至江西則一省之事。惟汝主裁。汝其勉力負荷。毋辜任用之意可。○湖廣提督王無黨奏巡察宜昌襄陽營汛。考驗弁兵技藝。較前大有進益。得旨雖經巡閱。仍應時常留心整飭。汝楚省武備甚屬不及他省。而汝猶為此奏。足見不實。又奏襄陽鎮總兵吳士英。不諳營伍。且表率無方。統馭乏術。徒滋苛刻之名。難收整頓之效。宜昌鎮總兵陳綸。年老重聽。馭下雖失之寬。但人尚明晰。精力亦未衰憊。得旨吳士英不過失之嚴。而汝以為不宜。陳綸乃實廢弛。而汝以為尚可。足見汝取舍好惡不公。亦楚省武備廢弛之明驗也。○大學士管川陝總督公慶復奏。川西地少山多。番蠻雜處。就中頑梗者。雜谷金川為最。雜谷土司蒼旺。貪狡殊常。然外極恭順。調遣從無遲誤。大金川土司

色勒奔細性更兇悍前年與巴底相爭又屢與革布什咱土司爭地近更欺壓小金川去年竟有將小金川土司拏去之信經臣差弁嚴查直至臣出口外瞻對已破方遣土目具稟軍前當即嚴加申飭細看情形實為強橫因地勢極險運糧無路且伊自在土司內相擾並非干犯內地要在該管文武務得大體令其彼此鈐制以保無事倘不遵割斷亦惟有以番禦番之法用衆力以收功得旨以卿所見紀山能辦此乎又批瞻對甫完功佳兵不祥卿所見極是然既有此事不可不留心也又奏練兵之法莫若行圍臣查閱各鎮兵丁馬上大半生疎請嗣後陝甘提鎮各標應於每年十一月十二月正月各給十五日限期在所管山林高曠之處行圍庶兵馬技藝日漸整飭得旨卿酌量行之操練之道實莫過於此較之演陣排場奚啻倍蓰哉兩廣總督策楞奏查閱廣西營汛及辦理情形

得旨知道了邊省武備應時刻留心整飭者不可忽視也又奏前據潯州協副將南天章密稟左江鎮總兵楊剛並楊剛揭南天章各款業經委員嚴查辦理奏明在案茲據各委員等查稟楊剛經手之項並無入己贓私其束兵過嚴亦因技藝不熟革除笞辱並非不惜士卒艱苦南天章所稟雖屬有因實不足為楊剛罪案至南天章護理鎮篆每日親自操兵間遇天雨恐淋濕衣甲並非沽名釣譽其所揭買辦短發價值等款悉屬子虛臣查楊剛南天章俱有辦事才具而潯協又為左江鎮所轄兩人亦俱有軍功未免各炫所長積有夙嫌又因粵西鹽餘每年例給左江鎮加增養廉銀三百兩楊剛進京陛見全行支用南天章護理鎮篆無項可支未免益為怨憾楊剛又明知被稟亦羅織款蹟以圖中傷總之昧於大體不自知其挾私廢公此案既審無確據亦無贓私隨會同提臣豆斌將

楊剛南天章分別嚴行申飭完結得旨如此辦理雖為調停之苦心然未免過寬矣且為此事曾有旨何未奏及耶○貴州總督兼管巡撫事張廣泗奏陞任布政使愛必達居心純正識見明通凡苗情民俗吏治軍行諸務俱見精明透徹今蒙陞授山西巡撫不日即可啟行至新任布政使孫紹武幹練明達勇往有為久任黔省風土苗情尤為熟悉以甫經實授之道員一歲三遷將來自必更加奮勉得旨覽又批此人亦有出息者方命愛必達往黔時朕尚未識其人後陞見始知之而且久於黔省似較愛必達為尤熟悉地方情形故今別用愛必達亦得放心造就人材以備任使朕用人苦衷外人豈能知哉

大清高宗法天隆運至誠先覺體元立極敷文奮武孝慈神聖純皇帝實錄卷之二百七十九

大清高宗法天隆運至誠先覺體元立極敷文奮武孝慈神聖純皇帝實錄卷之二百八十

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十一年丙寅十二月壬戌朔河東河道

實錄卷二百八十

二

總督完顏偉奏署開封府上南河同知喬大賚疎忽失火延燒料物請照例議處諭曰喬大賚著議處具奏現據完顏偉奏報中牟九堡地方又復被火燒燬料物二十餘日之內接連失火兩次固該廳員不加意照看亦由完顏偉漫不經心所致著一併交部嚴察議奏餘著議奏該部知道又諭軍機大臣等前據完顏偉奏報開封府上南河同知喬大賚所管中牟九堡工料失火被燒今奏報該殿

又復燒燬料物等語朕思河工物料不但豫備修築關係緊要工程且秣稭料物等項採辦過多亦恐有妨民用今中牟九堡地方兩次被火固由員役疎忽其中或因該廳員平日辦理不善致為仇人陷害或因地方員役利其買補藉此得以派累百姓均未可定不然何以二十餘日之內接連失火兩次此皆關係吏習民風所當留心覺察乃完顏偉僅以叅處著落賠補完結於此等處竟置不論所督理者謂何著傳旨申飭之○癸亥

實錄卷二百八十

二

上詣

皇太后宮問安幸瀛臺幸果親王弘瞻第

諭準噶爾現在遣使進貢班第有應辦事件著來京供職其山西巡撫印務交與布政使陶正中暫行護理又諭山東濟南府屬之陵縣所有帶徵乾隆八年正耗漕米五千七百九十餘石應於本年完交但思該縣當積歉之後元氣未復本年既有應納錢糧漕

米等項。若再催納帶徵之漕米民力未免拮据。著將陵縣應行帶徵八年正耗漕米加恩豁免。此內有已徵在官者准於次年抵納。新漕俾小民均得一體。邀恩該部即遵諭行。

甲子諭據將軍達勒當阿奏進獻園場所得牲畜。每園每次俱屬稀少。雖近年來大率皆然。但園場牲畜屆時自長白山來原屬蕃盛。今漸稀少。必係來路有所阻碍。自應查辦。乃觀伊等每年進獻及高販交納者並非不能

實錄卷二百八

如額。可見並非來路稀少所致。該將軍所奏未免相沿舊習。恐非確實。若園場牲畜果爾稀少。亦有關繫。著寄諭達勒當阿查明具奏。○賑湖北潛江沔陽天門荊門江陵五州縣沔陽荊左二衛被水災民。○乙丑諭達賴喇嘛看茶之綏綢喇嘛扎克巴達顏鎮壓頗羅鼎一事。傳清業交頗羅鼎即令完結。所辦甚是。朕聞達賴喇嘛郡王頗羅鼎伊二人素不相合。但伊二人皆係彼處大人。原不可軒輊

異視。著扎寄傳清令伊嗣後諸事即照此辦理。但酌量關係事體與否。務期地方寧謐。使頗羅鼎等不致滋事。持重妥協。辦理尚其留意。

手勅諭藏王頗羅鼎達賴喇嘛看茶之綏綢喇嘛扎克巴達顏將爾鎮壓經書寫人桑寨拏獲爾從傳清之言。將此事如同無事從輕完結。經傳清奏聞。扎克巴達顏係達賴喇嘛服役之人。惟恐關係達賴喇嘛如此辦理甚合機宜。達賴喇嘛係執掌闡揚西方佛

實錄卷二百八

教之人。爾係約束管理藏內人衆之人。爾二人同心協力以安地方。使土伯特向化一體。事務皆賴爾等辦理。朕視爾二人俱屬一體。從無畸重畸輕之見。若爾二人稍有不合以致地方不寧。甚負朕信任期望之恩。再朕知鎮壓左道斷不能有損於人。即以近事而論。扎克巴達顏四五年前將爾鎮壓。此時朕先將爾子封為長子。又加恩封長子為鎮國公。並施爾恩典甚重。豈非不能鎮壓之明效大

驗乎。觀此爾可以無疑矣。爾平日感激朕恩，勉力報効，克副委任。朕所深信，是以並未明降諭旨，特手書此勅，密諭開示，爾其知之。○大學士等議覆綏遠城將軍補熙奏稱：綏遠城駐防之家選列等復仇兵丁生齒漸多，糧餉不敷養贍，日久生計愈艱，宜及時酌辦等語。查此項兵丁原係八旗家奴，恩賞給伊主身價贖出，作為另戶，移駐綏遠城。現在內有領催前鋒馬甲匠役等共二十四百名，年來戶口日繁，其十歲以上漸次成丁者已有六千四百餘名，口自應早籌生計。從前乾隆六年該將軍條奏殺虎口內外一帶地方添設靖遠營一案，兵部議准由大同鎮殺虎協三處所轄抽出馬步兵共五百名撥往，并設都司千總各一員把總四員。於乾隆十年移駐伏念綏遠城與靖遠營甚近，此五百名兵缺即於綏遠城駐防派往馬兵一百七十名，以領催前鋒頂補步兵三百三十名，以兵丁頂

補千總於驍騎校內把總於領催前鋒內揀補。其現在靖遠營兵丁抽撥未久，令回原處。此外尚餘兵一千九百名，查直隸山西二省現在兵額甚多，應即分派該二省頂補綠旗兵缺。請勅該督撫悉心會議酌量通省標營兵額多寡，分出一千九百缺，令該兵等頂補一切操防管轄旗幟盔甲等項，均照新募綠旗兵之例辦理。惟查守兵月支餉銀一兩米三斗，恐該兵等初次遷移不敷用度，應令頂補馬兵步兵之缺。將來伊等子弟遇有馬步兵缺俱准挑補。此一千九百名兵內所有食半分錢糧之馬兵一百三十一名原係老幼殘廢，今議派往直隸山西二省，應令該將軍查明除年力尚堪驅策者仍令頂補馬步兵外其餘或子弟已有錢糧可資養贍無庸頂補，抑或尚堪頂補守兵之處分別咨該二省辦理。至搬移頂補之處應查照乾隆十年八旗漢軍壯丁間補馬蘭泰寧二鎮兵缺之案

令該督撫妥議又查前項人等內現有驍騎校二十七員品級與千總相等除現議將一員改補靖遠營千總外尚餘二十六員亦令該督撫於兩省內分出千總二十六缺將伊等照兵丁例撥往間補再千總六年俸滿例得保送陞用但乾隆二年奉旨將家選兵照八旗另記檔案之人止准用驍騎校等微員是此項改補之員既無陞轉之階亦未便令其久佔額缺將來俸滿作何甄別辦理其戶口應如何稽查之處均令該督撫定議具奏得旨所議千總不准陞用一條此內如有材技可觀實心効力者令該管大臣豫行奏明准其陞用餘依議吏部議覆直隸總督那蘇圖疏稱永平府屬村莊分隸不均請將遷安縣沙河堡八十七村莊盧龍縣附近沙河堡等六村莊歸七家嶺驛丞兼巡檢管轄撫寧縣深河堡四十村莊臨榆縣小車家七十七村莊歸榆關驛丞兼巡檢管轄沿途解犯

亦責令該驛丞收遞並請添建舖房各八間均應如所請從之戶部議准黑龍江將軍傅森疏稱八旗官兵人等墾種地畝被水歉收請將十年分借給備存倉糧一萬一千二十八石零與本年借給糧二萬七千三百二十二石零均展至丁卯戊辰兩年補還入倉從之丙寅

上詣

雍和宮行禮○諭軍機大臣等汝等扎寄傅清

朕手勅頒給頗羅鼐初降手勅時本欲加賞物件因驛站遙遠是以祇賞大荷包一對小荷包一對傳清接到時可將此情節曉諭頗羅鼐○軍機大臣等奏近年辦理準噶爾脫回之喀爾喀人等經將軍等詢問情節即由軍營解回各游牧安置其內扎薩克蒙古人等俱解送京師交臣等詢問仍送回各游牧查內扎薩克各旗俱在口外離軍營甚近今解送來京復行解回各游牧徒多往返應即

照喀爾喀之例辦理從之。戶部議准黑龍江將軍傅森疏稱黑龍江被水官莊三座酌移額爾本河開墾所有蓋造兵房并派兵協壑及分別年限交納錢糧各事宜均照呼蘭添設官莊例辦理從之。豁江南崇明縣入官墾地價銀一百三十七兩有奇。準噶爾部人已爾布達什來降賞給安插如例。丁卯。

孝惠章皇后忌辰遣官祭

孝東陵。諭今歲江南邳州等十屬被災黎民朕已令該督撫查明應賑月分分晰加展賑卹今思山陽高郵寶應甘泉銅山蕭縣贛榆七州縣被災雖為次重而與災重之邳州等屬邑界毗聯其困苦情形應亦不甚懸殊著將此七州縣被災十分九分者無分極次貧民概行加賑兩個月被災八分七分者亦無分極次貧民同被災六分之極貧概行加賑一個月俾災黎得資接濟該部即遵諭速行

○又諭曰御史馮鈐因前降旨湖廣軍政廢弛令總督加意振作奏請飭諭各省管兵大員勤加操演等語朕因設兵所以衛民不可任其懈弛從前各省營伍有廢弛者俱經隨時訓飭因人董誠歷來所頒諭旨已不啻三令五申此奏若交部議亦不過覆准通行曉諭究與實效無裨所奏知道了。諭軍機大臣等朕覽部覆巡撫常安審擬浙江採生折割一案將前擬流罪折贖之富沈氏改擬斬決鮑陸氏改擬絞候擬絞之謝世榮鮑二改擬斬決此案經該部議駁朕傳諭令其悉心審擬今始準情改正似此殘忍兇惡之犯其情罪確實必抵於法始快人心常安身任巡撫於此等案件一味寬縱尚必俟指駁飭行改擬殊非除惡安良之道著傳諭申飭之。戶部議准黑龍江將軍傅森疏稱黑龍江官莊二十四座被水請將本年收穫糧二千四百五十六石零給作籽種牛料尚有不敷將

本處備存倉糧借給免其交納額糧從之
戊辰

上詣

皇太后宮問安諭江南上江之鳳潁泗所屬
被災州縣朕已加恩賑卹因念該州縣皆積
歉之地來年正月賑畢以後未免度日維艱
著將宿州靈璧虹縣亳州泗州五河六州縣
被災十分九分之極貧加賑三箇月次貧及
被災八分七分之極貧加賑兩箇月被災八
分七分之次貧及被災六分之極貧加賑一
箇月至鳳陽懷遠臨淮鳳臺潁上蒙城太和
盱眙天長九縣被災雖屬次重但民間家鮮
蓋藏亦應一體加恩著將被災十分九分之
極次貧民均加賑兩箇月被災八分以下之
極次貧民均加賑一箇月各衛隨坐落州縣
一併加展俾小民得資接濟該部即遵諭行
吏部奏各省知縣現在奏請改教者甚多
其中保無遷就姑息情弊應通知各督撫嗣

後科甲出身人員如實係哀邁庸愚不勝民
社者務遵前旨或以才力不及或以溺職分
別題叅其有為人謹慎學問優通者送部引
見從之禮部尚書王安國奏定例各省生
員詳革審訊者承審官於事結後限一月內
錄案申報學政分別開復除名遲延者議處
今各省歲試已竣臣檢閱各冊所開詳革生
員未經分別開復除名仍列緣事項下多者
至八九十名遠者至十年以外州縣親民之
官於通詳之案玩忽如此其他戶婚田土之
自理詞訟安望聽斷敏決案無留牘再各省
州縣官於重案不能審出實情事隔多年案
由外結內部無可稽查惟有詳革生員先經
冊報在部者下次學冊每捏開病故完結請
行文各該學政凡緣事生員雖已病故務將
斥革年月曾否審結及審定犯案與開復除
名之革生一併摘敘簡明案由報部不得混
於病故項下開除得旨王安國奏各省學冊

開報緣事生員。多未遵例分別開復除名。又詳革生員。捏開病故等弊一摺。著照所請行。夫開報學冊。係易於查辦之事。尚有遲延至十餘年。朦混開報者。可見督撫有司。平日於一切政務。漫不經心。不過奉行文書。張掛告示。粉飾虛文。似此積習相沿。民風吏治。何由丕變。國家任用督撫有司。本意固如是乎。為督撫者。亦當知自愧矣。至王安國曾任巡撫。亦未見其在廣東何以實力整頓政績。班班之可考也。今在部辦事。乃為此奏。此非外省不能實心辦事之明驗耶。摺併發。御史孫宗溥奏。我

皇上仁周寰宇。昭格

天心。今年直省雨暘時若。俱各有秋。所有從前報災州縣。疊蒙殊恩賑濟。以及平糶之後。常平倉儲不無缺數。今當年穀順成。請飭各督撫轉飭各該州縣。或分年限積漸買補。或於素常豐收之地買運足倉。並嚴禁囤戶積聚。

居奇得旨。奏內買補米穀。及禁止居奇。皆各督撫現今辦理之事。而摺首虛詞頌聖。實屬獻諛。著飭行。命侍講蔡新提督河南學政。以陝西西安西靖逆營副將瑚寶為駐防哈密總兵官。直隸正定鎮總兵官范毓騎休致。調天津鎮總兵官馮吉品為正定鎮總兵官。以江南河標左營副將李正為天津鎮總兵官。旌表守正捐軀之山東嘉祥縣民李二小妻王氏。已已。

上詣

大高殿行禮。諭今歲上下兩江。因水災備賑。截留漕糧三十萬石。所有減歇漕船旗丁例支月糧一半。以資苦蓋。但念此等減歇軍船。多在被災水縣衛之內。米價昂貴。旗丁生計未免拮据。著加恩於常例五分之一外。增給二分。以示軫恤。旗丁之意。宗人府奏向例纂修玉牒十年一次。今查乾隆七年所修玉牒。滿漢不符。仍有應改之處。天潢支派甚多。

宗室覺羅漸衆俱應添入如必待十年始修限期似遠請除照例十年一次修纂外仍於五年增修一次不必全修止將應換之篇抽出換易增入以此為例屆時由宗人府將應添入人數查明及可否增修之處請旨自七年修纂後來春正屆五年請即增修但此次增修內應改應添者甚衆仍照例開館普行修輯請派總裁莊親王允祿裕親王廣祿履親王允禔和親王弘晝其滿漢大學士內閣學士禮部堂官等由各該衙門另行奏派得旨令

玉牒內舛錯處既多著照所奏於來年修輯嗣後仍十年一修為是餘依議○吏部議准工部侍郎三和奏稱工部寶源局錢法堂請照戶部寶泉局補給關防從之戶部議准河南巡撫碩色疏稱豫省乾隆十二年兵丁月米輪當豁免請將本年地丁銀內豫撥折給從之○兵部等部議奏大學士等原議甘肅

提督永常奏稱甘肅安西等處應需營馬請准出口向庫掄恰克圖採買所有事宜做照歸化城例將馬匹人數並指定地方提督給照移咨總督報部商民每歲止許出口一次立限一年通報備案至採買馬多係置貨交易其係營伍者應令該管衙門酌量馬匹多寡遴差妥弁兵丁前往其係商民者呈明地方官查詢明確取具保結各將人數姓名貨物限期詳註印照一面移知該管隘口官員驗實放行均應如所請辦理又稱商民向持大黃易馬兩有裨益查西省需馬頗多營中持票採買俱有定數往往不敷亦應准其所請但易回馬匹務令轉售營伍充補騎操不得居奇潛販仍令該督申明禁約違者按律治罪從之廣東右翼總兵官王濤休致以廣東澄海協副將魏國泰為右翼總兵官

庚午
上御乾清門聽政 詣

皇太后宮問安。諭直隸慶雲鹽山二縣蠲課節年災緩並帶徵等銀。前經降旨自丙寅年起分作三年帶徵。但思二縣積歉之餘元氣未能全復。若將分限帶徵舊欠一併開徵。以一年而完積年之欠未免拮据。所有該二縣本年應起限帶徵蠲課銀兩著緩至丁卯年照原案起徵。俾緩舊徵新以紓電力。辛未戶部議覆調任湖北布政使嚴瑞龍條陳災賑事宜。一查報被災戶口宜與頃畝分數勒限辦理查蠲免以分數為憑。賑濟以戶口為據。如被災較重而戶口繁多者概令依限查報。恐承辦各官草率了事。請嗣後查勘分數限內除戶口繁多難一時並舉者照例另報外其戶口較簡者即令乘便帶查一勘災限內有續經被災村莊酌量展限查續被災荒亦應早為勘報。若於正限外加半扣展反致藉端稽誤。請嗣後除旱災以漸而成仍照舊例辦理外如查勘水災限內有續被水村莊

距原報期已過十五日者方准聲明展限二十日。一本管道府親督查災賑查各省委查災賑道府多有止據印委各官印結加結詳報者應令各督撫嚴飭道府務須親身督察實力稽查從之。○兵部議准廣州將軍錫特庫疏稱駐防各旗現在壯丁二千零十四名派隸八旗數尚不齊除正藍鑲藍二旗照定額分派外其餘六旗每旗各派二百五十一名從之。又議准兩江總督尹繼善疏稱泰興縣五門兩關監獄及黃橋等汛應建木樓牌坊柵欄旗桿等項請照數添建從之。刑部議調任山西巡撫阿里衮疏擬民人張明興毆死史尚雲父子二命罪應斬決察其供詞情罪未符應令轉飭承審官悉心覆鞫具題再議得旨此案部議以張明興連殺史尚雲父子二命該撫擬以斬決洵不為枉但供看內稱並非有心欲殺情罪未符駁令細心推鞫具題再議張明興兇殺一家二命罪無

可違律應斬決乃因一語駁詰往返需時不得速正典刑殊非懲兇禁暴之道張明興依議著即處斬餘俱著照所奏完結其供詞未安駁問之處令該撫改正報部嗣後此等案件俱遵照此旨辦理○奉恩將軍巴顏布病休以其子海存襲爵奉恩將軍瑪查故以其子保綱襲爵○士申諭據巡臺御史六十七等奏稱撫臣周學健委員赴臺買穀二十萬石臺郡現在米價較上年秋收後已貴而採買之數倍於上年恐米價日增將來如果無礙民食自應飭廳縣妥辦設米價日長或致病民咨明撫臣暫停採買等語先經周學健摺奏臺郡採買之弊由地方官乘機私買射利已將歷來積弊詳悉敷陳朕思臺郡本產米之區福興泉漳等郡向資接濟縱邇來人民赴臺者衆然地土亦日漸開墾何致米價較前更昂及覽周學健所奏臺郡官吏有此種種情弊伊經理有年實心體察故能言之

切中今觀御史所奏官吏不能射利以昂貴病民之說聳動衆聽而御史等不為全閩計民食只知目前圖了事姑息養奸意欲停止益信周學健之言不虛矣著傳旨申飭該御史等令協同地方官妥協辦理毋得掣肘當周學健身自經理該御史等尚為此奏今陳大受甫經莅閩恐未能深悉該處情形地方官吏益得售欺偽著將周學健所奏發陳大受知其情弊以便妥辦該部知道○癸酉諭向來交部密議事件原非有所隱諱不欲使人聞知蓋因謀事之始理宜慎重易稱君子以作事謀始又曰幾事不密則害成正此謂也此等事件有其事尚在可行可止者有事可准行而其所以然之故不必傳布者有其事曲折多端應詳細商酌不宜早為宣洩者既係密議必有應密之由乃近見交議之初固屬密交密議及覆奏以後不行者本部存案不發而准行事件則將原議通行抄發即

其中有不必修播之語。亦一一宣布。殊非原
交密議本意。嗣後應將原議內准行事件。摘
取抄發。雖條款繁多。難以豫定。其如何分別
採擇刪節之處。應行酌定。方合體制。大學士
會同各部院堂官妥議具奏。○又諭前因瀚
海居住之喀爾喀等被旱。損傷牲畜。特派侍
衛官員等前往查勘。茲據侍衛鄂實等奏稱。
世子成衮扎布詳稱。垂木丕勒旗下人等被
旱。經本盟長額駙策凌等會議。已由富戶及
喇嘛牲畜內攤派馬匹羊隻撥給矣。若復賞
賜是重邀恩等語。額駙策凌及該盟長等照
例妥協辦理。俾被災蒙古等不致匱乏。朕甚
嘉獎。但念所撥牲畜之家。雖屬殷實。究係撥
派伊等牲畜。著賞銀一萬兩。交額駙策凌。其
應如何賞給伊等之處。令其酌量辦理。○戶
部議准貴州總督兼管巡撫張廣泗疏稱。楓
香廠出鉛微薄。請封閉從之。刑部奏原叅
總兵袁士弼在川省領兵効力。不能與提督

李質粹和衷共事。其移駐兆烏石時。又復奉
調。違期不至。聽任土守備樊福保冒昧輕進。
種種獲罪。應從重照軍臨敵境。託故違期不
至律。斬監候。秋後處決。從之。○調拉林副都
統巴爾品為熱河副都統。以熱河副都統索
拜為古北口提督。以古北口提督馬爾拜為
拉林副都統。○調甘肅寧夏道馬靈阿來京
引見。○免安徽泗州水災學田額賦。○旌表
守正捐軀之河南西華縣民徐二妃妻房氏。
○甲戌。戶部議准直隸總督那蘇圖疏稱。靜
海縣秋禾蟲災。請照例賑卹。并分別蠲免本
年應納錢糧。得旨依議。速行。○調湖南布政
使岳濬為山東布政使。以戶部銀庫郎中溫
福為湖南布政使。○旌表守正捐軀之陝西
朝邑縣民王廷信妻馬氏。乙亥。
上詣
皇太后宮問安。丙子。兵部等部議覆大學士
管川陝總督公慶復疏。陳瞻對善後事宜。一

瞻對夾居鴉龍江東西前接裏塘後距德爾格中與明正所屬各土司界連自應割裂險要絕其外屏請將擦馬所熟泥熟寨三處及日膩等六寨給裏塘土司阿斯羊雀給德爾格土司加社了卡至臘蓋等處給明正司頭人姜錯邦阿喜朱窩給原土司安蚌之子柱麻住牧子托給明正司土把總康平上瞻對仍令應襲康朱住牧撒墩仍令四郎住牧下瞻對茹色等處仍令土舍惡木丁住牧如郎

寨經堂一座給明正司之喇嘛德昌住持靈達給土目徒壩底朱兆烏石等寨給土目側冷工底囊等寨給土目阿札上甲納給土目沙加丹盡卜壩茹隆給革松結了魯空七給土目阿囊了魯窩壩給土目泥嗎宗了魯之卜角卜里邊多等處給土目曲中工擦牙所給土目騷達邦分定地界管轄一瞻對各地分賞管轄須授職銜方資彈壓請將上瞻對應襲康朱准其承襲長官司下瞻對土舍惡

木丁給長官司職銜上瞻對土舍四郎土目騷達邦曲中工沙加丹盡革松結土把總康平均給土千戶職銜土司之子柱麻土目姜錯邦阿札側冷工阿囊泥嗎宗徒壩協辦土目阿中阿果均給土百戶職銜分給號紙印信効用三年無過方准承襲一夷地勢若瓜分必得土司專轄事權始一請將裏塘宣撫司統轄一切貢賦承襲事件責成查核轉報一瞻對迤北多資畜牧迤南稍事耕種今既

將各地分隸自應定額輸貢今上瞻對康朱茹色惡木丁均認納馬一匹狐皮四張土千戶四郎騷達邦革松結康平曲中工沙加丹盡六名各認納狐皮二張德爾格代阿斯羊雀納狐皮二張土百戶柱麻姜錯邦阿札徒壩泥嗎宗阿囊側冷工阿中阿果九名各認納狐皮一張擦馬所及日膩等寨認納青稞九石零一瞻對係泰寧協所轄距建昌鎮稍遠請於每年秋末委泰寧協會同打箭爐同

知多帶兵前往於擴域頂擦馬所適中之地
督率統轄土司秉公查核仍照巡查臺站例
支給鹽菜口糧通譯工食其松潘賞需均以
一千兩為率事竣報銷一西北壘石為房其
高大僅堪棲止者曰住碉其重重鎗眼高至
七八層者曰戰碉各土司類然而瞻對戰碉
為甚請每年令統轄土司差土目分段稽查
酌量拆燬嗣後新建碉樓毋得過三層以上
仍令年終出具印結存案一番性素為頑直
遇有刦奪之案商人嗜利捏少報多追賠滋
釁請嗣後除番民互相搶刦照常辦理外如
遇漢人被刦者應確查原贓照數估還其餘
分賞首告及緝捕目兵以示鼓勵以上各條
均應如所請從之雲南總督兼管巡撫張
允隨疏報會澤縣礮嘉州判開壑水田四頃
五十畝有奇旱田二十畝調正藍旗滿洲
都統盛安為正黃旗漢軍都統以尚書班第
兼管正藍旗滿洲都統鑄給河南陝州糧

捕水利通判汝州糧捕水利州同關防從河
南巡撫碩色請也

大清高宗法天隆運至誠先覺體元立極敷文
奮武孝慈神聖純皇帝實錄卷之二百八十

大清高宗法天隆運至誠先覺體元立極敷文
奮武孝慈神聖純皇帝實錄卷之二百八十一

監外總管官經建講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲副都統功加七級隨帶加一級尋常加一級軍功紀錄一次臣履歷

總裁官經建講官太子太傅文學殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄一次

尋常紀錄十四次臣德瑛經建講官太子少保工部尚書紀錄六次臣曹振鏞等奉

教修

乾隆十一年丙寅十二月丁丑諭曰大學士

張廷玉年老內廷行走需人扶掖其子庶吉
士張若澄著在南書房行走○諭軍機大臣
等前據達青阿奏稱直隸驛站廢弛已經降
旨那蘇圖令其查叅一二以儆其餘今那齊
布自口外回京又奏稱伊等分內應給驛馬
只十餘匹竟有以騾代馬應付者是南北兩
路經由直隸地方官員俱如此陳奏則通省
驛站皆有此弊著再行傳諭那蘇圖令其嚴
加查察極力整頓不得以一查了事尋奏直

省驛站廢弛臣屢將管驛官員丁役究懲今
那齊布自口外回京管驛官員竟有以騾代
馬應付之事當即查取職名題叅臣仍不時
立法嚴查極力整頓得旨直隸為四通八達
之區若驛馬應付遲延大有關係可留心整
頓毋為姑息再有似此朕將惟汝是問矣
大學士等遵旨查訊馬甲張自南首告印房
叅領李據德收受原任廣西馬平縣知縣張
本闡餽送一案查張本闡於馬平縣任內欠
修城倉核減工料銀兩歸旗勒追除變產抵
償尚欠一千五百餘兩經該旗查稱力不能
完保題豁免在案今審出張本闡到京時餽
送佐領張達銀十二兩又託張達轉送叅領
李據德繭緞二疋囑其照應張自南首告是
實應將張本闡張達李據德各計贓定罪並
將混行保題都統以下各官請旨照例查議
得旨依議張本闡應追城工核減銀兩已據
該旗保題豁免今又審出餽送請託諸弊其

隱匿情節俱已敗露著將出結之佐領驍騎校並收受贓物之叅領李據德俱照例著落分賠其保題豁免之都統以下各官亦俱著交部照例分別議處近來虧空之案具題請豁者甚多而竟無事後發覺者似此事後發覺乃百十中之一也故嚴處以示警至督催承追各官以為朕多加恩寬免遂任貪劣之員營私寄頓草率完結國家帑項猶其細者而使貪婪侵蝕之風日熾豈所以肅吏治而澄官方乎此即諸臣不實心任事之應驗也著將此旨通行八旗各省知之 墨爾根城副都統布爾沙休致以護軍叅領青保為墨爾根城副都統 戊寅

上詣

皇太后宮問安 諭直隸鹽山慶雲二邑節年民借倉糧米穀價銀等項分作三年帶徵但朕念該二邑係積歉之區今歲秋成雖有六七分不等元氣尚未全復小民輸將未免拮

据著將鹽山慶雲本年應帶徵民欠等項緩至丁卯年秋成完納以紓民力該部即遵諭行○又諭宗人府考選應封宗室其學業平常者例應降封除職銜較大者按照定例降封外至奉恩將軍無等可降仍照伊應得職銜授封此項考選學業優長者封以應得職銜平常者降等授封原欲伊等勤學以示勸懲之意若以無等可降仍封以應得職銜則伊等恃此不知奮勉嗣後凡無等可降仍封以奉恩將軍者著停俸三年著為定例考選時仍開單前一日進呈 戶部議覆奉天府府尹蘇昌奏稱寧海縣現貯倉米一千石不敷本年兵米而孤貧監犯口糧以及來歲青黃不接在在均需接濟請於附近之復州倉內撥給米二千石等語應如所奏辦理至運脚一項奉省既無存公銀兩亦准於本年餘剩田房稅契銀內動支從之 予江南清河縣知縣涂璋浙江杭州府理事同知多永俄

湖北羅田縣教諭戴俊山東諸城縣知縣劉之鵬山西寧鄉縣知縣呂履恒雲南布政使徐嘉賓並明浙江永嘉縣知縣莊廷臣廣東守道洪雲蒸等八人入祀各該地方名宦祠江南陝西神木縣知縣徐之龍山陽縣監生阮應韶安徽宣城縣貢生梅文鼎浙江會稽縣舉人胡廷贊開化縣貢生戴九鏞建德縣耆碩吳瑜西安縣教諭錢瑞徵歸安縣生員吳鉞福建福清縣拔貢生何敬祖連城縣歲貢生張鵬翼優貢生童能靈湖北兵部員外郎朱翼治瑞州府同知譚士法山東工部右侍郎王懿戶部員外郎王坦戶部主事王作哲山西孟縣訓導晉淑京猗氏縣舉人令狐言安邑縣生員葛鳳翔並明廣東兵部主事盧鍛甘肅太常寺少卿何宗韓等二十一人入祀各該籍鄉賢祠己卯

上御乾清門聽政諭據兩江總督尹繼善奏稱上下江被災之地蒙恩加展賑恤月分所

需賑糧為數既多應本折兼放等語查向例本折兼放每米一石折銀一兩朕思災輕州縣猶可按例給發若被災較重之州縣亦照舊折給民食自覺艱難著將上江災重之宿州靈璧虹縣泗州五河亳州六州縣下江災重之邳州宿遷睢寧桃源清河安東阜寧沛縣海州沐陽十州縣來年加展月分之折價每米一石加增二錢俾災黎俱需實惠該部速行知之又諭前因將軍達勒當阿圍場

所獲牲畜奏單內稱牲畜稀少曾經降旨訓飭今達勒當阿呈進所獲牲畜奏單內復稱每圍牲畜稀少數圍僅鎗刺二虎等語八年朕巡幸盛京時十餘圍內即殺十餘虎以此觀之並非無虎或官兵不以殺虎為事抑或遇虎不殺盡皆放脫盛京為我朝豐沛之地從前故老上圍以不遇猛獸為憾若遇而弗得殺深以為恥嘗以之教訓後生今該處後生縱不知以此為務該將軍亦當追維舊習

振作士氣勤加訓導若如此光景流而愈下其懦劣伊於胡底達勒當阿身為將軍似此關係緊要之處豈可不實力整飭耶著飭行

戶部議准甘肅巡撫黃廷桂疏稱甘省各屬夏秋二季疊被水電請將安定狄道平番禮縣中衛靈州高臺西寧八州縣屬成災村堡先行賑恤其勘不成災之會寧安定漳縣西固隴西隆德莊浪皋蘭狄道河州真寧合水禮縣花馬池中衛山丹永昌高臺等十八

州縣廳衛各村堡酌量借給籽種口糧得旨依議速行以故科爾沁扎薩克多羅貝勒多爾濟子特古斯額爾克圖襲爵以二等子班岱子班他哈三等男吳文煌弟文煥襲爵免山東金鄉陽穀城武聊城莘野臨清東昌臨清衛等八州縣衛水災額賦有差庚辰命大學士訥親充

玉牒館正總裁大學士史貽直協辦大學士吏部尚書高斌禮部尚書來保內閣學士塞爾

赫充副總裁以大理寺卿劉綸為內閣學士兼禮部侍郎以山東布政使阿蘭泰為太僕寺卿豁廣西永福縣水衝地賦旌表守正被戕之廣東靈山縣民施成侃女施氏辛巳諭近派宗室等挑選侍衛由宗人府具奏不在宗室侍衛額內而領侍衛內大臣仍於宗室侍衛缺出以伊等充補伊等皆係在侍衛上當差原當一體辦理嗣後挑取侍衛時著宗人府會同領侍衛內大臣公同揀選將年已及歲應挑之近派宗室等另為一排開列於前宗人府王公領侍衛內大臣等一同帶領引見刑部議調任江蘇巡撫陳大受奏稱叅革江寧府江防同知嚴宗喆狼山鎮標左營守備陞任東海營都司袁文通承造戰船舞弊率混一案審得嚴宗喆袁文通實無弊混侵隱等情但造不如法節省價銀不即申報應分別罰俸其原叅革職之案可否准其開復得旨戰艦備水師操演防

禦之用關係緊要全在修造如律方能緩急足恃而向來承辦文武員弁往往侵蝕分肥至經管書役以及管船人等各有陋規因而通同作弊朦混報銷修造概不如法而該管上司不過據結題報肯實心查驗叅揭者甚少以致承辦之員恣意朋私視為故事此本內尹繼善原叅同知嚴宗詰都司袁文通舞弊狡飾一案所查節省銀兩先未報明及至敗露始行開出之處甚為明確而該撫陳大受承審乃謂尚未報銷原非侵隱亦無弊混等語獨不思題叅在前該員弁詳報在後其為侵隱弊混已屬顯然即使寬其侵冒罪名何得遽請開復部議照覆亦屬草率似此已經發覺之案尚為姑息優容將來承辦各官益無顧忌積弊何由漸除嚴宗詰袁文通俱不准開復此旨可傳諭各督撫知之署漕運總督左都御史劉統勲奏臣等會審原任葦蕩營叅將韓烈用正額荒柴七千餘束以

作纜心計值銀一百四十八兩零並採辦餘柴存剩銀一百八十四兩零湊給打纜工價均屬挪移應依律杖一百流三千里係難犯准徒四年免刺餘犯照例分別辦理其失察衙役犯贓之淮揚道葉存仁河庫道吳同仁相應附叅聽候部議至各項虧欠銀兩應於各犯名下照數追繳再韓烈係奉旨解任之員今既審明挪移是實應請革職得旨韓烈著革職餘著該部核擬具奏○又奏韓烈通揭道廳各款事皆有因辭不盡實應照律杖一百已於叅案內擬徒應歸彼案完結再積凌水鼓開涵洞一座至今未曾補建其不行具題咨達之原任河臣白鍾山應請交部察議尹繼善有協理河務之責不行查催速辦應請一併交部議處得旨該部議奏餘著察議具奏○壬午。

上詣

皇太后宮問安○幸瀛臺○署江南河道總督

顧琮奏本年淮徐等屬被水貧民業遵定例分別加賑臣於附近淮屬地方聞有貧困婦女擁擠求賑民情不甚寧謐雖經地方官彈壓不致滋事然皆係被災九分之極貧次貧臣訪察其故蓋緣成災分數專視其地畝被災之輕重至於分別極次則又視其生計之艱難其被災七八分者尚與十分者相隔至被災九分者則與被災十分者情形不甚懸殊而加賑俱少一月是以九分之極貧次貧僉謂貧苦與十分者無異希與十分者一例邀賑可否將九分之極貧次貧於例賑外量加半月或十日則九分者仍與十分者有間其八分者自不得藉詞與九分者相等遞生覬覦得旨如汝所言則八分者不將覬覦九分者乎所見甚鄙又批斷無因貧民鬧賑而即為加賑之理全不知治體奈何又諭軍機大臣等顧琮此摺并朕硃批一併抄錄交與尹繼善安寧閱看若因鬧賑而即加增此風

甚不可長但顧琮既有此奏或百姓實有向隅者或因屬員辦理不善著尹繼善安寧悉心查明毋因朕旨而遷就毋姑息屬員亦莫長民之刁風亦莫玩民之疾苦并將被災貧民或應加賑與不應加賑之處酌量定議即速奏聞 癸未準噶爾台吉策妄多爾濟那木扎爾遣使瑪木特等至京進表請安並貢方物

上命尚書海望等詢問來使據瑪木特稟稱我等前往西藏一切舉行善事念經之人其施恩照管及賞助牲畜之處伏乞憐念再念經之事需銀甚多我等前往東科爾貿易之人交易時乞飭令內地商人以銀收買伏祈轉奏海望等言我大國交易之例聽商自便難用官法抑勒從前已經曉諭爾等今爾台吉以念經之事需銀甚多復行懇求俟轉奏候旨奏入報聞 甲申諭向來外省降調旗員遇有本處駐防缺出咨送應陞人員引見時

將降調人員一併咨送。列於應陞人員之後。帶領引見。如引見不用。至第三次引見時。將緣由聲明具奏。但廣東、福建、四川、甘肅等省。距京遙遠。屢次咨送。未免長途拮据。嗣後廣東、福建、四川、甘肅等省降調人員。著於第二次引見時。該將軍、都統、副都統等。即將該員降調緣由。并出考語。聲明具奏。不必至第三次。以省跋涉之勞。該部即遵諭行。乙酉。

上詣

雍和宮行禮。○召夷使瑪木特等。賜見於大和齋。諭曰。爾台吉奏疏。朕已覽閱。一切事宜。皆遵奉朕諭旨辦理。看來如此恭順。必能安伊屬人。裨益部落。朕甚嘉悅。再爾求照看爾等念經之人。資助牲畜盤費。自應照前次賞賜之例。加恩賞給。至懇求貿易時。用銀收買爾等貨物。止可隨商賈之便。朕不便降旨於商人。現派侍郎玉保前往照看爾等。爾等與玉保商議酌量。凡事屬可行者。會議具奏。瑪木

特瞻仰行禮。賜茶跪領。祇聆訓諭畢退出。尋命尚書海望等宣諭瑪木特等曰。爾等意欲頗羅鼐資助念經人等。頗羅鼐雖係承受朕封號之人。究係別部落。不比內地臣民。彼資助與否。朕不便降旨應聽伊自主。故特諭爾等知之。丙戌。

孝莊文皇后忌辰。遣官祭

昭西陵。

上詣

皇太后宮問安。○是日丁卯年立春。順天府進土牛春山寶座。○戶部議覆御史朱士俊奏。稱外省州縣經徵錢糧時。多有不貯外庫。存貯內署。以便那用。而監收之佐貳。以為無關考成。至遴委監拆官員。亦多奉行故事。因而起解耽延。以致倉庫錢糧虧額。一聞道府盤查。非搬取於鄰封。即勒借於境內。請於丁卯開徵之先。勅下直省督撫。於遴委監拆時。嚴諭該員。眼同拆封。後與州縣官通盤計算。扣除支留

分數等語均屬現在遵行成例。但恐日久漸弛。應再通行各督撫。嚴飭該州縣實力奉行。如有陽奉陰違等弊。即行題參。至該御史所請應解錢糧一併著落監折之員督催。務於三日內批解呈院交司之處。亦應如所請行。從之。是日起。

上以歲暮禋祭

太廟。齋戒三日。○丁亥。諭江南淮徐海等屬災民朕已特沛恩膏。令地方官妥協辦理。其鹽竈向不在加賑之內。但思各場多坐落被災州縣。雖與民戶所業不同。亦當一體加恩。以示優恤。著將被災九分之荒瀆場竈戶。無分極貧次貧。概行加展兩月。被災八分之板浦徐瀆中正臨洪興莊五場竈戶。無分極貧次貧。加展一月。俾得接濟有資。以紓竈力。該部即遵諭行。○大學士等議覆福州將軍新柱奏稱。臺郡遠隔重洋。民番雜處。近有小船私由小港偷運米穀至漳泉粵東等處內地。奸

民乘其回棹。暗行過臺。又廈門往臺船隻。名為橫洋船。其舵水人等。額配過多。有分賄兵役。頂冒偷渡過臺。通行徇庇等語。查包攬偷渡過臺。例禁甚嚴。應勅交該省督撫飭屬再行申禁。設法查拏。從之。○兩廣總督策楞等奏潮州府城外湖山腰城。年久坍塌。經前督臣鄂彌達奏准重修。臣等覆查此城廢棄已久。地非險要。修築無益。徒費帑金。且民間墳墓如鱗。迫令遷徙。益滋驚擾。請將湖山腰城工程並押遷民墓移兵戍守之處。概行停止。得旨著照所請行。該部知道。○戊子。以歲暮禋祭。遣官祭

太廟中殿。

後殿。諭八旗辦理世襲官。有將外省駐防應擬正陪列名之人。全行咨取者。或有將應列名之人。不行咨取者。辦理未昭畫一。再拉林地方駐防人等。係新移駐防屯田。以資生計。若將伊等咨取。不得襲官而還。有妨生計。此

等外省駐防之人。長途往返。徒勞跋涉。嗣後各省駐防人內。遇有京城應行承襲世職。缺出於擬正陪有分者。著咨取來京。其有列名之分者。著該旗行文咨問。其情願來京者。咨取來京。不願者聽。○己丑。裕祭。

太廟。

上親詣行禮。○遣官祭。

永陵。

福陵。

昭陵。

昭西陵。

孝陵。

孝東陵。

景陵。

泰陵。○遣官祭。

端慧皇太子園寢。○遣官祭。

太歲之神。○諭。近因內扎薩克之蘇尼特。阿巴噶等旗。及北路喀爾喀蒙古等游牧被旱。

朕俱派侍衛官員前往查明貧丁。加恩賑濟。賞賚現在烏蘭察布盟長所屬六旗五扎薩克等。呈報遵照部文。將伊等屬下被災貧丁。俱於該旗妥為養贍。如此辦理。雖係伊等分所宜然。朕仍欲加恩賞賚。但此一盟被災。較蘇尼特喀爾喀稍輕。伊等既皆辦理妥協。著將此一盟之王貝勒貝子公扎薩克台吉俱加恩賞給半年俸銀。其向無俸銀之協理台吉各賞銀四十兩。小台吉各賞銀二十兩。其冊內有名官員閒散及喇嘛等。著照部議將所罰牲畜。入於賞項。辦理嗣後蒙古等如有似此被災者。均照此例。著存記。○大學士等會議。大學士管川陝總督公慶復議。覆遷移涼莊兵丁案內。據稱自乾隆二年涼莊添設滿兵。歲需糧料草束。俱於甘涼蘭州西寧等府屬酌派辦理。甚為拮据。而涼州較勝於莊浪者。涼州地界稍廣。莊浪僻在山麓。涼州商賈稍通。莊浪百貨不聚。涼州牧馬有地。莊浪沙地不毛。所以莊浪滿兵十分拮据。而涼州

猶為彼善於此。然最爾之區。採買過多。糧料草價。不能平減。幸而連年豐稔。倘遇歉歲。萬難購買。涼莊屬要地。而營鎮星羅。聲勢聯絡。設有重鎮。兵制已屬嚴密。原無藉於滿兵。惟先計可移之地。然後從容議遷。統三省而論。非寧夏。成都二處不可。寧夏富庶。甲於秦隴。連歲豐收。府城積穀至三十餘萬。原駐滿兵三千四百餘名。若以涼州滿兵添駐。供應可充。緩急調撥。不過稍遠數站。且現有舊城基。雖磚皮那用。土牛尚存。增築亦為省費。至四川僻處西南。內雜番蠻。外連沙漠。兵多積弱。四鎮僅敷防守。提標兵不足援勦。雖駐滿兵二千餘名。尚未為居重馭輕。若以莊浪滿兵添駐。無事固可以建威銷萌。倘頑番蠢動。即可出為援勦之勁旅。加以風土和暖。產米之鄉。勝涼莊實多。惟現係普免錢糧之年。經費宜籌。莊浪請俟三年後議移。涼州請俟五年後議移。其一切城池營房。應添兵數安置。

費用於議移之時。督撫會議妥協具奏等語。查涼州莊浪滿兵。從前屢經酌議。始於乾隆二年移駐。嗣經該督撫將軍等奏請遷移。有請移漢中。成都者。有請移寧夏。潼關。分派各省者。皆各持所見。惟莊浪之兵。則咸以為必應移徹。臣等酌議。該督既稱涼州地界寬廣。商販流通。牧養有地。又稱莊浪十分拮据。涼州彼善於此。即從前將軍烏赫圖亦曾謂涼州兵丁支給糧餉。食用充裕。是涼州滿兵可不必移。應令照舊駐防。惟莊浪地皆沙土。難以耕種。百貨不通。供運缺乏。自應照所請移駐。再該督原奏。蓋因涼州兵既移。駐寧夏。是以議將莊浪兵移駐成都。今涼州滿兵照舊駐防。而寧夏又係富庶之區。應將莊浪滿兵即移寧夏。似為近便。至寧夏雖據該督奏稱有舊城基址。增築可省費。查舊城原因地勢低窪。是以改易。且磚皮既用。僅存土牛。若復興建。其房屋城垣。俱應營造。恐辦理亦甚不

易應即就現在駐防處於城內添蓋房屋如城內地窄即於城外關廂稍為擴充添設營房令該督撫等察看情形定議奏明辦理至所稱現係蠲免之年宜籌經費俟三年後議移等語查莊浪兵既應移駐亦不必遲至三年後應令該督即將一應遷移事宜籌酌妥協請即行辦理從之 庚寅

上詣

皇太后宮問安 御保和殿筵宴朝正外藩左

翼喀爾喀世子成衮扎布教漢郡王吹木丕勒貝勒羅布藏和碩額駙朋蘇克阿巴噶郡王索訥木喇布坦貝子齊旺巴林郡王桑哩達貝子扎什那木塔爾輔國公璘沁科爾沁貝勒特古斯額爾克圖固倫額駙色布騰巴勒珠爾多羅額駙色旺諾爾布固山額駙拉禮達吉哩第古穆多爾吉瑚土默特貝子哈穆噶巴雅斯瑚朗圖扎嚕特鎮國公察罕靈華烏珠穆沁鎮國公朋蘇克喇布坦輔國公

德里克旺舒克喀喇沁輔國公敏珠爾喇布坦扎拉豐阿郭爾羅斯扎薩克台吉都噶爾扎布右翼科爾沁親王羅卜藏衮布浩齊特郡王丹津厄魯特郡王色布騰旺布貝勒散都布烏珠穆沁貝勒策布登郭爾羅斯貝勒諾依羅布扎木蘇固山額駙蘇瑪第阿巴哈納爾貝勒達什敏珠爾青海扎薩克台吉達爾濟色布騰達木璘色布騰色特爾布瑪喀爾喀貝子沙克都爾扎布鎮國公扎木禪旺扎勒和碩額駙津扎布多爾濟扎薩克台吉圖巴扎布阿寶賴吹扎布喇布坦桑寨璘沁羅卜藏敦多布旺舒克他爾扎翁牛特貝勒朋蘇克固山額駙車布登蘇尼特貝勒幹珠爾喀喇沁輔國公丹津固山額駙羅布藏敦多布鄂爾多斯輔國公色旺訥爾布阿巴噶輔國公鄂爾哲依圖教漢多羅額駙齊旺多爾濟德木楚克固山額駙吹濟扎勒及領侍衛內大臣大學士等召喀爾喀世子成衮扎

布教漢郡王吹木丕勒貝勒羅布藏阿巴噶
郡王索訥木喇布坦巴林郡王桑哩達科爾
沁親王羅卜藏衮布固倫額駙色布騰巴勒
珠爾土默特貝子哈穆噶巴雅斯瑚朗圖浩
齊特郡王丹津厄魯特郡王色布騰旺布烏
珠穆沁貝勒策布登郭爾羅斯貝勒諾依羅
布扎木蘇翁牛特貝勒朋蘇克厄魯特貝勒
散都布等至

御座前賜酒成禮○是月兩江總督尹繼善奏

向遇地方歉收貧民例應散賑惟營兵以有
月支糧米概不予賑查營兵所支月餉原不
能養贍多口若因一人入伍食糧使一家多
口不得與災民均霑惠澤似屬可憫但一概
入賑又覺過濫現據各屬紛紛稟請臣思兵
丁糧餉一分尚可養贍三四口請將坐落被
災地方營分除兵丁本身及家屬在三口以
內者俱不准入賑外其多餘家口應各就被
災處所分別極貧次貧編入飢民冊內給賑

得旨照所議盡心辦理○又奏海州連歲荒
歉今秋復被重災節年撥發銀穀災黎雖慶
更生而官粟勢難常繼該州介在海濱內地
商米必須涉黃渡海方達州境即城外海口
近接山東日照等縣然客販每由海道收入
江南之劉河口發賣運赴海州者頗少乾隆
八年經前撫臣陳大受奏明咨會東省米商
收泊海州者先儘居民舖戶收買不能全買
者官為動帑照時價買貯仍按原價糶濟民
用俾商船源源販運遵行在案茲據知州許
松估詳稱現在米糧價增將來官米恐尚不
敷平糶請循例招商措本出口赴東省採買
濟賣無庸發帑收買臣查該州積歉之餘招
商運販原屬因地制宜應如所請試行但能
行銷積滯請仍照八年奏明之例妥協辦理
得旨知道了仍應留心體察妥辦不可謂奏
聞了事也○又奏常州貪守董怡曾及廢官

張适賄結殃民曾經參奏在案奉旨將張适家產嚴加查禁臣於揚州帶同臬司會審即密令將張适家產查封嗣又奉旨嚴行查審惟該犯等貪惡諸款審擬尚須數月應俟參案審定再行奏聞得旨是統俟查清另為奏聞請旨江西巡撫開泰奏臣前在湖北巡撫任內會奏大冶縣民程奎先等索詐鄉民一案請照旗人擾害良人擬遣之處比擬不當蒙恩訓示具摺恭謝得旨汝近來諸事頗不滿朕意慎之漢人習氣何必學之讀書學文全不在此朕非自誇汝之文能如朕乎朕非不重文而不重漢人習氣也福建巡撫陳大受奏據蘇祿國王遣番官武厨安力等齎謝恩表文又該國王來咨內稱乾隆九年貢使馬光明等事竣回國在洋遇風飄入呂宋所轄邦仔絲蘭地方被呂宋番目黃佔拘禁擄搶銀物等情經前撫臣周學健奏明在案臣查蘇祿國慕義向化頗為恭順果因外

番欺凌赴愬自難恕置茲訊據各供該國回船遭風飄至呂宋呂宋未悉其為返國貢使故行擄取銀貨迨該國王遣人往取旋即放回是呂宋讐服天朝聲靈尚知不敢肆行至所領詔書據稱少有破裂或係在船安置失宜所致其銀貨不全取回之處據稱國王因與呂宋鄰邦囑令不必相爭是乃該國王睦鄰之道均無庸置議至黃佔生長番邦現充番目事隔外洋無憑提質况船載貨物據稱原無賬目則黃佔扣留若干更無確憑再查外番恭進表文俱係各該國文字到內地再為譯出今蘇祿國所齎表係漢文番文二道訊之番官又稱不識番字是否一樣殊難懸定竊思該國王因與呂宋鄰邦不肯相爭似未必又以黃佔搶貨之事上瀆天聽設漢文一道為馬光明等捏造與番文不同若與施行或啟島夷輕侮之意長奸徒生事之漸况搶貨情由一經上達勢須究問而事涉呂宋

外洋礙難辦理。臣擬令布政使高山傳集番官等。諭以此次表文番字漢字各一道。與向例不符。且無能識番字譯出之人。不敢陳奏。漢字表內所叙黃佔搬搶貨銀一節。應該國王自行查辦。不應於謝恩表內夾雜叙入。令將表文仍行齎回。並婉詞咨覆該國王。至該番官等遠涉重洋。來至內地。似應量加優恤。除飭令地方官加意安頓。撥給廩糧。並將所帶貨物。著舖戶公平交易外。請動支公項酌

實錄卷二八一

量從厚資給。配船令其回國。得旨所見甚得體。知道了。湖南巡撫楊錫綬奏。巴陵縣知縣薛澍。明白幹練。辦事勇往。湘陰縣知縣徐梁棟。端方明敏。政績昭著。均為賢能之員。又武陵縣知縣翁運標。清潔持躬。實心愛民。曾於計典內附薦。又經題陞道州知州。在案。臣前任廣西。即聞其孝名。今觀其居官。實能本孝為治。故不事操切。而民服其教。得旨覽奏。俱悉。此等賢員。宜令久於其任。庶於地方有

濟。驟加陞轉。不但開躁進之途。且亦非久道化成之本意也。○護理山西巡撫布政使陶正中奏。報晉省得雪日期。並陳汾州寧武二府。吉陽忻代。保德五州雪澤稍愆。俟查明有無妨礙生發之處。再行據實陳奏。得旨覽奏。俱悉。又批。此雖屬留心民瘼。然朝廷自有定例。夏災秋災之不止。今以朕留心愛民。則有春災矣。若汝此奏。是春災之不止。將來必有冬災矣。姑為是言。是迎合朕意。不出於誠也。

實錄卷二八一

實有此舉。啟民幸災樂禍之心。不識政體。是不知也。如之何而後可。○大學士管川陝總督公慶復等奏。籌備川省軍械事宜。一烏鎗宜添造。纏絲大鎗。查川省各營。烏鎗乾隆三年奏准。改造纏絲。體重六七觔。不等。尚未能攻堅致遠。請於原設烏鎗。每百桿內添造纏絲大鎗十桿。每桿以十觔為率。食五錢重藥。打五錢重子。按數分給各營演習。其原設烏鎗。仍日行操演。不得廢弛。一馬步弓箭。宜分

別製備。查習射之弓。均皆稍長面窄。原為扯拉靈巧。川省征行。多係叢林深菁。並霧雨瘴烟。一經潮濕。必致歪斜無用。請於各營馬步兵丁每百名內。另製短稍寬面弓二十張。俱要五六力以上。用纏筋生漆。戰箭酌量弓力長短。配合改造。另換點鋼利鏃。翎花不必過大。用纏絲上油。以備應用。一刷刀宜改為雙手帶。查川省各營刷刀。靶長刀寬。有名無實。請將各營刷刀。均改造雙手帶式樣。刀長二

實錄卷三百八十一

五

尺五六寸。近刀盤處寬一寸二分。由刀盤漸次稍窄。以至刀尖。更須銳利。背如魚脊。靶長一尺。加鋼精造。飭令刀法純熟之人教習。以收實用。得旨著照所請行。○是年。旌表孝子直隸等省陳璠等三十二名。孝婦孫氏等四口。孝女王氏一口。守節合例。八旗滿州九格等妻覺羅氏等一百四十五口。蒙古阿什圖等妻額諾特氏等二十口。漢軍邵景華等妻王氏等三十五口。奉天等省駐防佛保等妻

杜氏等一百七十六口。直隸等省白良柱等妻張氏等一千七百六十四口。夫亡殉節湖南等省周德深等妻何氏等八口。未婚守志江蘇等省蘇允位等聘妻張氏等四十七口。百歲壽民。婦汪寧等省生員馬召芟等二十六名口。各給銀建坊如例。○一產三男直隸等省郭鳳友等十五家。○會計天下民穀數。各省通共大小男婦一萬七千一百八十九萬六千七百七十三名口。各省通共存倉米穀三千五百五萬四千八百一十四石三斗八升七合七勺。

實錄卷三百八十一

五

大清高宗法天隆運至誠先覺體元立極敷文
奮武孝慈神聖純皇帝實錄卷之二百八十一

實錄卷二百八十一

三

大清高宗法天隆運至誠先覺體元立極敷文
奮武孝慈神聖純皇帝實錄卷之二百八十二

監修總纂官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄次臣慶桂

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞尋奉

敕修

乾隆十二年丁卯春正月辛卯朔

實錄卷二百八十二

一

上詣

奉先殿行禮○詣

堂子行禮○率王以下文武大臣詣

壽康宮慶賀

皇太后禮成御太和殿受朝作樂宣表如儀

詣

大高殿

壽皇殿行禮○遣官祭

太廟後殿○壬辰諭軍機大臣等劉統勳叩賀

元旦奏摺。於初二日始到。已過元旦矣。在齋摺之人。固屬無知遲緩。而劉統勲身為大臣。豈不知慶賀典禮。乃不豫囑來人。先期恭進。殊屬不合。著傳旨申飭之。○賞辦理夷使赴藏事務侍郎玉保。路費銀二千兩。○甲午。

上詣

皇太后宮問安。○御紫光閣大幄次。賜蒙古王公等宴。○諭朕嘉惠黎元。以次輪免天下正供。山西通省地丁。應於戊辰年全免。但該省

實錄卷三十二

二

太原平陽潞安寧武澤州蒲州六府遼沁平忻代保解絳八州及歸化城各協理通判所屬有額徵本色米豆穀麥一項以供滿漢官兵糧餉例不蠲免其實計田納賦本色即與地丁無異今應納地丁者均已蠲免其供輸本色者雖係支給兵餉未便概予蠲除但此次特沛恩施亦應量加愷澤俾伊等得以均霑著將太原等府州縣應徵本色酌免十分之三其大同朔平二府地處邊瘠頻年歉收

著全行蠲免該部即遵諭行。○又諭江南淮徐海等處地方朕已疊次加恩至再至三地方有司遵旨辦理小民自當不致失所但向來定例俱按被災分數賑卹今思積歉之餘元氣一時未復其被災九分者應否照十分之例加賑著該督撫酌量該處情形詳議以聞。○乙未賜準噶爾使臣瑪木特等宴於豐澤園隨頒賜準噶爾台吉策妄多爾濟那木扎勒緞疋等物如例。○丙申。

實錄卷三十二

三

上詣

皇太后宮問安。○命續修大清會典。諭國家立綱陳紀布在方策所以明昭代之章程備諸司之職掌以熙庶績以示訓行典至鉅也大清會典修於

皇祖聖祖仁皇帝康熙二十三年越我皇考世宗憲皇帝御極之初即允禮臣之請開館重修九年告竣刊梓頒行閱今又二十年矣其間因時制宜屢有損益向來諸臣每有

以重修為請者。朕以國家定制。豈容數更。踵事增文。自有部冊。故概未准行。近以幾餘時。加披覽。間為討論。乃晰由來。有不得不重修者。蓋緣編纂之初。諸臣或沿襲舊文。未經考證。或畧存近制。未溯本源。或限於案牘之不全。或誤自叅稽之不審。而又未嘗請旨取裁。斟酌至當。故舛訛疎漏。均不免焉。夫唐虞分職。具載典謨。周室經邦。詳於官禮。書曰。監于先王成憲。又曰。其爾典常作之師。既謹度以

實錄卷百全

四

惟貞。宜有條而不紊。矧際重熙累洽之期。當禮明樂備之日。勅幾慎憲。職惟其時。是當博考朝章。詳稽故實。正舊編之訛繆。補紀載之闕遺。用藏成書。垂示法守。所有一切開館事宜。該部定議具奏。尋定議六條。一。朝章宜考本原。金匱石室之藏書。非編纂諸臣所得見。應照國史館之例。令纂修官親赴皇史宬。詳考有關會典者。敬錄以為全書綱領。一。書籍宜備叅稽。古今圖書集成一書。博大精深。足

資考證。從前曾賜翰林院一部。明永樂大典。亦見貯翰林院。如有應行稽考處。應令纂修官赴翰林院覈對。又三禮及律呂正義二書。已成。校對將竣。從前所取書籍。現存該館。並請埃會典開館後。行文咨取。全數交送。其他書籍。凡有資考據者。酌取以備叅稽。一。卷案宜詳察。請勅下在京大小各衙門。令各該堂官。選賢能司官。專管清釐案卷。協同各本司官員。將所隸應入會典事件。分類編年備細

實錄卷百全

五

造送。毋漏。其年久蠹爛遺失者。移詢各衙門。及外省造送。一。纂修官務在得人。請令總裁官分派各衙門人數。行文咨取。該堂官公同簡選。務擇學問淹博熟諳掌故之員。擬定正陪。保送到館。由總裁官列名具奏。恭候欽點。至典則之書。義取綜核。經生之學。不乏專家。並請照三禮館例。聽該總裁於進士舉貢內。確知經術湛深。長於編纂者。酌保數人具奏。一。考定更正之條。宜隨時請旨。按會典舊定

條款或文鮮參稽舛訛未免或事經臚列援
据無憑以及古今異宜諸儒異議隨時折衷
均非臣下識見所能臆斷應令該總裁官詳
敘原委聲明緣由請旨裁奪其近年續增條
件亦應按事類逐卷進呈欽定一在館辦事
宜有成規總裁官督率纂修各官每日必及
辰而入盡申而散庶幾在館辦事俱有成規
不獨勤惰易稽年限便於覈定且互相討究
可以斟酌得宜彼此觀摩亦見智能交奮從
之○賜準噶爾使臣瑪木特等緞布銀兩冠
服有差○丁酉

實錄卷三百三

六

世祖章皇帝忌辰遣官祭

孝陵○

上詣

奉先殿行禮○以左僉都御史嵇璜為大理寺
卿翰林院侍讀張泰開為左僉都御史○特授
庶吉士張若澄為編修○戊戌諭江南海州沭
陽贛榆等處積欠帶徵銀兩已經特恩豁免其

隨正耗羨例應仍舊徵輸但念該地方積歉
之餘元氣未復若仍追節年零星耗羨民力
未免拮据著將海州及沭陽贛榆二縣並坐
落海贛二州縣之板浦徐瀆中正莞瀆臨洪
興莊等六鹽場乾隆十年以前民竈舊欠所
有應徵耗羨通行豁免以惠災黎○是日起
上以祈穀於

上帝齋戒三日○己亥享

太廟遣履親王允禔恭代行禮○遣官祭

實錄卷三百三

七

太歲之神○諭福建閩縣地丁項內有先賢
二十三祠祭產田糧一項本朝初年優免後
於雍正五年該地方官清查溢額錢糧之時
誤將此項作為溢額報解歸公現在追徵充
餉朕思祠宇祭產供俎豆牲牷之用歷來優
免以卹奉祠後裔原屬國家曠典著該督撫
查明豁免永著為例所有此項歷年未完積
欠一併蠲除○又諭江南河道總督周學健
著照伊品級賞給三代封典○諭軍機大臣

等前據顧琮奏請於高堰廳屬之老隄頭山圩廳屬之高澗壩以南及徐家灣周橋等處各添設護隄救生壩朕曾降旨令其妥協辦理今聞設壩與救生樁不同不過為商賈聚貨之便從前救生樁係動公項所費僅千餘金今各壩工程約費銀二萬餘兩將來每年歲修復需銀一萬餘兩徒費帑項於民未見有益又無關於河防爾等可會同周學健議奏尋議洪湖既有救生樁可備拯援不必設壩糜費臣等酌議已建之救生壩四座未便棄置但非關係河防與應動歲修者有間應令河臣察看如係應修之工仍令廳員看守遇風浪漂損每年於河庫存公銀內動用粘補不必列入歲修若無關緊要者不必修補從之（庚子）

上詣

南郊齋宮齋宿諭軍機大臣等據陳大受奏蘇祿國遣番官齋表謝恩摺內稱馬燦陳榮均係內地船戶水手於乾隆五年前往蘇祿

即於乾隆七年馬燦更名馬光明充為貢使陳榮更名陳朝盛充為通事入貢而此次馬光明復齋表謝恩若輩影射滋事之處內地似宜量為裁制等語定例商人往外洋諸番貿易遲至三年以外始歸者將商人舵水人等勒還原籍永遠不許復出外洋例禁甚嚴今馬燦等乃潛住蘇祿往來內地不但如陳大受所稱影射滋事等弊且以內地民人為外番充作貢使尤有關於國體可傳諭陳大受令其知情事之輕重留心籌辦仍將辦理之處具摺奏聞尋覆奏蘇祿國原咨搬搶銀貨一案查明馬光明向在呂宋逋欠番債曾累番目黃佔代賠遂在蘇祿貢充貢使圖至內地避債兼得乘機索詐至乾隆九年內蘇祿貢船回國阻風呂宋地方黃佔回明該國王將船中貨物扣留抵欠并訪聞馬光明在呂宋蘇祿生事之處甚多應逐細根究至該犯稔知定例不許在洋

逗遛二三年內必絡繹來往。尤宜杜其根株。現密飭廈門地方官。遴選熟習番語之人。作為通事。伴送該番回國。並令布政使高山咨明該國王。告以馬光明陳朝盛。近因在內地犯事留審。與該國無涉。似為妥便。得旨。如此辦理。甚妥。馬光明當重處以示警。○辛丑。祈穀於

上帝。

上親詣行禮。○詣

皇太后宮問安。

○壬寅。諭上年直隸秋成豐稔。惟薊州寶坻寧河豐潤玉田五處低田。間有被水淹漫者。已經加恩撫卹。分別給賑。惟是去年積水未涸之區。不能及時佈種。今東作方興。正可補種春麥。著該督那蘇圖。確查無力人戶。按畝酌借倉穀。俾貧民得以易換麥種。早事耕作。秋成免息還倉。該部遵諭速行。○大學士等議。覆陞任福建巡撫周學健奏稱。閩省沿海貧民生計維艱。因思上竿塘下

竿塘西洋嶼東獅白畎東洛西洛大嵒山小嵒山烽火衙浮鷹山四礪山七星嶼南關山等十四島。綿延數百里。環繞於閩縣長樂連江羅源霞浦寧德福鼎各界。其間可耕之地甚多。若一經開闢。數邑貧民。皆得藉以謀生。向慮有洋盜哨聚。因加禁止。今海宇澄清。遊巡絡繹。竿塘等島。更屬逼近內地。應請一併弛禁。令殷實士民。前往開闢等語。係為貧民生計起見。但事關海防。必須審度形勢。籌酌盡善。應飭交該省督撫。再加查勘。定議從之。○巴林固山貝子札什那木塔爾故。予祭如例。○癸卯。

上詣

大高殿行禮。○奉

皇太后居長春仙館。○詣

安佑宮行禮。○幸圓明園。○諭據大學士公管川陝總督事慶復奏。上年十二月十八日。更餘時。固原州突有兵民。城內外勾通。打開守門兵丁。奪門

而入搶掠當舖。該將等手刃拒捕二人。先後拏獲四十餘名。查起釁根由。始自營兵。現在次第根究等語。固原乃提督駐劄重地。兵民夤緣肆掠。大干法紀。應嚴處不法之徒。以靖地方。著大學士總督慶復。巡撫黃廷桂。即速前往。會同嚴審定擬。一面具題。一面將為首重犯。即行正法。以懲兇惡。○又諭。固原兵民糾眾夤緣。夜搶掠當舖一案。大干法紀。提督許仕盛。駐劄本城。今督撫皆經奏到。許仕盛雖經次日奏到。其中殊有遁詞。已另有旨諭矣。再慶復聞報。即差守備王正統。星速前往。會同該州文武。撫馭彈壓。并稱將來親往鞠審。黃廷桂雖無統轄營弁專責。然伊係旗員。且曾任總督。現為本省巡撫。似此兵民不法之事。即應親身前往彈壓。乃淡漠視之。並不親行。僅委知府辦理。可謂不知輕重之甚。即此可知。不勝總督。而近日觀其設施。殊覺熱中於此。亦可謂不知分量矣。著傳旨嚴行申飭。

○軍機大臣等會同陞任福建巡撫周學健。議奏。臣周學健前請令漳泉二府商民。給照赴臺買運。部議未准。無非慎重海防之意。但由臺達廈。水程僅十餘更。中隔澎湖一島。亦兵民聚居之所。臺雖海外。與內地呼吸相通。較之江浙遠隔大洋。情形迥別。況江浙閩省往來販洋之艘。皆屬巨艦。到處可往。若臺廈商船。梁頭不過一丈以內。總在臺廈往來渡載。並不能越洋販運。查漳泉二府商人。赴臺貿穀。既不致透越外洋。自於民食有益。應如所奏。嗣後如遇臺郡豐稔之年。應聽漳泉二府商賈。及在臺之漳泉二府民人。自十月起。至次年二月底止。於地方官處。請照買運。倘買運過多。臺郡米穀昂貴。與臺郡並非豐稔之年。仍令該道府等詳報停止。如有夾帶影射。逗遛私往等弊。不時嚴查。其應作何給照盤驗。關會之處。請勅交該督撫等詳悉妥議。章程辦理。從之。○軍機大臣等議。覆陞任福建

巡撫周學健奏稱閩省大小戰船共三百一十二隻。內趕繒大船約十分之六。雙蓬等小船約十分之四。大船修造價貼比小船多數倍。槓棋桅舵均加長濶。桅木購買尤艱。又船身轉折不靈。終歲停泊。不若雙蓬船等船。物料既省。駕駛更速。且閩粵水師同屬大洋。粵省每戰船十隻。趕繒大船不過配用一二隻。餘俱艍船拖風等船。與閩省雙蓬船丈尺相符。請勅下督撫提督將通省原配趕繒大

軍機處存案

一百

船。照粵省酌量留配。其多餘巨艦。即於屆期拆造各船內。漸次扣除。改造雙蓬船等船。不特帑項減省。材木亦不耗費。應如所請。其應作何扣除。改造分配兵丁之處。交該督撫提督妥議得旨。依議速行。○甲辰。

上詣長春仙館問

皇太后安。○御奉三無私殿。賜宗室王公等宴。○諭軍機大臣等。上年十二月十八日。固原兵丁糾眾搶掠當舖。提督許仕盛

駐劄本城。督撫皆經奏到。許仕盛奏摺於次

日始到。且摺中殊有遁詞。先據慶復所奏。兵丁口稱操演過嚴。糧餉遲發。有中營兵丁童五曜等起意糾眾搶掠。並非兵民相合等語。許仕盛摺中並不提及一字。明係袒護兵丁。希圖脫卸。已過至於悍兵擊碎提督衙門柵欄。是其平日不能服眾。以致眾心全無顧忌。及至臨時。又但委遊擊查拏。並不親身彈壓。假如臨陣遇敵。亦若此退縮可乎。此等軟弱畏蕙之狀。何以膺重寄而靖巖疆。伊以為到任未久。意在推卸。獨不思身為提督。安得以新任為詞。況伊於上年五月內到任。已蒞任半載有餘。果其約束有方。何致猖獗若此。而其摺中全無引咎之詞。可謂恬不知恥。以上情節。著傳諭慶復令其詢問許仕盛。一一回奏。此案朕已降旨。令慶復前往會同審訊。定擬案內不法等犯。雖係烏合之眾。已經擒拏解散。不足為意。但現在鞫審。伊等眷屬族黨。

軍機處存案

五

俱在本地無知之衆。畏罪心切。或恐抗拒滋事。於國體有碍。亦當留心防範。以備不虞。可密行傳諭。慶復酌量帶領督標兵丁一二百人。以資彈壓。再西陲為邊疆重鎮。兵力向稱驍勁。但習尚驕悍。乾隆四年。涼州兵丁因借糧鼓譟。後經從重究處完結。此番竟有提督駐劄之地。肆行不法。惡習如此。慶復當時加留意。善為調劑整頓。以化積弊。使兵丁等各知謹守法度。毋蹈罪戾。尋據慶復奏遵旨詢問許仕盛。據稱前奏固原兵丁糾衆搶掠一案。因倉皇急遽。語多不經情形。既未詳陳。齎摺又復遲到。種種罪戾。實無可遁得旨。許仕盛著嚴加議處。具奏該部知道。○乙巳

上詣

安佑宮行禮。○奉

皇太后幸同樂園。侍早晚膳。至甲寅。皆如之。○御正大光明殿。賜朝正外藩等宴。召科爾沁和碩親王阿拉布坦和碩達爾漢親王和碩額駙羅卜

藏衮布。貝子品級和碩額駙達爾瑪達都喀爾喀和碩親王德沁扎布。鎮國公格木丕勒。厄魯特多羅郡王和碩額駙色卜騰旺布。固山貝子散都布。教漢多羅貝勒固山額駙羅卜藏。鄂爾多斯固山貝子齊旺班珠爾。喀喇沁固山貝子多羅額駙瑚圖靈阿。輔國公敏珠爾喇布坦。烏珠穆沁輔國公德里克旺舒克等。至御座前。賜酒成禮。○順天府行鄉飲酒禮。

大清高宗法天隆運至誠先覺體元立極敷文奮武孝慈神聖純皇帝實錄卷之二百八十二

大清高宗法天隆運至誠先覺體元立極敷文奮武孝慈神聖純皇帝實錄卷之二百八十三

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

教修

乾隆十二年丁卯正月丁未諭山東被災州

平定縣志卷之三

縣朕已疊次施恩加展賑卹月分即春月青黃不接之時災黎均得餬口惟是被災六分之次貧上年雖薄有收穫而春來勢漸艱窘但格於定例不在加賑之內不無向隅之苦著將壽光樂安博興金鄉魚臺汶上濟寧東平郟城等九州縣內被災六分之次貧加恩給賑一月以資接濟○諭軍機大臣等朕因邇來各省武備不能及時整飭恐其漸致廢弛降旨令統兵之員留心訓練以肅戎行惟

在督提諸臣督率營弁實力奉行振作士氣

以收實效而近聞營員操演又有煩急瑣碎

之弊即如排日輪操果能實在演習使弓馬

熟練技勇優嫻而衆兵無守候之勞方於軍

政實有裨益乃衆兵黎明齊集營員已牌方

至營員已牌方至而將鎮又過午乃出又不

過較射三五回演鎗一兩遍以應故事兵丁

守候每至竟日總因提鎮大員養尊處優與

士卒情勢隔絕下至副參遊守亦以官長自

平定縣志卷之三

居頤指氣使甚至千把甫經拔補即踞坐自

如凌傲隊伍以致衆情含怨究於訓練之方

毫無實際獨不思兵當操演鎮將寧不當身

先董率乎古良將身先士卒不但臨陣為然

必其平日與同甘苦將視兵如子弟兵視將

如父兄始能心腹相孚臂指相使兵雖愚魯

亦各有人心彼親見將弁身在行間率先操

演豈有不感發天良反生怨望者至穿插耳

箭惟以懲創盜竊或軍營之內違犯號令則

藉以警衆。其隨常操演。何至用此重罰。此皆誤以苛急為整肅。而不知體恤鼓舞之道。固結兵心於平日。非訓練整飭之善術也。可傳諭各省督撫提臣。善體朕諭。務使寬嚴得宜。於整飭之中。寓體恤之意。俾衆心悅服。踴躍從事。但勿因有此旨。因循怠玩。以啟懈弛之漸。若張示曉諭。則無知兵丁。意有所恃。益長傲上之心。不服管轄。非惟於營伍無益。其於體制所損不小。該督撫提臣。可密行指示各營員。令其共知儆惕。身先士卒。體恤衆情。實心整頓訓練。毋煩苛而斂怨。毋驕蹇而憚勞。所期武備修明。以收禦侮折衝之實用。○又諭曰。署山東巡撫方觀承。勸輸義倉一摺。據奏北省尤稱易辦等語。義倉一事。直隸山東。現在議行。其陝西山西河南等省。應否仿照之處。著將此摺寄與該督撫閱看。令其查明覆奏。○戊申。命湖北襄陽鎮總兵吳士葵來京候旨。以京口中營副將齊大勇為襄陽鎮

總兵。○己酉。諭上年山東被水地方。已於例賑之外。分別加賑。今朕思萊州府屬之平度昌邑濰縣高密西州縣。被災雖止六七分不等。然當此東作方興。一經停賑。恐災黎或致失所。著將平度等四州縣。無論極次貧民。再加賑一個月。於二月內給發。以資接濟。該部即遵諭行。○又諭上年進剿。瞻對滿漢官兵。所有借給俸餉銀兩。回營之日。例應坐扣還項。朕念官兵人等。遠役勞苦。且能奮勇克捷。應加恩格外。以示獎勵。此內除革職治罪等員。不准寬免外。其餘滿漢大小官兵。借支銀兩。概行免其坐扣。俾得從容養贍家口。以昭優恤。戎行之意。○庚戌。諭國家承平日久。各省武備。恐致廢弛。屢經降旨訓飭。未見實力整頓。是以上年特令兵部定議。分年分省。請旨差派大臣。前往閱看。嗣經該部分別議定。近聞各省。知有閱兵之舉。無一事不加緊豫備。即如操演兵丁。應於常時按期練習。使各

兵技藝嫻熟。今則責效於倉猝。畧無休息。不但非愛養士卒之道。於此愈見其平日之廢弛矣。又如旗幟甲仗號衣等類。以分隊伍以壯軍威。原係營制所必需。向來動支官項製辦。自當按數貯營。以備操演之用。今則於閱兵之時。始行修整豫備。甚至兵丁衣服等項。亦必欲一色鮮明。令其勉力措置。此皆徒務外觀。不求實際。比比皆然。是營員不以本務為事。惟留意於末節。其有項可支者。既致虛糜。無項可動者。勢必有派擾坐扣等弊。在將弁不知大體。止圖掩飾於目前。而該管大臣。又以為如此豫備。可以了此番之查驗。而不顧貽累兵丁於日後。豈朕振勵戎行體恤士卒之本意乎。且定議欽差大臣閱看。亦以驗其技勇之生熟。兵數之虛實。糧馬之虧盈。以覘該督撫提鎮平時訓練整飭之實政。非止於旗幟甲仗衣服之間。取其美觀而已也。況輪年應閱省分。或由京差大臣前往。或令該

省督撫閱看。抑或不必查閱。總在臨期裁奪。各該管督撫提鎮。當善體朕意。統率屬員。從容整飭。為之以漸。而要之以久。不當若此急遽粉飾。務末而忘其本。是不但無益於營伍。且更有累於兵丁也。著通行曉諭各省督撫提鎮等。仰體朕心。恪遵朕訓。將向來積弊。悉加祛除。則訓練有實效。考驗非具文。戎政可望煥然改觀矣。○甲寅諭。今歲應查看直隸山西陝西甘肅四川等五省兵丁。該部遵例奏請。朕思直隸地方。車駕不時臨幸。常有親加校閱之處。山西亦係上年西巡之地。營伍情形。朕已知悉。其四川一省。則瞻對用兵。甫經凱旋。今年俱可停其查看。陝西為大學士公慶復駐劄省分。平時自加整頓。安西設駐塞外。提督李繩武。亦係朕特簡以禦外夷者。均可不必簡閱。惟甘肅地處極邊。今大學士慶復。現在平涼會審案件。可令其就便將甘肅兵丁查閱。○又諭。固原提標不法兵丁。糾

衆搶刦。事起倉猝。遊擊任舉單騎直前。奮勇救護。擒獲多人。方得解散。任舉甚屬可嘉。中營叅將馮天祿。現經糾叅解任。所遺叅將員缺。即著任舉補授。以旌勤勞。○諭軍機大臣等。固原兵丁不法一案。已命慶復前往。會同巡撫黃廷桂查審。所有首惡及實在在事之悍卒。自應按法懲處。不可稍有寬縱。以長刁風。但亦不可過於張皇。株連滋擾。臨時斟酌輕重。寬嚴得宜。善為辦理。并傳諭慶復。令其周閱該處兵民情形。體察生事緣由。或尚有漏網者。亦應一體辦理。并嗣後如何整頓。方可永除驕悍積習。肅清營伍。以寧謐邊疆。為善後長策。○又諭。今年例應欽差大臣查閱陝甘省營伍軍裝。慶復現有查審固原兵丁之案。即著慶復前往甘省查閱。但朕聞慶復前此查邊之時。地方盛為供應。雖屬體統如此。而家人隨役。亦未能約束謹嚴。此番閱看營伍地方。或仍前供應。亦未可知。大學士係

朕親信之人。既有所聞。是以寄諭令其知之。俾得留心約束。必使輿情允愜。浮議畧無。方副朕意也。○又諭。朕聞從前慶復至甘省查邊之時。黃廷桂授意所屬地方。供應繁盛。朕風聞若此。黃廷桂若以此逢迎總督。趨承取悅。殊屬卑鄙。如其意有所圖。懷私用術。則此心益不可問。今又有旨令慶復查閱甘省兵丁。可將朕前所訪聞。傳諭黃廷桂知之。○命翰林院侍讀學士董邦達。在南書房行走。○乙卯。諭軍機大臣等。去冬陶正中奏報地方雪澤情形。一摺。據稱目今雪澤稍愆。有無妨礙生發之處。現在飛飭確查。容俟覆到日。據實陳奏等語。是以朕如此批示。今陶正中奏摺內。不敘入所奏緣由。而但述硃批諭旨。一似雪澤稍愆之語。朕所不樂聞。而有所隱諱者。豈朕意耶。今又奏稱雖少雪澤。俱屬無礙。專望春仲早得雨雪。可冀有收等語。是又有回護粉飾之意。看此朕轉為晉省軫念矣。可

傳諭愛必達。令伊將陶正中上年奏摺取閱。便知朕之本意也。並令伊留心體察。倘所屬有米價稍昂。窮民有需接濟之處。如平糶倉穀借給籽種等事。酌量奏請施行。惟期料理妥協。於閭閻實有裨益。以副朕愛養黎元至意。○賜準噶爾台吉策妄多爾濟那木扎勒敕書。詔曰。閱爾奏書。爾能仰體朕加恩之意。諸事俱遵旨辦理。如此恭順。必能安爾屬下。利爾部落。朕深為嘉悅。所奏往西藏念經人等。有俟貿易後。始往念經。有即將貨物帶往念經者。俱懇在哈集爾得卜特爾過冬。俟貿易人由東科爾回。會齊同往之處。已俱照所請行。至爾使臣瑪木特口奏。念經人需用牲畜。祈降旨頗羅鼐令其協助。東科爾貿易時。俱令以銀兩交易等語。頗羅鼐雖受朕封號。究係遠方部落之人。非內地臣民可比。其資助與否。朕未便降旨。至需用馬匹口糧。朕自加恩照前賞給。即頗羅鼐此次或多為資助。

亦未可定。至貿易人等銀貨交易。止可各從其便。不便以官法抑勒。但爾既特行奏請。亦非甚難行之事。現在照看爾使臣前往。仍派侍郎玉保。已令玉保與爾使會商計議而行。爾使回時。自能詳告也。嗣後爾宜益加敬慎。永歸和好。以體朕廣教安民之至意。特敕付來使齋回。隨敕賜各色緞十端。粧緞十端。玻璃瑤瑯磁器十八事。○以直隸天津道吳謙鈺為廣東按察使。○丙辰。諭各處牌樓文字模糊。俱已殘舊。著交工部應有粘修處陸續修理。○諭軍機大臣等。湖廣通省營伍廢弛。朕已降旨。令總督塞楞額極力整頓。近聞該省墩臺塘汛。種種懈弛。草率不稱。觀瞻且有守望無人之處。不但如雲貴等省整齊嚴密。即較之山東河南直隸。亦遠不逮。自彼經過之人。在朕前陳奏。不一而足。必係實在情形如此。非力為整飭。何以肅營伍而嚴守禦。可傳諭塞楞額。通飭各營將弁。實力辦理。痛

改積習。務使武備精強。戎行整肅。一切分防戍守。時時嚴密稽查。向來督撫。但於新任下車。畧為簡閱。以應整飭虛文。日久仍前懈怠。或於初奉諭旨。通行曉示。便為業已奉行。不問是否實在遵循。地方有無實效。將弁習於怠玩。縱弛營伍。安得不廢。塞枵額當實心漸次經理。不可急遽一時。以求速效。但當時時留心訓飭。勿致往來行旅。嘖有煩言。以副朕念。○丁巳。

上詣長春仙館。問

皇太后安。○吏部議准。調任江南河道總督顧琮等疏稱。安豐司巡檢一缺。管理劉白兩場范隄。并巡鹽捕盜。在未設東臺廳以前。向屬揚糧廳管轄。自乾隆元年。設東臺廳。專管河道隄工。及稽察私梟。緝捕賊匪。安豐司巡檢所管之事。悉隸東臺廳所轄。自應歸東臺廳督率辦理。從之。○戊午。

上詣長春仙館。問

皇太后安。○諭。二月初八日。朕前往馬蘭峪。恭謁

祖陵。所有應行事宜。著各衙門照例豫備。○諭。軍機大臣等。據直督那蘇圖奏稱。東省貧民。於歲暮米糧艱食之際。攜眷出境覓食。現在設局留養。如有願回就賑者。即令資送回籍等語。上年山東河南二省。俱有被水之州縣。冬間雪澤又少。難於播種秋麥。此時東作方興。彼地情形。未知若何。朕心軫念。著即傳諭兩省巡撫。令其將被災各處。細心體察。如散賑之外。或應發倉平糶。或應借給籽種。如有可趕種春麥之處。及時播種。務期悉心安插。善為勸諭。俾窮黎毋致輕去其鄉。其覓食於外者。亦著巡撫悉心安辦。○刑部等衙門議覆。署山西巡撫班第疏稱。崑都崙台吉勞章羅卜薩等。偷竊厄爾得呢馬匹一案。將該台吉及夥同行竊人等。分別革職枷責。該扎薩克王阿拉布坦多爾濟。照例罰俸半年。得旨。

依議。此案扎薩克王阿拉布坦多爾濟。因約束疎忽。議以罰郡王俸半年。但在內王公等。凡於所兼任內事件。俱罰本任俸。至於蒙古扎薩克王公等。於所管旗務。即罰王公之俸。則內外辦理。既不畫一。而於伊等生計。亦屬無益。阿拉布坦多爾濟。罰郡王俸之處。著加恩寬免。照在京之例。對伊扎薩克品級。罰一品俸半年。嗣後蒙古扎薩克王公等。遇有任內罰俸案件。俱照此辦理。其不管扎薩克協理旗務之王公等。俱著罰二品俸。將此永著為例。○已未。

上詣長春仙館。問

皇太后安。○奉

皇太后還宮。○詣

皇太后宮問安。○

上還宮。○庚申。

上詣

皇太后宮問安。○諭。朕此次恭謁

祖陵。著莊親王。和親王。大學士。訥親。張廷玉。在

京總理事務。○命戶部右侍郎雅爾圖。兼管

太醫院事務。○是月。直隸總督那蘇圖。奏。遵

旨勸捐義倉。紳民踴躍。據各屬報稱。共捐雜

糧粟穀一十一萬二千餘石。分別題請獎勵

外。敬陳規條。一。義倉宜分建四鄉。直省社倉。

分設鄉鎮者。十之一二。附貯城內常平倉者。

十之七八。今新捐義倉。穀數既多。自應四鄉

建倉。使本處捐穀之人。春借秋還。民情利便。

查社倉每石收息一斗。請將息穀先儘建倉。

本年尚未收息穀。飭令動項鳩工。俟息穀歸

款。其收捐不及二千石者。令分鄉賃房收貯。

陸續動支息穀建倉。一。民人按捐分別獎勵。

旗戶宜一體收捐給獎。義穀與社穀內。凡紳

衿士庶。捐十石者。給以花紅。三十石五十石

以上者。獎以扁額。二百石者。題給九品頂帶。

三百石者。給八品頂帶。四百石以上者。給七

品頂帶。捐雜糧者。亦照數畫一獎勵。又近京

五百里內旗人有願在現住有產地方捐穀者一體報捐監生經部議准在案今時和歲稔旗戶踴躍捐輸給獎亦宜畫一除家奴及開戶人等外其餘照民人例勸獎一勸捐宜每歲豐收舉行仍請雜糧並收隨時易穀旗民近依畿輔深沐恩施好義急公倍於他省捐穀皆出至誠據州縣報到已收一十一萬餘石以一歲勸捐而言數不為少以各貯各境而論事應豫籌請嗣後秋收豐稔悉令照此次捐輸至民間種植粟穀居其二三高梁米豆居其七八應聽雜糧並捐每逢春借秋收許願借雜糧之戶按照糧價易穀交還照穀數加息一慎選倉正副經管并酌定州縣盤查交代各社倉俱有倉正倉副司理出納限年更替期滿給獎請按各州縣每鄉穀數多寡五百石以內者設倉正一名一千石以外者添倉副一名今公舉端謹殷實者充至該管州縣官應每歲於春借時聽倉正副確

查無力農民報縣借給秋收後於十二月底逐鄉同倉正副盤查一次取結加結詳報道府其因事交代者接任官照常平倉穀一體盤收倉正副年滿令更替之人按數盤收出口糧折耗宜酌銷息穀以免賠累米糧之出納折耗既所不免倉正副之經理費用又所必需請嗣後有穀一百石者豐年加息十石以一石為倉正副紙張飯食以一石為倉穀折耗以一石為賃房之需其餘七石存作建倉之用俟倉廩建立息穀源源積貯於乾隆丁卯年為始畫一遵循酌定本鄉借穀人戶先須分別良莠義倉原以惠濟本地良農必須佃耕田土實有恒業之人方准借給若游手無藉者概不准借非僅慮有借無還亦所以勸務本而成游惰倉長亦免虧賠得旨所奏俱悉實力妥為之○兩江總督協辦河務尹繼善奏太湖六桅船由來已久現在查點吳縣陽湖無錫宜興共船一百八隻

每船舵工水手及眷屬等。並無來路不明之人。向在蘇常湖州一帶捕魚。各船均在本縣編號印烙給票。兼設漁船總甲小甲。共相稽察。最稱安分。查太湖跨越兩省。最易藏奸。時宜防範。湖中產魚甚薄。扁舟不能廣捕。六桅船隨風捕魚。資生即同恒產。若將伊等子孫世守之業。勒令拆卸。驅之平陸。使一旦失所。不但有拂輿情。並妨民利。應請以現在一百八隻為限。此後不許再增。將各船另行挨次

編號烙印給照。開造姓名。令漁總保甲互相稽察。地方文武。不時查點。如私增船隻。及人數不符。或容留外來面生可疑之人。將船戶總甲一併治罪。得旨。覽奏俱悉。有治人無治法。惟在汝等實力行之耳。○署江南河道總督漕運總督顧琮奏。淮徐河務道高晉。丁母憂回旗。其印務暫委河庫道姚廷棟兼署。查淮徐道員缺緊要。請即簡放。抑或俟高晉百日後。仍令赴南任事。得旨。此奏意不可解。官

員丁憂。自有定例。汝若以高晉為能。一時不得其人。奏請在任守制。尚可。豈有如此候旨之理。識見卑鄙。汝之素也。今則愚而詐矣。且此事亦非汝所應奏。新河臣到任在即。汝何不俟之。○湖北巡撫陳宏謀奏。湖北冬春連得雨雪。夏收可望豐稔。各屬米價平減。上年被水等處。目下正在加賑。小民不致失所。再湖北夙號水鄉。全仗隄工捍衛。通省有隄工者。共二十九州縣衛所。每歲民間出夫合力

修築。已飭經理河隄各官。及時查勘。督率興工。期於一律堅固。至楚民健訟。若舊案不為速結。則新案日增。現在徹底查催。得旨。覽奏俱悉。行之以實。而要之以久。朕所素訓。百爾者也。汝其勉之。慶復所叅汝徇庇屬員之事。汝亦有辯乎。今雖從寬留任。然汝不宜自滿。諸事去積習而勉誠實也可。○湖南巡撫楊錫紱奏。查湖南協解雲南本年分銅本銀二十三萬兩。委辰州通判王敦賁等管解。至常

德府屬龍陽縣途次。被夫役偷去一鞘。現據該縣申報解員王敷賁。將所失鞘銀如數賠足。臣當即飛飭該縣。懸賞選捕。上緊嚴拏。毋使漏網。在事文武各員。不知小心護解。實由臣率屬緝匪不能盡職之故。不勝惶悚。得旨知道了。豈惟此事。汝諸凡皆覺好名姑息。至於所嚴者。又瑣碎可以不嚴之事。以後當恒以為戒。○河南巡撫碩色奏。開歸陳汝許所屬。上年被水災。黎疊蒙賑濟。現俱得所。惟被災五六分之戶。正月以後。向不加賑。口食拮据。查糶借倉糧。例於二三月間舉行。但歉收之地。糧價增昂。應請於正月下旬。糶借兼行。至歸德所屬。連年被水。尤與偶遇偏災者不同。應請以平糶穀價。借給貧民。租購牛隻籽粒。乘時播種。俟秋收徵還原借銀兩。買穀補倉得旨。所辦頗妥。督率屬員實力為之。○署山東巡撫直隸布政使方觀承奏。東省各屬上年被水。米穀缺乏。即有收之處。亦因商販

價增。查現在糧價。較價平之年。均屬昂貴。所有平糶。非尋常出陳易新可比。應請將市價每石六七錢以上至八錢者。酌減一錢。其在八錢以上至一兩者。統以七錢出糶。向後若再增長。均照時價酌減三錢。再上年截留漕糧。尚有賑剩米。應即酌派各屬領回。先儘此項減糶。如有乏食農民。請借口糧者。並准借給。秋後按一米二穀。免息還倉。再東省開糶多在二月下旬。災區貧民待食甚殷。應請於二月初開糶。得旨甚妥。令屬員等實力奉行可也。○又奏。據沂州府蘭山縣稟稱。該縣未被災之北鄉。因被災之南鄉。准借倉糧。聚集多人。於正月初四日赴縣借領。又蜂擁至知府副將衙門。經該縣曉諭。始行解散。臣復訪聞。是日有壘塞縣署儀門之事。又該縣於十三日拏獲九人。有南莊民張懷敬。豫伏多人。打傷差役。均未據該府縣報到。現在飭司道嚴查。速拏首從要犯審辦。其文武各官不能

彈壓。並有無諱飾之處。查明叅處。得旨。覽奏俱悉。未據報到。非諱飾而何。交阿里衮嚴查辦理。○又奏。安山湖地分撥貧民認墾升科一案。行司轉飭東平州詳查。據稱安山湖地面寬濶低窪。運河水漲。則由通湖開分減入湖。以保運道。各村瀝水。亦均藉湖為歸宿。以全民田。乾隆十一年夏秋間。通湖皆水。現猶停蓄。大概湖地必須雨水調勻。秋禾始望有收。惟二麥佈種於已涸之後。收穫於未發之前。小民皆願認墾。臣查湖田多屬沃壤。而麥收足抵秋禾。每畝額徵銀二三分。又至輕減。故雖有水患。民間亦願升科。但升科之後。官徵民納。例重秋收。如秋禾被水。或並未播種。則請蠲。並將請賑。且或連年積水。河工需地。行水。又應請豁。徒致紛煩。兼多妨礙。竊思安山。南旺二湖。同為運河洩水之地。南旺湖業經奏准報墾徵租。安山湖似應一例辦理。將升科改為徵租。並照直隸淀泊河灘地畝分

季徵收之法。其專種一季夏麥者。於麥後徵收。兼種秋禾者。分麥禾兩季徵收。地方官解交運河道庫。以為河工之用。如遇水淹。查明免其輸租。不得請賑。貧民每戶領地二十畝。禁私相典賣。則租額毫無減於升科。而除去升科名色。官地民種。應徵應免。可以隨宜辦理。且富戶無從兼併。貧民長霑恩澤。得旨。所見頗是。知道了。○管川陝總督大學士公慶復。四川巡撫紀山奏。訪得川東有華銀一山。內產硝磺。綿亘三百餘里。界聯重慶府之巴縣。合州。順慶府之岳池。隣水。深山密菁。人跡罕到。竟有匪棍聚眾滋事。密飭道府查拏。現據隣水縣將巨魁龔瘋子。曹蜂子。彭老五。陳矮子。弋獲。究出招集匪類。偷挖硝磺。并奸盜行兇等事。又獲夥犯張仕俸等十數名。現在嚴審究擬。餘黨聞風逃散。將茅棚盡行燒毀。檄飭文武不時游巡。并飭道府查勘山勢。應否於要處移駐員弁彈壓稽查。俟會勘妥議。

具奏得旨。是此皆安靜地方之要圖。所宜妥辦者也。○四川布政使李如蘭奏。川省向例買儲倉穀。每石額定價銀三錢。奉行已久。惟近來戶口日增。各省流寓民人。不下百倍。若仍繩以原定之價。在恂謹州縣。無力賠墊。勢必貽誤倉儲。即明幹有司。設法急公。難保無勒買派累。請嗣後川省應買倉穀。許按照各地方秋成時價。責令該管道府委員監糶。取具各結。據實報銷。如有以少報多。侵漁扣剋情弊。嚴行叅究。得旨。此奏所謂因噎廢食也。但知姑息屬員。而川省米價之日增。必由於此矣。豈可行之。

大清高宗法天隆運至誠先覺體元立極敷文奮武孝慈神聖純皇帝實錄卷之二百八十三

大清高宗法天隆運至誠先覺體元立極敷文奮武孝慈神聖純皇帝實錄卷之二百八十四

監修總裁官經筵講官太子太傅文淵閣大學士文淵閣領閣事領侍衛內大臣隆察爾泰 上諭事件處管理

吏部理藩院事務正黃旗滿洲副都統世襲騎都尉軍功加七級隨帶加一級尋常加二級軍功紀錄一次臣慶桂

總兵官經筵講官太子太傅文學士文淵閣領閣事稽察欽奉 上諭事件處管理刑部戶部三處事務

世襲騎都尉軍功加十九級隨帶加二級又加二級臣董誥內大臣戶部尚書錢琳滿洲副都統軍功紀錄五次

尋常紀錄十四次臣德斌經筵講官太子少保工部尚書紀祿六次臣曹振鏞等奉

敕修

乾隆十二年丁卯二月辛酉朔

上詣

皇太后宮問安。○諭吉林地方上年雨澤缺少下霜太早。是以秋成歉薄。該地方屯丁應交穀石。若仍令其照舊交納。伊等生計未免不能接濟。著施恩將應交穀石概行豁免。以示朕軫恤旗人至意。該部即遵諭咨行該將軍遵照辦理。○吏部等部議准大學士管川陝總督公慶復奏稱。川省咽喉一項。實為作惡之根。其地山水交錯。到處可通。各省匪類。最

易潛藏。非立賞罰。地方官必不盡心緝捕。請嗣後文武各官有能拏獲一起查明在半年以內。照拏獲暗具例加二級。半年外功過相抵。不准議叙。如在該地方容留。已過半年。並不實力查拏。或鄰境拏獲。或別案發覺。將失察之地方官。照失察賭具例革職。文職拏獲免同城武職處分。武職拏獲亦免同城文職處分。從之。○壬戌

上詣

皇太后宮問安。○遣官祭黑龍潭

昭靈沛澤龍王之神。○諭據寧古塔將軍阿蘭泰奏稱。永吉一州。設在吉林烏拉係寧古塔將軍所轄地方。該州向隸奉天府。一應辦理旗民事務。俱申報府尹轉咨。不但稽延時日。且於辦理事件。多至掣肘。請將永吉州改設理事同知。屬寧古塔將軍管轄等語。著照該將軍所請。永吉州改設理事同知。管理該州事務。其作何裁改。一應事宜。交與該部定

議具奏尋議永吉州知州衙署應改為理事同知衙署該同知關防應擬寧古塔理事同知字樣查船廠現有理事通判一員今既將知州改設理事同知其現設理事通判應否裁汰該州現設之州同吏目學正應作何裁改刑名錢穀案件以及文武生員作何改隸之處俱令該將軍會同府尹詳議具題到日再議從之○又諭鹽山慶雲二縣地瘠民貧朕已疊次降旨令該督加意撫綏且緩帶徵年分地方官遵照辦理當可望其漸有起色但該處上年秋成雖有六七分而無地貧民尚或未免拮据今東作方興雨澤未降或應平糶倉穀以資接濟或應借給籽種以惠耕甿該督查看情形酌量奏請其現行之種樹穿井等事實心查辦務期於該地方實有裨益以副軫念尋奏鹽山慶雲二縣現種秋麥之區得雨二寸又蒙緩徵已有起色將來麥秋可望擬於清明後農務方殷之時設厰平糶

以資接濟其赤貧衰老之人借給口糧有地無力之人借給籽種至種樹穿井等事已次第辦理得旨覽奏稍慰○予故頭等侍衛食副都統俸諾納爾圖祭葬如例○癸亥以舉行仲春經筵遣官告祭

奉先殿

傳心殿

上御文華殿講官暨侍班之大學士九卿詹事等行二跪六叩禮分班入殿內序立直講官四人出就講案前行一跪三叩禮復位直講官彭維新阿克敦進講論語樊遲問仁子曰愛人問知子曰知人四句講畢

上宣御論曰問仁而曰愛人問知而曰知人此非啻示仁知之用而且括仁知之體嘗謂聖人之言大小畢賅有如海焉以瓶取之盈瓶以壘取之盈壘無不滿其量故聖門問仁者雖多夫子各告之殊而無非為仁之極則也乃樊遲以仁知兼問夫子亦惟是直指其要

曰愛人知人似乎隨所問而掲指歸於以明仁知有相成之用而已然仁知之全體大用無有過於此者大哉乾元萬物資始天地以生物為心也聖人得乾之元以為仁聖人之愛人即天地生物之心也舍生物之心不可見乾元之資始舍愛人又何能見聖人之仁哉愛人之為仁明則知人之為知可類推矣余故曰非啻示仁知之用而且括仁知之體講官暨侍班官跪聆畢興直講官錢陳羣索柱進講周易君子以教思无窮容保民无疆二句講畢

上宣御論曰易道廣大無不備體以示其象德以寓其理闡天地自然之蘊者其惟極深研幾之聖人乎試觀澤上有地臨之象也悅以強教順以含容臨之理也具其象而理或乖玩辭者其何所從焉澤上有地人咸知其為臨之象矣而因悅之教與順之容更識臨之理教而不養操切之政也養而不教姑息之

為也從古盡臨之義者舍是其何以為治民之急務哉且也教與養亦相資而不可離者是故無包荒之量則振德之心究不能至誠無斁也鮮納汙之德則虛受之懷究不能廣大無限也人第知教養之宜並行而不知教正所以為養養正所以為教也有臨民之責者所宜視為一事而日勉焉勿遑也講官暨侍班官跪聆畢大學士訥親等奏曰

皇上知仁合德集千聖之大成教養兼施躋萬

方於至治心源接乎洙泗道化媲乎唐虞臣等幸侍經函親聆睿訓不勝欽服奏畢諸臣出就拜位行二跪六叩禮禮成

上還宮賜講官侍班官等宴於協和門甲子

上詣

皇太后宮問安遣官祭

先醫之神戶部議覆福建巡撫陳大受奏

稱前撫臣周學健請於臺郡採買米穀二十萬石查臺郡晚稻收成只有七分市價較定

價昂貴且該郡從前豐收之年採買不過十萬石今收成未為豐稔請先買十萬石餘俟秋成後買貯應如所請籌辦得旨依議速行

乙丑諭軍機大臣等戶部議覆陳大受奏臺郡採買米穀一摺朕已批依議速行但從前周學健曾奏臺郡採買之弊由地方官私買射利朕已降旨訓飭並令陳大受知其情弊以便妥辦臺郡採買米穀地方官向來視為利藪陳大受尚未奉到朕旨且蒞任未久

實錄卷二百八十四

十

此難於採買之說即係臺郡地方官射利之私意正周學健所指之積弊也可傳諭陳大受令其加意體察務除前弊

大學士等議覆太僕寺卿阿蘭泰等奏稱阿魯西巴爾臺地方未種地一百二十二頃係從前議給正紅旗察哈爾官兵之項據牧廠副總管呈稱原係鑲藍旗牧地且水草叢深地多鹹鹵懇留收放馬匹本翼賽爾馬克特卜克等處有水草平常不宜收放之地如數換給官兵墾

種實為兩便應如所請從之

○大學士等議覆署山東巡撫直隸布政使方觀承奏稱青州府屬瀾河上年六月內山水暴漲湧至壽光將東岸衝開一百五十丈壽濰二縣村莊民田多被淹浸鹽場大道阻隔請將決口處堵築堅固舊河沙埂悉行挑平咨河臣遴委熟諳廳員會同地方官查辦務於桃汛前完竣至博興樂安二縣未消積水應於孫家窪之東開挑引河引入淄河業令青州府前赴

實錄卷二百八十四

八

詳加相度或按段落或按土方計算並作何酌給口糧妥議辦理均應如所請得旨依議速行

○以大學士公訥親大學士伯張廷玉禮部尚書王安國兵部尚書班第充會典總裁官吏部左侍郎蔣溥戶部左侍郎傅恒兵部左侍郎舒赫德右侍郎王會汾刑部左侍郎錢陳羣充副總裁官

○丙寅諭會典一書上自郊廟朝廷行之直省州縣凡禮樂兵刑之實財賦河防之要城池郵驛之詳大綱

小紀無不并包薈萃必使制度沿革本末瞭然條貫井井方足備一代之典章垂之冊府非若詞章之僅資諷詠紀纂之但誇淹博而已今既有事重修爾總裁官其敬率纂修諸臣詳悉參考事必究其遵行令必徵其實據勿以案牘浩繁而憚於檢閱致有闕遺勿以卷帙煩重而失於糾稽益滋舛錯即如現行典制共睹共聞而紀敘非實文與事戾一經指摘不覺爽然又如往昔施行屢經詳定自

實錄卷一百一十四

九

當彙括辭旨略見源流而原議舊儀連篇並載徒為炫目反掄正文其他訛誤多端繁簡未當俱宜更正以示憲章詎宜因就草率從事再向者修書祇先呈樣本餘俟全帙告竣一併進呈既浩汗而不易披尋亦已成而難於改作未得編摩之要領豈云纂輯之良規著依明史綱目事例將稿本繕成一二卷即行陸續呈奏朕勅幾多暇將親為討論冀免傳疑而襲謬且毋玩日以曠時諸臣其敬承

之○兵部密議福建巡撫周學健奏請閩省營員迴避本省一疏得旨此所奏密議閩省營員迴避本省因周學健奏該省兵弁積習驕悍瞻徇掣肘就事論事專從閩省而言但各省營弁俱不迴避本省而獨行之於閩夫營員瞻徇掣肘之習豈惟閩省為然從前慶復亦曾奏滇省武員多用土著宜為變通可見各省情形大率相類即所稱密令該督漸次調補雖係潛移默化之道而閩省人員不無揣測疑議且於事理亦未為公當在古人官於故里臨治其鄉者史冊多有然時勢不同伊等即於民事無涉而瞻顧親情在所不免迴避之例既可行之文職何獨不可行之武臣既欲行之閩省何獨不應行之他省除千把微員照所議無庸更調外其守備以上俱應隔省補用至水師營員洋面情形雖別而操防駕駛畧同且閩粵江浙相去不遠亦應隔省調補著兵部一併另行詳悉定議具

實錄卷一百一十四

五

奏國家辦事明白正大。原無可隱諱。即使稍有闕遺。亦所為君子之過。如日月之食。人皆見之。雖密亦無能掩。至於事當詳慎。自有不可不為謹密之處。究之密於前而不能不明。白宣布於後。是以前降旨令部院堂官將密議事件。如何刪節行文。分晰定議。看來事經交部。勢即不能甚密。且機務繁多。章程難於賅括。而無知之輩。不知密議自屬向來所有。一似新設科條。反以滋其疑議。殊未妥協。朕思軍機處係機密之地。所交密議章奏。本無宣洩。其應交該部密議者。嗣後俱交軍機處存記檔案。交發部議。其奏事處所奉密議事件。著亦交軍機處記檔轉發。其應行裁節者。臨時斟酌請旨。如此則檔案有可稽查。事機始終慎密。亦無由啟窺測揣度之弊。前所交定議原旨不必行。是日起

上以祭

社稷壇齋戒三日○丁卯祭

先師孔子遺慎郡王允禧行禮○諭山東去歲被災。朕屢降諭旨賑恤。今歲又加展月分。今聞彼地窮民北來覓食者甚衆。朕心深為軫念。著截留漕米十萬石。分貯歉收州縣。令巡撫阿里衮加意體察。或應酌量加賑。或應發粟平糶。以裕民食。俾災黎接濟有資。毋致輕去其鄉。妥協辦理。具奏以聞。該部即遵諭速行。諭軍機大臣等。前聞東省窮民出外者甚衆。曾傳諭阿里衮多方撫恤。今特諭部截留漕米十萬石。分貯被災州縣備賑。可傳諭阿里衮妥協辦理。先期多張告示。遍行曉諭。俾災民早知餬口有資。不致輕去其鄉。拋荒田業。一霑雨澤。即可及時耕作。以望秋成。阿里衮其善體朕意。軍機大臣等議覆直隸總督那蘇圖奏稱八旗閑散人戶下屯種地一案。照原議興造房屋。自應陸續完工。但旗戶到屯尚需時日。現屆東作。若待旗戶下屯始將地畝播種。勢必後時。若令各佃照舊

耕種又恐旗戶到屯收地佃戶虛拋辛力工本無償應豫定成規以免彼此偏執查秋麥係上年佈種春融加以耕耘如旗戶在三月以前到屯應令議還工本交出地畝在四月到者麥已將熟應令主佃各半分收其秋禾粟穀等項在三四月佈種五六月耘鋤如旗人在五月以前到屯償還籽種在六月以前到屯償還工本在七月到者收成已屆應令主佃各半分收至籽粒工本數目令地方官

傳同屯長旗佃照本處情形秉公議定報明以免偏累應如所請從之○大學士等議准署山東巡撫直隸布政使方觀承奏稱八旗內務府咨部清字事件應行知外省者向由承辦衙門繕寫轉行督撫接准後繕繹漢文增損錯漏實所難免嗣後凡遇八旗內務府清字事件行知外省該部即譯出漢文將原咨一併知照如係摺奏案件奉有諭旨及案內敘述舊奉諭旨該部即移咨內閣繕譯漢

文知照從之○禮部題朝鮮國王李昉遣使表賀

萬壽冬至元旦三大節及進歲貢方物賞賚筵宴如例○兵部議覆奉天將軍達勒當阿奏稱盛京三陵各設披甲八十名並未設領催請每旗添設領催一名率領披甲巡查並掌管錢糧檔冊俟奉天本旗公中驍騎校缺出與本旗領催一同揀選記名補用應如所請但每旗一名為數過多應照各

陵例准其各設領催四名從之○又議覆天津水師營都統富昌等奏稱水師營水手原設二百名請將每船正副舵工正頭舵阿班船板繚手等各存留一名船二十隻共存留水手一百二十名撥附水師營應用餘八十名應裁照例每人賞銀三兩發回本籍又稱從前舵工水手內有能教訓勤勉者挑取十名咨部給與把總職銜劄付仍留營効力三年奏請交部議叙現循照辦理但年限太淺請

入於存留水手內。効力五年。再行具奏。交部議叙。至教習千把總等。既經裁汰。除原派協領統轄外。應於滿洲官員內。每翼各派防禦一員。驍騎校一員。管轄水手。協理船務。均應如所請。從之。○以故巴林札薩克固山貝子達子之子薩木丕勒多爾濟襲爵。○戊辰祭大社。

大稷。

上親詣行禮。○詣

皇太后宮問安。

上以和敬公主初定禮。御保和殿賜蒙古諸王等宴。

上啟鑒謁

東陵。諭曰。固原提督許仕盛著來京候旨。其員缺著大同總兵官瑚寶補授。大同總兵官員缺著呂瀚補授。去冬固原兵丁不法一事。任舉係一遊擊。尚能聞信即出。往來拒敵。擒拏數十人。許仕盛身為提督。乃臨事畏葸。不

能親行彈壓。其柔懦無能如此。豈堪勝提督之任。大學士慶復審明之日。按律自有處分。斷無仍令許仕盛復任之理。是以令其來京。並非因憚兵肆橫。遂得操專閫之去留。以長刁風。此處著大學士慶復曉諭彼處兵民。將來審出不法各兵。自當明正其罪。速行正法。斷無寬縱也。○諭軍機大臣等。山東流民出口覓食。前已傳諭巡撫阿里衮加意撫綏。近據索拜奏稱。古北口等處流民四出。近日至二三千人之多。上年東省州縣雖被偏災。業經疊次加恩賑恤。今春復加展賑月。地方官果能實力奉行。何至流移載道。至於如此。此必因辦賑各員。因撫臣屢易。其人不加實力。奉行不善。或乘此有侵欺剋扣情弊。俱未可定。著傳諭阿里衮。或特派大員。詳悉查勘。或親身前往查看。實在情形。現有截留米石。其應行查辦之處。即另行妥辦。毋致災黎失所。是日駐蹕烟郊。○己巳。諭上年豫省被水

州縣曾諭該撫查明被災分數按例賑恤今
入春以來雨雪稀少窮民應作何接濟之處
亟當豫為籌畫平糶倉穀不必拘存七糶三
成例務期多方撫恤俾得均霑實惠其或未
霑雨澤耕種有誤則極貧次貧之民尚應加
展賑月以資餬口著該撫確查情形速行請
旨又諭豫省地丁錢糧今歲係輪免之年
其耗羨舊欠等項俱予停緩俟次年補徵惟
該省有額徵隨漕銀兩支給運軍行月錢糧
例不捐免但此項銀兩通省按畝徵收皆畸
零小數小民難以輸將且豫省去歲亦有被
災之處朕所軫念著照耗羨等銀之例將該
省隨漕銀一十一萬八千餘兩緩至戊辰年
補徵再歸德府屬有徵解江南船料銀兩亦
係按畝徵輸事同一例亦著緩至來年徵納
其本項應用銀兩該撫酌量借撥該部即遵
諭行○戶部議覆直隸總督那蘇圖奏本年
秋冬二季及明年春夏二季遵化薊州豐潤

等三州縣供應

陵糶需米四萬五千餘石除積年存貯餘米三
千餘石尚需撥米四萬二千石應即在八溝
貯買餘存米內酌撥運往所有向例撥充
陵糶漕糧應行停止應如所請辦理得旨依議
速行○是日駐蹕白澗庚午

上駐蹕桃花寺○辛未春分朝

日於東郊遣和親王弘晝行禮○

孝康章皇后忌辰遣官祭

孝陵○禮部奏本年二月二十六日

孝昭仁皇后忌辰致祭與清明節致祭適逢一

日請於前一日遣官行忌辰致祭禮從之

是日駐蹕隆福寺翼日如之○壬申

上謁

昭西陵

孝陵

孝東陵

景陵俱未至碑亭即降輿慟哭步入

隆恩門詰

寶城前行禮躬奠哀慟王以下文武大臣官員隨行禮○癸酉諭軍機大臣等據紀山奏稱大金川土司莎羅奔侵佔草布什咱土司地方彼此仇殺又誘奪伊姪小金川土司澤旺印信並把守甲最地方揚言欲攻打草布什咱等語苗蠻易動難馴自其天性如但小小攻殺事出偶然即當任其自行消釋不必遽興問罪之師但使無犯疆圉不致侵擾於進藏道路塘汛無梗彼穴中之鬥竟可置之不問如其仇殺日深勢漸張大或當宣諭訓誨令其息憤寧人各安生業亦當相機行事聲威足以懾服其心使之弭耳輸誠方為盡善苗蠻頑梗無知得其人不足臣得其地不足守謹屯蟻聚無足深較倘果有抗拒侵軼不得不宣布皇威以全國體亦當相度機宜慎之於始不可輕為舉動但不可因遵朕旨即或有關國體不得不示以國威者亦一味因

循惟在慶復紀山等詳審事勢令輕重合宜耳即如瞻對一事初亦非敢有侵犯而一經辦理不免命將出師並由京城派員前進直至大學士慶復親往經畧始得安輯皆由事前不能先有成算以至於此足見撫馭遠夷全在機宜合要邊吏喜於生事營弁不知遠謀往往過為張皇因小釀大不知千鈞之弩不為鼯鼠發機惟當修善守禦厚蓄聲威令其畏憚奉法恩撫威懷各得其道先事豫籌無致輕有舉動○總理事務王大臣等奏報京師於本月初十日未刻至丑刻約得雨雪四寸有餘近京二三十里內一體均霑得旨此處亦如之但所奏分寸不覺過實乎雖不無少補而朕意尚以為不足再得繼以甘霖則實可喜耳○是日駐蹕桃花寺○甲戌上幸盤山駐蹕至丁丑皆如之○遣官祭關帝廟○禮部議覆湖南按察使周人驥奏稱湖南俗尚澆漓凡居喪之家糾集親朋演

戲開筵自昏連旦名曰鬧喪其次力有不逮亦糾合鄰族親朋聚飲歌唱拍手相和聚必多人唱必徹夜名曰夜歌民間陋習相沿紳衿亦所不免請嚴紳衿違抗之條以挽頹風應如所請嚴行禁止紳衿內如有仍蹈前轍者該地方官確查照違制例杖一百通詳片革從之○工部議覆署江南河道總督顧琮疏稱黃河北岸徐昇壩縷隄貼近運河因黃溜北趨外灘刷去陡生新險亟應建築挑水

平定縣志卷八

三

埽壩二百九十丈應如所請從之○山西巡撫愛必達奏正月二十八日據司道密稟有文水縣民杜良珍赴汾陽縣民卞懷錦家投遞逆書二紙當據卞懷錦出首獲犯呈書臣展閱書詞荒誕狂悖提犯來省審訊該犯供稱素有瘋疾因飢寒無奈造寫逆書計圖誑騙搜該犯家有紙糊舊爛鞋樣一紙上書妖言及機密字樣訊據供稱妖言即謠言係人傳說伊子不妥之意機密係寄字伊子家窮

勿被人見笑之意臣按該犯投書之日並未疾作即設謀圖騙豈無他術似此大逆手札遽敢投於素不相識之人雖親屬鄰里衆供僉同情理殊難深信查伊子杜肇星現在喀喇河屯已咨直督提解到案訊擬具奏得旨此等惡民所謂凶頑可愍者也然發覺甚速亦足以警愚民按律嚴審究擬其首出之人可謂良民酌加獎予並傳諭提督索拜及現在辦差之按察使永寧將杜肇星即速密拏

平定縣志卷八

三

交山西巡撫愛必達一併嚴審○乙亥諭軍機大臣等據山西巡撫愛必達奏報文水縣民杜良珍赴卞懷錦家投遞逆書現在拏獲審訊一案朕已批示令其按律嚴審究擬今思杜良珍捏造狂悖之詞於法自無可貸但供稱意在誑騙銀兩若實情不過如此不足明正典刑可不必錄供成案然不抵之於法則此等奸惡愚民又無以示儆向來外省有奏明杖斃之例著傳諭愛必達令其於審明

完結之日。即於本處杖斃示衆。將辨理情由具摺奏聞。不必復用題本。尋覆奏查杜良珍

供詞。並詢之里鄰人等。實無交結匪類情事。

是該犯立意止於誑騙銀兩。反覆究審。已無

遁情。謹遵旨不必錄供成案。發回該縣知縣

當堂杖斃。示衆完結。報聞。○又諭曰。奉天府

尹蘇昌續叅義州知州胡世仁一本。朕已批

發。蘇昌到任後。所叅屬員虧空甚多。前後共

有幾案。此各案是否俱係霍備在任時屬員

實錄卷二百八十四

侵蝕所致。或有前任府尹吳應枚任內之案。

著大學士訥親張廷玉分晰查明。如在吳應

枚任內。亦應照例議處分賠。再霍備曾否補

用。現在何處。一併查明奏聞。○又諭刑部奏

稱南城兵馬司副指揮張光熊。拏獲造賣賭

具莫天祿一案。霸州知州馮章宿將人犯扣

留。以自行訪獲。通詳復致私書請託。請交該

督就近將先後拏獲之處。查審分別叅處等

語。此案內曲直乃議叙議處所關。而私書請

託漸不可長。著該督秉公確審。不得因係屬員。稍為迴護。

實錄卷二百八十四

吉

大清高宗法天隆運至誠先覺體元立極敷文奮武孝慈神聖純皇帝實錄卷之二百八十四

大清高宗法天隆運至誠先覺體元立極敷文
奮武孝慈神聖純皇帝實錄卷之二百八十五

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣等謹

總裁官經筵講官太子太傅大學士文淵閣領事領侍衛內大臣稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣等謹將內大臣戶部尚書鑲藍旗滿洲都統軍功紀錄五次

尋常紀錄十四次臣等謹將官太子少保工部尚書紀錄六次臣等謹將尋常

敕修

乾隆十二年丁卯二月丙子工部議覆前欽

平定水三千工

差查辦河工協辦大學士吏部尚書劉於義
等奏稱永定河隄自五工以下淤淺處所引
河刷深通順無庸興挑唯南北兩岸隄壩各
工盛漲後應加修理請動項趕辦應如所請
從之○補行廣東省十年分大計不謹官二
員罷軟官二員年老官三員有疾官四員才
力不及官三員浮躁官三員廣西省不謹官
四員年老官一員有疾官一員浮躁官二員
分別處分如例○裁浙江玉環同知缺移溫

州府海防同知駐玉環從前任閩浙總督馬
爾泰請也○鑄給湖南長沙府督捕同知關
防從巡撫楊錫紱請也○丁丑遣官祭
歷代帝王廟○戊寅

上駐蹕白澗○己卯諭向來下五旗大臣官員
內有因宣力出色特恩擢入上三旗者四川
巡撫紀山係平郡王屬下伊父額勒恩特依
曾在軍營宣力陣亡而紀山在巡撫任內亦
甚勤勞著將紀山擢入正黃旗滿洲旗分再

平定水三千工

理藩院尚書那彥泰宣力多年著将那彥泰
擢入正白旗蒙古旗分○諭軍機大臣等奉
天官員虧空案件著落該府尹分賠之處應
查明虧空時日在何人任內不必論到任日
期如到任在吳應枚任內旋即虧空該府尹
不行揭報自應著落吳應枚分賠若到任雖
在吳應枚任內即有一二年而并未虧空至
霍備接任後虧空者仍應專著霍備賠補如
是則吳應枚始心服想大學士等所議意蓋

如此而於各員到任摺聲明一處以致眉目反覺不清。若照此辦理恐致蒙混推諉可傳諭大學士等於蘇昌題覆到日照此旨辦理。○直隸正定鎮總兵官馮吉品因病解退以通州協副將海亮署正定鎮總兵官。是日駐蹕盤龍山。○庚辰。

上行圓。○諭東省蘭山縣去秋被災雖止五分而入春以來尚未得雨小民艱於粒食若僅酌借口糧恐未足以資接濟著該撫阿里衮

字長子

三

一

查明實在乏食貧民加恩賑濟一月俾耕作有資毋致失所該部遵諭速行。命歸化城副都統五十六來京候旨調正藍旗蒙古副都統音扎納為歸化城副都統以步軍翼尉什圖為正藍旗蒙古副都統。是日駐蹕髻髻山。○辛巳遣官祭昭忠祠。是日駐蹕盤龍山。○壬午。

上行圓。

皇后千秋令節奉

皇太后懿旨停止行禮筵宴。○吏部議太常寺堂官於祫祭

太廟時未將看守燈火之太監豫先迴避應照例罰俸一疏得旨來保著罰俸六個月伍齡安等罰俸之處數案但以紀錄抵銷來保乃總理之人非如伍齡安雅爾呼達等專司其事且二人管理太常寺事務俱已多年而近來屢有疎失致干察處該堂官等又不和衷殊無敬謹裡宗之意伊等恃有紀錄即議處不過抵銷不足示懲著將所有紀錄通行銷去。伍齡安雅爾呼達李世倬俱著罰俸六個月餘依議。○豁除河南孟縣被水衝塌衛地軍地額賦。是日駐蹕三家店。○癸未。

字長子

四

上還圓明園。詣

安佑宮行禮。遣官祭賢良祠。○甲申。

上幸豐澤園演耕。詣

皇太后宮問安。

上還宮。乙酉以

孝昭仁皇后忌辰值清明節前一日遣官祭

景陵○諭軍機大臣等陳宏謀在陝西巡撫

任內經總督慶復奏徇庇屬員各款部

議革職朕已從寬留任今董三錫貪婪一

案該部復議革任朕因一時不得其人將

伊復留原任看此則陳宏謀在陝全不實

心任事虛糜豐厚養廉殊負委任之恩朕

上年西巡經過直隸定州見城垣傾圮亟

宜修葺著陳宏謀出貲派人修理將此併

傳諭直督那蘇圖知之○丙戌清明節遣官

祭

永陵

福陵

昭陵

昭西陵

孝陵

孝東陵

景陵

泰陵○遣官祭

端慧皇太子園寢○諭軍機大臣等據駐藏

副都統傳清摺奏郡王頗羅鼐告稱部中叅

奏言其挾有私意殊屬屈抑又以部院俱與

伊不合因有疑惑等情或係伊意中果有委

曲怨望情形或因部叅語重伊心畏懼思改

已過所奏殊未明晰頗羅鼐係彼處辦事之

人伊凡所陳訴俱有關係理宜留心查察將

其現在情形詳細具奏傳清此摺詞意甚屬

含糊况伊應辦一切事務俱不留心惟事偷

安即繕寫奏摺俱甚潦草著傳諭傳清將頗

羅鼐意見情形據實奏聞再上年十二月內

曾降勅密諭頗羅鼐計其時日應在傳清未

奏此摺之時早已接到頗羅鼐接奉此旨後

作何言語傳清此次因何並未奏聞著一併

傳詢令其即行覆奏○大學士等議覆福建

巡撫陳大受奏稱暹羅產米甚多向例原准

貿易向來獲利甚微興販者少今商人等探

聽暹羅木料甚賤。易於造船。自乾隆九年以來。買米造船運回者。源源接濟。較該國商人自來者尤便。但無牌照。可憑稽查。未為嚴密。且恐守口兵役。藉端索詐。致阻商民急公之念。應請給牌照。以便關津查驗。其無米載回。只造船載貨歸者。應倍罰船稅示儆。均應如所請。從之。○戶部議准盛京戶部侍郎蘊著疏稱。內倉應貯三年備用米六萬一千四百四十餘石。現貯各項米。通計三萬四千三百餘石。尚不敷米二萬七千一百餘石。請將遼陽開原廣寧應徵米石。暫行撥入內倉。計一年應徵米五千一百六十餘石。六年可得米六萬一千四百餘石。俟米足日。仍歸各該城交納。從之。○丁亥。

上耕耤詣

先農壇行禮。更服至耤田所。

躬耕三推。復加一推。

御觀耕臺。命莊親王允祿裕親王廣祿和親王

弘書。各五推。吏部侍郎德齡。戶部尚書海望。禮部尚書王安國。兵部侍郎陳惠。華刑部侍郎勒爾森。工部侍郎三和。都察院左副都御史二格。通政使司通政使雷鏞。大理寺卿嵩壽。各九推畢。順天府府尹率農夫終畝賞賚者。老農夫如例。○定武員迴避本省。諭武員定例。部推月選之缺。向即迴避本省。惟題缺各省督提。有將本省人員。豫行保舉。缺出掣補者。亦有指缺題補者。部中雖執例不准。而朕施恩准用者多。故武員之用本省者。率由於此也。乃武員習為故常。竟似應行補用本省。而以調往別省為苦矣。即陞銜調缺。亦多以為未便試思。部中推選。豈能坐用本省之缺。此皆以一己之私。見昧國家之常度。不知官員迴避。本籍原屬定制。當然即准其題補。於五百里外。及以隔府別營補用。亦不過為地方人材起見。并非令伊等得以自便其私。今兵部議令。遵照定例迴避。自應仍復舊制。

第念伊等既經保舉註冊必俟別省缺出始行掣補未免需次艱難朕思副參為武職大員不應題補本省之人嗣後無論陸路水師缺出俱著停其題補其遊擊都守等官與副參官級稍遜且有副參統轄稽查諒亦不至瞻徇掣肘可仍照現行之例辦理此係朕格外體恤之意非為伊等寬其繩檢也至年滿千總一項部議發往他省伊等係本省拔補微員候補人多一時難以得缺發往他省不無俯仰拮据之慮著仍留本省補用其副參等官作何迴避陞調之處該部另議具奏尋議水陸副參分別陞調八款一水陸副將向無論俸推陞之例應即於各該督所轄省分內酌量對調一陸路參將為數無多且俱係小銜一二年間照例推陞加銜一等改調他省此時毋庸改調一水師參將除廣東肇慶內河水師一缺外並無部推之缺嗣後遇俸滿推陞臣部將該員陞銜一等請旨分發隣

省以相當之缺題補至籍隸本省之水師大銜遊擊例應推陞參將者嗣後本省不便保題遇俸滿推陞亦照此辦理一已經豫保註冊應陞副參之參遊內有籍隸本省者臣部於隣近省分互相掣調一水陸現任遊擊籍隸本省者仍准一體豫保照現在分定隣省調掣之例掣補一參遊推陞遇有籍隸本省之小銜參遊雖經初次推陞例應留任一次者概不准仍留原任即加銜一等令赴新任一河營無操防地方之責嗣後缺出該督將籍隸他省之河員題補如無他省熟諳河務之員仍於本籍人員內保題請旨補用一已經題補未經引見之籍隸本省副參俟引見時於綠頭牌上聲明請旨簡調從之○又諭曰江西南贛總兵官章隆前於廣東左翼任內經提督保祝奏伊營務因循毫無振作復以簡缺調補河南南陽總兵官項朝選曾任建寧總兵經總督那蘇圖以縱兵結黨漫無

約束諸事任性喜怒不常。參奏革審。後經開復。由副將用為總兵。乃二員蒞任以來。不能鼓勵奮勉。整飭戎行。且年皆就衰老。俱著以原品休致。若伊等自度尚可効力。准其來京。該部帶領引見。其江西南贛總兵官員缺著岳鍾璜補授。河南南陽總兵官員缺著成元震補授。戊子。

上御乾清門聽政。詣

皇太后宮問安。大學士等奏原任內務府大

臣丁阜保現年百歲。應照例給銀建坊。並請賞賜扁額。及朝服一襲。上用緞十疋。銀一千兩。是日五品以上內務府官員等均往慶賀。生辰八旗文武大臣亦應前往從之。戶部議准安徽巡撫潘思渠疏稱奉旨截漕之鳳潁泗三府州屬其被災各州縣額徵漕糧除災田應徵米石暫緩催輸外。熟田應徵漕糧二萬一千二百餘石。請全數截留。仍不敷米七萬八千七百餘石。在於定遠等州縣派截以

符十萬石之數從之。○又議准黑龍江將軍富森疏稱呼蘭地方官莊五十座內除能滿交額糧外。其被災之八座共需口糧一千一百十九石。現收穫細糧四百十三石八斗八升。尚不敷糧七百五石一斗二升。請於本處備存倉糧內動支借給。次年秋收催還入倉從之。○命編修陳大喻以原銜充日講起居注官。○實授直隸通州協副將海亮為正定鎮總兵官。○已丑諭軍機大臣等前因東省被災州縣上年喀爾吉善辦理賑務未妥以致流民出口。并蘭山被災未經查辦。曾傳諭巡撫阿里衮或親身前往查勘。或特派大員往查。今阿里衮止援引從前已委道府大員分頭查報。其不必另派大員。及伊不必親往之處俱未奏明。或者因伊甫經到任事務繁多。或者為豫辦東巡事宜不能親身前往耳。不知豫辦東巡之事甚輕於民瘼也。又奏稱分委府佐攜帶存公銀兩前往直隸古北口

等處招徠資送等語流民出外覓食總因鄉里餬口無資是以諭令截漕加賑借糶兼行果能一一遵旨辦理安輯於本州縣使無輕去其鄉者上也離鄉未遠招徠於本省境內者次也及其已至直隸古北口一帶往返數百里遠者千里其中或有父兄親族向在口外有所依倚亦不妨任其前往若一一資送回籍不惟糜費不貲且恐已誤耕作而還鄉更無可倚賴於災黎轉屬無益此皆不達世

務之見從前曾降旨令其多張告示曉諭流民本欲使聞風各安閭井不致四外流離今該撫所奏乃欲招徠流民於遠離本境之後其為計則已拙矣看來東省上年被災不輕從前辦賑大率虛文了事此時去麥秋尚遠雨澤亦未霑足窮民待哺情形迫切著傳諭阿里衮將被災州縣於現在賑恤之外再酌量分別加賑以資接濟該撫作速妥議奏聞請旨至所稱平糶米石照原議酌減及回籍

貧民一例補賑之處著照所請行古語云救荒無奇策原不過加賑平糶借給口糧等常行之事惟在該撫董率地方官實心實力一奉行權其輕重緩急使百姓均霑實惠無致失所可耳尋覆奏臣智識短淺疎忽之罪竊屬難辭現已密諭前委之各道府等實心查辦俟勘報到日何處尚應加賑月糧何處止須借給倉穀隨時具奏請旨得旨覽奏俱悉○又諭官員侵盜錢糧案件既經題參自

應速行審結定擬以伸國法今查此等案件竟有遲久不結事歷一載有餘尚未題覆者如直隸則有張德榮張鑑查錫納三案奉天則有榮大成吳秉禮臧根嵩胡世仁崇倫永五案湖廣楊統正曹繩柱二案福建李潛一案廣東朱介圭一案雲南陳題一案此皆該督撫等任意遲延不以讞決為事殊非國家立法懲貪之意可寄諭各該督撫將以上各案即速審明定擬題覆務必入於今年秋審

案內母得再有遲延。○駐藏副都統傅清奏正月初九日據郡王頗羅鼐告稱訪得策卜登台吉已獲罪被殺并其妻子及其叔父果莽堪布喇嘛皆被殺果莽堪布喇嘛之缺已令扎什倫布之阿克巴喇嘛補授阿克巴喇嘛之缺已令羅卜藏丹怎補授策妄多爾濟那木扎勒之姪女許與拉藏汗之孫納噶查為妻現在彼處所最重者是納沁宰桑察罕宰桑巴雅斯瑚朗宰桑小策零敦多卜固子宰桑等但因其台吉已亡而新立台吉年幼用事之人彼此不和惟恐阿卜都爾噶里木哈薩克土爾扈特喀爾喀等處發兵襲之所以防範卡座甚嚴等語報聞免湖北棗陽縣十一年分水災額賦其雲夢應城襄陽鄖縣等四縣并予緩徵緩徵廣東澄海潮陽饒平惠來四會廣寧新興等七縣十一年分水災額賦兼賑災民移福建龍溪縣縣丞駐華封建安縣縣丞駐迪口建陽縣縣丞駐

麻沙政和縣赤岩司巡檢駐下庄從陞任福建巡撫周學健請也。○庚寅諭軍機大臣等前據劉統勲奏摺內稱韓烈辦柴勇往今劉統勲來京將伊如何勇往并其人尚可錄用與否之處詢問劉統勲據稱韓烈辦出餘柴至數十萬之多因未經報明上司致被叅劾但其勇往辦公情尚有可原諒現在因那移錢糧問擬徒罪查那移完贓例得開復又因誣揭道廳問擬革職轉與開復之例不符若就其現在氣質而論草率不免誤公傲慢足以債事如身受懲創之後痛自改悔其才力或尚有可驅策之處等語可寄諭周學健將韓烈辦事為人將來可否錄用之處確查秉公據實奏聞尋覆奏韓烈辦理餘柴一事核之前後案卷並非實屬為公且其乖張暴戾現仍如舊報聞廣西道監察御史黃登賢奏各省幕客類多聚集省會引類呼朋與上下各衙門書吏往來結識因之生事招搖并

探知各衙門內幕或指稱同鄉親族投帖拜往互相照應每於州縣申詳多方批駁各州縣不得不來省會訪求幕客之與上司內幕熟識者厚聘延請彼此串合滋弊無窮請勅下各省督撫轉飭首府首縣將聚集省會之覓館幕客嚴查驅逐倘仍聽逗留即將該府縣照不力行保甲例叅處再府廳州縣以下等官罷職後有在原省鑽營作幕一旦得為大吏延請懷私挾怨心存報復更有志在營私情弊尤難殫述併請嗣後原官該省者不得復在該省作幕如經叅奏或被首告將延請之官照違例議處營求作幕之人嚴加懲治得旨允行下部知之○是月協辦大學士吏部尚書高斌奏臣自盧溝橋由永定河南岸查勘工程今春凌汛安瀾各減壩俱未過水下尾出口溜勢通暢惟下口河尾溜勢北趨其轉灣處隄工甚為險要應取直挑引河一道其范甕口一帶伏秋汛內向在水中之

葛漁城一村水已環繞查該村去北埕僅二里許應接築土埂壘道中留三孔木橋以通水道俱交各工員興修臣隨至北運河查橫淺共七十餘處已交做柴草木壩束溜刷沙蓄水濟運現往北路由昌平至宣化一帶勘工得旨經由地方似均望雨澤民情光景如何速奏以慰朕念尋奏臣經由良鄉涿州固安霸州永清東安武清香河通州順義懷柔昌平延慶懷來十四州縣境俱係上年豐收之處民情安帖目前雖未得雨待澤尚未甚殷得旨覽奏俱悉直隸春間望雨竟成故例矣然豈可委之天而不責之已乎○直隸總督那蘇圖奏遵旨訓飭營員一摺得旨覽奏俱悉實力行之近日頗覺有望雨之意宣化災餘之區與慶雲積歉之地皆朕所軫念也近日光景如何并何以料理之處明白速奏來尋奏宣郡上年被災給賑且各屬豐收糧價平減貧民安帖臣恐被雹六分以上之戶

不無拮据。前經借給口糧籽種。至慶雲鹽山。上年均有六七分收成。春麥已種。現亦得雨。得旨。覽奏俱悉。○又奏各屬雨雪情形。得旨。知道了。土膏脈起之時。而灰塵頗大。究屬地燥。不無有礙春耕否。畿輔一帶民情光景。若何。尋奏沿河已種秋麥之區。均得雨澤。保郡得微雪。畿輔一道亦得雪寸許。將來春雨續霑。春耕無悞。或有糧價漸昂。應需難借之處。隨時辦理。得旨。所奏俱悉。近京及薊州一帶得雪較保定猶覺畧大也。○兩江總督尹繼善署江蘇巡撫。安寧奏淮徐海等屬上年被水。疊蒙賑濟。災黎安帖。惟查被災五分之貧民。與被災六分之次貧。向不在賑恤之內。而五分貧民。有酌借口糧之例。六分之次貧。例內未經開載。竊思五分災民。因無賑而借給。其六分災之次貧。亦係無賑之民。雖次於極貧。然較五分災者。尚多被一分之災。殊覺向隅。應請將五分貧民六分次貧。其中稍可支

持者。酌借一月口糧。如實屬無力者。酌借兩月口糧。俟秋收免息還倉。得旨。覽奏俱悉。○署江蘇巡撫安寧奏。報各屬得有透雨。徐州海州二屬春來少雨。若數日內同獲甘霖。麥秋可望。得旨。欣慰。覽之。徐海今得雨澤。否彼積歉之區。若有旱形。須加之意也。○又奏凜遵諭旨。整飭戎行。體恤兵丁。得旨。撫標之兵。各省皆屬庸懦。朕亦以撫臣有察吏安民之責。概不問及。汝若能於政務之暇。實力整頓。固佳。若不能。朕亦不罪。蓋所責於汝者。在彼不在此。安徽巡撫潘思榘奏。皖省地方自交二月。甘澍頻施。二麥蕃盛。蠶豆菜蔬等類。鬱葱遍野。鳳潁泗災重之區。復蒙展賑。益勤東作。臣飭勸農人。於路傍地隙。廣植榆柳果樹。再蘆粟一種。宜於山地。不擇肥瘠。六安州民種植甚廣。煮為糧。無異米穀。土人稱為六穀。又豫省紅荊易蒔。多收東省稗子。土名穄子。較高粱更耐水潦。臣俱諭令試種。并趁

此農務未殷。疏通溝洫。以備水旱。得旨。此可謂留心本計。嘉悅覽之。閩浙總督喀爾吉善奏。考驗浙省將備官兵優劣情形。得旨。知道了。諸事不惟應據實奏聞。亦應據實辦理。斯不徒託之空言矣。即如山東蘭山縣。去歲甚荒。今歲入直隸謀食者。紛紛載道。汝舊年所為妥協賑恤。據實奏聞者。安在耶。朕非於事後責汝。但若任此以往。則汝將大負朕恩。於朕用人顏面攸關矣。汝其慎之。福建巡

撫陳大受奏。建寧延平邵武汀州漳州等五府屬接壤浙江江西廣東流丐男婦三五成羣。日則沿街乞化。夜則行竊。少年拳勇者勾串本地奸民。恃強討乞。稍不如意。公行搶奪。縱火延燒。臣現通飭所屬稽察。外來流丐有生事擾民者。拘遞回籍。並飭各營汛於隘口稽查驅逐。又查延建邵三府風俗素淳。近亦健訟緣有一種寄籍民人。大半自江西汀州漳州等處而來。賃山開墾。種植茶果麻靛之

類。其桀驁不馴者。藉端滋訟。土民耳濡目染。漸為澆薄。亦經嚴飭地方官實力化導。如不安分。嚴懲遞籍其土著之人。如將田山租賃與外郡刁惡民人。日後滋事連坐。得旨。好應如是留心清理者。又奏查臺地採買定價。先係每石四錢。續經奏准加銀伍分。前發銀八萬兩。買穀二十萬石。係仍照四錢原價。若照廳縣所報各時價。核計穀二十萬石。該銀十四萬一千三百二十餘兩。且官穀較市穀必須乾圓潔淨。斗斛較滿。並運費等項。勢皆取足於民。番官價僅敷一半。海洋要區。短價派累。恐釀事端。臣再四詳酌。所有未買穀九萬二千餘石。應請仍俟本年秋收後。再行酌買至臺地積貯。較內地為歉。如青黃不接時。米價加昂。必資平糶。其已買之十萬七千餘石。併請暫貯臺倉。再看早稻收成。若何定奪。得旨。所見雖深謀之意也。而究屬一偏。審如是。則臺米為不可恃矣。不知歷來閩省所恃

者乃臺米也。此語一出，將臺員與奸販皆得生風居奇。而此事乃大壞矣。果有其弊，亦惟去其弊耳。因噎廢食，昔人所戒。不謂汝之意見乃出於此也。湖北巡撫陳宏謀奏報雨水霑足，并整飭吏治，清理積案情形，得旨覽奏俱悉。若徒為新到任設施套語，而一切如汝在陝撫任內所為，則大不可耳。○河南巡撫碩色奏歸德府各屬因連年被水，賑恤頻施，倉儲久匱，市賣米價較昂。查光州固始現貯穀俱五萬餘石，臣酌令光固二州縣各動撥倉穀二萬石，共碾就熟米二萬石，由水路運至亳州，派給永城等縣，減價出糶。糶價即存貯各縣，俟麥熟秋成後，採買穀麥儲備，得旨甚是。河南亦望雨，目下光景有悞春耕否。○又奏覆豫省上年被水，係開歸陳汝許五府州所屬。臣勘災之初，即酌借口糧麥種，嗣蒙豐賑災黎，俱各得所。本年正月內，臣因被災五六分之貧民，正二兩月已不在加賑之

列復酌令糶借兼行。民情安帖。至歸陳汝三府俱得雨雪，麥苗青葱，惟開封所屬雨雪微少。河北三府大概相同。若二月二十內外得有透雨，二麥仍可豐收。得旨覽奏稍慰。一得透雨，即速奏以慰朕懷。即不得雨澤，設於二麥有礙，亦應先事豫謀，妥酌奏聞，毋致後時也。○山西大同鎮總兵瑚寶以陞授固原提督，奏請陞見得旨不必來京。汝立心辦事，武員中不多見，但固原兵驕之處，惟在寬嚴得濟，更宜留心酌中，化鴛凌之惡習，為邊防之倚重。一切勉力為之。○山東巡撫阿里衮奏臣自京入東，省境沿途麥苗發青，土脈微燥，自平原至歷城一帶俱得細雨，麥苗長發，現在糧價尚不昂貴。得旨覽奏俱悉。東府被災流民由直隸出口謀食者甚衆，已至此則資送遮迴亦非所願矣。但彼處地方官何為者，且去年所賑國家所費不貲，此必百姓未被實惠耳。近來州縣官貪黷者屢見，而東省屢

易巡撫恐不無乘此作弊者朕甚疑之汝應細查明白並將現在情形詳悉奏聞○又奏署撫臣方觀承移交奏摺一件係蘭山縣民強借倉糧壘塞縣署并毆差拒捕府縣未報奏奉諭旨交臣查辦已飭兗沂曹道吳同仁親往勘查茲據該道查明蘭山縣北鄉民人赴縣求借倉糧人多擁擠將角門土牆擠塌一塊并將磚鋪甬道躑翻丁役喝阻衆人疑為擒捉即拾磚拋擲經知縣段珫面諭准借旋即散出赴知府副將衙門跪求別無滋事并勘明縣署亦無壘塞情事至縣民張懷敬等拒捕毆差該縣於委查後始報實係諱飾又訪得蘭山縣知縣段珫差役妄拏無辜拷打詐贓以致王家樓等莊民驚避知府色起始則飭縣查拏該縣薄責了事匿不通詳該府因有府役同詐亦復徇縱現已飭諭司道確查嚴辦得旨知道了據方觀承奏稱東省吏治廢弛以揜飾文過為能汝其加意整飭

汝雖不習文只如論語所謂不逆詐不億不信抑亦先覺三語一生用不盡也○大學士管川陝總督公慶復甘肅巡撫黃廷桂奏固原營兵糾衆搶刦一案查營兵不法喊撞提督衙門搶掠鋪家衣物克橫已極經署城守營叅將任舉集兵擒殺拏獲多人餘衆始散其情罪百無一赦但事起倉猝夥黨衆多兼值歲暮查拏嚴急更恐激成事端臣等密諭委員平慶道章元佐從緩查辦務在盡獲首犯章元佐抵固原時人心惶惑該道即大張告示諭以糾衆首犯數人罪無可赦並不連累無辜即脅從亦姑許自首並令將混搶鋪家衣物暗行拋貯空廟內以安商民嗣值放餉之期又傳標營各頭領痛切開諭人心始定城門出入如常惟稽查營兵不許帶出衣物數日內已收繳衣物五千餘件俟事定另行查給鋪家外其起意首犯數人姓名已訊訪得實密移各營於初二日擒送到案查先

後擒獲。及現供應拏各犯。已有二十餘人。皆係營兵。因操演畧嚴。給糧稍緩。藉端起釁。自當嚴加審擬。以彰國法。得旨。已有旨了。卿至彼酌中為之。總期毋濫。毋枉。不可滋蔓。以生事。亦不可姑息。以長刁風。章元佐此事料理尚妥。卿以為如何。○慶復又奏審訊故道阿炳安侵帑一案。嚴鞠協領德明。寄頓銀兩。已據招認。惟銀數不符。現在審究。查追。又據阿炳安家人蘇勒供稱。乾隆四年正月。曾將銀四千兩。用木匣盛送大將軍查郎阿。交伊家人安七轉呈收受等語。但一面之詞。未便指為確實。安七又在京城。難以查辦。謹據實奏聞。得旨。查郎阿係

皇考所用之舊大臣。朕不忍置之於法。此事不必跟究。朕自有處。○兩廣總督策楞廣東巡撫準泰。奏據東安縣知縣莊榮徵稟稱。縣屬西山地方。聞有奸徒韋正秀。欲圖聚眾搶奪。即會同守備李登科。前往彈壓。緣西山四圍

陡絕。令兵丁盤日貴等入山偵探。韋正秀糾夥拒捕。將盤日貴傷斃等語。查該縣所稟聚眾搶奪。並未指實。是否辦理不善。激成事端。現在確查。至韋正秀拒捕傷人。即應嚴究。現飭文武帶兵往捕。務獲首惡。不擾良民。得旨。是雖不應累及無辜。亦不可過縱也。將如何結案情形速奏。○策楞又奏據茂名縣稟稱。高州鎮標千總馮文煥身染熱病。本月二十六日。陡將剃刀抹脖。伊妻黃氏喊救。即拔腰

刀誤砍伊庶母萬氏。伊妻驚慌走出。文煥趕出砍傷立斃。文煥奔至高州府堂。自刎殞命。伊庶母亦因傷而斃。吊驗劉付內寫有冤係陳總兵逼死千軍衣受銀二千兩共十五字。據高州府查稱。千軍衣一事。緣本年正月高州鎮陳訓生辰。官兵為之置辦壽禮。該鎮即已禁止。其二千兩之說。實無其事等語。現在委員確查。研訊得旨。知道了。此皆意外可訝之事。頻頻有之。朕甚為粵東繫念矣。諸事留

心省察母致後事失機

清高宗法天隆運至誠先覺體元立極敷文

奮武孝慈神聖純皇帝實錄卷之二百八十五

大清高宗法天隆運至誠先覺體元立極敷文
奮武孝慈神聖純皇帝實錄卷之二百八十五

大清高宗法天隆運至誠先覺體元立極敷文
奮武孝慈神聖純皇帝實錄卷之二百八十六

教修

世宗憲皇帝實錄卷之九十九
世宗憲皇帝實錄卷之九十九

世宗憲皇帝實錄卷之九十九
世宗憲皇帝實錄卷之九十九

世宗憲皇帝實錄卷之九十九
世宗憲皇帝實錄卷之九十九

世宗憲皇帝實錄卷之九十九
世宗憲皇帝實錄卷之九十九

世宗憲皇帝實錄卷之九十九
世宗憲皇帝實錄卷之九十九

乾隆十二年丁卯三月辛卯朔諭翰林院所

修詞林典故一書著王曾汾劉綸一同辦理

士辰

上詣

皇太后宮問安○幸圓明園、予故科爾沁札

薩克多羅郡王伊什班第祭如例○癸巳諭

從前因營伍懈弛屢經飭諭留心訓練又因

武臣辦理過急往往煩瑣滋怨復經訓諭於

整飭之中寓體恤之意今據福建巡撫陳大

受奏稱各處惟務飾觀大率留意於旗幟等

物。其他腰刀長鎗月斧等件。俱不經意。請特頒諭旨。通飭各省等語。此等營中修理一應兵械。原係營伍應辦之事。自當加意整頓。亦無庸再頒諭旨。著抄錄陳大受原摺。於各省督撫提督奏摺之便。傳諭知之。○又諭。向因臺灣為海外要區。設立巡察御史。原以表正風俗。稽查彈壓。除剔弊端。近據陳大受奏。該御史等於養廉外。又分派臺鳳諸彰四縣輪值。每季約需費三四百金。其出巡南北兩路。供應夫車廚傳。賞給各社番黎操閱犒兵。俱令各縣措備。該衙門濫准詞訟。差拘滋擾。於額設胥役之外。更有奸民掛名。恃符生事。該巡察既有專制一方之意。而屬員極意承應。雖有積弊。亦復上下相蒙等語。大凡巡察之員。或因一二事隨時特設。尚於地方有益。至定以年限更換。在該巡察等奉命遠行。既已視為傳舍。及至彼處。而積習相沿。因循滋弊。懦弱者苟幸無過。坐待瓜期。喜事者擅作威

福諸事。多所掣肘。夫御史所以稽察人者也。今乃自作弊。後先相襲。不為怪。豈朕差往本意。其乾隆五年以後。歷任巡臺御史。俱著交部嚴察議奏。臺灣本有總兵道府大員。足資彈壓。一切案件。原屬本省督撫察核。似可不另派巡察。以滋煩擾。至盛京等處巡察。所司不過注銷案件等瑣屑之事。於地方政務。亦未見有所裨益。所有各巡察之處。或應仍差往。或應一併掣回。著大學士九卿詳議具奏。○是日祭先蠶之神。皇后親詣行禮。○甲午。諭據直隸總督那蘇圖奏。稱從前奏請改撥運通米四萬二千石。供應陵糈。所有雜費。經部定議。與截漕之例不符。未准支銷。但撥運之米。必按季支給。非隨放隨支者。可比其收貯鋪墊諸費。必不可少。請每石按給銀二分等語。此項米石。乃抵撥截漕。

為

陵糈之用。所請之費。勢所必需。著准其支給。其
他採買之項。不得援以為例。該部即遵諭行。
○諭軍機大臣等。據黃廷桂奏。辦固原兵民
搶掠。未經身自前往摺內。又有去冬十二月
內涼州標兵糾夥投遞無名呈狀。借糧度歲。
道府等隨經支借口糧。兵心均已寧帖等語。
此案該督撫等。比時並未據實奏報。黃廷桂
非因奏辦。亦久已匿不上聞。看此則各邊鎮

平定縣志卷六

四

營伍中。暗為消弭者。更不知凡幾矣。甘省自
乾隆四年。涼州兵丁鼓譟。去冬仍復糾眾借
糧。而固原遂有黃夜搶掠之案。營兵多事。獨
該省為甚。雖曰風氣強勁果敢。但致此之由。
必有其故。或因提督屢易。未能熟悉軍心。或
因給餉之時。不無濡遲扣剋。或有奸徒煽惑。
樂於生事。或因時當偃武。若輩勇悍之氣。無
所發洩。輒借端肆橫。或因大員不知輕重。專
以姑息養奸。或因武弁不能體卹兵情。轉以

訓練煩苛。而致怨皆不可不究悉其所由來

因病發藥。先事豫防。亦該督撫所應留心體
覺者也。前經傳諭慶復。令其體察生事緣由。
為善後長策。今再行申諭慶復。黃廷桂。令詳
晰體察。細究根源。據實奏聞。邊省嚴疆。最為
緊要。務令嚴加整飭。剔除積弊。使兵丁奉令
畏法。毋致妄行滋事。以肅戎伍。尋甘肅巡撫
黃廷桂覆奏。查前次涼標今番固原俱為支
借口糧而起。蓋因生齒日繁。既無買賣。又無

平定縣志卷六

五

手藝。惟賴餉銀度日。寅食卯糧。稍加節禁。便
出怨言。以致易於生事。善後長策。必須詳妥。
方克有濟。業經扎商督臣慶復。裁酌會奏。報
聞。○予故內大臣品級承恩公凌柱。祭葬如
例。諡良榮。○一等子旺扎勒故。無嗣。以其叔
伍巴什襲爵。○免山東官臺王家岡。西由。三
場。寬地十一年分水災額賦有差。○乙未
上幸靜宜園駐蹕。至丁酉皆如之。○吏部等部
會議大學士管川陝總督事公慶復等議覆

西安布政使慈中奏裁同州府潼關縣缺。其屯地錢糧等事歸駐劄之撫民同知管轄。並將潼關縣學改為廳學。仍留訓導一員。原設之典史教諭大慶關巡檢俱裁。撫民同知一缺改為衝繁難三項要缺。在外揀選等語。應如所請。至分隸之戶口兵米草束常社各倉驛遞夫馬學額并該廳之養廉公費鹽引各項細數應俟另議具題到日再議從之。○以故鎮國將軍伊克塔哈子杭麟照例襲封頭等奉國將軍。多羅信郡王德昭子華齡奉國將軍查庫齊子綽和諾奉國將軍伯祥子廣安照例襲封奉恩將軍。免江蘇睢寧縣十一年分水災額賦六千七百二十兩有奇。○丙申十三經注疏二十一史刻成議敘提調編校校錄監造各官加級紀錄有差。

御製重刻十三經序曰。班固氏曰。六學者王教之典籍。先聖所以明天道正人倫致至治之成法也。漢代以來。儒者傳授或言五經。或言

七經。暨唐分三禮三傳則稱九經。已又益孝經論語爾雅。刻石國子學。宋儒復進孟子前明因之。而十三經之名始立。自宋易漢唐石刻之舊五經始有板本。及明南北監板行。而箋疏傳義臚列具備。學士家有其書。傳習彌廣。顧訓詁繁則踳駁互見。卷帙重則承亥易訛。或意晦於一言之舛。或理乖於一字之謬。校讐疎畧。疑誤滋多。承學之士無所取正。我朝

列祖相承。右文稽古。

皇祖聖祖仁皇帝研精至道。尊崇聖學。五經具有成書。頒布海內。朕披覽十三經注疏。念其歲月經久。梨棗日就漫漶。爰勅詞臣重加校正。其於經文誤字以及傳注箋疏之未協者。參互以求。其是各為考證。附於卷後。不奈舊觀刊成。善本匪徒。備金匱石室之藏而已。書白學于古訓。乃有獲傳曰。經籍者聖哲之能事。其教有適。其用無窮。朕咨采勅幾實無審。

定之暇亦無鑒古之識而惟是緝熙遜志日就月將則有志焉而不敢不勉繼自今津逮既正於以窮道德之閫奧嘉與海內學者篤志研經敦崇實學庶幾經義明而儒術正儒術正而人才昌恢先王之道以贊治化而宏遠猷有厚望焉

御製重刻二十一史序曰七錄之目首列經史四庫因之史者輔經以垂訓者也尚書春秋內外傳尚矣司馬遷創為紀表書傳之體以

成史記班固以下因之累朝載筆之人類皆嫻掌故貫舊聞旁羅博采以成信史後之述事考文者咸取徵焉朕既命校刊十三經注疏定本復念史為經翼監本亦日漸殘闕併勅校讐以廣刊布其辨謬別異是正為多卷末考證一視諸經之例明史先經告竣合之為二十二史煥乎冊府之大觀矣夫史以示勸懲昭法戒上下數千年治亂安危之故忠賢奸佞之實是非得失具可考見居今而知

古鑒往以察來揚子雲曰多聞則守之以約多見則守之以卓豈不在善讀者之能自得師也哉○禮部議覆甘肅巡撫黃廷桂疏稱甘省土司與州縣衛往來文移向無一定體制請將土司三品至六品分為三等指揮使及指揮同知列為一等與州縣衛守備往來文移用平行手本僉事列為一等州縣衛守備與僉事用照會僉事與州縣衛守備用牒呈千百戶列為一等州縣衛守備與千百戶用牌票千百戶與州縣衛守備用中文查指揮使及指揮同知雖係三品其體統原不得與內地之三品等若文移平行不足以資彈壓請將該撫所分土司三等之處分為二等其指揮使及同知僉事職銜者與州縣衛守備往來文移州縣衛守備用照會指揮使及同知僉事用牒呈其千百戶與州縣衛守備往來文移州縣衛守備用牌票千百戶用中文再該撫稱同知管轄土司與知府之表率

全郡者相似。應將指揮使指揮同知列為一等。與同知文移用牒呈。同知用照會。僉事千百戶列為一等。與同知文移用申呈。同知概用牌票。查同知與州縣衛同屬統轄土司之員。章程自宜畫一。應令指揮使指揮同知僉事。與同知文移用牒呈。同知用照會。千百戶與同知文移用申呈。同知概用牌票。從之。工部議覆署江南河道總督顧琮疏稱清河北岸李家莊縷隄貼近鹽河。溜勢北趨。直掃隄根。頂衝至要之處。需備築挑水壩長二百二十丈。以保隄工。應如所請。從之。免山西陽曲太原二縣十一年分水災額賦二十六百八十兩有奇。○丁酉。諭軍機大臣等。瑚寶前赴固原時。已經批諭令其寬嚴得濟。留心酌中。化囂凌之惡習。近據慶復奏稱。許仕盛不得兵心。而二三悖逆之徒。乘機糾眾。直欲謀殺提督。事既不遂。轉而搶刦等語。觀此。則固原兵丁之驕縱犯上不法。已極。亦由於許

仕盛急遽輕率。有以激成事端。此番辦理。於已往之事。自當盡法重懲。業經督撫審擬題結。瑚寶蒞任。應加意整頓。但亦不必過於峻厲。彼無知之輩。愚悍性成。易為流言所動。必當安慰眾心。使共知國家養體恤之深恩。守法奉公之大義。瑚寶身係旗員。向曾駐防在外。諳習邊情。今簡任提督。勿因甫經到任。急切辦理。以致人心惶懼。當慎密持重。緩急得宜。使兵知畏法。漸次轉移可耳。前曾傳諭慶復黃廷桂。令其體察該處兵丁。何以易於生事。或因提督屢易。未能熟悉軍心。或因給餉之時。不無濡遲扣剋。或有奸徒煽惑。樂於生事。或因時當偃武。若輩勇悍之氣。無所發洩。輒借端肆橫。或大員不知輕重。專以姑息養奸。或因武弁不能體恤兵情。轉以訓練煩苛。而致怨當究悉其由來。因病發藥。先事豫防。可并傳諭瑚寶。令其逐一體察。將來如何整飭化導。方為善後長策。詳晰斟酌。奏聞。再

據慶復奏稱固城內外兵多民少而民人中回子過半。回子中有掌教專司教約等語。夫掌教乃回教中私自推擇充當。非強有力而為衆所畏。則必狡黠而足以籠絡衆心。方肯受其約束。此於人心習尚俱有關係。但相沿已久。而若輩人衆心齊。蔓延各省未易繩以官法。驟為改革。向來地方官平日並不留心防範。不能禁制於未發之先。以致屢屢生事。瑚寶駐劄固城。應就近時時體訪量度情形。懾服銷弭。以期永杜釁端。乃邊鎮地方切要之務。不可如慶復等至彼時面呼掌教之人。諭令約束。是轉假掌教以事權。張其聲勢。非計之得也。標兵中回人太多。彼倚恃身在戎行。敢於滋事。應留心分別。其豪悍者懲革之。怯懦者沙汰之。漸次整飭。使營伍肅清。但不宜顯露形跡。並不可以此意宣示營弁。防其稍有洩漏。又致訛言駭聽。所關更復不小。慎之。○豁除廣西鬱林州荒田八十三畝有奇。

額賦。○緩徵湖北漢川棗陽二縣十一年分水災額賦。○戊戌。

上回。圓明園。大學士等議准福建道監察御史葛德潤奏稱。外省地方事件未經申覆。先具稟帖。蓋以補文移所不及。而不肖之員。挾嫌報怨。駕虛造端。獻能於上。輒肆詆毀。更有狡詐之徒。於謁見上司時。意所傾陷。借事陰中。聽者不覺其入實。為外省積習。嗣後文武官員具稟上司。除應辦公事外。不得妄言上官及同寮文武短長。如有挾私密譖者。該督撫秉公查察。一涉虛誣。即嚴行叅處。若屬員進謁於公事外。乘間浸潤。意在中傷者。即面加斥責。庶為吏治人心之助。從之。○又議准順天府府尹蔣炳府丞孫灝奏稱。近聞各省學臣因科舉名數稍減。貢監可赴京應試。遂止於生員內錄取貢監。多有遺棄。請勅下各省學臣。將本省貢監與生員一體錄科。不得豫立成見。庶士子無赴京跋涉之艱。而京闈

號舍亦不至有不能容納之慮得旨依議速行○又議准順天府府尹蔣炳府丞孫灝奏稱直隸每舉人一名錄科八十名應取科舉七千九百二十名貢院號舍僅萬間除滿合夾旦鹵四等字號須用四千餘間所餘止五千餘間萬難容坐直隸文風較江浙兩省究屬有間請照山東省每中一名錄取六十名得旨依議速行○予故內大臣葉楚祭葬如例○免直隸豐潤縣越支場竈地十一年分旱災額賦十之二并予緩徵○己亥

上詣

皇太后宮問安

上還宮○鑄給直隸靜海縣獨流鎮巡檢司印從總督那蘇圖請也○免江蘇山陽縣淮安衛十一年分水災額賦二千五百兩有奇○賑奉天錦縣廣寧二縣被水災民○庚子上以和敬公主下嫁御保和殿筵宴○諭朕普免天下錢糧今歲係安徽省輪免之年聞該

省有馬田稻租一項係歸公官田不在蠲免之例但念民佃終歲勤動不得一體邀恩未免向隅著加恩將馬稻租息蠲免十分之三俾耕佃農民均霑實惠該部遵諭速行○戶部議准前護山西巡撫陶正中疏稱大同府屬豐川衛乾隆十年分勸墾旱田二頃三十畝應徵額銀照例升科從之○以固倫和敬公主下嫁科爾沁輔國公色布騰巴勒珠爾授為固倫額駙○改鑄山西總理旗民蒙古事務分巡歸綏兵備道關防從巡撫愛必達請也○辛丑

上詣

皇太后宮問安○諭曰大學士慶復在外多年

綸扉重地應召取回京辦理閣務昨歲四川瞻對之役甫經告竣今又有大金川番蠻肆橫不法已命慶復相機征剿今思彼地番衆恃強生事屢屢不能安輯必須經理得宜始可永遠寧帖貴州總督張廣泗於此等苗蠻

情形素所熟悉。貴州地方張廣泗料理以來。現在妥協苗種向化。可以無虞。川陝總督員缺著張廣泗補授。不必來京。即由貴州取道速赴川省。大學士慶復俟伊到川之後。將彼地事機情形詳悉告知。或可回京。或仍應留川一同辦理。自行酌定。不必急於赴闕也。雲貴二省原係總督一人管轄。著仍復舊制。即以張允隨授為雲貴總督。圖爾炳阿著授為雲南巡撫。孫紹武著授為貴州巡撫。又諭

山東臨清衛上年被水成災。坐落濟寧魚臺之十三屯。因分數較輕。未邀加賑。第念該處連被災傷。當此青黃不接之際。小民餬口艱難。著照濟寧等處之例。極貧加賑兩月。次貧加賑一月。以資接濟。其郟城縣從前遺漏戶口。著該撫查明補給一月賑糧。以免匱乏。至被災各該縣境內。有上年秋成少歉。尚未成災者。雖非被災民人可比。但與災地俱屬毗連。輸將未免拮据。所有應徵舊欠錢糧。亦著

加恩緩至麥熟後開徵。俾民力得以稍紓。該部遵諭速行。又諭向來直隸有歉收地方需用米石。彼此商販有將奉天米石由海道轉運內地者。原屬應行之事。至將奉天米石運往山東。惟雍正八年議行一次。此後間有歉收之年。俱未舉行。或因山東與直隸天津不同。其海道遙遠。逼近外洋。恐有奸商透漏接濟奸匪之弊。且奉天上年有被水州縣。即直隸天津等處運販亦已停止。今趙青藜請令山東小民往奉天採買海運。其應否舉行之處。著大學士會同該部詳悉定議。速行具奏。壬寅諭上年豫省被水州縣已經按例賑卹。災民不致失所。惟歸德府之永城鹿邑夏邑商邱柘城五縣連年歉收。當此青黃不接之時。農務方殷。小民正資接濟。著該撫查明將此五縣被災六分之極貧及七分以上極次貧民。加恩展賑一月。使食用有資。安心及時耕作。該部遵諭速行。諭軍機大臣

等四川為臨邊要地。外控百蠻。山深箐密。兼之諸番野性難馴。恃強凌弱。攘奪仇殺。叛服不常。數年以來。屢多不靖。上年瞻對。復敢跳梁。今又有大金川肆橫不法。朕因張廣泗熟悉苗蠻情形。已降旨調任川陝總督矣。前據慶復等奏報。大金川土司莎羅奔將伊一女妻小金川。又嫁一女與巴旺。以為鈐制之方。近攻革布什咱之正地寨。又攻明正司所屬之魯密章谷。番民望風畏避。坐汎把總李進廷抵敵不住。退保呂利。看此情形。則賊酋恃其巢穴險阻。侵蝕諸番。張大其勢。并敢擾我汎地。猖獗已甚。張廣泗到川之日。會同慶復將彼地情形。詳加審度。其進剿機宜。作何布置。一切糧餉。作何接濟。善為辦理。再瞻對甫經平定。即有大金川之事。揆厥所由。因渠魁班滾未曾授首。無以示威。使之聞風懾服。即據報班滾焚燒自縊之處。情節可疑。焉知不詭詐免脫。潛往大金川勾通致釁。張廣泗到

彼。正可詳細訪察。伊於此案並未經辦。自必無所顧忌也。至川省番蠻種類繁多。歷年多生事端。即如郭羅克於康熙年間橫肆剽奪。旋經安輯。迨乾隆七年。又復滋事。其他如曲曲烏夷等。亦復自相攻殺。後經發兵彈壓。始得寧帖。又如巴塘裏塘。近因將汪結補授宣撫司。其屬下遂有煩言。蓋番性易動難馴。尋仇報怨。是其常事。但伊等皆受朝廷封號。給與號紙。乃不遵約束。互相戕賊。即在土司地方蠢動。不得不為防範。已費經營。若敢逼近內地。擾我邊陲。則聲罪致討。更屬勞師動衆。總因平日駕馭無方。未有成算。不能使之懾服。畏威。以致蠻氛未靖。張廣泗熟悉苗情。善於撫馭。大抵番蠻與苗性相近。今莅川省。即以治苗之法治蠻。自能警服其心。消弭其釁。務須一一通盤計算。為永遠寧謐之圖。可將從前川地所有辦過郭羅克曲曲烏夷瞻對等及現在大金川案件。抄錄寄與張廣泗閱看。

俾豫知彼地前後原委以便熟籌經理副朕綏靜邊疆之意○又諭據御史張孝捏奏稱蒲州府屬萬泉縣去冬因辦理以糧載丁一案有刁徒聚集多人圍城燬屋之事至今未見邸抄似未可希圖省事在外完結等語此事從前未據該撫奏報朕思蒲郡乃晉省邊要之區聚衆乃大干法紀之事此等刁風漸不可長可傳諭愛必達令其查明此事起釁根由及現在作何完結之處據實具摺奏聞

尋覆奏此案丁攤地糧緣該縣民籍多而鹽籍少是以鹽戶勻攤之數較少於民有該縣舉人張與琳等暗使縣民馮世祿等捏稱門銀一項原係鹽戶應辦赴省具控前撫臣阿里衮飭令仍向民戶徵納張與琳等出具甘結縣民嗔其反覆將張與琳等房屋焚燒查案內並無圍城一事此案始於上年九月節奉前任撫臣嚴批又拏獲馮世祿等解蒲審究該守朱發一味姑息養奸至今未覆詢之

兩司僉稱該員在任數載素日辦事即無決斷俟審明完結後酌量具奏得旨覽是何言耶以無決斷之人而令其在知府之任數載布按皆知何不告之巡撫此足見伊等不實心矣○諭協辦大學士高斌據周學健奏稱七巨以下海口中洪水勢最深處僅一丈一二尺淺者止七八尺皆因海口每日兩次潮湧水緩沙停所以海口中洪轉淺於內地等語海口淤淺之說自來即有不過相沿浮議

無足深信蓋係彼處之人欲聳動衆聽藉興大工之意黃河會淮入海以來自宋迄今已數百年若果淤淺有礙何以安流至今蓋海潮沙汎不常旋湧旋消原無定勢如黃河水勢消緩適當海潮湧盛則停沙較多一遇汎水長發仍然汕刷如舊即伊奏清河等處中洪初止四五尺之深未及半月遂深至六七尺一丈不等皆因清口乃黃淮交會處所以水勢深淺靡定未必真由疏挖之力觀此

則海口深淺不足憑信可以類推且海防一帶從前大學士鄂爾泰曾與爾會勘乾隆九年大學士訥親亦經親往俱云海口深通並無淺濫今周學健復有此奏未免又為俗論所搖大凡河工之事當以鎮靜為要固不可玩工貽患亦不可喜事輕舉目下汎水未發各處工程俱屬平穩即有應行舉動之處亦俟爾至彼再行商酌妥辦其蔣家閘工程亦令暫緩移建可一併寄諭周學健知之○大

學士查郎阿以老病乞休允之○以湖南辰永靖道永貴為雲南布政使○以貴州按察使恒文為貴州布政使貴州糧驛道介錫周為貴州按察使○免江蘇淮安揚州徐州海州等府州屬十一年分水災額賦一萬四千九百兩有奇○癸卯諭軍機大臣等據完顏偉奏稱山東兗沂曹道吳同仁因聞生母病篤一面具詳即將印信封交嶧縣知縣齎送藩庫有違定例請旨革職交部察議等語吳

同仁不候詳請具題擅離職守自應照例題叅但該員又有母病情節亦應詳查確實如果因母老病危至情迫切尚屬人子盡孝之誠心於情可憫不至遽請革職如伊母尚不至危篤而該員因桃汎盛長有意規避或任內別有經手錢糧未清等情則應從重議處完顏偉乃並未詳查確實緣由遽行具摺請旨革職朕難於批示完顏偉之拘泥不識大體往往如此著傳諭知之○軍機大臣等議

覆福建巡撫陳大受奏內地採買臺灣米穀應俟豐年價賤委員赴買不必拘作年例並將買數價值明白曉諭民番以杜影射私買之陋習應如所請但臺郡素稱產米之區漳泉一帶藉以酌濟民食該撫又不得因一時收成未獲豐稔遂視停買為常例不為內地久遠之策應令該撫悉心詳查務使內地可以接濟臺郡亦不至缺乏從之○大學士會同戶部議准署江蘇巡撫安寧奏稱江省倉

儲虧缺甚多。米價昂貴。難以採買。請將江省捐監之例。仍停部捐於本省。交納本色。照現在減二之例。再量減五分。其捐貢一條。亦改歸本省。以本色報捐。得旨依議。速行。命平郡王福彭署理馬政大臣。○豁除廣東曲江縣被水衝淹田地九頃三十一畝有奇。額賦七百二十兩有奇。○甲辰陝西道監察御史湯聘奏。近聞民間典鋪有收當米穀一事。囤積甚多。在典商不過從中射利。而奸商刁販。恃有典鋪通融。無不乘賤收買。隨收隨典。輾轉翻騰。約計一分本銀。非買至四五分銀數之米穀不止。至米價昂貴時。陸續取贖出糶。小民一歲之收。始則賤價歸商。終仍貴價歸民。此弊江浙尤甚。不獨米穀。每年遇蠶絲告成。及棉花成熟。一如收當米穀之法。小民衣食之計。止以供奸商網利之圖。請勅諭直省督撫。嚴飭州縣有司。無論城鄉典鋪。如有囤

積米穀等貨。尚未糶賣者。諭令首出。照值官為收買。免其懲治。隱匿不報。一經發覺。即照違制律。嚴行治罪。并嗣後每季取具各典鋪並無囤當米穀等項。遵依甘結存案。再犯治罪如律。得旨所奏是。著各該督撫照所請實力行之。該部知道。○改鑄陝西西寧鎮屬歸德營都司關防。從大學士管川陝總督公慶復請也。○乙巳。諭據副都統傅清奏。稱郡王頗羅鼐病故。頗羅鼐任事以來。克盡忠誠。實心効力。今聞溘逝。深為軫悼。著加恩於彼處收貯錢糧內。賞銀一千兩。料理喪事。例應遣大臣致祭。著派索拜前往祭奠。應行恤典。該部照例查奏。朕從前因念伊奮勉。肫誠。降旨令頗羅鼐保奏一子。承襲封爵。據頗羅鼐以次子珠爾默特那木扎勒堪。以効力具奏。業加恩封為長子。今辦理藏衛噶卜倫事務。乏人。即將伊子珠爾默特那木扎勒襲封郡王。但年尚幼小。甫經襲爵。辦事噶卜倫等務。如

頗羅鼐在時同心協力。龜勉辦理。著傳清將此旨通行曉諭知之。○又諭曰。古北口提督索拜。現在差往西藏。致祭郡王頗羅鼐。著即速來京。其提督印務。著正白旗副都統拉布敦前往署理。○諭軍機大臣等。西藏地方關係甚要。頗羅鼐經事練達。下人信服。伊亦能奮勉効力。諸事毋庸置念。今頗羅鼐已故。雖命伊子珠爾默特那木扎勒襲封。總理藏衛事務。而藏地素屬多事。衆心不一。值珠爾默特那木扎勒年幼新襲之時。未必即能如頗羅鼐收服衆人之心。頗羅鼐在時。凡事俱由伊主張。不過商同傳清斟酌辦理。今非頗羅鼐時可比。著傳清逐處留心訪查。如有珠爾默特那木扎勒意見不到之處。即行指示。不得稍有疎忽。再上年有達賴喇嘛屬下人鎮壓頗羅鼐一事。伊等彼此已露不和之意。今頗羅鼐暴歿。珠爾默特那木扎勒或念伊父動生猜疑。與達賴喇嘛不睦。或達賴喇

嘛又信人言。即照所行於頗羅鼐者行之於珠爾默特那木扎勒。則更有關係。傳清於此兩人。善為和解。惟期地方安靜。不生事端。伊等彼此和好。屬下人即有奸詐者。亦不能滋事矣。頗羅鼐總理藏務多年。皆因能用其屬下可信之人。凡事始皆妥當。珠爾默特那木扎勒宜令其用伊父信用舊人協力料理。方為有益。再今歲準噶爾又往熬茶。恐其聞頗羅鼐已歿。彼處無總理之人。任意藉端造言生事。亦未可定。亦當留心防範。凡應備辦牲畜口糧等項。務須豫為儲備。至照看來使之侍郎玉保。係前次承辦之人。一應事宜俱宜會同商酌。務期妥協。現在頗羅鼐歿後。彼處衆人情形若何。即應奏聞。乃並未具奏。殊屬疎忽。此際彼處衆人意見情形及珠爾默特那木扎勒襲爵辦事後各處人心輸服與否。俱著一一加意體訪。具摺奏聞。倘有一二不肖滋事之人。亦著傳清即行酌量辦理。以示

警戒

實錄卷之二百八十六

三

大清高宗法天隆運至誠先覺體元立極敷文奮武孝慈神聖純皇帝實錄卷之二百八十六

大清高宗法天隆運至誠先覺體元立極敷文奮武孝慈神聖純皇帝實錄卷之二百八十七

教修

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理
吏部理藩院事務正黃旗滿洲副都統世襲騎都尉軍功加七級隨帶加一級尋常加二級軍功紀錄一次臣
總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務
世襲騎都尉軍功加十九級隨帶加二級又加二級臣董誥內大臣戶部尚書鎮江府知府滿洲副都統軍功紀錄五次
尋常紀錄十四次臣德瑛經筵講官太子少保工部尚書紀錄六次臣曹振鏞等奉

乾隆十二年丁卯三月丙午戶部議准廣東

實錄卷之二百八十七

一

巡撫準泰疏稱粵省各屬勘丈過沿海沙田
虛缺稅畝共四頃七十畝徵銀六兩三錢一
分本色米三斗八升已起徵額外稅一頃九
十二畝徵銀四兩二錢一分應於奏銷乾隆
十一年地丁冊內開除未起徵額外稅四十
畝徵銀一錢八分又勘丈過溢額沙坦稅三
百五十頃四畝徵銀一百六十二兩七錢照
例升科從之○命協辦大學士吏部尚書高
斌為大學士禮部尚書來保為吏部尚書協

辦大學士。調戶部尚書海望為禮部尚書。仍管戶部三庫事務。以戶部左侍郎傅恒為戶部尚書。○命古北口提督索拜駐藏協同副都統傳清辦事。○免安徽壽州、宿州、鳳陽、臨淮、懷遠、虹縣、靈璧、鳳臺、阜陽、潁上、霍邱、亳州、蒙城、太和、泗州、盱眙、天長、五河等十八州縣鳳陽鳳中長淮宿州泗州等五衛并泗州續報學田乾隆十一年分水災額徵銀七萬六千五百一十七兩有奇。米三百五十七石八斗有奇。麥五十二石九斗有奇。○丁未

上詣

皇太后宮問安。○幸瀛臺。○諭軍機大臣等兩淮天津設有鹽運使二缺並無多辦事件。其責任不過稽查錢糧出入尚不如各道員有刑名地方等事。其所得養廉款項反數倍於各道員殊為未協。著該鹽政查明酌留若干期於敷用其餘悉行裁減歸於公項以有餘

補不足。酌盈劑虛之道亦當如此。向來該鹽政節省養廉以及平餘等項每年請旨。此項亦著入於此內。一併具奏請旨。尋長蘆鹽政伊拉齊奏長蘆舊定運使等員養廉為數過多。請照山東運使等員之例。運使五千兩。運同二千兩。運判一千六百兩。餘裁減歸公。通計每年實在歸公銀六千一百二十兩。即於本年為始。扣存運庫。歲底奏解。又兩淮鹽政吉慶奏查運使養廉較各道為多。請酌留四千兩。自本年丁卯綱為始。其減存銀二千兩入於奏報節省摺內請旨。報聞。○命副都統羅山以原銜管理阿爾台等處軍臺並商都達布遜諾爾馬廠事務。○戊申

上詣

奉先殿

壽皇殿行禮。○諭曰。副都御史德爾敏著補授戶部左侍郎。德爾敏現在奉差其員缺著吏部侍郎德沛暫行署理。○己酉

上御乾清門聽政○諭據四川巡撫紀山奏稱大金川土司莎羅奔勾結黨與攻圍霍耳章谷千總向朝選陣亡并侵壓毛牛鎗傷遊擊羅于朝等語經軍機大臣議令該督撫等迅速派官兵遴選將弁統率前往相機進剿已令星速行文知照前將張廣泗調任川陝總督已諭令速赴川省今觀紀山此奏勢不可緩可再傳諭張廣泗令其即速前赴會同紀山相度機宜如慶復已經赴川一同商酌進兵迅速剿滅毛牛迫近西鑪逆酋敢於侵擾傷及官兵勢甚猖獗總因前此瞻對之事辦理未善無所懲創不足以震懾蠻心而所遣將弁輕率寡謀不知用兵節制兼之崇山密箐餽運艱難曠日失時烏拉死傷甚衆此皆前事之失可為炯鑒今番千總陣亡由於陷伏遊擊甫經迎敵即已受傷官兵輕進取敗土衆望風奔竄其疎忽輕率漫無紀律已可概見張廣泗辦理貴州苗疆甚為妥協此番

進剿一應機宜專聽張廣泗調度申明軍律指授方畧籌畫糧餉迅速進兵務令逆酋授首剷絕根株以期永靖邊陲張廣泗在黔所知習於軍旅臨陣勇敢足以出奇制勝之將弁若欲帶幾員往川驅使亦可酌量帶往一面奏聞○西路軍營叅贊大臣副都統保德期滿以鑲紅旗蒙古副都統那蘭保代之○旌表守正捐軀之江蘇嘉定縣民陳子揚女陳氏○旌表守正被戕之四川金堂縣民黃茂發妻曾氏○豁免直隸蔚州三年分水衝沙壓地一百十九頃七十三畝熱河道屬之拏兒河水衝地一項九十四畝額賦○庚戌上詣

皇太后宮問安○幸圓明園○諭羅山由現任副都統差往管理阿爾台等處軍臺事務仍照伊原銜賞給京師副都統養廉此後如有由現任副都統差往管理阿爾台等處軍臺事務者著照此例行○戶部議准署廣西巡

撫鄆昌疏稱。乾隆十年分興安武緣恭城三縣開墾水田六十二畝四分。應徵銀米。照例升科。從之。○工部議覆江南總督尹繼善疏。稱天然閘河。彭家正河。邳州盧口沂河。朱家祠堂新閘河。梅家道口等處。應行疏浚。改挑築壩壘堰。幫修殘缺。應如所請。從之。○辛亥諭。各省沿海口岸。設立塘汛。更有哨船遊巡。原以防偷渡及透漏禁物之弊。朕聞福建省巡查兵役。惟以需索為事。出入船隻。俱有規例。需索既遂。一切不查不問。該管官員。所司何事。乃漫無覺察。一至於此。嗣後務須痛革陋弊。毋使仍蹈前轍。至於各省俱有口岸。閩省如此。諒他省未必不然。著各該管官員一體嚴行查察。實力革除。該部即遵諭行。○大學士等議。駁御史趙青藜奏。請暫弛奉天米禁。聽商轉運山東接濟一摺。與例不合。得旨。大學士等照例議駁。固是。向來海禁甚嚴。原以防奸商透漏。接濟奸匪之弊。但東省上年

被水地方。目下賑濟各項。需用米石。倘奉天可以通商販運。而稽查嚴密。不致偷越。自於災地有益。著行文詢問山東巡撫阿里衮。盛京將軍達勒當阿。是否可行。奉天米石。可以運往若干。如何按數給照。撥運東省。如何驗照稽查。俾商販流通。不致透漏。而奉天米價。又不至於騰貴。如果可行。一面辦理。一面奏聞。此因東省偏災。一時權宜之計。嗣後不得援以為例。該部速行。尋阿里衮覆奏。海運為一時權宜之計。奉天米石。是否足資撥運。必須咨商酌辦。嗣接准部咨。內議覆盛京將軍達勒當阿具奏。奉屬米價增昂。不能通融接濟東省。奉旨俞允。現在截留漕糧。足資儲備。其撥運奉天米石之處。應照部議停。下部知之。○戶部議准湖廣總督塞楞額奏。稱上年湖北因銅觔不敷。鼓鑄經前督臣鄂彌達奏准。暫改鑄八分重之小錢。搭放兵餉。今查小錢與大錢同價。私銷私鑄二弊。相因而起。應

仍遵定制。改鑄大錢。并採買漢鎮客銅。添鑪鼓鑄。將搭放餘剩錢文。設局照市價酌減出售。銀歸原項。所需銅價。照定價支給報銷。其市用京整小錢。定為每千文易銀一兩。放餉所用八分重之小錢。照成本計算。每銀一兩。給錢一千二百四十六文。又遠安縣三寶山地方產銅。試採有效。應親查確實。酌定章程。請旨辦理。得旨。依議速行。○調山東登州鎮總兵馬負書為福建漳州鎮總兵。以直隸獨石口副將什格為山東登州鎮總兵。○壬子。諭京師入春以來。雖得雨澤。尚未霑足。今穀雨已過。未沛甘霖。農田望澤甚殷。朕心深為廬念。宜申虔禱。著該部查照定例。敬謹舉行。○諭軍機大臣等。張廷結交劣守。仗勢殃民。橫行鄉曲。現在確審定擬。其平日欺凌訛詐。魚肉善良。今既敗露。所有貲財。應為地方公用。著將伊勘過家產。入於江賑項內。以充賑濟之需。可傳諭尹繼善安寧。令其遵照辦理。

軍機大臣等議奏。勸諭義倉一事。據山西巡撫愛必達奏稱。可與直隸山東一體舉行。而河南陝西二省。俱奏明難與社倉並行。臣等思社倉義倉。名異實同。全在地方官善於勸諭。乃為無弊。各省情形不同。應聽各督撫因地制宜。任從民便。其河南陝西二省。仍無庸仿照舉行。報聞。○頒給湖北安陸府沙洋管理水利同知鍾祥縣石牌水利縣丞關防。潛江縣高家場巡檢兼管水利印記。天門縣岳口水利縣丞關防。荊門州建陽馬驛兼理巡檢事鈐記。從總督塞楞額請也。○免直隸薊州寶坻寧河靜海蔚州宣化萬全西寧蔚縣懷來保安豐潤玉田張家口同知等十四州縣廳。十一年分水災額銀二千九百一十八兩有奇。糧四千九百三十五石有奇。○癸丑。諭據公九如奏請指俸借銀三千兩。修伊高祖英親王阿濟格園寢。英親王原係國家宣力名王。今伊園寢年久傾頽。不必借俸修理。著即加恩交與工

部撥官帑修理。○調四川建昌鎮總兵官畢映為廣東右翼鎮總兵官。廣東右翼鎮總兵官許應虎為四川建昌鎮總兵官。甲寅諭軍機大臣等。據山西巡撫愛必達所題樺林營火藥庫失火一案。現發部議。朕思彼時那爾泰原係本協副將。又護理總兵印務。係地方大員。其標弁將火藥盡數燒燬。震塌城垣。殊屬疎忽。且向日伊即不能實心奮勉。一切因循。所有應修城工。著落那爾泰等賠修。火藥庫房等項。著落都司伊三泰名下賠補。方為允協。部覆到時。遵旨辦理。○又諭陝西同州府屬之朝邑華陰二縣。與山西蒲州府屬之永濟縣接壤。兩省沿河居民彼此互爭灘地。雍正七年。差員查勘築牆立界。訟端始息。今陝省二邑。又有被晉省民人燒燬房屋。搶奪農器之事。已據慶復等奏報。移咨山西巡撫各委大員會勘。愛必達何以未見奏到。著傳諭愛必達。務要妥協之員。詳加會勘。不可

因晉省民人稍存袒護之見。秉公定界。永杜爭端。○又諭據大學士慶復奏報陝甘二省所屬有雨雪已經霑足者。亦有得雨稍遲。尚未霑足之處。統望穀雨前後。漸得透雨。則農田均屬有賴等語。可傳諭徐杞黃廷桂。令其留心確查。雨澤稀少。各州縣不知此際已得雨否。倘將來不得透雨。則青黃不接之際。或應借給籽種。或應平糶倉糧。其中或有成災處所。應行賑恤。以資接濟。均宜先事綢繆。酌看地方情形。多方佈置。毋致臨事周章。務須妥協辦理。並將辦理之處。具摺奏聞。尋陝西巡撫徐杞覆奏。查各屬倉糧足資動用。計全省未得透雨者十之一二。已霑足者十之七八。現在實無據報成災應賑之處。得旨覽奏。俱悉。甘肅巡撫黃廷桂奏。察視各邑情形。其得雨已足者。農民悉安生業。即得雨未足數處。自春迄今。借糶兼施。民情亦極安帖。得旨覽奏。俱悉。其未得透雨之處。若致成災。一切

賑恤。妥酌為之。○吏部等部議准湖南巡撫楊錫紱奏稱各府州縣設立科房。原以收貯案卷。最關緊要。查湖南府州縣竟有書吏不入衙門。一切案卷俱存私室。請嗣後如書吏不入科房。並將案卷攜歸私室等弊。該管官不行查出者。照約束不嚴例。降一級調用。并請邊遠省分有似此者。亦一體飭查。從之。○戶部議准江西巡撫開泰疏稱。乾隆十年分南昌萍鄉萬載太和萬安樂安廣豐弋陽貴溪安遠等十縣。勸墾田地六頃八十六畝。有奇。照例升科。從之。○禮部議覆御史書昌湯聘等奏稱。查繙譯鄉試。例用謄錄筆帖式百餘員。該員等俱係各部院現在行走之人。令其為生監人等謄錄試卷。似於體制未協。而各所廉官品級與筆帖式不甚相懸。礙難約束。應請停止。於各旗領催內遴選熟練清字守法安分者。送入謄錄。應如所請。又稱外廉各官併入場彈壓之副都統及叅領章京等

官。其跟隨人役應酌定人數。再場內需用各項夫匠人役。務須雇覓良民充役。不得希圖省費。雜以乞丐無賴之輩。仍令各該員於三日前照例造具確實年貌花名細冊。加具印結。申送外場御史查點。倘與冊結不符。即將承辦之員指名叅處。均應如所請。嗣後外廉各官跟隨人役。各帶二人。副都統各帶三人。叅領章京等官各帶二人。從之。○旌表守正被戕之直隸沙河縣民孔卯英妻張氏。○乙卯諭現出有道府數缺。向有各部院保送之例。著各部院堂官於司員內揀選可勝道府之任者。秉公保舉。交與吏部作速帶領引見。候朕簡用。○丁巳。

上詣

皇太后宮問安。○還宮。○廣東巡撫準泰奏粵省本年地丁錢糧輪免各屬俸食等銀由藩司撥款。其遠處州縣赴司領支往返繁費。查各屬有應徵稅契雜稅等項。應准照數動支。出具批

領赴司劃清抵兌。作正收支。得旨。此所為利析秋毫。而亦無當於實濟者矣。以理言之。國家不惜數千萬帑金。蠲租賜復。為臣工者。宜體此心。即俸工養廉。缺此一歲。不得滿索。亦所宜然。而況朕體恤備至。俸工養廉。皆許以別項支給。今復以路遠支領為難。錙銖較利。在州縣如此存心。必非良吏。而汝為之籌辦。所見直與若輩等。朕為粵省官方懼。且為天下吏治慙。○是日起。

上以孟夏享

太廟。齋戒三日。○戊午。諭向來各省鄉試正副考官。有通行考試之例。亦有令大臣保舉者。各科往往不同。而外間議論亦不一。今歲係大比之年。所有各省正副考官。著將應行開列人員。通行考試。其不願考試者。聽仍於應行開列中。著大學士九卿等。將學問優長。精於衡鑒者。各舉所知。密封交送內閣。進呈候朕酌用。如此考試與保舉並行。內有保舉而

考列優等者。固可簡任文衡。即未經保舉。而文藝入選者。亦一併簡用。則人材不致屈抑。而衆心亦當允服矣。該部即遵諭行。其非科甲出身。及無真知灼見者。亦不必強舉。○又諭據江西布政使彭家屏奏。稱豐年出賣倉穀。減價不必拘定五分一摺。內稱地方官於糶買兩事。有無數詐偽。而糶時之欺敝。尤不易除等語。彭家屏此奏。切中各省州縣辦理情形。但平糶乃惠民實政。豈容因噎廢食。地方官藉端罔利。固屬不職。亦由督撫司道平日不能稽查訓飭。以致習為風氣。即如廣東巡撫準泰。因州縣支領養廉赴省遼遠。為之籌畫脚費。經朕批示曉諭。準泰果能以大義曉諭屬員。屬員自當心折。而惟徇一面之詞。為之瑣屑經理。獨不思輪免錢糧之年。養廉許於別項支給。已屬恤下深仁。而於費數十金運致之末。斤斤計較。可見州縣各官。自顧之念重。而奉公之意輕。即其簞簋唯謹。保守

無過。乃出於懼。懼法網之畏心。非真知義利之大防。安然而不為也。州縣為民父母。閭閻休戚所係。而如此存心。尚可望其奉行德意。惠養羣黎。以州縣之眾。其中砥礪廉隅。束脩自好者。當不乏人。而自私自利之習。均所不免。督撫操轉移吏治之責。當加意整頓。正已以倡司道。司道等共秉公忠。稽察屬吏。時時訓飭。痛除私弊。務使實惠及民。庶吏治可望肅清。地方自有起色。朕於吏治人心。諄切誨諭。不啻再三。而州縣之存心。督撫之所見。尚復如此。因再頒此旨。期各督撫共勉之。準泰彭家屏摺併發。○諭軍機大臣等。據楊錫紱疏。叅耒陽縣知縣鄒鳳城。虧空銀兩。因母病買參。以致債主取逼。遂將庫銀挪給。并請將債主均免提究等語。經部議以是否。債主逼令移帑。令其妥擬報部。所駁甚是。鄒鳳城係侵貪劣員。理應治罪。今聽其粉飾之辭。反以為孝於其母。則是彼因孝而獲罪矣。楊錫紱

素係好名之人。遂借此等言語。為劣員掩飾。若竟草率完結。則將來侵欺庫項之人。勢必皆借此為辭。徒滋流弊。楊錫紱身任封疆。於此等處。全不留心。覺察著傳諭申飭之。又諭據安寧摺。奏徐州府屬宿遷縣革生王育英。因地方賑濟。希圖普賑。繕寫罷市知單。囑令窮民喊叫罷市。因天色尚早。各鋪原未開張。經知縣查拏。俱各奔逸。實屬罷市未成。應照刁徒直入衙門。挾制官吏例。發邊外為民等語。聚眾罷市。大干法紀。王育英既繕寫傳單。分貼縣城。乃謀事已行。何得以罷市未成。脫卸重罪。似此則刁風日長。大為人心風俗之害。著傳諭安寧。改照光棍律定擬具題。○己未戶部議准。福建巡撫陳大受疏。稱臺屬通郡丁銀三千七百六十五兩四錢。請於十二年為始。勻入田園內徵收。從之。○是月直隸總督那蘇圖奏。京東一帶得雨情形。得旨覽奏時。蒙

天恩賜以甘雨。自寅至辰。但尚未霑足。不無望蜀。又不知近畿曾否遍及耳。○又奏保郡續得雨澤情形。得旨。實足欣慰。然為日正長。此際豈可生滿足之念乎。○兩江總督協辦河務尹繼善奏海州所屬地勢低下。田多積水。先經奏准。照下河高寶等處。將窪地一例修築圩岸。臣現酌定規條。通行飭示。分年辦理。除有力者。督令自行修築外。其無力之戶。每土一方。量借給銀二分。由田主具領轉給各情形。并請將鳳潁。泗。三屬連年受災之鳳陽。宿州。靈璧。虹縣。懷遠。鳳臺。亳州。蒙城。太和。泗州。盱眙。五河等州縣。今歲秋收後。亦照例陸續修治圩岸。得旨。此誠務本良圖。妥協實力為之。○江南河道總督周學健奏。河務首在用人。酌定敘功陞補章程。得旨。總在爾鼓勵表率耳。豈有定法哉。○江西巡撫開泰奏。上年七月內。因福建福寧府屬有西洋人倡行天主教。左道惑人。奉諭各省督撫嚴密查拏。

懲治。其西洋人俱遞解廣東。勒限搭船回國。等因。茲確查江省。并無西洋人在境行教。創建教堂。惟高安。萬安。鄱陽。浮梁等縣。有胡柳喻元捷。沈鳴鳳。鄒雲章等五十餘人。訊係無知奉教。別無引誘聚眾不法之處。應將各犯交地保嚴加約束。經卷圖像銷燬。舊有教堂查照入官。再查上年十一月內。有西洋人李世輔。路過鄱陽。經該縣盤獲。訊係熱爾嘛哩。哪國人。乾隆五年入中國。在山陝二省傳教多人。上年至京。有西洋人席登元。遣人送伊回國。繞道過此。並未在此傳教等語。除一面移咨山陝。將奉教之人。確查完結。一面移咨禮部。向席登元查明李世輔來由。再行遞解廣東。勒限回國。得旨。知道了。此人且不可令其回國。即在江西拘禁。俟事竣後。摺奏請旨。○閩浙總督喀爾吉善奏。自杭抵閩。經過地方。雨水情形。得旨。覽奏俱悉。若似去年山東所奏。則不可信矣。朕何嘗以年成之豐歉。定

督撫之賢否。而爾尚不解此意。尚有粉飾之為。實應慙應改也。○福建巡撫陳太受奏。閩屬應補倉穀。緣穀價未經平減。買補未足。所有積存價銀。業報部候撥。另用其捐監一項。亦緣各屬內。或出米無多。或本地無願捐之人。未能足額。請照江南之例。隨地報捐。得旨。所辦是。若果願捐者多。則足加捐之數。之後。正可補買。補之不足。而以買補之銀。報部另用。亦一轉移法也。○湖廣總督塞楞額奏。乾

隆十年。經前督臣鄂彌達奏請動項。於武昌城上。添建礮亭。礮房。兵房。窩鋪。并大小銅鐵礮位。派把總二員。兵丁一百餘名。分撥城上居住看守。不惟於城下居民不便。亦且駭人聽聞。臣因將西南兩路兵丁撤回。查明要隘處所。及登城馬道。添設柵欄。嚴行封鎖。礮位收貯於各城樓上。惟東北兩面。民居稀少。近山之處。仍照派定兵數。往窩鋪看守。可省兵一百二十餘名。得旨。既已如此辦理。知道了。

朕謂鄂彌達此事。尚非大謬。且彼受惡名而去。後人踵之。反得稽察之益。亦何必博名而頓改耶。○湖北巡撫陳宏謀奏。嚴禁各州縣書吏徵收錢糧。抽取侵蝕積弊。得旨。是自可嚴其將來。不必究其已往。○河南巡撫碩色奏。通省二麥雨水情形。得旨。覽奏俱悉。惟應盡人事。以俟。

天佑若果成災。切忌粉飾。更當鎮靜也。○又奏得雨情形。得旨。覽奏稍慰。開封一帶。尚欠霑足。仍應竭誠致禱。并一切政務。勉力補救可也。○山東巡撫阿里衮奏。濟南首郡。地濶事繁。知府徐大材。難以勝任。請以調補泰安府。其濟南府員缺。有新授浙江衢州府知府陶士儻。誠實老練。前在兵部山西共事有年。表裏如一。懇恩賞發山東。調補濟南府知府。得旨。若未有缺。尚可。今彼已有缺。早請訓赴任矣。若為爾請而調補。非止不合例。豈不資人口實哉。且此人。爾向所深信。今若在首府。必

至失衆屬員之心。得一人而失衆望。亦非計之得也。朕另籌一可勝首府者用之。亦足以為爾助也。○大學士管川陝總督事公慶復奏蒙硃批指示。有傳姓家人干豫外事。聞命之下。不勝惶懼。即行押鎖拘禁。嚴查重處。得旨。過而能改。斯無過矣。何惶懼之有。○甘肅巡撫黃廷桂奏河東各府屬望雨情形。及辦理借種減糶各事宜。得旨。覽一切政務。加意體察。妥辦。以待。

平定天字八十一

三二

天澤水旱安能保其必無。亦惟盡人事耳。若存諱災之心。則過大矣。○甘肅布政使阿思哈奏辦理庶務竭蹶緣由。得旨。此奏似有引而不發之意。一切實力奮勉。即有不得已處。亦宜據實奏聞。似此指東話西。何益乎。看爾慣用聰明。恐非便宜也。○廣東巡撫準泰奏凜遵訓示。密飭將備整飭戎行。勿致煩苛。亦不得懈弛。得旨。撫標之兵。朕從未督責。在爾分內之事。尚不能稱職。以副朕望。此更無論矣。

實錄卷三百六十一

三三

○廣州將軍錫特庫等奏東安縣猺人韋正秀拒捕殺傷兵丁。盤日貴。不過一時激成。並非聚衆為匪。聞發兵往拏。即已自行投到。現在審究。得旨。此奏甚是。知道了。此等事應留心據所聞見陳奏者。○雲南總督兼管巡撫事張允隨奏滇省湯丹大水碌碌三廠產銅漸少。臣再三籌慮。惟有乘三廠尚足供用之時。於附近東昭兩府躡覓礦苗。招徠開採。現已試採數處。每年約得百餘萬觔。將來日漸豐旺。即可以盈補絀。得旨。覽奏俱悉。又批。此所為先事之良圖。經邦之遠猷。封疆大臣可謂無忝欣悅嘉許之外。無可批諭也。○又奏滇省各標鎮協營。並無凌傲隊伍。以致衆情含怨之弊。得旨。滇省武備。尚在妥協。此旨原為各省而言也。但今用卿為兩省總督。一切更宜加之意可耳。○貴州總督兼管巡撫事張廣泗奏謝賜福字恩。得旨。覽今因四川大金川土司不法。用卿為川陝總督。即由貴州

取道川省。或勦或撫。卿其相機妥協辦理。亦
屢有旨諭。向大學士處頒發矣。

實錄卷一百一十七

二十四

大清高宗法天隆運至誠先覺體元立極敷文
奮武孝慈神聖純皇帝實錄卷之二百八十七

大清高宗法天隆運至誠先覺體元立極敷文
奮武孝慈神聖純皇帝實錄卷之二百八十八

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣等謹

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部庫務

世襲騎都尉軍功加十九級隨帶加二級又加二級臣等謹將內大臣戶部尚書領侍衛內大臣都統等紀錄一次

尋常紀錄十四次臣等謹將太子少保工部尚書紀錄六次臣等謹將

數修

乾隆十二年丁卯夏四月庚申朔享

實錄卷二百八十八

二

太廟。

上親詣行禮。○詣

皇太后宮問安。○諭軍機大臣等。聞得四川省
辦理田房稅契一事。地方有司。往往分別銀
數多寡。少者即行侵蝕。不給契尾。向來民間
買賣。例由布政司頒發契尾。與業戶收執為
據。不惟杜隱漏之弊。亦所以息爭訟之端。豈
可任不肖之員。侵欺舞弊。可傳諭紀山。令其
查辦。○辛酉。

上御乾清門聽政。○詣

皇太后宮問安。○以散秩大臣弘暎為鑲紅旗滿洲副都統。調正紅旗蒙古副都統豐安為鑲紅旗蒙古副都統。○正紅旗漢軍副都統蘇巴禮以老疾乞休。允之。○壬戌。諭曰。山西布政使陶正中。前任直隸道員。來京引見時。適值天津河間被災之際。詢以地方情形。伊陳奏賑卹事宜。尚能明晰。言及民間疾苦。至於涕泣。朕以其實心愛民之員。是以特用為藩司。此朕用陶正中之情節。並非有人薦舉也。去歲朕臨幸晉省。見其辦理一切。甚覺竭蹶。今巡撫愛必達奏稱。蒲州府知府朱發優柔寡斷。詢之該司。亦稱伊在任數年。素日辦事亦無決斷。難稱表率等語。陶正中既知屬員不能勝任。何不告之阿里衮。而聽其叢脞廢事乎。藩司有佐理巡撫察吏安民之責。陶正中止知拘謹自守。才力不勝藩司之任。著補授直隸清河道。朱一蜚著補授山西布政使。

實錄卷二百八十八

二

一

該撫既稱朱發不勝知府之任。著解任來京。該部帶領引見。○諭軍機大臣等。近據愛必達奏。山西蒲州府屬之萬泉縣。去冬因辦以糧載丁一案。有刁棍聚眾毀屋之事。解州安邑縣。又於今年三月。有聚眾拆毀牌樓塞門放火。拒捕傷人之事。蒲州府永濟縣民。因與陝省之朝邑華陰爭占地界。有拆毀草舍之事。山西民風。素稱淳樸。而比來動輒聚眾逞兇。皆由地方官平日不能約束整頓。以致刁

實錄卷二百八十八

三

一

民無所顧忌。阿里衮在山西時。非不實心任事。但未免過於細心。惟恐屬員窺探意指。而屬員轉因此避事。因循觀望。是以上下之情。乖隔不相聯屬。於屬吏賢否。反不能周知。無由訓飭稽查。而民風因以肆其刁橫。今調任山東。事繁民玩。更非晉省可比。朕甚為懸念。可傳諭阿里衮知之。毋致屬員得為朦蔽。○又諭愛必達所奏山西萬泉安邑等屬有刁民聚眾之事。山右民風向稱淳樸。而比來動

輒聚衆逞兇。愛必達莅任未久。於民風未能一時整頓。即從前班第署事。亦僅數月。此皆阿里衮在晉時。平日不能約束整飭所致。但安邑鄉民聚衆多至七八百人。圍城放火。拒捕傷人。不法已極。非痛為懲創。不足示警。愛必達身任封疆。且兼提督文武員弁。皆所統轄。理應飛調大員。立擒首惡。則奸徒不致漏網。而附和之衆。亦共知所畏懼。乃僅札商鎮臣。令徵末委弁。偵探情形。如仍前肆橫。方相機擒捕。似此等重大案件。不過照常辦理。奸徒何由歛跡。愛必達辦理此事。輕重失宜。殊屬寬縱。著傳諭申飭之。其首事及附和逞兇刁民。如何嚴拏治罪之處。令其速行奏聞。○又諭駐藏副都統傳清奏摺內落字。經朕用硃筆添寫。應奏事件。任意遲延。即如頗羅鼐故時。伊應將彼處情形。早行奏聞。至今未奏。可見凡事疎忽。毫不留心。試問伊在彼所為何事。著飭行。○駐藏副都統傳清奏。從前阿

里克地方。原係頗羅鼐長子公珠爾默特策卜登駐劄管轄。嗣因足疾。回藏調養。茲頗羅鼐病故。阿里克地方緊要。伊足疾漸愈。臣即令仍赴阿里克防範。再騰格里淖爾喀喇烏蘇等處。每年夏季。令珠爾默特那木扎勒領兵駐防。今珠爾默特那木扎勒留藏辦事。臣令其派親信宰桑那旺根敦管轄喀喇烏蘇之兵。策凌達什管轄騰格里淖爾之兵。先期前往駐劄。再從阿哈雅克卡起。至阿里克止。每卡添兵三十名。其巡察阿哈雅克之卡。派扎薩克頭等台吉旺對前往。下軍機大臣議行。○是日起。

上以常雩祀

天於

園丘。齋戒三日。○癸亥。諭軍機大臣等。據錫特庫奏稱。協領李培遇事瞻徇。如教場演藝。則挑選弓軟不善射者。朦混領賞。挑放甲缺。則各壯丁家口多寡。注寫恒多舛錯不齊。又自

侍記名之後。上進有階。凡事玩忽。請將記名之處暫停陞轉等語。錫特庫所奏。是否公論。有無偏私之處。可傳諭策楞。令其秉公查明具奏。尋奏。查李培挑兵補糧。凡事玩忽。瞻徇。經將軍副都統嚴飭未改。錫特庫題參俱實。報聞。○軍機大臣等議。覆據慶復奏。請添調固原營兵一千名。查前派西南二路兵五千一百餘名外。續調隣省各標鎮兵三千為數已足。固原營兵驕悍。恐臨敵不能用命。況近有聚眾不法之案。甫經懲治。遽行調遣。難免在途滋事。不必派往。再川西糧運艱難。應令會同紀山妥商速辦。奏聞。從之。○甲子。

上詣

南郊齋宮齋宿。○諭山東東平。聊城。莘縣。東昌衛。上年被水成災。業已加恩賑卹。但目下正值青黃不接之時。民食難免拮据。著將此四州縣衛被災貧民。再行加賑一月。俾得餬口有資。該部即遵諭速行。○諭軍機大臣等。山東河南二省入春

以來。雖據該撫等。各奏報俱得有雨澤。而未經霑足之處尚多。近日未見奏到。朕心深為厯念。未知此時均得透雨否。倘有仍未霑足之處。與二麥春耕有無妨碍。目下青黃不接。或有應需借糶賑卹。以資接濟。該撫等自應先事綢繆。無致臨事周章。可傳諭阿里衮。碩色。令其將現在地方情形。併如何籌辦之處。即速奏聞。○又諭前據愛必達奏。安邑縣村民聚眾多至七八百人。拆毀牌坊。塞門放火。拒捕傷人一事。因愛必達於此等重大案件。不過照常辦理。輕重失宜。隨經降旨申飭。并令嚴拏速辦。今據羅俊奏稱。三月二十日。安邑縣百姓。因追比錢糧。聚眾數百人圍城。臣即親赴該縣查拏。刁民俱已散去。據知縣佟濬口稟。拆毀東門外牌坊一架。火燎北門。臣驗看並未燒毀。本日申刻。又據知縣佟濬差人稟報。百姓聚眾復來圍城。隨飭署連城都司魏傑帶兵前往查拏。民人仍復散去。現調

附近兵丁二百五十名。倘刁民再敢聚眾。星赴該縣擒拏為首之人。照例治罪等語。刁民聚眾多至數百人。圍城放火。旋散旋聚。不法已極。自應立擒首事及附和逞兇之人。或即行杖斃。或審明速奏。令兇徒知所畏懼。愛必達前奏。辦理已屬寬縱。今羅俊出巡之地。距彼處甚近。乃僅委微末員弁。以備彈壓。並未迅速查拏首惡。竟若驅之四散。即可置之不問。羅俊身屬總鎮大員。其觀望情形。皆由愛必達寬縱所致。該省提鎮。於此等刁悍惡習。並不協力整頓。無以詰奸禁暴。申國法而警刁風。殊失大體。可再傳諭申飭。愛必達。令將此案確查。務獲首惡。盡法速處。毋使奸徒漏網。并將現在辦理此案情形。即速奏聞。再近來山西雨澤。曾否霑足。民情若何。著一併奏聞。○軍機大臣等議覆。據紀山奏稱。金川情形。應分路夾攻。將川西。川南。分為兩路。派總兵。副將。帶領漢土官兵。或直搗巢穴。或分擊

前後。更駐兵木坪。以為兩路聲援。於綽斯甲撥兵堵截隘口。以分金綽二酋之勢。至所奏或係大兵齊集。或俟有隙可乘。即行進剿等語。伏思兵貴神速。敵氣既懾。我力方銳。則一發制勝。所向成功。但必計出萬全。此時慶復已經到川。應令商酌妥辦。至川西川南兩路。應派總兵二員。現有松潘總兵宋宗璋。奏請出口。而新調建昌總兵許應虎。又奉旨聽該督撫委用。應即派分兩路。又稱統領應居中調度。請移駐雅州。督師進剿。查本年二月內。臣等因紀山奏派馬良柱為統領。恐其未必勝任。是以議令紀山親行。計此時慶復已到成都。一應軍務。既有總統大臣。紀山應在省調度糧餉。提督印信。仍交新任武繩謨。從之。○山東巡撫阿里衮奏。東平等四十二州縣。除前奉旨緩徵八縣外。其東平。金鄉。魚臺。汶上。濟寧。陽穀。滕縣。蘭山。城武。單縣。聊城。莘縣。臨清。安邱。諸城。益都。平度。高密。膠州。定陶。

曹縣。鉅野。嶧縣。寧海。福山。棲霞。荷澤。嘉祥。博山。文登。榮成。及東昌。臨清。濟寧。衛等三十四州縣衛。上年舊欠錢糧。除已交外。餘概緩至麥收後啟徵。得旨。著照所請行。乙丑。常雩祀。

天於

園丘。

上親詣行禮。○詣

皇太后宮問安。○

實錄卷二百八十八

十一

一

上幸圓明園。○諭軍機大臣等。據正定總兵海亮奏稱。正定地方三月二十五六等日。各得微雨一寸。四月初一日。復得雨二寸。農民俱云。高地尚不能栽插。窪地可以播種。將見西成有望等語。所報雨澤分數。與那蘇圖所報相同。未知此時已得透雨否。或雨澤尚未霑足。於二麥春耕有無妨礙。可傳諭那蘇圖。令其一一查明。如有應行借給口糧籽種。以資耕作之處。著即先事綢繆。豫為妥協辦理。並

實錄卷二百八十八

十一

一

將辦理之處。即速奏聞。尋奏查正定屬州縣。於三四月之交。陸續得雨。二麥俱各暢茂。可望五六分收成。至井地。窪地。棉花。高粱。及秋禾。亦俱種齊。惟高地雨未深透。月內得雨。即可插種。將來倘需借給口糧籽種。隨時辦理。得旨。覽奏稍慰。○又諭。據巡撫紀山奏稱。雅州府為形勝要地。今慶復張廣泗抵川。會商進剿事宜。或同駐雅州。便於籌畫調度。或慶復在雅州駐劄。張廣泗更行前進。別據要害。以便調發統領大員。隨宜進剿。同駐分駐。孰為妥便。俱聽慶復張廣泗自為酌量。如慶復張廣泗俱駐雅州。或令提督武繩謨。總統前進。就近策應亦可。但武繩謨初任提督。甫經到川。未見其即能練悉軍情。其官兵進剿。既用宋宗璋。許應虎為統領。或令武繩謨專辦提督事務。不必前往。亦聽慶復張廣泗相度機宜。悉心商酌。總以聲援聯絡。計出萬全。迅奏膚功為要。慶復俟張廣泗一到。即行商定奏聞。總

兵許應虎於何日到川。亦一併具奏。軍機大臣等議覆。紀山條奏糧餉事宜。一。漢土官兵口糧。宜分別酌給。查向例。內地祇給口糧。出口方支鹽菜。此次應照舊辦理。一。籌辦糧餉。宜通盤覈算。前經紀山奏請於附近成都州縣備辦軍糧。臣等議令於附近軍營州縣。較成都更為便捷之處。先為撥運。俟成都解到補還。今紀山議請南路於打箭爐現存軍米內動支。西路於溫江等處動支。常平倉穀碾米五千石。並將保茂二處軍糈案內存餘青稞。辦成炒麪。輓運至軍。糈銀兩不敷。請勅交戶部於附近四川省分撥銀四十萬兩。速解備用。一。酌設臺站以速輓運。查由雜谷關。西至黨壩。程十二站。應於黨壩安設糧務一處。中安十一臺。又自雜谷關南至沃日。程七站。應於沃日安設糧務一處。中安六臺。其運夫腳價。每名。每臺議給銀八分。本色米麪一升。一。請分設糧務人員以專責成。據稱此次用兵。

打箭爐一路。係建昌道總理。雜谷關一路。係松茂道總理。打箭爐以外。應以鑪同知為正辦。照磨為協辦。將來再於兩河口適中之地。安設正協糧務。其雜谷關一路。必須專員辦理。請以茂州知州為正辦。再委佐雜二員協辦。沃日黨壩二處。俱安設正協糧務。各一員。至黨壩一路。十一臺。十二站。管臺文官三員。沃日一路。六臺七站。地尤險峻。亦應酌設管臺文官三員。督催糧米。稽查文報。松茂道應移駐舊保縣。居中調度。又打箭爐雜谷關。章谷。沃日。黨壩。為糧運總處。應每處設護糧外委一名。兵十名。又稱此次進兵。係在兩河口沙普隆二處。並無夷塘。請照瞻對案內裏塘安設蠻塘之例。添設塘馬。以速軍務。均應如所奏行。從之。駐防哈密總兵官王能愛奏。臣於二月內奉旨。以準噶爾使臣瑪木特來京會議貿易熬茶事務。伊等原奏於九月中旬前來。經玉保令其於八月初旬到哈濟爾。

得卜特爾貿易。九月初即行進藏。瑪木特等因已經伊台吉奏明。未便遽定。俟歸告台吉。若如所議。當於四月內遣人至哈密通信。若照前奏。即不送信。可傳諭王能愛令於夷使回巢經過時。將何時遣人。確切詢明。具摺奏聞。臣於三月十一日接見夷使。遵旨詢問瑪木特。據稱進藏熬茶。已蒙

大皇帝俞允。我台吉原奏於九月十五日前後到哈濟爾得卜特爾地方貿易畢。進藏念經。

經

天朝大臣等。仰體

大皇帝體恤之恩。令於八月初旬前來。九月間進藏。天氣溫和。行走便利。我急欲回去。酌定日期。前來報信。現即啟程。懇由烏克克嶺行走。路途較近。必得於四月十五前回到伊犁。方不誤事。臣問以四月十五前方到伊犁。報信人如何。即能於四月內得到哈密。夷使云。我到伊犁定期後。遣報信人來。揀選好馬。由

我處卡座晝夜兼行。四月內必到哈密。或仍照原奏於九月內前來。即不送信。臣諭以即使九月前來。亦應送信為是。夷使云。此當稟知台吉而行。臣察其意。亦欲於八月內前來。是以急於回巢。已照例護送出境。報聞。○以天津鹽運使辰垣為直隸按察使。○丙寅。皇太后駕幸暢春園。

上詣暢春園問

皇太后安。○諭曰。湖北按察使徐琳原係獲罪之人。朕加恩起廢錄用。後復緣事降調。又加恩用至臬司。今據塞楞額奏。伊時存邀譽市恩之念。辦理刑名。援引未當。且辦事乖張。居心詐偽。深負朕擢用之恩。著革職。湖北按察使員缺。著洮岷道劉芳藹補授。洮岷道員缺。著刑部郎中石柱補授。○旌表守正被戕之山西永濟縣民甯孝妻李氏。○丁卯。諭前據山西巡撫愛必達奏報解州安邑縣刁徒聚眾拆毀牌樓。又萬泉縣聚眾搶犯。現在查拏

審擬等語。今復奏安邑致釁緣由。因該縣知縣佟濬輕信衙役鎖拏欠糧民人。將伊題叅草職不職知縣原不可姑容。然何不查察於平時。而糾叅於刁民聚衆之後。使彼奸徒意必自謂得計。且當下拏獲之三人。尤黨竟敢挾勢要回。其查拏首從各犯。經今半月。並未據擒獲奏報。似此刁惡之風。若不迅速痛懲。何以警奸徒而禁兇暴。且何以安良善而靖閭閻。著侍郎雅爾圖。馳驛前往。會同該撫愛

必達。前赴解州。將案內首從各犯。查拏嚴審。分別定擬。應正法者。即於彼處正法。以申國憲。以正民風。至所叅安邑縣知縣佟濬各款。亦令雅爾圖會同愛必達審明具奏。其萬泉縣搶犯案內情節。一併會同查辦。雅爾圖有應帶司員。即令帶往。○諭軍機大臣等。安邑民人聚衆一案。前已傳諭愛必達。令其嚴拏首惡。從重審結。以警刁風。昨據河東鹽政衆神保奏稱。因該縣催徵錢糧。將拖欠民人拘

禁追比。以致刁民聚衆喧鬧。今據愛必達查明啟釁情由。因該縣知縣佟濬輕信衙役家人。將糧民籤拏鎖押。衆民忿怒莫遏。將知縣題叅草職等語。是起釁之由。實因拘押糧戶。即可從拘禁追比人等之家屬親黨內。蹤跡倡首奸徒。密拏跟究。即或稍有株連。而首惡不致漏網。亦可令衆人知所畏懼。乃半月以來。並未拏獲要犯。先將知縣叅處。刁惡之輩。將以聚衆即可挾制叅官。恣意逞兇。漫無顧

忌。不因此益長刁風耶。即所叅該縣各款。向來督撫糾劾屬員縱容僕役。亦常有之案。今不待查審聚衆本案明確。即行題叅。意欲安百姓之心。而實示之以怯。殊為不顧大體。輕重倒置。其萬泉聚衆搶回現禁之犯。大干法紀。亦不過飭該協及道府查拏務獲。加意巡邏。謂如此辦理。即可了此重大之案。甚屬糊塗。特再嚴行申飭。因其初任巡撫。加恩寬恕。剴切訓諭。已著雅爾圖前往。會同審理。可一

一遵照諭旨。悉心查辦。○又諭。據陝西按察使馬金門奏。命盜防緝一摺。朕已批令議奏。內稱旗人有犯。易於躲閃。即狡滑之漢人。亦且得以依附藏身。又稱有司差役。誰敢遽執滿兵家奴而問之等語。凡臣工陳奏事件。自宜就事敷陳。一秉至公。不可稍存畛域。今閱馬金門所奏。有歧視滿漢之見。伊身為臬司。乃存此意見。殊非朕視滿漢一體之意。可傳諭申飭之。○戊辰。諭。據張允隨奏。稱普洱鎮

總兵張聖學。年力就衰。現又患病。語言失序。驟難痊可。難勝總兵之任等語。張聖學著解任。回籍調理。普洱鎮總兵員缺。著鶴麗鎮總兵溫朝宰調補。鶴麗鎮總兵員缺。著定廣協副將劉維綱補授。○又諭。河工伏秋二汛。最關緊要。江南河道總督周學健。甫經到任。大學士高斌。熟練河務。此次查勘直隸水利事竣。著即前往江南。會同周學健辦理。一應防汛事宜。於何時可以回京。大學士自行酌量。

○又諭。據楊錫紱奏。辰州同知楊統正。因徇隱礦商。易經世。侵隱銅鉛。恐有通同婪賄情弊。題叅革審。今審訊止。係失於查察。原無徇庇受賄情事。將來定案。似可不入秋審等語。朕前降旨。將官員侵盜錢糧。題叅各案。速行審結。入於今年秋審案內。原因近來侵貪之員。比比皆是。或由水懦之失。用彰懲貪之意。今楊統正如徇庇得贓屬實。即應審結。入於秋審案內。如止係失察。尚無受賄情事。自應將實情叙入本內。按律定擬。或因奉旨之後。理應奏明。即當指實陳奏。乃楊錫紱以似可不入秋審。試探朕意。伊意在從寬。而又不肯明言。若朕以為不可寬。則將德歸於己。怨歸於上。其居心尚可問乎。昔人稱堯曰宥之三。皋陶曰殺之三。又曰。予曰辟爾。惟勿辟。予曰宥爾。惟勿宥。惟厥中。楊錫紱係讀書之人。豈不知此。今乃為此觀望之語。秉公執法之臣。當如是乎。楊錫紱既不可信。焉知現在審理

此案。非故為寬縱。以冀開脫楊統正之罪耶。楊錫紱平素專以沽名邀譽。取悅於衆。朕已屢經訓飭。今此陳奏。又復取巧。可見積習難。以悛改。故明示朕意。令各督撫知朕明允本懷。楊錫紱著該部嚴察議奏。○大學士等議。奏據兩江總督尹繼善。江蘇巡撫安寧奏稱。江蘇錢糧。自乾隆元年。至九年。拖欠至二百餘萬兩。此中吏役侵蝕。或恐不免。是以臣安寧於藩司任內。奏請清理。廷議令俟丁卯開徵之年。再行清理。今已屆期。臣等酌定自首減免之條。令各屬於數單前出示曉諭。准其將所侵何都何圖何戶。何年銀兩若干。據實首出。於三個月內全數通完。免其治罪。否則按其侵蝕之數。照知人欲告而自首律。減本罪二等定擬。其自首不實不盡。致被查出。即以不實不盡之數。通計所首之數。減一等治罪。應追銀犯該徒罪以上者。概行監追。勒限一年全完免罪。逾限不完。即照原擬治罪。未

完銀。搜查家產變抵。再有不敷。著落的屬嚴追完項。倘書役希圖倖免。不行自首者。查出照侵盜錢糧例。從重定擬。遇赦不准援免。至失察各官。有舊任現任之不同。如現查出舊任役侵。依限追完者。胥役既得免罪。舊任亦請免議。如不能依限全完。仍應治罪者。舊任亦仍照失察例。現任照承追例。分別議處。其查出本任役侵。依限追完者。功過相抵免議。如不能查出。後經發覺。及查出而不能依限追完者。亦照例分別叅處等語。查此與雍正十二年前撫臣高其倬侵蝕官役一摺。部議相符。應准其查照辦理。至所稱地方官失察在前。查出在後。應寬處分之處。地方官處分過嚴。恐轉致迴護掩飾。所議亦屬妥協。均應如所奏行。再此番清查。專為役侵起見。不得絲毫擾民。應令該撫等妥協辦理。從之。○吏部題請新授大學士高斌。應兼殿閣。及尚書銜。得旨。大學士高斌。著授為文淵閣大學士。

兼吏部尚書。○以正藍旗滿洲印務叅領鄂托為鑲黃旗蒙古副都統。○己巳諭曰大學士高斌現在奉差江南其直隸河道總督印務交與那蘇圖暫行管理。○又諭曰雅爾圖現在出差戶部侍郎事務著舒赫德暫行兼管。○諭軍機大臣等從前綏遠城家選兵丁滋事已飭令潛心防範今山西數處百姓聚眾不法家選兵丁內匪類甚多一聞此信不無生心爾等可傳諭補熙等留心防範勿致疎虞。○授貝勒允祜之婿喀喇沁公查拉豐阿為郡君額駙。○都察院左副都御史孫嘉淦以老疾乞休允之以宗人府府丞梅穀成為都察院左副都御史原任吏部右侍郎楊嗣璟為宗人府府丞。○庚午諭據御史張日譽奏稱近來直省有司每遇民間詞訟任意差遣票入衙蠹之手多方需索延至數月小民冤抑難堪皆由地方官差票不謹任其遲延所致請酌量道路遠近定以限期如在五

十里者限三日百里者限五日遞加扣算。不許少逾時日等語張日譽所見甚小外省詞訟案件差拘質訊之事勢所難免惟在督撫平日留心屬員屬員留心胥吏則案件自可速結耽延苛索之弊亦可剔除若不能留心稽察而惟定以限期不但弊不能除轉致胥吏人等借端訛索且所拘人犯苟其限內不獲亦無不待質訊即行定案之理所謂有治人無治法任法不如任人者此也但人才自昔為難即如州縣等官用科目出身之人原為伊等讀書攻苦數十年始博一官是以按資銓叙每於引見時有年力衰邁之員欲不用則棄置堪憫用之貽誤地方不得已令其改教在伊等擯而不用則未必盡皆心服若使強詞奪理方謂一見何以決其不能勝任究亦難與辨晰其實衰庸闇茸之員斷不能膺民社重寄即未經扣除而將就錄用徐觀其後者亦不知凡幾矣此朕委曲成全其難

其慎之意。難以徧喻天下之人。惟在各省督撫。善為激勸。循良者獎掖之。柔懦者策勵之。則羣才奮起。而吏治不至於廢弛。朕前降旨訓飭大吏。廣勵羣僚。至再至三。無非欲使閭閻無擾。措斯民於衽席之安。今御史張日譽復為此奏。應申諭各省督撫。善體朕意。共知勤求治理。首以察吏為要。不可稍有怠忽。至於御史為朝廷耳目。其官階職守。尤非州縣可比。果其有關國計民生。自當不時入告。乃今日張日譽奏請酌定差拘限期。范宏賓則奏八旗內外武職大臣。及提鎮等。亦應薦賢自代。九成則奏請將營房教習人員。分別勤惰。朕詳閱三人奏摺。皆屬瑣屑拘牽。無關緊要。且非因時就事。必應目下陳奏之言。向來內陞外轉屆期。科道多有撫拾條奏。以希擢用者。朕曾降旨訓飭。今不免仍蹈前轍。可再傳諭科道等。令其各自省改。毋存鄙見。以副朕真切求言之意。張日譽摺并發。又諭本

年七月二十日。朕行幸木蘭。著傳行各處。有應行豫備之處。豫備。又諭據額駙策凌奏。稱喀爾喀副將軍郡王成衮扎布病故等語。朕心深為惻然。著加恩賞銀五百兩。派乾清門侍衛一員。部員一員。馳驛前往致奠茶酒。其應得卹典。著該部查例具奏。其副將軍員缺。著本處扎薩克和碩親王厄林沁多爾濟補授。○辛未。諭此次考試各省鄉試正副考官。列一等之周漢。金甡。周長發。陳大喻。錢度。陳作梅。馮秉仁。朱荃。徐文煜。表曰修。睦朝棟。德保。陸嘉穎。周玉章。湯大紳。王際華。王洛郭。肇鏞。陳鏐。沈景瀾。二等之彭端淑。竇光鼐。胡澤潢。沈廷芳。阮學濬。毛永燮。湯聘。孫廷槐。邱柱。錢琦。劉炳。周孔從。薛澂。吳履泰。馮鈐。王居正。孫宗溥。興泰。胡蛟齡。程景伊。羅源。漢林。蒲封。陳兆崙。鄭肇奎。程恂。廖瑛。袁德達。嚴源燾。王錦。潘乙震。陳亮世。陳士璠。葉酉。張日譽。朱佩蓮。程鍾彥。雙慶。蔡揚宗。著吏部於十三日

帶領引見。考列三等之方世偽、戈岱、錢維城、程巖、李玉鳴、周人麒、經聞、儲麟趾、顧汝修、納國棟、王雲煥、楊述曾、徐瑋、覺羅奉寬、劉錫齡、李金臺、羅暹春、周燾、孫維、邱玖華、戴章甫、李龍官、肇敏、金相、馬正午、歐堪、善張、繆、李清芳、張孝惺、吳士進、王顯、許汝盛、李果、吳孫逢黃、師範、童其瀾、廖方蓮、周煌、馮元欽、彭肇洙、時鈞、轍、張映斗、龔渤、葛峻起、楊廷為、羅源、浩、楊勳、周正思、宏亮、陳大復、陳世烈、諸錦、出科、聯王以昌、程廷棟、韓彥曾、周祖榮、趙青藜、王太岳、溫葆經、黃元鐸、色臣、西成、王世仕、李清載、歐陽瑾、叢中正、伍澤梁、何其睿、陸樹本、楊文桂、武紹周、吳鼐、蔡賓興、李從龍、著於十四日帶領引見。大學士等議覆：據直隸總督那蘇圖等奏稱：上年十一月內，侍郎玉保奏請獨石口等處添給生息銀一案，內稱查各省駐防兵，俱蒙賞滋生銀，惟直隸各小城及各邊口內，除鄭家莊向有房租銀外，餘山海關

等處，未蒙恩賞。各處兵數自八百名至四十名不等。若按地方分給本銀，未免難於辦理。請將天津每年賞賸利銀內酌給，其各處每年應需數目，並如何撥給存貯備賞之處，交直隸總督天津都統定議具奏等因。查山海關、冷口、羅文峪、喜峰口、獨石口、張家口、古北口、昌平州、千家店、雄縣、盧龍、三河、寶坻、玉田、東安、固安、霸州、采育、營順、義良鄉等處駐防兵，共二千六百四十名，驍騎校共四十五員，每官兵百名，酌撥息銀八十兩，每歲共應撥天津餘息銀二千一百四十八兩，分給貯附近該管衙門備賞。查各省駐防遠近不齊，兵多寡不一，應請按照兵數，將歲需派出賞項，先令該駐防統轄之員，出具印領，差弁赴臣富昌等衙門領貯。試辦一年，如有餘統於歲底查明存作下年賞數，仍於次年歲首接續具領。其歲底冊報之法，查冷口、羅文峪、喜峰口三處均由山海關副都統管轄，獨石口、張

家口。古北口、昌平州千家店五處均請照鄭家莊之例。由本管大員造冊請銷。其各小口聽管領之員隨旗造冊送部覈銷。所有赴領盤費各照遠近公項動給等語均應如所奏行。再查各省駐防生息銀俱係各該將軍副都統等造冊咨送各該承查旗分覈銷。惟鄭家莊係房租銀兩由該管副都統自行奏銷。現在山海關等處撥給銀雖由各該處賞給均係天津餘息且為數無多。若如該督等所請紛煩難稽。應令各該管副都統造冊仍報承查天津生息銀兩之正藍各旗總覈奏銷從之。○壬申

上詣暢春園問

皇太后安。○諭軍機大臣等。據山東巡撫阿里衮奏報米糧價值摺內。東昌萊州等屬米麥俱貴。彼處民情若何。可傳諭阿里衮留心體察。其所奏雨澤尚有未霑足之五十五州縣及未報到之三十七州縣。據稱已飭布政司

詳察妥議。先時籌備等語。從來備荒無奇策。惟在處置合宜。而奉行得法。如其有意從寬。則濫冒侵漁。漫無稽覈。奸民轉生望恩倖澤之心。挾制閭閻。或由此益長刁風。如其有意從嚴。覈實裁減。則州縣又謂上司意在節省錢糧。轉啟諱飾匿災之弊。可傳諭阿里衮體悉此意。先事豫籌。務在慮之以周詳。而出之以鎮靜。庶臨事不至周章。窮黎得霑實惠。奸徒不致逞刁。地方亦均得安輯矣。○癸酉諭

軍機大臣等。兩廣總督策楞等會奏廣東安縣奸徒韋秀貞聚眾拒捕。傷斃官兵一摺。其中疑竇頗多。據稱目兵盤日貴先曾為盜。割過腳筋。伊子背負在後行走。致被追及鎗傷。夫營兵應選精壯趨捷。以備披堅執銳之用。盤日貴既經割過腳筋。何以尚令食糧充伍。況擒捕奸匪。又非守汛可比。更應精選健卒。乃反用步履不便之人。令其子背負前往。有是理乎。此必該管各司。因案情重大。是以

飾詞揭報。意謂殘廢落後。傷斃有因。希圖從輕歸結。又稱該縣知縣莊榮徵。聞盤日貴被殺。張大其詞。請添兵擒捕。及見副將知州俱至。實事難掩。隨用刀自戳頸項等語。人非萬不得已。何至自戕軀命。即謂匪衆拒捕。由該縣激成事端。亦不過辦理不善。止於叅革。該縣豈不知之。或者此案原因。副將知州。風聞雲容山聚匪而起。欲急速了事。以卸己過。該縣受其抑勒。情狀難堪。以致於此。可傳諭策楞等。將此案前後情形。徹底確查。務得實情。以成信讞。不得任該屬員等掩飾前非。苟且完結。其韋秀貞乾隆四年傷斃縣差之案。既據供認。而知縣莊大中。諱匿不報。自應即行查叅。至此等強梁不法之徒。拘繫本處縣監。守禦單弱。倘或家屬夥黨。就近逞強。又致別生變故。應提至省城監禁。嚴審定擬。粵省海疆重地。民情强悍。奸匪潛滋。不可不加意整頓。詰奸禁暴。以杜刁風。俾地方寧謐。可一併

傳諭策楞等知之。又諭據阿里衮奏稱。前因叙奏不明。將東平一州。與聊城莘縣東昌衛。三處災民。並請加賑一月口糧。已蒙恩旨允准。勅部頒發到臣。今查東平州上年被災七分。已節次題請分別賑卹。今春復荷恩加展賑月。該處貧民。現在足資餬口。毋庸再議加賑。惟有被災未入賑冊之貧民。上年未得一體賑卹。此時轉覺貧苦艱難。請與聊城莘縣東昌衛三處。一併加賑。已飭各該處速行遵照辦理。俾得早霑惠澤等語。是東平州被災戶口。已經加賑者。可以毋庸再行加展。其未入賑冊之貧民。據奏與聊城等處一例。待澤甚殷。現已飭屬速行查辦。著傳諭阿里衮。即照伊所奏辦理。使貧民均霑實惠。至所稱仍將接到部文。另行敬齋軍機處恭繳成命等語。現在軍機處未見繳到。或係伊俟諭旨頒到之後。再行齎繳。所奏不甚明晰。著一併詢問。原奉諭旨不必繳回。○又諭據開泰奏

稱上年十一月內有西洋人李世輔同直隸
南宮縣民蔣相臣山西曲沃縣民尹得志路
過江省鄱陽縣境該縣盤護訊供曾在山陝
二省傳教又在京城海澱堂裡住過一面移
咨山陝撫臣確查一面移咨禮部查明來歷
俟審明後遞解廣東附回本國等語李世輔
游歷山陝授徒行教其從前經由之澳門等
關口並未照例奏明顯係多事不法之人此
等奸徒若押令回國伊必捏造妄言肆行傳
播轉為未便其蔣相臣尹得志等既隨從附
和此外必尚有黨與若押遣回籍又得串通
消息不若將此三人即於江西省城永遠牢
固拘禁則伊等狡獪伎倆舉無所施不致蔓
延生事可傳諭巡撫開泰將此案審明遵旨
辦理具摺奏聞其移查禮部之處傳諭該部
令將原文發回又諭據江西巡撫開泰奏
稱江西省吏治因循即如叅革知府汪宏禧
知縣王鉞二案承審之員俱各任其狡混希

平定縣志卷之八

二

平定縣志卷之八

二

冀模稜了局迨經嚴行指駁除汪宏禧一案
現已審明按擬而王鉞一案仍藉犯証無獲
未據訊有確供等語臬司為通省刑名總匯
屬員承審未協之處應即為覈正使案情速
結庶為無忝職守黃岳牧自調任以來於地
方因循積習總未有所陳奏而於刑名案件
亦未能實心料理即如此二案一則經巡撫
駁飭而後審明一則藉犯証未獲懸案不結
不能竭力整頓以致案情轉輾稽延何以克
副臬司之任爾等可傳諭嚴行申飭甲戌
甘肅巡撫黃廷桂奏準噶爾夷使進藏除已
有例者照乾隆八年備辦外惟是前次係在
東科爾交易今次由哈濟爾易銀前往所有
應行隨時酌辦之處逐一酌議夷人在哈
濟爾易銀不需貨物廷議令較上次交易之
數畧為多備查上次用官銀七萬八千餘兩
今酌備交易銀十六萬兩進藏備用二萬兩
又官兵口糧鹽菜應賞俸餉運腳等項約需

十五萬兩。除八年案內剩三萬餘兩外。兩項尚需銀三十萬兩。請先在甘肅藩庫撥用。仍於隣省速撥還項。一。上次運糧及通信綠旗官兵口糧鹽菜俱從寧裏帶。今次護送夷使。派出綠旗官兵同行。全資馬力。未便攜帶口糧。除從寧赴卡。由藏回寧。自行攜帶外。其由哈濟爾進藏時所需口糧鹽菜。應照上次撥兵運送。其到藏駐劄及留牧兵並運糧兵。仍照上次辦理。一。防護綠旗兵。於賞銀外。每名借半年餉銀。綠旗官員。賞一年俸銀。均不敷用。請酌借總兵銀五百兩。遊擊都司二百兩。守備一百五十兩。千把總八十兩。回營在俸餉內扣還。一。乾隆八年。夷使至東科爾貿易。賞食物三次。今次仍請於哈濟爾夷使初到時。賞給一次外。其二次賞給。應於卡座交易事畢。起身進藏時。令照看夷使之侍郎玉保等。宣布

皇恩。再賞一次。熬茶事畢。回巢時。仍在附近青

實錄卷二百八十八

三十四

海之處。賞一次。其應賞物件。廷議令備牛羊米麵等物。查乾隆八年。將牛羊米麵酌換茶乳酥油。今仍照前辦理。下軍機大臣議行。

實錄卷二百八十八

三十五

大清高宗法天隆運至誠先覺體元立極敷文奮武孝慈神聖純皇帝實錄卷之二百八十八

大清高宗法天隆運至誠先覺體元立極敷文
奮武孝慈神聖純皇帝實錄卷之二百八十九

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級丁酉加二級軍功紀錄一次慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級入加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十二年丁卯四月乙亥

實錄卷二百八十九

上御勤政殿聽政。諭五城司坊官緝捕竊案。
向來原有定例。緝獲過半。許其保題。如不能
過半者。量予記過。既經記過。則不應保題。可
知。乃都察院原未遵照此例辦理。亦未將不
便止就竊案考核之處。奏請改正。今議御史
馮鈐條奏。又不將未遵定例之故聲明。及交
大學士等查閱。以所議殊未明晰。請交另議。
是以令其明白回奏。該堂官惟以命盜各項
案件籠統合算。與竊案緝獲過半之例無涉。

固執前說。甚屬含糊。著將該堂官交部察議。
京師為五方雜處之地。查拏匪竊。原以肅清
輦轂。考核自應較嚴。但地廣人稠。奸良莫辨。
其躡緝之案甚多。若定例過嚴。則司坊官動
罹叅處。永無上進之階。亦非鼓勵微員之意。
其作何定例。使寬嚴得中之處。著吏部會同
都察院妥議具奏。尋議嗣後司坊官考課。除
勒限承緝。初叅二叅。分別處分。及每年內緝
賊多寡。分別功過。仍照舊例遵行外。其三年
俸滿保題時。司坊內有堪保薦者。應將該員
三年任內事主被竊未報。當經捕役躡獲賊
賊有據之案。入於承緝已未獲各案內。計案
通算。獲賊過半者。准其保題。如不能過半者。
仍行記過。記過後果能上緊訪緝拏獲。仍許
保奏。如該管地方內竊案累累。不能實力查
拏。及縱捕拏賊等弊。經該城御史察出。照例
叅處。從之。諭軍機大臣等。據山西巡撫愛
必達奏。安邑縣聚眾一案。檄調遊擊石良臣

實錄卷二百八十九

道員託庸帶兵前往拏獲李景璿等八人。旋被奪回。且將堡門堵塞。又復挖濠塞路。以作準備等語。朕前見此案事發之初。民情洶湧。愛必達起初辦理姑息。特遣侍郎雅爾圖會同該撫嚴拏確審。今看此猖獗情形。事同叛逆。不法已極。可速傳諭雅爾圖等。務將要犯匪黨痛加勦除。以示懲艾。若僅照尋常案件。令其擒獻數人。即謂國法已伸。苟且了事。必致奸徒得計。將無用病廢之輩。公議獻出數人。搪塞官長。而主謀狡黠之首犯。反得公然漏網。嗣後益復無所懲創。理應調遣員弁兵役。示以嚴威。如仍敢抗拒。即用鎗刃傷斃。不但法所當然。亦俾兇徒知火烈難犯。一時愚昧。後必改悔。安邑之兇黨翦滅。則萬衆匪類。自必聞風畏懼。將來奸匪各自斂跡。可以永杜刁風。愛必達遇此等重大案情。應即速馳奏。令齎摺人兼程前進。其雅爾圖於何日至山西。會同前往。亦應迅速奏聞。何以至今尚

未奏報。嗣後毋得任齎摺人緩程稽遲。即因此事馳驛奏聞。亦何不可。○大學士九卿會奏。巡察御史應否差往兩議。得旨。差遣巡察官員。原以令其稽查地方事務之廢弛。近因按年輪派。遂均視為泛常。毫無裨益。反於地方滋擾。殊非設立巡察之本意。若不必限年更替。俟應查之時。特派專員往查。尚於事務有益。盛京等處巡察官員。俱照所奏。即令撤回。每屆三年。該衙門將應否差員之處請旨。其臺灣巡察官員。應否存留之處。著交該督撫定議具奏。到日再降諭旨。吏部議。積習相沿。因循滋弊之乾隆五年以後。巡臺各御史應請革職。得旨。此案自應分別現任前任議處。今該部概議革職。殊無區別。現任巡察六十七范咸。俱著革職。前任巡察舒輅。書山。楊二酉。熊學鵬。俱著革職留任。張湄著於補官日革職留任。大學士等議奏。湖南巡撫楊錫紱奏稱。湖南長沙岳州常德澧州四府

州。環繞洞庭。濱湖居民。就荒地圍築墾田。謂之隄垸。有曾被水衝。發帑修復者。曰官垸。其未經帑修。及後續圍者。曰民垸。每年冬令。水利各員。督民培築。以防夏秋之水。曰歲修。臣到任後。由湘陰勘至益陽。所有隄垸情形。尚應酌定章程辦理。一。險工宜三年連加大修。查各隄當水衝處。謂之險工。每年歲修。不過加土數寸。一尺。若加高厚。各數尺。則曰大修。歲修。佃民任之。大修。由主任之。今查兩邑民垸。新築固屬鬆薄。即官垸舊築者。亦未能一律高厚。蓋每歲冬月。雖加數寸。一尺。次年雨水衝激。又多坍塌。臣雖面諭隄民。每遇天晴水小。隨時培築。不必定候冬月。然佃民農忙之時。殊難兼顧。而田主皆有力之家。出資修隄。俾田長成腴產。並非強以所難。應自本年秋冬為始。凡屬險工。每歲加厚三尺。高二尺。以三年為止。即稍有衝損。尚多餘存。合之現在隄身。三年之間。厚可一丈六七尺。高亦準

此。遇大水亦保無患等語。應如所奏。令該撫飭該管水利各員。勸諭鄉民。如式加高培厚。每年工竣確勘。出具冊結。詳報各上司存案。造報工部查覈。一。護隄柳株。宜一律栽種。查年久舊垸。有種柳以擋風浪者。即堅厚無損。未種者。即不免單薄。近年民垸。則種柳者絕少。今已面加勸諭。令各多插。水利之員。兼行督率。責令隄總隄長人等查看。并飭道府等官。隨時摘抽點驗等語。應如所奏行。一。專管水利之員。宜免差委。查各屬隄垸。多者五六十。少者三四十。每垸大者六七十里。小者亦二三十里。每年冬季培修。夏秋防護。若差委別出。則督率無人。應請著為定例。凡屬水利專員。概不差委。再三年大修興工時。擇佐雜中勤慎老練者。分委協辦等語。查地方公務。向准一體差派。今湖南水利各員。如遇緊要之時。自應隨時酌量。不另差委。若防護閒暇。原可一體差派。未便因係水利專員。即行定

例概不差委。應無庸議。至現議三年大修時。該管各員。有督率難週之處。應聽於佐雜中。揀選幹員。分委協辦。一民垸宜禁再圍。查洞庭湖雖曰巨浸。藉以受各省之水。隄垸俱係沿湖受水之地。漸次圍成。所謂與水爭地也。雖濱湖荒地。定例不許擅墾。但尚有無礙隙地。許民呈官。勘明築墾之例。恐奸民捏詞朦混。有司遽徇其請。上司據詳批准。實貽墾水漫決之患。應請嗣後各屬濱湖荒地。長禁築墾墾田。應如所奏。令該撫除現在已圍墾垸外。其餘沿湖荒田。未經圍築者。即行嚴禁。不許再行築墾。致妨水道。從之。以原任湖廣總督鄂彌達為正黃旗漢軍副都統。以正白旗滿洲協領納漢泰為天津水師營副都統。旌表守正捐軀之四川永寧縣民楊登英妻胡氏。丙子。

孝端文皇后忌辰遣官祭

昭陵。諭曰。盛京等處巡察官員。昨已降旨。徹

回。令每屆三年。該衙門將應否差員之處。請旨。今思三年屆期。一時差遣。未必得如許賢員。應分別年分。陸續差遣。方為妥協。其巡察所至。如彼處將軍以下。倘有簞簞不飭。政事失宜。官兵擾累。及案件有無逾限。皆該巡察等分內應查之事。游牧地方。各有大員管理。其是否實心任事。挑補屬員有無屈抑。并上駟院等衙門馬羣事務。是否妥協。亦應一一查察。於差竣之日。將所查該處三年內實蹟。并地方現在情形。逐一據實奏聞。既可具悉該處吏治民情。廣明目達聰之益。而巡察人員之能否盡職。即可定其殿最。如此方與地方實有裨益。而巡察不為虛設。較之前此巡察人員。但以註銷案件為事。及差滿撫拾無關緊要條奏塞責者。不可同日而語矣。其如何分年請旨。并定立巡察條款。著大學士九卿會同詳晰妥議具奏。尋議盛京等處巡察。應分三班。盛京事較繁。要應於乾隆己巳年

為始派往。庚午年。派往黑龍江。船廠二處。辛未年。派往歸化城游牧。居三年之期。各該衙門再行奏派。仍照舊例。以一年為期。各該巡察。將三年內地方一應利弊。逐一實心查察。事竣。回京覆奏。不得藉端滋事妄陳。亦不得撫無關緊要之事塞責。倘有未經查出。不行據實陳奏者。查出將該巡察等分別議處。從之。○命整飭刁悍民風。諭軍機大臣等。守令於民最親。教養之施。法紀之立。皆由此始。古之循吏。使人愛之如父母。敬之如神明。良由威信所孚。積於平日。閭巷銖兩之奸。無不洞燭。是以法立令行。心悅誠服。邇來吏治肅清。舉凡供應之需索。囊橐之誅求。向所習為固然者。釐剔殆盡。百姓皆宜安分奉法。敬畏命官。以成淳厚之俗。而近據各省奏報。奸民聚眾之案。如江南宿遷。山東蘭山。皆因求賑。浙江臨海。則因求雨。福建上杭。則因抗租。山西安邑。萬泉。則因丁糧豁免等事。遂至聚集多

人。抗官塞署。放火罷市。肆為不法。此皆愚無知之百姓。平日於地方官毫無敬畏之心。且見報災辦賑。稍未妥協。督撫亦即據實題參。竟若州縣之短長。操之自己。因而望恩倖澤。無有饜足。稍有未遂。遇事生風。不遵勸諭。眾情洶湧。州縣即有衙役民壯。城守即有汛兵。而眾寡不敵。勢難擒捕。及至事過之後。聚者已散。無從查拏。訪得一二倡首之人。根究黨與。又恐查拏未確。濫及仇扳。往往從輕歸結。附和之眾。益無顧忌。此民氣所由日驕。刁風所由日熾。所謂有一利。即有一弊。扶起一邊。又倒一邊。水懦民玩。信不虛也。朕愛育羣黎。惟惠養是務。億兆善良者眾。豈肯因一二莠民。頓尚威克。但懷保不可不厚。而去惡不可不嚴。奸棍橫行。貽害地方。亟當整肅紀綱。以杜其漸。督撫宜共體此意。留心化導。扶植州縣。強幹者嘉獎之。文弱者激勸之。使得奮勵展布。各盡職守。俾小民咸知國憲之當遵。命

吏之當敬。斂戢其浮囂之氣。惛服其驕悍之心。禁於未然。較事發而後以法繩之者。所全多矣。可傳諭各督撫知之。○又諭曰。戶部議覆。四川巡撫紀山奏請滿城應買穀石。悉照時價採買。并給運費一事。朕已降旨依議。但從前係本地採買。今因本地價昂。分發新繁等五縣採買。而各縣穀價。仍未減於本處。轉增腳費。是於折價八錢五分內。雖有留餘。惟是向來兵丁。止扣除六錢。今又加增。如此酌辦。是否於兵丁有累。著傳諭紀山。令其查明奏聞。尋奏查新繁等五縣穀價。較省城每石賤二三分。加以運費。每倉斗穀一石。總不過三錢七八分。以二穀一米計算。每米一石。亦不過七錢五六分。較之各兵中米一石。折銀八錢五分。除坐扣穀價運費外。尚餘銀一錢。是分發採買。米價雖稍增於從前。實仍於兵丁有益。報聞。戶部議覆。福建巡撫陳大受條奏臺郡積貯事宜。一臺灣從前額徵供粟。

除支臺澎兵糧。歲有流存。嗣因內地每年撥運平糶兵眷米穀。臺倉日見其虛等語。查臺屬額徵供粟十六萬九千餘石。從前止給臺澎兵米九萬餘石。餘粟七萬餘石。積存臺倉。共有數十萬石。歷任督撫題准發價採買。撥運內地平糶。及兵米。每年十餘萬石。以致積存不敷。現在應運還內地兵糧三十四萬九千餘石。請分作五年。每年帶運七萬石。今該撫奏稱臺倉已經告匱。每年帶運七萬石之議。請停止。應如所奏。將前項發價未買等項穀石。照數運補內地倉儲外。餘請停止撥運。一籌備積儲。以清釐款項為首務。查臺米支給班兵眷米數內。有福寧建寧汀州三鎮延邵二協。烽火門楓嶺桐山三營米。三千五百六十石。有奇。抵粟七千一百二十石。有奇。向撥福州府廳縣支給本色。各營不能運回。即在省城變價。經前督臣郝玉麟題准。每石折銀九錢。應請將此項眷米折銀。改動正項於

估餉冊內造報支銷一臺屬積貯額四十萬石。查上年委員採買粟十萬七千餘石已飭存臺倉。又臺屬額存官民捐穀並社穀贖穀潮穀共四萬八千餘石。又本年應徵供粟並帶徵舊欠除支給臺澎兵粟外可餘七萬八千餘石。彙同上年流存粟七萬六千餘石再將上年委員未買粟九萬二千餘石俟本年秋成後買足共符四十萬石之額。一現在停運本年內地兵粟七萬八千餘石請先於各屬倉穀內碾支另籌歸補。查閩省加捐監穀八十八萬餘石現已報捐過半請將本年內地全額兵眷粟八萬二千餘石一并照數收捐補足此番清理之後臺郡額徵供粟均為支給內外兵糧之需。年清年款不得仍前壓欠。至積貯四十萬石應准其每年供粟未開徵之先即於此內碾支兵糧。秋成徵粟歸還遞年出陳易新以免久貯沓變之虞。再平糶亦宜撙節除大歛不拘外其餘不得過一萬

石。隨時買補一臺地海道險阻運送不敢整船裝載俱於商船搭運每船一百石多至二百石而止。如內地急需必須豫籌嗣後視臺穀價平之年動帑採買價昂則停均應如所奏行從之。丁丑命定守令久任例論從來親民莫切於縣令而知府表率一郡職任尤重。欲望其政平訟理易俗移風非久於其任不可。漢宣帝詔曰太守吏民之本也數改易則下不安。民知其將久不可欺罔乃服從其教化誠至言也。朕臨御以來念保安元元守令最要曾向直省督撫屢降諭旨但未定有成例俾得遵循是以未見實效。即如州縣中才具稍優者督撫或奏請調繁或題補陞用知府則薦擢監司在督撫為官擇人練達之員試有成效駕輕就熟自較初任為可觀究之缺有繁簡職守則一繁地固須能員簡邑獨無民人社稷之寄乎。知府賢則屬縣各修其職監司體制雖隆而所職不過分巡轉

覈或專司鹽糧。轉不若知府之專有責成。與屬縣較為親切。今以能勝繁劇之知府。擢任監司。反若置之閒地。不得盡展才猷。且此題陞題調者。不過幹辦敏捷。一時見長。未必皆古所謂惻怛無華。日計不足。月計有餘。循良之選也。即果係循卓。人地相宜。而此地得一良吏。即彼地失一良牧。孰非赤子。孰不當善為撫字。而顧數數更易乎。況能員既得優加陞調。則熱中躁進之員。惟事逢迎上司。要結

取譽。以祈速化。又安望其留心實政。盡父母斯民之道也。但榮進之念。人情不免。若非定有成規。示以獎勵。則歲月淹久。必致自隳志氣。而吏民無識。亦謂其不為上司所物色。或啟疲玩之習。不足以鼓舞人才。振起治術。漢時守令。治行優異。輒以璽書勉勵。增秩賜金。寵以車服。有爵至閭內侯者。兩漢循良。冠越唐宋。今或仿其意而行之。守令實能為地方興起教化。勸課農桑。興利祛弊。發奸摘伏。阜

安閭里者。定以年限。或予以紀錄。或加級。或加銜食俸。仍留原任。在恬靜自守者。既得從容展布。以收績效。即躁進之人。亦知格於成例。不致視一官為傳舍。并可潛消奔競陋習。於吏治人心。不無裨益。嗣後直省守令。除特旨擢用。及該地方情形。不得不奏請調用者。許其酌量聲明保奏外。其如何酌定年限。示以優敘。俾可久於其任之處。著大學士會同九卿詳議具奏。尋議定例。繁簡互調。原為酌量人地起見。今各省督撫多有因調一缺。將數缺遞行轉調。借調補之虛名。為趨避之捷徑。殊非久任安民之道。伏查雍正六年。九卿議覆廣西巡撫金鉷條奏。將各省道府同知。通判州縣各缺。分別銜繁疲難除道府請旨補授。其同知以下四項三項相兼者。於現任屬員內揀選調補。原恐初任之員。貽誤地方。是以分別辦理。雍正十二年。直隸總督李衛奏稱。從前所定繁簡未確。奉

旨令各省督撫詳查據實具題。經各督撫更正。有將選缺改為要缺者。亦有將要缺改歸部選者。乾隆七年奉旨。各省道府同知通判州縣等缺。從前督撫辦理時。不過據屬員開報。以致繁簡之間。多不的確。著吏部行文各省督撫。將從前所定各缺。悉心妥議。務期名實相稱。亦經遵照酌定在案。近年來各省仍有陸續奏改者。是同一地方。同一職守。繁簡前後互異。更改不一。總之督撫酌留要缺。在外題補。本為鼓舞人材。但所留之缺。既不切當。又多遷就。徒啟屬員覬覦。今若仍照雍正六年以前部選例。悉行裁改。未免驟覺更張。應再通行各該督撫。將現定應題應調各缺。詳細核更正。造冊奏報。其直隸州知州一項。向不歸部選。未便酌定。但知府內之衝繁疲難者。今亦請旨補放。直隸州知州各缺。應一并分別酌定。統俟各省覆齊。臣等再將更定各缺。作何補用。并如何酌定年限。示以優敘之處。

一并詳議。請旨從之。諭軍機大臣等。閩浙總督喀爾吉善奏。閩省兵丁好動惡靜。聲氣連結。驟加懲創。恐滋事端。其奏追繳烏鎗摺內。又稱閩省習染已深。急則易生事端等語。閩省兵民習尚强悍。喀爾吉善身任封疆。應加意整頓教導。先事禁約。逆折其邪心。潛移其積習。乃一則曰恐滋事端。再則曰易生事端。殊不可為訓。奏摺雖係密封。而幕賓傳寫。安保其必無洩漏。況喀爾吉善於入告之詞。尚沾沾以此為說。則其平日亦必以此訓飭所屬員弁。或轉相傳播。或窺探意旨。閩省兵民將謂大憲如此猜嫌防範。轉生疑懼之心。是欲息事而因以滋事。非所謂孚以威信。鎮靜彈壓之道也。喀爾吉善因曾奉有諭旨。今身履其地。親見兵民習尚。實屬驕悍。不得不慮及於此。是以屢形章奏。要之瞻顧適足以釀奸。而疑慮不足以服衆。可傳諭喀爾吉善隨時體悉朕訓。開誠化導。寬嚴互濟。漸次整

頓綏靖海疆。但喀爾吉善屢言恐生事端。或者地方情形。另有見聞。應為先事豫防者乎。令其速行奏聞。仍著時時留心體察。但不必先存惟恐生事之成見於胸中。則觀聽易惑。轉多窒礙耳。尋奏閩省習氣驕悍。兵民人等聚衆抗官。放火械鬪。拆屋刦商。諸案累累。又有前撫臣周學健奏墾海島竿塘之事。正在議詳。該處紳士公然據為己業。遍處糊帖佈告。必須伊等批字。始准招佃招漁。現在嚴行查究。兵民紳士積習如此。亟宜立法挽回。但論通省大局。則舊染既久。變化尚待從容。整頓須有次第。情節如是不敢不據實奏聞。得旨覽奏俱悉。所見是矣。勿始勤而終怠可矣。又批紳士風氣尤屬可惡。查其名姓奏聞。

戊寅
上詣暢春園問

皇太后安。諭朕覽吏部奏議國璉一本。祇就伊自陳本內之詞。議以才力不及降調。前日

察議孫嘉淦亦照伊自陳之本。議以休致。此雖因襲成案。而朕以為不然。蓋孫嘉淦前因總督任內不能稱職。有罪革退。後復加恩用為副都御史。自履此任。始則識見迂瑣。撫拾條陳。繼則因循保位。一言不發。而且年老衰邁。不勝風憲之任。國璉前任國子監祭酒時。聞有簞簋不飭之處。是不勝師表之職。因其劣蹟未彰。光祿寺係事簡衙門。故行調用。為光祿卿。乃屬員盜竊庫銀。毫無覺察。且性情偏執。並不和衷辦事。是以本年京察時。將伊二人察議。所謂察議者。察其過而議之也。若其無過。則亦不必議矣。吏部職掌銓衡。進退人才。是其專職。今用人一途。既已拘於例矣。而當京察大典。正宜激濁揚清。如其祇就自陳之詞。以定去留。誰則不能。且黜者開巧為隱飾之端。此本著發還。另議具奏。大學士等議覆大學士公慶復條奏固原善後事宜。一平涼為陝甘咽喉。靜寧乃六盤扼塞均宜

重兵控制。請移提標兩營。一添駐平涼。其原駐遊擊。改為守備。仍領原兵。專管城汛。隸移駐之遊擊管轄。一移駐靜寧。其原駐之千總。撤回固原城守營。該州另設一千總。專管城汛。平靜兩營。仍屬提督統轄。合之仍為五營。查固原提標。共設前後左右中五營。固原地方狹小。而駐兵五千餘名。慶復所請。自屬因地制宜。至分防之兩營弁兵。挈眷遷移。作何料理。官署兵房。作何建置。摺內俱未奏及。應令新任督臣張廣泗。於到任後。酌定規條。請旨辦理。一提督駐劄處。多有道員同城。當年移兵固原之時。未將道員一併移駐。請將平慶巡道移駐固原。再加兵備銜。兵民皆可管轄等語。應如所請。令新任總督張廣泗。歸入移兵案內。一并具題。一從前西路出兵。召募新兵。現在陝甘各標營。皆已裁補無幾。惟固原因循。尚有千人。此輩既無恒業。欲補則無缺。欲裁則無名。臣到固原時。曾面交將弁時

加操驗。即為清楚等語。查陝甘二省。自雍正七年用兵以來。節次召募新兵。二萬四千六百餘名。嗣後陸續調撥裁補。統計不下二萬三四千名。何以固原提標。尚有未裁新兵千人。自係辦理因循所致。既經大學士慶復面交該將弁時。加操驗。即為清楚。應令該管大員。加意查辦。從之。兩江總督尹繼善奏。查先經調任江蘇巡撫陳大受。奏稱太湖界連江浙。湖中諸山綿亘。最為遼險。奸匪易藏。查雍正年間。江南設叅將一員。駐劄東山。浙江遊擊一員。駐劄西山。竊思分疆管理。難免推諉之弊。請將太湖營叅將裁改。副將兼江浙之銜。統轄全湖。駐劄西山。居中控制。遊擊改為都司。原設之守備千把。仍照舊制。等因。經部議。令臣等詳悉妥議。伏查全湖形勢。必須大員統轄。應如陳大受所奏。將江南太湖營改為副將。兼江浙之銜。兩省將備弁兵。統歸管轄。至所稱副將移駐之處。臣等相度形勢。

西山雖居湖之中。而東山逼近蘇杭大道。尤為緊要。不若仍駐東山。較為得力。又請將浙省現駐西山之遊擊。改為都司。查副將中軍。例設都司。故有此請。但太湖叅將。以駐劄簡村之守備為中軍。今叅將雖改副將。仍以守備為中軍。於體制無礙。遊擊請仍駐西山。無庸更張。下部議行。○以翰林院編修周煒為雲南鄉試正考官。楊述曾為副考官。翰林院編修徐煒為貴州鄉試正考官。檢討覺羅奉寬為副考官。○己卯。諭朕普免天下錢糧。今歲係河南省輪免之年。聞該省之開封歸德彰德懷慶河南南陽等府所屬有灘地官莊官地義田四項租課。因非地丁正賦。均不在蠲免之內。但念民佃耕種徵租。不得一體邀恩。未免向隅。著加恩蠲免十分之三。俾農佃均霑實惠。○諭軍機大臣等。據山西巡撫愛必達奏。萬泉縣鄉民千餘人。圍知府朱發。要索監犯。砍傷家人等語。該處現有道員并遊擊統兵在

城。而刁民敢於聚眾挾官持械傷人。不法已極。侍郎雅爾圖等。目今俱應已抵安邑。與萬泉相拒不遠。自可就近調度。該處現在情形若何。如何辦理之處。著一面迅速嚴行查辦。一面奏聞。其總兵羅俊統兵至彼。作何辦理。監犯馮世祿等。曾否被眾人要回。著一併即速查明具奏。事已至此。惟有痛加勦洗。明正典刑。務得渠魁。以彰國法。斷不可復存姑息了事之見。其令雅爾圖愛必達羅俊皆知之。○吏部議。山東巡撫阿里衮奏。充沂曹道吳同仁。不候批查。擅離職守。應照例革職。得旨。吳同仁。不候批查。委署。擅離職守。自應照例處分。但據稱因聞母病甚篤。而現已呈報丁憂。是其至情迫切。不及候代。觀過知仁。應加恩原宥。吳同仁免其革職。於服闋起補之日。該部帶領引見。旌表守正捐軀之河南桐柏縣民蒿國柱妻陳氏。○庚辰。兩廣總督策楞奏。挾詐捏稟之東安縣知縣莊榮徵。

署羅定協守備李登科得旨。此本內情節。疑實多端。或因案情重大。飾詞捏報。希圖從輕歸結。或因州協訪聞不確。却過該縣。別有抑勒情狀。朕已傳諭該督撫徹底確查。這所叅莊榮徵李登科俱著解任。俟該督撫查明到日。再降諭旨。其東安縣知縣員缺著張紱署理。已有旨了。其鎗傷身斃之目兵盤日貴既經為盜。治罪割筋。何得尚令充伍。此濫收匪盜為兵之該管員弁俱有應得處分。著該督撫一并查叅。○諭軍機大臣等。據兩廣總督策楞等奏稱。廣東東安縣奸徒韋秀貞聚眾拒捕。傷斃官兵一摺。其中疑實頗多。已一一傳諭。將此案情事徹底確查。茲據錫特庫等奏稱。韋秀貞本是強人。素非良善。與盤日貴舊有嫌隙。此次遇著殺死。不過一時激成。並非聚眾為匪。東安縣知縣莊榮徵原同守備李登科駐劄大鰲灣彈壓。後退回百里。被人恥笑。用刀自戳等語。與從前策楞所奏。兵目

盤日貴先曾為盜。割過腳筋。背負在後行走。以致被追鎗傷之語不同。其知縣自割緣由亦與策楞所奏。莊榮徵因事難掩飾。用刀自戳之處。迥不相符。可見朕從前降旨詢問。已早知其中實有疑實也。即此次錫特庫等所奏亦未必俱係實在情形。但兇徒拒捕殺人。縣令持刀自戳。甚有關係。乃彼此奏報互異如此。自當根究確實。可再傳諭策楞將此事逐一研究。務得實情。詳悉奏聞。毋令屬員緣毫容隱。苟且完結。尋奏。臣奉旨後。即查傳莊榮徵李登科細訊。據莊榮徵供稱。實緣初任不諳。因見漸成事端。疑懼交并。一時痰迷。不自知其舉刀戳傷。並非州協抑勒。李登科供亦無異。臣復細加察訪。均屬相符。報聞。○辛巳。諭八旗護軍統領等奏。定例護軍校缺出。於本佐領下。曾經軍營効力年久人員內揀放。現俱用完。其餘雖曾出兵。並無勞績。且年齒已邁。騎射平常者甚多。在彼自恃進身有

藉急玩成風後進人員。又以前列有人無由奮勉。請嗣後護軍校缺出。除於此項人員內。好者仍行補放外。其餘騎射生疎者。概行裁汰。另於新進應陞人員內揀放等語。護軍校有管轄護軍之職。且係精選營伍。自應以才具去得。管轄有方者。充補護軍統領等所奏甚是。著照所請行。其前鋒營圓明園護軍營。並照此辦理。但凡事有利必有弊。今如此行之固善。恐久又滋弊。嗣後裁汰補放之處。倘有不公。許本人在領侍衛內大臣處控告。朕另派親信大員秉公查辦。如果並無冤抑。希圖僥倖。妄行告許者。照越訴例治罪。著通行曉諭該管官員及兵丁等知之。諭軍機大臣等。從前大學士慶復奏稱班滾及伊家口并惡木勞丁姜錯太等一齊燒死等語。彼時朕即以情節可疑。令大學士慶復留心蹤跡。今鎮海營叅將袁士林來京。引見朕。令大學士等詢問。據稱聞泥日寨之姜錯太未曾燒

死。想姜錯太同在一處。彼既未死。其班滾似亦未曾燒死。亦未可定等語。與大學士慶復所奏不符。雖袁士林得之傳聞。但既有此語。未必無因。可傳諭問大學士慶復。令其將姜錯太果否燒死之處。留心察訪。據實覆奏。○
壬午。

上詣暢春園問

皇太后安。○諭前因山西萬泉安邑有聚衆抗官之案。特差侍郎雅爾圖前往辦理。今據奏報。於中途患病。不能前進。又據巡撫愛必達奏稱。萬泉縣刁民屯聚多人。把守城門。看此情形。必有巨奸為之謀主。煽惑愚民。逞兇肆惡。猖蹶至此。非尋常聚衆可比。著大學士公訥親乘驛前往。給與欽差大臣關防。率同巡撫愛必達嚴行查辦。以彰國法。諭軍機大臣等。從前徐杞由甘肅布政使來京。面見時。奏稱任內經手案件。俱已完結清楚。今據阿思哈奏摺。內稱前任未完積案。多至數百餘

件因令各部查明。據戶兵刑工等部查出徐杞任內接辦未經完結者十九案。本任內承辦未結九十四案。與伊面奏全完之處。迥不相符。著將軍機處行查各部原單發往。令徐杞明白回奏。尋奏。臣於雍正十三年十一月抵甘肅任。於乾隆十年五月離任。所有積年地丁兵馬等項錢糧。俱已陸續詳請題咨。凡外省辦理。以詳經題咨者。即為清結。是以有此面奏。而題咨後接到部覆。或准或駁。此等案件。俱應後任接辦。是以阿思哈奏摺與臣迥不相符。得旨。雖有此情節。然汝向所奏亦可謂不實矣。以後戒之。又諭。從前大學士慶復奏稱。班滾及伊家口。并惡木勞丁姜錯太等。一齊燒死等語。情節甚屬可疑。前已傳諭張廣泗。令其於到川時。詳細訪察。今鎮海營叅將袁士林。來京引見。朕令大學士等詢問。據稱。泥日寨之姜錯太。未曾燒死。想姜錯太同在一處。彼既未死。其班滾似亦未曾燒

死。亦未可定等語。袁士林雖係得之傳聞。但伊親在行間。其焚燒泥日寨。即差伊前往舉火。而為此語。顯屬有因。可將此情節密行傳諭張廣泗。令其將班滾姜錯太等果否燒死之處。留心察訪。此非張廣泗經辦之案。自當無所瞻顧。悉心察訪。可以盡得實情。即行據實覆奏。甲申諭鑲藍旗漢軍都統奏。已故山西渾源州知州劉廷詔。應追虧空銀米。實不能完。請交部照例查辦一摺。查劉廷詔於乾隆九年八月初六日。叅革。初七日病故。相距僅止一日。此中顯有情弊。向來督撫徇庇屬員。所有虧空倉庫。並不留心稽察。據實題叅。及至該員身故。無可彌補。始行揭報。不得已上下通同。倒提年月。以掩飾從前不能查察之過。雍正年間。屬員虧空。定有上司著賠分賠之例。是以稽察嚴密。官員知所畏懼。虧空之案甚少。近來此例不行。所以貪風復熾。不可不加意整頓。稽察屬員。乃督撫專責。果

其實心查察耳。目何患不周。果其察出。即叅屬員。何至不知畏憚。敢於任意虧空。乃平日因循寬假。明知虧空。冀其自行彌補。及至水落石出。僅以題叅了事。本任既無可著。追旗籍。又聲明豁免。相習成風。無所底止。將虧空之案。由此日增。於吏治深為有害。劉廷詔未完虧空銀兩米穀。著該上司巡撫以下分賠。並傳諭各督撫知之。○諭軍機大臣等。據愛必達奏。安邑刁民。已拏獲三十九犯。其所稱邠村百姓。始猶鳴鐘聚衆。旋即就擒。所擒人數。未據聲明。至供出之倡首逆犯張遠。曾否擒拏。亦未明晰。萬泉刁民。辱官搶犯。把守城門。不法已極。羅俊統兵前往。僅拏獲數人。此外必尚多脫漏。現在搜捕。續獲若干人。俱交大學士訥親。詳悉查辦。固不可因刁民肆惡。牽累無辜。而刁悍逆徒。亦斷不容漏網。即使用法稍嚴。而刁頑知所儆懼。不敢效尤。所全實多。若各犯但因目前欽差大臣及巡撫親

往。知勢不能支。以獻犯為可了事。而藏匿要犯。暗中脫逃。倘俟事已稍畢。大員散去。再有蠢動。益復不成體制。可傳諭大學士訥親。於此處著實留心辦理。其鎮協分設武弁。原以守衛城池。乃任刁民把守城門。設兵之謂何。此併不可與苗疆失守一例而論。蓋苗疆本屬異類。尚為有因。以內地百姓。而據門自守。欲何為者。此案審結時。所有統轄專轄之文武員弁。俱照苗疆失守例。從重辦理。再此案已有大學士訥親辦理。雅爾圖如已回京。則已。若尚在調理。或彼又隨後前往者。亦即令回京。不必在彼。○乙酉。諭據廣東巡撫準泰奏。稱東安縣素稱難治。前任知縣莊大中。不能整飭。接任知縣莊榮徵。又復庸懦畏葸。一無振作。所有東安縣員缺。查有羅定州州判張紱。辦事實心。在粵年久。熟悉風土。徭情。以之陞補東安縣知縣。實屬人地相宜。照例給咨赴部引見等語。該員係兩任接疲之後。亟

宜竭力整頓。張紱若照例給咨赴部。徒需往返時日。於地方事務。轉致曠弛。著照該撫所請。即行前往署理。不必送部引見。俟三年後。果能稱職。另請實授。○大學士公慶復奏報。勦辦金川逆酋事宜。得旨。知道了。兵貴神速。不可久延時日。尤當以班滾之役為戒。速奏膚功。殲滅真正渠魁。朕所欣望耳。○又奏謝奉旨召回辦理閩務。得旨。不必急於回京。當與張廣泗和衷共濟。以成此事。○黑龍江副

都統阿思海。緣事革職。調鑲黃旗滿洲副都統福爾松阿。為黑龍江副都統。○丙戌。嚴懲虧空積習。諭向來州縣虧空倉庫。定例綦嚴。雍正年間。復有分賠著賠之例。所以懲戒。通同掩飾。朦混徇庇之該管各上司。令其實力稽察。使屬員不致侵食。此正所以為保全之善術也。朕觀近年來虧空漸熾。如奉天府尹霍備任內。則有榮大成等五案。山西則有劉廷詔之案。朕是以照例令該管上司分賠。而

揆厥由來。實緣該管上司。見朕辦理諸事。往往從寬。遂一以縱弛為得體。獨不思州縣定有養廉。用度儘已寬裕。何至侵那虧空。今民間絲粟固不容妄取。乃於帑項正供。恣其婪食。有是理乎。且倉庫所入。出自窮簷小民力。作以奉公。貪員安享以自利。以赤子之脂膏。飽饒壬之囊橐。其情理深為可惡。而為之長者。一切置之不問。迨至彌補無術。則以揭叅了事。異日無可著追。又為之照例請豁。是使

貪員得計於目前。國帑虛懸於事後。而於其間上下相蒙。彌縫巧飾。實乃苟且因循。廢法欺公之惡習。益致叅案累累。成何政體。在朕力崇寬大。黷竊凝旒。罔兼庶慎。而諸臣秉節奉公。整綱肅紀。當查者查。當叅者叅。不事姑容。不為蒙蔽。乃所為主職要。臣職詳。合於寬而有制之正道。若一味縱弛。其將何所底止。豈諸臣公爾忘私之意也。可傳諭各督撫。共體此意。痛除積習。時時加意稽查。據實辦理。

如仍前寬縱。致貪風日熾。帑項侵虧無著。惟該管上司是問。○又諭據將軍阿蘭泰奏。所給拉林居住滿洲等牛二千隻。今僅存五百餘隻。且俱疲瘦。其所住房屋圯壞。及被火災燒者。三分內幾及一分。至所給地一千頃。去年只耕種六百三十餘頃。其餘俱已荒蕪等語。從前補放巴爾品為拉林副都統時。原因初移駐滿洲。令伊竭盡心力。加謹管理。今該將軍阿蘭泰所奏。則巴爾品在拉林時。並未以此為事。盡心辦理。惟曲徇所屬。博取好人之稱。且伊立心。只欲回京。諸事俱因循苟且。以致如許牛隻倒斃。房屋塌毀。地畝荒蕪。巴爾品著交部嚴察議奏。○諭曰。那蘭保著調補熱河副都統。巴爾品著革職。賞給副都統銜。自備資斧。前往軍營効力三年。再行請旨。○丁亥。

上詣暢春園問

皇太后安。○諭曰。內閣學士沈德潛現在暫假

回籍。俟來京之日。在阿哥書房行走。○又諭。覽蘊著。納爾泰。自陳本內。俱薦舉增壽保一人。而肅滿岱。介福。自陳本內。又俱薦舉德通一人。伊等俱係同城居住之員。彼此豈無知聞。若似此商酌薦舉。成何體制。蘊著。納爾泰。肅滿岱。介福。俱著交部察議。○又諭曰。王河乃侵盜國課之要犯。理宜留心稽察看守。今在監身故。明係伊自知侵帑。難免重罪。願甘畢命。以逃國法。該管官不行查察。則平素上司之疎忽可知。著大學士傳旨申飭鄂昌。○又諭直隸水利。關係綦重。是以

皇考特命怡賢親王。及大學士朱軾等督修。欲營水田。以備不齊。後以南北地利異宜。難臻績效。朕於乾隆九年。復准言臣條奏。特命大學士高斌。協辦大學士吏部尚書劉於義。相度經理。今據奏順天。保定。河間。天津等府。及順德。廣平。大名。趙州等處。各工俱先後告竣。高斌。劉於義。屢次親詣工所。往返勤勞。及在

事員弁皆著交部議叙但興舉大工必期實有成效可垂之久遠方為有益朕為畿輔生民永圖利賴是以不得已開捐期於去水之害收水之利如淫潦泛溢疏濬之而使有所歸則涸出者皆成沃壤而受水之區即可得灌溉之益今用項至七十餘萬然何處積害已除何處實效已著曾未詳悉確查具奏至籌畫善後良圖亦非僅付之地方有司即可保守永遠弗墮者其目今如何成效日後作

何保固之處著軍機大臣會同高斌劉於義詳查議奏○諭軍機大臣等朕因周學健素能實心任事是以簡任河道總督但河工關係至重而治河自古為難非胸有全河不能得其要領非數十年留心試驗確見情形因勢利導亦不能萬全無弊較之辦理諸務可用心思智力測度經營者迥不相同周學健辦事不患其因循而患其太急不患其畏怯而患其太猛已於前此奏摺并令高斌傳諭

內詳悉開示今觀近日所奏數摺仍未免喜於興作而議論亦復紛煩古人處大事必鎮定安詳以輕舉為戒是以不露聲色而動必有成故書曰慮善以動孔子曰臨事而懼其不敢自逞意見嘗哉為之者正所以善其事也高斌現在南河可再傳諭周學健令其虛衷審慎一切與高斌詳晰熟籌俟洞悉原委徐圖績效以稱委任併諭高斌知之○以宗人府府丞楊嗣璟為禮部右侍郎○己丑

上御勤政殿聽政○諭京師自立春以來穀雨前後雖常得雨澤但未霑足今已隔旬餘正禾稼發生之際而風日炎燥農功望澤甚殷朕心深為憂惕宜申虔禱著該部查照定例敬謹舉行○是月奉天將軍達勒當阿奏查朝鮮小馬殊不堪用本朝自盛京開基以來不准賣與朝鮮大馬相沿百有餘年邊口照例嚴查本年三月朝鮮使人跟役在京買馬四十匹雇旗人引路越邊經柵子章京德裡

善聞知。會同鳳凰城弁兵連夜追及。將人馬一并拏獲。伏思大馬不准帶往朝鮮。中有深意。今朝鮮來使跟役。由京買去馬內。既有牝牡。至彼便可滋生大馬。請飭交京城左右翼稅局。嗣後不准將大馬賣與朝鮮來使跟役人等。仍飭山海關一帶。并盛京邊口弁兵嚴加查拏。得旨。所奏甚是。知道了。○直隸總督那蘇圖奏報大名府屬得雨情形。得旨。此奏雨澤頗周之語。殊不可必。近日風燥日烈。又覺望霖。保定一帶光景如何。○又奏報保定天津及趙冀深等府州一帶。得雨已周。惟正順廣三府間有未霑足處。得旨。覽奏俱悉。其有覺旱成災之處。加意撫卹。綢繆。不可以一隅視之度外也。○新授直隸按察使辰垣奏。請進京請訓。得旨。可不必來。直隸諸員於朕巡行所歷。隨便皆可進見。至汝向在刑部。刑名是汝駕輕就熟之事。更何用朕訓。惟不自滿假。視若不足。以實心行實政。則可勝任而

愉快矣。○兩江總督協辦河務尹繼善議覆。據蘇松水師營總兵官胡貴條奏水師各事宜。一請陸路將弁願改外海水師者。先應出洋演試。查定例。外海水師誤用陸路內河者。准其改調。原欲收人才之實用。若不加試驗。何從得悉。應如所奏。嗣後陸路將備欲改外海水師者。發海營演習。如果去得。方准改調。一請令該鎮中奇二營遊擊一體出洋巡哨。查外海水師重在熟悉洋面。若不親臨情形。何從得悉。今胡貴請將奇營遊擊與左右兩營輪班出巡。亦應如所奏行。至所稱中營遊擊不拘春秋兩哨。出巡一次。遇有失事。請免處分。蓋因中營經管兵馬錢糧。與別營不同。但身膺外海之任。應與各營一體輪巡。其出巡之月。中營事務。即委別營代辦。亦不致稽誤。惟是從前出洋。止左右兩營。自二月至九月。分春秋二班。今輪巡既有四營。若仍分春秋兩班。是每員俱二年輪巡一次。仍難熟悉。

請將四營之遊守。自二月起。九月止。分為四班。一年一周。每班兩月。亦不至過勞。其川沙、吳淞二營之將備四員。亦如之。至於十月至正月。西北風狂。例不出巡。但海洋緊要。不可不時刻留心。今計四個月。共一百二十日。應令鎮標四營暨川吳二營。每營分管二十日。遇失事。各按分管之期查叅。再內洋一切分汛事宜。亦當一并釐定。查蘇鎮標營西與福山。西南與劉河。東南與川吳二營對峙。各就汛內洋面分管。悉以中流為界。又川吳二營彼此推諉之胡港口黃浦。迤東至楊家嘴一帶洋面。亦各就川吳附近地界劃分。東南屬川沙。西北屬吳淞。並以中流為界。其滙頭百里洋面。雖與南漚營陸汛相對。但該營專管陸路。難兼水師。今計程南至川沙北至蘇鎮。西至吳淞。五十里至百里不等。均非本汛洋面。難專責一營管轄。應作蘇鎮四營暨川吳兩營公汛。每年每營分管兩月。更替出洋遊

巡。得旨如卿所議行。○漕運總督顧琮密奏。江西省永新幫漕船三十四隻。行至鄱湖。忽遭風險。擊破十九隻。淹斃男婦十九名口。郭仲寧等十二船全行漂沒。應照例豁免。其餘除劉汪等二船幸閣淺打撈。虧折無幾。尚可飭丁買補。至周梁等五船。每船僅存水米二三十石。五十餘石不等。與豁免之例未符。但均係貧丁。若令賠補。每船須銀千餘兩。力有不能。可否邀恩一例請豁。得旨。漕項向例甚嚴。定法者必有深意也。汝但照例辦理。俟不能時。於具題外。據實摺奏。乞恩尚可。今乃先為此言。豈非市恩邀譽。汝此病何不能稍改耶。○湖廣總督塞楞額。湖北巡撫陳宏謀。奏楚省積儲未足。請將本省人民停止在部捐監。專收本色。以實倉儲。得旨。楚省不似江省災傷之餘。艱於儲蓄也。總之部臣利於在內。督撫利於在外。朕惟酌中行之。至汝等此奏。實在不可行之列也。○山東巡撫阿里衮遵

旨覆奏。四月初一日得甘霖四寸。麥苗改觀。至初七八。得有透雨。秋田大有裨益。得旨。覽奏俱悉。初一初七之雨。何不亟行奏聞。朕盼雨念切焦勞。急欲慰望之意。汝尚不知乎。河南巡撫碩色遵旨覆奏。豫省被災處。已飭安頓撫綏。四月初七八復得透雨。秋禾徧插。現無失所。至各屬二麥。省南可望六七分收成。省北雖稍減。然去年秋稔。今轉瞬即得新麥接濟。民食有資。得旨。覽此奏。稍慰朕懷。○又奏報各屬覺旱情形。得旨。此奏畧遲。自汝有望雨之奏。朕日夜待之。既稱旱象已著。則一切政務。更應先事豫籌。慮之以周詳。為之以安靜。不遺不濫。雖云救荒無善政。而思過半矣。新授山西布政使朱一蜚奏請進京請訓。得旨。汝係常領朕訓之人。何必復來。速赴任所。常體朕訓。而擴充之。則得矣。若求其更切於汝而最者。亦惟四字。曰毋用聰明。甘肅巡撫黃廷桂奏覆前奉硃批責臣以汝

無取悅之心是也。此四字未經奏明。且有遁辭。竊臣向有利害刻薄到處與人不和之名。是以督臣慶復始而疑臣。久而復有人言不可信之語。詎意又有指臣授意屬員。供應繁盛者。臣性急口快。不為衆情所喜。顧蒙

皇上特達之知。委以封疆。何所畏懼。而欲用術行私。結人歡心。惟有欽遵訓旨。有則改之。無則加勉而已。得旨。汝總以不善交結。不肯逢迎自居。此即汝巧處也。此八字非惟汝可自

保。朕亦保汝。前諭用術行私四字。汝總未言明。此即遁詞也。何妨明諭汝。蓋汝之意。供應豐盛。朕必知之。知而慶復必獲罪。或調進京。則總督非汝而誰。此汝之本意。屢次詢問。而汝總指東話西。越情見乎辭矣。四川巡撫紀山奏謝擡入正黃旗滿洲恩。得旨。既知感激。則當盡心封疆。政務察吏安民。而夷考所行。又不過循分供職。實難稱為副朕望也。勉之戒之。四川提督武繩謨奏大金川地處

萬山之中。土司莎羅奔奸惡梗化。小金川各處地土人民。均被奪掠。速宜搗穴犁巢。以杜諸番效尤。土兵狡詐。向背無常。應多派漢兵。始能擒勦首惡。得旨。此奏據實直陳。可嘉之至。餘俟旨而行。○雲南巡撫兼管總督張允。隨奏報密飭官兵。豫備協勦川屬逆首事宜。得旨。此可謂以封疆為念。知輕重之見也。但滇川途遠。只於交接處所堵禦可矣。驅馳行間。未必藉此得力也。○又奏謝授雲貴總督

平定奏言二

四

恩。得旨。覽奏俱悉。雲貴總督舊制甚有深意。蓋所以聯二省之脈絡。即所以固極邊之藩籬。於政務暇時。時一巡閱。於封疆營制。均不無補也。○新授雲南巡撫圖勒炳阿奏謝。得旨。諸事諮之張允。隨而行。不自滿假。設誠學習。何患不勝任耶。○新調川陝總督張廣泗奏謝。得旨。覽奏俱悉。目下精於戎行。能運籌制勝者。朕以為莫過於卿。此去必能攘外安內。成一勞永逸之圖。朕惟待膚功之早成耳。

又奏陳各路稟報。川省自瀘州以下。咽喉搶奪之案甚多。又有邪教遺孽。奔竄各路。恣行剽掠。及大金川土酋兇惡不法。侵蝕鄰封。拒傷官兵。各情形得旨。覽川省既有此等不靖之事。今皆為卿職分內應辦之責矣。然目下總以大金川為首圖。俟大金川之功成。以次及之可也。○新授貴州巡撫孫紹武奏謝。得旨。覽。但弗滿盈。諸事向前。秉公奮勉。何職不可勝耶。汝今雖為巡撫。然總督遠在滇省。一切苗疆之事。亦應留心。不可推諉也。

平定奏言二

四

大清高宗法天隆運至誠先覺體元立極敷文
奮武孝慈神聖純皇帝實錄卷之二百八十九

實錄卷之二百八十九

四十七

大清高宗法天隆運至誠先覺體元立極敷文
奮武孝慈神聖純皇帝實錄卷之二百九十

上諭軍機大臣等奏請將前次因事請假內大臣結案欽奉 上諭軍機大臣等

吏部理藩院事務正黃旗滿洲副都統世襲騎都尉軍功加七級隨帶加一級尋常加一級軍功紀錄一次臣慶桂

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲副都統軍功紀錄五次

尋常紀錄十四次臣德璘經筵講官太子少保工部尚書紀錄六次臣曹振鏞等奉

乾隆

乾隆

乾隆十二年丁卯五月庚寅朔以通政使德

通為都察院左副都御史○以右翼前鋒統

領兼都統銜阿岱兼管滿洲火器營大臣事

務以固倫額駙色布騰巴勒珠爾管理正

紅旗蒙古都統事務○辛卯

上詣暢春園問

皇太后安○諭軍機大臣等山東沂州府蘭山

縣上年被災之後朕已加恩借給口糧今春

又加賑一月目今賑期已過聞該處雖得雨

而牛具籽種俱力有不能此際即官為借給

亦已過時。誠恐秋成無望。朕心深為軫念。可傳諭阿里衮。察看現在情形。應如何加恩撫卹接濟。俾窮民得霑實惠。不致失所之處。速行詳悉查辦。一面料理。一面奏聞。尋奏蘭山縣現在連得雨澤。麥收實有八分。秋禾亦俱暢茂。間有被雹之處。並無損傷。民情寧帖。無庸再行撫卹。得旨。覽奏稍慰。○又諭曰。河南巡撫碩色奏。偃師縣民。因出借倉穀。棍徒擁至縣署。拾磚擲傷典史頭面一案。雖據拏獲首惡五犯。而已獲復逃之二人。竟未問及。又稱近城觀看。一時人多擁擠。將轎傘擠壞。且稱並未久聚抗固。與山陝光棍聚眾罷市抗官塞署有間等語。此案鄉民聚眾。多至百有餘人。奸徒因得乘機煽誘。該撫乃謂觀看擁擠。明係存化大事為小事之意。為隨從附和之眾。借端漏網。且邇來各省屢有此事。若非痛為懲創。則遠近聞風。奸徒何由知儆。山陝光棍之條。正為此設。乃以並未久聚抗固。曲

中華書局影印

二

為開脫。成何政體。即其所稱將知縣暫緩糾劾之處。亦因見朕諭旨。為此觀望之辭。非謂事理必當如是也。偃師並非歉收之地。借穀亦非求賑可比。而恃眾不法。鬧署毆官。語云。涓涓不絕。將成江河。萌芽不剪。將尋斧柯。碩色身任封疆。不能加意整理。仍復為兇徒開豁。殊屬寬縱。可傳諭嚴行申飭。○調廣東巡撫準泰。馳驛來京。以總督策楞兼管巡撫印務。○調甘肅涼州鎮總兵哈尚德。為雲南臨元鎮總兵官。臨元鎮總兵徐啟新。為甘肅涼州鎮總兵官。○壬辰。孝誠仁皇后忌辰。遣官祭景陵。○軍機大臣等奏。甘肅所需營馬。原由金塔寺出口。往喀爾喀等處採買。乾隆七年。肅州鎮臣遣人赴額爾得尼昭附近買馬。額駙策凌恐滋事。報部禁止。嗣經總督慶復。議以每年定限給票。不得濫往。並指明地方。甘肅各營。由金塔寺口外行走。安西各營。由布隆

中華書局影印

三

吉爾西喇呼魯蘇行走北路喀爾喀蒙古庫倫恰克圖一帶購買部議覆准今安西提督李繩武奏買馬弁兵經過圖古里克過準噶爾脫出蒙古孟克一名等語查買馬弁兵擅赴圖古里克其地在哈密卡外逼近準夷應嚴加防範除甘肅各營出金塔寺口者仍不得至哈密卡外其安西各營即在附近西寧一帶採買不得遠至喀爾喀其圖古里克一帶及哈密卡外行走之處嚴行禁止從之

癸巳諭軍機大臣等山東兗州濟南泰安一帶得雨均未霑足際此青黃不接之時聞各該處米麥雜糧價日漸增長以粟米而論每倉石市價自一兩四五錢至一兩七八錢不等其餘麥豆價值可以類推雖各處減價平糶價仍昂貴夫米麥為民食所需今市價日漸昂貴恐小民買食艱難況目下未得透雨將來麥收或致歉薄皆應豫為籌畫不知阿里衮現在如何辦理可傳諭詢問令其將

該地方實在情形及如何辦理之處詳悉奏聞尋奏濟南等府屬自本月初八以來均得透雨濟南府屬除德州德州衛二處被旱餘有六分以上收成泰安府屬除泰安縣被旱餘約有七分收成兗州府屬除鄒縣魚臺濟寧汶上四處被雹金鄉濟寧嘉祥三處被旱餘有六分以上收成早穀高粱現俱暢茂而近省一帶麥地俱在翻犁播種晚秋可期豐稔米豆等價平減被災之所已分飭履畝確勘現在照例籌辦得旨覽奏俱悉又諭三月內潘思渠題參署靈璧縣知縣潘璋藉賑營私一本已降旨令該督嚴審究擬向來各省此等案件有一面具摺奏聞一面題參者亦有但題參而不摺奏者但關係賑恤事宜於具摺之便亦應奏聞可傳詢潘思渠何以未曾具奏其他散賑各屬民情若何亦應留心查察奏聞始勤終怠人之常情其令慎之尋奏臣題參潘璋時恐弊侵在官不止靈

壁一處。飭道府徹底清查。實則具結。虛即揭
參。擬俟覆到時。彙總奏聞。至災黎疊荷恩賑。
咸慶生全。現在二麥豐稔。民氣舒和。地方寧
謐。得旨。覽奏俱悉。諸事無不應留心。封疆之
責。常存自視。若不足之念。則得矣。○甲午。

上詣暢春園問

皇太后安。○諭軍機大臣等。四川提督武繩謨
奏稱。莎羅奔佔踞章谷。攻取孔隅。直至牛廠
一帶。欲圖進爐。遊擊羅於朝帶兵抵禦。金酋
伏兵衝突。土兵遇賊漫散。致被殺傷。又稱綽
斯甲。瓦寺等土司。俱有姻親。其派調土兵。誠
恐臨敵觀望。向背叵測。莎羅奔係受印土司。
輒敢自稱為王。大肆猖獗。似應多派漢兵。始
能擒勦首惡等語。從前紀山奏報莎羅奔猖
獗情形。亦大畧相似。而武繩謨奏該酋欲圖
進爐。紀山則謂恐其侵爐。遣兵防範。至自稱
為王之語。紀山摺內並未奏及。夫蠻衆鴟張。
侵軼內地。或與官兵抵拒。偶有傷害。正如搏

虎捕蛇。反被毒噬。尚屬有因。至於私立名號。
煽脅黨與。恣行不法。其蓄心尤為可惡。武繩
謨初莅川省。據稱得自訪聞。可傳諭慶復張
廣泗是否確實。如果有此事。紀山身任封疆。
豈不聞知。何以不行陳奏。是否不欲張大其
辭。著慶復張廣泗一併問明。至武繩謨所稱
土兵向背叵測。應多派漢兵。始能擒勦之語。
似亦有見。以蠻攻蠻。雖屬制禦土司之道。而
情形各有不同。觀前此羅於朝所帶土兵四
百名。中途遇伏。不戰四散。即土兵不可倚信
之明驗。可傳諭慶復張廣泗。令悉此意。以便
斟酌派調。再從前曾降旨慶復張廣泗。或同
駐雅州。令武繩謨總統前進。或用宋宗璋許
應虎為統領。武繩謨專辦提督事務。不必前
往。俱聽慶復張廣泗商酌調度。今據武繩謨
奏稱。酌帶官兵。請商督臣相機勦堵。其應否
令其前赴軍營之處。仍著慶復張廣泗遵照
前旨。相度機宜。隨時調度。殄滅羣醜。迅奏膚

功。併傳諭紀山武繩謨知之。尋慶復張廣泗奏臣等遵旨詢撫臣紀山。據咨稱莎羅奔狂悖不法。煽脅隣封。及打革布什咱正地。又犯西爐等處。後經發兵防禦。該酋退守。並未進爐。再查金川亦未私立名號。惟拏獲賊番審訊時。或有自稱其主為金川王爺者。武繩謨所奏。不為無因。究係愚番供辭。未敢據以為實。至土兵原不可倚信。臣等前已另派川兵二千名。分佈兩路。並調黔兵貼防矣。報聞。

丙申。諭向來鄉會試之年。不准條陳科場事務。蓋欲使士子潛心誦讀。不便紛更成例。以擾其心志。且亦防弊之一端。立法甚善。夫三年之內。何時不可言。而必待場期已近。紛紛陳奏耶。孫宗溥摺著交部暫存。俟科場事畢。另行議奏。嗣後如有似此違例條奏者。必交部察議。並傳諭科道等知之。廣科舉額。諭禮部。國家賓興之典。原以遴拔俊髦。若學殖荒陋者。俱得廁名倖進。則玉石雜呈。主司因

而迷目。自不可不嚴立限制。前此學臣科試之後。復取遺才。錄遺之後。督撫又有大收。其取送甚濫。是以議有科舉定額。每舉人一名。大省錄取八十名。中省錄取六十名。小省錄取五十名。其途本寬。果係真才。自不復有遺珠之歎。但近來士子。因科場剔除舊習。頗知自愛。有志讀書。期以實應。又當稍展其額。以示鼓舞作興之意。朕思前議。但就正榜定額。尚有副榜未經議及。著再加恩。每副榜一名。大省加取四十名。中省加取三十名。小省加取二十名。令各學政於考試遺才時。不論生員貢監。亦不拘縣分大小。但就文理明通者。照數錄送入場。此外概不許濫送。該部可即速行文知之。○諭上年山東被水。各府州縣衛屢降諭旨。分別賑卹。朕又念歉收之後。宜加撫綏。復經降旨。令該撫將被水州縣於現在賑卹之外。酌量加賑。以資接濟。今據阿里衮奏稱安邱諸城二縣原報被災五分之各

村莊。例不加賑。但今春雨水短少。米價昂貴。小民謀食艱難。其餘原未報災之各村莊。雖稍有收穫。歷今半載有餘。窮乏戶口。未免拮据。請加賑一個月等語。安邱諸城二縣。無論已成災。俱著加賑一個月。俾貧民餬口有資。勿致失所。該部即遵諭行。○諭軍機大臣等。安邑萬泉二案。朕遣大學士訥親。率領該撫。愛必達查辦。自起身之後。朕計日望其將辦理情形奏聞。即愛必達到彼。與烏爾登等

先到彼處。亦應即行奏聞矣。乃遲至今日。始據奏萬泉一案。先後共獲人犯一百一十四名。要犯俱已全獲。彼時官兵初至。各犯有聞風躲匿。百姓亦有搬移附近別村。要犯有已逃被獲。百姓旋經招諭。亦即寧帖等語。此案糾眾不法。兇惡已極。其辱官搶犯。把守城門。非尋常聚眾可比。或有蓄謀構釁。勾結奸匪。另有別圖。是以命大學士訥親。前往查辦。其該處監獄有無疎虞。倉庫有無搶刦。即如固

原兵丁糾眾時。有搶奪當舖等事。此次萬泉兇徒肆橫。一應當商店舖。有無刦掠。良善有無擾害。彼蜂屯蟻聚之際。百姓若何光景。是否安堵如故。及羅俊帶兵前往。不能彈壓於前。今若何擒獲兇犯於後。此中情事。最關緊要。大學士訥親摺內。並未敘及。若以朕盼望之切。先為畧陳大概。則此摺所奏情節。即初一日到彼之時。已可發摺。今遲至初三日。自可細加查察。逐一奏聞。乃摺內不過籠統陳奏。何以慰朕西顧之念。爾等可傳諭大學士訥親。令其詳悉速奏。再愛必達摺內。稱知府朱發。因刁民簇擁出城。遂手書硃票。由蒲州府放還。現已全拏監禁。朱發為一郡之表率。平日庸懦。釀成事端。乃臨事為刁民迫脅。遂爾書票放犯。其罪不容於誅矣。應從重議罪。至於此案審結時。所有統轄專轄之文武員弁。應遵前旨。照苗疆失守例。從重辦理。又大學士摺內奏稱。於三十日途遇撫臣齎摺之

人詢知奏報續獲人犯。恐致行遲落後。不如由驛遞送。更為便速。因令齎回等語。此摺乃愛必達於四月二十八日齎發者。即恐稽遲時日。帶回由驛遞送。亦當於初一日即為齎遣。即今初三日所發摺內。亦並無此摺。若云訥親所奏。即愛必達摺內情形。彼摺可以無庸覆奏。即應將此情節聲明。再此次來摺之密封。上面拆破。下面竟未封口。所包黃紙。亦未粘封。訥親係最精細之人。斷無此理。此中自有情弊。已差員前往沿途一帶挨查。大學士訥親應將封發奏摺之人。細加詢問。可一併傳諭知之。再事已定局。所辦者善後耳。可於衆犯正法之後。押解別犯赴太原。可令太原之滿兵。便路護送。若有應至太原商辦者。即親至太原。烏爾登等先令回京。沿途暑熱。不必似去時疾行也。尋奏查萬泉刁民。欲將蒲州人犯。提至本縣審結。因聞知府到來。恐人少不足挾制。是以糾集多人。又恐知府回

去。人犯不能提回。派留徒黨把守城門。乃其起事本意。所有倉庫監獄。全未干動。城內並無絲毫侵擾。百姓亦無驚惶。至羅俊因查閱營伍。親至安邑。未經查拏人犯。即回平陽。後因萬泉有開闢之事。帶兵至萬泉。彼時知府業已旋府。知縣亦調赴臨晉。在後方回。該鎮到時。刁民已散。陸續於各處查拏。兇犯俯首就擒。百姓聞官兵一到。便都驚避。此等情節。臣概未敘入。實增慚悚。再臣於萬泉發摺時。所包黃紙。緣與撫臣奏報同在一匣。是以用紙另裹。未經粘糊。至奏摺實係封好。其封口損傷。上面封口。因摺子添多。將黃褥改薄。裝墊不實。以致沿途鬆動擦損。其下口本係舊糊。挨動自脫。報聞。○丁酉。

上詣暢春園問

皇太后安。戊戌。諭前因山西萬泉安邑刁民抗糧拒捕聚衆不法一案。特遣侍郎雅爾圖前往查審辦理。乃雅爾圖行至中途。向巡撫

愛必達。告稱患病沉重。不能前進。請醫調治。近又稱病勢漸愈。緩緩回京。向來八旗大臣官員。均勵忘私忘家之義。即遇用兵行圍。若未經派出。無不痛哭懇求。以從王事。其或年老有疾。亦情願捐軀於疆場。而以偃息在牀。死於婦人女子之手為恥。此滿洲之舊風。雅爾圖身為大臣。豈不知之。至此案奉命查辦。即使中途患病。理應力疾前往。果至不可支持。巡撫使至攔阻。而義在雅爾圖。惟奮往已耳。其不能審理案件。請旨派人代已而已耳。乃自稱病勢危篤。逗遛不前。究且此案查拏匪類。則有綠旗之兵弁在。定案參奏疎防。則有巡撫以下。不善經理之官員在。何至耽延觀望。畏首畏尾。至於如此。較之從前八旗公忠勇敢之風氣。大相逕庭矣。朕於是大為人心風俗慮。尚不為雅爾圖一人而已也。雅爾圖現既患病。著解任調理。俟病痊之日。自行奏聞請旨。戶部侍郎著舒赫德調補。○旌表

守正捐軀之湖南石門縣民冷上珍妻林氏。○已亥。諭軍機大臣等。各省督撫養廉有三萬兩者。有僅止數千兩者。在督撫俱屬辦理公務。而養廉多寡懸殊。似屬未均。著軍機大臣等酌量地方遠近。事務繁簡。用度多寡。量為裒益。定議具奏。尋議查各督撫養廉銀。現在湖廣總督一萬五千兩。兩廣一萬五千兩。江蘇巡撫一萬二千兩。江西浙江湖南湖北四川各一萬兩。不甚懸殊。無庸置議。外直隸畿輔重地。事務繁多。總督養廉止一萬二千兩。較各省覺少。請增銀三千兩。山東山西河南三省。同屬近地。事務用度亦屬相仿。且俱係兼管提督。而山東山西二省各二萬兩。河南止一萬二千兩。請將山東山西二省各減五千兩。河南增三千兩。各成一萬五千兩之數。廣東巡撫一萬五千兩。廣西止八千四百餘兩。雖廣東用度稍多。然相去太遠。請將廣東減二千兩。廣西增一千六百兩。以足一

萬兩之數。再川陝總督。雖有節制邊方。犒賞兵丁之費。然養廉三萬兩。較各省過多。而西安。甘肅二省巡撫。西安居腹裏。甘肅為邊地。乃西安二萬兩。甘肅止一萬一千九百兩。請將川陝總督減五千兩。西安巡撫減八千兩。甘肅巡撫增一百兩。以足一萬二千兩之數。閩浙總督其道里遠近。事務繁簡。與兩廣相仿。而養廉二萬一千兩。未免過多。請減三千兩。福建巡撫。養廉一萬二千兩。未免不敷。請增一千兩。江蘇巡撫。養廉銀一萬二千兩。安徽則止八千兩。雲南巡撫。一萬五百五十兩。貴州則止八千五百兩。亦屬未均。請將安徽巡撫增二千兩。貴州增一千五百兩。以足一萬兩之數。至各省督撫養廉。間有奇零。乃從前據火耗之額定數。今既經定制。零數應刪。請將兩江總督養廉銀一萬八千二百兩內。去零銀二百兩。雲貴總督雲南巡撫。各去銀五百五十兩。從之。又諭山西萬泉安邑二

縣匪類聚眾抗官之案。特遣大學士訥親前往查辦。所有造意為首。及附和逞兇各犯。現經分別懲治。以彰國法。朕思晉省風俗。向稱淳樸。其民多勤本業。而重犯法。乃不意近日刁民。竟至拆毀牌坊。塞堡守門。辱官索犯。種種猖獗。愍不畏死。至於此極。豈事理之所宜有。夫稂莠不剪。則嘉禾不殖。今首惡要犯。既各明正典刑。其林林總總。之不為煽誘者。皆良民赤子。戴高履厚。於光天化日之下者也。宜令大學士訥親。宣布朕意。懇切訓諭。俾共知國家立政。仁育義正。威惠兼施。彰善癉惡。不容稍有假借。我朝德澤涵濡。覆露長育。百有餘年。爾百姓保家室而樂盈寧。長子孫而安耕鑿。刑辟何自而施。即使地方官政事少未妥協。督撫司道昭布森列。自當據實陳訴。靜聽申理。何至無所控籲。鋌而走險。犯上作亂。兇暴公行。總緣愚民無知。易為鼓動。挾衆人之勢。以逞一己之忿。遂至陷於大惡。罹於

重辟而不復顧。獨不思身犯刑章。無所逃罪。父母妻子。不能相保。既罹重辟。又受惡名。其實不過一二首惡之人。挾私用詐。圖快己意。倡為邪說。而蚩蚩之衆。貿貿從之。意謂此二人挺身以為衆人。衆人不可不出力相助。平日好勇鬪狠之輩。不知大義。反若激於公憤。振臂而前。如飛蛾之投燄。赤子之入井。試令反而自思。有不痛自咎恨。追悔無從者乎。爾百姓於事過之後。覆念前此兇暴情形。與今日之安居樂業。孰得孰失。有不共斥其愚頑狂悖。轉而自相慶幸者乎。嗣今已後。務須洗心滌慮。痛除惡習。毋恃朕保民若赤。過於寬厚。而冥頑不靈。以逞兇為得計。當共知尊卑之分。決不可踰法度之嚴。決不可犯父教兄勉。革薄從忠。力為良民。恥為匪類。以共享昇平之福。大學士訥親。將朕此旨。遍行曉諭。如尚在蒲州。即於蒲州剴切訓導。如已至太原。即在太原宣諭。務令賢愚共曉。併頒發各

府。令地方官轉行化導。俾窮鄉僻壤咸共聞之。以化愚悍之積習。○又諭曰。兩廣總督萊楞等題。參電白營遊擊黃翔麟等。因本年二月內。提督林君陞。飭查地方營汛情形。黃翔麟等違例出票。查點戶口。以致烏石等三堡男婦訛傳。驚慌奔避一案。該督撫等從前為何並未摺奏。著大學士等寄信詢問之。尋奏烏石等堡男婦謠言奔避一案。緣地方文武官初意徇隱。故逃避招回復業。俱未稟報。直待鎮道知府查出通稟後。臣等始知之。事隔經月。民咸復業安居。奏報無及。但營弁生事擾民。文武互相朦蔽。不稟不詳。成何政體。是以將遊擊黃翔麟守備施森。知縣毛邑。逐一題參。報聞。○又諭據喀爾吉善陳大受奏。稱臺灣道府二缺。最為緊要。請於知府中選擇一員陞署巡道。於同知中選擇一人陞署知府。似於要地有所裨益等語。朕已批允所請矣。但思臺灣孤懸海外。民番雜處。現在漢民

俱非土著。刁黠成風。專以侵奪番利為能事。番民生計。日就艱難。而漢民猶欺騙不已。兵役等。又恣意虐使之。習以為常。地方官徇於便安。惟是因循不加整頓。視一官如傳舍。坐待陞遷。其不肖者。又復假公濟私。動稱養廉無多。希圖取利。即如採買一事。竟敢託言彌補。明肆侵漁。其他弊端頗多。難以枚舉。蓋官兵兵役。總以遠隔海洋。上司耳目不到。遂無所忌憚也。今該督撫既請選擇道府大員。以重海疆。不拘資格。務必擇老成幹練。有為有守。可以整飭地方者。使之統率屬員。加意振刷。若仍存故習。不過為此二人進用之階。則大不可必也。何以使番民各遂其生。不至困苦含怨。何以使漢民各安其業。不致侵擾窮番。何以使屬員等潔已愛民。何以使兵役等奉公守法。即採買等事。若何使積弊革除。不致仍蹈故轍。如此實心經理數年。則民風吏治。煥然改觀。海疆永享寧靜之福矣。可傳諭

喀爾吉善陳大受。祇遵朕諭。多方留心。此時慎加選擇。將來不時稽查。以收要地得人之效。倘有因循玩愒等弊。經朕訪聞。惟於該督撫是問。○又諭據閩浙總督喀爾吉善奏稱。浙江司牧之官。雖賢否不一。而所辦政務。尚欠整飭。漕務亦有弊竇。胥役舞文弄法。匪竊頻擾閭閻。就現在吏治而論。則當振其頹惰。革除弊端等語。常安自任浙江巡撫以來。不過循分供職。並無整齊化導移風易俗之事。此處朕亦知之。向亦屢經訓飭。今春來京陛見。又復切切面誨之。而伊所陳奏。究亦無甚出格留心。整頓地方之處。今喀爾吉善奏。浙江吏治頹惰。弊竇種種。則常安之廢弛顯然矣。朕因伊居官年久。於吏事尚為歷練。一時浙撫不得其人。是以令回原任。伊不可於陛見之後。而存自是自滿之心。所當省察前非。革除積習。佩朕訓於不忘。聞人言而加惕。庶幾後效可收。末路可保也。可傳諭彼知之。

旌表守正捐軀之浙江樂清縣民陳景和妻王氏。○庚子。諭直隸河務。現交總督那蘇圖管理。伏秋二汛。甚屬緊要。總督事務紛繁。一切修防工程。難以兼顧。通政司左通政張師載。向為南河道員。通曉河務。著前往協同辦理。其所需夫馬食用。著總督那蘇圖酌量給與。○辛丑。

上詣暢春園問

皇太后安。○還宮。○是日起

上以夏至祭

地於

方澤。齋戒三日。○壬寅。諭夏至致祭

方澤。前因齋宮新葺。樹木尚未成陰。天氣炎熱。扈從人多。不免病暈。是以在宮內齋宿。去歲以得雨之後。時正清涼。朕仍詣壇內住宿。近因未得透雨。天氣炎蒸。此次親祭。隨從人等。未免苦熱。著照九年之例。仍在宮內齋宮住宿。不必前詣壇內齋宮。現在望雨之際。屆期

前往致祭。不乘輦。不設鹵簿。著即傳諭各衙門知之。○遣官祭

關帝廟。諭軍機大臣等。陝西河州回民馬應煥。控告同教馬來遲。邪教惑眾。起明沙會。耳內吹沙一事。從來叩闕之案。不論虛實。立案不行。但陝省回教人多。性悍心齊。最易生事。如固原鎮兵。回教十居七八。去冬搶刦商舖。恣行不法。即明驗也。馬應煥所告。雖虛實難定。但據其所稱。於回教之外。又立邪教。將來聚集益眾。彼此角勝。必致仇殺相尋。蔓延滋事。為土俗民風之害。不可不早折其萌芽。痛除邪妄。以靖地方。不可拘立案不行之定例。置之不問。著將舒赫德原奏。抄寄總督張廣泗。巡撫黃廷桂。令伊等據實悉心辦理。如果邪教聚至二三千人。巡撫黃廷桂。亦不應全無聞見。著查明確實。具摺奏聞。不可稍為回護。再馬應煥詞內稱。上年十一月。本州斷明示禁。並不遵依。十二月內。本州接了呈子。

三四日不見音信等語。近來州縣官自理詞訟。既無忠信明決之才。更存因循避事之見。是非曲直。莫辨實情。沉擱遷延。不能結斷。其審案又不過以文告了事。百姓之遵循與否。不復討論。近日山西萬泉聚衆之案。亦因州縣不早為申理。釀成事端。夫身在地方。而令不能行。禁不能止。獄不能折。奸不能懲。亦安賴是木偶為耶。可傳諭該督撫嚴飭各州縣官。審理詞訟事務。必秉公明斷。應禁止者嚴行禁絕。盡拔根株。毋得姑息養奸。博寬大之虛名。貽閭閻之隱患。此綏靖邊疆。整齊風俗。切要之圖。慎之毋忽。張廣泗尋奏。甘省回民甚繁。河州聚處尤衆。大概誦經禮拜。通教無異。惟開齋有先後。誦經有繁簡。稍為不同。馬來遲向年貿易外省。攜有摘本到家。名明沙勒。即漢語此經截句之謂。並非吹沙入耳。至馬應煥所供。上年十一月在本州控告。審明示禁之語。調卷查無其事。惟有回民馬卜世

病故。親戚馬應虎送喪。因散給油香。起釁鬪毆。馬應煥赴州具控。經頭人遞詞銷案。事因鬪毆。並非邪教。案內亦無馬來遲名姓。又據河州鎮臣金貴稟稱。本地回民。大概各就附近一寺誦經禮拜。並無明沙會名目。至回衆雖共守一教。然各有本業。禮拜原無多日。事畢各散。並無聚至二三千人者。查該鎮亦係回籍。所言當屬不謬。但馬應煥未經在甘面質。或一面左袒。亦未可知。如果馬來遲惑衆有據。自應窮治。如馬應煥誣控。尤須按律究擬。請將馬應煥解發甘省面質。一面扎致撫臣黃廷桂。飭司道提齊各犯。俟馬應煥到日。徹底審究辦理。得旨。著照所請行。該部知道。又諭。廣東巡撫所管之粵海關。著總督策楞永遠兼管。不必再交巡撫。以署兵部右侍郎鄂容安為兵部左侍郎。盛京戶部侍郎宗室蘊著為兵部右侍郎。甲辰夏至祭地於

方澤

上親詣行禮○詣暢春園問

皇太后安○幸圓明園○諭軍機大臣等山西

布政使朱一蜚奏前月得有透雨後兼旬以來風日炎烈本月初七八日得雨一寸等語看此則晉省雨澤殊未霑足已批令將一切政務先事綢繆加意辦理巡撫愛必達身任封疆既以寬縱因循致奸民恣為不法貽害地方若知將來處分必至離任自以五日京兆

晉省人三十一

三十一

益復懈怠偷安諸事曠廢則其罪更無可逭况螟螣既除粮莠既翦則嘉禾益當滋之雨澤今既稍有早象即當豫籌撫卹無致皇皇待哺可傳諭大學士訥親嚴飭愛必達一日在任即有一日之責新撫一日未到所有地方應辦事務稍有疎忽仍於愛必達是問著悉心籌畫詳晰奏聞且此等情節自知可耳亦不宜露於屬員以致威令不行也再萬泉安邑二案情節孰重孰輕安邑起事在先何

以萬泉猖獗更甚所辦萬泉案内據稱看守城門恐怕府主走了提不回人來並不敢有別的意思等語張世祿等不過數人何以遂能看守城門是否實情其河邊追獲要犯二名有無拒捕把總如何擒獲是否奮勇作何獎賞前所奏口供俱未敘明此事頗有關係而兩次所奏諸摺未能徹底明晰著將案內情節一一詳細奏聞至各犯造謀附和情形各別今覽供詞大率相類想由敘錄繕摺不過撮其大要未能備載可傳諭大學士訥親將原畫供單隨便帶來呈覽尋奏查安邑刁民於三月二十日至縣闕鬧三次初次拆坊繼則毀門後又索回毀門之犯皆係一日之事萬泉辱官守城雖係四月初十起事較安邑在後但該處自上年九月放火燒房以來今年正月則毆紳抗糧三月則擁衆進城奪犯積漸已非一日情罪較安邑更重至萬泉刁民守城一節查該邑甚小兵丁連外委共

晉省人三十一

三十一

止十名。又於搶犯後。衙役兵丁。畏其勢。俱散匿城內。在城官員。俱不免畏首畏尾。一任刁民恣橫。即每門撥一二人看守。亦無敢與之理論。再把總王於賓。探知要犯史考娃。王滿倉。二人逃匿陝西。往彼查拏。協同該處地方。於黎明未開門時。將二人拏獲。並未敢拒捕。查王於賓從前同都司胡璘。帶兵赴萬泉。協拏人犯。聞有開城之信。頓居不前。是以此處拏犯微勞。未便獎賞。得旨。所奏俱悉。

高宗實錄

卷二十九

大清高宗法天隆運至誠先覺體元立極敷文奮武孝慈神聖純皇帝實錄卷之二百九十

大清高宗法天隆運至誠先覺體元立極敷文奮武孝慈神聖純皇帝實錄卷之二百九十一

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次世襲佐
總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務
世襲騎都尉軍功加十九級隨帶加二級又加二級世襲內大臣戶部尚書鑲藍旗滿洲都統軍功紀錄五次
尋常紀錄十四次世襲總纂講官太子少保工部尚書紀錄六次世襲總纂等奉

敕修

乾隆十二年丁卯五月乙巳諭京師自入春

實錄卷二百九十一

以來。雖常得雨澤。但未霑足。今麥秋已過。未沛甘霖。所種大田。望恩尤切。已降旨虔誠祈禱。因念清理刑獄。亦感召

天和之一端。著刑部堂官。將在京各案內。徒杖以下輕罪。查明情節。稍有可原者。或應釋放。或應未減。即速分別辦理。其重罪人犯。雖法無可減。但其中五次緩決者。秋審時有酌量減等之例。此等獄囚。著大學士會同該部。一查。查明斟酌情罪。奏請朕旨。○諭軍機大臣

等。據大學士慶復等奏。金川賊番圍攻各寨。沃日土司求救。隨調松茂協馬良柱帶兵一千五百名救援。四月十二日。抵熱籠寨解圍。賊衆四散。二十三日。抵沃日官寨。前駐沃防護之都司馬光祖等出迎等語。摺內頭緒。殊未明晰。馬良柱以一副將。領兵深入。似屬奮勇。但金酋兵勢方盛。不無冒險。是否另有官兵策應。所報打死賊番名數。憑何查驗。其自熱籠至沃日。何以但有營盤。而蠻兵幾許。如

平定回疆方略卷一百一十五

二

何逃散之處。俱未敘明。又前摺內稱。都司馬光祖帶兵二百名駐沃防護。今奏稱馬良柱兵到。伊等方帶領土司出迎。是否俱經被困。官兵二百名。有無傷損。再前摺內稱。宋宗璋駐兵雜谷關。其馬良柱進兵以後。宋宗璋現駐何處。作何調度。又據另摺。許應虎已經到川。作何委用。俱應一一詳晰奏聞。再小金川向與大金川有隙。其投順似係實心。至綽斯甲等。同惡相濟。罪無可寬。今見官兵勢盛。乃

稱情願領兵出力報効。此等反覆情形。狡黠故智。何足憑信。前此瞻對四朗之案。袁士弼一意招撫。以致孽黨效尤。豈可復蹈前轍。不若盡行勦滅。毋俾易種。既可鋤除兇惡。以靖邊陲。即可震懾諸蠻。令革心向化。不必專以招徠撫卹。為翦金酋羽翼之勝算也。朕思此等苗蠻。雖屬化外。而叛服靡常。端由辦理不善。如但謂得其人不足臣。得其地不足守。比之禽獸虺蛇。亦何妨聽其涵孕卵育。並生宇

平定回疆方略卷一百一十五

三

宙之間。而此等蜂屯蟻聚之衆。果可度外置之乎。即如瞻對大金川之事。亦豈好大喜功。實因伊等聲勢日張。不得不勞師動衆。然前此進兵。既不能遽得要領。臨事又惟草率了局。官兵甫徹。旋復煽動。傷威損重。勞費實多。若但來則應之。去則弗追。試思十至而十應。何如以十應之勞。用之於一舉。毀穴焚巢。芟除蕩滌之為愈也。稽之前事。如漢之馬援。諸葛亮蠻中至今凜其遺烈。即前明韓雍。王守

仁輩亦能震以兵威。羣蠻胆落。坐收一勞永逸之利。近日滇黔古州等境。悉成樂土。具有明效。川省諸番。亦當加意經畫。況我朝天威無遠弗屆。即蒙古四十八旗。自古所不臣。何嘗不在五服要荒之外。而奉令守藩。輸誠內嚮。寧輯至今。可見含齒戴髮之倫。斷無不可化誨。惟在德足綏懷。威足臨制。得柔遠之道耳。可傳諭慶復張廣泗等。悉心區畫。因此番用兵。將全蜀情形。通盤計度。如何可令蠻衆弭耳帖服。永為不侵不叛之臣。使叢篁密箐。息警消烽。共安至治。熟籌長策。詳晰奏聞。辦理。如果有不能辦理。或不可辦理情節。亦著將實在情形。緣何不便之處。密行陳奏。○又諭山東沂州府蘭山縣上年被災歉收。民人乏食。朕已降旨。令阿里衮察看本地情形。應如何加恩接濟。即行辦理。又登萊青三府。亦有被旱歉收之處。前據阿里衮祇報安邱諸城二縣。朕聞不止於此。不知近日麥收如何。

民間情形如何。若有應須酌量籌畫接濟者。一面奏聞。即一面速行辦理。務使貧民不致失所。因目前時日已迫。不可再遲。尋奏查益都等處。接續被災。其中安邱諸城二縣。已蒙賑給一月口糧。現在麥禾失收。仍須賑給。再查諸城縣并安東等衛被旱。請一例辦理。得旨。著照所請速行。該部知道。○大學士等奏

各

陵修造事務關防。應俱改為承辦辦理等字樣。

平定回疆

四

一

平定回疆

五

交禮部鑄給。報可。○丙午。諭朕令大臣等於自陳本內舉賢自代。原期各矢公心。全無瞻顧。楊嗣璟係廣西人。而舉廣西學政官獻瑤。且侍郎與中允。官階相隔甚遠。雖朕有韋帶之士。亦許舉薦之旨。原以待出衆之材。必其材猷特達。國令皆以為可者。而後稱。而官獻瑤豈即其選。即謂此時實無瞻徇。焉知日後不緣此居功。而便於請託耶。且將來地方官。皆以本地縉紳。可操薦揚之柄。此風亦不可

長。夫縉紳之不敢武斷鄉曲者。

皇考所極力振作。而後能挽頽風。此法當謹守而弗失。楊嗣璟著交部察議。○諭軍機大臣等。從前託庸在廣西任內。叅奏布政使唐綏祖一案。原屬過當。亦且近於刻薄。後經策楞毫不瞻顧。秉公查審。朕已知曲在託庸。降旨將託庸革職。而巡撫一時未得其人。即用鄂昌署理巡撫印務。而用按察使李錫秦為布政使。此朕擢用二人之由也。但當李錫秦來

平定奏言上

六

京召見時。深貶託庸。而盛稱鄂昌居官之優。彼時朕原應將鄂昌李錫秦分省調用。乃即遞用為撫藩。同莅一方。竟似二人有意營謀而得者。今鄂昌自陳本內。又舉李錫秦自代。封疆重寄。以撫藩大員為之表率。巡撫有失。藩司得隨時調劑。藩司有過。巡撫當隨時糾察。方協君子和而不同之義。若交相稱譽。互相援引。將來必啟黨比營私之漸。今觀鄂昌李錫秦如此相得。恐未免雷同附和。於地方

事務。殊有關係。可密行傳諭策楞。於西省一

切政務。時時留心體察。倘或貽誤公事。即行秉公據實奏聞。尋奏查李錫秦自知縣至藩司。皆在西省。和平老練。辦事勤明。在兩司中實為出色之員。是以累任督撫。事必與商。鄂昌初到。知其可靠。即與交好屬實。但以之統轄羣僚。恐不勝任。前巡撫楊錫紱與提督譚行義。藩司唐綏祖不和。時李錫秦已任臬司。並無一言建白。迨託庸為巡撫。羣小簸弄是

平定奏言上

七

非。李錫秦亦未能匡正。此其少特立之操可知。鄂昌此舉。實屬過當。得旨。至公之論。知道了。○兵科給事中李清芳奏。前保應陞知縣裘思通。今任福建晉江縣知縣。臣聞其頻改前操。向地方紳士借貸。操守不堪。據實檢舉。諭據給事中李清芳。檢舉伊昔年保舉之知縣裘思通。頻改前操一摺。其中情節。尚當體究。如果裘思通操守不謹。李清芳不護前非。據實檢舉。事屬可嘉。但李清芳係福建人。裘

思通為伊地方官。倘因有所干瀆。不滿其欲。遂成嫌怨。而以檢舉示公。亦未可知。裘思通著解任。將此摺交與該督撫秉公確查。據實奏聞。再降諭旨。○丁未。

上御勤政殿聽政。○諭。征勦金川。前已撥銀四十萬兩。協濟川省。但軍營糧餉。務須充裕。著戶部於附近四川省分。再撥解銀二十萬兩。以備支用。○又諭。山東地方上年歉收。已先後截漕二十六萬石。存貯該省。以資接濟。今

年春夏以來。該省雖得雨澤。尚有未經霑足之州縣。將來秋收或有歉薄之處。應行豫為籌畫。即或有收。便可於該處存貯。現據漕運總督顧琮奏報。尾幫漕船。於五月十四日全數過臨清閘。此時糧艘諒在德州左右。可速行傳諭顧琮。再行截留十萬石。以備動用。如此時尚在山東境內。可就近留貯德倉。若已過德州。即於水次州縣酌量收貯。該部遵行。○定舉賢自代例。諭為國求才者。若渴之心。

以人事君者。忘私之義。朕於京察之年。令自陳大臣。各舉賢自代。蓋以政務殷繁。資人而理。諸臣自當殫竭忠誠。舉能其官。以副朕額俊之意。乃乾隆九年。諸臣所舉。已有不滿朕望者。然尚猶可諉曰。初。今次所舉。不但允協之未曾。而夷考其中。瞻顧黨同。皆所不免。是不可以不諭。如禮部侍郎楊嗣璟。以廣西人而舉本省之學政官獻瑤。不以官階越次為嫌。內閣學士朱定元。舉雲南府知府徐鐸。是皆藉口朕有韋帶之士。亦許舉薦之旨。不知朕之此旨。原以待出眾之材。必猷為特達者。而後稱。豈官獻瑤。徐鐸輩。即可舉以應明詔耶。此等處。若謂無私。誰其信之。又如盛京侍郎。四人同在一城。而所舉彼此相同。顯係邪許會合。並不出於誠也。又如戶部侍郎李元亮。甫薦湖北臬司徐琳。而徐琳即被總督塞楞額參奏。以為辦事乖張。居心詐偽。李元亮之特保。何所取耶。又如廣西巡撫鄂昌。薦舉

布政使李錫秦。上年託庸叅劾唐綏祖。原屬過刻。經策楞審明。朕將託庸革職。因粵撫一時不得其人。即用鄂昌署理巡撫。而用李錫秦為布政使。適李錫秦在京。朕召見時。伊痛貶託庸之劣。而極稱鄂昌居官之優。今鄂昌即舉李錫秦以自代。其何能免黨同朋比之嫌乎。書曰。舉能其官。惟爾之能。稱匪其人。惟爾不任。諸臣獨不聞之乎。嗣自今諸臣其克勉進賢之誼。勿苟且以塞責。勿假公以濟私。

勿藏拙以廢公。勿勉強以從事。本省藩臬。本省縉紳。亦不許舉本省官員。著為例。○四川巡撫紀山奏。前奏糧運各條。經軍機處議覆准行。但川西輓運甚難。黨壩沃日二路。中隔雪山。若不增加臺站。蠻夫皆裹足不前。雜谷關至黨壩。原擬安設十二站。今增六站。自雜谷關至沃日。原擬安設七站。今增三站。仍添管臺官二員。又查沃日一路。前因金苗圍困熱籠。糧路阻塞。官兵另擇汶川縣之草坡地

方出口。經由瓦寺地界。糧運亦即於此路尾隨。今熱籠圍解。運道已通。但止雜谷關一路轉運。不敷支給。應仍由草坡分運。至川南打箭爐軍糧。原存爐倉一萬石。除給過官兵口糧外。又酌撥雅州府倉米五千石。輓運爐城自爐地至泰寧。安設十站。自泰寧至革布什咱之吉地。甚屬荒涼。難安短站。今於泰寧用烏拉長運至沙普隆。由沙普隆長運至吉地。共安設糧務三處。并添置烏拉二千頭幫運。

再查前議。川西總理糧務道唐進賢駐劄舊保縣。居中調度。原止就黨壩沃日兩路而言。今又增瓦寺一路。請委保寧府知府周岐。駐劄跟達橋。為副總理。下軍機大臣議行。○以兵部右侍郎宗室蘊著。為鑲黃旗滿洲副都統。○以太常寺卿赫瞻為通政使。○以通政使左通政張師載。為宗人府府丞。○以翰林院編修張映斗為四川鄉試正考官。翰林院侍講學士龔渤為副考官。禮部主事陳大復為廣

東鄉試正考官。兵科給事中李清芳為副考官。國子監司業陳世烈為廣西鄉試正考官。陝西道監察御史馮元欽為副考官。司經局洗馬韓彥曾為福建鄉試正考官。翰林院編修經聞為副考官。山東道監察御史趙青藜為湖南鄉試正考官。翰林院侍讀雙慶為副考官。○戊申上詣暢春園問

皇太后安。○諭乾隆十一年分直隸通省額徵地糧。朕已普行蠲免。其天津所屬有應徵葦漁課銀一項。向來攤入地糧完納。著加恩一體蠲除。俾瀕海小民均沾惠澤。該部即遵諭行。○諭軍機大臣等。據碩色奏報歸陳南汝四府及許汝陝光四州所屬地方三月初五日得有透雨之後。又得雨數次。開封彰衛懷河五府屬亦於四月初七八日甘霖大沛。茲二麥登場。據各屬稟報。惟儀封等十一州縣收成稍減。其餘九十八州縣二麥收成俱有六七八九分。統計七分以上等語。摺內祇報

麥收分數。現在大田光景何如。並未奏及。可傳諭詢問。令其將近日雨澤若何。並秋禾栽蒔以後情形。據實奏聞。尋奏各屬於三四兩月內陸續得有透雨。秋禾徧插。業經節次奏聞。迨五月以來。通省復得雨澤。大田得資濡潤。俱可乘時播種。晚秋實於農事有益。報聞。○己酉。

上詣黑龍潭祈雨。安西提督李繩武奏本年五月初五日準噶爾夷使奔塔爾至哈密報赴藏熬茶的期。據稱我宰桑瑪木特於四月初六日回至伊犁。告台吉策妄多爾濟那木扎勒云。進藏一事蒙

大皇帝恩准。令於八月初十前後到哈濟爾可及。早進藏。我台吉不勝感激。給我字單。令我先來報信。隨將所送字單譯出。內稱往西邊念經熬茶之人。定於八月十五前後到哈濟爾。約共三百人。宰桑四人。一瑪木特。一吹納木喀。一巴雅斯瑚朗。一圖魯庫喇嘛。三人。一

綏綢一溫都遜一固尼爾等語。報聞。○以福建水師營副將施必功為江南狼山鎮總兵官。庚戌軍機大臣議覆慶復張廣泗奏陳金川事宜。據稱現在進剿大勢全在西川。更不以雅州府為適中之地。慶復等自應同駐灌縣。俟官兵齊集後。張廣泗前往雜谷關。慶復移駐汶川。庶可商酌辦理。至所奏瓦寺土司潛通賊信。尤關緊要。應令其留意防範。又稱西南兩處分兩路進兵。聲援方為聯絡。提督武繩謨有兵馬錢糧之責。無庸前赴軍營。應如所奏行。又請添調川省兵。並調黔兵為貼防之用。查前據摺報漢土兵已有一萬九千名。又續派陝兵三千。計共二萬二千。已不為少。今又請添。意在重兵壓攻。易於速捷。而另摺又云。土兵不甚得力。則添派自不容已。應如所奏。於川省各營添調二千。以資勦洗。其川兵調後。本省兵單亦應於黔省上游協營內調兵二千來川防守。從之。○定邊左副

將軍額駙策凌奏。今年正當喀爾喀四部落大會。又遇閱看軍裝之期。應派參贊大臣稽查喀爾喀四部落所備軍裝。但盟長與各扎薩克帶領人衆。兩次豫備。未免煩費。請照乾隆八年例。將閱看軍裝事。暫停派參贊大臣。即交副將軍及盟長等。在各游牧處查看。報聞。○又奏。定例每年派喀爾喀兵三千名。於秋間至臣軍營操練防範。今軍營無事。各蒙古力量應加體卹。請裁一千名。得旨。今既無事。何用多兵。所奏是。依議。○以都察院左副都御史德通為鑲藍旗滿洲副都統。○予故正紅旗蒙古都統保祝祭葬如例。謚恭簡。○辛亥諭曰。愛必達羅俊現交部議。山西巡撫員缺著準泰調補。太原鎮總兵員缺著正定鎮總兵海亮調補。廣東巡撫員缺著山東布政使岳濬補授。準泰一時未能即到。其未到以前著吏部侍郎德沛馳驛前往署理巡撫提督印務。海亮不必來京。即由正定速赴新

任。○諭大學士等。朕令軍機大臣等寄信傳諭之旨。有因地方應辦事務。經朕指示。及傳諭詢問者。亦有令該督撫等商酌辦理者。既未明發諭旨。理宜慎密。嗣後諸臣回奏摺內。如不交部議者。仍聽其引入原旨。若係應交部議之案。概不必將寄信之處敘入。另行具摺聲明。至具題本章。尤為不可。俟伊等奏摺之便。傳諭知之。○欽差大學士公訥親奏。萬安兩邑刁民。現已訊供定案。萬泉首犯張世祿。始而斂錢告狀。繼又主謀糾眾。逼勒知府。擬斬立決。梟示。張正惠等四名。毆官索犯。放火把門。安邑首犯張遠。親寫傳單。聚眾開闢。李林水。鳴鑼糾黨。脅眾鬧城。並擬斬立決。餘犯各照律定擬。至闔省官弁。除巡撫愛必達。總兵羅俊。另摺題參外。其蒲州府知府朱發。萬泉縣知縣李廷棟。庸懦遺誤。釀成大釁。都司胡璘。河東道周紹儒。奉調不前。並請從重治罪。安邑縣知縣佟濬。平日縱容家丁衙役。

作弊。致起釁端。參革審竣後。從重議結。得旨。三法司核擬速奏。所參官弁。俱著革職。拏交刑部治罪。○壬子。

孝恭仁皇后忌辰。遣官祭

景陵。○以山東按察使赫赫。為山東布政使。江南淮徐道李敏第。為山東按察使。○予故輔國公吉存。祭二次。謚勤僖。○癸丑。

上詣暢春園問

皇太后安。○諭。朕宵旰勑幾。思所以惠鮮懷保之道。尤勵始勤終怠之戒。不敢因臨蒞久而有泰心。近歲以來。科道官時有以民氣漸驕為言。朕初不信。仍戒飭之。乃福建。則有羅日光。抗租拒捕之案。山東。則有張懷敬。聚眾毆差之案。江南。則有王育英。號召罷市之案。廣東。則有韋秀貞。拒捕傷人之案。而莫甚於山西安邑。萬泉聚眾抗官。守門索犯之肆為猖獗也。夫以普免錢糧。而民不以為恩。加賑厚卹。而民不生其感。偶或地方有司。辦理少不

如意。輒呼羣咆哮。挾制官長。為督撫者。或避
下急之名。或存省事之見。不詢根由。不顧大
體。甚或叅處官員。以圖結案。夫百姓之敢於
恣肆妄為。亦由平日不知尊親大義。而平日
之不知大義。則由於朕厚加之以恩膏。而不
先率之以教化。督撫亦惟知朕有愛民之心。
而不思朕有教民之責。居恒煦嘔煥休。惟恐
拂百姓之意。百姓目無官長。竟若官長去留
可操之其手。及羣不逞譁然而起。而官長則
已掛名彈章。以致益煽。習為故常。猶劣子之
倚慈母。有所恃而無恐。且抗衡焉。不思守令
者。朝廷之守令。敬守令。所以尊朝廷。普免加
賑。格外之矜卹也。假如不蠲免。不賑濟。譬之
父母不顧其子耳。子不得生怨忿之心。乃既
蠲既賑。而轉不安分奉法。即使有司奉行不
善。胥吏夤緣為奸。國有常經。民宜靜聽。夫父
母愛子。亦愛其馴順者耳。使其子縱欲而不
能節之以禮。為非而不能裁之以義。至於扞

法抵禍。議者必歸咎其父母。其父母亦必自
悔過縱之失。則今日之頑民聚眾。干犯刑章。
朕得不引為己過。深自愧悔也歟。然朕雖失
教於前。尚思勤懇誨迪於後。以為眾黎庶勸。
各省督撫。其倡率州縣。諄切化導。使愚民知
敬畏官長。服從教令。勿復自蹈迷途。以益朕
過。實厚望焉。各省督撫。其遍行曉諭。使遠所
窮鄉之民。咸悉朕意。○旌表捐軀殉節之鑲
白旗護軍寶林妻吳扎拉氏。○甲寅。諭曰。直
隸正定鎮總兵員缺。著四川重慶鎮總兵邱
策普調補。松茂協副將馬良柱。前在瞻對軍
營。曾著勞績。今又隨征大金川。頗能奮勇出
力。著補授重慶鎮總兵。松茂協副將員缺。甚
屬緊要。著該督於所屬副將內。揀選一員調
補。所遺員缺。著浙江太平營叅將吳一清補
授。○諭軍機大臣等。浙江按察使萬國宣。來
京引見。朕省其人舉動粗率。不諳禮儀。然居
心尚無詐偽之習。其草野處。朕亦不甚督之。

及朕問其有無條陳事宜。並在浙設施何事。伊則稱現刻五刑圖。以警愚民。並將圖樣進呈。其刑狀惡劣可怪。伊竟以此為覺世牖民之良法。而不知失體已甚。識見如此卑鄙。則才具可知。浙江乃刑名繁多之省。即萬國宣亦奏稱人情巧幻。今以萬國宣之才識觀之。未必能勝浙省臬司之任。可傳旨詢問常安。令其據實具奏。○乙卯。諭山西萬泉安邑刁民聚衆二案。經大學士訥親審明。將倡首附和名犯。分別治罪。并將起釁始末詳悉奏聞。揆滋事之端。由該地方官始則不能洞燭民隱。調協輿情。繼則蒙蔽因循。希圖不致決裂。迨構釁日深。聲勢漸熾。而地方官仍復畏葸退怯。於是刁民敢於肆意橫行。及至欽差查審。文武員弁協力擒捕。一人不至漏網。可見百姓未嘗不知有法。及至以身試法。而不見法之可畏。是以無所顧忌。正子產所謂水懦弱民狎而玩之者。觀此則地方官之辦理不

善。其奚所辭咎。朕初閱愛必達奏報。疑其過為張皇。措置失當。今從事後觀之。則其據實上聞。較之地方官惟以彌縫了事為心者。尚屬有間。假使愛必達亦如伊等之遷延諱飾。尚不知更生何變端矣。夫星星之火。可以燎原。事機之由。積小成大。古稱善御者。必利其銜策。設當羣情洶湧之初。有一二明幹之員。能剖晰事理。使之豁然心折。自可立時散遣。即不然。而擒首惡以儆餘兇。亦可銷萌於事始。此之謂化大事為小事。化有事為無事。不此之圖。而惟事姑息養奸。重使蚩蚩之氓。駢罹重辟。司民社之謂何。而恒怯名侮。一至此也。朕前已降旨。明晰戒諭。該督撫等當嚴飭所屬守令。俾殫心治術。寬猛適宜。民情倘有壅滯。必當明敏裁決。導之使通。民俗稍或强悍。必當斷制當機。折之使服。毋或委靡觀望。稔惡容奸。所冀去莠滋良。寧謐閭井。以無負撫字循良之任。○調正黃旗漢軍副都統鄂

彌達為正紅旗漢軍副都統。正紅旗漢軍副都統朱倫瀚為正黃旗漢軍副都統。丙辰上詣黑龍潭。

龍神祠謝雨。丁巳諭軍機大臣等。朕前降旨。截留漕米十萬石。就近留貯德倉。以備動用。若已過德州。即於水次州縣酌量收貯。今據顧琮覆奏。於山東德州酌撥五萬石。直隸東光縣水次酌撥二萬石。滄州水次酌撥三萬石等語。所有撥貯東光滄州二處米石。原

平糶奏二萬石

以備山東之用。現在直隸地方俱已得雨雪足。想山東亦必霑被。則此項米石未知尚有需接濟之處與否。可傳諭那蘇圖阿里衮商酌。或東省需用此項米石。如何酌量運往。抑或即留各該處。不必全行運往山東。令其悉心會商。具摺奏聞。尋奏直省倉儲現在尚可支持。撥貯東滄二處米。原備山東之用。似應仍運東省。准阿里衮咨稱。德州派截漕米五萬石。請將漕船掣回。派截各縣水次。就近兌

收至東滄三州縣之五萬石。查菜屬上年歉收。應運至掖縣昌邑等處海口接濟天津。與菜屬海道相通。即令漕船由天津交兌運菜。為便此處委員酌帶水腳銀。前赴天津領運等因。臣行令天津道即飭漕船前赴天津聽候起撥報聞。山西巡撫愛必達奏。晉省墩兵從前因邊方緊要。每墩設兵一二名。今各墩在腹裏。自應因地制宜。酌量撤留。除樓子營所管石城等墩臺一十六座俱設在邊牆。或與邊垣附近。并保德營所管孫家梁等墩臺八座附近。黃河商賈往來自應照舊。毋庸議撤。外其偏關等營所管虎頭樓等墩臺八十七座。老營營等營所管左烽寺墩臺六十四座。水泉營所管護營峒等墩臺三十座。河保等營所管護城等墩臺二十六座。共兵四百二名。或偏僻山頭商賈不通。或在腹裏附近塘汛。實屬虛設。同老營營原設巡邊兵二十名。及五眼井邊外偵探兵五名。全裁仍歸

本營差操。再河會營沙溝灘。至河曲縣土溝七十里。未設塘汛。該處山路崎嶇。行人絡繹。應於適中之寺塢廟。弔子臺子梁三處各設兵五名。添建塘房官廳。墩臺望樓牌坊烟墩。令該兵攜眷駐劄巡防。下部議行。○以福建福州城守營副將茹毓。為廣東高廉鎮總兵。○戊午上詣暢春園問

皇太后安。幸靜宜園。駐蹕至六月庚申。皆如之。○諭軍機大臣等。據海亮奏。正定地方已於五月二十五日得雨四寸。即高地亦可播種等語。看此。彼處得雨未為霑足。連日濃雲密布。未知二十六七間曾否得有透雨。直屬迤南各府雨澤田禾情形若何。可傳諭那蘇圖據實確查。即速奏聞。尋奏查迤南之大名順德廣平趙深等屬高田五月二十日前有未經偏種者。自五月下旬陸續得雨。俱已播種。尚有大名元城東明等縣未經報到。現在飭查得旨。覽奏俱悉。○兵部等部議覆四川巡

撫紀山疏稱。金川軍務機宜。全期傳遞迅速。請加增馬匹。添設驛站。南路自新津起。至打箭爐止。現存驛馬十匹。其自雅安分路至蘆山縣。自蘆山至印州。均無驛馬。西路自成都至舊保縣。松潘至新保縣。並無驛站。按道路之平險。文差之多寡。酌量於各路增驛馬。應如所請。南西兩路。增設馬五百五十四匹。雇夫二百七十七名。所需馬價工料。鞍屨棚廠。倒馬分數。均照所請辦理。事竣裁報。並將馬匹鞍屨等項。變價還項。得旨。依議速行。○署廣西巡撫鄂昌奏。准刑部咨議覆陞任貴州按察使孫紹武條奏。黔屬地方狹隘。苗多漢少。軍流人犯。聚集太衆。與苗往來。所關非細等因。竊思漢土人情。原有區別。且犯軍流者。本非善類。若將此輩撥發土司。或土司不能鈐束。或與土民交結。致生事端。粵黔逼近。風土畧同。請嗣後各省發遣廣西軍流等犯。統於漢屬州縣內。照該犯應配道里之遠近。酌

量安插。又軍流雖同為遣犯。軍犯則有附近邊衛。邊遠極邊烟瘴之別。而流犯並不論有無烟瘴。止按道里撥發。該犯一至烟瘴之地。觸染毒氣。多致傷生。請嗣後發遣廣西流犯。免其分撥寧明等五州縣安置。其餘烟瘴少輕各州縣。仍與內地州縣一例撥發。下部議行。○己未。軍機大臣奏。據侍郎玉保等奏稱。乾隆八年。準噶爾入藏熬茶。由噶斯路行走。來使到時。將伊克柴達木。得卜特爾。兩卡座。

平定回疆

卷六

展設於哈濟爾察罕烏蘇。派西寧綠營兵一百名。今年來使。仍由噶斯路。應照八年例辦理等語。應如所奏。交西寧總兵官張士偉。派兵一百名。與蒙古兵同在哈濟爾等處。展放卡座。再乾隆八年。玉保帶領準噶爾人赴藏。因沿路未設臺站。凡奏摺傳事。俱從四川馳遞。路途迂遠。若有候旨辦理之事。必致遲誤。今次應請於現派出卡倫蒙古綠營兵丁內。酌派五六十名。交玉保於進藏時帶往。自哈

坦和碩。至喀喇烏蘇。暫安臺站。遇緊急事務。沿途遞送。俟準噶爾人回巢後撤回。從之。○

是月。奉天將軍達勒當阿奏。現在雨澤稀少。覺有旱象。請豫籌接濟。得旨。覽奏俱悉。若再不得雨澤。夏禾或致成災。有應籌接濟者。速行奏聞。毋致後時。但奉天向為產米之鄉。邇年收成頗好。何偶一旱歉。便至拮据。夫未雨之綢繆。固宜早為留意。而鎮靜安詳。以定民志。尤根本之地最先務也。○欽差大學士高

平定回疆

卷六

斌。奏報經過直隸。山東。河南。江南。一帶地方。得有雨澤。麥禾豐稔情形。得旨。卿去時此間雨暘時若。夏仲望雨甚殷。今於五月二十二日。甘霖優渥。均霑。始謂麥收較勝去年。今則仍不及去年。但願此後雨暘應時。大田或可希冀如舊歲耳。○兩江總督尹繼善奏報各屬雨水調勻。二麥豐稔。惟徐州府屬之銅山。沛縣被雹傷麥。現飭查勘。一面照例資給口糧。借給籽種。得旨。覽奏欣慰。其被雹雖屬一

隅亦當加意撫卹。○安徽巡撫潘思渠奏鳳
潁泗三屬上年被水。蒙恩賑濟。有應調劑者
數條。一勸農桑以警游惰。鳳潁一帶男婦惰
窳成習。鮮勤耕作。豐稔則仰食於天。災歉則
待給於官。所賴地方官時時勸戒。或藝桑麻
或植蔬果。勤者獎之。不率者懲之。即以民情
之勤惰為勸課之優劣。一疏溝洫以備旱潦。
鳳潁一帶地有三等。一為崗地最高。一為湖
地稍低。一為灣地最下。灣地接連大河。人力
難施。湖地外高中低。如於下流疏渠導水。即
可涸出栽種。崗地絕少溝池。惟傍山麓為坡
塘以蓄水。夏秋缺雨。俾得引水灌田。一稽流
移以正風俗。鳳潁民風。樂於遷移。稍遇災歉。
攜老挈幼。潛往鄰境。更有向係出外起食之
人。一聞本地災歉。即捏稱災民。濫邀賑給。嗣
後請嚴飭州縣。悉心查察。除實在災民外。如
有冒領口糧者。嚴行究懲。再資送流民至三
十名口。即作一起。不許過多。庶不致沿途生

事。得旨。此乃根本之務。歷來安省巡撫。無言
及此者。朕觀此奏。甚嘉悅焉。勉力妥為之。以
俟汝三年之成也。○湖北襄陽鎮總兵官齊
大勇奏謝請訓。得旨。諸事實心辦理。酌中措
施。而不存滿假之念。則得矣。為人為官。不過
平易之道。何精微之有。○湖南巡撫楊錫紱
奏。本年四月內。衡州府屬耒陽。衡陽。衡山。安
仁。暴水衝倒民房二千四百餘間。淹斃男婦
十二口。田禾亦有損傷。現飭各屬確勘。照例
動項撫卹。得旨。知道了。督率屬員加意賑卹。
毋遺毋濫可也。○山東巡撫阿里衮奏。報各
屬雨水情形。得旨。看此則仍屬望雨也。即如
京畿。高粱有二三尺高者。尚屬望雨。而況一
二寸之雨。其何能接濟耶。一切留心體察。斷
不可存諱災之意。○山西布政使朱一蜚奏。
報各屬得雨情形。得旨。覽奏俱悉。晉省吏治
頗屬廢弛。又以巡撫屢更。恐屬員不無觀望。
汝其加意整飭之。○川陝總督張廣泗奏。臣

到川後。備知大金川賊酋莎羅奔。兇橫不法。官兵屢次失利。現調漢土官兵。雖有二萬餘名。但土兵各懷二心。非遠巡觀望。即逃匿潛藏。此土兵之不足恃也。而官兵又單弱。將來深入賊巢。或攻勦碉寨。或押護糧餉。或沿途防守。斷難支持。竊念兵多固能廉餉。兵少難於速竣。亦廉餉也。臣與大學士慶復。及撫臣提臣酌籌。於近省貴州上游各協營內。抽調兵二千名。以備調撥。得旨。覽奏俱悉。又批。甚

通之論。足見幹濟。今照汝等所請。但既已添兵。惟應克奏膚功。仍當以班滾為戒。○廣東巡撫準泰奏。粵東濱海環山。民稠土狹。產穀稀少。每藉廣西接濟。三水縣毗連西省。雍正十年。建有廣益倉。西穀價賤時。收買存倉。少昂則開倉發糶。向例收糶。並責廣州府糧捕通判專管。但通判駐劄省城。距三水一百七十里。諸多未便。且現在省城倉穀七萬餘石。均係通判經理。近又兼管錢局。廣益倉勢難

兼顧。請就近改歸三水縣知縣管理。盤查統轄。交代奏銷。仍責成驛糧道。得旨。著照所請行。○貴州安籠鎮總兵官崔傑奏報。遵旨振刷營伍情形。得旨。實力行之。況張廣泗久在黔省。今陞任他往。恐兵丁以及苗民皆不無觀望。汝等宜留心也。此旨不可宣露。密寄孫紹武。丁士傑知之。

大清高宗法天隆運至誠先覺體元立極敷文奮武孝慈神聖純皇帝實錄卷之二百九十一

大清高宗法天隆運至誠先覺體元立極敷文奮武孝慈神聖純皇帝實錄卷之二百九十二

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部主庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄四次臣德瑛經筵講官太子少保工部尚書紀錄六次臣曹振鏞等奉

敕修

乾隆十二年丁卯六月庚申朔諭朕幼誦簡

編心儀

先聖一言一動無不奉

聖訓為法程御極以來覺世牖民式型至道願學之切如見羹牆辟雍鐘鼓躬親殷薦而未登闕里之堂觀車服禮器心甚歉焉仰惟

皇祖聖祖仁皇帝巡幸東魯親奠孔林盛典傳

於奕禩

皇考世宗憲皇帝崇聖加封重興廟貌嘗遣朕弟和親王恭代展祀未以命朕意者其或有

待歟朕寅紹丕基撫茲熙洽思以來年春孟月東巡狩因溯洙泗陟杏壇瞻仰宮牆申景行之夙志復奉

聖母皇太后懿旨泰山靈嶽坤德資生近在魯

邦宜崇報饗朕不敢違爰遵

慈訓親奉

鑒典秩于岱宗用答鴻貺旋蹕青齊觀風布澤

以昭崇聖法

祖教孝省方鉅典所有應行典禮大學士會同

該部稽考舊章詳悉具儀以聞其應預備之

各衙門查察事宜先期請旨至行在一切所

需悉出公帑無得指稱供頓儲侍絲毫貽累

間閭羽林衛士內府人役等各該管大臣嚴

行稽查約束並令扈蹕文武臣僚嚴飭廉從

無或侵踐田疇致妨宿麥如有騷擾地方指

名需索者立即叅奏從重治罪通行曉諭知

之戶部議准直隸總督那蘇圖疏稱八旗

下屯種地人等應建房屋現在通州昌平豐

潤三河玉田昌黎樂亭涿水武清等州縣各報建竣二百五十戶。又任邱文安香河大興延慶衛大城霸州延慶州灤州順義清苑望都容城密雲寶坻遷安高陽雄縣蠡縣等州縣衛續報共建竣三百六十九戶。又建竣耕種認買公產地畝共三十二戶。應查明已撥人戶。令其前往耕種。內有各屬已造旗分姓名。及現報完工。尚未造有旗分姓名者。均經分晰彙造總冊。應聽戶部移咨各旗。按戶查明。發銀給照。令其前往等語。查各州縣建竣房屋內。八旗共計六百十九戶。耕種公產者三十二戶。共六百五十一戶。應照原議。於公產地價項下。動撥銀六萬五千一百兩。令各該旗出具總領。赴部領回。會同查旗御史。按戶給發。每戶給牛具籽種銀。各一百兩。并印照一紙。令其前往。又稱。各屬未經建竣六百四十三戶。及耕種認買公產旗人一十九戶。現在督令速建等語。應令該督嚴飭趕辦。隨

竣隨報。俾得陸續下屯耕作。從之。辛酉。上詣暢春園問。

皇太后安。○迴圓明園。壬戌。江西巡撫開泰。叅奏侵虧不職丁憂萬安知縣馬淇瑞得旨。馬淇瑞著革職。其侵虧不職情由。及本內有名人犯。該撫一併嚴審追擬具奏。近來屢有此等虧空案件。皆由該上司等平日稽察不嚴。彼此互相朦蔽。盤查不實。任其挪借掩飾。及至丁憂離任。不得已然後題叅。此風漸不可長。此案虧空。開泰並不詳查緣由。但據司府揭報。以題叅了事。且以盤查以後之語。為之開脫。此案著追。如不能完項。即著該管上司。及盤查之員分賠。該部知道。○諭軍機大臣等。開泰自補授巡撫以來。於地方政務。全無振作。惟事沽名。屢經朕批示開導。尚未能悔改。即如所叅萬安縣知縣馬淇瑞虧空之案。據該府盤查時。並無短少。乃甫經兩月。即虧空至五千餘兩。明係盤查不實。通同徇縱。

所致。而開泰並不根究該府盤查情節。但據揭題。參平日之所為稽查屬員者何在。實心任事之道。固如是乎。著嚴行申飭。○又諭朕聞石匣之東。五指山娘娘廟。向有泉水。淳注近有無知愚民。忽倡為飲泉可以療疾。掬洗可以明目之語。遠近傳播。老少趨赴。累萬盈千。地方官有稽查彈壓之責。何以置若罔聞。全不查禁。將來聚集既眾。恐成邪教等名色。別生事端。可傳諭那蘇圖。拉布敦。留心查辦。此語起自何人。但無得張皇滋擾。尋查五指山頂。舊有廢廟二。本山開元寺僧沙雲。欲於山頂重建娘娘廟。甫議興工。適半山鋤出泉眼。沙雲即聲稱可以療疾。治目。設簿募化。又稱四月十八日。娘娘壽誕。遠近傳播。男婦趨赴。此後人漸稀少。查沙雲人甚老實。其假借泉水療疾。不過志在募化建廟。並非邪術煽誘。可比似應聽其存留。准其悔過。嚴切曉諭。毋許再行多事。其代為募助之香頭人等。

分別鞭責。俾知懲儆。得旨。既不過如此情節。不必過嚴辦理。即愚民鞭責亦可寬免。○癸亥。

上詣暢春園問

皇太后安。○還宮。○諭曰。十四叔允禩從前倚恃。

皇考恩眷。不遵

訓諭。有違弟臣之義。是以

皇考將伊拘禁。冀其悔改。朕登極後。特令釋放。賜以公爵。家居十數年來。安靜循分。並未生

事。則是自知悔悟。能改前非矣。使得及

皇考在御。必當

嘉予恩施。朕用是仰承

皇考加恩之意。著封十四叔允禩為貝勒。照常

上朝。○駐藏副都統傅清奏。夷使赴藏。熬茶

要地。俱應添兵防範。阿哈雅克騰格里。淖爾

一路。前派兵六千。令珠爾默特那木扎勒防

守。今珠爾默特那木扎勒留藏辦事。已派宰

桑那旺根敦策凌達什在彼管轄。應即交伊

等防範駐守。至準噶爾進藏時。臣另派噶卜倫策凌旺扎勒等。前至喀喇烏蘇帶兵三百名護送至藏。其防守阿里克一路。已令公珠爾默特策卜登前往帶兵五千名駐劄。又查工布。與達克布。及藏內地方。共備過兵四千名。臣仍照數防備。現在調用兵共一萬五千名。再從準噶爾至藏。路徑共五處。每處安設卡座。每卡派兵一百名。頭目一名。小心偵探。又歸併藏內之那克素三十九部落番子。原係羅卜藏丹津屬下。罔知法紀。聞夷使入藏。難保無滋事之處。應於夷使將到時。令其游牧移至別處。仍派人約束防範。其準噶爾人等。往各寺廟熬茶時。仍派官兵與原護送之官兵。一同約束。并密飭各寺廟喇嘛之處。已俱交珠爾默特那木扎勒。小心辦理。得旨。軍機大臣議奏。尋議準噶爾往藏熬茶。因係奏明為伊父修善事。是以蒙恩俞允。而藏內之人。慮其狡詐。防範自不可忽。但調兵至一萬

五千。不免張皇。且準噶爾此次尤極恭順。諸事俱遵旨而行。應外示寬和。暗令傳清調兵數千名於緊要處嚴防。方為妥協。一切與郡王珠爾默特那木扎勒。公商辦理。餘俱如所奏行。從之。又奏前次準噶爾赴藏熬茶。管送之大臣官兵等所用米糧。動項採買二千三百餘石。後僅支用九百餘石。此次應酌減豫備二千石再管送之。大臣官兵及準噶爾熬茶人等所用之柴。草乳油茶葉炒麵等項。交珠爾默特那木扎勒妥備。得旨。軍機大臣議奏。尋議此次管送之大臣官兵。較前次既少。上次止用過米糧九百餘石。此次備二千石。尚屬過多。應飭令採買一千石。餘應如所奏從之。

甲子。

上御太和殿視朝。文武陞轉各官謝恩。○幸圓明園。○諭據閩浙總督喀爾吉善奏。稱海壇鎮總兵袁政。歷任陸路。未能熟諳水師情形。恐

與海疆無益等語。海壇鎮總兵員缺。著喀爾吉善於通省陸路總兵內揀選熟習水師之員調補。所遺員缺。即著袁政補授。如陸路總兵內無勝任之員。著於通省揀選熟習水師之副將陞補。袁政即留於該省。俟有陸路總兵缺出。題補。○乙丑。廣西下旺司土巡檢韋仕秀病廢。以其子韋尚禮襲職。○旌表守正捐軀之寧古塔民八十兒妻閻氏。○丙寅。諭。現在運到漕糧。著於尾幫內截留二十萬石。存貯天津北倉。倘將來直隸等地方有需用米石之處。即由天津運往。較之抵通撥運。更為便易。該部即遵諭速行。○諭軍機大臣等。前因山西渾源州知州劉廷詔。及奉天州縣虧空案件。由該上司平日盤查不實。應著落分賠。以為通同掩飾。徇庇屬員之戒。已傳諭各督撫共悉此意。近日江西巡撫開泰。又有題叅萬安縣知縣馬淇瑞侵虧之案。據稱該府於上年十一月內盤查。並無短少。馬淇瑞

丁憂離任。距盤查時不及半年。何以虧空遂至五千餘兩。明係該上司等並不實力稽察。所云盤查。不過照常取結。明知挪借掩飾。轉令自行彌補。及遭事故。如劉廷詔之身故。馬淇瑞之丁憂。任已離矣。補無日矣。於是司府以揭報卸責。督撫以題叅了事。設令一日在任。則一日不破。州縣習為固然。是以侵挪無忌。夫稽查屬員。乃督撫專責。平日於此等侵貪蠹蝕之員。漫不加察。惟坐擁豐厚養廉。統統保守。在己身自謂無過。而所謂整飭吏治者。安在。封疆大吏。實心任事者。固如是乎。馬淇瑞之案。若本身力不能完。已降旨令開泰等分賠。嗣後各省督撫。如有不實力稽查屬員。俟其離任身故。始行叅出者。開泰分賠之例。即其榜樣。可通行傳諭各督撫。俟其奏摺之便帶去。○又諭。前據達勒當阿奏稱。五月以來。雨未霑足。已批令將應籌接濟之處。速行奏聞。未知近日曾否得有透雨。秋禾情形

若何。可傳諭達勒當阿。即速具奏。以慰朕念。再現在雨水未足。將來如有成災處所。旗倉已經告匱。民倉米石。是否足資接濟。抑或尚需若干石。應通盤計算。豫為籌畫。著達勒當阿。會同該府尹。詳悉計議。作速奏聞。以便早為料理。再前因山東需米。曾詢聞奉天米石。可以撥運若干。并令流通商販。今奉天本處。現既需米。則撥運東省。及通商販運之處。俱不必行。其海禁。仍照例嚴查。毋令奸商偷越。

一併諭達勒當阿。阿里衮知之。○丁卯。

上詣暢春園。問

皇太后安。○命停新科舉人覆試。諭國家三載賓興。所以旁求俊乂。關係綦重。向因不肖士子。陋習相沿。臨場專事懷挾。舞弊營私。希圖僥倖。是以上科順天鄉試。特派大臣侍衛等。嚴加搜檢。彼時外省傳諭未到。恐其中有夾帶冒濫中式者。因令於榜後覆試。冀得真實學問。以培養人材。本年又當鄉試之期。聞士

子頗知愧悔。不敢自罹罪譴。奮勉下帷。以圖上進。向求講求巧挾之弊。頗斂。而閉戶讀書。精研場課者有之。朕嘉悅焉。但若因此稍弛。別弊之令。恐復蹈故轍。著各該監臨等官。臨時加意搜查。不許攜帶片紙隻字。務令諸弊悉除。使場規整肅。以收得人之效。至上次覆試。原因場期已近。不及嚴查。今既一體嚴行搜檢。其覆試之處。著停止。○諭軍機大臣等。前據潘思榘奏請捐監之例。改歸本省。經部

覆准。朕已降旨允行。原欲積貯充盈。於倉儲有益。可傳諭潘思榘。令其於一二年後。將收捐米穀數目。具摺奏聞。則有益無益。可以立見矣。○戊辰。諭從來滿洲人員。凡事心存敬慎。今傳恒奏稱。伊昨日進班。仍回至私寓。晚飯後方至。且云。伊等每日如此。再納親差旋召見時。詢及昨在何處住宿。奏稱在伊私寓。莊親王自

陵寢回京面見。亦稱昨日到家。進班大臣。並非

門上行走侍衛等。輪流食飯者可比。辦事後大臣等散去。止有進班大臣。若各退食私寓。朕偶有臨幸。豈有止令侍衛等扈從之理。再從前差族人員。從無未進內廷。先回私宅者。今伊等在朕前具奏。並不自知其非。旁人亦視為故常。凡事無不因小致大。朕若不加訓飭。從此相率效尤。敬慎之心安在。所關非細。著將此旨通行曉諭。此後務遵舊制。以副杜漸防微之意。○大學士兼管直隸河道總督高斌等。條奏河工各事宜。一。寧晉泊週百餘里。雍正三四年間。漳河北徙。又滹沱支河。從趙州流入泊內。水不能容。以致泛溢。今漳河南徙。滹沱水歸正河。支河久已斷流。泊內乾涸。每年並無水患。惟夏秋各處瀝水匯注。應於泊內七里河下。順舊河形。准民力自挑小河。使瀝水有歸。一。趙州大石橋下。舊河甚濶。從山西流入直隸之平山。獲鹿等縣。由趙州歸泊。近年水道淤塞。不能通流。將來若遇大

水。上游恐有泛溢。今自獲鹿查其故道。勸諭民力挑挖小溝。使水不致阻滯。一。順德府鉅鹿縣。向有嫌地四萬餘畝。乾隆九年。於小莊建閘一。又於東西郭城隄上開涵洞一。將餘水注隄東。嫌地經水。嫌氣頓除。佈種秋禾。收成豐稔。惟鹽池。柳窪。油房。大小韓家寨。五村。嫌地甚多。而地勢微高。不能引水。須於隆平縣地方。多開一閘。引水東注。方可澆灌。已面飭該地方官。勸諭農民。借地建閘挑溝。嫌地俱可成熟。一。沙河在沙河縣城南五里。源出山西遼州。現在乾涸。伏秋水發。甚為洶猛。由沙河縣南。東趨大陸。臣等經由縣南。見風沙堆積。河形阻塞。隨諭地方印河各官。每年於夏秋水發前。勸民挑通水道。使河流順暢。不致旁溢。一。百泉在順德府城東南八里。環三里許。泉流甚旺。灌溉邢臺南和稻田。現在無庸修治。又有達活泉。在府西七里。野狐泉。在府西北十里。二泉建閘。開溝灌田。向甚有益。

今泉眼枯塞。隨諭邢臺縣知縣勸民挑挖通利。以復舊規。一滏陽河源出磁州。下游直通子牙河。每歲春末夏初。灌田之時。水嘗斷流。磁民於城西槐樹村建西閘。灌田四百餘頃。於城東北琉璃鎮建東閘。灌田六百餘頃。餘水聽其流入下游之邯鄲。永年。曲周。雞澤。平鄉。任縣。澆灌地畝。雍正二年。閻家淺地方居民。又建攔河惠民閘。呈請下板。蓄水灌漑。查磁州東西兩閘。定例五日閉閘。五日啟板。是一月中。磁州獨得水利十五日。其餘十五日。始分溉六縣。若再准惠民閘下板。於磁州固有益。而下游六縣。竟不得霑潤。況閻家淺地低。若一下板。則收束滏水。更難下灌。請立案禁止。一大名府之漳河。源出山西。從河南臨漳縣。流入大名府之魏縣。水極洶湧。雍正九年。漳河繞魏縣城之南北。分為兩支。魏縣勢甚危急。現於該縣上游八十里之行善村地方。開引河八十餘里。水口築減水草壩一。兩

旁築壩臺。中空二十四丈。平時土填。至伏汛時。則開。分正河水十之四。暢流至館陶縣界。入衛河。數年來。水勢安流。魏縣安如磐石。勸用民力。成此鉅工。知府任宏業。與印河各官。勞績昭著。請加恩議敘。下軍機大臣議行。○戶部議覆。據四川巡撫紀山奏。請添撥軍餉銀六十萬兩。前因進勦金川。於江西。湖北。二省。撥銀四十萬兩。本年五月十八日。復奉旨。於附近四川省分。再撥銀二十萬兩。經臣部議。於江西撥銀二十萬兩。共六十萬兩。江西之二十萬兩。紀山雖未接到部咨。但軍需銀兩。理應充裕。應如所奏。再於廣東留備銀內。撥六十萬兩。協濟。從之。○定邊左副將軍額駙策凌奏。所有交與和托輝特公額林沁。安插約束之投誠準噶爾烏梁海泯達遜一戶。私自逃回。旋經拏獲。已將泯達遜等正法。其子索雲。解送理藩院。照例辦理。得旨。著查明。由準噶爾投誠。交與各扎薩克地方安插之。

烏梁海等共有若干人。將如何防範。不令逃回之處。軍機大臣等議奏。尋議由準噶爾陸續脫回。及投來欲歸親族之厄魯特烏梁海及回人等共五十起。二百二十一名口。俱由軍營詢明情節。奏交各該旗安插。今泯達遜一户無故逃回。投誠人內未必無似此者。應交額駙策凌及提督李繩武密飭各該扎薩克等嚴加約束。並令各處坐卡人員不時巡查。亦不宜過於聲張。致生疑懼。其解送之逃

人索雲一名。俟到京日。交刑部長遠圈禁。從之。○命翰林院侍講學士周長發在尚書房行走。○庚午。諭汲古者並稱三通。該洽博聞之士所必資也。舊刻謬缺漫漶。且流布漸少。學者閔焉。今載籍既大備矣。十三經。二十二史。工具告歲。其以內府所藏通典。通志。文獻通考善本。並經史館翰林等詳校而付之刷氏。一倣新刻經史成式。以廣冊府之儲。諭軍機大臣等。前據河南巡撫碩色奏。偃師縣

民。因出借倉穀。棍徒鬧署一案。雖已據拏獲首犯。而已獲復逃之二人。竟未問及。又稱近城觀看。一時人多擁擠。將轎傘擠壞。且稱並未聚抗。與山陝光棍聚眾者不同。朕因其有掩飾寬縱之意。降旨申飭。今碩色將審擬情由具奏。何以並未將諭旨敘入摺內。著傳諭詢問。令其作速具題。此等棍徒罷市抗官之案。自應速為審結。明正典刑。以彰國法。使遠近聞知。刁民有所畏懼。不敢輕犯科條。辟以止辟。所全實多。若稽延時日。不特兇徒得以苟延殘喘。而百姓將不知其獲罪之由。無以懲戒。封疆大吏。有整頓地方之責。懲惡所以勸善。鋤奸乃以安良。各省督撫於奏事之便。亦併傳諭知之。尋奏。此案事關重刑。恐發部核議。是以未將諭旨敘入。至已獲復逃之二人。現經拏獲。係邱起文。王麻子。俱照律定擬。報聞。○諭曰。馬爾泰在外多年。諸事取巧。未能盡力。今年老有疾。一切不能。且以舊臣自

居。動止驕慢。昨令射箭。又託病推諉。著革去領侍衛內大臣。所遺員缺。著伊勒慎補授。旌表守正捐軀之陝西郃陽縣民康德業妻張氏。辛未。

上詣暢春園問

皇太后安。○諭貴州省苗蠻錯處。軍務關係綦重。巡撫文員。與通省營弁不相統轄。從前撫提各持意見。公事遂致掣肘。總督駐劄雲南。相隔遼遠。貴州巡撫著提督軍務。節制通省

兵馬。○又諭。原任府尹霍備。於辦理奉天流民案內。部議革職。朕從寬降調。茲查奉天所屬虧空之案。累累。皆因其毫無整飭。以致州縣無所顧忌。任意侵欺。霍備既不能稽察於前。又不能查叅於後。深有曠於職守。今伊降調。理應在此候補。而避而家居。優遊自適。無以為負恩鰥職者戒。著革職。發往軍臺効力。該督那蘇圖。即勒令起程前往。毋得聽其托故遲延。○諭軍機大臣等。據達勒當阿奏。奉

天牛莊地方。因上年歉收。米價漸貴。經章京伊圖出示。不准米糧載往別城販賣。百姓因此。攔阻過境糧草。後該章京伊圖。忽又派兵將攔阻之車。護送出城。以致石匠王君弼等。在街鳴鑼。欲將出城之車輛。仍復攔回。巡檢洪魁。當聞信差拏。王君弼等。誼開無忌。將巡檢並章京伊圖住宅。一併堵塞。現在委員逐一查拏。嚴加彈壓。俱各畏罪貼服等語。刁民抗官圍宅。目無國憲。漸不可長。況奉天為根本重地。大關緊要。非他省可比。可傳諭達勒當阿等。速行查審。嚴加究治。俾奸民知所畏懼。以懲刁風。至該章京巡檢等。撫馭無方。自應叅處。然當俟審結之後。題叅。今刁民尚未審明治罪。而先叅該管官員。則刁民轉以為得計。辦理殊屬失宜。可一併傳諭達勒當阿等知之。○又諭黔省山箐崇深。苗徭錯雜。張廣泗在黔日久。聲威幹濟。素足懾服苗心。是以地方寧謐。但苗性難馴。或因張廣泗調任。

無所畏憚。亦未可定。督臣相距遼遠。巡撫提督。統轄闔省員弁。均有守土之責。事事當和衷共濟。近省如山東河南等省。以巡撫兼任提督。於通省文武呼應頗靈。但貴州向來原設提督。若令巡撫兼管。體制未合。而苗疆軍務綦重。黔撫原非他省巡撫可比。尋常無事之日。巡撫兩司。即當留心營伍。以資彈壓。設有不虞。便可即時摧伏。封疆大吏。能如此同心協力。方愜朕意。倘或地方文武。稍存歧視之見。如從前哈元生。元展成。撫提交惡。釀成事端。於地方深有關係。朕今降旨。令孫紹武節制通省軍務。可傳諭孫紹武等。令其協同提鎮。綏靖苗疆。一秉公忠。每事商酌辦理。毋致彼此掣肘。並諭丁士傑知之。○又諭提督李繩武奏稱。詢問自準夷投來之厄魯特巴雅爾。據稱伊係去年隨同來使瑪木特前來之人。回巢時。因副使都喇勒哈什哈出痘。令伊調治。未痊身故。瑪木特不令伊同行。都喇

勒哈什哈從人。又欲將伊加害。兩次潛行逃歸。在路被獲。今又乘間逃來等情。應將巴雅爾照例料理。解京等語。此係近日隨同夷使來京之人。又有逃回兩次被獲情節。今來投誠。彼處斷無不知。非從前投誠之人可比。李繩武應具奏請旨辦理。乃即向伊詳問彼處一切情事。解至京師。辦理甚屬不合。但此時若再令回巢。伊必備細歸告緣由。反令彼此疑惑。致生事端。此案著即照此完結。朕思屢收此等投誠之人。竟無裨益。從前用兵時。尚欲得其信息。方今罷息干戈。伊等甚屬恭順。來使交易往來。並無事端。得其信息與否。無甚關係。且此投誠人內。大抵皆沿邊居住。或幽僻處所者居多。彼處要緊大事。未必稔知。即伊道聽之言。亦難憑信。假如一人前來。謂彼處有進兵之信。可即信其言遽爾出征乎。亦不過仍照原議。同守疆界耳。現今將若輩收留安插。不但需費繁多。將來辦理。亦費周

章。但定界時並未議及不准收納逋逃。未便將投來之人。即行拏解伊處。嗣後如有投至卡座者。務須問明。逃時曾否有人知覺。或有無追拏之處。如有前項緣由。不必詳問彼處秘密之事。即諭以現今和好。爾台吉甚屬恭順。大國施恩。不比從前。汝國逃來之人。未便收留。若拏獲遞回。又恐致汝被罪。將令其自回之處。明白曉諭。不必令進卡座。倘自彼處來。無人知覺。又並無追拏等情。問明後送至軍營。聽候辦理。可密諭兩路軍營大臣等知之。○士申。

上御勤政殿聽政。○戶部議准。江蘇巡撫安寧疏報吳江震澤二縣瀕湖坍沒轉經田蕩八十五頃七十四畝有奇。新漲轉重田四百三十七畝有奇。現飭確勘無異。所有錢糧應蠲應升。均請照例辦理。從之。○山東巡撫阿里衮奏。東省雨澤愆期。德州鄒縣等三十二州縣衛。照例借給籽種口糧外。其青州府屬之

益都博興高苑安邱諸城萊州府屬之平度昌邑等七州縣。上年秋禾被水。今歲二麥旱災。民情益增拮据。照例借給籽種口糧外。再請按戶計口。賑給一月口糧。得旨。著照所請行。該部知道。○以鑲藍旗蒙古副都統富德為盛京戶部侍郎。○轉通政使右通政趙城。為左通政。補原任右通政林枝春為原官。○以內閣侍讀學士積德為太常寺卿。監察御史德爾格為光祿寺卿。○調熱河副都統那

蘭保為鑲藍旗蒙古副都統。以原任領侍衛內大臣馬爾泰署理熱河副都統。○癸酉。諭軍機大臣等。從來兵貴神速。名將折衝。未有不以師老重費為戒者。大金川之事。調兵逾半載。撥餉過百萬矣。前據慶復張廣泗奏報。迄今已幾兩月。所調陝兵。何時到齊。慶復張廣泗於何時前進。宋宗璋許應虎進兵以來。軍聲若何。賊人見大兵雲集。情形若何。何時可搃賊巢。俱宜不時奏報。何以尚未具奏。深

用厯念。其鑒瞻對前車。迅奏膚功。所有近日軍情。作速詳悉奏聞。○閩浙總督喀爾吉善奏臺灣客民搬取家口。請定限一年。地方官查明。給照過臺。逾限不准濫給。得旨。著照所請行。該部知道。○甲戌。諭。本年七月內出口行圖。著莊親王。履親王。大學士訥親。張廷玉。在京總理事務。其月選之文員內。通判州縣等官。武員內。八旗護軍校。驍騎校。及外省送到之補放水手官。驍騎校等官。并年滿千總俱著王大學士。照從前之例驗看。可傳諭該部知之。又諭馬端臨文獻通考一書。綜貫歷代典章制度。由上古以迄唐宋。源委瞭然。學者資以攷鏡。明王圻取遼金元明事蹟。續之。煩蕪寡要。未足與三通並。且至今又百五十餘年矣。我朝監古定制。憲章明備。是以蒐擇討論。以徵信。從其自乾隆十年以前。會典所載。令甲所布。金匱石室所儲。與夫近代因革損益之異。上溯宋嘉定以後。馬氏所未備

者。悉著於編。為續文獻通考。大學士張廷玉。尚書梁詩正。汪由敦。經理其事。惟簡惟要。所有纂輯事宜。酌議以聞。○刑部議奏。病故寧海縣知縣崇倫永。虧空庫銀。應著落家屬勒限究追。得旨。州縣官侵蝕倉庫。非因公挪用可比。此等貪劣之員。多有身故事發以後。不過於家屬名下。勒限著追。遷延一二年。率以家產全無。保題豁免。且并有父歿而子乘機盜帑。移罪於父。己仍得坐擁厚貲者。故無以儆貪風。夫父子一身也。子代父罪。亦理之宜。崇倫永既經身故。著將伊子崇元。誦監禁追比。嗣後侵貪之案。如該員身故。審明實係侵盜庫帑者。即將伊子監追。著為例。餘依議。

大清高宗法天隆運至誠先覺體元立極敷文
奮武孝慈神聖純皇帝實錄卷之二百九十二

實錄卷之二百九十二

六

大清高宗法天隆運至誠先覺體元立極敷文
奮武孝慈神聖純皇帝實錄卷之二百九十三

監修 總纂官 經筵講官 太子太傅 文淵閣大學士 文淵閣領閣事 領侍衛內大臣 稽察欽奉 上諭事件 處管理

吏部 理藩院 事務 正黃旗 滿洲 都統 世襲 騎都尉 軍功 加七級 通帶 加一級 尋 常 加二級 軍功 記敘 一次 臣 慶桂

總纂官 經筵講官 太子太傅 文淵閣大學士 文淵閣領閣事 稽察欽奉 上諭事件 處管理 刑部 戶部 工部 事務

世襲 騎都尉 軍功 加十九級 通帶 加二級 入 加二級 臣 董誥 內大臣 戶部 尚書 運 鹽 鎮 滿洲 都統 軍功 記敘 五次

尋 常 記敘 十四次 臣 德瑛 經筵講官 太子太傅 工部 尚書 記敘 六次 臣 曹振鏞 等 奉

敕修

乾隆十二年丁卯六月乙亥諭朕此次行圍

所有外省督撫提鎮等奏摺著照舊例自起
鑾之日為始俱齋赴在京總理事務王大臣
處加封交內閣隨本呈送行在候朕批示隨
本發回仍於總理處交付齋摺人祇領該部
即通行傳諭知之 丙子

上詣暢春園問

皇太后安 諭據大學士慶復川陝總督張廣
泗奏征剿大金川現已悉心籌畫分路進兵
搗其巢穴附近諸酋輸誠納款則諸事業有

就緒。首首不日可以殄滅。嗣後征勦事宜。張廣泗一人即可辦理。現在大學士高斌出差在外。內閣辦事需人。著慶復回京。辦理閣務。○諭軍機大臣等。據慶復張廣泗奏。小金川土司澤旺。率衆投誠。並退還搶佔沃日三寨。大金川外援隔絕。官兵駐防其地。可以直搗大金川大寨。又收復毛牛及馬桑地方。西南兩路俱可進攻。慶復張廣泗現已分路。令統領宋宗璋。許應虎等。訂期會勦等語。此番官兵調集。佈置得宜。計可指期剋捷。至小金川望風迎附。乃迫於大兵勢盛而然。但既已來歸。自當乘機安撫。安可遽信為革心向化耶。從前辦理土蠻。總未能得經久長策。即如瞻對之役。調兵二萬四千。糜餉幾至百萬。亦僅殲厥渠魁。何嘗得其一人寸土。乃甫經竣事。而大金川又復見告。將來即使計日剪除。而徵兵籌餉。勞費業已相等。若蕩定之餘。仍以屬之土目。縱令震懼餘威。目前俯首恭順。而

蓄養氣勢。日後仍必鴟張。國家動衆傷財。適為伊等重事權而增氣勢。迨至兵力稍足。又復環視而起。旋起旋滅。何有已時。在國家全盛之時。視之不啻蚊蠅蜂蟻。而糜脂膏於荒筭。屯兵革於蠻烟。曷若熟籌善策之為得也。小金川現雖歸順。安知其意不謂金酋殄滅。其地不授之小金川而誰屬。信如此。是又增一大金川矣。即如土備汪結。乃慶復所信為領兵出力者。在本身尚能帖服。而伊子若孫。果可保耶。蓋番性叵測。如康熙雍正年間。郭羅克番衆征勦帖服。久之仍復滋事。乃其明驗。然謂必不可制。則青海蒙古附近土番。西藏即係番類。一經辦理。寧謐至今。可見籌畫有方。無必不可化誨懾服之理。朕觀金川情形。雖不可遽照苗疆之例。改土設流。或分置衛弁。統轄汛兵。或亦派大員彈壓。田賦獄訟。聽其經理。簡節疎目。馴擾羈縻。期於綏靖地方。約束蠻衆。不致如土司之專有其人。易於

蠢動。可以永除後患。朕意如此。是否於該省情形相合。著慶復張廣泗悉心從長商酌。詳悉具奏。如於該處不甚相宜。或如何始為盡善。別有經畫之處。著一一密行奏聞。大學士公慶復等。奏請軍營馳報事件。口外由塘馬口內由驛遞得旨。著照所請。行該部知道。丁丑。諭江南沛縣銅山二邑。於本年夏初。禾麥被雹。間有損傷之處。該督撫借給一月口糧。以資補種。朕念銅沛二邑。連歲歉收。若照例於秋後繳還。民力未免拮据。著加恩將現在借給口糧。作為撫卹之資。免其秋後還項。諭軍機大臣等。朕聞江蘇華亭縣生員姚培謙。江陰縣布衣是鏡。此二人皆力學有素。閉戶著書。不求聞達。尹繼善。安寧。既為江蘇督撫。諒必知二人之梗概。可寄信詢問之。或其人才具可用。或學問可膺師儒之任。據實奏聞。候朕降旨。俟奏摺之便。寄去。尋安寧奏前聞華亭縣生員姚培謙。好書籍。多著述。

後據呈送所纂各書。亦未見根柢實學。且聞伊於各衙門呈送。恐係好名之人。又聞該生富而好客。一切著述。亦不盡出其手。布衣是鏡。實陽湖人。在江陰開有講堂。聞學臣尹會一造其廬。與談理學。稱為先生。時論迂之。訪知該生向談道學。親沒廬墓三年。兩人梗概。臣所聞者如此。至其人之才具。可否錄用。及是否可膺師儒之任。尚容細查。報聞。尹繼善奏。生員姚培謙。麤有詞章。著述數種。不過摭撫陳言。無關精蘊。察其素行。喜浮夸。競聲氣。士論薄之。至江陰布衣是鏡。曾究心儒先諸書。聚徒講學。著有孝經圖頌。詞多膚淺。性醇謹。不競聲利。考其言論識見。雖近迂拘。尚能自立。得旨。所奏甚公。安寧亦如此。陳奏。又批姚培謙言。此人之善者。出於沈德潛。亦可異也。豈為其所愚乎。又批。是鏡如此。則尹會一造其廬。猶不失為善善欲長。○以兵部右侍郎王會汾。為浙江鄉試正考官。刑部主事周

漢為副考官。刑部左侍郎錢陳羣為江西鄉試正考官。監察御史馮秉仁為副考官。詹事府少詹事袁曰修為湖北鄉試正考官。翰林院編修朱荃為副考官。戊寅。諭軍機大臣等。此次準噶爾使臣瑪木特來京奏稱。從前伊處赴藏熬茶人等。頗羅鼐並未照舊例幫助牲畜口糧等語。經朕以頗羅鼐雖係受封號之人。究屬遠方部落。非內地臣民可比。不便降旨令其資助。但此次或照前量加資助。亦未可定。詳悉曉諭該夷使等。並於玉保前往時。令其向珠爾默特那木扎勒公同商酌妥協辦理。著再傳諭傳清。令其轉諭珠爾默特那木扎勒。此次夷使到藏時。雖毋庸循照舊例。二十日即行辦給一次。著於初到給資之外。酌量駐藏日期多寡。再行辦給一二次。俾夷使等咸知感悅。軍機大臣等奏。雍正十二年。北路軍營拏獲準噶爾烏梁海宰桑鄂魯什野勒之子扎勒布解京。奉

旨將扎勒布暫且留養。俟後來再定。至今在聖華寺十餘年。年近三十。前因軍務未竣。未經請旨。今準夷恭順。軍前寧謐。扎勒布毋庸看守。又不便發回游牧。請照投誠厄魯特給與娶妻立產銀兩之例安插。報聞。己卯。諭軍機大臣等。據阿里衮奏稱。山東營伍廢弛。急須整飭。請將晉省叅將都司四員。勅發東省等語。定例。督撫奏請將平日所知人員帶往備用。概不准行。今所奏與定例有違。業已批示。但朕看東省情形。營制廢弛。相沿已久。所當整頓。已特降諭旨。將勒圖蕭奏韶調往東省。并勅部揀選人員發往。著傳諭阿里衮將弁內有才力不逮。不能稱職者。即行查叅。所遺員缺。將揀發之人調補。大學士等議准。閩浙總督喀爾吉善。福建巡撫陳大受奏稱。閩省各鎮協營。原領買穀銀。本應按年買穀借給兵丁。嗣因買穀艱難。竟將銀給兵自買。在青黃不接之時。兵雖得藉以糴買。至秋收

時米價未平。領出餉銀。又須如數扣還。轉多拮据。嗣後如值年豐。即行買穀實貯。青黃不接之時。穀價尚平。不必出借。俟價昂再借。如遇歉收。商販稀少。准其暫存原價。價平買還。其未經買穀以前。仍准以存價借兵。得旨。依議速行。○又議覆喀爾吉善等奏稱閩省積儲。每歲出陳易新。原屬良法。惟是邇年米穀價昂。平糶銀不敷採買。虛懸倉額。查閩省原額徵本色米一十二萬六千餘石。例於春夏二季。將存倉穀碾米給兵。秋成徵收色米。又買穀貯倉。殊多周折。請嗣後按各府州縣徵收色米之數。統於倉內全行碾米。放給兵糧。秋收後。以一米改徵二穀還倉。其所需碾費。向例不准開銷等語。碾米既無所費。徵穀又無弊端。官民兩便。應如所議行。又稱延建等府運省兵米。二萬五千餘石。又兵米改折。將本色解省項下米。四千四百餘石。如令以穀解省。則運費倍多。仍令徵米。則米穀參錯。亦應

如所奏。令原徵州縣一體徵穀。即於本地碾米解省。得旨。依議速行。免廣東崖州乾隆十一年分水災額賦。旌表守正被戕之直隸萬全縣民張雲交妻江氏。○辛巳。上詣暢春園問。

皇太后安。諭軍機大臣等。據河南按察使舒輅奏。偃師縣刁民聚眾借糧。鬧署毆官之案。該縣朱續志不能彈壓撫卹。例有處分。比因特參。恐長刁風。經撫臣面商。原因兵役無多。不能即時擒獲。今首從要犯。俱已陸續報獲。情尚可原。已於案內聲明。應候部議等語。此案先經巡撫碩色。及舒輅先後摺奏。舒輅摺中有該縣如果有辦理未協之處。當另揭參之語。朕批示云。刁民鬧賬。而即參知縣。將來刀風益熾矣。尚當酌量。因而該撫摺中。即稱該縣平日居官尚屬黽勉。而具題本內。并為聲明邀免。可見伊等辦理地方事務。全不論事理之當然。胸中茫無定志。定見。惟以觀望

為懷。朕謂當處。則從而叅劾之。朕謂當寬。則又從而聲請之。觀此。則不但後之聲請。因見朕酌量之語。而然。即前此之叅奏。已非出自至公。謂於理必應叅劾矣。其首鼠兩端如此。何以克副封疆重寄耶。督撫藩臬。通省之樞轄。屬員賢否出焉。其平日之稱職與不稱職。臨事之當理與不當理。自當卓有定識。如鏡之鑑形。妍媸一定。似權之衡物。輕重不爽。乃近來督撫。往往叅之於不當叅之時。而聲請於無可寬之處。亦不獨碩色一人為然。封疆大吏。朕所倚任。若一以依違將順為事。政治其何賴焉。嗣後督撫。當秉公酌理。如果屬員辦理不善。或怠事而釀奸。或拂眾而激變。則其過在官。不必因恐長刁風。而稍為姑息。或辦理本無不合。而刁民恃眾逞兇。違犯訓令。則其罪在民。又不可因地方有事。即謂其不善撫綏。遽掛彈章。轉使奸徒得計。是非舉錯。各當於理。庶足以服人心。而正風氣。各督撫

當共悉此意。俟伊等奏摺之便。傳諭知之。○又諭。朕於上年十二月內。降旨將通州知州杜甲。發往浙江。以知府補用。本年二月。題補寧波府知府。聞其交代未清。至今尚未赴任。通州缺係衝繁。差務絡繹。交盤款項。自屬繁多。但亦何至稽遲半載有餘。著傳諭那蘇圖查察。如係因公交代未清。伊現在直隸。該督若欲留直補用。可酌量奏聞。以相當之缺。請旨補授。其寧波府知府員缺。朕另行簡用。若交代漸清。該督亦無需用伊之處。當令其作速交代清楚。即行赴任。庶其缺不致久懸。如有侵欺等款。即當據實叅奏。尋奏。通州水陸衝衢。最稱繁劇。承辦一切公務。墊用墊解之項。不一而足。是以交盤一時難結。現據新任朱奎揚詳稱。通計各款。杜甲應交出銀五千三百餘兩。杜甲則云。止應四千八百餘兩。所有長墊銀。已足抵款。彼此相持。未能剋日完結。不便任其再延。現飭道府徹底查核。三面

算清後。即令杜甲速赴浙任。至直隸知府各缺。現俱人地相當。杜甲無庸留直。報聞。○壬午。遣官祭

火神廟。○甲申。定邊左副將軍額駙策凌奏。查北路官兵月支餉銀。於乾隆十年十月內。解到銀二十五萬兩。陸續支放外。尚存貯銀十二萬兩有奇。不敷來年夏季支放。應豫支領。從之。○命戶部尚書傅恒。為會典館總裁官。○乙酉。

上詣暢春園問

皇太后安。○諭據河南巡撫碩色摺奏。中牟縣九堡地方。估建月隄壩臺等工。例應僉雇人夫。給與工價。官民從無異議。今縣民潘作梅抗不應夫。於欽差經過時。具詞告免。奉發押候查訊。詎潘作梅黨羽。脅聚多人。將知縣姚孔鍼圍在城外泰山廟內。不容進城。隨據開歸道沈青崖。開封府知府朱繡。中軍路峨等。陸續拏獲黨棍四十四人。究出張淑德。張二

麻。張鉢。白老小四犯。俱係為首號召。尚有要犯潘明亮等未獲。現在設法查拏。審擬等語。近來屢有聚眾抗官之事。奸棍逞兇。殊干法紀。觀中牟此案。又與山西安邑萬泉相類。如此相率效尤。刀風斷不可長。所有現經審出為首之犯。應行正法者。該撫一面具題。一面即於本處正法。以儆刁頑。其未獲要犯。該撫即速嚴拏。無令奸徒漏網。拏獲之日。審明。即照例辦理。○諭軍機大臣等。中牟縣聚眾之

案。首犯應正法者。著即於本處正法。已有旨諭部。至所奏潘作梅一犯。原因伊為首。具呈被拘押候。以致黨羽多人。闕鬧抗官。彼時曾否被其挾制。要回。此係起釁之犯。應從重究擬。所云欽差復係何人。曾作何處置其事。其知縣姚孔鍼。既被眾圍在城外。有無被凌辱毆打情節。摺內俱未聲明。著碩色詳悉確查。據實奏聞。無得稍有掩飾。并將所發諭旨。抄寄知之。尋奏查此案臣聞信之始。即委祥符

縣知縣顧師仁前往查看時刀民已至離城五里之郭家莊。顧師仁即會同姚孔鉞往該莊曉諭。其時刀民聲稱潘作梅為衆人之事具呈。今獨被拘。必欲放出。紛紛鬧開。當經顧師仁曉以例禁。並加勸諭。衆人惟將姚孔鉞圍在泰山廟內。不容進城。彼時臣所委之開封府知府朱繡。中軍路峨等。帶兵役已至中牟。刀民旋即奔散。潘作梅並未被其要回。至知縣姚孔鉞前。據顧師仁稟覆。止被圍在泰山廟內。並無辱毆等情。再欽差係大學士臣高斌。由江南至豫省。經過中牟。潘作梅前往具呈。時河東總河臣完顏偉亦同在一處。潘作梅將呈誤投河臣處。當經河臣面交管河道沈青崖。發縣查訊。欽差大學士臣高斌並未與聞。處置其事。報聞。丙戌。諭軍機大臣等。據山東巡撫阿里衮奏稱德州倉已經截留漕米五萬石。足資接濟。今又令將漕糧五萬石。原船帶運德倉。先後共截十萬石。為數

過多。不如分貯臨清濟寧二處近河一帶州縣。有需用之處。可以隨時酌撥等語。此項續撥運貯德倉之漕糧五萬石。如已運到德州交兌。若復令盤運。恐於旗丁有累。著照原議存貯德倉。如現在尚未起兌入倉。即照該撫所奏。分貯臨清州三萬石。濟寧州二萬石。以備沿河州縣酌撥之用。可即速傳諭顧琮。阿里衮遵照辦理。○又諭。近據江蘇巡撫安寧奏。許關併餘銀兩。每年移交織造衙門。動支三千兩。以為公用一摺。朕令將緣由查明。係乾隆六年。經王大臣等議令該織造將公用銀兩。秉公酌減。如有不敷。准於併餘銀內動支。曾經奏准之案。但織造衙門所有公用。向來俱於申餘項下開銷。該織造等往往視公用為無關正項。不知撙節。每一飭查。則稍核減。若聽其造報。遂任意開銷。即如申餘一項。每年多寡不齊。從前王大臣等定議。原令申餘不敷之年。始准動支併餘銀兩。乃自奏准

之後。遂視為應動之項。畧不樽節。圖拉等身為織造。於此等公用。理應留心查核。若實屬公用。自當開銷。若係私用。即當於養廉內動支。伊等養廉豐厚。豈尚欲假公濟私乎。可傳諭圖拉。嗣後務當加意節省。據實開報。毋得仍蹈故轍。并傳諭申祺。吉葆等知之。丁亥。諭軍機大臣等。據楊錫紱奏稱。每年額辦桅杉二木。委員有輕價勒買。夾帶逗遛等弊。現在委員親查。至沿途逗遛。請照糧船銅船之

例。咨會沿途督撫。飭行地方官催趲出境。如有逗遛。據實揭報等語。運木雖非重大之事。楊錫紱能設法稽查。留心及此。甚屬妥協。若地方緊要事件。俱照此查辦。自於公事有濟。但當遵照原奏。實力奉行。不可以數陳了事。徒托諸空言。爾等可傳諭楊錫紱知之。翰林院檢討程巖。為陝西鄉試正考官。戶部郎中時鈞。轍為副考官。禮部侍郎鄧鍾岳。為江南鄉試正考官。翰林院侍講學士周長發。

為副考官。戊子。

上奉

皇太后幸靜宜園駐蹕。○大學士等議覆陝西固原提督瑚寶奏善後事宜。一營伍宜清查。標營兵丁衆多。賢愚不等。請行聯環保結。例如無人互結。察其平素是否守分。親加驗看。弓馬漢仗平常者。量為開除。如技藝可觀。明白開導。令其俊改。著該管之千把暫保留伍。一召募卒伍。宜慎選擇。查各省兵丁缺出。有

兵丁子弟頂補者。亦有另行召募者。從前軍興之際。陝甘各營。俱有召募新兵。凱旋以來。定議兵丁缺出。以兵丁子弟與新兵間補。今請將該兵子弟及現在新兵。各造一冊。遇缺出。按冊間補。一給餉宜杜剋扣遲緩。查散餉成例。均係飭發流單。惟借給接濟應扣之項。向不在流單之內。今請於放餉前三日。將應關應還之項。出示曉諭。仍於驗餉日。查對流單數目給發。一愚悍之習。宜立法懲勸。兵丁

無知。必須徐徐開導。查士卒中果有孝義可風者。量加獎賞。頑梗不率者。盡法重懲。各項明晰條款。刊刻發給。并令將備千總時為講解。一操練之期宜仍舊。查操演舊章。於二月十五日開操。至九月十五日停止。今請於每十日之內。分別弓箭鳥鎗技藝三項。各三日輪流操演。至逢十日之期。則親率將備操演分合陣式。并考將備等官馬步弓箭。其春秋大操停止之後。各兵自行操演。仍令五日小

軍機大臣等

一八

操一次。一操演之鉛藥火繩宜豫籌。查各省操演所需鉛藥火繩等項。向例動用公費。定有數目。原未便意為增減。但現在公費不敷。仍係兵丁自備居多。操演時或該兵施放生疎。欲令多放數鎗。非恤兵之道。若令徒衍空架。準頭又難純熟。請概動公費製給。一營費宜加。查乾隆十年。經兵部定議各省標營。每兵百名。止抽步糧二分。以作公費。固原步糧八十分。除朋馬小建每年止得銀一千三百

八十餘兩。營中一切事務。公費不敷。現在虧缺一千餘兩。更有司庫應扣備貯五年鉛藥銀三千四百兩。查固原兵營原額。係馬兵三千名。步兵一千名。請改設馬糧八十分為公費。除朋馬小建可得銀一千八百二十餘兩。其操演兵丁之火藥鉛丸等項。亦可於公費內製給。一兵乏宜接濟。固原兵丁缺乏。一在青黃不接之時。一在歲底。其青黃不接之時。已於應領首季餉銀時預支次季五六千兩。

軍機大臣等

一八

以充接濟。俟領餉時扣還。至年底缺乏。請於冬季領餉時。將春季餉銀豫支五千兩。以足歲底之資。即於次年分作四季扣除。均應如所請。從之。軍機大臣等奏。據奉天將軍達勒當阿奏稱。奉天連得透雨。無庸另籌接濟。且現存各倉米穀共十八萬餘石。即稍歉亦可支持等語。前因奉天缺雨。奉旨命臣等將北倉截留漕米。酌量運往。今該將軍既稱無需接濟。直隸米價本昂。再加海運一切腳價。

轉多糜費。此項米似應停運。再查天津北倉。往年曾貯五十萬石。今現存止八萬餘石。并截留米十五萬石。通共不過二十餘萬石。此項應仍留北倉。俟需用酌量動撥。報可。又議覆甘肅巡撫黃廷桂奏請遵照舊例。給與頭目回民牛具籽種。聽其開墾荒地一摺。查雍正四年。土魯番回民托克托嗎穆忒等。情願移駐內地。經岳鍾琪奏准。移於肅州之金塔寺。并借給牛具籽種。俾得耕作。今該撫奏稱。回民人多地少。且或拋棄典賣。不敷養膳。現在無地可耕。遊惰成羣。請於回民原給地畝外。附近曠土。令其墾闢。一切俱照舊例安插等語。查回民偷惰成習。即另添地畝。暫濟目前。將來終難為繼。若不另為籌酌。究非經久之策。查哈密地方。可以屯糧之處甚多。若以之移駐。則同屬回民。土俗素習。安輯較便。現在貝子玉素富所屬回民。皆編有旗分佐領。今將此項回民。分駐哈密。可以就近管束。

俾專力耕作。實為久遠之計。其盤費籽種。并令該撫酌給。再回民春初乏食。借給過口糧一百九十一石。原應秋收還項。今既無以餉口。前項應請豁免。從之。是月。奉天將軍達勒當阿奏恭摺。

祖陵供茶人員。向例於防禦內酌派八員。但該地方防禦止十六人。每遇大祭。執掌獻帛獻酒舉桌等事。而膳房拜唐阿八人。備香拜唐阿四人。每逢祭祀。官員拜唐阿俱無事故。方足敷用。倘猝有事端。難免不齊。嗣後請於永陵官員拜唐阿子弟內。選端正敬謹者十二人。令在香港膳茶房三處學習行走。拜唐阿缺出。即於此項人內揀補。從之。直隸總督那蘇圖奏報各河道水長平穩情形。得旨。覽奏俱悉。今歲雨水頗大。幸是夜雨朝晴。故田禾無恙。至於一切河工。甚屬朕念。覽奏稍慰。○兩江總督尹繼善奏報各屬節次得雨。麥收豐稔。惟徽州府屬之績溪婺源休寧歙縣。

等縣。寧國府屬之太平、宣城二縣雨水過多，隄壩衝損，壓傷禾苗，并有倒塌房屋，淹斃人口之處。現飭確查，一面照例分別撫卹，得旨。覽奏俱悉。凡被水之處，即係偏災，亦應督率屬員，加意撫卹。署江蘇巡撫安寧奏報各屬連朝大雨，河水暴長，衝塌隄堰田禾，民屋俱有損傷，應作何賑濟，俟勘明成災，再行籌辦，得旨。覽奏俱悉。救災無善策，但盡一分人力，則百姓受一分之福，此處不可不知也。

福州將軍兼管閩海關事務新柱密奏，陞任巡撫周學健據福州、福寧兩府紳士黃瑞等呈報，奏請開墾上下竿塘各島一案。查各島並孤懸海中，山多田少，而黃瑞等呈內以少報多，其意不在田而在海，海洋之利甚夥，濱海貧民輸納魚課，藉此為生。若聽紳士認墾兼併，窮民必至坐困。況各島開墾，海禁即弛，實為啟釁叢奸之漸。伏乞暫將臣摺留中，俟督撫二臣定議具題到日，睿斷施行，得旨。此

奏甚是。知道了。湖廣總督塞楞額奏報雨水禾苗情形，得旨。覽奏俱悉。既云望雨日久，何不早奏，殊未體朕如傷之念也。一切綢繆之計，宜妥協加意為之。河南巡撫碩色奏報各屬被水，并有倒塌房屋，淹斃人口之處，現飭確查，得旨。覽奏俱悉。被水處雖係偏災，應善為撫卹。山西布政使朱一蜚奏，各屬雨水調勻，麥禾豐稔，惟太原、大同、潞安、汾州等府屬及口外清水河地方，於五六兩月雨中帶雹，田禾被傷，現飭確查籌辦，得旨。知道了。被災之處，督率屬員加意撫卹，必使民受實惠乃可。汝等莫以德沛五日京兆而玩易之。雲貴總督張允隨奏，各屬缺雨未能栽插，現飭確勘，如有成災之處，一面設法補救，一面奏報，得旨。是雲南遠在天末，賑卹之事，更宜督率屬員無濫無遺，以期稍救災黎。至數年以來，滇省屢獲有秋，想不至拮据耳。其如何辦理之處，速奏以慰朕懷。又奏各屬

陸續得雨。惟雲南府屬之安寧州。楚雄府屬之廣通。楚雄三縣。雨未深透。現飭確查。果否成災。分別撫卹。得旨。覽奏俱悉。被旱之處。加意撫卹。毋致災黎失所。

大清高宗法天隆運至誠先覺體元立極敷文奮武孝慈神聖純皇帝實錄卷之二百九十三

大清高宗法天隆運至誠先覺體元立極敷文奮武孝慈神聖純皇帝實錄卷之二百九十四

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲副都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣口部尚書鑲黃旗滿洲副都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

教修

乾隆十二年丁卯秋七月己丑朔日食○享

太廟遣履親王允禔恭代行禮○

上詣麗矚樓問

皇太后安○奉

皇太后還暢春園○

上居靜宜園○諭據山東巡撫阿里衮奏稱濟南府屬之歷城章邱泰安府屬之萊蕪沂州府屬之蘭山郯城東昌府屬之臨清州衛并濟寧州低窪沿河村舍有被水之處其東昌府屬之聊城堂邑莘縣夏津臨清館陶東昌

衛。青州府屬之益都。兗州府屬之陽穀。滕縣等處被雹。現已委員會同地方官確勘。果否成災。取具分數冊結詳報。倒塌廬舍。給資修葺。淹斃人口。資助掩埋。損傷秋禾。酌借籽種。及時補種等語。東省被水被雹州縣。并前報被水之魚臺。長清。共二十州縣。衛。即使不致成災。窮黎殊可憫惻。著該撫加意撫卹。務令得所。其災戶應徵新舊錢糧。俱著緩徵。俟查明後。照例辦理。以紓民困。○又諭據廣州將

實錄卷一百九十四

二

軍錫特庫奏。鑲藍旗協領李培。遇事瞻徇。如教場演藝。則挑選弓軟不善射者。朦混領賞。挑放甲缺。則各壯丁家口多寡。註寫恒多舛錯不齊。又自恃記名之後。上進有階。凡事玩忽等語。李培記名之處。著該部註銷。停其陞轉。○諭軍機大臣等。據大學士高斌。總河周學健奏。稱宿遷。桃源。清河。安東。之六塘河。及沐陽。海州。之沐河。向因山水漲發。地方受淹。嗣經委員發帑興修。尚未全竣。茲遇上游山

水驟發。致子堰衝漫。一面嚴押堵閉。被淹田地。星速察勘明確。應行撫卹之處。照例查核辦理。但連年經畫。水患未能盡除。或係兜灣逼溜。形勢尚欠暢順。堰土尚欠加高。前此勘估籌辦。尚有未盡周到之處。遴委幹員。再加確勘。詳籌妥辦等語。六塘。沐河等處。每年加工修築。而每年仍復被災。必係前此經理未善。今遇大雨時行。又被暴漲衝漫。高斌等奏請委員查勘。朕思與其委員查辦。或瞻顧原

實錄卷一百九十四

三

議。或勘估不實。於地方終無裨益。應即令高斌。尹繼善。會同周學健親往查勘。詳晰經理。熟籌疏濬之方。務令宣洩通暢。不致泛溢衝漫。子堰淹損田禾。為一勞永逸之計。以副注念。○庚寅。

上詣暢春園。問

皇太后安。○迴圓明園。○諭軍機大臣等。山東沂州府屬之蘭山縣。上年收成。祇有五分。雖不成災。而已歉薄可念。今年春又復被旱。近

又被水。該縣連年災歉。與他州縣不同。所有
一應撫卹安輯之處。著阿里衮加意籌畫辦
理。於伊奏摺之便寄去。○辛卯。諭國家三載
賓興。係抡才大典。每科正副考官。皆令該部
就各省分驛程之遠近。按期請點。從無遲誤。
乃各省之中。有數省督撫。循例請差者。亦有
不行奏請者。揆厥所由。皆因前明季年。朝政
闕茸。竟有當大比之年。逾期不點試官。以致
科場展限者。其後地方大吏。不得不行豫請。
至今尚有沿習舊文。具本題請之事。實屬重
複。各省又不畫一。殊非政體。嗣後惟令該部
屆期照例請點。其直省自行奏請之處。著停
止。○又諭。江西永新所幫旗丁周梁共等五
船。漂沒漕糧。例應按數賠補。朕念此次鄱湖
風浪猛險。人力難施。若責令該旗丁補償。情
有可憫。著加恩免其賠補。將來不得援以為
例。○諭軍機大臣等。據那蘇圖奏報。天津河
水漫溢之處。次第消涸。沿河低窪處所。設法

疏洩。高粱早稻。均無妨碍。晚禾被淹。尚可補
種。菽麥等語。其漫溢幾處。成災與否。尚未明
晰。朕已經批示。但聞天津因伏雨積水。有至
二三尺者。與那蘇圖所奏不同。天津地勢。素
號低窪。如果積水至二三尺。必於田禾有碍。
可傳諭那蘇圖。令其將現在情形。及如何辦
理之處。即據實詳悉奏聞。尋奏天津窪地。稍
為伏雨漫淹。已委員確查。嗣於六月二十六
日。又降雨四寸。各村積水。自六七寸至二三
尺不等。現在設法疏消。居民廬舍。並無妨碍。
至靜海。青縣。滄州。南皮。等州縣。情形與天津
相同。津地雖號低窪。距海甚近。數日晴霽。即
可漸涸。其中或有偏災。俟該道府查明後。即
行酌辦。再現據薊州。玉田。豐潤。寶坻。正定。冀
州。衡水。河間。任邱。霸州。文安。等州縣。續報河
水陡漲。近河低窪處被淹。已委員確勘。是否
成災。照例查辦。得旨。速行查明妥辦。以慰朕
念。○大學士等議覆。副都統李世倬奏稱。八

旗下屯種地各戶。應給牛具籽種銀兩。請陸續分給等語。查種地人等。各給銀一百兩。以為耕種資本。若撥往之始。全行給與。易致糜費。應如所奏。先給銀三十兩。餘七十兩。令該旗都統委佐領等官。赴各處將牛具籽種。確估購買。按戶交給。餘銀分給各戶。從之。○戶部奏原任福建司主事楊可鏡。因候選同知余銓。出身不正。濫行出結。部議革職。查楊可鏡所出之結。係結其親身赴部。與地方官結

軍機處三寶九

大

一

其出身無碍者有間。且係明臣楊漣之後。才具亦尚堪驅策。可否帶領引見。得旨。楊可鏡著從寬留任。○壬辰。署山西巡撫宗室德沛奏。萬泉。安邑。二縣。各設外委一員。兵丁九名。不足以資巡防。請移蒲州協千總一員。帶兵三十一名。前往萬泉駐劄。原設外委撤回。於平垣營撥兵十一名。移駐安邑。仍令該外委管束。得旨。著照所請行。該部知道。○癸巳。諭山西萬泉。安邑。刁民聚眾之案。朕因該地方

官。平日化導無方。撫綏無術。彈壓無才。致兇悍愚民。如此其驕。如此其縱。如此其肆行無忌。而仍復委靡因循。為所挾制。釀成事端。地方官自有應得之罪。是以刁民既行正法。并將巡撫總兵。以及該地方官。分別懲處。而近聞該地方無知之輩。竟有以拏問地方官為快。一似為正法兇徒。抵償其命者。則其兇頑愚蔽。抑已甚矣。國家為政。自有紀綱。民有罪當伏民之誅。官有罪。則當抵官於法。若因恐

軍機處三寶九

上

十

長民之刁風。而置官於不問。則廢法。然因治官之罪。而刁民轉自以為得計。則益無所忌憚。或因此輾轉煽惑。設復犯令干紀。起釁作非。又不得不繩以國憲。此朕聞之而不能不惻然豫為開導也。朕之所以深飭山西文武官弁者。正如子弟有犯。罪坐家長。衙役有犯罪及本官。嚴其罰。實以警其失。而重其權。使知身為司牧。即當視公事如家事。撫卹不可不周。訓誡不可不切。而約束不可不嚴。戒怠

玩而端治源。乃振飭官方整齊風俗之要道。豈謂刁民既罹重辟。亦即置地方官於法。以慰安其意耶。但既有所聞。或該地方有此流言。或愚不逞之徒。有此謬見。或民實無此意。而為是說者。欲聳動朕聽。以寬此數官之罪。均未可定。是用特頒諭旨。令直省督撫通行曉諭。使無知愚民。洗滌兇狠迷昧之習見。服教安生。守分樂業。無得聽一二好事之浮言。敢於犯法。身罹大戮。地方官益當加意整頓。

撫字善良。翦除邪惡。毋得一意因循。釀姦養害。以慈惠孚衆心。以威嚴肅衆志。共成蕩平正直之治。○諭軍機大臣等。前據提督潘紹周。保舉劍川協副將胡大勇。堪勝總兵之任。今送部引見。看來胡大勇。並無出色之處。在副將任。或尚可竭蹶從事。何能勝總戎重任。潘紹周何以將伊保薦。可傳諭申飭之。○甲午。

上詣暢春園。問

皇太后安。○諭馬蘭鎮標綠旗兵內漢軍挑補

之缺。本以優卹旗人生計。而近據總兵官布蘭泰奏稱。八旗撥到壯丁。有隻身無眷者。有眷屬託故不行。心懸兩地。求假探視者。有到即脫逃者。并有已經挑補。託言父母老病留侍。迹涉規避者。又有已挑該營。復挑補京營。另行掣補者。遂致懸缺至半年。或數月。防汛空虛等語。查撥補該鎮漢軍兵丁。於起身時。優給盤費。并給驛車。俾攜眷屬。體恤已為周備。況距京不遠。並無跋涉之苦。理宜踴躍從事。而託故遷延。有此種種情節。皆由各旗漢軍都統。不能實心任事。平日失於教導。一任旗人習於遊蕩。畏避差使。不知體恤之恩。至挑補之時。該都統等。並不遵照定例。亦不立限。令其起程。又不令攜眷同往。挑而復留。展轉更換。辦理不善。以致於此。著嚴飭行。其布蘭泰所奏。餘丁拔補之處。軍機大臣議奏。尋議。應如所奏辦理。但須擇家口衆多。而餘丁

可充伍者頂補。不得濫佔名糧。令在京挑往之人。致有壅滯。從之。○諭軍機大臣等。本日正白旗滿洲。將盛京補放佐領之新滿洲人等。帶領引見。清語俱屬平常。盛京係我滿洲根本之地。人人俱能清語。今本處人員。竟致生疎如此。皆該管大臣官員等。平日未能留心教訓所致。將軍達勒當阿。著傳旨申飭。○乙未。諭曰。大阿哥新得皇孫。命名綿德。朕孫行命名上一字用綿字。下一字俱從心字。內閣照例恭擬字樣進呈。以備選擇。○又諭朕因八旗漢軍人等。生聚日繁。家計未裕。於乾隆七年。特頒諭旨。自從龍人員子孫外。願改歸民籍移居外省者。准其具呈本管官查奏。旋據漢軍都統等分晰辦理。允行在案。朕觀漢軍人等。或祖父曾經外任。置立房產。或有親族在外。依倚資生。及以手藝潛往直隸。及各省居住者。頗自不少。而按之功令。究屬違例。伊等潛居於外。於心亦自不安。朕思與其

違例潛居。孰若聽從其便。亦可各自謀生。嗣後八旗漢軍人等。願在外省居住者。在京報明該旗。在外呈明督撫。不拘遠近。任其隨便散處。該督撫咨明該旗。每年彙奏一次。以便稽查。務令安靜營生。無得強橫生事。如此則於功令不相妨碍。伊等亦得安居樂業。生計有資矣。○兵部議准。直隸馬蘭鎮總兵布蘭泰奏稱。鎮標額設千把外委等官。不敷巡防。請於左右兩營額外外委內。揀選十員。給八品頂帶。仍食原糧。毋庸給與養廉。如果差防勤慎。遇經制外委把總缺出。拔補從之。○丙申。諭軍機大臣等。前朕將浙江按察使萬國宣。能否勝任臬司之處。降旨詢問常安。今據常安奏稱。萬國宣為人。幼未讀書。粗率洵所不免。又因其賦性鯁直。藉以彈壓一時之風氣。至於事事有合政體。萬國宣實無其才等語。臬司為刑名總匯。風紀攸關。朕之詢問常安者。所重在萬國宣之勝任與否。茲常安所

奏總未明晰。且前後抑揚其詞。若萬國宣果能勝任臬司。則外官陞見不習禮儀。不過草野粗率。尚可寬貸。倘不稱職。即當據實陳奏。今乃作兩可之詞。一似涉於貶詞。恐為萬國宣所怨。乃窺伺朕旨。含糊具奏。其能否勝任。並未奏及。殊屬游移。著傳諭申飭。仍令將萬國宣能否勝任之處。再據實明白具奏。尋奏萬國宣人雖粗率。但平素操守頗好。自任事以來。亦無過誤。於浙省臬司。尚可勝任。報聞。

○刑部議覆調任貴州按察使黃岳牧奏請嚴禁川販買貴州苗民子女一摺。查貴州窮民子女。止許當官契買。至鄰省地方。不許買苗民於川販之手。律無明禁。應如所奏。行令四川並雲南湖南廣西等省各督撫。轉飭所屬州縣。出示嚴禁。嗣後貴州苗民子女。槩不許買。盜買者除川販按例治罪外。將買主照違制例治罪。所買苗民。令原籍親屬領回。從之。○丁酉。

上詣暢春園問

皇太后安 詣

大高殿行禮

上還宮○諭我滿洲稟性篤敬。立念肫誠。恭祀天

佛與神。厥禮均重。惟姓氏各殊。禮皆隨俗。凡祭神祭天。背鐙諸祭。雖微有不同。而大端不甚相遠。若我愛新覺羅姓之祭神。則自大內以至王公之家。皆以祝辭為重。但昔時司祝之

人。俱生於本處。幼學國語。凡祭神祭天。背鐙獻神報祭。求福及以麋猪祭天。去崇祭田苗神。祭馬神。無不斟酌事體。編為吉祥之語。以禱祝之。厥後司祝者。國語俱由學而能。互相授受。於贊祝之原字原音。漸致淆舛。不惟大內分出之王等。累世相傳。家各異辭。即大內之祭神祭天。諸祭贊祝之語。亦有與原字原韻不相脗合者。若不及今改正。垂之於書。恐日久訛漏滋甚。爰命王大臣等。敬謹詳考。分

別編纂并繪祭器形式陸續呈覽朕親加詳覈酌定凡祝辭內字韻不符者或詢之故老或訪之土人朕復加改正至若器用內楠木等項原無國語者不得不以漢語讀念今悉取其意譯為國語共纂成六卷庶滿洲享祭遺風永遠遵行弗墜而朕尊崇祀典之意亦因之克展矣書既告竣名之曰滿洲祭神祭天典禮所有承辦王大臣官員等職名亦著叙入○諭軍機大臣等昨將四川等省逆案

正法之劉奇夏如春等妻子賞給功臣等為奴朕因伊等係逆犯子嗣若一處安置恐怙惡不悛又致生事是以分賞外省將軍大臣朕辦理之意恐伊等不能深悉著傳諭各省將軍大臣等所有分賞伊等此項人口斷不可留於京城務須攜赴任所加意約束毋致疎縱脫逃滋生事端○以故四川打箭爐作蘇策土百戶江初扎什子側旺漳臘營中阿壩土千戶墨丹住子曹旺蚌打箭爐桑阿籠

土百戶沙家平姪沙家丹津襲職○戊戌孝懿仁皇后忌辰遣官祭

景陵○

上詣

雍和宮行禮○幸圓明園○禮部議准原任山西巡撫愛必達奏晉省按照中額應錄科舉三千九百餘名試卷較少應將易書詩三經各減一房外簾受卷謄錄對讀三所各減一員從之○已亥諭軍機大臣等聞將軍補熙

軍機大臣等

十五

遣佐領素爾芳阿帶馬甲六名攜生息銀一千兩往額駙策凌所居地方購買馬匹並以茶葉等物送額駙策凌向未聞有從歸化城赴軍營買馬者今遠道跋涉遣官前往未知實係官買抑係私買詢及所遣人等據稱送物與額駙策凌而言語又復閃爍此事或果屬買馬或另有別情著詢問補熙令其據實明白回奏併寄知額駙策凌於伊所差人等問明具奏○理藩院奏西林郭勒盟長蘇尼

忒等六旗蒙古被旱成災貧乏人等應行賑卹得旨覽奏西林郭勒盟長蘇尼忒等六旗被災較大著派尚書納延泰馳驛前往查辦○庚子諭據江蘇巡撫安寧奏稱布政司王師於江陰縣丞俞鐙採辦硝斤一案俞鐙因帶辦私硝圖利遲延又經鋪匠人等控告扣剋該司並不詳揭又原署阜寧令馮觀民經道府揭報虧空該司瞻顧同鄉委稱年款不清不行詳揭又江蘇鼓鑄該司瞻徇姻親范商違例不令爐頭加色又清理錢糧係該司專責乃一切詳稟浮泛不切錯謬難行又王德純冒領庫銀一案最為易結該司以姜順蛟係伊門生恐罹重處輒轉駁詰至今懸案該司辦事遲留居心詐偽等語王師係朕特用之員自宜秉公率屬實心任事奮不顧身以圖報稱今據安寧所奏是不稱江蘇藩司之任著解任來京候旨其江蘇布政司員缺著愛必達前往署理○又諭曰御史李文駒

奏山西河南刁民屢次糾衆抗官請差員按部宣諭一摺朕觀奉使之員好事者則干與地方之務與督撫抗其安靜者則不過乘傳往來敷衍了事以應虛文於風俗人心究無實際蓋厚撫綏興教化皆有司專責在地方官身為司牧朝夕與民相親正當隨事教導示之禮法漸摩於不覺禁戒於未萌方為有益豈欽差巡歷一遍宣講一番即能使愚民共喻頑梗革心收捷效於口頰間耶夫糾衆抗官之事從前往往往暗自消弭比來事無大小悉令上聞文武大吏不敢隱匿朕因整飭紀綱維持風俗隨時辦理不事姑息並非往日少而近日益見其多即如水旱偏災各省向所時有近歲雖不成災亦必入告亦因朕明目達聰外吏無不據實陳奏初非水旱之較多於前也以通省之大間有一二縣一縣中間有一二人此一二二人既伏辜正法則其餘皆善良輩矣而仍復命使頻煩往來喋喋

竟似方州比屋人盡冥頑。非聚集訓諭不能感發天良。是直以不肖待人。為民上者何忍出此。譬之農夫為稼。嘉穀中不免一二稂莠。翦稂莠則嘉穀自滋。若因有稂莠而並嘉穀亦因之鋤耨。則勞而反損。此柳宗元種樹之喻。深戒夫長民者之好煩其令也。御史條奏。往往乘一時風氣。辦水利。則競言水利。辦錢價。則競言錢法。訓飭刁民。則競言刁民。近日袁銑曾奏請行保甲。定地方官處分。因係已行之事。且曾屢降諭旨訓飭。其摺未發。令李文駒又為此奏。伊等所見大率如此。是用明切曉諭知之。又諭軍機大臣等。據署江蘇巡撫安寧奏。布政司王師辦事遲留。居心詐偽。沽名邀譽。不能整頓一切。其不揭虧空。私免加色。尤屬有意徇私。各款朕已降旨令王師來京候旨。又奏清釐積欠一摺。據稱江南積欠甚多。其弊總在書役。現在設法辦理。於民間無擾等語。安寧初任巡撫。辦此二事。

有當與否。抑或有用氣質之處。高斌現在江南。可抄錄原摺。寄去詢問之。○辛丑

上御勤政殿聽政。○諭軍機大臣等。衆神保。自任鹽政以來。不過循分自守。於鹽務未見其能實心辦理。至地方一切事務。全不留心。即如安邑係伊駐劄之所。萬泉相距甚近。地方刁民聚衆。如此不法。僅於安邑起事之初。曾奏大畧。硃批。令其踪跡為首之人。密行奏聞。伊乃並未覆奏。而萬泉一案。則始終置若罔聞。伊意以為此地方官之事。與己無與。不知欽差官員。雖不可干與地方事務。而有所聞見。必當一一據實陳奏。朕亦可因以印証。該地方情形虛實。以廣明目達聰之用。若祇因循保位。直同木偶。自以操守可信。即為無忝厥職。伊坐擁豐厚養廉。豈尚患其蓋簾不飭耶。今因一時未得其人。仍留伊一年。可傳諭嚴行申飭。嗣後黽勉振作。毋蹈前轍。以稱委任。○陝西巡撫徐杞奏。陝省高陵。涇陽。三原。

興平咸陽臨潼富平乾州武功等九州縣豆
收歉薄其額徵豌豆留為次年支放者請徵
三緩七俟明年夏收後照額徵還至明年兵
馬應需料豆於存倉豆內通融支給得旨著
照所請行該部知道○以翰林院侍讀學士
董邦達為內閣學士兼禮部侍郎○命領侍
衛內大臣伊勒慎仍管正藍旗漢軍都統事
務○壬寅

上詣暢春園問

皇太后安○諭軍機大臣等據大同總兵官呂
瀚奏得勝口外鎮寧所地方有生員李曰英
等在理事通判衙門喧鬧先後拏解四人交
大同知府衙門審究等語山西萬泉安邑刀
民甫經懲創遠近百姓即有愚不逞之徒亦
當聞風斂跡何得尚有喧鬧官署之事可謂
慙不畏死著傳諭德沛令其從重盡法嚴處
無得以其微而忽之○大學士等議覆閩浙
總督喀爾吉善等奏稱前據陞任福建巡撫

周學健條奏漳泉二府商民許給照赴臺買
米在臺居住之漳泉二府商民亦許將米運
回發賣經軍機大臣議准行令妥定章程查
漳泉二府產米不敷民食商民赴臺收買甚
屬簡便請嗣後買米商民令本縣給文赴泉
防同知換照過臺呈明臺防同知移知臺灣
府准其購買於鹿耳門出口時臺防同知驗
數填照到廈之日令泉防同知移知漳泉二
府聽其發賣倘照內米數不符或由小口出
入并不在漳泉發賣將該商究處若出口已
久逾期不返將該商家屬審究仍令該同知
及在汛武員嚴束兵役毋許需索如違查參
至周學健奏在臺流寓之漳泉二府民人准
將餘米運回發賣查此等流寓民人若有餘
米本地自可出售不必遠涉重洋應照舊停
止等語均應如所奏辦理從之○以給事中
程鍾彥為河南鄉試正考官編修周正思為
副考官侍講德保為山東鄉試正考官御史

葛峻起為副考官。編修劉炳為山西鄉試正考官。編修諸錦為副考官。○命涼州副都統黑色來京候旨。以給事中都隆額為涼州副都統。○癸卯中元節。

上詣

安佑宮行禮。○遣官祭

永陵。

福陵。

昭陵。

昭西陵。

孝陵。

孝東陵。

景陵。

泰陵。○遣官祭

端慧皇太子園寢。○諭科場關係大典。務期甄拔真才。向因士子希圖僥倖。有懷挾作弊之事。是以乾隆九年鄉試。朕派大臣侍衛等官。嚴加搜檢稽查。以清積弊。近日以來。士子

頗知作弊為恥。蒸蒸向善。漸肯潛心讀書。甚可嘉悅。惟是人之賢愚不等。誠恐一二不肖之人。故智未忘。乘機舞弊。轉令有志向上者。亦蒙其垢。殊非朕作育人材之意。現在出口行圍。八月鄉試屆期。著在京總理事務王大臣等。照上科之例。酌派大臣侍衛等員。嚴加搜檢稽查。務使弊絕風清。以光鉅典。○又諭曰。協辦大學士吏部尚書劉於義年逾七旬。現在兼管戶部事務。部務紛繁。難於兼理。且兩部輪班奏事。連日往返。未免過勞。所有戶部事務。著不必兼管。○又諭朕此次行圍。在京戶部辦事之堂官甚少。著大學士訥親兼管戶部事務。○又諭前據山東巡撫阿里衮奏稱。歷城等二十縣衛。被水被雹。朕已諭令緩徵。今據續報濟南府屬之德州陵縣德州衛泰安府屬之泰安肥城東平州東阿平陰武定府屬之青城利津霑化兗州府屬之滋陽曲阜寧陽鄒縣金鄉縣濟寧衛嘉祥汶上

壽張並東平守禦所。曹州府屬之荷澤鉅野鄆城單縣城武沂州府屬之費縣東昌府屬之博平清平高唐恩縣青州府屬之博興高苑樂安等三十四州縣衛所。六月下旬大雨時行。山水漲發。沿山傍水窪下鄉村。一時宣洩不及。晚穀未免損傷等語。雖屬偏災。而被水窮黎。深可憫惻。著該撫加意撫卹。所有應徵新舊錢糧。緊緩徵收。以紓民力。查明後應行辦理之處。照例作速辦理。務令得所。○諭

軍機大臣等。今歲畿輔地方。近京之處。立夏以來。雨澤調勻。田疇禾稼。大約與去年相同。但從前春夏之交。那蘇圖曾報大名一屬。得雨稍遲。近據稱滹沱子牙河等處。河水陡漲。其沿河低窪之處。不無被淹。朕已批諭令其查明妥辦。現今秋成在邇。著傳諭那蘇圖。將直隸通省情形。詳悉確查。通盤計算。較之去年收成分數若何。據實具奏。尋奏。直隸通省高阜之地居多。惟天津靜海南皮河間任邱

獻縣東鹿冀州等處。因滹沱子牙河水陡漲。低窪地土被淹。現已委員查辦。至薊州玉田豐潤寶坻正定霸州東光等處。多係一水一麥之地。今春二麥豐收。晚禾浸損。亦屬常有。例不成災。將來或應停緩舊欠。酌借籽種。或於冬季酌給口糧。俟查明分別辦理。餘俱豐收。計通省高地收成。比上年較勝。得旨欣慰。覽之。○大學士等會議。欽差大學士高斌等議覆漕運總督顧琮請定洪澤湖救生壩修理章程一摺。臣等酌議。原設救生壩四座。責

成該管廳營防守修補。并動公項銀四千兩。以備修費等語。查河道總督周學健原議。救生壩四座。內老堤頭周橋二壩應修。其餘二壩聽其去留。今應仍照原議。毋庸增添。至所奏沿河救生椿。每年原有修費。應如所請。責令廳員稽查。如有偷盜混冒等弊。分別叅處賠補。從之。○戶部奏。八旗戶下家奴。有借名設法贖身。私入民籍。或被首告。或經查出。查

明曾報部旗。伊主得過身價者。應令歸旗。入於原主名下。作為開戶。不准歸本佐領下。如未經報明部旗。無論伊主曾否得過身價。俱令歸旗。仍作為原主戶下家奴。不准歸入佐領。作為開戶。從之。○又奏。八旗另戶間散下屯種地一案。應行籌畫事宜。一下屯種地之人。原准上京挑選當差。但種地人等。自當專心耕作。本人應不准挑差。如兄弟子姪有願上京考試。及挑補差使者。聽一下屯種地內。或有病故之戶。所遺房地。伊妻子可以承種者。照舊管業。如無妻子。准於原報冊內有名嫡屬。令其承種。如祇存妻室孀婦。即將房地徹出。令地方官暫行召佃徵租。孀婦情願回旗。酌給盤費銀二十兩。即於徵收租息內動支。至孀婦情願在屯居住。應於原給地內。上地酌給四十畝。中地六十畝。下地八十畝。土房四間。俟其身後徹出其餘地畝。召佃輸租。一。種地人戶。或遇偏災。暨青黃不接之時。應

令地方官。會同理事廳員查勘。與民人一例賑貸。從之。

大清高宗法天隆運至誠先覺體元立極敷文奮武孝慈神聖純皇帝實錄卷之二百九十四

大清高宗法天隆運至誠先覺體元立極敷文
奮武孝慈神聖純皇帝實錄卷之二百九十五

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加 級尋常加二級軍功紀錄一次臣慶桂

總纂官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十二年丁卯七月甲辰諭此次引見月

聖訓卷之三

選官內有衰庸不勝知縣之任著令改教者
四人吏部過堂及九卿驗看何以不行舉出
看來近日吏部九卿於驗看一事不能實心
任事如此廢弛之漸殊為可慮著嚴飭行知
縣一官古稱司牧其才具之短長乃政治得
失所關民生休戚所係斷不可因其例應選
用曲意姑容輒以社稷民人寄之闔茸之輩
也此等之人必不能望其整頓地方休養黎
庶以無負父母斯民之責即使勉徇其意令

其赴任該督撫亦必以才力不勝奏請改教
在本人既多往返跋涉之勞設或更代之員
仍復不能稱職則該地方竟至累月經年無
正員經理案牘由此日積風俗由此日隳流
弊不可枚舉不若慎簡於銓選之初量材而
授尚可冀其黽勉策勵是以重銓衡公驗看
無非求盡所以擇吏安民之道從前諄切訓
諭至再至三而吏部九卿又復徇於積習不
思澄敘官方乃吏部職掌果其為官擇人甄
別精當豈得謂之專事權而作威福今第依
次註名漫無可否乃昔人所謂一吏可任者
銓衡重寄固如是乎九卿為國家股肱耳目
匡襄政治深所倚賴月官人材之優劣年力
之衰健可一望而得而拱默觀望諉之吏部
吏部又諉之九卿九卿吏部交相諉實諉之
於朕耳夫謂知人之難者以其心術才具非
外觀可定如杜預身不跨馬射不穿札為晉
名將裴度退然纔及中人為唐名相以貌取

聖訓卷之三

人不能無失。要其可用不可用。則賢愚無難立辨。惟在實心與不實心耳。能實心。則鑒別不淆。而庸鈍自見。不實心。則因循了事。而良桮無分。九卿之不行舉出。豈其限於識見不明。不過謂已成之功名。為一言所阻。怨謗所歸。於是乎在。不知身列大臣。正當為公事任勞任怨。若謂無干已責。聊徇羣情。不能分朕之憂。救時之弊。似此優柔姑息。其將何所底止。況秉公糾舉。則駑駘不得與騏驎同駟。燕

石不得與連城相混。循卓之風。必自此始。即在不自量之輩。未必盡能心服。而一人之得失。與一邑之政治。孰重孰輕。范仲淹謂一家哭。何如一路哭。先哲名言。寧不聞之耶。嗣後吏部九卿。務體朕拳拳吏治之苦心。共矢公忠。屏除瞻徇。凡遇驗看之日。詳慎簡擇。擢拔人才。鄭重司牧。毋得任意因循懈怠。○諭軍機大臣等。昨據湖廣總督塞楞額奏報楚省得雨日期。稱望雨日久。今已據報於六月二

十八九等日得雨。陳宏謀報雨之摺。亦於今日同到。而前此之望雨。何以並未奏聞。督撫奏報雨澤。祇應就現在情形。據實陳奏。其將來收成若何。安能豫必。而陳宏謀摺中。屢以田禾豐盛為言。且謂低田向易淹沒。今歲可期倍豐。為此滿足過量之語。殊非敬畏之道。如此不已。必至隱諱捏飾。夫水旱愆期。時所恒有。即仰邀

上蒼敷佑。全省有秋。而民間蓋藏。亦當豫為籌

畫。況尚未至滌場之時。民食未見其必能寬裕。而乃以西成豐稔。沾沾自足耶。若謂以此寬慰朕懷。則朕必詳核其所奏盡實。方為欣慰。如其稍涉諱飾。則奏報不足取信。徒益朕之懸念耳。著傳諭訓飭陳宏謀知之。○旌表守正捐軀之山西寧鄉縣民許某妻梁氏。○乙巳。諭軍機大臣等。大金川進剿情形。前據該督張廣泗奏報。令宋宗璋許應虎等分路領兵前進。至今又已經一月。并前此疊次傳

旨詢問之處。俱尚未見覆奏。軍務機宜。固不便從中遙制。但迅奏膚功。必當先籌成策。聲息時通。似此音問稀疏。殊用廑念。可傳諭張廣泗。迅速辦理。尅期奏捷。其軍前一切調度事宜。不時馳報。務使萬里情形。瞭然於堂陛間。得豫知臨戎勝算。以愜遠懷。○賑恤廣西義寧縣本年水災飢民。○丙午。

上詣暢春園問

皇太后安。○詣

安佑宮行禮。○諭近因校閱金史。見所附國語解一篇。其中訛舛甚多。金源即滿洲也。其官制。其人名。用本朝語譯之。歷歷可見。但大金全盛時。索倫蒙古。亦皆所服屬。幅幘遼廣。語音本各不同。而當時惟以國語為重。於漢文音義。未嘗校正畫一。至元臣纂修。又不過沿襲紀載舊文。無暇一一校正。訛以傳訛。有自來矣。即如所解之中。或聲相近而字未恰合。或語似是而文有增損。至於姓氏。惟當對音。

而竟有譯為漢姓者。今既灼見其謬。豈可置之不論。爰命大學士訥親。張廷玉。尚書阿克敦。侍郎舒赫德。用國朝校定切音。詳為辨正。令讀史者咸知金時本音本義。訛謬為之一洗。並註清文。以便考證。即用校正之本。易去其舊。其坊間原本。聽其去留。庶考古信。今傳世行遠。均有裨焉。○諭軍機大臣等。朕車駕所經地方。有加恩蠲免錢糧者。地方官辦理。皆照合邑均攤。是以附近御道地畝。得沾實

惠轉少。前經降旨。那蘇圖。令查明附近御道田畝數目。已據那蘇圖將馬蘭峪易州二處御道兩旁田地。造冊送部。惟是熱河一路。亦係朕常時來往之地。著那蘇圖查明酌定。具摺奏聞。○兵部議覆。福州將軍新柱等疏稱。福州水師旗營。曾挑閩安海壇二標下水師兵一百名。作為教習。已閱多年。自應酌裁。請暫留正工五十八名。在營教習。缺出即將熟諳旗兵充補。定限五年。裁汰三十四名。儘留

二十四名。俟水師純熟。一併裁汰。其副工四十二名。已經旗丁充補六名。尚餘三十六名。應裁。以旗丁熟練水師者充補。至教習原營兵缺。久已募補。今旗餉既裁。未免守候。請遇兵丁缺出。將裁汰之兵。陸續掣回頂補。又原設教習把總三員。功加六員。應裁。只留外委把總三員。即在所留正工數內。俟回原營拔補把總時。將外委員缺。無庸再補。又水師營戰船。現存木艚匠八名。請仍留營教習。以十年為限。俟旗兵熟諳併裁等語。均應如所請。從之。○賑卹直隸固安。永清。香河。武清。涿州。霸州。大城。薊州。玉田。新城。容城。蠡縣。雄縣。祁州。東鹿。安州。高陽。新安。易州。涞水。河間。獻縣。阜城。肅寧。任邱。寧津。吳橋。故城。東光。天津。南皮。正定。井陘。藁城。冀州。南宮。新河。武邑。衡水。趙州。柏鄉。隆平。高邑。臨城。深州。武強。饒陽。安平。沙河南和。平鄉。廣宗。鉅鹿。內邱。永年。曲周。雞澤。邯鄲。成安。威縣。清河。磁州。宣化。赤城。萬

全懷來。蔚州。蔚縣。西寧。懷安。喀喇河屯。通判獨石口。同知熱河。八溝。同知四旗。通判等七十五州。縣。廳。被水。被旱。被雹。飢民。○戊申。上以秋獮木蘭。奉

皇太后自圓明園啟鑒。○詣

皇太后行宮問安。○是日。駐蹕南石槽。○己酉。上詣

皇太后行宮問安。○諭今歲浙江被水各縣。朕已降旨分別撫卹。其淳安。壽昌。遂安等處。受災較重。該省本年錢糧。俱已蠲免。而漕項尚應徵收。若照例令其完納。民情未免拮据。著加恩將被水傷重地方。應徵本年漕項。俱行緩徵。以紓民力。至此等災民。交冬之際。如有衣食更覺艱難之處。并令該撫查明辦理。量加賑卹。以資接濟。○諭軍機大臣等。肅州金塔寺。安插吐魯番回子。內有不服水土。至於生計艱窘者。一百餘戶。經大臣等議奏。請移於哈密種地居住。此項回衆。向被準夷凌虐。

情願移入內地。迄今二十餘年。因水土異宜。積蓄者少。窮迫者多。若將伊等移於他處。究不能於生計有益。哈密吐魯番雖部落各異。其教則一。情性相宜。且哈密貝子玉素富。自伊曾祖額貝都拉塔爾罕伯克以來。數世受國家恩澤。竭誠報効。奮勉急公。教養所屬之人。亦甚妥協。現在哈密地方。尚有可種餘地。著將安插金塔寺回衆。交貝子玉素富併入伊所屬旗分佐領。加意撫卹。令新舊回衆和好如一。撥給餘田。令其耕種。俾永不致失所。將此傳諭貝子玉素富知之。○是日駐蹕密雲縣。○庚戌。

上詣

皇太后行宮問安。○諭軍機大臣等。列樹表道。實為善政。理應隨時培植。自京師至熱河。皆行旅輳集之所。尤當加意經理。今朕巡幸所過。直隸地方。未種之處尚多。即有種植者。亦空缺不全。或多枯乾。皆因初時不過循種樹

之名。原未實心經理。又聽往來民人毀折及牲畜戕損。以致如此。即所種柳樹。或與土性未宜。不免枯朽。即易以他種。自無不發生長。養可傳諭那蘇圖。令其以明年為始。督率地方官留心辦理。務須補種齊全。時加培養。毋致毀傷。俾民人共資茂蔭。是日駐蹕要亭。○辛亥。

上詣

皇太后行宮問安。○諭軍機大臣等。從前周學健來京時。條奏請開上下竿塘十四島。以興民利。經軍機處議交該督撫查覆。旋據巡撫陳大受奏稱。檄委員弁查勘。據稱原呈請開之紳士。於各島徧貼告條。招令佃漁諸人。向其批字。方許墾地。掛網窮民。惟恐失業。俟勘明請旨等語。此件尚在確勘。未經題覆。准行。而紳士等貼示招人。看此情形。惟以包收衆利為事。全無實在與民興利之心。今朕又聞各島田園無多。其願墾者。不過希冀海洋之

利。徒使紳衿富豪逞其欺佔。以圖私利。於窮民非惟無益。而且有害。況各島一開。未必不弛海禁。尤有關係。圖一己之私。倡此興利之說。以惑衆聽。此風為民上者所當訓迪禁遏之。何可滋長。著傳諭該督撫等速行查勘。定議題覆。照舊嚴禁。以息訟端。○又諭。據安徽布政使陳惠榮奏稱。上江民欠。自乾隆二年起。至十年止。共未完銀六十四萬餘兩。現在倣照江蘇之例。設法清查。以完陳欠等語。朕已批令竭力妥為辦理。布政司雖屬錢糧總匯。然巡撫為一方之統率。須善為助理。方得有濟。譬如臂指之相連。然後脈絡相貫。著傳諭潘思榘。令其同心協力。與布政使陳惠榮實力查核。商酌妥協。務令從前積弊清除。亦勿得有所滋擾。○又諭。前愛必達請訓時。朕已頒諭旨。令大學士訥親傳知之矣。惟清查積欠一案。尚未諭及。今見安徽布政使陳惠榮條奏此事。因江蘇尤為緊要。若不早為澄

清。則此後究難免於舊習復萌。必須實力辦理。使耗蠹侵隱。一一清釐。又於民間無擾。方為盡善。可傳諭大學士訥親。令其即寄信愛必達。務必實心經理。贊助巡撫。以成其事。不得稍事因循。○福建布政使高山。緣事降調。以原任直隸按察使永寧署福建布政使。○是日。駐蹕兩間房。○壬子。

上詣

皇太后行宮問安。○諭軍機大臣等。久未接張廣泗大金川之報。若有摺奏抵京。可迅速封發。嗣後有張廣泗摺報大金川之事。總由驛遞。不必俟發報之日封送。再各省督撫提鎮等摺奏來京。倘有緊要事件。其齎摺之人。大概情形。自無不知之理。詢問明白。如係尋常事件。仍隨本封發。如有關係之事。亦即由驛遞。可傳諭大學士等知之。○又諭。福建布政使員缺。朕已降旨。令永寧前往署理。永寧即著在京起身赴任。不必前來請訓。著在京總

理事務王大臣傳諭永寧閩省民風向未淳厚如漳泉俗悍民刁最稱難治前此彰化之賴石戕害官長近日上杭之羅日光抗租拒捕其他如長泰之相驗抗官南靖之爭地械鬪種種不法實多驕肆各郡皆然亟宜隨時整頓至於紳衿武斷鄉曲遇事風生如近日查辦竿塘等島即徧貼告條霸佔漁利此等弊俗不可枚舉其臺灣孤懸海外閩粵流移番民雜處仇殺爭競私載透漏等弊俱宜實力革除盡心化導次第辦理俾士庶革薄從忠漸成敦龐之俗布政司有旬宣之責所任綦重應與督撫同心協力善為經理以挽頽風庶無負朕簡用之意○是日駐蹕常山峪

○癸丑

上詣

皇太后行宮問安○工部議准河東河道總督完顏偉疏稱東省運捕淤上四廳所屬隄工屢被汛水汕刷殘缺閘壩等工多有損壞請

動項興修從之○直隸總督那蘇圖奏今歲熱河八溝一帶均屬豐收穀價平減請於司庫撥銀二萬五千兩委員陸續採買運貯薊州遵化豐潤三州縣倉內以供

陵糈得旨照所請行○免湖南臨武藍山二縣水衝地畝額賦○是日駐蹕喀喇河屯翼日如之○甲寅諭軍機大臣等據那蘇圖奏稱口外熱河八溝一帶早禾茂盛次第登場請撥銀兩委員採買以供

陵糈之用等語從前

陵糈米石俱係漕米內運往後因屢次條奏於八溝採買其意或因彼處撥運腳價較省或因口外豐收恐致穀賤傷農是以如此辦理其意蓋為節省然漕米不運薊而運通不知其較採買運往者所省幾何而買運則須現撥正項亦未見其十分節省也朕思與其由八溝運往薊州不如仍照舊制以漕米運送其八溝之米即存貯本處以為口外備荒之

用。況今歲蒙古地方。聞有被旱之處。將來或須賑卹。以此接濟。甚為有益。且向例本由漕運。今於八溝採買。即有所省。倘口外又復需用。如無項可撥。由通運往。所費不更多乎。那蘇圖所奏。朕已批示。照所請行。但辦理尚需時日。可傳諭那蘇圖。令其將以上情形。再為籌畫。妥議具奏。並傳諭大學士訥親。令其從前因何改撥。及屢次辦理緣由。詳悉查明奏聞。○又諭。朕聞四月十六日。有成都查街兵丁。拏獲金川細作七人。經臬司訊供。係莎羅奔差來放火。要燒盡成都。好占地方等情。未見張廣泗奏報。果否曾有此事。可傳諭張廣泗。令其據實詳悉奏聞。尋奏。臣於五月初一日抵成都。距四月十六日。僅止半月。並未聞有細作放火之事。是以未經具奏。報聞。○大學士等議。覆閩浙總督喀爾吉善等奏。前據陞任福建巡撫周學健條奏。閩省額設趕繒船。請照粵省酌量留配。其餘改造雙蓬等船。

經軍機大臣覆准。行令分別裁改。查閩省洋面。與粵省不同。非趕繒大船。難期穩便。不能照粵省之例。裁減大半。請畧為變通。將淡水營趕繒船六隻。裁去四隻。其餘各營酌量情形。共裁二十二隻。改造雙蓬艍船等船。仍留大小趕繒船一百五十三隻。至周學健原奏。請於趕繒船拆造時。漸次改造。查裁去趕繒船。既應改造。請照閩省水師旗營之例。先行變價充餉。所有應造雙蓬等船。即動項興工。造竣交營差操等語。應如所請。從之。○又議。准閩浙總督喀爾吉善等奏。稱先經浙江處州鎮總兵苗國琮奏。濱海戰艦需用梘木。採運維艱。請於閩浙等省無稅官山。雇覓種樹之人。多植松杉等樹。令地方官勤加培護等語。查戰船木植。自應設法栽培。惟雇覓種樹之人。必須先給工價。既種之後。乏人看管。易致損傷。設役巡查。徒滋擾累。該總兵所奏。似屬難行。請將查出無稅官山。許民承種柴薪。

聽其收管。樹已成材。照價給買。從之。○大學士公慶復。川陝總督張廣泗奏。金苗莎羅奔居勒烏圍。就日吉父子。居刮耳崖。現分兵兩路攻勦。河西各寨。亦應勦洗。派遊擊羅子朝同土司汪結帶兵進攻。俱定於六月二十八日。各路齊進。臣張廣泗原擬駐雜谷關。迨到彼相度。尚偏於西路。是以仍回汶川。由瓦寺取道沃日。徑赴小金川。美諾寨駐劄。俟各路齊進後。當率兵相機策應。臣慶復現駐汶川彈壓。今分路進兵。擬出駐舊保。以便商辦。得旨。覽奏俱悉。朕始謂大學士慶復。尚在汶川。軍前有張廣泗一人。足資辦理。是以有旨。令入閣辦事。今觀此奏。是前臨軍營矣。若接旨而已。起身迴京則已。若尚在軍前。且不必來京。可俟奏凱功成。大局已定。然後起身可耳。○又奏。勦撫已旺。孫克宗等處。西南兩路。兵行糧運無阻。得旨。覽奏報攻勦情節。總與去歲瞻對相仿。即幸而成功。恐亦未必遠勝前

此之為也。○又會同四川巡撫紀山覆奏。金苗狂悖不法。固屬首惡。而綽斯甲。乃敢陰行附和。其罪實無可原。但其地與金川相連。而力又强悍。若明露並勦之機。恐二賊並謀。有傷兵力。是以該苗前到汪結處。有悔懼効力之請。即責以立功贖罪。但誠偽究屬難信。當以兵據其險要。俟金苗蕩平。即回戈南指。乘其不備。自易勦除。至金苗顯行悖逆。本身親屬之外。凡係黨羽。不容稍有漏網。其餘屬下番民。誅之不可勝誅。且迫於使令。非如黔省古州之苗。滇南昭通之獮。自懷叛志者可比。苟其投戈順命。自應伐罪弔民。且金川正在衆番蠻土司之中。深邃幽險。尺寸皆山。難以安設營鎮。若駐兵防守。運餉更難。惟俟將來蕩平之後。就現在恭順効力之土司。擇其從征有功之子弟頭人。量為畫界分授。少其地而衆建之。既以彰賞罰之典。又使力少不能為亂。庶可寧輯邊陲。至副將馬良桂統兵一

千五百名。先解熱籠之圍。後援沃日官寨一案。查本年三月內。金酋侵犯沃日各寨。經宋宗璋、馬良柱等發兵五百餘名。令都司馬光祖守備徐克讓等先後帶往聲援。馬光祖先赴沃日。與該處土兵協同拒賊。賊來攻寨。彼此勝負未決。守備徐克讓等兵會合在熱籠地方。賊衆大至。被圍寨內。馬良柱在巴納山聞知沃日被圍。奮勇前戰。直至松林口。與遊擊李成邦合力殺賊數百人。賊始披靡。官兵遂抵熱籠解圍。所殺賊衆留有尸骸。臣張廣泗目睹屬實。馬良柱既抵熱籠。總兵宋宗璋遣遊擊陳上才等領兵翻山接應。馬良柱揚威前進。往援沃日。賊敗逃後。俱已膽落。小金川又復投誠。賊遂逃散。馬良柱隨受小金川之降。派漢土官兵前赴小金川。美諾官寨踞守。金酋始領兵守穴。不敢復出。得旨。此奏畧遲。而又不過小小取勝。未報大捷。朕甚懸念也。○乙卯。

上奉

皇太后駐蹕避暑山莊。至八月庚申。皆如之。○
詣

皇太后行宮問安。○諭軍機大臣等。昨據大學士慶復等奏報大金川情形各摺。朕已詳悉批示。伊等總未能領畧從前諭旨。為出奇制勝之策。奏報攻勦情節。雖小小取勝。與去歲膽對相仿。蠢茲小醜。大兵壓境。未嘗不畏威懾服。究難保其日後之不復肆橫。置之化外。仍不免勞師動衆。豈為一勞永逸之計。即事平後。以蠻治蠻。不過分析其地。使之勢弱而黨孤。亦屬遷就。種種情節。亦難遙度於萬里之外。可將所奏各摺。并批諭之處。抄寄大學士張廷玉。訥親。令其閱看。細加籌酌。或勢有不能。只得如此辦理。抑或別有良策。可詳悉計議。到時爾等軍機處一同覆奏。尋奏大金川賊巢雖居各土司之內。然東則四川成都。西則西藏。南則雲南貴州。北則西寧青海。與

各處疆界相連。或可設衛分轄。或派大員駐劄其地。隨時彈壓。庶可懾服羣蠻。今慶復等所奏。不過於蕩平後。分析其地。多立酋長。與辦理瞻對一轍。豈足以除後患。現在張廣泗身統大兵。親至其地。應令該督於勦除後。將長靖番蠻至計。詳悉分別具奏。報聞。○丙辰。鑲白旗護軍統領傅達禮因病解任。以鑲黃旗蒙古副都統烏爾登為鑲白旗護軍統領。○賑卹長蘆永利富國西由等三場旱災。竈戶。○丁巳。

上詣

皇太后行宮問安。○軍機大臣等奏。據侍郎玉保等奏稱。每年春秋二季。巡察額色勒金柴達木。兩路卡座。派定青海王公扎薩克台吉等。每路遣一人察卡。又派莊浪滿官四員。每年於秋間帶兵巡察一次。均應於九月間。自西寧起程。今值夷使進藏熬茶。請暫停等語。查準噶爾夷使赴藏熬茶。侍郎玉保現已在

哈濟爾駐劄。倘察卡人等。照舊前往。正值夷使將到。人多勢衆。恐致生疑。應請將今秋察卡之青海王公等。並莊浪官兵。俱暫停。俟明年春季派往。從之。○戊午。賜蒙古王公等宴。○諭曰。署理提督拉布敦。提督任內養廉等項。例不應支。伊前往查邊。又有費用之處。著將伊副都統分內。應得本年冬季明年春季養廉銀兩。即行給與。○是月。倉場侍郎覺羅吳拜等奏。浙江紹興前後兩幫。本年回空船一百三十八隻。幫丁拮据。長途乏費。請動支通濟庫項。每船借給銀十二兩。仍令總漕於新運截漕銀內。分作二年。扣還歸款。得旨。如所請行。○直隸總督那蘇圖奏。本年陰雨連綿。滹沱漫溢。冀州屬東興等十五村。民埵被衝數丈。東鹿縣屬曹家莊迤東。正河淤淺。大溜改由莊西。經二十餘里。旁注冀州境。另由焦岡西南之野莊頭。歸入滏陽河。現今漫口三十餘丈。水過之地。禾苗被淹。現在委員會

勘量加撫恤得旨覽奏俱悉雖屬偏災總以悉心撫恤為要○又覆奏六月間連日大雨通水道所屬工程水衝張灣大石橋木排板椿一處清河道所屬潞龍河瀑河隄工間有塌卸正定之滹沱河二三四壩工護岸俱有沉墊天津道所屬南運河水勢漫溢竭力修築未至衝決而沿河低窪之區如天津青縣靜海滄州南皮及薊州玉田正定冀州衡水河間等處晚禾間有被淹是否成災現在委勘查辦報聞○又奏雄縣城垣頽壞亟應修整又該縣南門外之瓦濟橋年久坍塌趙北口之易陽橋亦多朽壞均請動項興修報聞○欽差宗人府府丞張師載奏永定河伏汛安瀾工程平穩得旨覽奏稍慰但數日以來雨勢頗大朕甚厪念汝宜加意防範又那蘇圖奏內云有漫溢之處汝何未奏及有礙田廬否速奏以慰朕懷尋覆奏永定河自六月以來雖連遇霖雨發水較大但順軌暢流兩

岸隄工並無漫溢惟京東一帶山水驟發通水道屬之還鄉河漫溢二處薊運河漫溢五處今已堵築完竣廬舍並無衝壞窪地秋禾間有被淹現在地方官查勘辦理報聞○署江蘇巡撫安寧奏淮徐海各屬自五月以來陰雨連綿汎水漫溢窪地多有被淹現委員妥為撫恤得旨覽奏俱悉○浙江巡撫常安奏浙省自六月十三日省城得雨之後晴已二旬農民不無望雨現設壇祈禱得旨一得雨澤速奏以慰朕懷若其早象已成一切賑恤之事亟力督率屬員妥協為之○又奏浙省七月初九初十兩日連獲大雨杭嘉湖等府俱已霑足惟金華府屬之東陽永康寧波府屬之奉化處州府屬之麗水縉雲宣平松陽等縣雨猶未足現委員確查如有被旱鄉村即斟酌辦理得旨覽奏稍慰○閩浙總督喀爾吉善奏浙省自五月以後雨澤稀少六月二十六七八等日溫台二府得雨杭州於

七月初九初十等日得雨霑足。惟金華府屬之東陽等縣。早象已成。現在查勘辦理得旨。據常安已奏報得雨。此奏知道了。然常安或查察未到。或畧為粉飾。亦未可定。卿總宜再行詳查妥辦可也。○山東巡撫阿里衮奏東省墩臺營房年久破損。若拘泥成例。令地方官捐賠。恐事非急務。日漸傾頽。應動項興修。庶足以資守禦。前經委員查勘。所估銀數未免浮多。應酌量核減。中路自德州至臺莊。東

平定奏卷之五

路自德州至紅花埠。共一百三十六座。每座先發銀六十兩。沿河沿海地方。六十一座。每座先發銀三十兩。僻路九十九座。每座先發銀二十兩。歷城縣黃岡地方。現係土墩草房。應改建磚瓦墩臺。先發銀一百兩。益都縣北關。向無墩臺。亦應照僻路添建一座。先發銀五十兩。請於司庫餘平充公銀內動支。如有不敷。再行增給。得旨。照汝核減之數修理。亦足以壯守禦而肅觀瞻。不必再增。仍督令毋

得侵冒可也。綏遠城將軍補熙復奏兵丁

滋生銀。向在各扎薩克地方及多倫諾爾等處。購買駝馬牛羊。以便貿易。本年六月內。據協領七德哩等呈稱。本處商人俱赴喀爾喀。台密等處貿易。請派佐領素爾芳阿攜帶生息銀兩。隨同商人赴該處購買馬匹牲畜。臣一時冒昧。遂派令前往。並無借端影射等弊。得旨。知道了。既有商人即可交伊等貿易。今因貪利。特派官兵。殊失大體。○陝西巡撫徐杞奏。陝省出借常平社倉穀。徵收例限。每多參差。請嗣後夏收在六分以上者。六月至九月完納一半。十月至十一月底全完七分。以上者。六月至九月中全完。八分至十分者。九月以前完十分之八。十月底全完。飭令各屬於歲底造冊詳報。委員監查。如有虧挪。嚴叅究辦。報聞。

平定奏卷之五

大清高宗法天隆運至誠先覺體元立極敷文
奮武孝慈神聖純皇帝實錄卷之二百九十五

高宗實錄

卷

大清高宗法天隆運至誠先覺體元立極敷文
奮武孝慈神聖純皇帝實錄卷之二百九十六

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

文部理藩院事務正黃旗滿洲都統世襲騎都尉軍功加七級隨帶加一級軍功加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄四次臣德瑛經筵講官太子少保工部尚書紀錄六次臣曹振鏞等奉

敕修

乾隆十二年丁卯八月己未朔吏部等部議

平定六年丁卯八月

一

一

覆湖廣總督塞楞額等奏稱湖北施南宜昌
二府之知府同知通判所屬之鶴峯長樂恩
施宣恩來鳳咸豐利川等七州縣向俱定為
苗疆要缺在外揀員調補並二府之經歷司
獄七州縣之州同州判縣丞吏目巡檢典史
各員缺俱五年俸滿即陞今該處人民漸次
蕃庶風俗亦覺醇良間有命盜案件不難審
理請將二府府廳各官七州縣及所屬佐雜
俱歸部選其五年即陞之例概停再二府各

官。向俱優給養廉。今既改為選缺。亦應量減。知府原給銀二千二百兩。應各減四百兩。七州縣原給銀千二百兩。應各減二百兩。同知以下等官。向以苗疆。照內地之數。加給一半。請將加給數內。酌減一半等語。均應如所請。從之。○戶部等部議覆湖廣總督塞楞額疏。稱湖南永順龍山。保靖桑植。四縣。苗地糧輕。漢民希圖賤買苗地。佐雜防汛各員。每多濫批給照。外郡民源挈眷而來。奸良不一。請嚴禁等語。應如所奏。嗣後佐雜微員。濫給印照。塘汛放行。照濫用印信例。減等罰俸。地方官失察民入苗地。照例降革。凡苗疆省分。均照此例辦理。從之。○副都統品級管理商都達布遜諾爾駝馬羣總管白泰故。賜祭如例。○旌表守正捐軀之山西陽曲縣民王瑞妻李氏。○庚申。賜扈從王公大臣等宴。○大學士公訥親覆奏。向來

將應運薊糧。撥往江南備賑。奉旨。在古北口一帶採買。分運薊州。遵化。豐潤。三州縣。以補原額。嗣原任熱河副都統達勒當阿條奏。每年秋成。在口外動帑採買。經陞任直隸總督高斌議。以年歲豐歉難齊。必須臨時奏請。毋庸豫定。每年採買。此後九年。係撥漕糧。十年。係口外採買。十一年。係撥漕糧。並採買餘剩米石。本年應用米石。部議於十年口外購買米石內撥充。此節年改撥之由也。今直隸總督那蘇圖奏。請於八溝等處採買。蓋豫為明歲陵糈之用。查此項米石。在口外採買。雖有節省。而豫東二省。供應之米。仍須運至通倉。每年採買。亦須現撥正項。誠未見大有裨益。報聞。○辛酉。上自避暑山莊。奉皇太后啓鑒。幸木蘭。○詣皇太后行宮問安。○是日。駐蹕中關。○壬戌。

上詣

皇太后行宮問安。○戶部議覆署江蘇巡撫安寧疏稱銅山豐縣沛縣等三縣四月間被雹傷麥廬舍人民間亦傷損請酌借籽種口糧災戶應徵錢糧緩至秋收後徵輸等語應如所請辦理至銅山等三縣被雹成災田畝新舊漕項銀米該署撫題請緩至秋成可否緩徵請旨遵行得旨依議銅山等三縣應徵新舊漕項銀米著照該署撫所請速行○又議

准雲貴總督張允隨疏稱滇省鎮雄州屬土地餘鍾麒戶下佃戶卜約等十六戶田地錢糧戶口前經奏歸川省敘永廳管轄入額徵收所有滇省原報上中下三則田四十七畝夷地一項三十四畝額徵銀米應請開除從之○是日駐蹕波羅河屯蒙古諸王公等恭迎

聖駕○癸亥。

上詣

皇太后行宮問安。○是日駐蹕張三營。○甲子。上詣

皇太后行幄問安。○諭據那蘇圖奏稱乾隆二年霸州等十一州縣領運通倉賑濟米石一案屢經部駁但分設四鄉輾轉分盤折耗在所不免每石請銷耗米一升五合等語著加恩照所請准其報銷後不為例。○又諭據安寧奏稱蘇松等屬之崇明寶山上海鎮洋常熟昭文南匯江陰各縣沿海沿江等處於七月十四日夜颶風陡作大雨傾注海潮泛溢田禾被淹人民房屋亦有漂沒衝坍而崇明寶山為最重上海鎮洋似覺亦重現在分別查辦其沿海未經報到之處查明續奏等語該處民人卒被風潮非尋常水災可比朕心深為憫惻著該督撫等加意撫綏實力查辦至綠旗兵丁因有糧餉例不撫卹但是日風潮昏夜驟至兵丁廬舍人口同被災傷殊可軫念著加恩一體查卹俾被災兵民均沾實

惠。○又諭。據陳大受奏稱。上杭永定。於民因粵民有違議造屋。竟越境拆人房屋。又朕聞該省之竿塘十四島。亦因紳士希圖專利。鑽營呈請開墾。並未准行。而各紳士即遍貼告條。令漁佃人等請批。方准承墾。從前各處鄉紳恃勢武斷。凌虐桑梓。欺侮鄰民。大為地方之害。及雍正年間。加意整飭。嚴行禁止。各紳士始知遵守法度。循分自愛。不敢稍涉外事。乃近來舊習復萌。竟有不顧功令。恣意妄行。各省未必無此。而閩省為尤甚。夫紳士受國家厚恩。必其品行端方。遵循禮法。始足以表率鄉閭。今乃不知檢束其行。下類與臺賈販與小民爭利。或凌侮鄰境。此風漸不可長。著直省各督撫詳加訓飭。繼自今。其各敦品守法。毋使敝俗復興。以致鄉閭滋害。倘仍有肆橫不法者。立即據實查叅。若該督撫稍涉瞻徇。經朕訪聞。惟該督撫是問。不為寬貸。該部可傳諭通行知之。○諭軍機大臣等。據甘肅

提督永常奏稱。甘省連歲有收。今歲自春徂夏。雨暘時若。市中糧石。最為充足。糧價較之昔年甚賤。秋成有收。勢必更減。可以乘時採買。以備積貯等語。採買原所以裕倉儲。而當穀賤之時。亦所以利農民。但未知現在甘肅倉儲盈缺若何。今歲秋成。如果豐稔。倉儲不足。及時採買。以裕積貯。自是有益之舉。著傳諭黃廷桂。令其將應否採買之處。詳查具奏。若其應買。一面辦理。一面奏聞。○又諭朕聞阿里衮糧價一摺。甚覺昂貴。但今日又據顧琮奏稱。山東沿河一帶。低窪地畝。現在被水淹浸。阿里衮現在查辦。高處仍屬有收等語。其先經被水。雖據阿里衮奏聞。而高處光景如何。此次並未奏及。著傳諭阿里衮。令其將現在情形。通省有收與被災者孰多。及被災者如何撫卹。俾災民不致失所處。作速奏聞。尋奏。東省地方。高下不一。低地不無淹浸。高阜俱屬有收。合計通省有收者究多。其被水

貧民。先給一月口糧。俟勘明分數。再請加賑。衝塌房屋。酌給修費。洩出地畝。借給籽種。其涸遲者。每畝借麥本銀五分。災地應徵新舊錢糧。遵旨暫緩徵收。現在通飭實力查辦。得旨覽奏俱悉。但朕明年東巡。於經過之處。不無災後蕭疎形狀。且汝等辦理一切。不費周章耶。○軍機大臣等議覆。副都統保德奏稱。軍營侍衛官員拜唐阿等。應換班時。隨伊等報滿日期更換。未有定時。此等人員。一出張家口。均騎蒙古馬匹。若適遇冬春。牲畜疲瘦之時。應付馬匹。及供應食物。未免拮据。請將軍營換班人等。於五月半間自京起身。換回之人。於七八月間來京。其差使來京者。除有要事外。其尋常貴送檔冊事件。亦俟五月起身。於九月間回至軍營。再軍營換班。若均在一年。應換之人太多。請將看水草侍衛。部院衙門官員。作為一年更換。守卡侍衛。作為一年更換。再口外行走。惟工珠及珠爾惠兩路。

若分年分路行走。蒙古人等自不致拮据等語。均應如所奏辦理。現在軍營官員。冬春應換者。即照此奏。俟來年五月內更換。其看水草侍衛。向係新舊錯綜更換。不便令與部院官員。一時全換。現在侍衛十員內。仍留一半。另作一次更換。從之。○又議覆保德奏稱。喀爾喀各盟長。督理一部落事務。向無印信。請另行鑄給等語。應如所請。內扎薩克六盟長。亦應一體鑄給印信。從之。○順天鄉試。以順天府府尹蔣炳為監臨官。刑部尚書阿克敦為正考官。左都御史劉統勲為副考官。○是日。駐蹕什巴爾台。○乙丑。上詣皇太后行幄問安。○行圍於永安莽喀。○是日。駐蹕海拉蘇台。翼日如之。○丙寅。賑卹長蘆海豐。寧津。二縣旱災竈戶。○丁卯。太宗文皇帝忌辰。遣官祭昭陵。○

上詣

皇太后行幄問安。○行圍於威遜格爾。○是日

駐蹕準烏拉岱。翼日如之。○戊辰祭

大社。

大稷。遣履親王允禔恭代行禮。○

上行圍於溫都爾華。○賜蒙古王公台吉等宴。

○駐藏大臣索拜奏。前經面奉諭旨。命訪頗

羅鼐之子。與達賴喇嘛。兩處情形。臣抵藏後。

細加體訪。頗羅鼐病故後。達賴喇嘛。即欲弔

奠誦經。伊子珠爾默特那木扎勒未允。經副

都統傅清申飭。旋即悔過。願請達賴喇嘛弔

祭。現在彼此和睦。並無異詞。得旨覽奏。可釋

朕西顧之憂矣。○已巳。

太祖高皇帝忌辰。遣官祭

福陵。○

上詣

皇太后行幄問安。○行圍於諤爾根郭。○是日

駐蹕敦達烏拉岱。○庚午。

上行圍於布爾噶蘇台。○諭據河南巡撫碩色

奏開。歸陳汝等屬。因今歲雨水過多。以致秋

成失望。其鄆陵等二十七州縣。勘明已成偏

災等語。朕心深為軫念。其被災州縣。應即行

賑卹。而歸德陳州。連年被水。尤宜加意撫綏。

著該撫查明。或應加賑。或應借糶。督率屬員。

詳悉辦理。務使小民均霑實惠。毋致失所。該

部遵諭速行。○諭軍機大臣等。安徽巡撫潘

思渠奏稱。候補知縣王名標署理無為州知

州任內。有連剗案內。例應議處。但該員甫經

到任六日。與平日不能消弭者有間。係揀發

候補。無本任原缺等語。著傳諭大學士張廷

玉。訥親。俟其於疎防案內。部覆之時。擬票送

部引見之簽。俟引見時。候朕降旨。○大學士

等議覆。閩浙總督喀爾吉善等奏稱。臺灣巡

察官員。應否去留。奉旨。命臣等定議。查臺郡

袤延二千餘里。遠隔重洋。平時地方寧謐。鎮

道等員。足資辦理。猝遇要務。每指畫無術。巡

察坐鎮其間。耳目易周。且使文武各官。有所顧忌。不致蕩檢踰閑。應請仍照舊制。毋庸議裁。惟臺地向分南北兩路。滿漢巡察。每年俱係一路周巡。隨從僕役太多。或致擾累地方。請嗣後於每年農隙時。分路各自巡查一次等語。均應如所請。從之。○吏部等部議覆。署山西巡撫宗室德沛奏。河東道駐劄蒲郡。該處向設副將一員。與文職不相統攝。一遇要務。措置每不能盡合。請將河東道加兵備銜。凡蒲州協所轄。及該道所屬地方營汛。俱令稽查鈴束。都司以下等官。聽其節制。遇盜賊竊發。刁民聚眾等事。均聽調遣勦捕。支放俸餉。嚴加查察。兵民交涉事件。會同副將辦理。換給關防勅書。應如所請。從之。○戶部議准。四川巡撫紀山疏稱。川省閬中南部鹽亭榮昌富順樂山萬縣綿州等八州縣竈民。開淘鹽井八十五眼。共產鹽一百五十六萬二千三百九十觔。配增水引二百五十五張。應徵

稅銀一千七十七兩有奇。請自乾隆十二年為始。按數徵納。應用鹽引。於餘引內動給行銷。從之。○是日。駐蹕布爾噶蘇台。翼日如之。○辛未。

萬壽節遣官祭

太廟後殿。○遣官祭

福陵

昭陵

昭西陵

孝陵

孝東陵

景陵

泰陵。○遣官祭

顯佑宮

東嶽廟

城隍廟。○

上詣

皇太后行幄行禮。○御行幄。扈從王公大臣官

員及蒙古王公台吉等行慶賀禮○賜扈從王公大臣蒙古王公等宴○軍機大臣等議覆直隸總督那蘇圖奏稱前經奏請在熱河八溝等處買米撥運遵化薊州豐潤三州縣以供

陵糈節省運費本屬無多况口外買運仍須現撥正項不如即將所買穀留該處備用且蒙古被旱現在賑卹遵旨以此接濟洵為有益請將所撥司庫銀二萬五千兩交熱河道分

發各廳採買收貯等語應如所請得旨依議速行○又議覆直隸總督那蘇圖奏稱蘇尼忒六旗蒙古被災奉旨命理藩院尚書納延泰前往賑卹行令於張家口獨石口等處備茶四萬觔米二萬石濟用現在張家口存穀無多應乘秋收採買新米至獨石口倉內現存米几千餘石應於此內酌撥一切運費俟奏明後定議等語查蒙古需賑甚亟如此辦理未免稽遲應令該督即行酌撥應採買者

即行採買一俟尚書納延泰查明應賑地方即行起運一切運費亦應即為核定至該督奏稱張家口同知現存穀價銀三萬三千餘兩買米價值即可動支今秋熱河八溝豐收先經奏明買米令賑卹蒙古不敷米亦可就近撥運所需茶葉令多倫諾爾同知購買均應如所奏辦理再口外地方並無塘汛運送茶米必需委員防護應如該督所請派理藩院蒙古筆帖式二員一往張家口一往多倫

諾爾協同運送得旨依議速行○壬申上行圍於巴顏溝○諭軍機大臣等朕前降旨令那蘇圖將熱河一路御道兩旁地畝查明酌定具摺奏聞今據那蘇圖奏報現委查勘到日再加查核等語熱河與馬蘭峪易州一例久應查辦乃經朕飭查而奏覆又復遲延仍未詳悉開報可傳諭那蘇圖令其速行查明具奏併將馬蘭峪易州二處自乾隆十年查辦造冊報部之後曾否辦理有無另行降

旨之處。一併詳查。具摺奏聞。尋奏。熱河一路。請照馬蘭峪。易州之例。附近御道。平坦大路。兩旁各以三里為界。山徑地窄道路。兩旁各以二里為界。遇有格外蠲免。均照此分別辦理。再查馬蘭峪。易州。自上年造冊報部之後。未經另奉諭旨。報聞。○是日。駐蹕巴顏溝。翼日如之。○癸酉。

上詣

皇太后行幄問安。○賜扈從王公大臣暨蒙古

王。公。台吉等宴。○諭。前據安寧奏報。蘇松等屬。海潮泛溢。人口田廬。間有漂沒。朕已降旨。將被災兵民。加恩賑卹。今又據安寧續奏。現在災地情形。雖輕重不等。而小民猝被風潮。棲身無所。餬口無資。朕心深為軫念。此次被災既重。非尋常水旱可比。一應賑卹之事。不可拘泥常例。該督撫等。惟視災地情形。竭力撫卹。督率有司。悉心查辦。俾災黎不致失所。并將上下兩江。明歲應運漕糧。截留二十萬

石。以備將來賑糶之用。該部遵諭速行。○又諭。江南沿海州縣。陡被風潮。朕已降旨。令該督撫加意撫綏。實力辦理。大學士高斌。現在江南。即著該部即速行文。令其前往被災之處。會同該督撫。將賑卹事宜。悉心籌辦。務使災黎均霑實惠。○諭軍機大臣等。朕閱安寧奏報。秋禾情形。摺內稱。大江以北。除被水之宿遷等十三州縣外。餘俱可望豐收。大江以南。惟沿海猝被潮災。其腹內并各屬秋禾。俱屬暢茂。從此兩暘應時。秋收可卜。大有等語。今歲蘇松等屬。陡被風潮。非尋常災歉可比。即使各屬有秋。可以補救災屬。已足為幸。何至遂登大有。所奏殊覺牽混。夫救荒原無奇策。惟在隨時隨事。善為區畫。著傳諭安寧。既云別屬可望豐收。或於各州縣內。悉心籌酌。量撥米石。前往災屬。以裨賑卹。無致失所。似亦轉移之法。一面辦理。一面奏聞。尋奏。江蘇被災州縣。應需賑濟米穀。現於成熟州縣內。

酌量派撥協濟。崇明縣撥江蘇常等府屬倉穀十九萬餘石。鎮洋縣撥蘇常鎮等府屬倉穀三萬餘石。寶山縣撥蘇州府屬倉穀一萬石。海州撥淮揚等府屬倉穀五萬餘石。沐陽縣撥鎮揚等府屬倉穀二萬五千石。其餘各被災地方。本處倉穀尚足應用。容察看情形再為續撥報聞。○又諭前據提督永常奏稱甘省連歲有收。米糧充足。價值較之昔年甚賤。可以乘時採買。以備積貯。朕經降旨傳諭

實錄卷二百九十六

六

黃廷桂令其將應否採買之處查辦。令覽黃廷桂摺奏該省望雨情形。內稱河東河西各廳州縣現在缺雨。而皋蘭金縣安定會寧四處係連歲偏災。現今又復苦旱。并請將安定會寧三處城垣動工興修。以工代賑等語。看此情形。甘省缺雨之處甚多。且現請以工代賑。若復行採買。必至於民食有礙。前奏採買應行停止。抑或永常所請採買處所。非黃廷桂所奏被旱地方。亦未可定。著黃廷桂查明

奏聞。可即傳諭知之。

實錄卷二百九十六

七

大清高宗法天隆運至誠先覺體元立極敷文奮武孝慈神聖純皇帝實錄卷之二百九十六

大清高宗法天隆運至誠先覺體元立極敷文奮武孝慈神聖純皇帝實錄卷之二百九十七

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務黃旗滿洲都統世襲騎都尉軍功七級隨帶加一級尋常加二級軍功紀錄一次臣慶桂

總裁官經筵講官太子太傅文學殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十二年丁卯八月甲戌

軍機處

上行圍於珠爾。○正黃旗滿洲都統等奏派往

綏遠城駐防兵五百名內有借製軍裝庫項

應於該處餉銀按月扣還但伊等初至彼處

生計未裕可否免其坐扣候旨遵行得旨著

豁免該部知道○是日駐蹕珠爾○乙亥

上詣

皇太后行幄問安○行圍於諾郭台色欽○是

日駐蹕諾郭台哈達○丙子

上行圍於巴顏木敦○諭據湖廣總督塞楞額

等奏稱新任湖北督糧道石杰現在總理瞻對軍需款項繁重請令暫緩離任等語朕前因湖北督糧道陳仁係陳宏謀一族降旨將石杰調補伊前在瞻對之役辦理糧餉甚屬妥協現又有金川之事轉運督餉需人料理石杰原係卓異人員因其賢能諳練是以辦理軍務若令其離任轉致無缺可歸石杰著仍以四川建昌道兼管川省軍需事務俟事竣照例卓異送部引見陳仁在川或令其署理建昌道或另行委用聽該督酌量奏聞○又諭昨據差往查賑蘇尼忒等六旗被災蒙古人等尚書納延泰奏稱烏珠穆沁親王阿拉卜坦那穆札勒貝勒策卜登阿霸坡郡王索諾穆拉布坦阿霸哈那爾貝子班朱爾等四旗被災較輕其屬下窮乏蒙古二萬餘人俱已辦理在本旗內兼養無庸賑濟等語該扎薩克等如是辦理雖係伊分內之事朕甚嘉焉著加恩賞給王貝勒貝子公等半年俸

祿。其副台吉各賞銀四十兩。小台吉各賞銀二十兩。官員及喇嘛人等俱照去年烏蘭察布賞給牲畜之例。加恩辦理。○諭軍機大臣等。據署廣西巡撫鄂昌奏稱。桂林府屬義寧縣龍勝以內之獨車地方。與湖南綏寧縣連界。該處有耙冲嶺。坐落楚地。銅礦甚旺。應行開採等語。朕思開採一事。雖有益於鼓鑄。每易於滋事。而界接苗疆。辦理尤宜慎重。今所奏綏寧一帶。即係苗疆地方。必悉心詳查。徹始徹終。細加籌酌。將來開採之後。萬無一失。方可舉行。若於苗疆稍有未便。斷不可因目前之微利。啟將來之患端。不如慎之於始。照常封閉。以杜聚集奸匪之漸。可將此摺。抄寄湖南巡撫楊錫綏。令其加意查察。將應否開採之處。據實奏聞。○又諭。向來遇朕時巡。曾有旨令將外省奏報災賑本章。皆令在京總理事務王大臣。一面交部建議。一面奏聞。曾記隨本另有聲明夾片。此次巡行。大學士等

亦曾奏請。朕令遵照舊例辦理。今阿里衮。潘思渠。災賑本二件。並無夾片聲明。或係部覆時方具夾片。是否如此。辦理之處。著傳諭總理事務王大臣等。查明奏聞。○軍機大臣等議覆。欽差尚書納延泰奏稱。查勘蘇尼忒等六旗蒙古被災人等。除被災稍輕者。各本旗通融養贍。毋庸議賑。外。實在貧乏蒙古。共計三萬八百餘口。請自本年十月起。至次年三月止。給六個月口糧。每月給米。大口一斗。小口五升。均折色。每石銀一兩二錢。共需銀一萬七千八百餘兩。由戶部撥給。直隸備賑米石茶葉。停其運辦。再伊等產業牲畜。應豫籌接濟。除本旗自辦外。需牛羊等項。折銀三萬三千八百餘兩。明春由戶部支給。均於該王貝勒等明年應領俸銀內。扣還歸款等語。均應如所請辦理。得旨。此次蘇尼忒等六旗蒙古被災甚重。非尋常被災可比。所有賑濟貧乏人口。辦給產業牲畜。應需銀兩。俱著動用

庫帑賞給。該王貝勒等下年之俸。不必扣除。仍著賞給。以為養贍。屬下人等之需。餘依議。○是日。駐蹕鄂爾楚克哈達。○丁丑。秋分。夕月於西郊。遣裕親王廣祿行禮。○祭先師孔子。遣大學士史貽直行禮。○

上詣

皇太后行幄問安。○行圍於德爾吉。○戶部議覆。奉天將軍達勒當阿奏。稱向例盛京各城旗倉米石。每年派令兵丁糴買。應行停止。旗

民內有願買者。仍照例不過三成。按各城時價賣給。所賣米價。於秋後採買還倉。但奉天豐稔年多。米糧價賤。旗民各有耕穫之糧。如旗倉米石。無人認買。不能出陳易新。減價糴賣。則原價虧缺。設致霉爛。勢必著落城守尉倉官等賠補。請於奉天豐收。可開海運之年。或天津。山東。運船到來。將沿海各城倉米。按糴三之例。照時價糴賣。遼陽城相隔牛莊一百二十里。每年出陳易新。亦應入於海運項

下辦理。義州旗倉米石。由關內陸路販運賣給。所得價銀。俱於秋收後。照數採買還倉。如遇偏災。收成歉薄。將旗倉米石。盡數留存本省。於青黃不接之時。准令旗民糴買。或借給旗人接濟。俱於秋收後按數補還。興京。開原。二城。地方高燥。積貯米石。雖無霉爛之虞。但米石究難久貯。不若改貯穀石。可以久存等語。俱應如所請辦理。從之。○又議覆四川副都統卓鼎奏。稱成都駐防兵丁口糧。共需米二萬八千六百餘石。俱係改給折色。後因米價昂貴。經前任副都統永寧奏准。每年令成都。華陽。二縣。採買稻一萬八千餘石。存貯滿城。於青黃不接之時。分給兵丁。在餉銀內照原價扣還。但兵丁所領稻少。需用口糧甚多。一遇雨水。購買維艱。請將每年兵丁應領米折銀內。扣除二萬石米價。存貯藩庫。於秋收後分發附近成都各州縣。買運滿城。酌量支給兵丁等語。應如所請。從之。○兵部等部議

覆直隸總督那蘇圖署山西巡撫宗室德沛覆奏。綏遠城家選兵丁。分派直晉兩省。頂補綠旗兵缺。並驍騎校改補綠營千總。各事宜。一家選兵現有一千九百名。應分別馬步守。按照兩省兵額勻派。直隸應補馬兵四十二名。步兵八百十五名。守兵五十五名。山西應補馬兵二十六名。步兵九百十九名。守兵四十三名。每遇各標營出有十缺。以七缺補家選。以三缺補綠旗。應如所請。一驍騎校三十員。亦應按照兩省額設千總勻派。直隸酌派二十二員。山西十一員。遇有缺出。與該省人員間補。亦應如所請辦理。至俸滿保送之處。仍令該管大臣豫行奏明。一兵丁挈眷前往兩省補缺。應日給口糧。並酌賞車輛。及搬移之費。查駐防兵丁起程。例准給與車輛口糧。今綏遠城派往兵丁。應令每名給車一輛。無車之處。照雇車定例核給。至所需口糧大口日給銀五分。小口四分。其搬移盤費。如補

山西省。至大同鎮者。每名賞銀五兩。至太原鎮。並直隸省者。每名十兩。一家選兵丁。應以補缺之地入籍。與民一例編審。並各給營房二間。如向無營房。或該處不敷撥給。令地方官就近建造。亦應如所請。從之。○是日。駐蹕扎克丹鄂佛囉。○戊寅。

上行圍於畢圖舍哩。○準噶爾部人鄂勒錫尼瑪。挈眷來降。賞給安插如例。○是日。駐蹕伊遜薩爾巴里。○已卯。

上詣

皇太后行幄問安。○行圍於阿濟格鳩。○四川巡撫紀山疏報。西昌縣開墾荒地四頃八十九畝有奇。○是日。駐蹕阿濟格鳩和羅。○庚辰。

上詣

皇太后行幄問安。○行圍於僧機圖。○遣官祭關帝廟。○是日。駐蹕僧機圖伯勒齊爾。翼日如之。○辛巳。

世宗憲皇帝忌辰遣官祭

泰陵。○諭軍機大臣等。據額駙策凌奏稱綏遠城將軍補熙等。遣佐領素爾芳阿前來軍營買馬。經臣告知遣員。汝等齎來俱係官帑。途間萬一遇有賊盜。關係非小。不比客商。既經遠來。可到鄂爾坤買得牲畜。即便回歸。嗣後不可為例等語。此事額駙策凌尚能籌及。告知遣員。補熙等辦理疎忽。不知大體。甚屬不合。滋生銀兩。雖應籌辦。或在他處貿易。或交商人領辦。皆無不可。特差官兵。持銀遠赴軍營貿易。不特事理不宜。設途中遇有宵小竊發。更於大體攸關。補熙等著傳旨申飭。該副都統等。曾否與之商議。究竟出自何人之意。並著伊等明白回奏。○大學士公慶復。川陝總督張廣泗。奏總兵宋宗璋。統領西路。其分攻刮耳崖各將內。威茂協副將馬良柱。連戰克捷。各寨望風乞降。現去刮耳崖僅二十餘里。又總兵許應虎。統領南路。得賊卡三處。賊

番遁入獨松碉寨等情形。得旨。自汝等定期會勦之奏至。朕日夜望捷音之來。遲至如今。亦不過小小之破碉克寨。何足慰朕耶。此內雖馬良柱尚屬奮勇。有所攻克。然用力圍攻。旋受其降。將來事成之日。此等曾經逞兇之犯。問其罪乎。將置而不問乎。若置而不問。數年之後。又一金酋耳。則亦未為計之得也。至於許應虎。在朕前力請出師効力。今一獨松即不能克。所為奮勇直前者何哉。且攻碉獲勝情形。總與班滾之事無異。朕所慮者。將來金酋。又似班滾之生死不明。則勞師動衆。訖無成功。必有身受其咎者。卿等始終籌畫。勿顧目前。為國家圖永久靖安之策。邊防銷疥。癰窺伺之萌。必如古州之至今苗民相安耕作。控禦有方。斯得矣。○壬午。上行圍於永安。○諭。浙江今年被水州縣。朕已降旨。令該督撫分別撫綏。其嚴州府屬之壽昌。淳安。遂安。被水尤重。將來嚴冬即屆。此

等災黎。嗷嗷待哺。朕深為軫念。著加恩將三縣內田地。不能墾復之乏食貧民。於常例撫卹一月外。再賑給兩月。俾資養贍。著該撫常安督率屬員。實力查辦。其有無更須籌畫之處。亦著該撫就近相度。加意詳籌辦理。務使災黎得霑實惠。○諭軍機大臣等。從前常安奏稱杭金台等處。望雨甚殷。續據奏報省城各處得雨。今喀爾吉善又奏稱金屬之東陽湯溪浦江。據詳早象已成等語。著將此摺抄

錄。寄與常安閱看。令其將奏報得雨之後。曾否續得雨澤。現在情形。據實奏聞。○總理事務王大臣等覆奏。乾隆八年。十年。恭遇

皇上時巡。奉旨各省報災本章。即將副本交部查辦。於正本內另具夾片聲明。至部覆時。一面行文該省。一面奏聞。至十一年。未經奉旨。皆照例擬寫票簽進呈。本年七月內。大學士等。因各省報災本章。曾經具奏。奉旨仍照十一年之例速辦。是以此次阿里衮等報災本

章。大學士等照例擬寫該部速議具奏票簽進呈。未經夾片。得旨覽王大臣覆奏各省災賑本章一摺。從前大學士等請旨時。查奏年分之處。原未明晰。朕亦未及詳看。是以批照十一年之例速辦。嗣後災賑本章。著仍照八十年十年之例辦理。○準噶爾部人博克來降。賞給安插如例。○是日。駐蹕齊爾伯庫昂阿。○癸未。

上詣

皇太后行幄問安。○行圍於英圖。○遣官祭

歷代帝王廟。○遣官祭

都城隍之神。○戶部議覆。安徽巡撫潘思榘奏稱。上年鳳。潁。泗。三府州屬被災。所有賑缺米穀。及撥缺沿江各屬倉儲。前奏准於本省監穀內。並俟秋成時。酌量採買補足。查各屬投捐人數。多少不一。請將安。池。等屬。撥缺米十萬二百餘石。以一半捐補。一半採買。其鳳。潁。泗。等屬。賑缺撥缺米七萬八千六百餘石。應

及時採買。如有投捐監穀。即於買數內扣除。均應如所請。從之。○是日。駐蹕英園和洛。○甲申。

上詣

皇太后行幄問安。○行圍於喀喇諾特海。○遣官祭昭忠祠。○是日。駐蹕齊老圖。翼日如之。○乙酉。

上詣

皇太后行幄問安。○行圍於喀喇瑪拉噶。○諭據直隸總督那蘇圖奏稱。直屬被水州縣。有成災較重之天津。靜海。文安。大城。霸州。永清。武清。津軍廳等八州縣。應請照例先行撫卹一月口糧。其成災較輕之河間。任邱。南皮。青縣。滄州。慶雲。寶坻。七州縣。毋庸普賑。但其中極貧下戶。口食維艱。應請一例摘賑。撫卹一月口糧等語。朕思慶雲一縣。此次成災。雖輕。但該處屢被荒歉。地瘠民貧。朕甚軫念。著照被災輕重之天津等處。一例普賑。餘著照

該督所請。分別賑卹。俾民食得資接濟。至此十五州縣廳屬。既被偏災。所有應徵錢糧。小民輸納。必多拮据。著加恩將該處應徵新舊錢糧。暫行緩徵。以紓民力。該部遵諭速行。○又諭。據楊錫紱奏稱。原任戶部侍郎陳樹萱家居並不安分。每因細故爭訟。并干謁地方官等語。近因各省紳衿。漸有恃勢欺凌鄉里。干豫詞訟之習。曾經降旨訓飭。楊錫紱查出據實陳奏。甚屬可嘉。陳樹萱著交部察議。尋議應照例革去職銜。得旨。陳樹萱著革去侍郎銜。○兵部議准。湖廣總督塞楞額奏稱。湖南武岡營並城步汛。向歸寶慶協管轄。乾隆三年。將城步縣改隸靖州。並將城步汛。武岡營。俱歸靖州副將兼轄。城步距靖。路遠未便。請將武岡營遊擊。並城步汛守備等官。均仍歸寶慶協兼轄。從之。○工部議准。安徽巡撫潘思渠疏稱。臨淮縣西土壩埂。被水衝沒。亟應修築。請動項興修。從之。○豁除浙江錢清

場海潮坍沒上則田十四頃十五畝有奇額賦○賑卹湖南耒陽衡山零陵祁陽東安永明城步綏寧會同等九縣本年分水災飢民○賑卹陝西朝邑縣本年分水災飢民○賑卹廣東順德博羅廣寧等三縣本年分水災飢民○旌表守正捐軀之廣東東莞縣民吳昌遠妹吳氏○丙戌

上行園於巴顏陀羅海○大學士等議奏來年孟春

皇上稽古東巡致祭

先師經過泰山肅將祀事所有應行典禮命臣等詳議謹查康熙二十三年

聖祖仁皇帝致祭闕里均用闕里禮樂今遵舊制惟

文廟樂章雖經頒發曲阜恐本處樂工未諳令樂部太常寺量派司樂及樂舞生前往演習致祭禮成

御詩禮堂講書宣

勅諭於五氏官員子弟宣讀

勅諭於大學士內奏派一員講書人員於文職大臣內奏派二員會同衍聖公於五氏子弟內選擇二員進講其

勅諭及應講之書由翰林院撰擬講書禮成

駕詣孔林行祭酒禮至周公廟即在曲阜照例遣官讀文致祭泰山靈嶽近在魯邦應行致祭古者因名山以升中原有燔柴之禮昔

聖祖仁皇帝因儀文度數書缺有間後世議封

禪者又多附會因從廷議照五嶽禮致祭今致祭泰山請照舊行禮惟是泰山向不用樂查周禮大司樂奏蕤賓歌函鍾舞大夏以祭山川是山川之祭自古用樂今特舉盛典秩于岱宗請倣古用樂其樂章令樂部撰擬樂器樂工及香帛等項令樂部太常寺帶往從之○是日駐蹕巴顏陀羅海○丁亥

上詣

皇太后行幄問安○是日駐蹕珠爾噶岱碩龍

○是月。直隸總督那蘇圖奏查勘東鹿縣濬沱河改徙。舊河漸成平地。新河順軌安流。毋庸築隄捍禦。其被水貧民。已酌量賑卹。得旨。所見甚是。一築隄即成河工。有損無益之事也。○又會同欽差宗人府府丞張師載奏。永定河汎水出漕。應於北岸崔營村。築草壩一座。又南北兩岸。水浸隄根。隄工卑薄處。量加培修。現在為期尚早。大學士高斌。不日回任。再與酌定辦理。至永定河下口。由沙家淀歸鳳河。現在鳳河多淺狹處。應展挖寬深。目下淀水尚未全消。俟冬月再行勘估。得旨。是刻不容緩者。即照爾等所議行。其餘俟高斌之至。○山東巡撫阿里衮奏。定例武職副將以上。准丁憂。叅將以下。不准。近雖有給假治喪。及二十七月內。停陞轉之例。與文職究未畫一。查直省武職。有祖父母。父母年老。家無次丁者。俱准終養。是武職親在之日。得與文員一例終養。獨至親歿。不得與文職一體丁憂。

揆諸人子之心。殊有未安。且武職丁憂。康熙二十五年。曾經舉行。請嗣後叅將以下。俱照文職丁憂。如有邊關緊要。及軍機調遣。許該督撫提鎮。題請留任。衛所官員。運糧聞訃者。運完回籍守制。得旨。自是名正言順之文。但行之恐有扞格。俟朕酌量。○定邊副將軍額駙策凌奏。綏遠城將軍補熙。遣佐領素爾芳阿前來買馬。臣詳加詢問。據稱歸化城民人。向俱往鄂爾坤買馬。是以將軍差來置買。並無別故等語。素爾芳阿。應俟其買馬後。即為遣回。得旨。業經前去交易。若使空回。勞苦益多。著好為照管。勿令生事。急速買完遣回。此俱補熙等。市利輕舉。業經有旨訓飭。○川陝總督張廣泗奏。到軍營後。查訪班滾果否燒死之處。因聞有自班滾處。逃回土兵。昔什縛扒塔兒。隨喚至軍營。細加盤詰。據供。班滾於如郎寨逃出。即往沙家邦寨中藏匿。嗣大兵焚燬泥日寨。並無班滾在內。又接提督武繩

謨札稱有新投兵丁王懷信。向在裏塘。亦聞班滾未死。並傳說現在金川各等語。是班滾未經燒死。已屬顯然。臣仍多方密訪。務得實在下落。再行奏聞。得旨覽此。則班滾實未死也。如其未死。舍金川而何往。一事而成兩功。惟卿是賴。至於一切顧慮。恐惹嫌怨之處。皆可不必。勉之。○又奏。本年五月內。據管理裏塘糧務巴縣縣丞稟報。瓦述崇喜長官司達漢太吉等兄弟。及喇嘛頭人等八員名。被番

衆殺死。並詢據跟隨達漢太吉之土目鄂木結供稱。衆番行兇時。聞有長官司俄木勞丁聲音。並見伊土目賴嘛塔在場等語。隨飭提犯審辦。詎俄木勞丁托病不出。而賴嘛塔亦不到案。現委員曉諭俄木勞丁。先將賴嘛塔獻出。再行相機辦理。如敢抗拒。俟金川奏凱後。即就近移兵勦辦。得旨覽此。所謂一事未完。復生一事者也。既不能忍置而不問。又不能為一勞永逸之謀。前此之督撫提臣。不能

辭其責。此後之經畧。卿其何以副朕懸望耶。○署廣西按察使鍾昭奏。粵西土俗。最易輕生。偶有偷竊事犯。即公衆議罰。倘辯論不服。竟逼令自盡。或令伊父母親族。公同致死。此等案件。臣必盡法按擬。並出示嚴禁。至苗獠各種。性最愚頑。惟聽該頭人指揮。如頭人奉公守法。即可寧謐。若頭人欺詐。多生事端。現飭各州縣。將玩法頭人。逐一革除。另選委充。得旨是。以明刑弼教之意。行化民移俗之方。

日計不足。月計有餘。汝其勉之。亦不可欲速也。○廣西左江鎮總兵楊剛奏。安南莫匪。自敗往牡丹以後。勢已困敝。現在邊外寧靖。貼防邊兵。已全撤歸伍。得旨。雖云徹防。尚應時常留心探聽。以備不虞。○雲貴總督張允隨奏。滇省安寧。廣通。楚雄等三州縣。黔省台拱。天柱。古州。下江等處。秋禾被旱。現委員查勘。酌量接濟。餘俱有收。得旨。覽奏欣慰。至台拱古州。乃苗疆要地。彼處缺雨。恐頑苗乘此新

易總督之時故智復萌一切卿宜留心

大清高宗法天隆運至誠先覺體元立極敷文奮武孝慈神聖純皇帝實錄卷之二百九十七

大清高宗法天隆運至誠先覺體元立極敷文奮武孝慈神聖純皇帝實錄卷之二百九十八

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂
總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務
世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次
尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十二年丁卯九月戊子朔

上詣

皇太后行幄問安遣官祭賢良祠 諭朕出

口巡幸觀田禾豐稔與與翼翼較去年秋成
相仿實為欣慰但道旁禾稼尚有未經收穫
者恐隨從人等稍有踐踏著加恩將經過州
縣地方本年應徵額賦蠲免十分之三著總
督那蘇圖詳悉確查妥協辦理 又諭據山
東巡撫阿里衮奏稱沂州府之蘭山郯城二
邑河道淤塞隄埝塌額為累年被水之由應

動帑疏築等語。疏築隄埝為利民之舉。且二邑河道淤塞。以致屢被水災。以工代賑。實屬應行。河務所關。須將上源下委審度周詳。然後可以興舉。著大學士高斌於江南查賑事竣時。便道查看。將應行疏築之處。悉心妥酌。勘實奏聞。○諭軍機大臣等。據安寧奏稱。金壇縣知縣馮觀民虧空一案。不能早為叅處。即係臣之咎。於題叅本內附疏聲明。將來馮觀民之虧空。不能完補。應於臣及藩司等各

名下分賠等語。此案屢經安寧批飭查叅。而王師等觀望不前。今安寧復行查出叅奏。著傳諭大學士本到之日。擬票安寧既經自行查出叅奏。免其分賠。如馮觀民不能完項。著王師等賠補之簽。○又諭今歲蘇松等屬沿海地方。猝被風潮。朕已屢降諭旨。緩徵加賑。并截留漕米。豫籌接濟。復命高斌查辦。今覽安寧所奏。坍塌房屋十萬餘間。淹斃人民一萬二千餘口。實非尋常災祲可比。大抵較雍

正十年潮災。相仿朕心深覺怵惕。更為憫惻。可傳諭大學士張廷玉。訥親。將雍正十年江南風潮所頒

諭旨內。如何特加恩恤。並有引過之旨。否。查明仿照寫旨。一面先行頒發。一面奏聞。如彼時未經奉有

特旨。可著大學士等詳悉斟酌。此次小民罹此大災。雖經屢頒諭旨。或更宜特沛殊恩。以甦民困。並應否用引咎責躬之辭。商酌妥協。繕寫諭旨。隨本速行奏來。尋奏江蘇潮災最重。已屢奉諭旨。多方接濟。籌畫周詳。茲更欲特沛殊恩。所有應行事宜。臣等俱於擬寫諭旨內。敘入恭候欽定。再查雍正十年江蘇被災所奉

諭旨。未載引咎之辭。此次似可毋庸添敘。報聞。○又諭近據大學士等議奏。明歲朕躬詣闕里。恐本處樂工於欽定樂譜未諳。派樂部太常寺員役前往演習應用。其告祭泰岱應用

樂工令樂部太常寺帶往應用等語現在太常寺卿李世倬前往查看但曲阜本處樂工於樂譜既有未諳即派在京人員前往演習仍須正其音字未免多費周折況泰山應用樂工既由京帶往則闕里亦不若即用在京樂工至孔廟佾舞之人仍由本處應用如此辦理似覺妥協可諭莊親王令其知之○賑恤甘肅伏羌安化合水環縣真寧鞏蘭金縣安定會寧寧遠等十縣本年分旱災飢民並予緩徵○賑恤雲南安寧楚雄廣通等三州縣本年分旱災飢民並予緩徵○是日駐蹕白虎溝○已丑

上詣

皇太后行宮問安○四川巡撫紀山奏軍營撥運倉穀例應買補但為數太多恐價昂貴請將撥運倉穀各州縣仍准收捐監穀陸續補還得旨著照所請行該部知道○是日駐蹕波羅河屯翼日如之○庚寅賜蒙古王公台

吉等宴○皇清文穎告成議敘提調以下等官加級紀錄有差

御製序曰我大清受

命百有餘年

列祖德教涵濡光被海宇右文之盛炳焉與三代同風朕紹聞遜志以是為學亦以是為治矢其文德一紀於茲易曰觀乎人文以化成天下蓋自有天地而人經緯乎其間士君子之一言一行國家之制度文為禮樂刑政布之為教化措之為事功無非文也乃其菁華所萃蔚為國華詞以般之聲以永之律以和之諧協六同彰施五色典謨作焉雅頌興焉詩不云乎追琢其章金玉其相文之盛也而賡之曰勉勉我王綱紀四方則所謂其風自上也曩我

皇祖命大學士陳廷敬選輯皇清文穎儲之延閣未及刊布

皇考復允廷臣之請開館編輯隨時附益久之

未竣朕因命自乾隆甲子以前先為編次。凡御製詩文廿四卷。臣工賦頌及諸體詩文一百卷。錄成序其首簡。昔之論文以代為次者。於漢則有西漢文類。唐則有文苑英華。唐文粹。宋則有文海。文鑑。元則有文類。明則有文衡。皆博綜一代著作之林。無體不備。今是編惟取經進之作。朝廷館閣之篇。與諸書小異。然以觀斯文風尚。當有取焉。在易渙之象曰。風行水上。善立言者。以為天地自然之文。而序卦受之以節。言文之不可過也。繼之以中孚。言有實也。節而不流。徵之以信。有典有則。可久之道。其在斯乎。朕孜孜典學。求所以善持之者。因以為摛文者鵠俾共勉云。吏部議覆。安徽布政使陳惠榮奏。稱向例教職。歷俸三年。准給假回籍省親。葬親。省墓。近來告假各員。每藉病遷延曠職。請嗣後假滿教職。果係抱病。准展限一月。逾限咨部開缺。至教官告假。既無任事之勞。請停食俸。並論俸遷轉。

時按日扣除等語。均應如所請。各省教官告假。該督撫將起程回任日期。報部陞轉時。照例扣除。如論俸應陞。尚未銷假。停其陞轉。俟回任後陞用。從之。辛卯。

上詣

皇太后行宮問安。諭軍機大臣等。刑部核擬直隸叅革涿州知州張德榮虧空一案。內稱張德榮例應擬斬。但虧空銀兩尚未追完。應請緩決等語。此等虧空案件。若因其未完。即請緩決。是未完者轉得邀緩決之恩。而全完者反抵於法。則侵欺之犯。惟以拖欠帑項為倖免之計。誰復將虧空之項完補。如此科斷殊非懲貪之意。或因定例全完之後。有減等之條。在此時定擬。亦不應如此聲說。可傳諭大學士張廷玉。訥親。令其查明。即向來相沿有此定例。亦宜改正。抑或另有情節。一併詳悉定議具奏。再傳諭該部。有似張德榮案情者。俱俟定議之後。遵照辦理。且今日部議奉。

天叅革知縣榮大成一案擬以斬候而未聲請緩決直隸張德榮案又聲請緩決今日蘇昌通本內將榮大成等四人現擬情實事同一例而辦理兩歧若以蘇昌所奏為是則那蘇圖所請緩決為非那蘇圖所奏為是則蘇昌所奏為非而該部亦迄無定語是豈弼教協中之意著一併問該部尋奏查雍正年間侵盜錢糧及貪婪各犯原有擬入情實奉旨勾到者嗣後辦理各案皆因例內載有分年減等逾限不完仍照原擬監追之語九卿於秋審時是以概入緩決查侵貪各犯法所難宥今年減等原屬法外施仁細繹例文限滿後仍照原擬監追如無力完帑題請豁免是銀兩無可著追而本犯仍入秋審自應按其罪名分別核擬概擬緩決似於定例未符但相沿已非一日非示以明文難以遵循請交大學士九卿將如何酌改之處會議具奏至刑部核擬直隸張德榮一案該部已經改正

進呈報聞○戶部議准湖南巡撫楊錫紱奏稱嗣後各州縣食米自行置買不得擅碾倉穀供應各該督撫不時密查倘有碾用等弊委員盤查查出將不揭報各上司一併叅處如已經揭報而該督撫不即題叅者照例議處從之○是日駐蹕中關○壬辰上奉

皇太后駐蹕避暑山莊至丙申皆如之○詣皇太后行宮問安遣官祭黑龍潭

昭靈沛澤龍王之神○戶部等部議覆漕運總督顧琮奏稱清理各衛屯田請定州縣衛所官弁處分一摺應如所請屯田典賣與民許旗丁備價回贖由衛所移明州縣令民收價退田倘州縣不即飭退照承查遲延例扣限查叅分別議處如該丁不即備價混控退田官弁未及詳查旋即更正者罰俸一年實係民地捏報軍田者官弁降一級調用旗丁責革再有倚恃書役隱佔軍田者官照失察

衙役犯贓例叅處役照侵盜官糧例治罪嗣後各省屯田如有影射侵漁等弊州縣衛所不即審結將該管各糧道一併題叅從之○刑部議覆貴州巡撫孫紹武奏稱定例四川棍徒勾通貴州奸匪將民苗肆行擄賣者為首立斬為從絞候如致死人命者為從亦斬候查向來案情不一請畧區別等語應如所奏凡貴州流氓勾通本地奸徒將民苗人等殺害擄其婦人子女販賣者無論已賣未賣曾否出境俱照強盜得財不分首從皆斬梟示其迫脅同行並在場未經下手於疏內聲明減為擬斬監候請旨定奪至殺一家三人以上者仍從重依殺一家非死罪三人律例定擬其用威力強綁及用計誘往四川等省販賣不論已賣未賣曾否出境為首者擬斬立決在犯事地方正法為從者擬絞監候其將被拐之人傷害致死者除為首斬決外為從擬斬監候若和同誘拐不論已賣未賣但

起行在途為首擬絞監候為從杖一百流三千里被誘之人仍照例擬徒再窩隱川販在家指引殺人捆擄及勾通誘賣藏匿子女者與首犯同罪若但窩隱護送分贓與知情窩留而未分贓者仍照舊例分別定擬從之○予故奉恩輔國公逢人祭葬如例謚恭恪○貴州上馬橋長官司方世雄緣事革職以其弟世傑襲職旌表守正捐軀之浙江樂清縣民陳景和妻王氏○癸巳諭本年七月十四日蘇松等處猝被風潮而崇明一邑受災為尤重朕前據安寧奏報深為憫惻即降旨諭令加意撫卹並截留漕米以備接濟又令大學士高斌留南查辦月餘以來憂心未嘗稍釋今續據安寧查報崇明一邑坍塌房屋漂沒人民甚多似此非常之災朕覽奏徬徨軫惻寢食為之不寧惟有速籌補救庶災黎得獲安全現據安寧奏報已撥運倉穀二十餘萬石並弛海口之禁俾商販流通米價不

致甚貴。則米糧一項似可無虞。惟是房屋坍塌。災民無棲身之所。況轉瞬即屆嚴冬。應速行給貲修葺。並於常例之外。量為加增。俾得從容措辦。至於來春播種。關係綦重。亟應借給籽種。及時耕作。亦令該督撫董率有司。豫行經理。又思崇邑被災既重。縱使賑卹多方。元氣不能驟復。所有該縣應徵明年地丁錢糧。特沛殊恩。全行豁免。至本年未完地丁。以及折徵漕項。併歷年帶徵緩徵銀兩。概予停緩。其綠旗兵丁。朕已加恩一體撫卹。但念伊等廬舍人口。同被災傷。雖經安輯。未免拮据。著再加恩。各賞給一月錢糧。以資用度。至寶山鎮洋各處被災。次於崇明。輕重不等。其應如何賑卹。加恩之處。著大學士高斌會同督撫悉心酌議。無拘常例。妥協辦理。務使凋瘵復蘇。登災黎於衽席。以副朕夙夜焦勞。怵惕靡寧之意。該部即遵諭速行。○甲午。命原任布政使安圖辦理北路軍營糧餉事務。乙

未。諭軍機大臣等。據玉保奏準夷熬茶來使。先遣阿喇布扎報知。伊等至塔里木河。因水大難渡。不能如原約。於八月十五前後到來。緣由。又詢問此處現派大臣幾員。領兵若干。駐劄何處。各情由。看其光景。似有疑慮等語。此次準噶爾進藏熬茶。諸事皆允其所請。又係伊等從前經過之事。理宜無所疑慮。玉保此奏。亦甚含糊。並未詳悉聲明。著即傳旨詢問。若因伊遲誤約期。豫先遣人來報。即料其有疑慮。玉保尚屬曉事人。不應至此。或準噶爾人等違背約期。自知食言。遂有掩飾之意。玉保即從此生疑。亦未可定。務將實在情形。明白速奏。以便豫行辦理。朕思準噶爾人等素行詭詐。難以憑信。近又新襲台吉。或借赴藏緣由。窺我邊界。且進藏熬茶。離青海甚近。藉端謀襲青海。亦不可不慮。及凡一應豫備防範之處。即令玉保會同地方大員密行商酌。設法辦理。倘伊等本無疑惑之形。而內地

稍露張皇之意反致伊等疑懼則更大有關係此事已令大學士慶復暫住陝西豫行籌辦凡應行會商之事就近密商妥辦仍俟玉保覆奏到日再行酌量並將此旨寄慶復知之又諭據侍郎玉保奏稱準夷熬茶來使於中途遣阿喇布扎前來告稱伊等至塔里木河因水大難渡將約定八月十五日期不能到來緣由先行報知又詢問此處現派大臣幾員領兵多少駐劄何處各情形看其光景似有疑慮等語準夷如何疑慮之處具奏不明已降旨詢問玉保著將此摺抄寄大學士慶復閱看準夷向來不可憑信策妄多爾濟那木扎勒新襲台吉往藏熬茶離青海甚近藉端謀襲青海亦未可定自應防範豫備現在玉保止領兵丁四百名提督李繩武遠在安西總督張廣泗又駐軍營西寧等處並無大員設或偶生事端亦屬可慮前令大學士慶復回京必取道於陝西此時如已起程

即令在陝西暫住靜候玉保信息就近將一應豫防事宜暗為備辦設有事端一面具奏一面辦理然不過先事豫籌之計務宜加意慎密斷不可令夷使等稍有知覺反生疑惑即內地人等亦不可稍露形迹致令泄漏候應令伊回京時候朕降旨再行回京戶部議覆綏遠城將軍補熙等疏稱清水河所屬時和豐家室盈等里田苗間被雹傷被災地畝應徵銀米請分別蠲免帶徵舊欠錢糧亦請展限一年於來歲徵輸如有無力貧民來春酌借口糧籽種等語均應如所請得旨依議速行○豁除浙江嚴州所衝廢田地二十一畝有奇額賦○賑恤安徽歙縣黟縣績溪宿州靈璧虹縣五河等七州縣並宿州一衛本年分水災飢民○賑恤河南通許鄆陵中牟陽武封邱蘭陽鄭州商邱寧陵永城鹿邑虞城夏邑睢州考城柘城上蔡西平淮寧西華商水項城沈邱太康扶溝臨潁鄆城等二

十七州縣本年分水災飢民○賑卹山東齊河齊東濟陽禹城臨邑長清陵縣德州德平原德州衛泰安肥城新泰萊蕪東平東阿平陰惠民青城陽信海豐樂陵商河濱州利津霑化蒲臺滋陽曲阜寧陽鄒縣泗水滕縣金鄉魚臺濟寧嘉祥汶上陽穀壽張濟寧衛東平所河澤定陶單縣城武曹縣鉅野鄆城濮州范縣觀城朝城蘭山郟城費縣蒙陰沂水聊城堂邑博平茌平清平莘縣館陶臨清高唐恩縣夏津武城東昌衛臨清衛益都博興高苑樂安壽光昌樂臨朐安邱諸城掖縣平度昌邑膠州高密等八十七州縣衛所本年分水災電災飢民並予緩徵○旌表守正捐軀之湖北隨州民王宏文妻杜氏○丙申賜扈從諸王大臣等宴○諭閩省請開海島以廣民業一案茲據喀爾吉善陳大受奏稱各島田園無幾若議開闢於民食終無所濟轉於海防大有未便現在紳士不候查勘定

議先貼告條招令漁佃諸人向其批字方許耕種顯欲包收重利節次委員查勘實在有損無益等語從前議開島嶼周學健原因民食起見是以未詳查而奏請茲經該督撫查出情形實由紳士圖利借開墾之名以為霸踞之地既與民食毫無所補著照舊嚴禁永行停止紳士受國厚恩必持躬端謹遵循禮法始足為鄉閭之表率豈可不知檢束惟利是圖其佔踞開墾遍貼告條之紳士內進士舉人等不思讀書自愛居鄉多事已屬不合然猶可諉曰未登仕籍若原任郎中李德絢庶吉士李修卿孫拱極侍衛林明知縣施廷瓚俱已身列職官理宜安分守法而踰檢貪利如此甚屬卑鄙俱著交部察議具奏以福建建寧鎮總兵蕭琅臺灣鎮總兵陳汝璉對調 丁酉

上奉

皇太后自避暑山莊迴鑾 詣

皇太后行宮問安

上行圍 諭朕至湯山王大臣等前來接駕時大學士張廷玉年逾古稀湯山距京尚遠看其精神可來則來不可稍有勉強在京接駕亦同一體著傳諭王大臣等酌量之是日駐蹕喀喇河屯翼日如之戊戌戶部議准四川巡撫紀山疏稱涪州額引不敷請增水引二十九張應徵稅銀自乾隆十二年為始按數徵收從之己亥

上行圍 諭據巡撫阿里衮奏稱山東被水州縣衛所已照例先行撫卹東省動用穀石多未買補明春青黃不接之時需用米穀實屬浩繁除撥運薊糧四萬七千餘石關係陵糈仍照例起運外下餘漕糧請全數截留以資賑濟之用等語該省被水災黎朕心深為軫念將來賑卹需米自多著將本年應徵漕糧及應運薊糧一併截留以備賑糶之需其陵糈應用米石仍交與直隸總督那蘇圖於八

溝採買米石內照數運往山東巡撫阿里衮奏今歲東省因六七兩月雨水過多窪地被水甚眾其撫卹口糧及出借麥本等項銀穀兼資現在藩庫無項可動請將乾隆十一年地丁銀兩扣留本省以資賑務得旨著照所請行該部知道是日駐蹕常山峪庚子川陝總督張廣泗奏大金川地勢尺寸皆山險要處皆設碉樓防範周密鎗礮俱不能破應用火攻現派弁兵多砍薪木堆積賊碉附近臨攻時各兵齊力運至碉牆之下舉火焚燒再發大礮易於攻克各路行之已有成效得旨看此則奏凱尚需時日何能慰朕西顧之憂哉是日駐蹕兩間房○辛丑

上詣

皇太后行宮問安○諭軍機大臣等前據張廣泗奏報大金川情形雖未大勝而連破番寨去刮耳崖僅二十里似乎不久可以成功朕方望捷音之踵至乃此次所奏以賊碉所踞

俱在絕險。攻克頗難。並未言及刮耳崖如何進取。是奏凱尚需時日。伊前後奏報相隔不過數日。而情事各異。即奏到之日。亦遲速不同。且此次未與大學士慶復會奏。即慶復接到令其來京之旨。已經起身。彼即應奏明。慶復既未奏聞。而張廣泗此摺亦未聲明。著傳旨詢問。至所奏查訪班滾踪跡。其未死可知。從前以其焚燒自縊。朕即謂其情節可疑。焉知不詭計免脫。潛往大金川勾通致釁。今查奏如此。則班滾之潛逃。舍大金川而何往。伊既附賊酋。必教之謀逆。勾結黨援。衆番聳聽。是以螳臂自恃。敢於跳梁。蓋番性難馴。又多狡獪。雖各分門戶。而聲氣相通。鬼蜮之伎。隨在皆有。即如郭羅克之後。則有瞻對。又繼之以金川。即崇喜土司之仇殺。雖為穴中之鬪。亦係啟釁之端。若瞻對辦理妥協。何至復有金川等事。即裡塘土司汪結。於征瞻對時。効力著有功績。為大學士慶復所任用。今覽張

廣泗所奏。王懷信供詞。上年汪結授為土司。班滾亦差人到汪結處投哈達道喜。則其心懷叵測。番衆之暗傳聲息。從可知矣。且據昔什綽所供。汪結做中班滾的兄弟。俄木丁投降了叫班滾逃往別處去。益可證班滾之始末。汪結咸知。則汪結蓋一陰巧小人。彼既外示出力於我。而內仍不使班滾怨彼此。乃番蠻兩下獲利之巧智。而慶復特墮其術中。而不知耳。將來此人。須另有一番處置。方可。今汪結現在軍前。尤宜事事密為留意。不可稍露機宜。致彼生疑。而蹤跡班滾之事。尤不可付之此人。也。總之。此次用兵。非小小克捷。懲創於目前。所可了事。必須統計金川番情。大為籌辦。實足以懾服諸蠻。為一勞永逸之策。方不至事久復有蠢動。若此時稍有遷就。以圖速成。將來辦理愈難。反不若無此役之為得計矣。金川之役。興師運餉。勞費已煩。且天氣漸寒。正宜乘時勦滅。以奏膚功。上年瞻對

出師朕屢加督策始得結局茲以張廣泗嫻於師旅一以委之自無煩西顧之憂是以未屢頒旨訓飭今看尚無奏凱之期又不能不厯懷矣若班滾果在金川則殄滅醜類擒獲逃首一事而成兩功全在此舉可傳諭張廣泗令其審度機宜速殫智勇籌全制勝永靖蠻氛以副朕特用之意瞻對乃前車之戒不可蹈也○又諭現在征勦金川不過與前此辦理瞻對相仿並無善策如所奏攻擊碉樓

惟開挖地道施放地雷已為衆番所熟悉不知用兵之道豈必專仗火攻即碉樓亦僅止一隅何若相度地勢或斷其糧道或絕其水路使之坐困諒無不斃之理張廣泗於此等俱未籌及朕意興師已久尚未奏凱綠旗兵丁不足取勝與其日久而師老不如選京師旗兵之精銳一以當十汰綠旗之間冗以省無用之費益勁旅之資若功成迅速較目前為尤省也且張廣泗以旗人管旗軍料亦無

掣肘之處但是否應如此傳諭張廣泗著大學士等再行詳悉酌定具奏○是日駐蹕要亭○壬寅

上詣

皇太后行宮問安○

上行圍○諭江西武備遠不及他省乃人所共知是以於該撫奏事之便言及令二總兵明白回奏高琦奏到時降旨交部察議者蓋因高琦莅任三載全無整頓非如岳鍾璜之到

任未久者批知道了而可以不必交部察議也該部惟應按例以定處分乃復議交該督詳查自來已降旨察議之人有如此辦理者乎殊屬違例邀譽著將該堂官交部嚴察議奏此本發還另議具奏○諭軍機大臣等據江西巡撫開泰奏稱委員領解川省餉銀抵湖北宜昌府屬之巴東縣該縣將鞘銀落歇空寺無故稽留且虛填夫數玩公慢事或解員有無別情現在俱移咨楚省飭查等語撥

解餉銀最關緊要。自宜加謹防護。依限接解。乃地方官似此拖延玩忽。甚屬不合。著傳諭湖廣總督塞楞額。伊何以未行參奏。今既江省飭查。令其秉公確查。據實具奏。毋得瞻顧。○是日駐蹕密雲縣。

大清高宗法天隆運至誠先覺體元立極敷文奮武孝慈神聖純皇帝實錄卷之二百九十八

大清高宗法天隆運至誠先覺體元立極敷文奮武孝慈神聖純皇帝實錄卷之二百九十九

監修總纂官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理理吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一丁慶桂世襲騎都尉軍功加十九級隨帶加二級又加二級巨靈浩內大臣戶部尚書錄星滿洲都統軍功紀錄五次尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十二年丁卯九月癸卯

上詣

皇太后行宮問安。諭軍機大臣等據德沛自山西回奏稱自萬泉安邑之後復有似此者。四案皆已從嚴辦理。朕詢以山西民風既如此。刁囂何阿里衮在彼時未聞有一案而彼一離晉省便有如此之多乎。德沛奏稱阿里衮在彼時已有九案內六案皆外結存案。其三案則以大化小。以小化無。亦並未存案等語。朕聞之駭然。既有如此多案。阿里衮何無

一言奏及而到京見朕時亦未面陳也似此隱諱在他人尚且不可豈阿里衮亦為此乎或因地方有此不法之事隨宜外結可以不煩朕心彼愚民無知豈喻此意轉以憲章為不足懼而輕犯走險豈除奸去暴防微杜漸之意哉即萬衆一案未必非因此而起總之已往之事朕已不咎即屢降諭旨訓誨者亦不因山西一任辦理有所未協今伊在東省事務較晉省更繁而齊東椎魯之風更甚於山西若仍以處山西者處山東是更增朕之憂慮矣彼不比他人豈不思朕用人顏面乎○工部議覆浙江巡撫常安疏稱浙省原設便民船一百隻日久朽爛現存四十隻亦已損壞亟應修造請再添造十隻等語查便民船現存四十隻承應差務並無貽誤應令該撫將現存船隻動項修造所請添造十隻之處無庸議從之○以故五經博士冉天琳之子冉上成襲職○以頭等侍衛烏丹為杭州

左翼滿洲副都統 貴州巡撫孫紹武疏報南籠鎮寧獨山甕安青谿等五府州縣開墾額外額內田地共三百九十二畝有奇○是日駐蹕南石槽○甲辰

上詣

皇太后行宮問安○諭曰彭維新陳惠華現在議處候旨兵部漢堂官辦事乏人著內閣學士莊有恭署理兵部侍郎即速進署辦事○定邊副將軍額駙策凌奏本年七月內有準噶爾烏梁海杭噶勒投誠前來經臣等詢問伊逃來時與一蒙古台吉額倫同逃額倫已被人拏回伊一人步至邊卡已遵旨阻回嗣後除即行阻回者無庸另議其有畏本處治罪不肯回巢者臣等難以辦理請酌量照前收留俟夷使進貢來京時將不容留逃人之處曉諭準噶爾台吉彼必愈加感激臣等亦得遵循辦理得旨此次投誠之杭噶勒其情節並不與巴雅爾相似乃遽令阻回辦理殊

屬拘泥嗣後有似此及必不願回巢者仍著收留安插○是日駐蹕湯泉翼日如之○乙巳

上詣

皇太后行宮問安○諭軍機大臣等前因山東被水地方賑借需米曾將奉天米石可否運往東省接濟之處詢問達勒當阿等據奏奉天地方被災現在米價昂貴不能接濟東省續因降旨截漕足敷備用又經阿里衮奏明

中書奏奉天

四

中書奏奉天

五

停止今據蘇昌奏報奉天各屬得雨後秋收豐稔米價自應平減而東省萊州等處被災較重正須賑貸之用可傳諭達勒當阿蘇昌令其就本處情形或可得十萬石或數萬石由海道運往東省於災地甚屬有益如果可行其作何運往之處即一面辦理一面奏聞仍知會山東巡撫若不能得米即不必知會山東惟將情節奏聞尋奏奉省今年秋收在七分以上糧價漸減辦米接濟山東於奉省

旗民日食不致有虧現擬辦十萬石即雇船先運三萬三千石赴萊州府交卸餘米咨明山東巡撫令於來春撥船赴奉領運下部知之○又諭據大學士高斌奏稱江蘇煩劇重地書役之侵蝕飛灑百弊叢生牢不可破誠恐察弊既滋擾累而察出一弊將更轉增十弊不惟無益而且有損雍正年間清查滋擾固是辦理者之奉行不善今次之清查恐亦不能即謂妥協聞此際已有書役侵蝕畏罪不能自完仍免糧戶代為應承實欠重出完納者甚多是小民現今已受重完之累而蠹蝕仍未能清紛擾多端難於枚舉至所謂書役者約言若無多人其實一邑中其類何止數百蓋書則有經承書辦清書役則有原差快役以及圖書里書排年里長等類實繁有徒而所謂紳衿者其中賢愚優劣固有不齊但係一邑一鄉之望且南邦讀書者多尤宜養其廉恥導之以禮而書役雖賤與小民同

類今皆不能無擾而此中畏罪之徒奸匪之
蠹遇事風生拖累無辜牽連良善之處亦所
不免以致民情惶恐竊以安民首在察吏今
江蘇繁劇之州縣宜慎選精明強幹之員俾
久於其任令督撫面行曉諭清查積欠一事
原屬應行加意剔釐蠹弊懲一儆百不時體
察從容妥辦須用寬嚴相濟積欠原應新舊
並徵於設法催科之中寓勸導撫字之術其
人如果清勤廉幹人地相宜准督撫保題陞
則陞銜降亦留任雖未能責效於目前亦可
澄清於久遠其現今派令清查多員可否漸
次撤回等語清查江蘇積欠一事原始於安
寧屢次陳奏經大學士等議行者原以杜書
役之侵蝕俾拖欠積習可以悉除而於民間
不致滋擾今既有稱安寧辦理未協者尹繼
善為本省總督何以視若無涉未行奏聞或
者此奏所言有未盡然耶可傳諭尹繼善令
其將所奏情節詳查明白據實奏聞並將高

斌覆奏摺抄寄大學士訥親閱看令其作速
寄交愛必達將摺內情節是否如此密行詳
查據實具奏○大學士等議覆欽差大學士
高斌兩江總督尹繼善等奏稱查勘六塘沐
河工程因前築土堰尚欠高厚以致衝漫應
請將六塘河險處堰底加寬二丈次衝亦加
寬二丈其餘地勢低窪者酌量加高二三尺
沐河南北兩岸土堰亦應分別加高培厚宿
遷桃源兩縣屬之縣東湖邊等處形勢兜灣
應將河身挑直大興集上下舊堰尚有逼近
河身者應向高阜處展開建築磚井王家莊
等處河內俱有磯心大灘應切去灘嘴又駱
馬湖之尾間有永濟石橋一座過水處太窄
應接建石橋四十丈上下開挑引河一道請
動項興修再此項堰工原為保護民田嗣後
應於每年農隙令里民按田出夫將殘缺處
酌量修補水發時地方官督率居民協力防
護各等語均應如所請辦理得旨依議速行

○丙午。

上詣

壽皇殿行禮。○奉

皇太后還宮。○詣

皇太后宮問安。○

上還宮。○旌表守正捐軀之江蘇山陽縣烈女

李氏。○丁未。

上詣

皇太后宮問安。○大學士等遵旨覆奏用兵之

道原非專仗火攻。前奉諭旨。或斷其糧道。或絕其水路。使之坐困。允合機宜。至選旗兵之精銳。汰綠旗之間冗。在京師旗兵較綠旗自屬勇往。但此番金川用兵。舉動措置。較前次瞻對之役。似為上緊。據張廣泗奏稱。征兵去刮耳崖僅二三十里。則就現在情形而論。已經扼其險要。如派京兵前往。即以一當十。數亦不少。目下天氣漸寒。道途遙遠。非若前次派往瞻對。止數十人。易於料理。且旗兵自京

抵營約須三兩月之久。中間或已就破滅。或已經圍困待斃。俱未可知。且可無庸傳諭張廣泗也。報聞。○以河南按察使舒輅為安徽布政使。江西南贛道富明為河南按察使。○致仕太子太保大學士查郎阿遺疏聞得旨。查郎阿患病溘逝。知道了。該部知道。○以故奉恩輔國公吉存子特通額襲爵。戊申。諭曰。吏部侍郎德沛著在阿哥書房行走。○諭軍機大臣等。聞江蘇清理積欠。此際有書役侵蝕畏罪。不能自完。仍浼糧戶代為應承。實欠重出完納者甚多。以致人言藉藉。清查弊竇固難免議論。但原以除弊而所聞果實則是辦理猶未盡善。此弊尤宜釐剔。從前糧戶完納之時。多有轉托吏胥代為輸將。而奸胥蠹吏暗行侵蝕。在所不免。此次清理。若仍按糧戶追納。小民有重完之累。著傳諭安寧。此項積欠內有係吏胥侵蝕者。應向吏胥查追。不得任其狡飾。仍向糧戶重科。務須加意稽

查妥協辦理。○吏部議奏。兵部議處江西南昌鎮總兵高琦廢弛武備一案。違例邀譽。應將尚書彭維新左侍郎鄂容安。陳惠華照例革職。得旨。兵部議處高琦一案。違例邀譽。並不遵旨察議。部中從無似此辦事之理。將該堂官等交部嚴加察議。昨至湯山。侍郎鄂容安在中途內廷班次接駕。因召至面前降旨訓飭。原因彼係滿堂官。且現掌部印。應於彼是問。是以至九卿接駕之地。不復問彭維新。陳惠華也。且二人向日即旅進旅退。無所可否。亦不足問也。設其當問。即似鄂容安馬前訓飭。有何不可。乃由湯泉回至行宮時。九卿立班侍駕。而彭維新。陳惠華獨不在班。指名尋覓良久。始至。據稱為關防所阻。則九卿在班者甚衆。年高如劉於義。並未被攔阻。何獨伊二人。其將誰欺。此乃伊等知朕訓飭鄂容安。懼而避匿。人臣敬君之道。有是理乎。若恐朕以待鄂容安之道待之。即謂有失大臣之

體。伊不能受。則此心益不可問。其罪更不容誅矣。前代廷臣有挂冠徑去者。此乃綱紀凌替所致。我朝天澤明而名分肅。豈容有此。況彭維新。曾罹重譴。起自廢籍。復以居憂赴任。為言官所劾。廷議革職。陳惠華因伊弟陳惠正有議處之案。具摺奏辯。竟匿不上聞。亦經部議革職。朕皆棄瑕錄用。而伊二人平日居官。不過庸碌備位。全無奮勉之意。今遇此等些小罪譴。輒如此存心規避。若更加窮詰。則其罪益無可容。姑免深究。彭維新。陳惠華著照部議革職。鄂容安從寬革職留任。○己酉上御乾清門聽政。○兵部再議江西南昌鎮總兵高琦到任三載。並不盡心訓練。以致武備廢弛。及奉旨詢問。徒以兩次出巡。朦混覆奏。應照廢弛營伍例革職。得旨。高琦著革職。從寬留任。○湖北巡撫陳宏謀疏報蘄州衛開墾下則屯地七頃三十三畝有奇。○庚戌定侵貪犯員罪名。諭人臣奉公潔已。首重廉隅。

貪婪侵盜之員。上侵國帑。下朘民脂。實屬法所難宥。是以國家定制。擬以斬絞重辟。使共知儆惕。此紀綱所在。不可不持。

皇考世宗憲皇帝懲戒貪墨。執法不少寬貸。維時人心儆畏。迨至雍正八年。因吏治漸已肅清。曾

特旨將從前虧空未清之案。查明釋放。此其明驗也。朕因見近來各省侵貪之案累累。意欲早為整頓。庶其懲一而儆百。不致水濡而寬難。特命大學士等查明原委。雍正年間秋審朝審案內。侵盜及貪婪各犯。奉

旨勾到者八案。擬入情實未經勾到者八案。雍正六年各省勾到。惟朝審未勾。內有擬入情實者五案。又歷年貪婪立決。未待秋審者二案。是侵盜貪婪之犯。秋審時原有擬入情實奉

旨勾到者。及詢以今何以率入緩決。以致人不畏法。侵貪之風日熾。則不能對。蓋因例內載

有分年減等逾限不交。仍照原擬監追之語。至秋審時概入緩決。外而督撫。內而九卿。法司。習為當然。初不計二限已滿。既入秋審。自當處以本罪。豈有虛擬罪名。必應緩決之理。即在本犯。亦恃其斷不擬入情實。永無正法之日。以致心無顧忌。不知立法減等。原屬法外之仁。至限滿不完。則是明知不死。更欲保其身家。此等藐法無恥之徒。即應照原擬明正其罪。嗣後此等二限已滿。照原擬監追之犯。九卿於秋審時核其情罪。應入情實者。即入於情實案內。以彰國法。朕於勾到日。再為酌奪。其如何分別酌核之處。著大學士九卿悉心妥議。速奏。尋議凡侵貪案犯。二限已滿。察其獲罪之由。如動用雜項。及那移核減。一應著賠。作為侵欺。並收受借貸等款。問擬貪婪。迨監追後急圖完公者。量擬為緩決。若以身試法。贓私累累。至監追二限已滿。侵蝕未完。尚在一千兩以上。及貪婪未完。尚在八十

兩以上者。秋審時即入情實。請旨勾到。從之。
諭各省進呈題名錄內。開列各官銜名祇。
應開注籍履歷。乃有兼寫表字別號者。殊。
非進呈之體。著通行傳諭禁止。兵部議覆。
兩江總督尹繼善疏稱。邳州趙村驛額馬三。
十匹。不敷承應。且西至東岸驛甚遠。須設腰。
站。請於利國東岸二驛內抽馬三十匹。夫十。
八名。增給趙村本站。並添設單家集腰站之。
用。又古城驛原設馬四十匹。山陽縣原設馬。
九十一匹。此二驛路當極衝。支應竭蹶。請於。
金陵江東姑蘇平望桃山五驛內共抽馬三。
十九匹。夫二十八名。增給古城馬二十匹。夫。
十六名。山陽馬十九匹。夫十二名等語。均應。
如所請。從之。翰林院檢討陳兆崙充日。
講起居注官。辛亥。

上詣

皇太后宮問安。幸瀛臺。諭軍機大臣等各。
省督撫開報米糧價值。用以驗年時之豐歉。

審民食之盈虛。必當確核時值。據實入告。固。
不可。故為減少。亦不得有意加增。前曾降旨。
令將價增價減之處。比照上月填註。原欲知。
實在情形。乃近見各省所報。大抵多稱價貴。
有連年豐稔。而僅開價中。或仍開價貴者。豈。
通屬竟無價賤之處。歷歲總無價賤之時。即。
一府一縣之中。豈無上月價昂。下月價減者。
蓋緣督撫所奏。悉據州縣開送。地方官若照。
實價申報。則採買時不得浮開。是以豫為之。

地。此亦情理所有。不知奏報稍有不實。則民。
生之盈絀。必致壅於上聞。非朕勤恤民生之。
本意。嗣後各督撫務必隨時確訪。實在市價。
不得一任屬員隨意開送。又不可因朕此旨。
有意將米價裁抑。少開。以圖粉飾。古太師陳。
物價以觀民風。漢刺史問羊得馬。民不敢欺。
傳稱循吏。况六府八政。首重穀食。是曰民天。
其亟加之意。毋偽毋隱。俟奏事之便。傳諭知。
之。以河南南陽鎮總兵成元震甘肅河州。

鎮總兵金貴對調。湖廣襄陽鎮總兵齊大勇陝西興漢鎮總兵改光宗對調。○壬子。

上御太和殿視朝。文武陞轉各官謝恩。○諭江南鳳潁泗三屬頻年被災。所有借給籽種口糧銀米。曾經降旨。將乾隆六七兩年借項。於丙寅戊辰二年分還。乾隆十年借項。於己巳庚午二年分還。但上年該處復被偏災。今歲又值蠲免停緩之年。若於戊辰年全行催輸民力。未免拮据。著加恩。將從前分年帶徵之項。分作戊辰己巳庚午三年。按限徵還。八九兩年借項。亦於此三年內帶納。其十一年出借之項。著緩至辛未年催徵。該督撫等務須轉飭屬員妥協辦理。以副朕體恤災黎之意。該部遵諭速行。○兵部議准。湖廣總督塞楞額疏稱。澧州營所轄自岩地。墻至宜都營。計程一百四十餘里。未設塘汛。請撥施南協戰兵七名守兵三十名。歸宜都營添設五塘。每塘安兵三名。共十五名。餘二十二名。添入城汛。從

之。○賑貸河南許州本年分水災飢民。○甲寅。

孝慈高皇后忌辰。遣官祭福陵。○

上御懋勤殿。勾到雲南貴州情實罪犯。停決雲南斬犯二人。貴州斬犯六十一人。絞犯一人。餘五十人予勾。○諭據山西巡撫準泰奏稱。晉省辦銅鼓鑄。尚須白鉛點錫。應委員赴楚採買。一時不得其人。請飭發叅草河東道周紹儒出資前赴採買。効力贖罪等語。周紹儒聞聃無能。貽誤地方。現在照例治罪。既據準泰保奏。著照所請。將周紹儒發往晉省辦理。鉛觔以贖前愆。○諭軍機大臣等。據直隸總督那蘇圖奏。稱山東被災。有攜眷單身貧民前往口外熱河等處投親種地覓食。經由直隸地方。其中不無有衰老孱弱者。時屆寒冬。請於通州總路派員設廠。將東省衰老孱弱貧民日給通倉色米留養等語。朕思東省與

直屬接壤其出外覓食之人經過地方遠近不同亦不止通州一處若於通州設廠雖倉廩近便而路遠不及抵通之貧民無由覓食且貧黎聞有此信勢必奔赴來通將來聚集多人轉恐派員料理未能周到不若於直屬附近東省州縣遇有前來覓食貧民隨其所至地方就近收養酌給口糧以度隆冬俟春和資遣回籍可傳諭那蘇圖董率屬員妥協辦理○又諭貴州省余成龍案內未勾之黃

忠義等四十三犯俱著牢固監禁行刑時不必一同綁赴市曹蓋人數既衆恐致別生事端且雖同在叛案之中而情罪輕重各異愚民無知見其往而復返轉生玩法之心不足示儆可傳諭孫紹武知之其馬玳案內二十三犯內有情罪稍輕九犯及年七十以上五犯俱從寬免勾其行刑時仍照例綁赴市曹務令嚴加防範○大學士等議覆兩江總督尹繼善奏稱江蘇潮災最重貧苦兵丁除本

身不准入賑外家口請一體給賑等語查江蘇災地兵丁已疊頒諭旨與齊民一體撫恤又賞給一月錢糧該督尚未奉到是以奏請賑濟應令該督遵旨悉心查辦如撫恤並賞給一月錢糧之外尚有應行接濟之處再行奏明辦理得旨依議速行○閩浙總督喀爾

吉善奏浙江巡撫常安貪劣各款一收受前任海鹽縣知縣周宣猷金三百兩保陞嘉松分司一收受候補分司陳柱銀二千兩許補周宣猷題陞遺缺又收受周宣猷每年養廉鹽規之半一信任東塘同知劉晏諸暨縣丞張治屢委署府縣各缺一剋扣心紅紙劄及書吏飯銀二千餘兩一各所掣鹽並不親行掣驗一勒索鹽政衙門承差規禮一剋扣兌鹽及秋審跟役飯錢一扣存淨慈寺工銀一勒索海關書吏規禮一收受墅河米牙規銀許增賣價一縱容家人賒取各鋪人參金珠等物不給價值一海塘効力人員朦混咨

部得官得旨。據閩浙總督喀爾吉善奏。浙江巡撫常安貪婪種種。常安著解任。命大學士高斌會同顧琮前往浙江查審具奏。摺款併發。浙江巡撫員缺。即著顧琮補授。總漕員缺。著蘊著補授。○賑卹山西襄陵。太平。永濟等三縣水災。電災。飢民。並予緩徵。○乙卯上詣

皇太后宮問安。○諭山東被水之齊河等州縣。成災加賑。有因倉糧不敷。銀穀兼賑者。定例每穀一石折銀五錢。但思東省連歲歉收。今年被災亦非尋常可比。現在糧價高昂。照例折價恐不敷購買。所有加賑口糧。著加恩於每石五錢之外。增銀一錢。折給俾窮黎得資接濟。此出格外特恩。不得引為成例。該部遵諭速行。賑卹兩淮。呂四。餘東。餘西。金沙。西亭石港。掘港。豐利。角斜。拼茶。伍祐。新興。劉莊。廟灣。丁溪。草堰。小海。板浦。中正。臨洪等二十場。本年分水災。竈戶並予緩徵。是日起

上以孟冬享

太廟。齋戒三日。○丙辰。

孝敬憲皇后忌辰。遣官祭

泰陵。○戶部議覆。四川巡撫紀山疏稱。籌辦進

勦金川事宜。一。川省出征官兵。借給製備行

裝。馱載銀。一。舊鑄新鑄及靖蠻各礮。須雇內

地長夫運送。支給工食銀。一。出師官兵。支給

鹽菜口糧。一。口糧每日支米一升。一。派調候

補員。并支給行裝鹽糧。派調土兵。支給口糧

鹽菜銀。一。各處土兵除已經派調外。有情願

添助並出力復仇者。支給鹽菜口糧銀。一。漢

土兵丁口糧。願支折色者。照例以米麪腳價

合算。隨地支給。一。總督張廣泗親赴軍營。從

行書吏。支給鹽菜口糧。漢土兵丁折給牛羊

犒賞銀。一。出師官兵糧餉。應先籌辦。一。軍營

裏帶炒麪。應設法採辦。一。輓運夫役腳價。按

日支給口糧。一。西南兩路進兵。糧餉宜分路

辦運。一。西南兩路各員月費口糧。並帳房鐸

鍋騎馱等項。分別支給。一官兵雇用通譯斗級倉夫。並派聽差外委兵丁。除領兵將弁。於征兵內撥用。餘分別支給工食口糧。騎馱盤費脚價。一總督張廣泗隨營遣用官四員。所需月費口糧。騎馱鐳帳房。分別支給。又選外科醫生二名。支給騎馱口糧。一雜費賞賚銀。議給備用。一解送餉銀。分別支給需用銀。並酌給帳房。一動支賞賚銀。製辦賞號物料。一西南大小土司迎謁需用賞號。兼收撫被

擄窮番。請照贍對案。例於道庫動支銀五百兩。製備。一統運軍糧。應酌定折耗。一安設軍臺。一遇害兵丁夫役人等。宜給搬骸夫馬。均應如所請辦理。得旨。依議速行。○丁巳諭軍機大臣等。前據張廣泗奏報。辦理大金川情形。及今又經逾月。尚未見奏捷音。想該督嫻於軍旅。熟諳機宜。必使實奏膚功。是以相持許久。若如李質粹等從前辦理。贍對之草率了事。早可告竣矣。但前據該督奏稱。戰礮險

絕。難以猝攻。而班滾狡詐潛逃。暗為勾結。近據紀山奏。亦復相同。必須徹底殄除。方無貽患。如此時已經搃穴殲渠。誠為盡善。若尚需時日。則彼處地近雪山。朕思際此冰霜嚴冷。我師屯聚。誠恐墮指裂膚。難於取捷。或且暫行退駐。向陽平曠之地。令得稍為休息。俟氣候融和。再加調官兵。厚集軍威。以成一舉掃除之計。其應行防範之處。務當嚴密周詳。無令乘機兔脫。全在該督算計萬全。可諭令該

督酌量。現在進剿機宜。妥協辦理。至善後事宜。前曾令該督按度全川形勢。大為籌辦。但思若仍歸伊等土司。不過奪彼與此。終易煽惑。殊非長策。因思彼處地隣西藏。來往之所必經。若即歸入西藏。令王子朱爾默特那木扎勒。就近管束。受達賴喇嘛化導。其一應鈐轄稽查。悉令王子派頭目前往經理。以專責成。現有駐藏大臣總轄董率。足資彈壓。如此則西疆藏路。俱可永遠寧謐。不致勞動官兵。

蓋伊等原係番回種落雖殊情形相類以番治番較為妥便。若謂道遠難於遙制則青海部中尚有達賴喇嘛徒衆可見番回同類遠近無分比之設屯置衛非可同日而語。該督其善體此意悉心籌畫妥酌以聞。蜀中土目碉寨星羅悉在幅員之內非緬甸等越在外藩可比。即如昭通古州等當時始事未嘗不大費經營而迄今遂成樂土成效具在並非黷武窮兵勞師勤遠之謂。此番徵兵轉餉業

平定奏三言二九

三言

已不貲即使莎羅奔與班滾實在並獲亦不足償。且欲使邊省兵民永安社席正不得憚於勞費其經理得宜惟該督是任可傳諭知之。以福建巡撫陳大受為兵部尚書。調安徽巡撫潘思榘為福建巡撫以廣東布政使納敏為安徽巡撫安徽按察使赫慶為廣東布政使。以四川按察使倉德為四川布政使四川建昌道石杰為四川按察使。是月兩江總督尹繼善奏勘辦潮災情節得旨

此次災固異常而汝等從宜辦理可謂知輕重足慰朕懷。但此後更當督令屬員等盡心詳悉妥為以結此局耳。○署江蘇巡撫安寧奏蘇松等屬猝被風潮坍損各項工程應分別緩急動項興修得旨以工代賑正應及時為之並壯觀瞻也。○閩浙總督喀爾吉善奏閩省各屬大約雨水調勻缺雨地方甚少惟臺郡匝月不雨似有旱象得旨覽奏俱悉臺灣若成旱災不比內地一切應加之意也。

寶錄奏三言九

三言

山西巡撫準泰奏晉省常平倉出借平糶銅弊多端請嗣後每年止許平糶其出借一項必地方官確核情形詳請上司批准方准借給並將從前奸民蠹役換新領以抵舊欠之弊盡發其奸勒限本年秋收後徹底清完如紳衿士庶抗欠該州縣分別詳革追比其胥役作奸立拏究治一俟報完即委員盤查得旨好加意妥為之。○大學士公慶復奏遵旨於八月十六日自軍營起身回京現已抵陝

西省城得旨卿起身而來宜即奏聞今已至西安而奏為已遲矣。又奏臣行抵陝西接奉諭旨以準噶爾未可深信命臣暫駐陝西密為防範臣遵即馳赴莊浪暫駐倘有應辦事件一面辦理一面奏聞得旨知道了此時並無信息大約玉保所奏用心太過反覺荒唐今卿業經起程多行數日何妨即有意外之事有卿在彼量亦無憂。川陝總督張廣泗奏臣自抵軍營後見川省軍務一時未能告竣即凱旋之後一切善後事宜尤須駐劄川省就近經理陝甘二省外臨九邊內控三輔營務地方勢難遙制請另設陝西總督專任臣節制川省之任得旨卿所見雖是但陝甘現在無事卿正宜留川詳悉經理善後之圖又何必易制哉。甘肅巡撫黃廷桂覆奏甘省河西各郡豐收應乘時採買現在安西甘州西寧肅州等處倉穀較少酌買十萬石分貯各倉如價稍昂即停下部知之。又覆

奏臣前所奏被旱地方係寧夏涼州一帶已將採買停止安西西寧甘州肅州等府州夏收既稔秋收又豐即提督永常所請採買地方已擬定於各該處採買穀十萬石現動項辦理得旨覽奏已俱悉。兩廣總督策楞署廣西巡撫鄂昌奏粵西購買滇銅已運到十五萬觔請先添爐二座與原爐十座一同開鑄鑄出錢搭放兵餉得旨知道了。貴州提督丁士傑奏古州苗疆俱屬安輯但恐總督張廣泗甫經調任各苗人不無觀望現與巡撫孫紹武留心防範協和化導不至稍有貽誤得旨覽奏足慰朕懷常如此留心地方自獲安寧也。

大清高宗法天隆運至誠先覺體元立極敷文
奮武孝慈神聖純皇帝實錄卷之二百九十九

實錄卷二百九十九

三八

大清高宗法天隆運至誠先覺體元立極敷文
奮武孝慈神聖純皇帝實錄卷之三百

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次屢經

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級入加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十二年丁卯冬十月戊午朔享

實錄卷三百

一

太廟

上親詣行禮○遣官祭

永陵

福陵

昭陵

昭西陵

孝陵

孝東陵

景陵

泰陵○遣官祭

端慧皇太子園寢○頒乾隆十三年時憲書

○順天府行鄉飲酒禮○已未諭向來祭享

太廟獻爵獻帛例用侍衛及太常寺官朕御極後俱令用宗室人員蓋因宗支繁衍實惟

祖德所詒

一氣感孚昭格尤為親切且使駿奔走執豆籩

有事為榮亦得服習禮儀陶鎔氣質意蓋有在但演習禮節奉常實所專司宗室既非所

屬未必聽其指授嗣後每逢祭祀之期著派

宗人府王公一人前往監視俾進退優嫺執

事有恪以昭誠敬將此載入會典○戶部議

覆福建巡撫陳大受疏稱前奏准籌貯臺郡

倉穀四十萬石應勻撥分貯但臺灣府倉無

多鳳山諸羅彰化三縣倉有在府城者有在

本邑者淡防廳向無倉續建亦為數不足覈

計共應添建倉一十四間又知府經管之倉

貯穀頗多除交盤出結責成該府細事統令

府經歷兼管至廳縣之倉仍令各該同知知

縣經理又舊倉如勘有應修之處分別咨部

未買之穀務於今冬足數收貯均應如所奏

從之○以江蘇淮揚道葉存仁為安徽按察

使○庚申

上詣

皇太后宮問安○幸圓明園○戶部議覆前署

山西巡撫宗室德沛疏稱交城縣之張家山

王家山木股溝陽城縣之松腳山并邊傍子

洞孟縣之王子均才溫家等山平陸縣磨兒

嶺之三成洋溢二洞線斷砂微不敷工本請

准封閉至交城縣之馬鞍山并邊傍新開子

洞金金溝平定州之銅題山黑白鉛鑛各一

砂線近來俱旺試採有效請開採抽稅如例

餘鉛酌量官收責冀寧道總理稽查嗣後如

砂微質薄仍咨部封閉又晉省鼓鑄現需白

鉛四十一萬五千觔本省礦產尚難即時敷

用仍請委員赴楚採買均應如所請從之○

辛酉。

上御洞明堂。勾到四川。廣西。廣東。福建情實罪犯。停決四川斬犯二人。廣西斬犯三人。絞犯一人。廣東斬犯七人。絞犯三人。福建斬犯九人。絞犯四人。餘九十九人予勾。○諭軍機大臣等。從前班滾焚斃。未得確據。是以屢次降旨。令密行體訪。今據總督張廣泗查明班滾仍踞如郎。且敢肆行多事。攻打康朱。蹤跡顯然。汪結於班滾潛逃時。明知隱匿。且遣使往來。暗通消息。遊擊羅于朝亦係上年承辦此案之人。恐其發露。意欲多方掩飾。是汪結實為彼地之巨蠹。而羅于朝亦屬知情。種種情形。俱屬顯著。該督謂雖彼處無再用兵之理。而設法鉤致。大費經營。朕思班滾狡獪生事。至為可惡。不可不明正刑章。若果能如計就擒。則已。否則再用大兵攻勦。亦係出於不得已。而非黷武。在目今進勦大金川。須全力貫注。不得分營。至將來金川事竣。即應移師如

郎。迅速擒討。斷不容緩。汪結既為彼耳目。羅于朝身為營弁。乃內地之人。輒敢與之通同。更為不法。至進兵時。須先期將羅于朝。汪結二人。以他事調赴軍營。一一訊明。便可得班滾實在下落。而明正其罪。此際更密為防範。令汪結不得暗施狡計。必當擒獲班滾。明治其罪。以正從前草率之失。所為一舉兩得。實在此役。此時宜遵前諭。不必稍露風聲。以防他變。可傳諭張廣泗知之。○又諭據新柱奏。本年八月。蘇祿國遣番丁鬱朗等來閩。據該國王咨內稱。前貢使勝獨喊敏在呂宋之時。探知甲黎司耶黃佔係漳州龍溪縣石尾鄉居住。見有妻子。胞叔黃照前經任呂宋甲必丹。胞弟黃令。黃罕彼時亦在呂宋營商。今三人俱已回家。前咨敢請裁奪。又武尉安力等謝恩事竣。祈配搭早船返國等語。看此情節。是該國王之意。以呂宋夷目搶奪一事。中國未經代為申理。是以再行咨請。但思瀕海省

分。皆接壤外洋。其島夷互相爭奪等事。只可聽其自行辦理。未便有所袒護。以後如遇此等事件。惟有曉以大義。俾知中國體制。不敢分外干求。至於內地民人。私越外洋。勾結滋事。甚有關係。可傳諭該督撫。當遵照定例。一應海口。嚴密稽查。不得一任屬員。虛應故事。其馬光明等。挾嫌構釁。據該撫等審擬僉配。並咨明該國王。告以馬光明等。因在內地犯事。且係內地之人。與該國無涉。亦只應如此

辦理。惟是馬光明。陳朝盛。二犯。雖擬僉發。此等棍徒。在配所亦未必安靜。或致更滋事端。著掣回解京。交部拘禁。再本年三月內。陳大受。奏已飭布政使將審擬馬光明情由。咨明該國王。何以該國王。至今尚未知悉。且夷使武廚安力等。何以尚留廈門。未遣歸國。又該撫前奏。呂宋番目黃佔。從來未入內地。今該國咨稱。現有妻子。居住龍溪。更有胞叔黃照。曾為呂宋甲必丹。今已回家。是否實情。著一

併查明具奏。尋據喀爾吉善。陳大受等。奏辦理馬光明等一案。審擬具奏後。即飭勒限。僉解赴配。適鬱朗等到廈。因該國番官咨內。又有追取鄭贊珍珠一事。干涉案犯陳梧。須與質對。是以未經起解。查陳梧假稱番王世子。侵吞番貨。照例擬軍。應請與馬光明。陳朝盛等。一併解部拘禁。至陳大受將審擬馬光明案由。飭司咨明該國王。於三月間。繕發廈門同知。轉給番使武廚安力等。承領。時因風信不順。內地並無往洋船隻。至今仍留廈門。以致該國王尚未知悉。復遣鬱朗等來詢。再黃佔親屬在閩各情節。俟審查確實。再行覆奏。得旨覽奏俱悉。○軍機大臣等議。覆川陝總督張廣泗奏。大金川善後事宜。應設兵彈壓一摺。查安設重鎮。分布營汛。以控制蠻方。係照黔楚苗疆一例辦理。但該督欲增兵七千餘名。轉運維艱。恐非久遠之計。不若於蕩平後。遵旨歸入西藏管轄。以番治番。事屬妥便。

又有駐藏大臣董率鈴制。尤為得宜。應令該督酌看彼地情形。詳悉定議具奏。得旨依議速行。○戶部議覆。奉天府尹蘇昌奏稱金州地方。上年收成歉薄。兵丁食用拮据。本年三月。由將軍衙門。咨借民倉米石。臣於復州撥借米二千四百八十石。茲屆秋收。應行照數還倉。而兵丁以金州離復州寫遠。挽運維艱。請就近交納寧海縣倉。但查復州倉糧。已有撥運寧海。并支放賑濟旗兵米五千餘石。亦不便過為缺額。請於該處現存米價銀兩。照時價撥發復州。採買還倉等語。均應如所請行。從之。○川陝總督張廣泗奏。金酋不法。臣前分派西南兩路各鎮將。領兵進剿。七月內。尚能奮勇直前。各距賊巢不遠。迨八月內。因去巢愈近。賊守彌固。是以各路雖據報有攻擊斬獲。而未能直搗賊巢。臣現查有昔嶺山梁。可以俯瞰勒烏圍。而直下刮耳崖為尤近。擬於九月中。親往督率指示進攻。務期於

九十兩月內。進取賊巢。報聞。○予故內大臣溱太。祭葬如例。謚簡恪。○壬戌。諭江蘇所屬沿海州縣。猝被風潮。前已降旨截留該處漕米二十萬石。備賑糶之用。但思此番被災。地方廣濶。戶口實繁。至淮徐海。各屬積歉之區。亦應豫籌接濟。將來加賑平糶。需用必多。著再於下江漕糧內。截留二十萬石。以資接濟。其如何分別存留派撥之處。該督撫悉心妥辦奏聞。該部遵諭速行。○又諭江蘇蘇松等屬。沿海被災之地。現在加恩按月給賑。經大學士高斌會同該督撫等。酌議銀米兼放。折賑定例。每米一石。折給銀一兩。但思今歲潮災較重。實不比尋常。地方米價昂貴。照例折價。尚恐不敷。著將崇明等九州縣。折賑口糧。每石增給銀二錢。俾窮黎得從容購覓。均霑實惠。○吏部等部會議。寧古塔將軍阿蘭泰等覆奏永吉州改設理事同知等官一案。內稱船廠地方永吉州。向隸奉天府。今既改設

同知。歸寧古塔將軍轄。所有旗民交涉人命盜案。及從前知州應辦民人刑名錢穀雜稅等項。俱令同知辦理。詳報該將軍完結。其秋審併奏銷等事。亦由該將軍具題等語。應如所奏辦理。又稱該同知所轄地方。周二千餘里。遇查驗等事。公出。若無接辦之員。必致誤公等語。亦應如所請。將理事通判。照舊存留。又稱吏目係知州屬員。今設理事同知。應改為巡檢。兼司獄事務。再學正照舊存留。文武生童。亦令同知管轄。仍詳報將軍。轉行奉天府府丞考試等語。亦應如所請。將永吉州學正目裁汰。改設寧古塔巡檢一員。永吉州學正改為寧古塔學正。印鈐均咨禮部換給。又稱伯都訥地方。入冊居民。僅三百餘戶。其分駐州同。應裁。另設巡檢一員等語。應如所請辦理。其伯都訥巡檢印記。亦咨禮部換給。至所稱伯都訥地方。旗民交涉命盜案件。交該副都統辦理。咨報將軍衙門。其一切錢穀。並文

武生童事務。令同知辦理。詳報。至大計之年。同知以下等官。俱由該將軍辦理具題等語。亦均如所請行。從之。○癸亥。

上御洞明堂。勾到奉天。陝西。情實罪犯。停決。奉天斬犯一人。絞犯一人。陝西斬犯五人。絞犯二人。餘四十六人。予勾。○諭內閣。刑部。朕因各省侵貪案件。纍纍。意欲懲一儆百。以息貪風。大學士及該部。並未詳查立法本意。蓋懸度朕意。止於惡侵。而不知朕意。實在於懲貪。夫侵盜之與貪婪。似乎有間。而不知服官守職者。孰無畏懼之心。不敢先虧庫帑。至於藐視國課。恣意侵漁。則下此之芑苴魚肉。更復何所顧忌。必致朘民自潤。貽害無窮。故天下庸有貪而不侵者。必無侵而不貪者。嚴侵盜。正以懲貪婪。此整綱勅法之要道也。及至再三降旨。曉諭。令大學士九卿等。詳悉酌議。於秋審時。應情實者。入於情實。乃今陝西省勾到情實案內。即有李銘。吳浩。丁葵。三案。此

又矯枉過正。惟旨是從。而三案未必皆當勾決也。此中亦有必無可貸者。但今當定議之始。向來因陋就簡。常入緩決之人。即以情實正法。所謂不教而殺。朕不為也。著於法外施仁。暫行停勾。再予一年之限。或尚能悔悟完項。自贖其罪。以邀寬典。如仍復玩視國法。必予勾以正其罪。朕用法從無假借。而必準情酌理。允協厥中。以歸至當。著通行各督撫共悉此意。○諭軍機大臣等。朕曾記憶從前顧琮面奏湖河地畝。伊任內辦理。有未令升科者。蓋一經升科。則遇水旱之年。勢必查勘賑恤。所奏如此。其意以此等地畝升科之後。轉難料理。今日完顏偉所奏。亦與顧琮之意畧同。朕思湖河地畝。若不令開墾升科。則附近居民。安插何處。使之資生餬口。若遇水旱之年。因未升科而不加賑卹。此等窮民。又作何料理。完顏偉所奏。此間已議矣。著傳諭顧琮。令其將從前陳奏未詳之處。并未令升科之

田畝。係何地方。逐一詳悉具奏。○又諭。據常安奏。稱浙省嚴州府屬建德淳安壽昌桐廬四縣。并嚴州一所。近時牛疫流行。民力艱窘。請照乾隆五年之例。飭令地方官。查明牛疫人戶。每隻借銀三兩。於次年麥熟秋收後。分作兩次徵完。共需銀三千六百餘兩。於司庫公項內借給等語。此奏著交顧琮。令其查明辦理。尋奏。請照乾隆五年借給牛本之例。動支司庫銀兩。照各地方牛疫之輕重。定借銀之多寡。並按各戶所種田數。少者借銀一二兩。多者借銀二三兩。俟來歲麥秋兩熟後。歸款報聞。○鑄給雲貴督標中軍副將關防。從總督張允隨請也。○甲子。上幸靜宜園。駐蹕。○乙丑。上以皇太后聖躬違和。詣皇太后宮問安。視藥。○是日宿慈寧宮。○丙寅。

上詣

皇太后宮問安。○是日視藥三次。至辛未皆如之。

上還宮。○諭河南被災州縣歸陳二屬之商邱等一十六州縣。加賑口糧。銀穀兼賑。每石例給銀五錢。朕念歸陳二屬。係積歉之區。穀價未免昂貴。貧民買食。不無拮据。著加恩增給銀一錢。俾得餬口有資。均霑實惠。○諭軍機大臣等。蠻賊盤踞山箐。專恃戰碉。以為巢穴。前據張廣泗奏。班滾將如郎舊碉修住。姜錯大舊碉燒壞。仍在舊處。新修大碉七座等語。其大金川各路進兵情形。亦稱賊碉險峻。鎗砲難施。攻一碉。不啻攻一城等語。去年班滾之案。慶復等所奏。何嘗不稱拆毀碉樓。毋使復築等語。未逾年而班滾復出矣。且復築碉樓矣。則是去年所云善後之圖何在。賊人負固走險。習俗難移。每當攻克賊巢。雖云焚毀碉樓。使之無所憑藉。其平居棲止。但可依巖

傍壑。蓋設平房。而不能扼其吭。而據其要。終不能禁止其不為。必致仍復恃險滋事。則此兩番辦理。俱屬虛糜。其如何革除舊俗。設法稽查。使不敢修設碉樓之處。應傳諭該督令其留意辦理。毋復如前之所為。再據張廣泗所奏。添設重兵。分防要地。擬增兵七千名。十年之後。漸議裁減等語。從前所議設屯置衛。本以據險扼要。聯絡聲勢。使之有所畏憚。不致恃險建碉。生心滋擾。而量置屯守。轉餉無多。事可經久。若增兵七千名。則每年需二十餘萬之餉。雖較之兩番進剿。糜費至二百餘萬。十年餽運。僅亦相等。如果確有成效。可保其久遠寧謐。豈不甚善。否則裁撤之餘。復生事端。勢不能置之不顧。分防久戍。未便議裁。則經費所關。不更多於此乎。此亦不可不熟籌於事始。其應否增兵。分佈要害。如該督所議。或應建設屯衛。或應照前諭歸西藏王子管轄。及駐藏大臣董率。如何方合機宜。張廣

泗身歷巖疆。措置較為親切。必能統計全蜀形勢。為善後長策。適因意計所及。可詳悉傳諭。聽其斟酌妥議以聞。○丁卯。

上詣

皇太后宮問安。○御懋勤殿。勾到湖廣。浙江。江西。情實罪犯。停決湖廣斬犯四人。絞犯二人。浙江斬犯二人。絞犯二人。江西斬犯一人。絞犯七人。餘六十人予勾。○戊辰。

上詣

皇太后宮問安。○諭今歲科場。各省監臨奏報。搜檢懷挾之處。有經搜出懲究者。亦有稱通省並無一人者。向來懷挾之弊。京闈尚少。而外省最甚。雖經屢頒諭旨。令嚴加釐剔。而士子徂於積習。監臨等官未免尚存姑息之見。未能翕然丕變。即如江西一省。三場多至十六人。可見各省此風尚未悔改。其未經搜出者。非奉行不力。則有心邀譽耳。夫始進不正。則士習不端。宿弊不清。則真才不出。嗣後各

省監臨。務必實力嚴搜。使弊絕風清。以裨文治。○旌表守正捐軀之河南光山縣民張行女張氏。○己巳。

上詣

皇太后宮問安。○御懋勤殿。勾到安徽。江蘇。情實罪犯。停決安徽斬犯三人。江蘇斬犯四人。絞犯四人。餘六十四人予勾。○諭軍機大臣等。前據黃廷桂奏。金塔寺回民。不敷養贍一事。經軍機大臣會同該部議以移駐哈密。統

平定回疆

令該撫黃廷桂查明具奏辦理。茲據貝子玉素富奏稱。哈密耕種。全資雪水。如遇雪少之年。不足以資灌溉。朕現在批令定議。所有移駐回民之處。此時不必辦理。候旨遵行。至於此等回民。黃廷桂從前奏稱。丁口加增。生計艱難。多有不能餬口。且貪惰性成。不力於農務。則此半載之中。又何以資生度日。且行令查辦。何以遲滯不行。具奏著傳諭一併詢問之。○吏部議覆。閩浙總督喀爾吉善等奏稱。

舊設温州府海防同知。專司洋面。職兼山海稽查。實非閒曹。至玉環一山。懸居溫台二府海洋交界之處。遊民私墾私煎。實為難治。前總督李衛議添同知一員。實以彈壓海洋。並非僅為漁稅起見。今若將兩同知歸併。在該員身駐玉環。於温州巡查等事。勢難兼顧。請將該二缺。仍舊設立等語。查玉環地方遼闊。易致藏奸。經原任總督馬爾泰等疏請。以温州府同知移駐該處。將玉環同知裁汰。經部議准在案。今該督等復以種種不便。請循舊制。海疆重地。原與他處不同。應令詳細審度。將應留裁汰之處。妥議具題。從之。○兵部議奏。各省滿洲千總。六年俸滿。保送引見。分別發往本省。別省以守備題補。此等人員。一時不能得缺。在彼既無廬舍可居。又無子姪食糧接濟。請嗣後。照隨營候推之例。送部引見。後。留京當差。給與守備頂帶。仍按年滿日期。候部推陞。從之。○庚午。

上詣

皇太后宮問安。○以翰林院侍讀學士齊召南為順天武鄉試正考官。檢討陳桂洲為副考官。○賑卹江蘇阜寧。清河。桃源。安東。山陽。鹽城。豐縣。蕭縣。碭山。贛榆。銅山。沛縣。邳州。宿遷。睢寧。海州。沭陽。淮安。大河。徐州等二十州縣。本年水災飢民。並蠲緩額賦。應徵漕糧。漕項。及蠲餘銀糧。舊欠漕米。緩漕等項。分別蠲緩有差。○辛未。

上詣

皇太后宮問安。○御懋勤殿。勾到河南情實罪犯。停決斬犯三人。絞犯十二人。餘六十八人。予勾。○以禮部侍郎伍齡客為鑲黃旗滿洲副都統。散秩大臣博倫岱為鑲藍旗蒙古副都統。○壬申。

上詣

皇太后宮問安。○是日視膳三次。翌日如之。○署江蘇布政使愛必達奏。江蘇積欠。共二百

數十萬兩。經安寧奏准清查。於上年十月。檄行布政使王師。酌議規條。覆覈辦理在案。但民情囂凌者多。淳良者少。逋糧侵賦。習為故常。冀倖豁免。一旦立法清查。其在侵蝕書役。既無影射藏奸之地。又少輸情悔罪之心。即紳衿花戶。多有田糧授受。親友交割。皆非若輩所願。是以人心惶恐。倡為謠言。如大學士高斌摺內所奏。書役實繁有徒。紳衿優劣不齊。今皆不能無擾。意似指此。若云此中畏罪之徒。奸匪之蠹。遇事生風。拖累無辜。牽連良善。亦所不免等語。似屬懸揣。未得實據。至印委官員。原須認真辦事。於凡冊內查出弊端。嚴訊經催書役。今高斌奏稱。聞有書役侵蝕畏罪。不能自完。仍免糧戶代為應承。實欠重出完納等語。嗣經案破纍纍。東挪西飾。始知高斌之言。事非無因。要之安寧原奏。清查各款。自屬詳慎酌覈。可見施行。即各屬奉行未妥。要當隨在體察駁正。總期歸於無弊無擾。

似未可因訛言繁興。委曲遷就。得旨覽奏俱悉。另有旨諭汝等。因時制宜。實力妥辦。汝先以此摺示安寧可也。○以內閣學士宗室塞爾赫為兵部右侍郎。○轉兵部右侍郎王會汾為左侍郎。以內閣學士莊有恭為兵部右侍郎。

大清高宗法天隆運至誠先覺體元立極敷文奮武孝慈神聖純皇帝實錄卷之三

大清高宗法天隆運至誠先覺體元立極敷文
奮武孝慈神聖純皇帝實錄卷之三百一

監修總裁官總纂官太子太傅文淵閣大學士文淵閣領事領侍衛內大臣稽察欽奉 上諭事件處管理
吏部理藩院事務正黃旗滿洲都統世襲騎都尉軍功七級隨帶加一級尋常加二級軍功紀錄一次臣
總纂官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務
世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次
尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十二年丁卯十月癸酉。

上詣

皇太后宮問安。○御懋勤殿。勾到山西山東情
實罪犯。停決山西斬犯一人。山東斬犯四人。
絞犯五人。餘五十三人予勾。○諭軍機大臣
等。從前高斌摺奏。江蘇清查積欠弊端一事。
朕令寄諭愛必達。密行詳查。據實具奏。蓋高
斌素性長厚。此等清查積欠之事。恐致擾民。
本非其所欲為。且因王師一事。未免稍存偏
護。所奏不無過甚。今覽愛必達回奏。實屬至

公之論。其摺內所稱。句容縣糧戶駱寅等。被
收書張玉昆。侵收銀三百餘兩。駱寅等情願
照數完納。鎮洋縣銀匠王蒼玉。侵收銀一百
四十餘兩。據監生何嘉楣情願先行完繳等
語。夫書役假串侵收錢糧。自應在書役名下
追償。即使脫逃。亦當俟緝獲之日。嚴行追比。
乃令原戶重為完納。此係安寧失於檢點。辦
理猶未盡善之處。況糧戶已完之項。復令重
科。所稱出於情願。亦係必無之事。如果有之。
則係盛世良民。為大吏者。當免其完納。以示
嘉獎。豈有復使代償之理。此時辦理。雖未必
如高斌所奏若此之甚。但即此二事推之。將
來書役聞風效尤。其流弊必至如高斌所奏
者。江蘇積欠至二百餘萬之多。固當設法清
釐。第不可使糧戶重完。以致擾累。前曾傳諭
安寧。加意辦理。今愛必達既悉此事情節。令
其協助安寧。除今秋被災州縣。自必難於清
查。此外當善為籌辦。雖清查積欠。難免議論。

但皆係地方大吏。如果和衷共濟。自能因時制宜。實力妥辦。使清查之事。克底於成。而又不致紛擾。以稱朕意。可一併傳諭知之。愛必達摺。著抄寄安寧。令其閱看。○甲戌。

上詣

皇太后宮問安。○是日。視膳二次。至丁丑。皆如之。○乙亥。

上詣

皇太后宮問安。○御乾清門聽政。○御懋勤殿。

勾到直隸情實罪犯。停決斬犯二人。絞犯五人。餘四十八人予勾。○戶部議覆湖廣道監察御史馮鈐奏。稱各省收漕。如踢斛淋米。刁蹬講貫裏折外。加倉有餘米。即以銀錢折色各弊。請勅漕臣嚴察示懲等語。應如所奏。令總漕及有漕督撫。飭各該糧道。不時訪察。如各州縣有不按定例。借端勒索。私行折加。以及縱容胥吏舞弊。即行指名題參。從之。○翰林院侍讀學士陳邦彥。為內閣學士兼禮

部侍郎。○以太常寺卿積德為通政使。○命固原提標叅將任舉。赴大金川軍營。聽總督張廣泗遣用。並賞銀二百兩。○丙子。

上詣

皇太后宮問安。○諭安徽宿虹等處。秋禾被水成災。業經加恩賑卹。其漕項銀米。例應照常徵納。但思該地方積歉之餘。民間元氣未復。輸將未免拮据。所有宿州靈璧虹縣宿州一衛。應徵漕項銀米。俱著暫緩徵收。俟來秋補徵搭運。其未完節年漕項。亦著停緩。照例分年帶徵。以紓民力。該部即遵諭行。○又諭曰。張保太。張曉。劉鈞等。俱係惡逆首犯。依律其妻子均應從坐正法。今從寬免死。給發功臣之家為奴。乃本朝寬仁之典。但此等真正逆犯妻孥。實不比為從者之妻孥。且深知悖逆情事。焉肯安靜悔過。著將張保太之繼媳董氏。陳氏。繼孫陳爾敬。張曉之妻楊氏。劉鈞之妻翟氏。俱交刑部。永遠監禁。餘著照所擬賞

給。○命順天學政呂熾。江蘇學政尹會一。安徽學政觀保。仍留原任。調山東學政于敏中。為浙江學政。浙江學政陳其凝。為山東學政。湖北學政宋邦綏。為山西學政。山西學政夏廷芝。為湖北學政。廣西學政官獻瑤。為陝西學政。陝西學政胡中藻。為廣西學政。廣韶學政夏之蓉。為湖南學政。湖南學政吳嗣富。為廣韶學政。以右通政林枝春。為江西學政。福建道監察御史葛德潤。為福建學政。編修朱荃。為四川學政。左諭德興泰。為肇高學政。編修葉酉。為貴州學政。編修何具睿。為雲南學政。○以廣西太平府屬上下凍土州知州趙東相子趙京襲職。○丁丑。

上詣

皇太后宮問安。○諭據將軍阿蘭泰等奏稱。三姓吉林地方。本年雨水連綿。所有官員兵丁。及官屯義倉。瀕河地畝。多被淹浸等語。此雖係一隅偏災。但官兵地畝歉收。米穀未免不

敷。著交該將軍等。按被災輕重。借給口糧。以資接濟。其支借穀石。若令於來秋償還。未免力有未逮。可與從前所借穀石。俱著分作三年。陸續交納。至本年應交官屯義倉穀石。著查明豁免。再吉林官屯田地。內有被水者。其應交穀石。亦一體查明豁免。該部即遵諭行。○撫卹長蘆興國。富國。豐財。蘆臺。嚴鎮。海豐等六場。井滄州。南皮。青縣。衡水。慶雲。海豐等六州縣。及山東永利。富國。永阜。王家岡。西由。石河。信陽。濤維等八場。本年水災。竈戶如例。○戊寅。

上詣

皇太后宮問安。○是日視膳一次。至辛巳。皆如之。○諭直隸總督那蘇圖。奏稱霸州豐潤二處營田。該牧令未能專心經理。宜設專員。以收實效。查叅革知府陸福宜。知州馮章宿。俱在直年久。辦事勇往。請留直委用。管理霸州。豐潤。營田等語。古有田畯之官。巡行阡陌。勸

稼課耕。宣布德化。該督所奏專員經辦營田。尚得古人遺意。而該員等叅案。亦非貪劣營私可比。著照所請。陸福宜管理豐潤營田。馮章宿管理霸州營田。令其親身督率。加意經理。如三年後。果能著有成效。該督奏聞。送部引見。○諭軍機大臣等。昨叅將任舉來京引見。朕令大學士等詢問固原兵丁。上年啟釁緣由。據稱該標兵丁。久懷生事之意。亦不始於許仕盛任內。從前周開據李質粹為提督時。已蓄異謀。未經發覺。至上年鼓譟。隨從附和。人數甚衆。訊供之時。尚有先謀害提督。次及總督等供。俱刪去未敢敘入等語。看此。則該標兵丁。秉性強梁。自恃勇悍。平時之結黨潛謀。目無法紀。已非一日。雖將首惡正法。其餘黨誅不勝誅。姑與分別結案。但伊等平素喜於滋事。動輒構釁。或因此次小小懲創。不足示警。故智復萌。且惡習既深。不可不豫為約束。密加釐剔。可寄諭提督瑚寶。令其知該

標兵丁。從前種種情節。留心防範。加意整頓。務必寬嚴並濟。使舊習潛移。共知遵循紀律。不致復行滋事。以靖戎行。又不可因此旨而稍有洩漏。益致滋事。尋奏上年標兵鼓譟。漏網匪類。非設法釐剔。難肅戎行。前於具奏善後摺內。有各兵聯環互保之條。當經飭將備留心辦理。又復設暗行遊巡之千把。細加密訪。嗣據各將備稟報。共有無人互結之兵丁五十餘名。隨即親加考驗。革除名糧。交原籍地方官嚴加管束。其頗知孝友。勤學技藝者。面為獎勵。至各兵中度日維艱者。已將前恩准善後條內。於冬季所借銀五千兩。陸續接濟。現在情形。實可保其必無滋事。得旨。如此留心。甚慰朕懷也。○賑卹浙江海寧海鹽平湖鄞縣慈谿奉化鎮海象山定海會稽餘姚等十一縣風潮等災。永康西安松陽等三縣旱災。石堰鳴鶴穿長龍頭玉泉并江南青村下砂頭二三場等八場潮災饑民。分別給

予籽本。並葺屋銀兩。○賜御前大臣傅恆。旺扎爾。內大臣特庫。都統海蘭。額駙達爾瑪達都。在紫禁城內騎馬。○已卯。

上詣

皇太后宮問安。○諭甘肅之皋蘭。金縣。靖遠。安定。會寧。五縣。本年均被旱災。且連歲歉收。舊欠不少。若一併徵輸。民力未免拮据。著將歷年未完額徵銀糧。自乾隆戊辰年起。分作五年帶徵。其狄道。隴西。安化。真寧。寧州。靜寧。禮

縣。七州縣。收成亦各有歉薄。其歷年欠項。一時完納維艱。著將此七州縣。歷年未完額徵銀糧。自乾隆戊辰年起。分作四年帶徵。以紓民力。○又諭。從前大學士慶復。辦理贍對軍務。曾奏請動支川省養廉銀六千兩。以充公用。經朕允行。今張廣泗。辦理大金川軍務。事屬一體。所有川省養廉銀兩。亦准其動支。俾用度充裕。賞賚有資。該部即行文知之。○諭軍機大臣等。巡撫黃廷桂。覆奏移駐金塔寺。

回民一摺。內稱。據貝子玉素富呈稱。哈密渠水缺乏。難以耕種。并該道鈕廷彩所稟。回民不願遷移等情。此案前經玉素富具奏。現在交議。已傳諭黃廷桂。令伊候旨遵行。并詢問伊何以遲滯不行覆奏。今黃廷桂始行奏到。甚屬遲延。且看伊摺內。不過據玉素富等咨稟之詞轉奏。並無一語議及。竟似無干涉於伊地方之事。可傳諭申飭之。○又諭。前玉保具奏。準夷熬茶人等。因不能如期到卡。豫先

差人送信一摺。內有伊等似有疑慮一語。含糊具奏。朕初以為果有別項事端。今據奏報。宰桑巴雅斯瑚朗等三百人。於九月十四日到哈濟爾。現往得卜特爾交易等語。是準夷並無異意可知。又奏稱藏地風俗。正月修好事念經。各處人衆。前來瞻拜。商賈聚集。甚屬擾攘。恐準夷乘間滋事。伊欲催促熬茶。於初五日。以內完竣。即帶來使回巢。如遲久不能畢事。將內地人衆。隨到瞻拜。不令久聚等語。

此等意見。又屬太過。準夷到藏熬茶。事畢即可回歸游牧。但伊等見藏地修好事。念經。必懇求多住數日。瞻仰數次。若遽催促起程。并將內地聚集瞻禮人衆。驅逐不令久聚。使彼知覺。反生疑慮。至期惟有約束內地人等。暗為防範。不使滋事。著寄信玉保帶領夷人至藏。與駐藏辦事大臣索拜傳清等。公同商議妥協辦理。斷不可稍有疎忽。亦不可使準夷知覺疑惑。再前因玉保之奏。令大學士慶復暫駐陝西。豫行防範。今並無事故。慶復即著回京。並諭玉保知之。○戶部議准。四川巡撫紀山疏報。捷為雲陽。西充。三縣竈民。開淘鹽井四十一。增竈八。添鹽鍋五十四。計產一千一百六十九引。請自本年始。配引行銷。徵課如額。從之。○庚辰。

上詣

皇太后宮問安。○諭浙江嚴州府屬之壽昌淳安。遂安。三縣。被水災黎。所有極貧戶口。已於

常賑之外。加賑兩月。俾餬口有資。但思其中極貧之民。覓食維艱。殊堪軫惻。著加恩添賑一月。以資接濟。○辛巳。

上詣

皇太后宮問安。○勅藏歷代帝后圖像。並明代帝后冊寶于南薰殿。諭朕閱內務府庫所藏歷代帝后圖像。蓋沿襲前明以來之舊。局鐫收藏。視同尋常圖繪。未經啟視。塵封蝨蝕。不無侵損。朕思勝朝陵寢。即世遠年湮。尚為之禁樵蘇而虔守護。使松楸勿剪。况縑素未渝。冕旒秀發。其何忍褻越置之。又明時帝后冊寶。向貯工部庫中。歲久亦不免遺失殘毀。朕意欲併藏之南薰殿中。示崇敬焉。其中或有損闕。槩令補綴完好。應重裝者即付裝潢。其如何編列甲乙。存錄檔籍。慎重珍藏之處。內廷大學士等會同內務府總管王大臣。妥議具奏。尋議臣等恭查南薰殿正殿五間。請於正中三間內。各設硃紅油漆木閣一。分五層。

安奉歷代帝像。每帝像一軸。造楠木色小匣。用黃雲緞夾套。包裹裝入。按閣層次。分列安奉。東一間。安奉后像。均照前式製辦。至帝后冊頁手卷。亦按帝后木閣安奉。西一間。置木櫃一。安放明時帝后冊寶。其功臣像。按軸置造小匣。套用紅雲緞。仍貯庫內。再帝后圖像內。現有應修補者。請俟修補完好時。各按朝代。挨次編列甲乙。安奉木閣。並冊寶收貯木櫃。一併登記檔籍存案。令內務府堂郎中。六庫郎中。稽察照管。報聞。○諭軍機大臣等。御史歐堪善條奏。常平倉穀一摺。經大學士。會同該部議駁。朕已降旨依議。積貯原為善政。民命攸關。行之不善。亦足滋弊。歐堪善所奏。雖難見諸施行。但其摺中所陳採買平糶情由。及種種弊竇。亦不無所見。可將原摺抄錄。寄與各該督撫。令其知米貴受病之由。隨時隨地。留心釐剔。務使調劑有方。得收常平之效。於奏事之便。寄去。○吏部等部議覆。兩廣

總督策楞等疏稱。湖潤寨土巡檢岑作柱病故。無人承襲。該處毗連夷境。必得專員彈壓。因思歸順州。與該寨接界。現設州同一員。請即移駐等語。查各省土司地方。需員管理者。例准於通省內。隨時改調。應如所請。歸順州州同。准移駐湖潤寨地方。改為歸順州管轄。其一切戶婚田土細事。該州同就近判斷。如遇命盜重案。仍令該知州承審。從之。○緩山。東海豐縣。並永利富國。西由三場。本年旱災。竈地。應徵新舊額賦。並借給籽種口糧。如例。○壬午。戶部議覆。大學士高斌等奏。稱本年蘇松沿海一帶。潮災甚重。江鎮淮徐各屬。亦有水旱災傷。通省米價甚昂。在官無項平糶。惟有折徵漕糧。使民間多留米穀。庶於民食有濟。請將江省各屬。本年應徵漕糧。除蠲緩外。無論災地及成熟州縣。概折徵十分之二等語。查成熟地畝。尚非災地可比。若照所奏。是惟有益於納糧之戶。無補於災地貧民。且

成熟地方。折收之米。未必盡能流通於災地。即或散售災區。亦係照市價交易。於米價未能平減。莫若將明歲應運漕糧。再行截留四十萬石。留為災地備用。庶現在賑糶無缺。而來春青黃不接時。亦多有米平糶。價無昂貴。得旨。依議速行。○工部議准直隸總督那蘇圖疏稱。香河縣雙街地方。自開新河後。東西兩岸。被水汕刷。所有臨河居民等。應令遷移。查該處土房。計一百五十四間。每間給運費銀三兩。從之。○賑卹江蘇常熟。昭文。上海。南匯。武進。江陰。靖江。泰州。太倉鎮。洋嘉定。寶山。崇明。通州。泰興等十五州縣。蘇州。太倉鎮。海金山等四衛。潮災。上元。江寧。句容。江浦。六合。溧陽。丹徒。丹陽。江都。甘泉。儀徵。興化等十二州縣。揚州。儀徵。鎮江等三衛。旱災。飢民。並蠲緩額賦。其應徵漕糧。漕項。及蠲剩銀糧。分別蠲緩有差。○癸未

上詣

皇太后宮問安。○諭直隸總督那蘇圖奏稱。天津總兵李正。為人謹飭小心。但識見未充。每多踟躕。且身患脾泄之疾。於營伍地方。恐有廢弛等語。李正効力年久。人尚老成。鑾儀衛鑾儀使。係總兵應陞之缺。著加恩將李正補授。現任鑾儀使張謙。係散秩大臣。著兼管漢鑾儀使事務。其天津總兵員缺。著馬世岱補授。○諭軍機大臣等。前因川省氣候早寒。恐冰雪嚴凝。官兵艱於取捷。曾傳諭總督張廣泗。令其酌量情形。或應暫行退駐向陽平曠之地。令稍為休息。俟春氣融和。再加調官兵。一舉克捷。今據巡撫紀山奏稱。黨壩等處。九月中旬。已連降大雪。不但糧運堪虞。我兵亦應籌畫萬全。或應通盤籌算。酌留官兵防守。休養士卒。俟春融再候進止等語。可見彼地情形。冬令嚴寒。運餉進兵。俱難得濟。張廣泗前曾奏我兵逼近賊巢。而昔嶺憑高。可以出奇制勝。大概九十月間。可有就緒。如果能如

期奏凱。固為甚善。但目今尚未見捷音。或者尚需時日。該督身在軍營。因時制宜。待時而動。自必豫有成算。著將紀山奏摺再行傳諭知之。再紀山奏稱。莎羅奔差頭人赴軍營及撫提衙門投稟乞降。但未親赴軍營。真偽難測。不便准其投誠等語。張廣泗亦曾奏該酋與伊兄就日吉父子。屢遣番目乞降。斷難允行。是該督已洞燭其奸詐。所見極是。逆蠻反覆狡獪。即使面縛歸誠。尚難保其日後不復肆橫。況此番官兵雲集。正當犁庭掃穴。痛絕根株。一勞永逸。斷無以納款受降。草率了局之理。著傳諭張廣泗。務將莎羅奔擒獲。明正典刑。即使堅壁待時。更當嚴加防範。無致巧為免脫。又如班滾之焚毀空巢也。○吏部等部會議。甘肅巡撫黃廷桂覆奏布政使阿思哈。請將通渭縣治。仍移舊地一摺。據稱通渭縣署。從前移駐安定監地方。原係一時權宜。嗣後原治百姓。憚其寫遠。從未一至彼處。以

致累任縣令。不得不俯從民便。仍在原治駐劄。而新縣則往來其間。終非久計。不如仍復原治等語。查設立縣治。原當四面適中。一切納糧聽訟等事。方順輿情。應如所請。安定監地方之通渭縣。准仍移舊地。又稱舊縣城現俱完固。惟城樓垛牆門洞。約估修費銀七百兩。士民情願捐修。至一切祠廟。久經士民建於城外關廂內。應仍其舊。惟各官衙署。以及倉庫監獄。自應移建城內。除該縣倉廩二十四間。原在城內。無庸議改外。所有知縣訓導典史各衙署。向係民房。規模狹隘。今既移建城內。其木料磚瓦等項。亦宜添補。均動正項興工等語。亦應如所請行。至安定監地方原建倉廩一所。應准照各屬鄉倉之例。分貯糧石。其原建文廟及各官衙署。仍舊存留。從之。○旌表守正捐軀之河南陝州民趙三杓妻劉氏。○甲申。

上詣

皇太后宮問安。○諭通州副將海沖阿現在丁憂例應離任守制。俟二十七月期滿始行補用。但旗員內俱持服百日。期滿即行當差。並不俟二十七月。且滿洲官員丁憂後。三年內並無差使。閒散安居。不但於伊等生計無益。人亦漸至怠惰。海沖阿原係侍衛。著伊持服百日期滿。守制二十七月內。仍照伊原銜。在頭等侍衛上行走。嗣後除提鎮內丁憂者。皆朕深知簡用之人。朕酌量另加委用外。其選用副將之旗員內。遇有丁憂者。即照此例。由侍衛陞用者。著在頭等侍衛上行走。由前鋒叅領護軍叅領驍騎叅領等官陞用者。著在各原處行走。遇叅領副叅領缺出。即行坐補。由世職陞用者。伊等原處無品級相當之缺。臨時著該旗辦理具奏請旨。以便酌量委用。俟伊等守制二十七月期滿。應行補用時。仍著照例補用。○諭軍機大臣等廣東肇羅道

徐大枚。因緝私案內降調。該督撫等出具考語送部。吏部帶領引見。朕因總督策楞等奏稱該員和平老練。熟諳吏治。是以降旨從寬。仍留原任。徐大枚前於江南運使任內。楊超曾奏其平庸懶惰。惟以奕棋宴飲為務。今日請訓。朕見其神氣昏眊。人亦糊塗。頗有耽酒之意。其平日之闡葺頹惰。恐亦難免。今既留任。著傳諭策楞留心察看。并將伊廣東任內有何實在政蹟之處。據實奏來。尋奏肇羅道徐大枚。在任五六年。公務並無歧誤。所屬基圍悉心防堵。應需搶築工程。住宿河干。不辭勞瘁。平時仿照江南河工。多備土牛椿木。頗為得宜。上年署運司篆務。剔釐諸弊。查出朱介圭侵蝕銀兩。及濫賒濫給帑鹽。以致各商拖欠各項銀三十餘萬。該道於數月之間。追完銀二十六萬。適該道因本任降調。送部引見。臣就其平日居官。會同撫臣據實註考。至奕棋宴飲之事。在粵並未聞有此議論。得

旨覽奏俱悉。朕亦不過看其一時奏對。覺不滿意。非有意苛求也。○吏部等部會議兩江總督尹繼善題覆海州州同移駐太伊山鎮。添設州判案內。據稱蘇省州判四缺。均係管理河務。未便改移。因思縣丞與州判品級尚不相懸。現在清浦縣有董漕管糧二縣丞。雖董漕縣丞業經移駐七寶。但該縣漕糧本少。請將管糧縣丞改為海州州判等語。應如所請。清浦縣管糧縣丞准其裁汰。改設海州州判一員。其縣丞應辦事務。統令主簿兼理。又稱溧水縣縣丞現改沐陽縣縣丞。所有官役俸工銀兩。應與新設海州州判各歸該州縣地丁項下動支。其原編俸工均裁存充餉等語。亦應如所請行。至各官衙署除海州州判有州同衙署可改駐外。其移駐太伊山鎮之州同并沐陽縣縣丞。應設衙署。以及議裁之溧水、清浦縣丞衙署。應令該督飭該州縣估查報部從之。○乙酉。

上詣

皇太后宮問安。○大學士等議覆安徽布政使陳惠榮奏安省積欠錢糧請照江蘇之例設法清查等語。應令酌量妥辦。并各省督撫等逐漸留心經理。得旨。所議各省積欠。令該督撫平日留心經理之處。所為杜弊於事先。以免清釐於事後。是亦不動聲色漸次剔除之一法。著依議行。國家政體原不宜屢有清查之事。但能留意於未然。何致滋事於既著。其諭各督撫嗣後於每年歲底將該省未完錢糧內或係民欠或係帶徵之項徵完若干未完若干並本年經徵已完未完各數分晰開具清單繕摺奏聞。○以故奉恩將軍琳安子碩安襲職。○丙戌。

上詣

奉先殿。

壽皇殿行禮。○詣

皇太后宮問安。視藥。○是月。欽差大學士高斌

等奏。崇明一邑。被災甚重。廬舍坍塌尤多。應照例加給修費。瓦房一間。銀九錢五分。草房一間。銀六錢五分。其災地應借籽種。應豁應緩錢糧等項。並加賞該縣四營兵丁一月餉銀。俱遵旨分別辦理。其被災次於崇明者。鎮洋寶山上海南匯四邑。修費請照崇明例。加增。此內寶山鎮洋被災較重。請將該二縣成災田地。明年地丁錢糧。并本年未完。及一切緩帶舊欠銀米。俱緩俟己巳年開徵。至沿海沿江被潮災各營兵家口。業分別借給錢糧。請於明年秋季起。將借給三箇月者。分八季扣還。一箇月者。分四季扣還。得旨。知道了。該部知道。○兩江總督尹繼善等奏。江省清理積欠錢糧。現在書役自首侵蝕之銀。已有二十二萬餘兩。既已畏罪首出。自當量為展限。請將從前侵蝕。據實自首者。自查清造冊竣日起限。除百兩以內者。仍照原議勒限三箇月追清外。其欠百兩外。至五百兩以上者。限

六箇月。六百兩至一千兩以上者。限一年。全數通完。照律免罪。如逾限不完。或雖有完數。不及五分者。按未完銀數。擬罪監追。如完足五分者。再予展限。仍不全完。亦按未完銀數。擬罪監追。得旨。著照所請行。咨部知之。○又奏。從前安寧奏請清查江省積欠。原非得已。而抗頑之輩。習為故常。浮言紛出。且積欠數多。欲行清理。實難處處妥協。而吏役巧詐多端。馬能一無指摘。但租賦原應按年清完。今拖欠年久。侵蝕與實欠不分。不得不一律清查。至經承書辦差役里長人等。不思奉公。惟圖利己。現查侵收之弊。不一而足。此等奸徒。法所不貸。今寬以自首之條。勒限清完。並不為累。此番清查。原照實欠冊。按戶散單。令其自填。其收單各員。一切公用。均出於官。絲毫不派及糧戶。臣與安寧悉心商酌。現在督率印委各官。詳慎清釐。務期得當。得旨。覽奏俱悉。卿等妥協辦理可也。○署江蘇巡撫安寧

覆奏。江省積欠案內。除查出書役侵蝕者。另行辦理外。其餘民欠。仍恐不實。現飭屬細開清單。派妥協佐貳。發交花戶。是否實欠。令各於單內填明。如填係已完。或單內欠數多。而花戶認欠少者。則仍係役侵。書役至此。乃無從掩飾。自查辦以來。實無勒派花戶認各及糧戶重完等事。惟其中或有狡黠花戶。知民欠尚可拖延。暗受賄賂。挺身為書役代認者。或有花戶轉托相熟之人。如銀匠總甲之類。並非在官書役。被其侵蝕。今既查出。自願先行完納。又或有花戶與書役狼狽為奸。改匿弊混。通同漏課。一旦破露。該戶不得不認為實欠者。以上情弊。實所不免。止緣江省州縣視役侵為常事。書役視花戶為利藪。且希冀將來舊欠。必有恩旨寬免。此時若不及早查辦。拖欠既深。無可徵比。若豁民欠。即役侵得免。是教之使侵。將來益無底止。臣所以不得已有清理之舉。惟有益加謹凜。體察屬員。以

無擾閭閻為主。得旨所奏已悉。此番經理。實汝不得已之舉。亦既殫竭心思矣。然與其經營於事後。孰若綢繆於事先。且十年二十年之間。必清察一次。亦豈政體。汝等若平時留心。何致有此哉。既往不咎。此後宜加之意耳。○又奏。江省災屬撫賑。需用甚多。先經派撥銀穀外。現尚需銀八十萬兩。查司庫正項錢糧。除留抵兵餉并雜支各項。所存無幾。請將兩淮運庫秋撥冊報存銀內。借支銀八十萬兩。得旨。知道了。○閩浙總督喀爾吉善查奏。本年浙屬。疊被水旱風潮等災。先後勘報。多屬含糊。如象山一縣。始而被旱。繼被風潮。而印委各官勘覆。尚稱有收。又麗水。縉雲。宣平三縣。雖據勘不成災。恐未確實。現在密飭查報。至前撫常安。辦理災務。實不免有粉飾之意。得旨。常安每存粉飾災傷之意。如此辦理。是矣。至於顧琮。乃樂於賑卹之人。若亦如此。是以寬濟寬也。凡事因其人而設施。無容心

焉。則善矣。且汝今任。恐人諱災之意頗切。而汝去年之在山東。何乃諱災耶。汝尚可教導。故如此批諭。然朕諭亦不易屢得也。○又奏臺灣府屬臺灣鳳山二縣。凡高阜無水源之村莊田園。晚稻黃萎。通計三千餘甲。實屬無收。現在照例題報。并知會巡臺御史督率該道府等妥辦。其諸羅一縣。水源灌溉之處居多。高阜田園零星無幾。不致成災。彰化淡水二處。陸續得雨。並未受旱。得旨覽奏俱悉。臺灣既受偏災。不比內地。宜加之意也。○又奏臺灣熟番生計維艱。查鳳山縣向有留存倉粟一項。分貯八社。每年借給番民數千石。春借秋償。不取其息。其餘臺灣縣大傑巔等二社。諸羅縣大武壠等九社。彰化縣半線等八社。淡防廳蓬山等十三社。悉係窮番。並無接濟之項。請將臺郡捐監案內議存倉穀撥二萬石。分給臺諸彰淡四屬視道里之遠近。番社之大小。勻貯。選老成殷實之土目通事經

管。照鳳山例借給。年底令各該廳縣盤查出結申報。土目通事倘有虧缺等事。即行革究著賠。得旨知道了。○湖廣總督塞楞額等奏武昌咸寧二縣交界馬蹟嶺地方。吳姓一族聚居。積慣為匪。當經官差緝拏。各犯敢於抗拒。嗣據該二縣先後詳報。拏獲吳月保等九名。訊供行竊多案。若僅照例充軍。仍在江浙內地易於逃回。應發寧古塔等處當差。得旨覽。又批。汝等但議其積匪之罪。而未及其抗拒之罪。不足示警。其為首者。竟當重處。附從者。照此議可也。○河南巡撫碩色奏豫省歸陳二府所屬州縣疊遭水旱。今歲又被偏災。倉儲屢賑久空。請將本省捐監穀內。滑縣酌撥一萬五千石。原武縣酌撥八千石。運至歸德。光山縣酌撥一萬石。運至陳州。飭令各該府分別存貯。至水陸腳價。現有各屬鹽當規禮。係提解藩庫充公閒款。應即於此項內動支。得旨甚妥。知道了。○山西巡撫準泰奏晉

省向設普濟堂之處。止陽曲等八州縣。因存費未充。留養難以周徧。現飭令各屬。凡係通衢。量擇空闲民房寺院。租設留養局。一切費用。該地方官先行墊給。臣及司道府州。分別捐給還項。至士民情願捐輸者。報明記功獎勵。得旨。晉省之民風。刁矣。刁則不應行小惠。以益啟其希冀之心。非所先務也。○兩廣總督策楞。署廣西巡撫鄂昌。廣西提督豆斌。奏歸順州莫漢卡地方。因安南匪徒。攻剽夷村。該國兵乘夜追捕。衝上山坡。內地守卡兵勇。聞邊外鎗砲聲。前往堵禦。適番目領兵追至。亦搶上山坡。晚間不能辨別。誤將卡兵殺傷。嗣聞內地文武各官查詢。即將誤捉之兵勇等陸續送進。現在照會該國王。即將誤殺內地兵丁之番目人等。查出下手正兇。拏至交界地方。知會內地文武。監同正法。報聞。○又策楞密奏。莫漢卡汛兵勇。誤被殺掠一事。除會同撫提二臣具奏外。臣細覈起釁之由。確

係安南追捕匪徒。黑夜不能辨別。致有殺掠。但邊隘所關。天朝體統所繫。未便遽視為過誤。致弛中外之防。臣已會檄該國王。令其查明辦理。至臣等會檄中。聲明尚未題奏者。原欲為該國王稍留餘步。以警惕其悔罪之心。懇恩暫緩降旨飭行。容俟該國王遵覆到日。臣等另行分別題奏。得旨覽。○雲貴總督張允隨奏。古州鎮城。自夏秋以來。時疾流行。兵民多有傳染。當即委員廣購藥料。配合丸散。撥醫分路診視。臣一面多製丹丸。親自帶往。倘到彼時疾未除。再行多方療治。得旨如此。則卿之前往查閱。雖屬王臣之誼。然不顧輕重。又增朕繫念矣。一切清吉平安處。速行奏聞。以慰懸切。

大清高宗法天隆運至誠先覺體元立極敷文
奮武孝慈神聖純皇帝實錄卷之三百二

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履歷

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部工部事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十二年丁卯十一月丁亥朔。

上詣

皇太后宮問安。○是日視藥三次。至己丑皆如
之。○戶部議口內外行宮二十八處看守弁
兵錢糧未便互異查例口內兵丁月支餉銀
一兩地七十畝惟湯山苑戶月支銀五錢米
一斛湯山現設苑戶七十名為數較多請裁
二十名每月均支給銀一兩與口內畫一至
口外熱河等處千總歲支俸銀六十兩地九
十畝與口內千總相同惟委署千總每名地

九十畝。月支餉銀五錢。兵每名地六十畝。月支餉銀或五錢或二錢五分。亦有無錢糧者。今議除現食五錢之兵。毋庸議增外。其原食五錢之委署千總。請月支銀一兩。原食二錢五分。併無錢糧之兵。請月支銀五錢。再各處行宮。均係各該總管管轄。惟巴克什營千總兵丁。向隸古北口提標。而錢糧又由內務府支領。自應交總管管轄。所有現設兵三十名。亦屬過多。應裁十名。再該處千總兵丁。既歸總管管轄。應與口外一體。千總除仍支俸銀六十兩外。應給地九十畝。將俸米及隨營應得馬乾銀等項。槩停。兵月給餉銀五錢。再應給地六十畝。所有應撥地畝。於附近古北口密雲縣等處撥給。其增給兵餉及巴克什營弁兵俸餉。均由該總管呈報內務府支給。得旨。湯山苑戶著裁去三十名。餘依議。○兵部議覆大學士原管川陝總督公慶復疏稱。涼州鎮原設配礮馬。未能負重致遠。請換駝六

十隻。將馬撥補營馬倒缺等語。查馬既不堪配礮。應盡數裁。准撥補倒缺。其需用駝之處。令在孽生廠挑補。從之。○原任浙江巡撫常安疏。奏布政使唐綏祖於本年八月間。德清縣典史濮標通詳德清縣知縣施念曾捏報平糶折收捐監案內。據稱該縣與藩司素好。恃勢侵漁等語。經臣飭該司查審。止將該縣捏報平糶一節。具詳題參。餘並不審詳。臣訪得該司曾發銀令施念曾代買茶葉。施念曾繳回原銀。買送收受。又富陽縣呂大雲因伊母生辰。斂費公製壽屏。該司亦以素好。不行查揭。本年淳安等三縣被水。該司詳請於常例外再賑三月。臣以此時應先賑兩月。何得遽請加賑。大拂其意。甚為不平。再該司曾將星士勒薦鹽商。又因與鹽商陳本有隙。借稱陳本故兄。欠伊銀兩。勒令代還。又慮後患。令報作育嬰堂費用。似此徇私狂悖。據實題參。得旨。常安。奏布政使唐綏祖各款。尚非贓

私狼籍可比。而亟掛彈章。一似不可姑容者。安知非常安先聞被劾之信。因疑喀爾吉善訪伊劣蹟。必由於唐綏祖開送。故捩拾傾陷。欲使兩敗俱傷。以洩已憤耶。但既有此奏。不可不加詳究。唐綏祖著解任。所叅各款。及本內有名人犯。俱交大學士高斌。會同巡撫顧琮。一併察審定擬具奏。○以鑲黃旗蒙古副都統保德。錦州副都統達松阿。對調。○調雲南布政使永貴。為浙江布政使。以雲南糧儲道宮爾勸。為雲南布政使。○戊子。

上詣

皇太后宮問安。○大學士等議。御史金相奏稱。六部郎中。員外主事等。漢缺既分司定額。滿缺則人不分司。司無定額。原為叅酌人地起見。而一司中未免多寡參差。前後互異。應令各堂官悉心斟酌。按司分之繁簡。定員額之多寡。既定之後。各堂官祇應於定額內量材更調。不得於已定之額有所增減等語。應如

所請。照漢司員之例。一體分司定額。至宗人府。理藩院。內務府。太僕寺。及盛京五部。均有額設司分。其體制職掌。與六部同。亦應一體酌定。此內如有蒙古司員之衙門。令該堂官一體酌覈分派。從之。○己丑。

上詣

皇太后宮問安。○定因公降革人員。保奏引見。例。諭各省文武官員。有因公累誤。部議降調。係該員應得之處分。部覆時。酌其情罪。或令該督撫。出具考語。送部引見。酌量錄用。已屬格外之恩。至於降旨依議降調之員。自應照所降之級。赴部候補。乃又有送都察院考覈引見之例。此等人員。有因原叅督撫所出考語平常。遲至數年。俟督撫離任。始行赴部。更有降調時。並不請咨考語赴部。及督撫屢更。復以無憑。出具考語。呈請引見者。既滋弊竇。抑且事屬重複。大抵為政貴簡而得要。例愈繁而弊愈多。嗣後著停止。其在京文武。并旗

員及各駐防人員。因公降革。有令該堂官該旗大臣。出具考語。帶領引見者。又有送都察院考覈者。條例亦覺繁多。不無啟趨避之途。其如何刪繁就簡。酌中定例。處著大學士。九卿。并八旗都統。詳議具奏。尋議在京各部院司員。及五城正指揮等官。并旗員。及各駐防人員。巡捕營叅遊守。因公累誤降革者。如辦事勤練。人才可用之員。任內並無錢糧不清。及治罪之案。該管大臣。會同都察院詳加察覈。果應行帶領引見。交該管大臣。出具切實考語。保奏帶領引見。其各駐防人員。咨送各該旗。帶領引見。應否去留。候旨定奪。從之。○
庚寅。

上詣

皇太后宮問安。○是日。視藥二次。至乙未。皆如之。○諭據山東巡撫阿里衮奏。稱該省被災州縣。應行賑卹之處。俱係銀米兼賑。需費浩繁。業蒙恩將乾隆十一年地丁銀兩。扣留備

用。其來歲青黃不接之時。尚應豫籌接濟。請於乾隆十年地丁。留協隣省銀兩項內。酌量存留備賑等語。著照所請。再留銀五十萬兩。以備撥賑之需。該部即遵諭行。○戶部議准。湖北巡撫陳宏謀疏。稱武昌。漢陽等四十州縣。衛荒蕪田地山場及屯地。一十一萬七千九百頃八十畝零。應飭令地方官將尚可開墾者。實力勸墾。照例升科。倘實係磽瘠。不得抑勒滋擾。從之。○命山東巡撫阿里衮來京。以山東布政使赫赫護理山東巡撫。○予故致仕吏部尚書性桂祭葬如例。謚恭簡。○辛卯。

上詣

皇太后宮問安。○諭據山西巡撫準泰奏。稱學政有統率士子之責。晉省兩年中。如天鎮之搶糧。鄉寧靜樂鎮寧等處之聚眾抗官。皆劣衿倡首。該學政從前未報劣行。寬縱之咎。已屬難辭。鎮寧等未結之案。該學政有無瞻徇

之處。現在查覈等語。夏廷芝著來京供職。其任內如有應叅之案。著準泰查叅。宋邦綏仍留湖北學政之任。山西學政著德保去。○大學士等會議。哈密扎薩克貝子玉素富奏稱。奉旨將金塔寺回民。歸入臣所屬旗分。撥給餘地。哈密地方少雨。俱賴山雪融化。流水灌溉。往往被旱歉收。若將金塔寺回民。移居此處。撥給之地。增至一萬餘畝。恐渠水不足等語。查該撫黃廷桂奏。金塔寺回民匱乏。臣等議令移居哈密。今該貝子所奏種種不便。請仍勅該撫。於金塔寺原圈給回民地界內。查明可墾餘地。將無地回民。每戶撥給百畝。所需牛具籽種。照初次安插者減半給與。仍嚴飭地方員弁。善為董率。頭目老戶等。教導回衆。盡力農功。毋得仍前怠惰。從之。○理藩院奏。喀爾喀扎薩克多羅郡王成衮札布之子齊巴克雅喇木丕勒。應否仍襲郡王。得旨。車木楚克納木札勒成衮札布父子俱係黽勉

効力之人。著加恩將成衮札布之子齊巴克雅喇木丕勒。仍襲扎薩克多羅郡王。○以內閣侍讀學士雅爾圖為兵部右侍郎。○壬辰上詣

皇太后宮問安。○御乾清門聽政。○戶部議覆四川巡撫紀山疏稱。進勘金川案內。前後撥湖北。江西。廣東等省銀一百二十萬兩。陸續動用銀一百萬兩零。請再於隣省添撥銀五十萬兩。解川備用等語。應如所請。於秋撥留協銀內。湖南撥銀三十萬兩。江西撥銀二十萬兩。從之。○川陝總督張廣泗奏。金川事尚未竣。大兵未可全撤。其從征土兵萬餘。久役未免疲乏。且瞬屆春初。咸懷東作。自應酌量減撤。請照雍正年間。滇黔用兵之例。豫於各營招募新兵。給以守餉。俟土兵徹退。即行抽調。制兵前赴軍營添補。下軍機大臣等議行。○以光祿寺卿德爾格。左僉都御史張泰開並為內閣學士兼禮部侍郎。○以少詹事西

成為太常寺卿。○移浙江歸安縣主簿駐菱湖鎮。安吉州判駐梅溪鎮。鑄給關防。孝豐縣天目巡檢。鄞縣杖錫巡檢奉化縣塔山巡檢各復原駐。象山縣趙舉巡檢駐三角地方。定海縣沈舉巡檢駐金塘樂清縣縣丞駐大荆倉。從原任巡撫常安請也。○癸巳。

上詣

皇太后宮問安。○吏部等部議覆貴州巡撫孫紹武疏稱。遵義府仁懷縣幅幘最寬。自雍正

聖訓卷三十二

十

八年。移駐新縣後。將府屬通判。移駐舊縣。所有仁懷河西土城。三里地方。一切刑錢案件。撥歸分理。惟士子應試。未經議及。現在教諭訓導均駐新縣。舊縣距六百餘里。生童赴試維艱。請將訓導移駐舊城等語。查該縣相距既遠。教職士子兩有未便。應准其移駐。又稱歲科兩試。即由該訓導錄送。通判考取送府。並請頒給仁懷舊縣訓導學記等語。查通判考取送府。止代縣考。應令該生向通

判衙門報名候考。毋庸該訓導錄送。其學記咨禮部鑄給。至入學名數。該縣僻處邊隅。人文尚未加盛。且分隸者亦止仁懷河西土城。三里地方。亦應仍照舊額取進。從之。○賑卹浙江壽昌淳安遂安等三縣飢民。緩徵本年漕糧。其地丁錢糧。命於明歲補豁。○甲午。遣官祭先醫之神。○

上詣

皇太后宮問安。○御懋勤殿。勾到朝審情實罪

聖訓卷三十二

十一

犯。停決斬犯五人。絞犯二人。餘十三人予勾。○諭內閣。刑部。行師最重紀律。故失律有誅罪在不宥。索士弼。在瞻對軍前。與提督李質粹意見齟齬。遇事推諉。奉文調遣。違期不至。經大學士慶復參奏。李交刑部治罪。朝審擬以情實。應即予勾。但慶復參奏。原據李質粹稟報。而李質粹所報。班滾焚巢斃命之處。始據奏報。朕即以為未可信。因命張廣泗。紀山等。備細訪查。乃知班滾現踞如郎。且敢領兵

攻打上贍對土司康朱肆行滋事。夫首惡渠魁。關係至為緊要。而以生為死。全屬子虛。則其他功過是非。豈復可信。張廣泗大金川軍務告竣後。必須將班滾另行辦理。袁士弼此次暫行停勾。李質粹即非枉陷袁士弼。而偽奏已屬顯然。著拏交刑部。羈候班滾事竣時。令張廣泗將此案情節。秉公據實逐一查明。現在隨營將弁內。當時在事之人尚多。必得真知確見。俟張廣泗查奏到日。令李質粹與袁士弼對質。則功過自明。袁士弼自有應得之罪。著入下年朝審。此次之不勾。非朕輕軍法而姑息從寬也。○大學士等議覆兩淮鹽政吉慶奏稱。兩淮鹽場猝被潮災。米價昂貴。請將鹽義倉穀減價平糶等語。查平糶倉穀。若減價太少。易滋弊竇。今兩淮米價。自一兩七八錢至二兩。應令該鹽政將平糶米價。每石總以酌減三錢為率。不得過少。至所奏本年例無加賑場分。於今冬平糶。現在加賑者。

俟賑畢再行出糶。應如所請。得旨依議速行。○又議覆兩淮鹽政吉慶奏稱。鹽義倉穀現在缺額。請動項分給各商。擇豐收價平地方採買等語。查該處潮災後。現在減價平糶。若即令各商領銀採買。恐滋弊端。應令該鹽政於平糶後。隨時酌量買補。得旨依議速行。○乙未。

上詣

皇太后宮問安。○諭軍機大臣等。袁士弼朝審情實。未經勾決。其原委已有旨諭內閣刑部。并令張廣泗將此案徹底查明。但張廣泗現辦大金川軍務。若明發諭旨。則汪結羅于朝等俱得豫知。辦理班滾之信。羅于朝尚屬內地營員。而汪結乃投順土司。狼子野心。恐其乘機先發。別起釁端。又成一班滾。莎羅奔為害叵測。是以所降之旨。密不發鈔。然袁士弼係違誤軍機。由軍前拏交刑部治罪之犯。軍營將弁聞其未經正法。而不深悉其緣由。將

謂行師失律。尚可倖邀寬典。何以明紀律而肅軍威。著將此旨密寄張廣泗。令其斟酌情形。俟應宣布時。將末士弼未經勾決之故。摘出曉諭衆人。使共知此次之暫行停勾。正欲令罪狀確實。以成信讞。並非朕之尚姑息而弛軍法。至汪結羅于朝。前已傳諭張廣泗。令密行防範。俟金川軍務告竣。進勦班滾時。先期以他事調赴軍營。訊明班滾下落。立正其罪。并不可稍露風聲。以防意外。經今逾月。張廣泗尚未奏到。其接到諭旨後情形若何。汪結等曾否稍有知覺。並可否如此辦理之處。著即行奏聞。○丙申。

上詣

皇太后宮問安。○諭軍機大臣等。四川巡撫紀山查奏。渝關缺額情形。據稱乾隆十一年。商販悉赴深山。砍運木植。抵關希少。於定額尚不敷銀一十二兩零。該撫捐補足額報解等語。權關徵稅。祇應儘收儘解。如果經理不善。

以致缺額。即應照例題明。議處賠補。自有定例。若因為數無多。聽其私自捐補。無此政體。且此端一開。不肖之員。反得以藉口。必將盈餘藏匿不報。以官帑飽其私橐。而指零星小數。為捐俸墊解。流弊何可究詰。渝關缺額之處。本不應捐補。即實係捐解。亦不當見之章奏。紀山據查報之語。代為奏聞。所見甚屬瑣屑。著傳諭知之。○禮部議覆。四川巡撫紀山疏稱。岳池縣。自康熙六十一年。復設縣學。現在人文加盛。請照例添設廩增出貢等語。應如所請。准照小學之例。設立廩增各十名。至出貢不便太驟。應俟四次歲考後。廩缺陸續補足。將初補之首廩。食餼十二年者。准其出貢。嗣後三年一貢。從之。○以廣西鎮安府屬向武土知州黃宸子煥章襲職。○緩福建長樂福清二縣本年旱災。應徵新舊錢糧。○丁酉。

上詣

皇太后宮問安。○戊戌。

上詣

皇太后宮問安。○諭直隸總督那蘇圖奏稱天津靜海二縣今歲偏災較重。現在加恩普賑。但二縣地處窪下。產米無多。又僻在海隅。商販稀少。米無來路。不得不為明春豫籌調劑。請暫開奉天海運等語。著照所請。准其暫開一年。俟明歲秋收後停止。其如何給照採買查驗發糶。以杜偷漏之處。該督督率有司妥協辦理。并諭盛京將軍知之。○己亥。

聖祖仁皇帝忌辰遣官祭

景陵。○

上詣

奉先殿。

壽皇殿行禮。○戶部議覆四川巡撫紀山疏稱。明正司汪結補裏塘宣撫司。應給養廉。但現在裏塘土司改設一正二副。正土司安本既降為副。未便仍令支食正土司養廉。除副土

司康邵江錯。仍食原給養廉銀二百四十八兩五錢外。其原給正土司養廉銀二百九十四兩五錢。與汪結支食。另請加增副土司養廉銀二百四十八兩五錢。給安本支食。即將該處及巴塘夷賦銀內。就便扣給等語。應如所請。從之。○庚子。

上詣

皇太后宮問安。○大學士等議覆川陝總督張廣泗奏。綏輯邊營各款。一。兵丁積欠。除各營新借及未還生息銀兩。并製辦鉛藥。借領銀兩。均應扣還。其雍正年間。派往軍營並各處駐防長支鹽菜草料。并少交馬價。未扣銀一萬七千九十餘兩。又乾隆元二三等年。派往哈密等處駐防。借支製辦行裝。未扣銀六千二百九十餘兩。又自雍正十三年。至乾隆九年。護送喇嘛夷使進藏。少交馬匹鍋帳等項。未扣銀九百三十餘兩。以上各項。可否豁免等語。查此項閱年既久。若按年坐扣。兵力不

免拮据。但帑項攸關。應否豁免。候旨遵行。一。
給發糧餉。於前三日。將應扣朋馬等項示諭。
此外分毫。不許攤扣。至軍械小有損敝。令各
兵自行修理。年久朽壞。及鉛藥不敷。俱於公
糧內動支。號衣盔甲。收貯公所。非大操。不許
穿用。因公遠差。准於公糧內動支盤費。新官
到任。上司過往。不准離汛送迎。督提鎮將員
弁公出。不許多隨兵丁。違者照例議處。一。選
補兵丁。凡餘丁缺出。驗其人材壯健。無過犯

者。取具父兄隣佑保結。新兵。取具原管旗隊
什長保結。方准頂補。收伍後。責成旗隊什長
約束。如有生事。什長隱匿。經旗隊查出。什長
責革。旗隊記功。旗隊隱匿。千把外委查出。旗
隊責革。千把外委記功。千把外委隱匿。該管
上司知情徇隱。一并叅處究擬。一。訓練兵丁。
鎗礮。以命中擊遠為主。弓。以六力為上。箭。以
中的為要。至操演之期。每年春季大操。於二
月十五日開。四月十五日止。秋季大操。於七

月十五日開。九月十五日止。開操後。每十日
內。三日演弓箭。三日演鎗礮。三日演技藝。一
日演陣式。將備千把身先士卒。提鎮大員。十
日親閱一次。大操停止後。仍每五日小操一
次。盛暑嚴寒住操。一。兵丁缺乏。歲底諸通畢
集。更為艱窘。請令該標協營。查其每季應領
餉銀若干。於冬季領餉時。將春季餉銀。豫支
若干。即於次年分作四季扣還各等語。均應
如所請。得旨。未完欠項。有旨諭部。餘依議。諭

曰。甘省各標協營。及陝提標內兵丁積欠。有
雍正七八九十等年。出征西路軍營。派往哈
馬爾達巴漢等處。長支鹽菜草料。并馬乾馬
價。乾隆元二三等年。所派駐防哈密。赤金等
處。并豫備戰兵製辦行裝。及雍正十三年。至
乾隆二五六七八九等年。護送夷使進藏。少
交馬匹鍋帳羊價等項。借支未扣銀。共二萬
四千餘兩。例應於每年餉銀內。按季扣還。但
念邊省生計艱難。現在兵丁尚有應扣之項。

若將歷年積欠一例坐扣未免拮据著加恩令該督撫查明豁免以紓兵力該部即遵諭行○命福建建寧鎮總兵陳汝鍵來京陛見調浙江黃巖鎮總兵薛瑀為建寧鎮總兵以原任福建金門鎮總兵孟伍進為黃巖鎮總兵○辛丑

上詣

皇太后宮問安○諭翰林院檢討阮學浩所奏貢生閻若璩

孔廟從祀末議十一條朕粗加披閱大概多前人所已經議及非有卓然至當不易之論有裨典制必當見之施行者即如議樂舞宜用八佾遵豆宜用十二一條其意謂尊崇祀典宜用天子禮樂夫

孔子道德高厚與天地參即備天子禮樂以奉之亦未足以昭崇報我朝

列聖隆禮致敬於

先師至矣盡矣而樂舞仍用六佾非畧而未

講也朕謂季氏八佾舞於庭

孔子斥其是可忍也孰不可忍今顧以

孔子所非者祀

孔子是得為敬

孔子乎在他人則議之在己則受之於聖人

之心安乎謂

孔子生未嘗為諸侯六佾亦豈所固有此乃

本之宋臣王安石謂史記不當列

孔子於世家不過文人翻新立說豈足據為

定論且天子尊師所貴宣明德化敦敘彝倫

實能行聖道以端治理明聖教以淑人心坐

而言起而行使天下無一人不與被聖人之

澤至於樂舞之儀文遵豆之度數其末節耳

而以此為尊師首務豈所謂能知輕重者乎

又所稱兩廡先賢先儒位次凌躐宜請釐正

一條兩廡從祀諸人累朝互有出入蓋書生

習氣喜逞臆斷而訾典章就其一偏一曲之

見言人人殊考之前史甚至有迎合時事黨

護鄉曲者。漢臣議禮如聚訟之譏。良有以也。阮學浩所信者。閻若璩之說。而閻若璩此條。如何釐正。若者宜先。若者宜後。在閻若璩即無定論。況

孔廟祀典。於雍正二年奉

皇考世宗憲皇帝諭旨。令廷臣集議。所有應增祀復祀之先賢先儒。已經一一釐正。閻若璩所謂西多於東者。蓋未釐正以前之舊。今定從祀東廡六十二人。西廡六十一人。位次秩然。初無凌躡。現載大清會典。閻若璩固未及見。阮學浩何備官而亦未之聞耶。祀典關係重大。若祇憑其私心淺見。率議更張。忽進忽退。忽東忽西。成何政體。以朕觀之。此二條即不可施行。是以明切曉諭。令衆知之。其餘各條。或有應議之處。大學士會同該部。詳議具奏。尋議。該檢討所奏。閻若璩末議。第三條。復祀秦冉。顏何。補祀縣亶。第四條。增祀樂正克。第七八兩條。增祀諸葛亮。范仲淹。第十條。增

祀黃幹。均蒙

聖祖仁皇帝。

世宗憲皇帝。採擇廷議。先後舉行。第二條。升祀有若於廟庭。又於乾隆三年。議准尚書徐元夢條奏舉行。俱毋庸再議外。其第二條內。議升祀公西華於廟庭。據閻若璩以論語孟武伯問仁。子路曾皙等侍坐。兩章為斷。查論語所記四科諸賢。蓋專指從於陳蔡者而言。唐開元中。據此遂定為十哲。升祀廟庭。其實史

記載

孔子之言。謂受業身通者七十有七人。皆異能之士。則知聖門高賢。原不止此數。故宋咸淳中。升祀子張。本朝乾隆三年。升祀有若。皆以補唐禮所未備。至公西華之賢。固不下於季路。冉有。然七十子之中。如子賤子羔。原思南容。漆雕開。皆為聖人所深許。較之公西華亦難為軒輊。即以閻若璩據問仁一章。謂與由求並稱。當升公西華。而所據侍坐一章。則

曾子升配已不能復進曾皙。是議禮紛紛如聚訟。轉不如姑仍其舊之為安也。再第四條議增祀公明儀。第五條增祀曾申。申詳。第六條增祀漢河間獻王劉德。查公明儀。曾申。申詳見於孟子。及檀弓等書。皆能守家傳。謹師法。以不背於聖賢之徒。但授受淵源。既罕明證。其闡明聖道。亦別無考據。漢河間獻王劉德。修學好古。所得皆古文先秦舊書。如周官尚書禮記之屬。事蹟具載漢書。但當暴秦之時。轉徙流離。藏遺經於焚書坑儒之會。諸儒實為其難。及挾書之禁已弛。以藩王有土之尊。出其力以搜求圖籍。獻王實為其易。若因子張之弟子。增祀公明儀。則曾子高弟。尚有樂正子春。子襄。公明高。若因曾子之孫。子張之子。增祀曾申。申詳。則孔氏子孫之賢者。尚有孔斌。孔穿。以下多人。若因有功經籍。增祀劉德。則藏書壁中。避禍嵩山之孔鮒。亦未列俎豆。事閱數千年。博議者未之及。非有闕遺。

實重之也。又第九條議改祀蔡元。定於兩廡。其意以為蔡元。定自有功聖門。非以子重。果如所言。不但無以處曾皙。即程珦。朱松。於聖道亦各有體認。豈皆以子重者。此其為臆說無憑。又不辨而自明。以上各條。俱毋庸議。從之。○諭昨據工部摺奏。蕪湖工關。較去年短少。行令查覈。業經降旨依議。今日戶部議稱。蕪湖戶關。盈餘較去年有餘。毋庸置議等語。此案工關盈餘。雖較上屆不足。其戶關較上年盈餘之數。足敷抵補。如將有餘者。毋庸置議。不足者。再加行查。於考覈功過之意。未合。即使行查。亦徒多往返登答。工部再行查覈之處。不必行。嗣後著該部照此辦理。如一人而兼兩關。其比較上年盈餘之處。俱有不足。再行議令該督撫據實查覈。

大清高宗法天隆運至誠先覺體元立極敷文奮武孝慈神聖純皇帝實錄卷之三百二

實錄卷之三百二

未

大清高宗法天隆運至誠先覺體元立極敷文奮武孝慈神聖純皇帝實錄卷之三百三

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履歷
總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部工部事務
世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次
尋常紀錄十四次臣德瑛經筵講官太子少保工部尚書紀錄六次臣曹振鏞等奉
敕修

乾隆十二年丁卯十一月壬寅

實錄卷之三百三

上詣

皇太后宮問安。○癸卯。

上詣

皇太后宮問安。○諭。據管理阿爾泰軍臺副都統羅山等。以坐臺原任都統佟世茂。年老患病。伊子佟泰呈請。願代伊父効力軍臺等情。奏聞。佟世茂。坐臺亦經五載。既年老患病。著加恩准其回京。不必令伊子佟泰往代。該部另行派人前往。○總理行營王大臣等議直

隸總督那蘇圖奏。籌備東巡事宜。一。自德州至天津。兩岸緯路。酌歸河員修整。查運河兩岸。每年本有歲修。此項修理。自應專歸河工。無庸交地方官重辦。一。請定豫備船數。查應用船隻。業奏准於天津。及內務府。分別備辦。無庸再議。至渡緯等項。現在設有岱船。應令於此內撥用。一。請揀選緯夫。恭查

御座。及隨侍等船。應需緯夫。於驛夫內。揀選六百八十名。其餘侍衛等船。於附近州縣。分募

民夫伺候。酌給口糧。一。緯夫號衣。應東直二省通融。據奏。

皇船及內庭船。緯夫需用袍帶。運帽。鞵。韉。緯板。緯繩等項。已准阿里衮咨明。酌辦等語。應令東省供用後。即交直省更替備用。其侍衛等船。緯夫衣帽等項。一體酌備。一。更換馬匹。請酌加草料銀兩。查此項馬匹。原議於

聖駕將至德州時。豫備。更換後。即應回營。並無守候耽延之處。應毋庸議。一。修墊駝馬經由

道路。據奏。除德州及運河兩岸緯路。無庸另修外。其餘道路橋梁。現飭酌動公項。撥修等語。應聽自行辦理。從之。○戶部議准。山東巡撫阿里衮奏。稱奉天運米十萬石。分撥青萊。武定等府屬。除先運米三萬三千石外。其未運米六萬七千石。現值隆冬。輓運維艱。且青萊二屬。尚有倉穀漕糧。歲內似可無虞。已咨會奉省。將未運米石。採辦齊全。俟來歲春融。即委員雇船。赴奉領運。一切運米事宜。仍照

今歲赴天津截撥漕米成例辦理。從之。○兵部議覆雲南提督潘紹周奏。稱鶴麗鎮屬維西營。密邇中甸。控扼爐藏。制馭蒙番。洵為極邊要地。原設叅將營制。未足以資彈壓。再劍川協雖原設副將。自維西設營後。該協各汛已入內地。請將協營對調等語。係為邊地駐防起見。應如所奏。將雲南劍川協改營。維西營改協。其原設劍川協副將一員。都司一員。維西營叅將一員。守備一員。俱准其改駐。從

之。○刑部等部議覆貴州按察使介錫周奏稱貴州地方遼濶。府州縣所管境內。每廣袤至六七站不等。遇有命案。印官公出。請鄰邑代驗。屍身業經發變。難免覆檢。請嗣後令經歷知事吏目典史往驗。寫立傷單。候印官回日。查驗填圖通報等語。查屍傷全憑相驗。若遲延發變。易起爭端。應如該按察使所奏。并通行直省。凡所屬府州縣內。如無同城佐貳。又地方廣袤者。一體酌辦。從之。○甲辰。

上以冬至祀

天於

圜丘。是日起齋戒三日。○乙巳。諭山東沂州府屬蘭山邾城二邑河道隄埝。應修應築之處。曾降旨令大學士高斌。於江南查賑事竣。便道查勘。今據奏。已委南河叅將邱若龍等。前往詳加查勘。將原有河道。疏其淤淺。舊存隄埝。補其殘缺。至原無隄埝之處。請建石工。以禦險溜。俟查勘酌議興舉等語。大學士高斌

現在查審叅案。尚需時日。蘭山災地。以工寓賑。於災民甚有裨益。著河東總督完顏偉前往率同大學士高斌差員。悉心相度。其淤淺河道。殘缺隄埝。應速行修補者。即酌議奏聞辦理。俾災民早霑以工寓賑之恩。其一切石工。尚可遲緩者。仍俟大學士高斌親行勘明。再行辦理。○丙午。

上詣

南郊齋宮齋宿。○丁未。冬至。祀

天於

圜丘。

上親詣行禮。○遣官祭

永陵。

福陵。

昭陵。

昭西陵。

孝陵。

孝東陵。

景陵。

泰陵。○遣官祭

端慧皇太子園寢。○

上詣

皇太后宮問安。○戊申。

上以冬至節。詣

壽康宮。行慶賀

皇太后禮。王大臣於

慈寧門。衆官於午門。行禮。○御太和殿受賀。○

諭朕聞閩省風俗。尚鬼信巫。偶遇雨暘失時。

遂有無藉之徒。意在歛錢肥己。因而詭稱某

處神佛靈應。聚衆迎賽。或將神像擡至街衢。

挾令地方官跪拜迎送。種種惡習。殊屬不經。

凡地方遇水旱。自督撫大吏。以至州縣有司。

固當竭誠致禱明神。為民請命。豈有棍徒藉

名聚衆擡神。挾持官長。因而召爭起衅。滋生

事端。甚為風俗人心之害。此風斷不可長。嗣

後著嚴行禁止。倘有違犯。即照律治罪。地方

官倘或悠忽從事。姑息養奸。即著該督撫叅

處。他省或有似此惡習者。著該督撫一體辦

理。○己酉。定邊副將軍額駙策凌。奏請陞見。

允之。以駐劄北路軍營護軍統領塔爾瑪善

暫署副將軍印務。○以廣東瓊州鎮總兵黃

有才。左翼鎮總兵黃士俊對調。○庚戌。

上詣

壽康宮。侍

皇太后宴。○諭。今歲七月。江南地方。猝被潮災。

朕心深為軫念。屢降諭旨。令該督撫加意賑

卹。惟是賑濟月分。至冬底已滿。離來春麥熟

尚遙。恐窮黎仍不免嗷待之虞。著將蘇。松。太

所屬被災最重之崇明。極次貧民。再加展三

月。次重之鎮洋。寶山。太倉。上海。及南匯之浙

鹽場。極次貧民。俱加展兩月。又次之常熟。

昭文。極次貧民。俱加展一月。其淮北所屬。被

水成災。雖較江以南稍次。但係積歉之區。其

災重之海州。沭陽。邳州。宿遷。睢寧。銅山。沛縣。

安東桃源九州縣內。被災九十分者。極次貧民。俱加展兩月。被災七八分者。極次貧民。俱加展一月。其兩淮鹽場竈戶。亦著一體加恩。被災十分之莞瀆。九分之板浦徐瀆中正臨洪興莊。七分之伍祐。極次貧民。俱加展兩月。六分之新興。極貧加展一月。次貧同五分之劉莊廟灣。極次貧民。俱加賑一月。至衛軍貧生。以及寄居場地之民戶。各隨坐落地方。分別照例辦理。俾得有資接濟。該部遵諭速行。

○辛亥。

皇太后聖壽節。遣官祭

太廟後殿。○

上詣

壽康宮。行慶賀

皇太后禮。王大臣於

慈寧門東官於午門。行禮。○復詣

皇太后宮侍宴。○諭朕尊崇

先師。仰止宮牆。已降旨於來歲孟春。躬謁

孔林。嗣因東省秋潦成災。雖經賑卹。恐一時民氣未復。若改俟秋間前往。未知於民情實在若何。該地方業經動帑豫備。遲至秋間。不免又多一番勞費。踴躍望幸。自屬輿情。但巡幸大典。所期於問閭實有裨益。是以特召巡撫阿里衮來京。面加咨詢。或春或秋。何者為便。據該撫奏稱。東省被災州縣。俱已撫綏得所。其經行道路營盤。俱經豫備。若春月前往。春麥雖不能補種。而秋田即可及時耕作。以待西成。若遲至秋間。則既誤麥收。并妨秋稼。即在地秋禾。亦須早獲。轉於民間歲計未便等語。看此情節。則改至秋間。仍不如乘春前往為宜。但正月尚寒。著定於二月初四日。恭

奉

皇太后鑾輿起程。○壬子。

上詣

皇太后宮問安。○定

郊壇大祀誓戒百官禮。諭古天地大祀。前期有

百官受誓戒之禮。周官冢宰祀五帝則掌百官之誓戒。唐宋則掌以太尉。或於尚書省。或朝堂。明初誓於中書省。後於闕門宣制。嘉靖中則親御奉天殿。百官朝服聽誓戒。所以聳衆聽而致肅共。懲怠玩。典至重也。國朝祀典太常寺先期行文出示。蓋本古人誓戒遺意。而集衆宣誓。儀章未舉。朕思八政祀居其首。而大祀莫重於郊。嗣後有事於

園丘

方澤

祈穀

雩祭。應於午門前宣誓戒。陪祀之王公文武大臣官員朝服齊集。跪聽行禮。以昭齋明嚴敬之義。大學士會同該部稽古具儀以聞。尋議嗣後有事於

園丘

方澤

祈穀

雩祭前期四日。鴻臚寺於午門外設勅案一。前設香案一。令御史四員。禮部鴻臚寺堂官各二員。侍儀。鳴贊官二員。於午門外東西向立。陪祀之王公文武大臣官員及執事官之應齋戒者。俱朝服齊集。內閣學士恭捧勅諭。內閣官前導。大學士隨行。由午門中門出。太常寺堂官接捧勅諭。安置勅案上。退。鳴贊官贊排班。鴻臚寺官引陪祀王以下文武各官排班。立。鳴贊官贊跪。王以下文武各官皆跪。鳴贊官贊宣勅諭。宣勅官詣勅案前。行一跪三叩禮。興。從勅案上恭捧勂諭。就勂案東傍西向立。宣讀勂諭。宣畢。恭捧勂諭。仍安置勂案上。退。鳴贊官贊叩。興。王以下文武各官皆退。太常寺堂官恭捧勂諭送內閣。其陪祀之王公文武大臣官員等於次日各詣齋所。至誓戒勂諭交翰林院撰擬進呈。宣勂諭官由太常寺奏派。黃案案衣香案交工部備辦。香案上陳設五供。交太常寺備辦。從之。勂諭曰。皇

帝勅諭陪祀王公文武大臣官員及執事人等。茲以某年月日恭祀某壇。惟爾羣臣。其蠲乃心。齊乃志。各揚其職。敢或不共。國有常刑。欽哉。勿怠。○吏部議覆黑龍江等處將軍富森等疏報年滿官學教習一摺。除列二等者應照例留學。毋庸議叙外。其列一等者查係由本處索倫等項人內挑補。未便以京員補用。應照倉官年滿守候武職之例。咨部帶領引見。記名後。以本處驍騎校陞補。并請嗣後黑龍江等處各學教習年滿。列為一等。臣部查明。係由本處挑取筆帖式充補者。俱照倉官年滿例辦理。如係本處揀選考取繙譯。咨送臣部帶領引見。補放筆帖式充補者。准與在京各學教習。以小京官選用。如情願守候武職。亦聽從之。○考選八旗軍政。卓異官一百十員。不謹官二員。罷軟官九員。年老官五員。有疾官二十九員。才力不及官八員。照例分別議叙。處分有差。其曾經出兵打仗之年

老官二十九員。賞給全俸半俸有差。○調山東泰安府知府徐大材。赴部引見。○癸丑上詣

雍和宮行禮。○諭山東省被災州縣。已加恩多方賑卹。第念停賑之後。來春民食未免艱難。著將被災最重之東平等二十三州縣衛。無論極次貧民。概行加賑兩個月。被災次重之齊河等六十州縣衛所。極貧加賑兩個月。次貧加賑一個月。其鄒平。泰安。新泰。萊蕪。蒙陰。費縣。堂邑。成災原止五分。並各災屬內。有被災五分貧民。及被災六分次貧。止撫卹一月口糧。例不加賑。又各災屬內。有先被水淹。旋經消落之處。雖勘不成災。與災地毗連。收穫究屬歉薄。此等貧民。歲內尚可支持。來春青黃不接。恐有乏食之虞。或應借給口糧。或須加賑一月。著該撫臨時確察情形。酌量分別辦理。再該省被災之處既多。米價不無昂貴。況來春賑借。需用浩繁。必米糧充裕。方於民

食有裨。著將河南省漕糧內粟米全數截留。並撥運天津北倉漕米共足二十萬石。以資接濟。其如何截留運往之處。著總督那蘇圖巡撫碩色。阿里衮。商酌妥協。一面辦理。一面奏聞。該部遵諭速行。○甲寅。

上詣

皇太后宮問安。○乙卯。諭軍機大臣等。據李繩武奏稱。有準夷逃來之巴顏庫車克等。逃出時。曾被人知覺。又有追拏情節。理宜遵旨阻回。但巴顏庫車克情極。取出佩刀。意欲自盡。苦求收留。伏祈降旨訓諭等語。朕從前降旨。如有投誠人至邊卡時。即將伊曾否遇見彼處之人。及有無追拏情事。詢明辦理。特為此等投來人內。有從前逃出被擒。後復投誠者。其中情節。彼處人業已深悉。是以令伊等詢問明白。不令收留。今巴顏庫車克等三人。內一人。經額敏和卓查明。係伊屬下部落。其無檔案可稽之二人。亦稱係自幼被擄。伊等雖

非內地之人。並無被獲復逃情事。李繩武自應斟酌辦理。乃堅持不受。所謂因噎廢食。固執太甚。況哀懇迫切。斷不肯回。情亦可憫。著傳諭李繩武。令收留伊等。照例辦理。從前額駙策凌。以投誠之杭噶勒。曾遇見彼處之人。即行阻回。經朕批諭。所辦甚屬拘泥。再有似此不願回去者。仍著收留。今覽李繩武所奏。伊等皆未能領會前降諭旨。著將此再行傳旨。曉諭兩路軍營大臣。嗣後務須審度情形。酌量妥辦。不得仍前拘泥。○丙辰。

上詣

皇太后宮問安。○御乾清門聽政。○兵部議覆。荊州將軍德敏等疏稱。荊州滿蒙閑散。及另記檔案開檔養子各閑散。共一千六百三十餘名。現在各佐領下。多寡不一。遇有挑選披甲。等缺。壅滯不均。請將各閑散均齊旗分等語。應如所請。除將開檔養子閑散二百二十名。俱均齊在各本旗外。其滿蒙閑散。并另記

檔案開散。共一千四百十八名。俱准在八旗畫一均齊。從之。○以大理寺少卿鄒一桂為左僉都御史。○以禮科給事中增綬保為光祿寺卿。○以吏部左侍郎蔣溥充經筵講官。侍讀學士齊召南充日講起居注官。○是月直隸總督那蘇圖奏。薊永昌河四協營。前於提標餘息內。分別營運。查四處除原給本銀外。共積存利銀四千五十餘兩。請將薊永河三協。原本及積存利銀。交典商營運。昌平營原開米糧店鋪本利銀兩。仍照舊營運。俱照提標例。二分起息。俟取息日豐開賞。得旨。知道了。○兩江總督尹繼善等奏。下江被災地方。現已照例賑卹。除災輕州縣所得正賑。均可支持外。其災重之區。尚須加展。正在商酌奏懇。蒙諭令將吉慶所奏。竈戶加賑月分。照民戶酌量查奏。隨即札詢吉慶。據稱伍祐一場。災傷極重。新興場次重。若從蕩地計算。止成災七分六分。例賑止兩月一月。劉莊廟灣

二場。止成災五分。例不加賑。但四場非於例外加賑。不足以資接濟。故先行密請。至通州淮安分司所屬。被災七八九十分之場。竈應否格外加展。原俟賑務將畢。再看情形。并俟民戶大勢。一體斟酌等語。應如所請。將伍祐一場。無分極次貧民。俱加展兩月。新興之極貧。加展一月。其次貧。同劉莊廟灣之極次貧。俱加賑一月。其餘各場。分別酌定加展月分。一併彙入民戶摺內辦理。得旨。覽。○福建漳州鎮總兵馬負書奏。報巡察漳鎮地方。並訓練各營伍情形。得旨。覽。奏俱悉。漳州民風刁悍。負氣而不知禮義。實不比他處。汝宜加之意也。○湖廣襄陽鎮總兵齊大勇奏。巡察襄陽各營伍。途次接奉諭旨。調任陝西興漢鎮。現在巡察已畢。恭摺請訓。得旨。覽。奏俱悉。興漢為邊陲重地。武備更宜實力整頓。然亦不可不顧兵丁勞苦。為之過甚也。○山東學政于敏中。以調任浙江奏謝。並懇進京聆訓。

得旨不必來京。汝在東省。頗屬安靜。此則律已之道得矣。至於浙省文氣浮華。汝當挽其流而示之的。此外更何訓汝之有。○調任陝西學政。胡中藻奏陝甘每考一棚。周行至千餘里。臣辦理四年。非案不徹燭。即騎不停鞭。仗恃強壯。不敢顧惜其身。然病且死者二次。向來議設此省兩學政。皆梗不能行。不過為省一學。臣養廉然與其潦草塞責。即一學臣養廉如同虛耗。誠不若分設為愈。得旨。汝奏尚屬據實。但未免自表之意多。而且語不得體。豈敬慎事君之誼。至於此事。另有區畫也。○川陝總督張廣泗奏。前奉諭旨。班滾詭計免脫。舍大金川而何往。臣查上年攻勦瞻對。果如慶復所奏。拆毀戰礮。分割其地。則班滾無可容身。自必潛逃他境。今查李質粹初臨賊境。尚攻克礮寨十餘處。迨兵過如郎。僅焚空礮二座。及圍燒泥日一寨。餘皆完好如舊。至分地之議。各土司因班滾現在。無人敢領。

悉仍為班滾所踞。至班滾所踞大礮。並未燒燬。其黨羽亦並未擒拏。班滾安肯舍其巢穴。遠赴金川。但現在進勦金川。必須全力。應俟殄滅金酋。再移師瞻對。不難迅為掃除。又奉諭旨。汪結現在軍前。尤宜事事密為留意。不可稍露機宜。臣查汪結不過一巧滑小人。因其熟諳夷情。在衆土司中最為明白。故慶復信而任之。現今來至軍營。臣面加詰詢。伊頗知畏懼。懇請効力。但番性叵測。謹當密為留意。俟事定另思處置。至崇喜土司被殺一節。係俄木勞丁挾仇報復。與汪結安本無涉。亦非所屬番人不平所致。得旨。覽奏俱悉。○廣東按察使署布政使吳謙鉉奏。晚禾收成分數。並陳南海等一十三縣偏災。經督臣策楞題報。委員確勘。俱加意撫卹。再粵東海口。徭疆督臣苦心調劑。鎮靜彈壓。得體有方。得旨。知道了。此奏未免有迎合督臣之意。大不可也。○廣東韶州鎮總兵畢映泰。臣屬八排。

一地。週四百五十餘里。俱係猺人聚處。外環七百四十餘里。毗連湖廣粵西。查傍猺之連山。陽山。屢被猺賊行劫。臣屬曲江乳源英德等縣汛內。均住有猺人。雖曰良猺。而頻年劫竊。即皆此輩。惟守固馭嚴。庶可安帖。凡猺人貿易等事。必須刻定期限。違者即繩以重法。而於散居各邑之良猺。亦當設法嚴加鈐制。得旨。制馭此等苗猺。惟應去其擾累。寬其小節。而凜然示之不可犯之國威。則得矣。切不可生事也。○廣西右江鎮總兵魏文舉奏報。番地匪徒李紹龍等節次帶兵。互相殺傷。屯聚處均與內地相近。邊隘宜加謹嚴防。已稟督撫提臣。并飛行沿邊各員。相機扼要。鎮靜遊巡。得旨。覽奏俱悉。彼雖不敢犯邊。然內地防禦。自當嚴謹。以靜地方。慎之。

大清高宗法天隆運至誠先覺體元立極敷文奮武孝慈神聖純皇帝實錄卷之三百三

大清高宗法天隆運至誠先覺體元立極敷文奮武孝慈神聖純皇帝實錄卷之三百四

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總纂官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十二年丁卯十二月丁巳朔軍機大臣

等議覆直隸總督那蘇圖奏八旗下屯種地稽查董率之方。撥受房地四至造冊交理事廳稽查。一屯戶原係理事廳衙門應管。其命盜等案不得專責州縣。仍會同理事廳辦理。至窩賭窩逃私宰私燒鬪毆等事一體稽查。一旗戶屯地私行典賣與民人已有定例。至旗人轉相典賣一體查禁。其另派旗戶頂種及出銀典買之人按律治罪。一屯戶領受房屋如有些小滲漏破損自行粘補均照所

請。雇工傭耕應聽自便亦照所請。如將田畝出租召佃則非令其種地習勞本意應嚴禁。豫行交租認佃者民人照例治罪旗人追租。一旗戶如探親他出往返在五以上者給假票如私自遠出及逾限不回分別懲治。但該戶倘任意逗遛該旗如何稽查及理事廳如何查催之法尚未議及應令於遷移安集後察看情形酌辦從之。○禮部議覆湖南巡撫楊錫紱奏稱湖南鄉試自雍正初年與

湖北分闈後士子應試多至七八千人今科酌定科舉較前已少其半請量減簾員等語。查湖南同考官十一員外簾官十六員今既應試人少應如所請裁同考官二員外簾官三員從之。○戊午諭各省督撫保舉俸滿教職理宜慎重揀選以冀得人從前尹會一張楷到任未久亦濫舉教職多員經朕降旨交部議處以為沽名市恩者戒昨引見教職內有直隸總督保舉之楊吟河南巡撫保舉之

郭丕二人皆屬平庸哀邁。不稱知縣之職。已降旨令回原任。那蘇圖碩色尚與尹會一等。到任未久。保舉多人者有間。著該部傳旨申飭。定例教職六年俸滿保題。原以其人才品出衆。堪膺民社之寄。是以許其格外保薦。為督撫者自應一秉虛公。核實保題。方不負人臣以人事君之義。若將平庸之員保薦。用為知縣。一二年後不能勝任。仍請改教。是不以民社為重也。於吏治民生實有關係。嗣後如

有不稱保題。該督撫濫行保薦者。朕必加以處分。該部傳諭各該督撫知之。○軍機大臣等議覆漕運總督今任浙江巡撫顧琮覆奏湖河地畝一摺。前總河完顏偉奏稱各處低窪地畝。交地方官查明。免其升科。遇水淹歉收。毋庸賑濟。今顧琮奏稱。辦賑原係挨戶稽查。如本村有賑。而所種高地無災。力能餬口。即有湖河地畝失收。賑亦不及等語。兩人所奏不同。查災賑雖按畝計算。但未經升科之

地。不能按畝報災。而實有被災戶口。無業貧民者。亦令查明一體賑恤。並不在地畝有無。暨升科之免與不免。完顏偉所奏。毋庸議。至顧琮所稱湖灘聽民開墾。有妨水道。若私墾未報者。準令升科。必致築圩圍堰。壅水專利等語。查乾隆九年。浙江布政使潘思榘奏請禁墾湖地。業經議準通行。現在各省遵照辦理。顧琮所奏。亦毋庸議。報聞。○己未

上詣

皇太后宮問安。○幸瀛臺。○諭軍機大臣等。據西安巡撫徐杞奏。高陵縣捏名揭帖。係馬宏財結首。有拜板傑等窩留李開花。及鮮傑私封職銜一摺。經朕批示。即問之被揭者。向日與何人結仇。今徐杞奏。訊據馬宏財。拜板傑與馬子龍。宋成雲。訐訟成仇。隨將二犯先後拏獲。俱不事刑求。直認捏寫不諱。照例律擬招解等語。辦理匿名之案。為督撫者。即應先從被揭之人。平日有何仇怨。跟究捏寫主名。

而徐杞初奏但稱查訊被揭之人到案力辯其毫無影響即據稟另緝寫揭誣陷奸徒而
其有無仇恨之處並未訊及迨經朕批示乃
訊明馬子龍宋成雲二人平素挾仇而二人
果亦直認不諱該撫所奏其為二人捏寫已
屬無疑但承辦此案之初何以但問被揭之
人有無叛逆情節而於挾仇誣告重情並未
嚴行跟究即州縣草率具稟而該撫及兩司
衙門何以無一人見及於此直至奉到硃批
始行遵照辦理看此情節其是否確係馬子
龍宋成雲二人捏造轉亦不能無疑矣況若
此造言生事捏寫悖逆情事煽惑流傳以致
釀成事端其貽害地方甚大是以康熙年間
曾奉

聖祖仁皇帝諭旨凡捏造悖逆言詞妄行投貼
者即行處死該撫既經審明的係馬子龍宋
成雲所為應即奏明立斃杖下以懲奸徒以
靖地方而僅照例具題似此不知事理輕重

封疆大吏其道固如是乎著傳旨嚴行申飭
令該撫再加研究如果確鑿無疑照例即行
杖斃完結如尚未出本著不必具題○又諭
據巡撫潘思榘奏稱安省各屬有學田因田
義田三項均屬官產欣遇恩蠲請照下江減
免學田錢糧之例扣免一半等語朕以此事
有弊令軍機處詳查乃知上年輪蠲江蘇錢
糧先經陳大受分款奏明該部將學租等項
俱照普免舊例不准蠲除今潘思榘所奏既
非應免之項而援江蘇之處又復錯誤況今
歲係安省蠲免之年伊即欲奏請何不於三
月內請免馬稻租息之時一併陳奏獨將此
三項遲之至今且未經奏明即行扣免其意
不過因調任閩省借此以博人之去思巧於
邀譽所有此項扣免錢糧即著潘思榘賠補
至所稱仿照下江之例而江蘇並未蠲免混
行援引是何意見此處著尹繼善詳查併傳
諭潘思榘著伊明白回奏○軍機大臣等議

覆署直隸提督拉布敦奏。八溝塔子溝等處設兵屯田一摺。查巴溝以北。及塔子溝通判所轄地方。皆係諸蒙古牧場。原不應聽他處民人開墾。乃貧戶絡繹奔赴。墾地居住。至三十萬之多。在各蒙古既非所轄。而該同知通判。又復鞭長莫及。積久易於滋事。各蒙古因其耕種納租。一時不無微利。不知染習漸移。大有未便。今拉布敦恐生事端。欲添設官兵彈壓。而以開墾為養兵之計。且稽查鈐束於蒙古更為有益。所見亦是。但查口外固多可耕之土。既係各蒙古牧場。未可輕議屯墾。而貧民雜處。查察管束。實不可少。理宜先為相度。應交理藩院。派賢能司官一員前往會同該扎薩克等查勘。備悉現在情形。繪圖到日酌議。至此等民人聚集。於各蒙古未便之處。已遵旨傳諭羅卜藏。據稱民人耕種蒙古地畝。雖似有微利。實已暗被侵占。且漸染伊等習氣。今若委員清查管束。皆有益於蒙古。

等語。請飭令理藩院行知各扎薩克。令徧諭所屬。其間有租與民耕種。或交銀承種幾年。或被侵占。及不可為牧廠。將來仍須開墾之地。俱報出以便辦理。得旨。此事著派尚書納延泰。貝勒羅卜藏。於明年春間。前往會同署提督拉布敦。率領地方官。查勘辦理具奏。餘依議。○庚申。諭軍機大臣等。那蘇圖查奏大興。宛平。二縣。每年經費銀兩一事。業經該部議駁。已降旨依議矣。前因該二縣經手錢糧報銷不實。或無其事而捏名冒銷。或有其事而浮開虛數。理應徹底清查。使錢糧盡歸實用。是以面諭那蘇圖查辦。今據覆奏。半歸各該衙門承辦。祇存數項。仍令該二縣承辦。竟似向來辦理。本無弊端。今若必欲清查。則莫若不令該二縣承辦之意。與朕從前交伊查辦之旨。全不符合。大宛為畿輔首邑。供應之事本多。如果實支實銷。雖款項繁多。亦公務所必需。若有所浮冒。即一款亦難容朦混。向

來任意浮開。則相沿陋習。一經查核。即託故推辭。不為辦理。揆之體制。殊有未合。那蘇圖查辦此案。專事推諉。且單內所開。亦甚瑣屑。辦理殊為取巧。著傳旨申飭之。○兵部等部議覆。湖廣總督塞楞額奏稱。湖廣為適中要區。稽查務嚴。湖北各處塘汛。止官廳三間。兵房五間。三間不等。瞭樓烟墩。多致頽斜。兵亦私離汛地。欲使長川在汛。必得攜眷居住。添建塘房等語。查設汛安兵。務需長川實駐。應如所請。湖北大路共八十九塘。每塘准添建廂房四間。圍牆三面。其瞭樓烟墩。分別磚石修砌。至湖南要汛。作何增修之處。題報再議。從之。○辛酉。

上詣

皇太后宮問安。○幸瀛臺。○諭軍機大臣等。赫赫補授山東布政使。已半載有餘。其於地方事務。並未見具摺陳奏。現在護理巡撫印務。雖為日無多。但伊任內一切地方事務。豈無

一應行奏聞之事。此次奏摺。請安之外。惟奏報米糧價值。可見其平素之漫不經心也。前伊為部屬時。尚屬能辦事之司官。今擢任布政使。看其全不實心辦事。或因位至藩司。器量偏小。輒自滿足。遂一味因循。為保全祿位之計耶。布政司為通省表率。地方關係緊要。豈可怠玩如此。著傳旨申飭之。○加賑安徽歙縣黟縣績溪宿州靈璧虹縣并宿州衛。本年水災飢民。並緩徵新舊錢糧。其應蠲額賦。命於明歲補蠲。○壬戌。

孝惠章皇后忌辰遣官祭

孝東陵。○諭軍機大臣等。宿遷縣革生王育英聚眾抗官一案。前據安寧僅問擬遣發。經朕寄諭訓飭。今據審擬改依刁惡頑梗之輩。逼勒平民。聚眾抗官者。有間等語。王育英繕寫無恃。矜抗官不法情事。較實在刁惡頑梗。逼勒平民。聚眾抗官者。有間等語。王育英繕寫

邀罷市知單。分貼縣東門。冀使該縣畏懼。又赴市以即得喫賑為詞。引誘貧民。喊令閉市。明係強行出頭。逼勒聚眾。乃尚欲為之開脫。姑息養奸。殊屬寬縱。可傳旨申飭之。再王育葵前既有倡首引誘。窮民附和喊叫等事。將來行刑之時。或有前項窮民。糾聚啓釁。致滋事端。爾等可寄諭安寧。令其密為防範。毋致疏虞。○兵部議准。荊州將軍德敏疏稱。荊州八旗。現在領催前鋒披甲。共四千名。請定為

烏鎗箭手兵。各二千名。從之。○癸亥。兵部疏請。議叙擒勦城綏逆苗之一等軍功。湖南衡州協副將今陞雲南昭通鎮總兵官治大雄等六員。各准軍功加銜一等。隨帶紀錄二次。二等軍功。湖北督標外委李超等三員。各准軍功加一級。紀錄一次。三等軍功。湖南提標外委王秉正等二員。各准軍功紀錄三次。再軍營立功之生員藍光緒等三十三名。監生范應星等二名。應照例授為貢生。又堵禦苗

徭三等軍功之貴州外委韓有中等三員。各准紀錄一次。至一等軍功之貴州外委魏顯華。於未經議叙前病故。應照例子廕一子入監。又打仗受傷之湖北荊門營千總伍以信及黔楚二省兵勇劉道明等十六名。並城綏二縣苗勇七百三十七名。均照例賞恤有差。從之。○以故奉恩輔國公逢人子盛昌襲爵。○甲子。

上詣

皇太后宮問安。○幸瀛臺。○賜派隨東巡大臣等宴。○準噶爾部人多爾濟巴顏。巴克什。都拜等來降。命賞給安插如例。○乙丑。諭。今歲直隸偏災。順天府屬之霸州。文安。大城。武清。天津府屬之天津。靜海。為較重被災民人。業已降旨加恩賑卹。其兵丁例不領賑。朕念伊等身列戎行。有差遣巡查之役。地方既遇歉收。食用未免拮据。著加恩將霸州等處駐劄各營兵丁。於司庫建贖銀內。借給一季餉銀。

自戊辰年夏季起。分作四季扣還。以資目前用度。該部即遵諭行。○又諭軍機大臣等。前宿遷縣革生王育英聚衆罷市一案。安寧辦理寬縱。朕已降旨申飭。今覽刑部本內採生折割一案。安寧又將律應立決之蔣運生。以可否改為監候之處。聽候部議。刑部定以立決。此等兇犯。戕人肢體。殘忍已極。法無可貸。聞者莫不髮指。正當按律懲治。以伸國法。以快人心。庶克頑知所儆畏。而風化亦得挽回。乃安寧猶以可否監候為請。是其有意姑息。且不止此一案矣。地方大吏。若存此心。風俗安望其能改易。可傳諭安寧。嗣後務須洗去此習。以副朕委任封疆之意。著於奏事之便寄去。○丙寅。

上詣

皇太后宮問安。○丁卯。諭軍機大臣等。慶復等前奏汪結管理土司一摺。著抄寄張廣泗。令其將裏塘土司果否如此情形。並慶復等。向

所辦合宜與否。查明具奏。汪結與莎羅奔暗相結納。心懷叵測。前曾傳諭張廣泗。令其俟大金川事平之日。將汪結以他事調至軍前。查詢實在情節。明正其罪。然可否如此辦理。尚未據覆奏。經月以來。未接張廣泗軍前奏摺。殊為懸念。前曾降旨。令其酌量形勢。如天氣苦寒。或應將大營暫駐向陽之地。俟春融前進。後又經傳諭。令其相度機宜。隨時酌辦。嚴密防範。前後諭旨。俱未據覆奏。或辦理已有成局。應乘機直搗巢穴。可以迅奏膚功。或慮及我兵暫退。則彼得乘間壘砌碉樓。有礙攻取。勢未可緩。以致前功盡棄。然此亦遠度耳。既有如此情形。何不奏聞。若因奉到此旨。遽行退駐。則為時返遲。亦不必如此遷就也。軍前之事。朕日夕廑懷。其現在情形若何。辦理已得幾分。何時可以告捷。該督身肩鉅任。必具有勝算。可一一詳悉馳奏。以慰遠望。著傳諭張廣泗知之。○軍機大臣等議覆。陝西

巡撫徐杞奏奸徒囤販糧食。先期赴鄉。豫給銀錢。愚民止圖現得微利。情願賤價。豫定石斗。及至收穫。不得不任其量載。或於新糧上市時。勾通牙行。零糴整囤。必待價倍。方肯出糴。現在查禁等語。此等奸徒。以微利而取重息。與青苗蠹民之法無異。請飭各督撫嚴禁。秋收時留心訪察。如仍前巧取射利。即按律治罪。從之。○予故鑲藍旗蒙古副都統那蘭保祭一次。○以故奉恩將軍占泰子德克精額襲職。○緩徵山東金鄉。魚臺。東平。汶上。濟寧。城武。惠民。濱州。利津。商河。鄆城。鉅野。平原。陵縣。泰安。東阿。平陰。滋陽。曲阜。寧陽。壽張。嘉祥。清平。齊河。齊東。濟陽。德州。德平。臨邑。禹城。長清。萊蕪。肥城。陽信。樂陵。蒲臺。青城。鄒縣。泗水。滕縣。陽穀。嶧縣。荷澤。曹縣。濮州。范縣。觀城。朝城。單縣。定陶。聊城。堂邑。博平。茌平。莘縣。臨清。館陶。恩縣。夏津。高唐。等六十州縣水災。應完本年米豆。并原緩帶徵。及隨漕錢糧。○戊

辰。

上詣。

皇太后宮問安。○諭軍機大臣等議覆西安巡撫徐杞所奏民間糧石。有奸徒射利。豫先給銀賤價定買。及囤戶居奇等弊。應令各省督撫不時嚴飭地方有司查禁等語。所議固屬現在應行之事。然督撫奉到部文。不過轉行各屬出示禁約。多一番文告而已。有司之果否實力奉行。及奉行而於米價之貴賤。實在有無裨益。尚未可知也。朕思米穀為民生日用所必需。而邇年以來。日見騰貴。窮黎何以堪此。即如川湖素稱產米。而川撫紀山。則以商販雲集。米價騰湧為奏。湖北督撫。則以江南被災。資楚糧接濟。以致本省米貴為奏。又如直隸一省。向籍八溝糧石。今歲畿輔尚屬有秋。而八溝亦以搬運太多而貴。夫商販流通。貴則徵賤。間或暫時翔湧。何至連歲遞增。有長無落。若謂囤戶居奇。此實弊藪。然自地

方官力所能禁。何至全不奉行。任其壟斷累民。而督撫漫無覺察。竟無一實力嚴禁。著有成效者。若謂戶口繁滋。則自康熙年間以來。休養生息。便應逐漸加增。何獨至今日而一時頓長。若謂水旱偏災。則亦向來所有。何以從來未聞如此之貴。且亦當歉者貴而豐者賤。又何至到處皆然。豐歉無別。若謂康熙年間。倉儲有銀無米。雍正年間。雖經整飭。尚未詳備。今則處處積貯。年年採買。民間所出。半入倉庾。未免致妨民食。此說似乎切近。然在當時分省定額。悉經該督撫分別酌議。自按各省情形。且至今足額者寥寥。亟需採買。所在皆是。藉以備荒撥賑。難議停止。設或果由於此。則當切實敷陳。商酌妥辦。不當聽其自然而不為之所也。朕反覆思之。不能深悉其故。亦未得善處之方。夫人事不修。則民生不裕。今日政治之闕失何在。所以致此者何由。米豆關稅。業經通免。雖不可因此遽求奏效。

而於米價宜不為無補。又何以價不日減。轉益日增。今使復徵。不且較此更增乎。朕自御極以來。宵旰勵精。勤求民隱。閭閻疾苦。無或壅於上聞。乃不能收斗米三錢之益。而使赤子胥有艱食之累。殊益焦勞。各督撫身任封疆。於民生第一要務。必當詳悉熟籌。深究其所以然。如果得其受病之由。尤當力圖補救。乃各省督撫。或不以介意。或歸咎於鄰封。或責過於商販。而應作如何辦理之處。並未籌及。可傳諭各督撫。令其實意體察。詳求得失之故。據實陳奏。或朕所舉諸條之外。別有弊端。俱宜確切入告。務期實有裨益。以裕民天。更不得因諭旨中。偶及免稅一節。誤會朕旨。以謂意在仍徵米稅也。○又諭前總督張允隨所奏屬員賢否摺內。稱驛鹽道郭振儀。年紀衰老。今閱圖爾炳阿摺內。稱郭振儀老練樸實。其衰老之處。並未奏及。其他所注屬員考語。亦俱有優無劣。夫人材原屬不一。或樸

實有餘。而才情未能肆應。或辦事幹練。而居心未能懇誠。或新任勵志。可以造就。或年老耄。尚堪驅策。俱當鑒別精詳。據實入告。方不負朕封疆委任之寄。今伊所奏屬員一摺。籠統開載。漫無區別。竟似通省官員。並無一人可訾議者。巡撫有察吏之責。留心人材。最關緊要。若衡鑒不精。何以克稱重任。圖爾炳阿。為人尚無過舉。但其向來情性。涉於寬緩。此奏無所可否。正其平日優柔寬縱之病。著傳諭旨申飭之。○己巳。諭軍機大臣等。據胡中藻奏稱。陝西地方。乙丑丙寅兩年。收成歉薄。尚可支持。至本年缺雨。渭河以南。有二三四分。若渭河以北。有收穫。不穀穀種。並有顆粒不收。連藁秸無有者。西安同州。為尤甚。今冬又缺雪。窮口嗷嗷。有挈提妻子出走。甚至有一堡之內。並無居人等語。數年以來。陝省屢奏有收。即使徐杞諱災。慶復陳宏謀。向日亦諱災乎。且今歲四月間。望雨。後亦據報普

霑。何至如胡中藻所奏。因將此情形詢問大學士慶復。據稱。此次來京。於陝西地方。歷經數府。秋收大局。漢中榆林。及近邊一帶。秋成豐稔。惟西安同州等處。間有秋收歉薄。州縣現在地方官酌量籌辦。至沿途所見。有就食親戚者。或一二人。或三四人。挈伴同行。從未見有一堡空虛之事。不至如摺中所奏之甚等語。近據徐杞奏報。咸寧長安等六十九廳州縣。秋收在八九分以上。已屬寧謐。其七分

以上者。亦不為歉薄。惟耀州等十六州縣。收成止有六分。看此情形。該處收成。雖有歉薄地方。何至如奏中之甚。蓋胡中藻本一好名沽直之人。其言災傷。自不無過甚之處。然朕向來聞有人言災傷者。從無置之不問。不行查辦之事。至其言徐杞馬金門之處。則實中肯綮。不可因人而廢言也。今陳宏謀已調任陝西巡撫。可將此摺抄寄。令其將摺內所奏種種情節。逐一確查。其中有應行籌辦之處。

即行辦理。務使貧民不致失所。亦不得因陳奏太甚。辦理過當。轉致滋事。可即傳諭知之。○命陝西巡撫徐杞來京候旨。調湖北巡撫陳宏謀為陝西巡撫。以倉場侍郎彭樹蓆署湖北巡撫。○以三等輔國將軍永敘子儀常照例襲封三等奉國將軍。○予故大學士前任浙江巡撫徐元夢陝西寧羌州知州劉榮臨潼縣知縣趙于京等三人入祀各該省名宦祠。江蘇禮部尚書吳士玉工部右侍郎周清原少詹事歸允肅右通政歸宗敬。贈太常寺少卿唐詩。贈翰林院侍講學士鄒卿森歲貢生陳新楷廩膳生李必恒。浙江生員錢爾復湖南江蘇鎮江道王之錡。國學生吳宏道山東江南驛鹽道孔毓琮。陝西明雲南道楊畏知處士李柏等十四人入祀各本籍鄉賢祠。○加賑山東齊河等八十五州縣本年水災飢民。應徵新舊錢糧。分別緩帶有差。○庚午兵部議覆御史時鈞轍奏稱。近來各省管

驛之員。每於額馬空缺。並不買補。遇緊急公務。或私借鄰驛。或雇覓驢頭。或以殘老充數。而所開買價。及日支等項。俱屬虛報。至上司遵員查點。該驛官吏百計掩飾。委員亦不過取結申覆。請勅下各督撫嚴飭各該驛道實力稽查等語。查定例驛馬疲缺。稽遲程站。處分綦嚴。應如該御史所奏。再通行各省督撫嗣後如何設法。將侵吞扣剋等弊。徹底肅除。酌定規條。年底將查驗各驛之處報部。如該委員不行查出。即同該驛官一併查叅。倘該管上司漫無覺察。被督撫題叅。交部嚴加議處。從之。○辛未。諭大學士徐本持躬端謹。才品優長。歷事三朝。宣力中外。朕御極之初。簡任綸扉。多資翊贊。後以抱恙。令伊子隨侍回籍。又加恩給與本俸。以資頤養。予告以來。又經四載。時加存問。方冀其宿疾就痊。赴闕供職。今聞溘逝。深為震悼。著晉贈少傅。就近在浙江藩庫內賞銀一千兩。辦理喪事。加祭一

次著巡撫顧琮親往祭奠。以昭朕恩禮老臣之意。其應得卹典。該部察例具奏。○大學士等議覆副都御史梅穀成奏稱。正一真人。秩視二品。原屬明代舊制。近復加至光祿大夫。題請襲封。伏思

孔子至聖。後裔承襲公爵。顏曾思孟以下。不過博士。今張氏所襲。竟與聖裔無別。請照提點演法之類。給與品級。停其朝覲筵宴等語。查正一真人。世居江西龍虎山。至宋始有封

平定縣志

卷二

號。元加封天師。秩視一品。明初改正一嗣教真人。秩視二品。本朝仍明之舊。而會典不載品級。蓋以類於巫史方外。原不得與諸臣同列。即康熙雍正間。曾荷褒封。亦用以祈求雨澤。非如前代崇尚其教。而必階以極品也。至從前給一品封典。亦因無案可稽。但憑舊軸題給。原未可為定制。嗣後應不許援例假借。題請給封。至所奏授為提點演法之類。所見亦是。但道錄司左正一。係正六品。正一真人

有統率道衆之責。若授為提點演法。則亦係正六品。查太醫院院使。秩正五品。巫醫本相類。請將正一真人。亦授為正五品。其原用銀印。即令繳部。嗣後缺出。應令該撫查其子孫應襲者。取具地方官印結。咨部襲補。照道官例註冊。至朝覲筵宴。均如該副都御史所奏。停止從之。○福建臺灣鳳山二縣。本年旱災。應徵新舊錢糧。○加賑山東鄒平。嶧縣。莒州。日照。即墨縣。併衛。本年水災。飢民。應徵新舊錢糧。分別緩帶有差。

平定縣志

卷二

大清高宗法天隆運至誠先覺體元立極敷文
奮武孝慈神聖純皇帝實錄卷之三百四

大清高宗法天隆運至誠先覺體元立極敷文
奮武孝慈神聖純皇帝實錄卷之三百五

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣謹
總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務
世襲騎都尉軍功加十九級隨帶加二級又加二級臣謹誌內大臣戶部尚書鑲藍旗滿洲都統軍功紀錄五次
尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十二年丁卯十二月壬申

上詣

皇太后宮問安。○諭軍機大臣等。戶部議覆黃
廷桂奏西安等衛孳生羊隻一案。朕已降旨
依議。此案前據黃廷桂奏請准行。至上年應
行考核。又據奏稱展限。目下已屆考核之期。
自應照原奏辦理。即有難於考核之處。亦當
據實奏明。乃忽以搭放難行。留收亦屬無益
具奏。意欲迴護前非。復蹈取巧故習。著傳旨
令其明白回奏。至此項羊隻。究於孳生搭放

有益無益。令其一并詳晰據實奏聞。○兵部議覆署直隸提督拉布敦奏稱營弁緝拏逃兵。請照捕盜緝兇之例。寬以四個月限期。如逾限不獲。照例議處等語。查兇盜案件。有二三四叅之限。逃兵止以一叅完結。事既懸殊。立限豈容一律。但逃兵有百日首免之條。則緝逃之官。亦當定百日免議之例。請嗣後除軍營逃兵。仍照舊定限五日外。其在營兵丁脫逃。能於百日內拏獲者。免叅。如逾限不獲。

實錄卷一百一

專管官罰俸一年。兼轄官罰俸六個月。從之。○舉行各省軍政。卓異官三十一員。不謹官三員。罷軟官四員。年老官十九員。有疾官四員。才力不及官十五員。浮躁官二員。分別陞賞處分如例。○以故三等男趙仁子趙連璧襲爵。○旌表守正被戕之四川遂寧縣民楊青三妻劉氏。○癸酉。

上御乾清門聽政。○刑部等部議覆盛京刑部侍郎介福等疏稱阿爾敦等攬送朝鮮人崔

綬萬等為匹越邊一案。應將崔綬萬等照例擬徒。咨送該國辦理。阿爾敦等分別鞭責枷號等語。應如所請。至該國使臣等漫無覺察。業經該國王將海興君李樞吏曹判書尹汲書狀官安雅等革職。應毋庸議。從之。○工部議黑龍江將軍富森題覆陞任郎中石柱奏黑龍江莫爾根二城。應設渡船一案。內稱該處河水溜險。旗民往來濟渡。不免沈溺。設立渡船。深有裨益。再黑龍江河寬溜急。行人甚

實錄卷一百一

多。設船二隻。莫爾根河身窄狹。設船一隻。均酌派水師營員管理等語。應如所請。從之。○以侍讀學士林蒲封充日講起居注官。○以江寧驛鹽道台柱為四川按察使。○以廣東香山協副將林嵩為高廉鎮總兵官。○以一等承恩公凌柱子伊通阿三等子烏爾圖那蘇圖孫德福一等男堆音齊子法靈阿襲爵。○甲戌。諭軍機大臣等。據漳州鎮總兵馬負書奏稱漳俗惡習。有一種闖棍。結黨橫行。欺

凌良善。平日皆勢惡土豪。養為牙爪。一經有犯。地方官按其情罪。予以枷責。豪惡之徒。暗資飲食費用。此輩闖棍。枷滿釋放。益無忌憚。強橫愈甚。請嗣後闖棍有犯。必究出養奸之人。一體滿杖枷號遊示。使各知畏懼等語。漳俗素來強悍。但如此辦理。是否即能化其舊染惡習。抑或尚有應行整飭之處。可傳諭喀爾吉善。令其留心體察。設法懲治。并將如何辦理之處。具摺奏聞。○軍機大臣等議覆副

都統哲庫訥府尹蘇昌奏。奉天暫開海運。原因直屬災黎起見。請止令直隸購買。餘省暫緩通商等語。查暫弛海禁。原屬一時權宜之計。他省商販。自不得越境販運。至所稱或令官買。或令商辦之處。查開禁原以通商便民。與委員採買不同。今若議定官買。非流通商販之意。應令該督將災地情形。酌定需用米數。會商該副都統府尹。稽查辦理。再此次開禁。本以一年為限。今請買足即行停止。與所

定年限不符。應令臨時會同該督。酌量奏請。得旨。依議速行。○兵部奏。本年臣部議准。江南河道總督周學健奏。武職回避本省案內。請將水師副參。籍隸本省。與鄰省對調。但查水師與陸路不同。出洋巡哨。亦非陸路操防可比。且水師副參。通計江浙閩廣四省。共二十三缺。內籍隸閩省者。十居七八。每遇閩省缺出。不特該省乏員。題補即鄰省亦無可調。請嗣後水師副參。毋庸迴避本省。如有徇情

上詣

皇太后宮問安。○幸瀛臺。○諭據川陝總督張

廣泗奏稱。身在蜀中。陝甘二省。不能遙制。其地方刑名錢穀。雖有巡撫經理。然於提鎮則無節制之權。於戎行無整飭之責。仰懇天恩。特命大臣暫署陝甘總督事務等語。張廣泗遠在軍營。不能遙制陝甘二省事務。著黃廷桂暫行料理。至一切武備。尤關緊要。更宜留心。如有地方重大之事。仍與張廣泗會商。俾伊無兼顧之慮。得以專力川省。該部即行文該督等知之。○又諭據總督張廣泗奏請頒發九節礮四位來川備用。朕思川省征剿逆酋。不妨多備數位。著將京城八旗存貯者。選擇十位。交與工部。照例派員即速運往。○諭軍機大臣等。朕覽張廣泗所奏。詢問汪結供詞。內稱四月十三日渡江。半夜到如郎。竟是空寨。班滾早已逃出。及責問俄木丁。伊云。必是隔江看見燒寨。害怕潛逃等語。前據張廣泗奏。昔什綽等在如郎。聽得人言。明正土司汪結做中間人。叫俄木丁投降。令班滾逃往

別處。是班滾之兇脫。皆係汪結暗為通信。今伊止歸罪於俄木丁一人。與昔什綽所供情形不符之處。何未問及。又前奏遣喇嘛雍中班吉前往如郎。班滾云。我曾差人往綽斯甲羅于朝。汪結營盤請安。說你叫我三年不出頭。我已遵了。又汪結曾有信與班滾弟兄。令其斂跡。以防金川事波。及而汪結所供。僅有帶信道喜一語。其餘俱未供出。不知張廣泗亦問及否。至彼明知事迹難掩。何難將道喜一語說明。以表其心。而種種潛通消息之處。實欲藉此掩蓋也。再摺內所稱文武皆知班滾尚在。而無一人敢少露聲息。及至康朱控告班滾父子構釁滋事。顯有確據。始肯漸吐實情。而咸諉罪於汪結。且以汪結神氣似非大奸宄。又謂汪結能料及綽斯甲之必應辦理。如其語果出誠心。實為諸番中之傑出者。朕細察情詞。是汪結之巧。不但先已欺蔽慶復。即張廣泗亦屬疑信參半矣。朕前所

降諭旨。俟將來金川事竣。即移師如郎汪結。既為彼耳目。羅于朝敢與之通同不法。進兵時。須先期將二人。以他事調赴軍營。訊明班滾下落。而明正其罪。此際更密為防範。不得少露風聲。以防他變。蓋因大金川現在進剿。不能又加兵於瞻對。是以令其俟金川事竣。再乘機辦理。孰知張廣泗此奏。竟未待事竣。即令汪結至軍營面詢。未免失於欲速。不合機宜矣。若汪結果知伊事已經敗露。罪有難逃。張廣泗因此調赴軍營查辦。則發奸摘伏。罪名昭著。即當明正典刑。使羣番知所警懼。如因汪結為衆番所信。未便殲除。恐即加誅殛。或致有失番心。更滋叢端。姑留之以圖後舉。而其摺內亦未將此意聲明。又汪結供上年打聽班滾實未燒死。曾屢次密稟宋宗璋。伊甚是愁怕。歎氣說如今更有何法等語。宋宗璋現在軍營。何不即將此詢問。以定虛實。但不可因有此旨。又稍露形迹。以致汪結懷

疑。復滋事端。且現今行間將士。半屬從征。瞻對之人。倘共知前此隱諱之事。皆已顯露。必人懷驚畏。當此軍興之際。甚有關係。至汪結所言現在大兵進剿金川。班滾放心在家。一無防備。我著人哄他離了巢穴。就容易擒拏。此等皆屬誑語。未可遽為憑信。若墮其術中。即蹈瞻對之故轍。雖據張廣泗奏稱尚未深悉汪結底裏。當密為留意。統俟事定。另思處置等語。但目今此事既經明白詢問。則汪結尤宜密防。毋使因疑生釁。又費周章。萬里之外。朕亦難一一遙為指示。可傳諭張廣泗。令其悉心體會朕旨。務須審度機宜。慎重經理。以紓朕西顧之憂。○川陝總督張廣泗奏。前奉諭旨。以塞外地近雪山。或暫駐向陽曠地。俟春融集兵進取。臣查官兵現已渡越雪山。進抵賊巢不遠。若復退駐。賊必前往奪據。明春攻取為難。得旨。朕亦料及此前日所降諭旨。尚未到耳。又稱現在各路官兵。雖未直搗

賊巢。賊已屢次遣人。籲懇投誠。臣曾面見頭人。諭以莎羅奔罪無可赦。如必欲免死。自行面縛而來。另候酌奪。得旨是。又稱臣自丹噶回至小金川。莎羅奔又邀請汪結等。至勒烏圍。懇請招安。并遣人隨同前來。臣復面加曉諭。該逆酋罪大惡極。更非瞻對可比。此番用兵。務期剿除兇逆。不滅不已。今歲不能至明歲。明歲不能至後歲。決不似瞻對燒燬罷兵。得旨甚是。甚是。足慰朕懷。又批。好。明告之。甚。

是。看此朕實慶用卿之得人也。勉之。雖遲何妨。又稱。自八月以來。我兵阻礮不前。賊應愈肆。鴟張而反。投誠乞命。實非本心。緣進兵已經半載。賊境失去大半。秋不得獲。春不得耕。番衆勢在窮迫。且兵臨賊巢不遠。故急求徹兵。以便稍為停息。復出肆掠。若我兵一退。正墮其計。得旨。如果力不能取。即如是困彼數年。彼尚能支乎。但領兵者。固不宜存此心。更忌出此言。以懈兵志耳。○賑卹直隸天津。西。

寧。霸州。固安。河間。永清等六州縣水災。飢民及旗戶。竈戶等。並分別蠲緩錢糧如例。○丙子。諭軍機大臣等。今日宋宗璋奏摺。一係請安。一係伊子中式謝恩。伊乃武夫。其子習武。是其世業。今於文闈中式。伊奏謝之摺。尚屬允當。但看其意。以得中為奇美之事。且文復庸陋不通。可知其子亦未必有佳文可錄。不過僥倖而已。伊身為總兵。現在行間。一切軍情。雖經呈報總督。但此次摺來。亦應將近日。

征剿情形。具摺奏聞。乃僅為伊子陳謝。並無一語及於軍營情事。則其不知輕重緩急可知。著傳旨申飭之。再現據張廣泗奏。汪結供詞內稱。去年六月內。提督徹兵起身之後。總兵宋宗璋還在臘蓋的時候。我就打聽得班滾實未燒死。但不知他藏匿的所在。就稟了總兵宋宗璋。并遊擊羅子朝。後來徹到曠域頂。我又打聽得班滾藏在空七寨一個山洞裏。那洞內有水有柴。可以久住。我又稟了宋。

宗璋。宋宗璋聽見甚是愁怕。歎了一口氣。說如今叫我有什麼法呢等語。汪結如何告知之處。著一併傳諭令其據實即速奏明。毋得稍有迴護。○丁丑。諭通政使雷鉉。因朕東巡所降諭旨。有撫臣阿里衮奏春麥不能補種。秋田尚可及時耕作之語。謂恐天下傳之。以為東省今年秋潦成災。幸荷皇恩賑卹。若有誤麥期。必待秋禾接濟。嗷嗷待哺。何以仰給等語。阿里衮所奏。乃指行幸駐蹕。除道安營所經占之地而言。無論山東闔省。即此除道安營之半里以外。亦原自照常播種。奏中所謂田野咸治。良苗懷新。皆巡行景象所必有。並非山東闔省麥期盡誤。俟回鑾方行力作。總總焉有曠時輟業之慮也。雷鉉身為通政。已列九卿。而於此全未明晰。竟以為直言入奏。與畧曉事者觀之。宜無不噴飯也。然雷鉉既誤會。則其餘似此誤會者。更不知凡幾。不得不錙銖較量。降旨以解羣疑。蓋道路營盤

地方官皆量給業戶價值。阿里衮之意。以為部例所給之價。皆有定則。不得濫加。亦祇可抵麥收。若至秋間前往。則計其所得。恐未必足敷所出。是以謂秋行不如春往也。夫乘時巡幸觀風。古所不廢。而似本朝毫不累民。計里予值者。亦鮮矣。而尚有雷鉉者流之為此奏。復不得不喋喋致辯焉。朕於此益愧。○軍機大臣等議覆。閩浙總督喀爾吉善奏稱。澳口汎有呂宋夾板船一隻。欲往廈門貿易。不便拒絕。但恐內地奸商行保。或有誑騙滋事。隨檄委興泉道監看貿易。凡領夷本置貨商人。定限交貨。違限者即著落行保賠還。商人從重治罪。其夷商番梢等。俱安頓公所。派委員弁領兵看守防船。如軍器等貯庫。俟明歲開行給發。復密札水師提督就近嚴察。應照所奏。至所稱呂宋為天主教教長。漳泉風俗。澆漓。此等夷船。終不宜使之源源而來。擬俟夷船回棹之日。善為慰遣。不使復來等語。查

此等貿易。原係定例准行。今若不令復來。殊非向來通商之意。至於厦門一帶風俗澆漓。惟在責成地方官。加意防範。慰遣之處。可以不必得旨依議速行。○又議覆湖南巡撫楊錫綬覆奏廣西巡撫鄂昌請開採綏寧縣杞冲嶺銅鑛一摺。據稱出礦山既不寬。創鑿銅砂。又屬低下。且深處苗穴。於田畝民食俱有所碍。應如所請。毋庸開採。從之。○戊寅

上詣

皇太后宮問安。○幸瀛臺。○諭山東省明歲係輪免錢糧之年。所有乾隆十二年未完地丁銀兩。應於奏銷前按欠催徵。朕思本年齊河等各州縣被災地畝。應完錢糧。已照例蠲緩。其勘不成災之處。與災地毗連者。收穫未能豐裕。歲內完納錢糧。已屬竭蹶。若明歲奏銷以前。再令完納。未免拮据。著將應徵未完錢糧。於奉到諭旨之日。加恩停緩。展至己巳年。照例帶徵。以紓民力。○己卯。諭大學士慶復

自

皇考時。屢經擢用。歷任尚書。朕即位之初。用為大將軍。復簡畀封疆。歷用至大學士。上年瞻對用兵。以總督統領軍務。乃奏稱班滾圍困焚斃。告捷竣事。朕覽奏。摺稱班滾燒斃。因念全無確據。應迅速查訪。其種種疑竇。詳晰批示。始據慶復奏班滾燒斃。彼亦懷疑。遵旨密行查訪等語。今據張廣泗查明。班滾現在如郎。尚復肆行滋事。當時捏報焚斃之處。檢閱

卷宗。有慶復駁回李質粹原咨。李質粹遂添入火光中望見懸縊賊番之言。慶復即據以入告。併前後辦理未妥各情節。因以張廣泗原摺傳示慶復。伊乃具摺請革職。交部從重治罪。朕自張廣泗奏到。數日來。為之反覆思維。念其敗歷中外。欲施恩宥。以全世戚舊臣之體。而法度者朝廷之法度。有功則賞。有罪則罰。朕不敢私焉。且國家能保千百年無兵革之事乎。若統兵之人。皆如此欺罔。其所關

係尚可問乎。夫世戚舊臣。皆與國共休戚之人也。慶復恩及此。亦將不能自恕。且以台輔大臣。受國家厚恩。何以於此等軍機重務。通同欺罔。一至於此。若謂一時誤信。或因用軍既久。邊外番地。不得不如此了事。此等情形。不宜題達宣示。亦應密行陳奏。乃始終並未據實奏明。今既通盤敗露。法紀所在。朕雖欲寬之而無可寬。慶復著革職。家居待罪。李質粹現在刑部監禁。著軍機大臣。會同刑部將此案情節。徹底研訊。有應問慶復之處。一併訊問。逐款審明。按律定擬具奏。○又諭朕從前因班第努三進兵瞻對。宣力効勞。厥有成績。是以將伊等及所帶侍衛官員。拜唐阿等。一并交部議敘。朕又施恩。令班第在御前行走。今據張廣泗奏稱。班滾現在如郎地方。並未被災。燒斃等語。班第努三雖係協同慶復辦事之人。未深悉地方形勢。與慶復李質粹專令帶兵者不同。然伊等在彼並不詳察。亦

從而謂班滾燒斃。率行具奏。殊屬冒昧。此事既經顯露。伊等議敘所加之級。及隨侍衛官員。拜唐阿等議敘之處。均一併註銷。班第努三俱不必在御前行走。著在乾清門行走。○庚辰。定郊壇大祀。省視。

神位。上香。及省視牲器禮。諭朕惟致敬。

郊壇。宜崇典制。乃者朕於大祀前期一日。恭詣

壇位。躬親省視。展潔告虔。良云周備。惟是

神主向藏。

皇穹宇。

皇祇室。

皇乾殿。考之唐開元禮。先期升主陳設。省視復收。朕思因省視而陳設。

神主。有違神道靜穆之義。未協寅恭嚴事之忱。

應於躬省。

皇穹宇。

皇祇室。

皇乾殿。上香行禮。分獻官詣配殿行禮。肅將悃。

忱以伸對越。但事屬創舉。著大學士會同該部詳悉定議。併躬詣

壇位。後親視籩豆之處。一併具儀以聞。尋議

皇上駕詣

南郊。於昭亨門外降輦。入外壇南左門。詣

皇穹宇。於

上帝。

列聖前。上行九拜禮。兩廡

從位。遣官上行禮。次詣

園丘視

壇位。詣

神庫。視籩豆。並遣官視牲。畢。入齋宮。

北郊。於

方澤北門外降輦。入外壇北右門。詣

皇祇室。於

皇地祇

列聖前。上行禮。並省視。俱如前儀。

南郊祈穀。於外壇南門右降輦。入祈年左門。詣

皇乾殿。上行。次詣

祈年殿。視

壇位及籩豆。並同大祀儀。從之。○諭聞得滿洲大臣內乘轎者甚多。各部院大臣乘轎。乃係向來體制。至武職大臣等。操演官兵。教習馬步騎射。非文職大臣可比。伊等位分既尊。自應遵照舊制騎馬。以為所管轄人等表率。若自求安逸。則官兵技藝安望精熟。再聞年少宗室公等。平日亦皆乘轎。伊等不過間日上朝。自應練習騎馬。似此希圖安逸。亦屬非是。此關係我滿洲舊習。著力行禁止。○軍機大臣等議。覆甘肅巡撫黃廷桂奏。新渠寶豐二廢縣。近年陸續墾復。已有二千餘戶。計口萬餘。請改城為堡。令民移居。應如所奏。改為新渠寶豐二堡。除原設文武衙署及廟宇倉廩等官基。仍留備用外。餘准作民基。仍循舊制。二堡各以坍塌廢鼓樓為界。樓南令回民居住。樓北令漢民居住。其分別回漢文給地基之

處亦應照所奏。每間出資三錢。地方官給印照管業。所收地資。即留為本處修補城池等項之用。所有改設之縣丞衙署。准即於寶豐堡內建造。從之。○又奏。陝西學政胡中藻奏請分設陝甘二省學政一摺。奉旨令臣等詢問。慶復據稱。陝甘二省遼濶。學臣未免跋涉多費時日。但該省預考生童無幾。閱卷省便是以向來督學。止係一人歲科兩試。均無貽誤等語。胡中藻所奏。毋庸議。從之。○命協辦

大學士吏部尚書來保。為大學士以吏部左侍郎宗室德沛為吏部尚書。○辛巳。

孝莊文皇后忌辰遣官祭

昭西陵。

上詣

皇太后宮問安。諭理藩院以安插青州之厄魯特內有逃走。旋經拏獲。博羅特等五人請旨正法。著派侍衛賽音圖理藩院郎中善泰即速馳驛前往青州。會同該將軍詢問伊等

逃走情由。傳集在彼投誠之厄魯特及官兵等一同觀看。將博羅特等五人即行正法。○諭軍機大臣等。據理藩院奏稱安插青州之厄魯特博羅特等約齊逃走。經官兵追趕將五人拏獲。已降旨即行正法。以昭國憲。伊等逃時。將軍額爾圖尚未丁憂。似此逆賊理應一面嚴緝。一面奏聞。拏獲時。即問明緣由。正法。乃博羅特等於九月二十七日逃走。而副都統三達色遲延許久。始行具報。又惟以錢糧咨請觀此。可知伊等全不曉事。將軍副都統俱係駐防地方大員。乃不知事之輕重。至於此極。辦理草率。實屬不合。額爾圖三達色俱著傳旨嚴行申飭。並傳諭各省駐防將軍大臣各處俱有安插此等厄魯特回人。令其密行防範。毋稍疎懈。然並非於無事時欲其過嚴。現在投誠人等俱屬安靜。若因此一事稍露形跡。伊等知覺。反生疑懼。致滋事端。亦有不便。該將軍等務宜用心妥協辦理。其未

經拏獲之厄魯特達什哈乃去歲投來。安插內地。居住一年有餘。通曉內地言語。地方情形。伊若將內道路。沿途詢知。逃回準噶爾地方。甚有關係。著開明達什哈年貌。交與兩路將軍大臣。傳諭各處卡倫。嚴行查緝。并行文直隸。山西。陝西。甘肅。四川。河南等處督撫。令其留心加緊查拏。斷勿使之鬼脫。以致逃回巢穴。俟於何處拏獲時。即速奏聞。○是日起。

上以歲暮祫祭

太廟。齋戒三日。○壬午。諭軍機大臣等。瞻對用兵之案。慶復。李質粹。以班滾焚斃。告捷撤兵。而班滾現據如郎。肆行滋事。朕原諭以俟大金川事竣之後。再行查辦。乃張廣泗辦理失於欲速。未合機宜。使事情彰著。矢在弦上。不得不發。因命將慶復革職待罪。李質粹交軍機大臣會同該部嚴訊。按律定擬。但思此案內。慶復。李質粹身為總統大員。貽誤軍機。情

罪固重。其在事捏報之宋宗璋。馬良桂。及將備人等。牽涉甚多。伊等既知此案情罪敗露。未必不心懷疑懼。於現在軍情無益。著傳諭張廣泗。令其酌量情形。如宋宗璋等。在事日久。熟悉情形。現在領兵攻剿。尚能實力奮往。可望成功。著仍留軍前。將伊等從前捏報欺罔。應行從重治罪之處。該督明白曉諭。許其戴罪圖功。以觀後效。令伊等心中豁然無疑。專一進剿。奮勇克捷。以贖前愆。若伊等並無實在出力。而軍前効用有人。如發往之任舉等。可以代伊之任。即將伊等叅革。並案內緊要人犯。一併拏解來京。歸案審結治罪。其餘情罪稍輕者。仍著明白宣諭。令其効力贖罪。軍務機宜。未便遙斷。著張廣泗詳悉籌酌。妥協辦理具奏。○又諭。各省湖河灘地。經大學士等。於乾隆九年。議令各該督撫委員詳勘。除已經報墾之地畝外。其餘蓄水之處。劃明界限。不許再行開墾。其從前已墾地畝。亦令

查明分別辦理。交部通行在案。各督撫等接到。自應遵照查辦。將該省有無此項地畝。及有此項地畝。作何分別辦理之處。分晰奏明。乃及今數載。惟直隸。福建二省奏到。其餘現有湖河灘地之各省分。俱未見其奏報。殊屬遲延。著傳諭詢問。於伊等奏事之便寄去。○軍機大臣等議覆川陝總督張廣泗奏稱金川善後事宜。經軍機大臣遵旨定議。歸入西藏管轄。但西藏終屬外藩。以塞內土司。歸其管束。形勢實有未便。莫若以治藏之法治之。番蠻最信喇嘛。請俟金川平定。設立大寺院一二所。并將伊地界所有喇嘛寺。亦畧為修葺。於京城大喇嘛內。選擇一人。帶徒衆數人。前來住持。大喇嘛所居之處。酌留副叅一員。帶兵千名。或數百名護衛。徒衆所居之處。酌留千把一員。帶兵百名。或數十名護衛。所需兵丁。於川省額兵內。輪年換班。其大金川土地。招人佃種。所收租糧。供各寺香火。餘充兵

食。再選司官一員。本省丞倅一員。隨同大喇嘛居住。田賦訟獄。聽其經理。至金川戰碁。應全行拆毀等語。查西藏皆我幅員。久沐懷柔。不得外西藏而內金川。即番俗素信喇嘛。該督欲設立寺院。令喇嘛居住。但必果能服衆。始於蠻方有益。且自京城派往。不如即在藏內選擇。其應如何鈐束之處。該督亦未籌及。辦理尚未盡善。再金川並無水田。所收青稞。僅供番蠻餬口。豈有餘糧。以資香火兵食。應令該督再為詳審。至喇嘛。如果能使羣番聽其教令。自應如所議。設立兵弁護衛。如不能鈐束。仍當另議兵防。至拆毀戰碁。係遵旨辦理之事。應如所請。得旨依議速行。○又議覆山東布政使赫赫奏請。捐職武生。有願入武闈者。准其一體考試。查捐職貢監例。得入闈武職。雖無明文。而事同一例。應如所請從之。○直隸總督暫管河道總督那蘇圖等議

覆前任漕運總督顧琮奏稱北河所築草壩應加高二三尺。來水濟運應如所請於戊辰年建築。壩座較本年所建量加高厚。築成後如有墊陷隨時加鑲報聞。○癸未以歲暮裕祭遣官祭

太廟中殿

後殿○諭軍機大臣等喀爾吉善奏常安貪婪一案經大學士高斌會同巡撫顧琮審以周宣猷等鑽營行賄七款屬虛應毋庸議惟

縱容家人李十勒索多贓常安應照例革職等語此時督撫豈有家人敢於勒索多至千有餘金而伊主全不知情之理高斌等並未將此情節細加研問嚴鞫常安若果係家人勒索確有証據毫無疑義則常安止於失察不至革職今坐以明係知情縱容遽請議革亦不足以服常安之心且果如所奏情節毫無疑義則喀爾吉善所奏過甚汚人名節即應將喀爾吉善查叅而奏內亦未議及且喀

爾吉善原奏該撫贓私狼籍今乃以家人需索從輕歸結又何以服喀爾吉善之心在高斌自非有意瞻徇常安而伊素性長厚顧琮亦立意從寬伊兩人意將該撫議革事亦兩平如訪所云和事老人者況督撫同屬封疆大吏非尋常叅劾屬員可比理無兩是則伊等勢不容並立常安無過則喀爾吉善有過若如此含糊歸結則將來督撫叅劾之案如何辦理朕以至公治天下當使曲直是非判然別白豈肯似

此模稜兩可如伊等之和事老人乎今此案若另派大臣前往審理則於朕差大學士高斌顏面攸關亦國體所係仍著高斌再行徹底研審據實具奏然高斌若再不能徹底審明此事則亦祇得另差大臣前往若彼時審出則又似慶復班滾之案朕所批云何以了局之事矣豈不可惜此處宜令高斌知之高斌曾奏臘底回京今查審唐綏祖之案尚未奏到著即寄諭前往令仍赴浙省會同顧琮查審此旨並高斌等原奏

俱諭令喀爾吉善閱看。○甲申。祫祭

太廟。

上親詣行禮。○遣官祭

永陵。

福陵。

昭陵。

昭西陵。

孝陵。

孝東陵。

景陵。

泰陵。○遣官祭

端慧皇太子園寢。○遣官祭

太歲之神。○詣

皇太后宮問安。○諭軍機大臣等。大金川逆酋

不法。現命張廣泗聲罪致討。據奏明春二三月

間。可以剋期取勝。前此瞻對跳梁。勞師動衆

幾及歲餘。此二役俱屬軍旅重務。必令天下

共見共聞者。夫國之大事。惟祀與戎。古者命

將出師。罪人既得。則執馘獻俘。我朝向曾舉
行。今此次大金川莎羅奔。負固拒命。恃其戰
礪之險。久抗王師。前此班滾狡計。兔脫俱係
兇逆渠魁。應生擒正法。以申軍律。可傳諭張
廣泗。若於交鋒之際。礮矢所加。已經授首。不
及生擒。亦只得如此辦理。如能擒執逆酋。著
拏解京師獻俘。明正典刑。如此則中外皆知
班滾現已就擒。可釋前疑。而慶復李質粹亦
益自知罪矣。著張廣泗留心遵照辦理。○又

諭大學士高斌。會同巡撫顧琮。查審常安婪
贓一案。以縱容家人勒索。定議革職。意欲合
糊兩可。從輕了結。總未能確得實情。朕已降
旨。令其再行徹底研究。今查奏唐綏祖之案。
審係全虛。則常安挾仇反噬。已見一斑。使常
安心中實無抱歉之處。而唐綏祖誣罔送款。
何難據實奏辦。否則靜候查審。虛實自明。乃
將唐綏祖捏款糾叅。本內又係擡寫年月。看
此情形。則常安心跡顯然。益足見高斌等辦

理前案之未能允協矣。督撫布政乃通省大吏。為封疆表率。今以納賄婪贓各重款。露章傳播人所共知。若不明晰是非。從重究擬。何以正官方而肅吏治。高斌於此情節。竟未能見及。況大學士有進賢退不肖之責。非顧琮可比。尤當使曲直分明。方足令人心折服。今似顛預辦理。如朕前諭所云和事老人者。其如天下公論何。高斌等著傳諭申飭。令其體悉前後諭旨。將此案並常安原案。再行研究。務得實情。分晰定擬。倘仍復含糊了事。朕必另派大臣審理。務將實情審出。前旨俱已明晰。慶復所辦班滾之案。即前車之鑒也。可諭高斌等知之。○又諭據阿里衮奏膠州營兵丁因欲借存營還穀銀兩。該副將清泰不允。兵丁鳴鐘聚集吵嚷。衆鄉紳攢銀借給各兵。始各安帖。其中為首之兵。現在密飭查拏等語。奸徒借端聚衆。於地方最有關係。況兵丁著伍食糧。非平民可比。乃因挪借聚集吵嚷。

殊屬不法。此風尤不可長。斷不得稍為寬縱。著該撫務將為首之人。逐一嚴查究審。按律定擬。不得以一二人塞責。使奸徒漏網。其情罪可惡者。或立斃杖下。令衆兵共知警懼。以申國憲。以嚴軍律。至地方鄉紳攢銀接濟。雖屬舊例相沿。究非政體。且使兵丁得借端滋事。此番業經攢湊給發。只可如此辦理。嗣後必應嚴行禁止。可傳諭該撫。令其實力稽察。該地方官毋任其陽奉陰違。以長兵驕惡習。將來如果該營兵有必資接濟情形。著該撫留心體察。酌量妥辦。○乙酉。

上詣

皇太后宮問安。○御保和殿。筵宴朝正外藩。左翼科爾沁達爾漢和碩親王羅卜藏衮布貝子品級和碩額駙達爾瑪達都鄂爾多斯多羅郡王扎穆揚。一等台吉衮布拉什。敖漢多羅貝勒羅卜藏。扎魯特多羅貝勒索諾穆喀爾喀多羅貝勒噶爾桑。一等台吉額木格爾。

齊巴克扎布。阿霸哈那爾。固山貝子班朱爾。
郭爾羅斯。鎮國公多爾濟。喀喇沁。輔國公敏
珠爾拉布坦。查拉豐阿。茂明安。一等台吉根
敦扎穆蘇。右翼。喀爾喀。車臣汗達瑪林和碩
超勇親王。固倫額駙策凌。多羅貝勒旺扎勒。
固山貝子沙克都爾扎布。鎮國公旺舒克。一
等台吉策當敦多布。旺扎勒。鄂羅特。多羅郡
王色布騰旺布。茂明安。多羅貝勒玉穆冲。鄂
爾多斯。固山貝子那穆扎勒。多爾濟。科爾沁。
輔國公色布騰班朱爾。瑪哈瑪朱爾。烏拉特。
鎮國公索諾穆扎穆薩爾。青海。輔國公達什
扎布。一等台吉薩拉。郭爾羅斯。固山額駙蘇
瑪第。及領侍衛內大臣。大學士等。召科爾沁
親王羅卜藏衮布。貝子品級達爾瑪達都。輔
國公色布騰班朱爾。瑪哈瑪朱爾。喀爾喀。車
臣汗達瑪林。親王策凌。貝勒旺扎勒。貝子沙
克都爾扎布。鄂爾多斯。郡王扎穆揚。鄂羅特
郡王色布騰旺布。敖漢。貝勒羅卜藏扎魯特。

貝勒索諾穆阿霸哈那爾。貝子班朱爾。喀喇
沁。輔國公敏朱爾。拉布坦。至

御座前。賜酒成禮。○皇七子永琮薨。○諭王大
臣等。皇七子永琮。毓粹中宮。性成夙慧。甫及
兩週。岐嶷表異。

聖母皇太后。因其出自正嫡。聰穎殊常。鍾愛最
篤。朕亦深望教養成立。可屬承祧。今不意以
出痘薨逝。深為軫悼。建儲之意。雖朕衷默定。
而未似端慧皇太子之書旨封貯。又尚在襁
褓。非其兄可比。且中宮所出。於古亦無遭殤
追贈。概稱儲貳之禮。但念皇后名門淑質。在
皇考時。雖未得久承孝養。而十餘年來。侍奉
皇太后。承歡致孝。備極恭順。作配朕躬。恭儉寬
仁。可稱賢后。乃誕育佳兒。再遭夭折。殊難為
懷。皇七子喪儀。應視皇子從優。著該衙門遵
旨辦理。送入朱華山園寢。復念朕即位以來。

敬
天勤民。心殷繼述。未敢稍有得罪。

天地

祖宗而嫡嗣再殤。推求其故。得非本朝自

世祖章皇帝以至朕躬。皆未有以元后正嫡。紹承大統者。豈心有所不願。亦遭遇使然耳。似此竟成家法。乃朕立意私慶。必欲以嫡子承統。行

先人所未曾行之事。邀

先人所不能獲之福。此乃朕過耶。此朕悲悼之餘。尋思所及。一併諭王大臣等知之。○是月。

直隸總督那蘇圖奏保定郡城於十二月十四日。得雪六寸。今冬各屬農民種麥頗多。滋培有益。得旨京師亦得霑被矣。所云六寸。未免過實。然三四寸則實有之。而且同雲密布。瑞葉紛霏。允足欣慰也。○又奏永平府屬撫寧縣城西。舊有洋河一道。自古城口至于房莊。舊築隄岸。久被山水冲刷。漸侵城市。亟應加築隄壩。據紳民等呈請願出工資修防。應令該管道府躬親相度。將編荆貯石。加椿攔

築。如式辦理。得旨覽奏俱悉。○又奏臣前奏東巡事宜內。直隸預備營馬。加給草料。管押兵丁。加給口糧一條。未經王大臣等議准。但調撥各營馬匹。遠近不同。必先期赴德州伺候。及更換回營。均需時日。請每匹預借一季乾銀。兵每名預借餉銀二兩。均分四季扣還。得旨著照所請行。○署江蘇巡撫安寧奏。江省漕糧。前後奉旨截留八十萬石。查蘇松各屬。現在賑糶需用既多。而糧額亦較重於淮揚等郡。應將江安糧道所屬之江淮揚徐海通六府州。截留二十五萬石。蘇松糧道所屬之蘇松常鎮太五府州。截留五十五萬石。各先儘災地派截。次及成熟州縣。仍按各屬需用賑糶之多寡。及倉儲之盈虛。通融撥協。得旨知道了。○調任安徽巡撫潘思渠奏。查安徽省之宿州。靈璧。虹縣。臨淮懷遠。泗州。五河等七州縣被災地方。土瘠民貧。生計艱難。即使屢豐。元氣未能驟復。新糧舊賦並輸。不免拮

揭請將乾隆五年以前未完帶徵地漕等銀五萬八千四百一十七兩零並隨正耗羨一體豁免得旨所奏是何不早奏至今始留去後之恩乎○又奏據潛山營遊擊彭肇槐申稟夫塘汛把總查出有該營遞送望江縣包封公文一角封面字跡不堪驗係假造文內詞語荒唐關防條記漢文係護封圖書砌成滿文模糊驗不成字又太湖汛查出該營遞送太湖宿松二縣包封公文四角亦係假造逐塘挨查皆從潛邑之虎頭鋪文遞隨提訊該鋪兵供稱是日出外鄰居飯鋪收存公文五角云係挑賣燈草之人所交其人素不認識係本地語音等語當飭該營縣上緊嚴緝務期必獲以戢刁風得旨應嚴查務獲重處示警仍將緝獲之處奏聞○調任湖北巡撫陳宏謀奏湖北詞訟較多地方官能於民間告案細心審斷早為歸結雖有刁健無從施其伎倆臣清理積案經今一年各屬稍知上

緊辦案咨題事件漸能限內完結至通省額徵地丁錢糧乾隆十年以前並無積欠惟十年十一年潛江等八州縣衛有未完一萬九千兩零乃因被水緩徵帶徵之項現在按限帶完且有透完分限者本年通省錢糧歲底約計已完十分之七來年奏銷之前可以全完再本標兵丁老弱漸次裁汰詳慎挑選飭將備各官加意訓練臣亦不時簡閱至湖北用錢向來大小兼用難以砂殼小錢錢價亦昂自今年開鑪鼓鑄悉鑄大錢搭放兵餉兼設官局發兌錢文官制大錢漸得流通將來小錢砂錢可以漸少得旨覽奏俱悉今命汝復為陝撫督臣遠在川省一切官方民瘼汝其加意勉為之至湖北現有應辦者告之督臣及新撫可也○湖北布政使嚴瑞龍以降級從寬留任具摺謝恩得旨自守無過實汝之長但一切認真急公之處則從未見也如是而得倖保功名以了一生者亦未多見也

汝其慎之。勿自謂得計也。○山西巡撫準泰奏本月十四日。太原省城瑞雪盈郊。遍野並據各屬陸續稟報得雪。惟永濟等十數州縣冬月前得雪甚微。今亦止一二寸。尚在望澤而麥根土膏滋潤。民情已為安慰。得旨覽奏稍慰。既有望澤之處。何為誇大之言。恐汝又存粉飾之見矣。一切應留意也。○川陝總督張廣泗奏署秦寧協副將張興駐守馬邦山梁。於扎果山梁糧運要道。並不設兵防禦。致被賊番阻截。經臣發兵援應。將賊衆擊退。已保無虞。又張興劄營之右山梁。遊擊陳禮駐守。自恃地勢陡窄。設卡堅固。賊番用石礮法安設木架。以機發石傷人。該遊擊並不先用鎗礮擊毀。以致機石齊發。我兵不能抵禦。退至山麓劄住。賊番於山梁河口堅砌石卡。堆集糧石守禦。糧運水道俱被阻塞。臣隨差署叅將王世泰前往援救。於曾達對河兩岸夾攻。遙呼張興奮力擊賊。詎張興陳禮閉營不

出。先與逆賊頭人講和。並出重貨。分散衆番。許送官兵過河。致被賊人引至右山梁溝底。俱被殺害。如此昏憤庸懦之將。不能早為覺察。臣罪奚辭。請將臣勅部嚴加議處。至川中將士怯懦至此。臣何敢輕言進兵。惟遵旨加調官兵。以為一舉掃除之計。得旨。懦將債事。豈卿所能逆料。然軍行之際。賞罰宜明。卿自行檢舉。亦是。但此時交部。必至外人盡知。益生議論。於事機無益。故且不發。俟成功之後。

交部併議。未晚也。○又奏。請加調陝西固原提標兵二千名。即令該標中軍叅將任舉前往調派統領。西寧鎮兵一千名。令大通協副將高雄統領。河州鎮兵一千名。令候補叅將王愷統領。甘州提標兵五百名。肅州鎮兵五百名。涼州鎮兵五百名。俱令金塔協副將劉順統領。延綏鎮兵七百五十名。寧夏鎮兵七百五十名。俱令潼關協副將鐵景祐統領。其應派將備千把等員。俱囑各提鎮酌派雲南


兵二千名。令鎮雄營叅將龍有印統領。貴州兵一千名。令清江協副將唐開中統領。共計派調兵一萬名。已咨移各該省督撫辦理。起程約明春三月間。可齊抵軍營。其時所鑄所請之璽亦正齊集。憑仗天威兵力。自能剋期蕩平。得旨該部知道。○又奏報咱地土司阿旺勞丁。蠻名丹津羅爾布。有異母弟阿望七立。素不相睦。於十月十二日半夜。夥衆劫殺其兄。奪去印信號紙。現在差員往查。相機辦理。得旨川省近來。何多事耶。朕甚追咎前年班滾之案。用非其人。以致釀成外夷輕視之端。卿當益策經猷。計出萬全。為一勞永逸之計。勉之。○貴州巡撫孫紹武奏。督臣張允隨任督撫已二十年。老成練達。至於苗疆情形。文武賢否。遠在滇省。原未能真知灼見。即如屯堡之設。錯雜苗寨中。可杜苗人窺伺。更足濟營汛單弱。未可輕議裁併。至古州鎮臣宋愛明白幹練。才守兼優。古州同知劉樵在黔

年久。諳悉夷情。近年以來。員弁盡易生手。而督臣以苗疆屯務。係臣從前奉委查辦。恐有迴護。且見臣論及營伍。似覺侵督臣之權。迨督臣前赴都勻等處。巡查已周。方知臣言非妄。并稱屯堡極周密妥協。至苗疆營汛。當年因地建設。惟期扼要。間有水土不甚相宜。基址不甚平坦。地勢使然。原不能一律。乃苗疆文武因少不便。輒思圖安避險。各逞臆說。混稟督臣。臣知決不可行。辯論頗切。督臣因臣爭之甚力。前議亦竟中止。得旨所言新疆情形。頗足至稱督臣懷疑之處。則是汝過用心耳。督臣並未言及汝與彼不和也。總以國家公事為先。則私心自化。責人不如責己。勉之。○貴州布政使恒文奏。黔省多產鉛礦。而礦廠轉運銅鉛。餘利甚多。前督臣張廣泗任內。向係上下通融。私相授受。並未奏明充公。迨聞愛必達授貴州藩司之信。始將銅鉛各廠餘息。奏充開河修城之用。惟是黔省正供無

多。公費有限。張廣泗。凡遇各項公用。不惜重費。多係捐貲給發。其實所用。即此項之餘息也。張廣泗在黔多年。一切苗疆吏治民生。料理整頓。日有起色。誠如聖諭。張廣泗在黔。過少功多。已在聖明洞鑒中矣。得旨。此係至公之論。目今既定章程。則前此之事。可不必論矣。○是年。旌表孝子。江蘇等省。孫夔等十九名。孝婦。程氏等四口。孝義。李陞鳳等二名。守節合例。八旗滿洲。五黑兒等妻。索佳氏等一百二十九口。蒙古保住等妻。趙氏等十八口。漢軍。蔣士俊等妻。王氏等三十二口。奉天等省。駐防。蘇英額等妻。那扎氏等九十四口。順天等省。曹河等妻。周氏等二千一百零六口。夫亡殉節。直隸等省。魏克儉等妻。王氏等三十一口。未婚守志。江蘇等省。朱鉉等聘妻。王氏等五十六口。百歲壽民。婦。山東等省。王廣業等十四名口。各給銀建坊如例。○一座三男。直隸等省。周自起等九家。○會計天

下民穀數。各省通共大小男婦。一萬七千一百八十九萬六千七百七十三名口。各省通共存倉米。穀三千二百七十三萬八千四百一十石四斗九升三合三勺

大清高宗法天隆運至誠先覺體元立極敷文奮武孝慈神聖純皇帝實錄卷之三百五



統一書號: 11018·1355—12

定 價: 47.00 元